

NUEVO TESTAMENTO

en el mixteco de Atatláhuca



La Liga Bíblica
Las Sagradas Escrituras para Todos

El Nuevo Testamento
en el mixteco de Atatláhuca

La Liga Bíblica 1M primera edición 1973 [mib]
La Liga Bíblica versión electrónica 2010

Publicado por

© La Liga Bíblica 1973

Se permite copiar, distribuir y comunicar públicamente esta obra bajo las siguientes condiciones:

- ▶ Reconocimiento. Reconozca a la Liga Bíblica los derechos que tiene en la impresión o distribución de esta obra, deslindándola de responsabilidad alguna por cualquier uso que se le de a la presente publicación.
- ▶ No comercial. No puede utilizar esta obra para fines lucrativos.
- ▶ Sin obras modificadas. No se puede alterar, transformar o generar una obra a partir de ésta.

PRÓLOGO

Este libro es la parte de las Sagradas Escrituras que constituye el Nuevo Testamento de nuestro Señor Jesucristo, el cual ha sido traducido al idioma mixteco, lengua nativa de algunos pueblos de la Mixteca Alta del distrito de Tlaxiaco, estado de Oaxaca.

El Nuevo Testamento fue escrito originalmente en el idioma griego; pero fue necesario traducirlo a otros idiomas para que todo el mundo pudiera recibir su mensaje de esperanza y de amor. En la actualidad, el Nuevo Testamento ha sido traducido a más de mil idiomas distintos.

La presente traducción al mixteco está basada en los manuscritos griegos que se conocen por el nombre de Textus Receptus. Este mismo texto fue el que usaron Casiodoro Reina y Cipriano de Valera para hacer su traducción al español en el año 1559.

Los traductores del Nuevo Testamento al mixteco, al emprender su tarea, tuvieron dos metas principales: 1) tratar de entender a fondo el significado del texto griego original, consultando varios comentarios importantes; y 2) tratar de comunicar este significado lo más natural y claramente posible en el idioma mixteco. Para realizar esta labor, los traductores contaron con la valiosa cooperación de varios habitantes nativos del área mixteca, por lo cual desean expresar su más profunda gratitud por la paciente y dedicada colaboración en esta importante obra.

Hay algunas palabras griegas que tienen un significado muy complejo y no se pueden traducir al mixteco con una sola palabra. Es por eso que en ocasiones ha sido necesario expresar estas palabras por medio del uso de dos o tres palabras mixtecas, o usar frases descriptivas más largas para expresar mejor el significado exacto del texto original.

La gramática del griego es muy diferente a la del mixteco, y las figuras y formas retóricas griegas a veces no se adaptan bien a la expresión en otras lenguas. Así que los traductores han tratado de expresar estas formas de manera que sean naturales en el mixteco. Para lograr esto, han preferido usar la construcción, el orden de las oraciones, las figuras retóricas y el estilo propio del mixteco, en vez de las del griego o español. En algunos casos, para facilitar su comprensión, han optado por explicar en detalle y claramente las informaciones que el manuscrito griego sólo implica, ya que

los lectores de la antigüedad entendían a que se referían sus escritores, por tratarse de su propia cultura.

El Nuevo Testamento ha sido el libro más leído de todos los tiempos, pues despierta el interés de todas las personas, no importan su edad, nacionalidad o raza. La vida de los personajes narrada en sus páginas y las enseñanzas que contiene han servido de inspiración y guía en la vida de millones de personas. Esperamos que la lectura de este libro sea de beneficio para ustedes y que les ayude a ser mejores personas, mejores mexicanos y mejores ciudadanos del mundo, cuando lleguen a comprender el significado de su eterno mensaje.

ÍNDICE

SAN MATEO	1
SAN MARCOS	66
SAN LUCAS.....	106
SAN JUAN	174
HECHOS	224
ROMANOS.....	289
1 CORINTIOS.....	316
2 CORINTIOS.....	341
GÁLATAS.....	358
EFESIOS	368
FILIPENSES.....	377
COLOSENSES.....	384
1 TESALONICENSES	390
2 TESALONICENSES	396
1 TIMOTEO.....	399
2 TIMOTEO.....	407
TITO	412
FILEMÓN	415
HEBREOS.....	417
SANTIAGO.....	437
1 PEDRO	444
2 PEDRO	452
1 JUAN	457
2 JUAN	464
3 JUAN	466
JUDAS	468
APOCALIPSIS.....	471

JNUHUN VAHA NI TEE SAN MATEO

Lista ñayuu yucūn jeē ní quiji

Jesucristo

(Lc. 3.23-38)

1 Yāha cúu lista ñayuu yucūn jeē ní quiji Jesucristo. Te máá yá ni quiji nuū yucūn rey David, te David ni quiji nuū yucūn Abraham.

²Abraham ni cuu de tátá Isaac, te Isaac ni cuu de tátá Jacob, te Jacob ni cuu de tátá Judá jíin táca ñani i. ³Te Judá ni cuu de tátá Fares jíin Zara, te náná ndindúú i ni cuu Tamar. Te Fares ni cuu de tátá Esrom, te Esrom ni cuu de tátá Aram. ⁴Te Aram ni cuu de tátá Aminadab, te Aminadab ni cuu de tátá Naasón, te Naasón ni cuu de tátá Salmón. ⁵Te Salmón ni cuu de tátá Booz, te náná i ni cuu Rahab. Te Booz ni cuu de tátá Obed, te náná i ni cuu Rut. Te Obed ni cuu de tátá Isaí. ⁶Te Isaí ni cuu de tátá David, tēe ni cuu rey. Te rey David ni cuu de tátá Salomón, te náná i, xihna gā ni cuu ña ñasihí Urías.

⁷Te Salomón ni cuu de tátá Roboam, te Roboam ni cuu de tátá Abías, te Abías ni cuu de tátá Asa. ⁸Te Asa ni cuu de tátá Josafat, te Josafat ni cuu de tátá Joram, te Joram ni cuu de tátá Uzías. ⁹Te

Uzías ni cuu de tátá Jotam, te Jotam ni cuu de tátá Acáz, te Acáz ni cuu de tátá Ezequías. ¹⁰Te Ezequías ni cuu de tátá Manasés, te Manasés ni cuu de tátá Amón, te Amón ni cuu de tátá Josías. ¹¹Te Josías ni cuu de tátá Jeconías jíin táca ñani i, máá tiempo jeē cuángoo ñayuu Israel preso nde ñuu Babilonia.

¹²Te náa cáyūcú i yūcuán, te Jeconías ni cuu de tátá Salatiel. Te Salatiel ni cuu de tátá Zorobabel. ¹³Te Zorobabel ni cuu de tátá Abiud, te Abiud ni cuu de tátá Eliaquim, te Eliaquim ni cuu de tátá Azor. ¹⁴Te Azor ni cuu de tátá Sadoc, te Sadoc ni cuu de tátá Aquim, te Aquim ni cuu de tátá Eliud. ¹⁵Te Eliud ni cuu de tátá Eleazar, te Eleazar ni cuu de tátá Matán, te Matán ni cuu de tátá Jacob. ¹⁶Te Jacob ni cuu de tátá José, tēe ni cuu yii María. Te María ni cuu ña náná Jesús, Yaā naní Cristo.

¹⁷Te nde Abraham te nde David ni iyo uxí cuūn yucūn. Te nde David te nde náa cuángoo ñayuu Israel preso ñuu Babilonia ni iyo inga uxí cuūn yucūn. Te nde ná ni jengoo i preso te nde ni cacu Cristo, suni ni iyo inga uxí cuūn yucūn.

Jeē ní cacu Jesucristo*(Lc. 2.1-7)*

¹⁸Te jeē ní cacu Jesucristo, súcuan ni cuu: Náná yā María, je ni cundaā jeē quijnáhan ña jíín José. Te nde ná tu quijnáhan ña jíín de, te ni jecūhun séhe ña ni sáha Espíritu Santo. ¹⁹Te José, tēe quijnáhan ña jíín, chi tēe ndaā cúu de. Te tu ní cúní de cuáha de jñūhun canu ña, chi sa cúní de jeē na jécuiñī sáhi jēē ma quijnáhan de jíín ña. ²⁰Te níín súcuan nácani ni de, te jíín jéni ni quee-ni iin ndajéhé maá Jítoho yō Yaā Dios nuū de, te ni cahān yā jíín de:

José, sēhe yucūn David, ma yūhu ró cueca ró ñasihí ró María, chi sēhe jeē scácu ña, vēji i nde nuū maá Espíritu Santo. ²¹Te scácu ña iin sēhe yíí. Te snání ró i Jesús, chi máá i cúu Yaā jnama ñayuu nuū cuéchi i, áchí ndajéhé.

²²Súcuan ni cuu tācá jniñu yáha, návaha squícu jñūhun Jítoho yō Yaā Dios jeē ni cáhān tēe ni nacani jñūhun ya nde jenahán. Te suhva ni cahān de:

²³Coo iin sūchi síhí, te nihīn séhe i, te scácu i iin sēhe yíí, te conaní sūchí un Emanuel. Achí tutu. Te síhví yáha cúní cahān: Yaā Dios ndeé yá jíín yó.

²⁴Te ni natahū ni José, te ni sáha de nájñūhun ni cahān ndajéhé Jítoho yō jíín de. Te ni jeca de María ni cuu ña ñasihí de. ²⁵Te tu ní quíxí de jíín ña, chi nde ni scácu ña sēhe yíí núú ña. Te ni snaní de i Jesús.

Jeē ní quijicoo tēe mago nuū yā

2 Te ná ni cacu Jesús ini ñuu Belén ndañúú Judea, te

tiempo un ndácu rey Herodes jniñu. Yūcuán na te jecu tēe ndíchí jēē cascuáha siquī quími, ni quijicoo de nde jicá, ichi nuū cáne niāndii, te ni jinūcoo de ñuu Jerusalén. ²Te ni cacajñuhún de ñayuu:

¿Ndé nuū íne sūchí jeē ní cacu jeē coo rey ñayuu hebreo? Chi ichi núú cáne niāndii ni cajito ná iin quími cáhnu jeē cúu seña jeē ní cacu i. Te vējicoo ná chiñuhún ná i, áchí de.

³Te rey Herodes, ná ni jini de jñūhun yáha, te ni cunéé ni de, nde jíín táca ñáyuu ñuu Jerusalén. ⁴Te ni nastútú de tāca sūtū cácujuhnu jíín tēe cástéén tutu ley Yaā Dios nuū ñáyuu. Te ni cajñuhún de tēe un ndé nuū cacu Cristo achí tutu.

⁵Te ni cacachi nuū de:

Ini ñuu Belén ndañúú Judea. Chi suhva cáhán nuū tútu ni tee tēe ni nacani jñūhun ya nde jenahán:

⁶Te róhó ñáyuu ñuu Belén ndañúú Judá, cújéhnu ga ñuu rō vēsú tāca gá jeē cújéhnu ini Judá. Chi suu ini ñuu rō quenda iin Yaā ndacu jniñu, te coto ya ñayuu maá rí Israel, achí Yaā Dios.

Achí tutu.

⁷Yūcuán na te Herodes ni cana sáhi de tāca tēe ndíchí un jēē naní mago. Te ni cajñūhun yúcún de ndé quíví ní cane quími ún. ⁸Te ni tají de tēe un quíngoo de ñuu Belén. Te ni cahān de:

Cuángoo ní te cajñūhun yúcún ní ndé nuū íne sūchí lúlí un. Te núu ni nanihīn ní i, te quijicoo ní castūhun ní nuū ná, návaha suni máá ná quichiñuhún ná i, áchí rey.

⁹Te jeē ní cajini de jñūhun ni cahān rey, te cuangoo de. Te máá

quími cáhnu jeē ní cajito de ichi núu cáne niāndii, yósnúu núu de cuahān nde ni jinū nuū íne sūchi lúlí un, te yūcuan ní jecuiñī. ¹⁰Te ná ni cajito de jeē ní jecuiñī quími ún, te yōhyo ni cacusiñī ni de. ¹¹Te ni jinūcoo de ni quīvícoo de ini vehe, te ni cajito de nuū sūchi lúlí un jíin náná i María. Te ni cajecuiñī yití de nuū i, te ni cachiñúhún de i. Te ni canune de yejnū de, te ni casocō de oro jíin sūje cútú jíin sūje uvuā nuū i. ¹²Yūcuán na te ni scóto jēni de, ni cachi nuū de jeē ma nuhún de nuū Herodes. Te inga ichi cuanuhun de ñuu de.

**Jeē ní jinu José cuangoo
de nación Egipto**

¹³Te náa cuánuhun tāca tée mago, te ni scóto jēni José jeē ñin ndajéhé maá Jítóho yō Yaā Dios ni cahān yā jíin de:

Ndocuiñī te cunu ró quíngoo ró jíin sūchi lúlí jíin náná i nde nación Egipto. Te yūcuán coyūcu ró nde castūhun rí nuū rō. Chi Herodes je yajni nanducú de sūchi lúlí jíin jeē cáhni de i. Achí yá.

¹⁴Te ni natahū ni José. Te cuangoo de jíin sūchi lúlí jíin náná i, te ñuu ní cajica de cuangoo de nación Egipto. ¹⁵Te ni coyūcú de yūcuan ndé ni jihī Herodes. Te sūcuan ni cuu návāha squícu jnūhun Jítóho yō Yaā Dios jeē ni cáhān tēe ni nacani jnūhun ya nde jenahán: Nde nación Egipto ni cana ri Sēhe ri vēji i, achí Yaā Dios, achí tutu.

**Jeē ní ndacu Herodes jniñu jeē
na cúu tāca sūchi yíí lúlí**

¹⁶Yūcuán na te Herodes ni jini de jeē sūcuan ni castáhú tée mago un

de, te yōhyo ni quitī ni de. Te ni tají de soldado cuangoo, te ni cajehni tāca sūchi yíí lúlí jeē uú cuiyā jíin jeē yiquín gá jeē cáyūcú ini ñuu Belén jíin tāca ñuu yajni. Chi je ni cajnūhun yúcún de tāca tée mago un nasaa tiempo ni cuu jeē ní cacu Jesús. ¹⁷Te sūcuan ni squícu jnūhun ni cahān Jeremías, tēe ni nacani jnūhun Yaā Dios nde jenahán, chi ni cahān de:

¹⁸Ini región Ramá ni jini sōho ri jeē cándahyū te cándahyū cohó. Chi ñahan cácuu yucūn Raquel, cándahyū ña jehē séhe ña, te tu cácuñi ña ndusiñī ni ña, chi ni cajihī i.

Achí tutu.

¹⁹Yūcuán na te ni jihī Herodes. Te ni scóto jēni José jeē ñin ndajéhé Jítóho yō Yaā Dios ni cahān yā jíin de nuū ndeé de nación Egipto. ²⁰Te ni cahān yā jíin de:

Ndocuiñī te nuhun rō ñuu rō Israel jíin sūchi lúlí jíin náná i. Chi je ni cajihī tēe cánducú cahni sūchi lúlí jíin nuú. Achí ndajéhé.

²¹Yūcuán na te ni ndocuiñī de, te cuanuhun de nación Israel jíin sūchi lúlí jíin náná i. ²²Te ni nihīn de jnūhun jeē Arquelao ni nucuiñī de nuū tatá de Herodes, te máa de ndácu jniñu región Judea. Te ni yūhú de nuhun de yūcuán. Te ni scóto jēni de jeē na quíhín de región Galilea, te cuangoo de. ²³Te ni jinū de yūcuán, te ni coyūcú de ñuu naní Nazaret. Sūcuan ni cuu návāha squícu jnūhun ni cacahān tēe ni canacani jnūhun Yaā Dios nde jenahán. Chi ni cacachi de jeē cahān ñayuu jeē tēe ñuu Nazaret cúu Jesús.

Jnūhun Juan tēe scuándute*(Mr. 1.1-8; Lc. 3.1-9, 15-17; Jn. 1.19-28)*

3 Te ni yāha tiempo, te ni jinū Juan tēe scuándute nde nuū ñūhun téhé ndañū Judea, nacani de jnūhun suhva:

²Nacani ni rō jijnáhan rō jēe stóo rō cuéchi rō, chi je ni cuyajni Yaā ndeé andiví jēe ndacu ya jniñu nuū rō. Achí de.

³Te Isaías, tēe ni nacani jnūhun Yaā Dios nde jenahán, suhva ni tee de jnūhun Juan nuū tútu:

Coo iin tēe cana jee nde nuū ñūhun téhé:

Sátūhva rō máá rō jijnáhan rō, chi quee maá Jítóho yō.

Te sáha rō jniñu ndaā, chi vēji ya, achi de.

Achí Isaías.

⁴Te sahma ñūhun Juan cúu ixi quití nání camello, te núhni iin cinturón ñi chiji de. Te jeē técu de cúu táca ndicuéhyí jíin ndúxi yocō. ⁵Te ñayuu ñuu Jerusalén jíin táca ñayuu región Judea jíin ñayuu yúcu yajni yuyúte Jordán, ni quijicoo i nuū de. ⁶Te ni canacani ndaā i cuéchi i nuū Yaā Dios, te ni scuándute de i ini yūte Jordán.

⁷Te ná ni jito de jeē vējicoo cuehē tēe grupo fariseo jíin tēe grupo saduceo nuū scuándute de, te ni cahān de jíin:

Va sēhe coō cácuu rō, chi xeēn rō nájñūhun coō. ¿A cájeni ni rō jeē cuu cunu rō cācu rō núū castigo xeēn jeē quíji? ⁸Núu súcuan te sáha rō jniñu váha, te súcuan stéén rō jeē ní canacani ndije ni rō jeē stóo rō cuéchi rō. ⁹Te ma cáni ni rō cahān rō jeē cuu cācu rō síquī

jeē cácuu rō yúcūn Abraham. Chi cáhán rī jíin rō jeē cuu sáha Yaā Dios jeē táca yúū yáha nduu sēhe Abraham jeē candíje váha, te núu cúní yā. ¹⁰Te cácuu rō nájñūhun nundéhé jeē tu jéhe ndehē váha. Te vijna je íyó túhva Yaā Dios jeē cuáha ya castigo xeēn, nájñūhun je íyó túhva iin cāa jeē cahnde nde yoho yujnu. Núu súcuan te sáha ya jíin rō nájñūhun jíin táca yujnu jeē tu cúun ndehē váha, jeē tahndé te cayū nuū ñuhún. ¹¹Te ruhū chi jíin ndute scuándute ri rohó, te yūcuan cúu jeē steén rō jeē ní canacani ni rō jeē stóo rō cuéchi rō. Te Yaā jeē quíji, chi nájñūhun scuándute ya rohó cúu jeē cuáha ya Espíritu Santo condee ini anuá rō, te poder yā cúu nájñūhun ñuhūn. Te Yaā quíji chi cújéhnu ndasí yá. Chi tú na vé jéhnu cuítí cúu ri nuū yā, ni jeē cuajniñu ri nuū yā vēsú iin jniñu lúlí gá nájñūhun jeē quénehen ri ndijēn yā. ¹²Te sáha ya nájñūhun sáha tēe scánda trigo, chi sásíin ya ñayuu váha jíin ñayuu cunéé, nájñūhun cúndoo trigo jeē quénda síin paja. Te nastútú yá trigo yā ndiví ini yacā yā. Te paja chi jnaa yā nuū ñuhún jeē ma ndahvá cuítí. Achí Juan.

Jeē ní jendute Jesús*(Mr. 1.9-11; Lc. 3.21-22)*

¹³Yūcuán na te ni quenda Jesús región Galilea, te ni quee yā yūte Jordán nuū íne Juan, návaha scuándute de ya. ¹⁴Te tu ní cúní Juan scuándute de ya, chi ni cahān de jíin yá:

Sa suhva cánuú jeē scuándute máá ní sãhá, ¿te ndese cúu jeē sa nuū ná vēji ní? áchí de.

¹⁵Te ni cahān Jesús jíin de:

Tuú chi sáha ró, chi súcuan cánuú squícu yó táca jniñu ndácu Yaā Dios, achí yá.

Yūcuán na te ni scuándute de ya. ¹⁶Te ná ni cuu ni jendute Jesús, te ni quenda ya nuū ndúte. Te ni nune-ni andíví, te ni jito ya jeē cúun Espíritu Yaā Dios vēji, te cáa nájnūhun iin paloma, te ni quee xiní yā. ¹⁷Te ichi ándiví ni cahān iin jnūhun:

Yāha cúu Sēhe ri jeē maní ndasí rí jíin, te yōhyo cúsiī ni rí jíin, achí.

Jeē ní jito ndee jexeén Jesús

(Mr. 1.12-13; Lc. 4.1-13)

4 Yūcuán na te ni jinū Jesús nde nuū ñúhun téhé ní sáha Espíritu Santo. Te yūcuán coto ndee jexeén yā, chi cúní jeē sáha ya cuēchi.

²Te ni iyo ndite ni yā uū xico nduú uū xico ñuú, sáá te jíí yā sōco.

³Te ni quee maá jéxeén jeē coto ndee un yá, te ni cahān jíin yá:

Núu máá ró cúu Sēhe Yaā Dios, te cahān rō jeē yuū yúcu yáha na ndúu staā caji rō, achí.

⁴Te ni cahān yā jíin:

Tuú chi yósó núū tútu ii: Nasūu máni máá jíin stáa cátecu ñayuu, chi suni jíin táca jnūhun cáhán Yaā Dios, achí yá.

⁵Yūcuán na te cuahān jexeén un jíin yá nde ñuu iī Jerusalén. Te ni jeni ya xiní torre templo. ⁶Te ni cahān jíin yá:

Te núu Sēhe Yaā Dios cúu ró, te síngava ró máá ró nde nuū ñúhun, chi jnama ya rohó. Chi yósó núū tútu:

Tejníñu ya ndajéhé yā quijicoo coto rōhó.

Te cunundee yā rohó jíjnáhan ya, návāha ma cáchihi ró jéhē rō nuū yuú.

Achí tutu. Achí jexeén.

⁷Te ni cahān Jesús:

Tuú chi suni yósó núū tútu jeē ma coto ndee ñayuu Jítoho i Yaā Dios, núu jnama ya i chí tuú, achí yá.

⁸Te jexeén un ní jeca tucu ya cuahān jíin yá nde xiní iin yucu súcún ndasí. Te ni steén táca nación níí cáhnu ñayívi núū yā, te yōhyo luu cáa ndíhi. ⁹Te ni cahān jíin yá:

Táca ñuu yáha cuáha ri nuū rō, te núu cuiñi yítí ró chíñúhún ró ruhū, achí.

¹⁰Yūcuán na te ni cahān Jesús nuū jexeén:

Satanás, cujiyo quihīn rō, chi yósó núū tútu jeē chíñúhún ñayuu maá Jítoho i Yaā Dios, te nuū maá-ni ya cuajníñu i. Achí yá.

¹¹Yūcuán na te ni cujiyo-ni jexeén un cuahān. Te ni quecoo ndajéhé Yaā Dios ni cajejníñu nuū yā.

Jeē ní quejéé Jesús nácani ya jnūhun región Galilea

(Mr. 1.14-15; Lc. 4.14-15)

¹²Te ná ni nihīn Jesús jnūhun jeē íne Juan vecāa, te cuanuhun yā región Galilea. ¹³Te tu ní cóndee yā ñuu Nazaret, chi ni jehēn yā ni condee yā ñuu Capernaum. Te ñuu un íne yumar, máá región Zabulón jíin Neftalí. ¹⁴Te súcuan ni squícu jnūhun ni tee Isaías, tēe ni nacani jnūhun Yaā Dios nde jenahán:

¹⁵Región Zabulón jíin Neftalí,

ichi jeē yíhi yumar, lado yūte
Jordán nuū cáne niāndii,
jíin región Galilea nuū cáyūcú
ñayuu tācá nación tu jíiní
jnūhun ya.

¹⁶ Ñayuu ún chi nájnūhun cáyūcú i
nuū néē,
te coto i nájnūhun iin luz cáhnu.
Te ñayuu je yajni naa, nihin i
jnūhun váha ndasí,
suu jnūhun jeē jnama ya anuá i.
Achí Isaías.

¹⁷ Te nde quiví yúcuan ní quejéé
Jesús nácani ya jnūhun, te ni cahān
yā sulhva:

Nacani ni rō jijnáhan ró jéē stóo
ró cuéchi ró, chí je ni cuyajni Yaā
ndeé andiví jéē ndacu ya jniñu nuū
rō, achí yá.

Jeē ní cana ya cuūn tēe jnái chācá
(Mr. 1.16-20; Lc. 5.1-11)

¹⁸ Te jíca Jesús yumar Galilea
cuahān yā. Te ni jito ya nuū úú
jnáhan ñani. Te iin de cúu Simón
jeē suni nání Pedro, te inga de cúu
Andrés. Te tēe cájnií chācá cácuu
de, te cásinga de ñunu de ini mar.

¹⁹ Te ni cahān yā jíin de:

Condiqūin ruhū na quíhín yō, te
nasáha ri rohó tēe nihin cuehē
ñayuu candíje ruhū, nájnūhun
cānihin rō chācá, áchí yá.

²⁰ Yūcuán na te ni castóo-ni de
ñunu de, te ni candiquin de ya.

²¹ Te ni jíca ya jecu gā, te ni jito ya
nuū inga uū jnáhan ñani. Te cácuu
de Jacobo jíin Juan, sēhe Zebedeo.
Te cáyūcú de ini barco jíin tátá de
Zebedeo, cánachijní de ñunu de. Te
suni ni cana ya de jeē cóndiquin de ya.
²² Te ni castóo-ni de tátá de jíin barco,
te ni candiquin de ya cuango de.

Jeē ni stéén yā nuū cuehē ñayuu
(Lc. 6.17-19)

²³ Te ni jíca cuu Jesús ní región
Galilea, ni steén yā jnūhun ini
tācá vehe ií jeē cúu sinagoga. Te
ni nacani ya jnūhun váha ndese
ndácu Yaā Dios jniñu. Te ni
nasávāha ya ñayuu cácuu tācá-ni
cuehyí. ²⁴ Te ni jitē núu jnūhun ya
cuahān ní región Siria. Te nuū yā
ni caquindeca i tāca ñayuu cácuu,
ñayuu cándoho tijni nuū cuehyí,
jíin jéé jetú, jíin jéé ñūhun tachí
ini, jíin jéé jihí yíhí, jíin jéé ni íjin.
Te ni nasávāha ya i jijnáhan i. ²⁵ Te
cuehē ñayuu región Galilea jíin
Decápolis, jíin ñayuu ñuu Jerusalén
jíin región Judea, jíin tāca ñuu ichi
núu cáne niāndii yūte Jordán, ni
cacondiquin i ya.

Jeē ní nacani ya jnūhun nde nuū yúcu

5 Te ni jito Jesús nuū ñayuu
cuehē. Te ni caa ya yucu
cuahān yā, te ni cucōo ya. Te tēe
cáscuáha jíin yá, ni jinūcoo de nuū
yā yūcuán. ² Te ni quejéé yá ni steén
yā tāca jnūhun yáha nuū de:

Jnūhun yōhyo ndetū
(Lc. 6.20-23)

³ Yōhyo ndetū ñayuu jeē cánacuni
i jeē tu íyó váha ánuá i siquí cuéchi
i, chí je ni quivicoo i ndaha Yaā
andiví jéē ndácu ya jniñu nuū i.

⁴ Yōhyo ndetū ñayuu cácuu íhyá
ni, chí ndusiñi ni i sáha Yaā Dios.

⁵ Yōhyo ndetū ñayuu cáhiyo vitá
suchí ini, chí ni jejnūhun ya jeē
cutahū i ñayiví.

⁶ Yōhyo ndetū ñayuu jeē
nájnūhun jeē cájii i sōco cájichí i,

súcuan jnāā i sáha i jniñu ndaā, chi máá yá chindéé ñáhán yá i jeē cuu sáha i.

⁷Yōhyo ndetū ñayuu cákundáhú ni jnáhan, chi suni cundáhú ni Yaā Dios i.

⁸Yōhyo ndetū ñayuu cáhiyo ndoo ini anuá, chi coto i nuū Yaā Dios.

⁹Yōhyo ndetū ñayuu cánasámani jnáhan, chi cahān Yaā Dios jeē sēhe ya cácuu i.

¹⁰Yōhyo ndetū ñayuu jeē cájito xeēn inga ñayuu i siquī jeē casáha i jniñu ndaā, chi je ni quīvícoo i ndaha Yaā andiví jéé ndácu ya jniñu nuū i.

¹¹Yōhyo ndetū maá ró jijnáhan ró núu cácahān neé i nuū rō jeē siquī ruhū, te coto xeēn i rōhó, te stáú yáhu i rōhó, vēsú tú cuēchi ró. ¹²Na cúsiñi ni rō jijnáhan ró núu súcuan, te sa víhyá gā cusīñi ni rō, chi cáhnu ndasí coo tahū rō nde andiví. Chi suni súcuan ni cajito xeēn i tāca tée ni canacani jñūhun Yaā Dios jeē ní quijicoo xīhna gā vēsú rohó.

Jñūhun yátá siquī ñiñi jín siquī luz

(Mr. 9.50; Lc. 14.34-35)

¹³Máá ró jijnáhan ró cájejnīñu ró ini ñayīví nájñūhun jéjnīñu ñiñi nuū cúñu návāha tú tehyū. Te núu ñiñi ún na náā jeē uhvuá, éte ndese nduu uhvuá tucu? Tuá cuajñīñu cuítī gā, chi sa cate ñayuu te cueñū i siquī.

¹⁴Máá ró cácuu nájñūhun luz jeē steén ini anuá ñayuu ñayīví. Te cácuu ró nájñūhun ñiñi nuū íne xini yúcu, jeē ma cúu quisāhí. ¹⁵Te ni tu nástīñi ñayuu ñiñi lámpara te chune i chíji cajón, chi sa suhva jéni i nuū sucún, návāha cundijin

nuū tāca jéé cáyūcú ini vehe. ¹⁶Te suni súcuan na stéén rō luz maá ró nuū tāca ñáyuu, te suu cúu jeē cúni i jniñu váha casáha ró, te cahān i jeē yóhyo vāha Yaā cúu Tátá rō jeē ndeé yá andiví.

Jeē ni stéén yā siquī ley Yaā Dios

¹⁷Ma cáni ni rō jijnáhan ró jéé véji ri snáā rī ley jeē ni jéhe Yaā Dios nuū Moisés, jíin jéé snáā rī tāca jñūhun ni cacahān tée ni canacani jñūhun ya jenahán. Tú véji ri jeē snáā rī, chi sa suhva jeē steén cají rī jñūhun ndíso. ¹⁸Chi jendaá cahán rī jíin ró jeē núu níni íyó andiví jíin ñayīví, te ma náā cuítī ni ñiñi punto ni ñiñi letra nuū tútu ley yā, chi nde na squícu tācá ndiñi jñūhun jeē cahán. ¹⁹Núu súcuan te núu ñiñi ñayuu tu squícu i ñiñi jñūhun yáha jéé ndácu ley yā, vēsú ñiñi jñūhun lulí gá cúu, te núu stéén i jeē suni súcuan sáha sava ga ñayuu, núu súcuan te cuu i ñayuu núu ga ichi andiví nuū ndácu Yaā Dios jniñu. Te núu ñiñi ñayuu squícu i te stéén i jeē squícu ñayuu, yūcuán na te cujéhu i ichi andiví nuū ndácu Yaā Dios jniñu. ²⁰Chi cáhán rī jíin ró jeē núu tú coo ndaā gā jniñu casáha ró vēsú jniñu casáha tée cástéén tutu ley yā jíin tée grupo fariseo, te ma quívicoo cuítī rō ndaha Yaā andiví jéé ndacu ya jniñu nuū rō.

Jeē ni stéén yā jeē ma quití ni yō

(Lc. 12.57-59)

²¹Je ni cajini ró jñūhun ni cacahān jíin ñáyuu jenahán, jeē ma cáhni i ndiyí, te na-ni ñayuu núu cahni i ndiyí, te cundaā cuēchi

i nuū tāca tóhō, achí. ²²Te ruhū chi cáhán rī jín ró, vésú núu máá jéé quití ni iin ñayuu jító i jnáhan i, suni cundaā siquī cuéchi i ún. Te núu iin ñayuu cahān neé i nuū jnáhan i, núu súcuan te cundaā cuéchi i un núu justicia kujéhu ga. Te núu iin ñayuu cahān i nuū jnáhan i: Róhó jéé canéé íí, achi i, núu súcuan te quívi i nuū ñuhún infierno te núu ma nácani ni i.

²³Jeē yúcuan te núu ni jinū rō nuū altar jín jéé socó rō nuū Yaā Dios, te núu ni nucūhun ni rō jeē ni sáha ró cuéchi siquī jnáhan ró, ²⁴núu súcuan te squéndōo ró jéé socó rō ún xiin altar, te xihna gā quihīn rō ndumanī rō jín jnáhan ró. Yūcuán na te nandicó ró socó rō.

²⁵Te núu iin ñayuu quihīn i jín ró nuū tohó jeē cacān i cuéchi siquī rō, núu súcuan te níní cuáhān rō jín i ichi te sándaā maá ró jín i, návāha ma squívi i róhó núu juez. Chi juez siáha de róhó núu policía, te chune de róhó vecāa. ²⁶Te jendaá cahán rī jín ró jeē ma quénda cuítí rō yūcuán, chi nde chunaa rō ndihī cuítí xūhun jéé cájicān de.

**Jeē ni stéén yā jeē ma
cósiquí ndéē jnáhan**

²⁷Ni cajini ró jnúhun ni cacahān jenahán jeē ma cósiquí ndéē jnáhan ñayuu. ²⁸Te ruhū chi cáhán rī jín ró jeē núu iin tēe ndéhe de nuū iin ñahan jeē ndíyo ni de ña, yūcuán na te je ni casíquí ndéē de ñahan ún ini anuá de.

²⁹Núu súcuan te núu tinūu lado váha ró sáha jeē quívi ró cuéchi, váha ga quenehen ró te scáne ró, návāha tuá sáha ró cuéchi.

Chi váha gā jeē náā iin tinūu ró vésú jeē cóo ndihī yiqui cúñu rō te quihīn rō infierno. ³⁰Te núu ndaha váha ró sáha jeē quívi ró cuéchi, váha ga cahnde rō te scáne ró, návāha tuá sáha ró cuéchi. Chi váha ga jeē náā iin ndaha ró vésú jeē cóo ndihī yiqui cúñu rō te quihīn rō infierno.

**Jeē ni stéén yā jeē ma ndusín
jnáhan**

(Mt. 19.9; Mr. 10.11-12; Lc. 16.18)

³¹Te suni ni cacahān nde jenahán: Núu ndé iin cúní stóo ñasihí, te na cuáha acta nuū ña jeē ndusín jín ña. ³²Te ruhū chi sa cáhán rī jín ró jeē núu iin tēe stóo de ñasihí de, te núu nasūu jéé tǎjni ni ña, núu súcuan te sáha de jeē casíquí ndéē ña de, chi condee ña jín inga tēe. Te núu iin tēe condeca de ñahan ní ndusín, suni casíquí ndéē de ña.

**Jeē ni stéén yā siquī
jnúhun jéjñuhun téyí**

³³Te suni ni cajini ró jnúhun jeē ni cáhán jín ñayuu nde jenahán: Núu ni jejnūhun téyí ró jeē squícu ró, jító jínúu Yaā Dios, núu súcuan te cánuú squícu ró jéé ni cáhán teyí ró un, achí. ³⁴Te ruhū chi cáhán rī jín ró jijnáhan ró jeē ní iin siquī jníñu ma cahán teyí ró nde jín sǎhví Yaā Dios, ni ma cahán teyí ró jeē jító jínúu yā. Te núu jéjñuhun téyí ró te tú váha jeē ndácunehen ró andíví ni ñayíví. Chi andíví cúu nuū ín mesa nuū ndácu Yaā Dios jniñu. ³⁵Te ñayívi cúu nájnūhun teyū nuū ín jehē yā. Te ni ma ndácunehen ró ñuu Jerusalén, chi suu cúu ñuu

maá Yáa cúu Rey cujéhu. ³⁶Ni ma cahán rō jeē na cóndee cuēchi siquī rō núu tu squícu ró. Ma cahán rō súcuan, chi ma cúu cuíti sáha rō jēē ni ñi ixi xíní rō nducujín chí ndujnúú. ³⁷Chi suhva-ni cahán rō: Cuu, achi rō. Tuú, achi rō. Chi núu chisóó gá rō jnūhun cahán rō, te nuū jexeén vēji.

Jeē ni stéén yā jeē ma cuáha yó jēē ndútahū ñayuu

(Lc. 6.29-30)

³⁸Ni cajini ró jnūhun jeē ni cahán jíin ñayuu jenahán: Núu ñi tēē ndahva de tinūu jnáhan de, suni súcuan na ndáhva tinūú de. Te núu ñi tēē stáva de jnūhun jnáhan de, suni súcuan na stáva jnūhun de, áchí. ³⁹Te ruhū chi sa cahán rī jíin ró: Ma nácuāha ró jēē ndútahū tēē sáha ndevāha jíin ró. Chi sa núu ndé tēē cani de yiqui núú lado váha ró, te váha ga suni cuāha ró ñga lado cani de, vēsú jeē nácuāha ró jēē ndútahū de. ⁴⁰Te núu ndé tēē stáú yáhu de rōhó te quēnde de camisa rō, suni cuāha ró jnūhun jeē na quíhín de jíin ndé ticāchi ró. ⁴¹Te núu ndé tēē scāca de rōhó jēē condiso ró ndajníñu de ñi kilómetro, te caca ró úú kilómetro jíin de. ⁴²Te na-ni ñayuu núu jíicán i ndajníñu ró, te cuāha ró núu i. Te ñayuu jíicán núu ndajníñu nuū rō, ma sasáhán ró cuāha ró núu i.

Jnūhun jeē cundáhú ni yō ñayuu cájito uhū yohó

(Lc. 6.27-28, 32-36)

⁴³Te suni ni cajini ró jnūhun jeē ni cahán nde jenahán: Cundáhú ni rō ñayuu cáhiyo maní jíin ró, te

coto uhū rō ñayuu cájito uhū rohó, áchí. ⁴⁴Te ruhū chi sa cahán rī jíin ró: Cundáhú ni rō ñayuu cájito uhū rohó. Te cacān rō jeē váha coo ñayuu cácahān ndevāha siquī rō. Te sáha váha ró jíin ñayuu cáquiti ni nuū rō. Te cacān tahú rō jehē ñayuu cácahān neé núu rō te cájito xeēn i rōhó. ⁴⁵Te súcuan stéén rō jeē cácuu ró séhe máá Tátá rō, Yáa ndeé andiví, chi máá yá jéhe niāndii cúndijin nuū ñayuu cunéé jíin ñayuu váha. Te jéhe ya saū nuū ñayuu casáha jniñu ndaā jíin núu ñayuu casáha jniñu neé. ⁴⁶Chi núu íyó maní rō jíin máa-ni ñayuu jeē maní jíin ró, te tú na tahū nihín rō nuū yā. Chi nde tēē cástútú xúhun renta jeē castáhú, suni súcuan casáha de. ⁴⁷Te núu máni jnáhan ró cahán yíñuhún ró jíin, ¿te na vé jeē váha ga sáha ró núu súcuan? Chi nde ñayuu tu cácañije Yáa Dios, suni súcuan casáha i. ⁴⁸Núu súcuan te ndaā na cóo ndihi jeē sáha ró, nájñuhun íyó ndaā ndihi jeē sáha Tátá rō, Yáa ndeé andiví.

Jeē ni stéén yā ndese sáha yó jniñu váha

6 Te jeē sáha ró táca jniñu váha nuū Yáa Dios, coto ró jēē ma sáha ró máá síquī jeē cúni ñayuu te cuajnúhún i rōhó. Chi núu súcuan sáha ró, te tú na tahū rō cuāha máá Tátá rō, Yáa ndeé andiví. ²Jeē yúcuan te jeē sáha ró caridad, te ma sáha ró jēē cúni táca ñayuu, nájñuhun casáha tēē stáhú-ni, cáhiin de nuū cúchitú ñayuu ini táca vehe ñi sinagoga jíin núu yáhu. Chi súcuan casáha de návaha cuajnúhún ñayuu de jeē

váha cásáha de. Jendaá cahán rī jíin ró jeē tahū de cúu jeē jejnúhún ñayuu de. ³Te róhó jíjnáhan ró, núu cásáha ró caridad, te sáha yuhu rō, náváha nde amigo váha ró tú cuni jeē sáha ró. ⁴Súcuan na sáha yuhu rō caridad. Te máá Tátá rō jeē jíto ya jeē sáha yuhu rō, iin quivī te cuáha ya tahū cuu ró.

Jeē ni stéén yā ndese cacān tahú yō

(Lc. 11.2-4)

⁵Te jeē cájicān tahú rō, te ma sáha ró nájñuhun cásáha tēe stáhú-ni. Chi cánujnahan ni de cuiñi de cacān tahú de nuū iyó chitú ñayuu ini tācá vehe iī sinagoga jíin tāca yíqui yáhu, náváha cuni ñayuu te cuajnúhún i de. Jendaá cahán rī jíin ró jeē maá yúcuan-ni cúu tahū jeē nihín de, suu jeē jejnúhún ñayuu de. ⁶Te róhó jíjnáhan ró, núu cájicān tahú rō, te ndēvi ró ini vehe ró te casi rō yehyí. Te cacān tahú rō nuū maá Tátá rō, Yaā ndeé yuhu jíin ró. Yūcuán na te máá Tátá rō jeē jíto ya jeē súcuan sáha yuhu rō, sáha ya jeē jícan rō.

⁷Te jeē cájicān tahú rō, te ma cahán saá-ni ró jnúhun jeē tu cájecūhun ni rō, nájñuhun cásáha ñayuu tu cájini jñuhun Yaā Dios. Chi cājeni ní i jeē núu cuehē jñuhun súcuan cahán i, te sáá te cuni sōho ya, te tuú. ⁸Núu súcuan te ma sáha ró nájñuhun cásáha máá i. Chi máá Tátá rō, je jíni yā na vé cájini ñúhún ró nde ná tu cacān rō nuū yā. ⁹Núu súcuan te suhva cacān tahú rō:

Tátá maá ná jíjnáhan ná jeē ndeé ní andíví,
níní na cóo yíñúhún ná nuū ní,
chi Yaā iī cúu ní.

¹⁰Te ñúhun ni na jéē yachī quiiji quivī ndacu ní jniñu níí ñáyiví yáha.
Te na cóo tācá jniñu nújnahan ní ní,
nájñuhun íyó ini andíví, súcuan na cóo ini ñáyiví.

¹¹Staā jeē cátecu na táca quíví, cuáha ní núu ná vijna.

¹²Te cone cahnu ni ni núu tāca cuéchi cásáha ná núu ní, nájñuhun cáhine cáhnu ni na núu ñáyuu casáha cuéchi nuū ná.

¹³Te ma cuáha ni jnúhun jeē coto ndee jexeén sāñá,
chi sa suhva jnama ní sáña núu tāca jéē neé.
Chi máá ní cúu Yaā ndácu jniñu, te jñí ní poder,
te yōhyo luu cújéhnu ní níí cáni.
Súcuan na cóo. Amén.

Achi rō jíjnáhan ró.

¹⁴Chi núu cone cáhnu ni rō nuū ñáyuu casáha cuéchi nuū rō, te suni súcuan cone cáhnu ni maá Tátá rō andíví nuū cuéchi ró. ¹⁵Te núu ma cóne cáhnu ni rō nuū ñáyuu casáha cuéchi nuū rō, te suni súcuan ma cóne cáhnu ni maá Tátá rō nuū cuéchi ró jíjnáhan ró.

Jeē ni stéén yā siquī jnúhun condite ni

¹⁶Te núu condite ni rō jeē chiñúhún ró Yaā Dios, te ma sáha ró nájñuhun cásáha tēe stáhú-ni. Chi cásáha de jeē coto xíí de, te súcuan stéén de nuū ñayuu jeē iyó ndite ni de, náváha cuajnúhún i de. Jendaá cahán rī jíin ró jeē maá yúcuan-ni cúu tahū jeē nihín de, suu jeē jejnúhún ñayuu de. ¹⁷Te

máá ró jijnáhan ró, núu íyó ndite ni rō, te sa chuhun vāha ró xínī rō te nandahá núu rō, ¹⁸návāha ma cúni ñayuu jeē iyó ndite ni rō. Chi máá-ni Tátá rō jeē ndeé yuhu yā jín ró, cuni yā, te ñin quivī te cuāha ya tahū cuu ró.

Ndese coo cúcá yó nde andiví

(Lc. 12.33-34)

¹⁹Ma cóndihvī ni rō caya rō ndajniñu cúcá ini ñayivī yáha, chi quívī tiquíxin, te cáne xehyu, te tívi. Te suni quívicoo ñacuíhná te sácuíhná. ²⁰Chi sa suhva sáha ró táca jniñu vāha návāha cayā tahū rō nde andiví. Chi yūcuan má quívī tiquíxin ni ma cáne xehyu jeē tívi. Ni ma cúu quivī ñacuíhna sácuíhná. ²¹Chi nde nuū nihín rō tahū vāha ró, yūcuan cúu nuū cóndihvī ni rō siquī.

Tinūu cúu lámpara yiqui cúñu

(Lc. 11.34-36)

²²Tinūu ró cúu nájñuhun lámpara nuū yiqui cúñu rō. Núu súcuan te núu tinūu ró íyó ndijin, te níí-ni yiqui cúñu rō cúndijin. ²³Te núu tinūu ró tu íyó ndijin, te níí-ni yiqui cúñu rō iyó nee. Te suni súcuan cúu ánuá rō, chi núu máni jeē jéni néé ni rō, te nacā jeē nee gā iyó ini anuá rō núu súcuan.

Jeē ma cóndihvī ni yō siquī xúhun

(Lc. 16.13)

²⁴Ni ñin mozo ma cúu cuajniñu de nuū uū patrón. Chi quitī ni de nuū ñin te coo manī de jín inga, chí squícu vāha de nuū ñin te sájéé ni de nuū inga. Te suni súcuan ma cúu cuajniñu ró núu Yaā Dios te núu máni siquī xúhun ndíhvī ni rō.

Yaā Dios ndíto ya yohó

(Lc. 12.22-31)

²⁵Núu súcuan te cáhan rī jín ró jijnáhan ró: Ma nácani ndasí ni rō siquī jeē cótecu rō, núu ndese caji rō coho ró, ni siquī sahma, núu ndese cuhun ró. Chi Yaā Dios ni sáha ya jeē técu rō jín yiqui cúñu rō, te nagā ni cuu jeē ma cuáha ya jeē caji rō jín jéé cúhun ró.

²⁶Condēhe ró ndese cátecu saa, chi tu cátaji tí, ni tu cánastútú tí jeē chívāha tí, ni tú yacā tí. Te vésú súcuan te máá Tátá rō andiví scáji yā tí. Te cánuú ndasí gá rō jijnáhan ró vésú táca saa ún. ²⁷¿Te ndé ñin ró, á cuu scuéhnu ró máá ró sava metro gā, vésú na nácani ndasí ni rō?

²⁸¿Te najehē cánacani ndasí ni rō jeē ma nihín rō sahma? Condēhe jijnáhan ró ndese jéé ita tāca yúcū. Chi tu sájniñu, ni tu táú. ²⁹Te cáhan rī jín ró jeē ni rey Salomón, quivī ní ñuhun de sahma vāha ndasí, tu ní ñuhun de sahma lúu súcuan nájñuhun ita ún. ³⁰Te núu súcuan jéhe Yaā Dios sahma lúu ita un jéé jéé vijna te sajnē cayū nuū ñuhún, te nagā ni cuu rōhó jijnáhan ró jéé ma sáha ya jeē nihín rō sahma. ¿Te naun tu cácandíje nihin ró jéé ndíto ya rohó? ³¹Núu súcuan te ma nácani ndasí ni rō siquī jeē caji rō, jeē coho ró, jeē cuhun ró. ³²Chi tāca ñayuu ñayivī jéé tu cácandíje cúu jeē máni siquī jeē yáha cándihvī ni i. Te máá ró jijnáhan ró, chi íyó Tátá rō andiví, te jín yā jeē cájini ñuhún ró tāca jéé yáha. ³³Te sa suhva cánuú gá jeē cóndihvī ni rō siquī jniñu jeē ndácu Yaā Dios nuū rō, jín siquī jeē sáha ró jniñu ndaā jeē núnahan ni yā.

Yūcuán na te sáha ya jeē nihín rō tāca jéē yáha. ³⁴Núu súcuan te ma nácani ni rō siquī jeē cóo sajnē, chi vijna cúu vijna te sajnē cúu sajnē. Chi cani ni rō siquī jnúndóho jeē iyó ná ìn ná ìn-ni quivī.

Jeē ma cahán yō siquī cuēchi jnáhan yó
(Lc. 6.37-38, 41-42)

7 Ma cahán rō siquī ñayuu ndese sáha i, návāha suni ma cahán Yaā Dios cuēchi siquī maá ró jeē casáha ró súcuan. ²Chi nájnūhun cácahān rō siquī cuēchi ñayuu, suni súcuan cahān yā siquī cuēchi ró. Te cūhva jeē cándihvī ni rō siquī i, suni cūhva yúcuan sáha ya jíin ró. ³Chi cuēchi jnáhan ró cúu nájnūhun jeē íne ìn yāca lúli tñūū i. ¿Te naun casáha ró cuenta jeē súcuan, te tu casáha ró cuenta cuēchi máá ró jeē cúu nájnūhun jeē íne ìn nduhu tñūū máá ró? ⁴¿Te naun cácahān rō jíin jnáhan ró: Na táva rī yāca íne tñūū ró, te tu cánacani ni rō jeē íne ìn nduhu tñūū máá ró? ⁵Tēe stáhú-ni cácuu ró núu súcuan. Xihna gā tñūū máá ró tava rō nduhu, te yūcuán na te cuu condēhe váha ró jéē táva rō yāca tñūū jnáhan ró.

⁶Ma sáha fuerza rō ñayuu cunéé quívicoo i nuū jnúhun ìi yā núu tu cúní i. Chi ndonda i siquī rō nájnūhun ina jeē cáyihī tí rohó. Te ma nácani ró jnúhun ya nuū ñayuu jeē tu cúní cuiti cuajnúhún. Chi cándāa i nájnūhun quinī jeē jeñú tí siquī perla jeē ndeé yahu ga.

Cacān yō nuū yā te nihín yō
(Lc. 11.9-13; 6.31)

⁷Cacān rō nuū Yaā Dios, te cuāha ya nuū rō. Te nducú ró tāca jéē váha iyó

nuū yā, te nihín rō sáha ya. Te cacān tahú rō nde nihín rō, nájnūhun sáha ñayuu cahán yehyí ndé nune quivī i. ⁸Chi tāca ñayuu jicán, cuāha ya nuū i. Te ñayuu nducú, suni nihín i. Te ñayuu cahán, nune ya ichi nihín i jeē cúní i. ⁹¿Te ndé ìn róhó núu sēhe ró jicán i staā nuū rō, te á cuāha ró ìn yuū nuū i? ¹⁰¿Te núu jicán i ìn chācá, te á cuāha ró ìn coō nuū i? Tú cuiti súcuan. ¹¹Núu súcuan te máá ró jijnáhan ró, vēsú ñayuu iyó cuēchi cácuu ró, te cájini rō cuāha ró jéē váha nuū sēhe ró. Te nagā ni cuu máá Tátá rō andiví jéē ma cuāha ya jeē váha nuū ñayuu jicán nuū yā.

¹²Te nájnūhun cúní rō jeē sáha váha ñayuu jíin ró, suni súcuan na sáha váha ró jíin i. Chi tutu ley Moisés súcuan ndácu jniñu, jíin táca tutu tēe ni canacani jnúhun Yaā Dios.

Siquī jeē quíví yó yéhyí túū
(Lc. 13.24)

¹³Condihvī ni rō quívicoo ró ndaha Yaā Dios. Chi cúu nájnūhun ìn yéhyí túū. Chi yéhyí jíin ichi jeē cuahán nuū jnahnú ndetū ñayuu, jíte te cáhnu, te cuehē i quívicoo yūcuán. ¹⁴Te yéhyí jíin ichi jeē cuahán nuū nihín tahú i cotecu i, chi tuū yehyí te cuñí ichi, te jecu-ni i cánihín i.

Jíin jniñu casáha ñayuu te nácuni yō
ndese ñayuu cácuu i
(Lc. 6.43-44)

¹⁵Te ma cándije cuiti rō tēe stáhú jéē cácahān de jeē jnúhun Yaā Dios cánacani de. Chi nájnūhun lanchi, quití tú xeēn, súcuan casáha de vējicoo de nuū rō. Te ini anuá de chí cácuu de nájnūhun yihī, quití xéén. ¹⁶Jíin jniñu casáha de te

nacuni rō de ndese tēe cácuu de. Chi cúu nájñuhun jeē tu scóyo ró ndehē uva xinī iñu, ni tu scóyo ró higo xinī iñu yóquin. ¹⁷Te tācá yujnu váha chi jéhe ndehē váha, te yujnu neé chi cúun ndehē neé. ¹⁸Iñ yujnu váha ma cúun ndehē neé, te ni ñin yujnu neé ma cuáha ndehē váha. ¹⁹Te tācá yujnu jeē tu jéhe ndehē váha, chi tahndē te cayū nuū ñuhún. ²⁰Te suni súcuan cácuu tēe ún, chi jíin jniñu casáha de te nácuni rō ndese tēe cácuu de.

Nasūú ndihi ñayuu quivícoo andiví

(Lc. 13.25-27)

²¹Nasūú ndihi ñayuu jeē cahán i Jitoho i ruhū cúu jeē quivícoo nuū ndácu Tátá rī jniñu nde andiví. Chi quivícoo máá nene ñayuu jeē squícu jniñu cúní Tatá rī andiví. ²²Te quiví jeē sándaá rī jniñu ñayuu, te cuehē i cahán jíin rí: Jitoho na jíjnáhan ná, ni canacani ná jnúhun jíin síhví ní, te ni caquenehen ná táchī jíin síhví ní, te ni casáha ná cuehē jniñu jéhu jíin síhví ní jeē náá ni ñayuu sáha. Achi i. ²³Yūcuán na te cahán rī jíin ñayuu ún: Tu jíiní cuítí rī rohó. Cujíyo quingoo ró, chi ñayuu casáha jniñu neé cácuu ró, achi rī.

Siquí uú vehe

(Lc. 6.47-49; Mr. 1.22)

²⁴Núu súcuan te tāca ñayuu jeē cájini sōho jñuhun cáhán rī te squícu i, cácuu i nájñuhun ñin tēe ni nacani váha ni, te ni jeni de vehe de siquí cáva. ²⁵Te ni cuun saū, te ni ndaa yūte, te ni quee tachī xeén, te ni cachundahá vehe ún. Te tu ní cótúú, chi siquí cáva

ndéé. ²⁶Te tāca ñayuu jeē cájini sōho jñuhun cáhán rī te tu squícu i, cácuu i nájñuhun ñin tēe cánéé jeē ní jeni de vehe de nuū ñíti. ²⁷Te ni cuun saū, te ni quiji ndute ñuhún cuéhē, te ni quee tachī xeén, te ni cachundahá vehe ún. Te ni cótúú-ni, te ni naa ñi-ni. Achí yá jíin i jíjnáhan i.

²⁸Te ná ni jínu ni cahán Jesús tāca jñuhun váha, te ñayuu cuehē un ní canaa ni i ni cajini i jñuhun ni steén yá. ²⁹Chi ni steén váha ya nuū i, chi máá yá cúu jeē ndíso jniñu siquí ndihi. Te tēe cástéén tutu ley Yaā Dios, tu súcuan cástéén de.

Jeē ní nasávāha ya ñin tēe ndóho cuehyí stehyú

(Mr. 1.40-45; Lc. 5.12-16)

8 Te ni nanuu Jesús yucu ún, te cuehē ñayuu cándiquin i ya. ²Te ñin tēe ndóho cuehyí stehyú, ni quee de nuū yá. Te ni jecuiñí yití de nuū yá, te ni cahán de jíin yá: Jíiní na jéé cuu sáha ní jéé nduvāha ná, te núu cúní ni, áchí de. ³Te Jesús ni soó yá ndaha ya siquí de, te ni cahán yá:

Cúní rī. Te na nduvāha ró, áchí yá. Te ná ni cahán yá súcuan, te ni nduvāha-ni tēe ndóho cuehyí stehyú un. ⁴Yūcuán na te ni cahán Jesús jíin de:

Ma cáchi cuítí rō nuū ní ñin. Chi quisteén rō maá ró nuū sutú, te condahá ró jeē socó rō nuū Yaā Dios, nájñuhun ni ndacu Moisés jniñu jenahán, návāha cuni ñayuu jeē ní nduvāha ró. Achí yá.

Jeē ní nasávāha ya mozo capitán

(Lc. 7.1-10)

⁵Te ni quiví Jesús ñuu Capernaum. Te ñin tēe nación Roma

jeē cúu capitán, ni quee de nuū yā, te ni cahān ndahú de jíin yá:

⁶Mozo na cátú i vehe ná, chi ni ijín i te ndóho xeēn i, áchí de.

⁷Te ni cahān Jesús:

Quihīn rī nasávāha ri i núu súcuan, áchí yá.

⁸Te ni cahān capitán jíin yá:

Tu cújéhu ná jéē quihín ni quívi ní vehe ná. Chi máá jéē cahán-ni ní, te na ndúvāha-ni mozo na.

⁹Chi máá ná suni ndíso jniñu ná ní casáha tēe cácujehu ga. Te cújéhu ná núu tācá soldado na. Te núu cáhán na jíin iin de jeē na quíhín de, te cuahān de. Te núu cáhán na jíin inga de jeē na quíji de, te quíji de. Te núu ndácu ná iin jniñu nuū mozo na, te sáha i. Achí de.

¹⁰Te jeē ní jini Jesús jnūhun yáha, te ni naa ni yā. Te ni cahān yā jíin ñáyuu cándiquin yā ún:

Jendaá cahán rī jíin ró jeē ni nación yō Israel tu ní níhín rī ni iin ñayuu candíje nihin súcuan, nájñuhun cándíje tēe yáha, vēsú tēe nación tu jíin jnūhun Yaā Dios cúu de. ¹¹Te cáhán rī jíin ró jeē quíjicoo cuehē ñayuu ichi núu cáne niāndii jíin ichi núu quee niāndii. Te cucōo i caji i staā jíin Abraham jíin Isaac jíin Jacob nuū ndácu Yaā Dios jniñu nde andíví. ¹²Te sava ñayuu nación Israel jeē maá i quívicoo núu, te sa quenehen ya i quihīn i nuū nēē, chi tu ní cácandíje i. Te yūcuan ndáhyū i te nacayihí yuhu i jeē ndoho xeēn i. Achí yá.

¹³Yūcuán na te ni cahān yā jíin tēe cúu capitán:

Cuánuhun vehe ró, chi sáha ri nájñuhun cándíje ró jéē sáha ri.

Te mozo de un ní nduvāha-ni i máá hora un.

Jeē ní nasávāha ya naná chiso Pedro

(Mr. 1.29-31; Lc. 4.38-39)

¹⁴Te ni jehēn Jesús vehe Pedro. Te ni jito ya naná chíso de jeē catú ña yíhi quíji ña. ¹⁵Te ni jniñi ya ndaha ña, te ni quenda-ni quíji ún ña. Te ni ndocuññi ña, te ni sáha ña jeē ní cayeji de jíin yá.

Jeē ní nasávāha ya cuehē ñayuu

(Mr. 1.32-34; Lc. 4.40-41)

¹⁶Te jeē ní cuaa ni quecoo ñayuu jíin cuehē ñayuu jeē ñúhun tachī ini i. Te ni quenehen ya tachī un cuángoo jíin jnūhun cáhán-ni ya. Te suni ni nasávāha ya tāca ñáyuu cácuñhū. ¹⁷Te súcuan ni cuu návāha cundaā jnūhun ni cahān Isaías, tēe ni nacani jnūhun Yaā Dios jenahán: Máá yá ni tejiyo ndínuū cuehyī cándoho yó, áchí Isaías.

Siquī ñayuu jeē cácuñi i condiquin i ya

(Lc. 9.57-62)

¹⁸Te ni jito Jesús jeē ní ndicó ndúu cuehē ñayuu yā. Te ni cahān yā jíin tēe cácuáha jíin yá jeē na yáha de jíin yá inga lado mar. ¹⁹Te iin tēe stéén tutu ley Yaā Dios, ni quee de nuū yā, te ni cahān de:

Maestro, condiquin na níhín quíhīn yō ndé-ni cúu-ni nuū quihín ni, áchí de.

²⁰Te ni cahān Jesús jíin de:

Tāca ñúcuui, íyó yāu cava cáñuhun ti. Te suni saa, iyó táca tī. Te ruhū, Yaā ní nduu tēe, tuú nuū cusú ri, achí yá.

²¹Te inga tēe ni cahān de jíin yá, te tēe scuáha jíin yá cúu de:

Condetu ní ndé na quíchindūji ná tátá na xíhna gā. Yūcuán na te condiquīn na níhín, áchí de.

²²Te ni cahān Jesús jíin de:

Condiquīn ruhū na quíhín yō. Te stóo tāca ndíyi na chíndūji jnāhan ndīyi, chí ndīyi cácuu ñayuu tu cácaandíje. Achí yá.

Jeē ní jecuiñī tachī níhin jíin mar ni sáha ya

(Mr. 4.35-41; Lc. 8.22-25)

²³Yūcuán na te ni quívi Jesús ini barco, te tēe cáscuáha jíin yá ni quívicoo de cuahān de jíin yá. ²⁴Te nuū mar ni jequīhi iin tachī níhin, te ni stónnda ndute mar, ni quívi ini barco un. Te Jesús chí quíxí yā. ²⁵Te tēe cáscuáha jíin yá ni castónnda de ya, te ni cacahān de:

Jnama ní yóhó, chí je queé yó chíji ndute, áchí de.

²⁶Te ni cahān yā jíin de:

¿Naun cáyūhú ndasí ró? Te tu cácaandíje níhin ró jéē cácu ró sáha ri, achí yá.

Yūcuán na te ni ndocuiñī yā, te ni cahān yā nuū tachí níhin un jíin núu mar. Te ni cuu nayúú í-ni. ²⁷Te ni canaa ni de jíjnāhan de, te ni cacahān de:

¿Ndé iin ga cúu tēe yáha, jéē ndé tachī níhin jíin mar cájetáhú jéē cahán de? áchí de.

Tēe Gadara jeē cándoho tachī

(Mr. 5.1-20; Lc. 8.26-39)

²⁸Te ni jinū yā inga lado mar, máá región ñayuu Gadara. Te uū tēe ni quendacoo de nde nuū yíndūji ndīyi, ni quijnahan de ya. Te cáñuhun tachī ini de, te siquī jeē yóhyo xeēn tachī ún, te ni iin ñayuu tu cúu

yáha i ichi yúcuán. ²⁹Te ni cacana cóhó de ni casáha tachī:

¿Naun vēji ní núu ná, Jesús Sēhe Yaā Dios? ¿A vēji ní yáha jeē stóho ní sáña ndé ná tu quee maá quívī? áchí.

³⁰Te nde jicá jecu cáhiin cuehē quīnī cájitu tí. ³¹Te tachī jeē cáñuhun ini tēe un ní cacahān ndahú jíin yá:

Núu quenehen ní sáña, te cuāha ni jnúhun na quívicoo ná ini quīnī cáhiin yūcuán, áchí.

³²Te ni cahān yā jíin:

Cuángoo núu súcuán.

Te ni quendacoo tachī ún ini tēe ún, te ni quívicoo ini quīnī. Te quīnī un ní cajinu tí ni caníngava tí iin yucáva, te ni ndaquīhi tí ndute mar, ni cajihī tí.

³³Te tēe cándito tí ni cajinu de cuangoo de jeē ní cayūhú de. Te ni najinūcoo de ñuu. Te ni cacastūhún de tācá jniñu yúcuán, jíin ndese ni cuu jeē ní quendacoo tachī ini ndíndúú tēe ún. ³⁴Yūcuán na te ndíivi ñayuu ñuu un, ní quendacoo i cuacondēhé i Jesús. Te ná ni jinūcoo i nuū íne ya, te ni cacahān ndahú i jíin yá jeē na quénda ya región yúcuán quíhín yā.

Jeē ní nasávāha ya iin tēe ndóho cuehyī ni íjin

(Mr. 2.1-12; Lc. 5.17-26)

9 Yūcuán na te ni ndívi Jesús ini barco. Te ni nayāha ya cuahān yā inga lado mar, te ni najinū yā ñuu maá yá. ²Te ni caquindeca ñayuu iin tēe ndóho cuehyī ni íjin, cátu de nuū iin camilla. Te ni jini Jesús jeē cácaandíje i jeē cúu nasávāha ya tēe ní íjin ún. Te ni cahān yā jíin de:

Na ndúndeyí ni rō séhē, chi je íne cáhnu ni rī nuū tāca cuéchi ró, áchí yá.

³Yūcuán na te jecu tēe cástéén tutu ley Yaā Dios, ni cajeni ni de siquī yā: Jeē cahán tēe yáha súcuan, chi cáhán de jnūhun ndevāha jeē quití ni Yaā Dios. ⁴Te ni jini Jesús jeē súcuan cájeni ni de, te ni cahān yā jíin de:

¿Naun cájeni ni rō jeē cahán ndevāha ri? ⁵Jeē uú jnūhun yáha, ¿ndé iin yí gá cáa? ¿A jéē cahán rī jíin tēe cúhú: Je íne cáhnu ni rī nuū tāca cuéchi ró? ¿Chí yí gá jeē cahān rī: Ndocuiñī te caca ró, chi je ni nduvāha ró, achi rī? ⁶Te vijna te na stéén rī jeē maá rí, Yaā ní nduu tēe, ndíso jníñu ri ini ñayívi yáha jéē cóne cáhnu ni rī nuū cuéchi.

Yūcuán na te ni cahān yā jíin tēe ni íjin ún:

Ndocuiñī te naquihin ró camilla rō te quinhun rō vehe ró, áchí yá jíin de.

⁷Yūcuán na te ni ndocuiñī-ni tēe ún, te cuanhun de vehe de. ⁸Te ná ni cajito ñayuu un jéē súcuan ni sáha ya, te ni cayúhú i. Te ni cacahān i jeē yóhoyo vāha Yaā cúu Yaā Dios jeē súcuan ni jēhe ya poder nuū iin tēe jeē cúu nasávāha de ñayuu, achí i cájito i Jesús.

Jeē ní cana ya Mateo

(Mr. 2.13-17; Lc. 5.27-32)

⁹Te ni quenda Jesús yūcuan cuáhān yā. Te ni jito ya nuū iin tēe nání Mateo, néne de nuū cutútú xúhun renta. Te ni cahān yā jíin de:

Condiquin ruhū na quíhín yō.

Te ni ndocuiñī de, te cuahān de jíin yá.

¹⁰Yūcuán na te ni jehēn yā ni yeji yā staā vehe de. Te cuehē tēe cástútú xúhun renta jíin inga tēe casáha cuéchi, suni cáyūcú de cáyeji de staā jíin Jesús jíin tēe cáscuáha jíin yá. ¹¹Te tēe grupo fariseo, ni cajito de, te ni cacahān de jíin tēe cáscuáha jíin yá:

¿Naun yéji maestro rō jíin tēe cástútú xúhun renta jíin inga tēe casáha cuéchi? áchí de.

¹²Te ni jini Jesús, te ni cahān yatá yá jíin de:

Ñayuu cáhīyo vāha, tu jíini ñúhún i tēe tájné, chi ñayuu cácuahú cúu jeē jíini ñúhún. ¹³Cuáhán jíjnéhan ró núu súcuan, te nacani ni rō na vé cúu jeē cahán jnūhun yáha jéē yosó núu tútu i: Cúni rī jeē na cúndáhú ni rō jnéhan ró, nasūu jéē socó rō quití nuū rī, achí Yaā Dios nde jenahán. Te ruhū nasūu jéē véji ri cana ri ñayuu tú cuéchi, jeē cúu i nájnūhun ñayuu cáhīyo vāha, chi sa suhva véji ri cana ri ñayuu iyó cuéchi, jeē na nácani ni i te stóo i cuéchi i. Achí yá.

Jeē ní cacajñuhún de ya siquī jeē cóndite ni

(Mr. 2.18-22; Lc. 5.33-39)

¹⁴Yūcuán na te tēe cáscuáha jíin Juan tēe scuándute, ni quecoo de nuū Jesús. Te ni cacahān de jíin yá:

Saña jíin tēe grupo fariseo, tíjni jínu cáhīyo ndite ni na núu Yaā Dios. Te tēe cáscuáha jíin máá ní, ¿naun tu casáha de súcuan?

¹⁵Te ni cahān Jesús jíin de:

¿A cuu condite ni de níní jéē iyó rí jíin de? ¿A cuu cucuíhyá ni ñayuu cáhīin vico nándāha, te núu níní néne tēe nándāha? Te quee

quívī jeē cújiyo tēe nándāha, te quívī ún chi condite ni i.

¹⁶Te ni cahān yā uū jnūhun yátá síquī jeē tu quíjnāhan jnūhun jeé jéé steén yā jíin táca jnūhun jenahán. Achí yá:

Ni iin tu náchuhun iin pedazo sahma jéé núu iin sahma túhú. Chi núu súcuan te ndiyi pedazo jeé un, te tahndē gā jeē tuhú un, te nducáhnu ga nuū catáhdé un. ¹⁷Te suni tu cáchuhun vino jeé ini ñii túhú. Chi núu súcuan te ndatā ñii ún, te naa vino jíin ñii. Chi cánuú jéé chūhun i vino jeé ini ñii jéé, te súcuan te quéndō vāha ndíndúú. Achí yá.

Jnūhun sēhe síhí Jairo jíin ñahan ní quehé yusáhma ya

(Mr. 5.21-43; Lc. 8.40-56)

¹⁸Te níní cáhán Jesús táca jnūhun yáha, te iin tēe cújéhnu nuū ñáyuu hebreo, ni quee de nuū yā. Te ni jecuiñī yití de nuū yā, te ni cahān de:

Sēhe síhí ná sá ní jihī i. Te núu na quíhín yō soó ní ndaha ní síquī i, te natecu i. Achí de.

¹⁹Te ni ndocuiñī Jesús, te cuahān yā jíin de, te suni cuangoo tēe cáscuáha jíin yá. ²⁰Te mēhñu ñáyuu cuangoo jíin yá ni quee iin ñahan, te je ní cuu uxī uū cuiyā ndóho ña cuehyī ñiñī. Te ni quee ña ichi yátá yā, te ni quehé ña yusáhma ya. ²¹Chi ni jeni ni ña: Vēsú maá sahma ya na níhín rī quehé rí, te nduvāha ri, jéni ni ña. ²²Te ni ndió cóto Jesús, te ni jito ya nuū ña, te ni cahān yā:

Na ndúndeyí ni rō, séhē. Ni candíje ró jéé cuu nasávāha ri rohó,

te jeē yúcuán ní nduvāha ró, áchí yá.

Te ni nduvāha ña maá hora un.

²³Te ná ni jinū Jesús vehe tēe cújéhnu ún, te ni jito ya nuū tēe cácuu músico jeē quíchindūji de i, jíin núu ñáyuu cuehē, cásávaā i.

²⁴Te ni cahān yā jíin i:

Cujiyo jíjnāhan ró, chi sūchi síhí yáha, tu ní jíhí i chi quíxí-ni i, áchí yá.

Te ni cajecū catá i jeē ni cáhān yā.

²⁵Te ni quenehen ya ñáyuu cuehē ún, te ni quívī ya ini vehe. Te ni jniñi ya ndaha sūchi síhí ní jihī ún, te ni ndocuiñī-ni i. ²⁶Te ní región yúcuán ní jitē núu jnūhun jniñu jéhnu ní sáha ya ún.

Jeé ní nasávāha ya uū tēe cuáá

²⁷Te ni quenda Jesús yúcuán cuahān yā. Te uū tēe cuáá cuángoo de yatā yā, cácana jee de:

Maá ní jeé cúu ní Sēhe yucūn David, cundáhú ni ní sáña víi, achí de.

²⁸Te ná ni jinū yā vehe, te ni jinúcoo tēe cuáá un núu yā. Te ni cahān yā jíin de:

¿A cácandíje ró jéé cúu nanune ri tinūu ró? achí yá.

Te ni cacahān de:

Cácandíje ná, áchí de.

²⁹Yúcuán na te ni tee ya ndaha ya tinūú de, te ni cahān yā:

Na sáha ri nájnūhun cácandíje ró, áchí yá.

³⁰Te ni cananune-ni tinūú de. Te Jesús ni cahān nihin ya jíin de:

Ma cáchi cuiti rō nuū ni iin, áchí yá.

³¹Te maá de chi ni quendacoo de, te ni cajete-ni de jnūhun ní región

yūcuan jēē súcuan ni sáha ya jíin de.

Jeē ní nasávāha ya iin tēe ñíhín

³²Te nuū ní quendacoo tēe un cuángoo de, te ni quecoo ñayuu jíin iin tēe ñíhín, jeē ñúhun tachī ini de. ³³Te ni quenehen ya tachī un cuáhān. Te tēe ñíhín un ní nacahān de. Te ni canaa ni ñayuu ni cajito i, te ni cacahān i:

Ná tu cuni cuiti yō ni iin jniñu súcuan ini ñuu Israel, achí i.

³⁴Te tēe grupo fariseo chi ni cacahān de:

Tēe yáha chi quenehen de tachī jíin fuerza maá jexeén jeē cujéhnun nuū tachī, achí de.

Jeē cundáhú ni yā ñayuu cuehē

³⁵Te ni jica cuu Jesús tācá ñuu jíin rancho, te ni steén yā jñūhun ini tācá vehe i sinagoga. Te ni nacani ya jñūhun vāha ndese ndácu Yaā Dios jniñu. Te ni nasávāha ya ñayuu cácuñu na-ni cuehyī cándoho i. ³⁶Te cundáhú ni yā jíto ya nuū ñáyuu cuehē ún. Chi cándoho i te cácuñuhyá ni i, chi cácuu i nájnūhun lanchi jeē tú jítoho tī, chi tu ndíquin i Yaā cúu Jitoho i. ³⁷Yūcuán na te ni cahān yā jíin tēe cácuáha jíin yá:

Ñayuu yáha cácuu i nájnūhun trigo jeē tahndé, te ndaā jeē cuehē cúu, te tēe cahnde chi jecu-ni de cúu. ³⁸Núu súcuan te cacān tahú rō nuū maá Jítoho rō Yaā Dios jeē na tájij yá cuehē tēe na quíngoo de cahnde de trigo, cúu jeē nácani de jñūhun ya nuū ñáyuu. Achí yá.

Jeē ní nacāji ya uxí uū tēe apóstol

(Mr 3.13-19; Lc. 6.12-16)

10 Yūcuán na te ni cana ya uxí uū tēe jeē scuáha de jíin yá. Te ni jēhe ya poder nuū de jeē quenehen de tachī ini ñayuu, jíin jēē nasávāha de ñayuu cácuñu tācá ndínuū cuehyī.

²Te yáha cúu síhví ndihúxí uū tēe apóstol un: Tēe iin cúu Simón jeē suni nání Pedro, jíin ñani de Andrés. Te uū gā de cácuu sēhe Zebedeo, te nání de Jacobo jíin Juan. ³Yūcuán na te Felipe, Bartolomé, Tomás, Mateo tēe ni stútú xúhun renta, Jacobo sēhe Alfeo, jíin Lebeo jeē suni nání Tadeo, ⁴jíin Simón tēe grupo cananista, jíin Judas Iscariote, tēe jeē ní nastúu de ya.

Jeē ní tají yá ndihúxí uū de quinacani de jñūhun

(Mr. 6.7-13; Lc. 9.1-6)

⁵Te ni tají Jesús ndihúxí uū tēe yáha jeē quíngoo de. Te ni ndacu ya jniñu nuū de ndese sáha de:

Ma quíngoo ró núu ñáyuu jeē násūu ñáyuu hebreo cácuu i, ni ma quívicoo ró táca ñuu ñayuu Samaria. ⁶Chi nuū maá-ni ñayuu nación yō Israel quíngoo ró, chi cácuu i nájnūhun lanchi jeē ní sana. ⁷Te jeē quíngoo ró te suhva nacani ró jñūhun: Je ni cuyajni Yaā ndeé andíví jeē ndacu ya jniñu nuū rō, achí rō. ⁸Te nasávāha ró ñáyuu cándoho cuehyī stehyú jíin ñáyuu cándoho tāca gá cuehyī, te nastécu rō ndíyí te quenehen ró táchī ini ñayuu. Te súcuan-ni ni jēhe ri

poder nuū rō jeē sāha ró, te suni súcuan-ni sāha ró jíin i.

⁹Te ma cóndiso ró xúhun oro, ni xúhun plata, ni centavo cuechí. ¹⁰Ni ma cóndiso ró ñunu stáá caji rō ichi, ni inga camisa, ni ndijēn, ni vara. Chi siquī jniñu jeē nácani ró jnúhun nuū ñáyuu, te cánuu coto i rōhó.

¹¹Te na-ni ñuu chí rancho núu ni jinūcoo ró, te yūcuán nducú ró ñin ñáyuu vāha, te coyūcu ró vehe i nde quingoo tucu ró. ¹²Te jeē quívī ró vehe ñáyuu ún, te cahān rō jeē na quíji jnúhun ndeyí jnúhun sī ni nuū i. ¹³Te núu ñáyuu vāha cácuu i, te jnúhun ndeyí ní cahān rō quendōo siquī i. Te núu nasūu ñáyuu vāha cácuu i, te jnúhun ndeyí ní cahān rō ma quéndōo siquī i. ¹⁴Te núu íyó ñáyuu jeē tu cájetáhú i rōhó, ni tu cúní i cuni nahín i jnúhun cahān rō, yūcuán na te quendacoo ró vehe un chí ñuu ún, te scóyo ró tícachā jehē rō, te súcuan stéén rō jeē iyó cuéchi i jeē tu ní cájetáhú i. ¹⁵Jendaá cahán rī jíin ró jeē quívī juicio te xeēn gā coo castigo siquī ñuu casáha súcuan vēsū siquī ñuu Sodoma jíin ñuu Gomorra nuū ní casáha ndasí ñáyuu cuēchi.

Jeē coto xeēn ñáyuu de jíjnáhan de

¹⁶Cuni sōho ró, chi tájí rí rohó quíngoo ró nájnūhun lanchi mēhñu yíhī. Núu súcuan te coo listo rō nájnūhun coō, te coo vitá ni rō nájnūhun paloma. ¹⁷Te condito ró máá ró nuū ñáyuu, chi quee quívī jeē quíndeca i rōhó núu tohó, te caní i rōhó ini tācá vehe ñi sinagoga. ¹⁸Te suni nde nuū tācá gobernador

jíin rey quíndeca i rōhó jéē siquí ruhū. Te súcuan te nune ichi jeē nacani ndaā rō jnúhun ri nuū de jíin núu ñáyuu tācá nación jeē tu jíin jnúhun Yaā Dios. ¹⁹Te núu ni jendeca i rōhó núu tāca tée ún, ma nácani ndasí ni rō ndese cahān rō. Chi máá hora un te máá yá steén nuū rō ndese cahān rō. ²⁰Chi nasūu máá ró cúu jeē cahán, chi Espírítu máá Tátá rō cúu jeē cahán jíin yuhu ró.

²¹Te sava ñáyuu tu cácadíje, nastúu i ñani i jeē na cúu. Te tátá nastúu sēhe. Te sēhe ndonda siquī tatá jíin náná jeē na cúu. ²²Te ndihí ñáyuu quítī ni i nuū rō jeē siquí ruhū. Te ñáyuu jeē cuiñi ñihin nde jeē jínu jnúndóho, ñáyuu ún chi cācu ánuá i. ²³Te núu cájito xeēn i rōhó ñuu, te cunu ró quíhīn rō inga ñuu. Chi jendaá cahán rī jíin ró jeē ma ndécava ró caca cuu ró ndihí nación yō Israel te ndiji-ni máá rí, Yaā ní nduu tēe.

²⁴Ñin tēe scuáha, tu cújéhnu de nuū maestro de. Ni tēe cúu mozo, tu cújéhnu de nuū patrón de. ²⁵Tēe scuáha chi nájnūhun ndóho maestro de suni súcuan ndoho nahín máá de, te tēe cúu mozo suni ndoho de nájnūhun ndóho patrón de. Núu súcuan te núu ruhū cácahān i jeē Satanás cúu ri, te nagā ni cuu jeē ma cahán i jeē rohó cácuu Satanás.

Jeē ní cachi yā ndé ñin cúu jeē yūhu yó

(Lc. 12.2-9)

²⁶Núu súcuan te ma yūhu ró coto ró ñáyuu. Chi tāca jnúhun cácahān sáhí i ma quéndōo sáhí cuítī, chi

ndihí natūu ndijin, te cuni ñayuu.
 27 Jnūhun ní cahān rī jín ró jeē tu ní jíní ñayuu, na nácastūhun cájī ró nuū i. Te jnūhun ní nacani sāhi rí nuū rō, na nácani jee ró yātā tācá vehe. 28 Te ma yūhu ró coto ró ñayuu cahni yiquí cúñu rō, chi ma cúu cahni i ánuá rō. Chi sa suhva yūhu ró jēē ma stívi ró núū Yaā Dios, chi cuu snáhnú ndetū yā rohó jēē quívi ánuá rō jín yiquí cúñu rō infierno.

29 Te tācá saa chi tú yahu ndéé tī, chi nde uū tī jeē ñin centavo lulí. Te ni ñin tī tu nánga nuū ñūhun te núu tu jéhe Tátá rō jnūhun, chi ndíto ya tī. 30 Te nagā ni cuu rohó jínáhan ró, chi nde ndihí ixi xíní rō je ni cahu ya. 31 Núu súcuan te ma yūhu ró jijnáhan ró, chi cánuú ndasí gá rō nuū yā vēsú cuehē tācá saa.

Ñayuu jejnúhún Jesucristo nuū ñga ñayuu

(Lc. 12.8-9)

32 Te tāca ñayuu jeē cuajnúhún rúhū nuū ñga ñayuu, suni súcuan cuajnúhún rí i nuū Tatá rī, Yaā ndeé andíví. 33 Te tāca ñayuu jeē ma cuajnúhún rúhū nuū ñga ñayuu, suni súcuan ma cuajnúhún rí i nuū Tatá rī, Yaā ndeé andíví.

Jeē siquí Jesús te cusín ini ñayuu

(Lc. 12.51-53; 14.26-27)

34 Ma cáni ni rō jijnáhan ró jēē vēji ri jeē cóyūcu mání ñayuu ñayíví. Tú vēji ri jeē cóyūcu mání ñayuu, chi sa suhva cuajnáhan i jeē siquí ruhū. 35 Chi jeē siquí ruhū te cusín ini sēhe yí jín tátá, te sēhe síhí jín náná, te sēhe jēnu jín náná chíso. 36 Chi tāca ñayuu candíje

ruhū, chi jnáhan vehe i cúu jeē quítī ni nuū i.

37 Te núu ndé ñin ñayuu maní gā i jín tátá i chí jín náná i vēsú jín rúhū, nasūu ñayuu vāha cúu i jeē cóndiquin i ruhū. Te núu ndé ñin ñayuu maní gā i jín sēhe yí i chí jín sēhe síhí i vēsú jín rúhū, te suni nasūu ñayuu vāha cúu i jeē cóndiquin i ruhū. 38 Te na-ni ñayuu núu tu jéhe i jnūhun ndoho i jnūndóho vēsú nde cuu i jeē siquí jeē cóndiquin i ruhū, nasūu ñayuu vāha cúu i jeē cóndiquin i ruhū. 39 Te núu ndé ñayuu cúni i cācu i nuū jnūndóho quiji nuū i jeē siquí ruhū, núu súcuan te jnahnú ndetū i ní cáni. Te núu ndé ñin ñayuu vēsú na cúu i jeē siquí ruhū, te cotecu i ní cáni.

Jeē iyó táhū yō nuū Yaā Dios

(Mr. 9.41)

40 Te ñayuu cuatáhú rohó jijnáhan ró, núu súcuan te ruhū cájetáhú i. Te ñayuu cájetáhú rúhū, cájetáhú i Yaā ní tají rúhū vēji ri. 41 Núu na-ni ñayuu cuatáhú i ñin tēe nácani jnūhun Yaā Dios, siquí jeē jíca de jniñu Yaā Dios, núu súcuan te ñnuú-ni coo tahū de nuū Yaā Dios jín tēe nácani jnūhun Yaā Dios. Te núu na-ni ñayuu cuatáhú i ñin tēe ndaā, siquí jeē tēe ndaā cúu de, núu súcuan te ñnuú-ni coo tahū de nuū Yaā Dios jín tēe ndaā. 42 Te núu ndé ñayuu cuāha i vēsú ñin ñajin ndute mǐjin coho ñin sūchi yáha, siquí jeē cúu i sūchi cándíje ruhū, ndaā ndíje cúu jeē nihín i tahū i. Achí yá.

Jeē ní tají Juan uū tēe nuū yā

(Lc. 7.18-35)

11 Te ná ni jínu ni ndacu Jesús jniñu nuū ndihúxí uū tēe cáscuáha jín yá, te ni quenda ya

yūcuan cuáhān yā jeē steén yā te nacani ya jnūhun tācá ñuu región yūcuán.

²Te ine Juan vecāa. Te ni nihīn de jnūhun tācá jniñu sāha Cristo. Te ni tají de uū tēe cáscuáha jíin de, ³cuacajñuhún de ya:

¿A máá ní cúu Cristo jeē achí tutu jeē quíji, chí condetu yó inga tēe quíji? áchí de.

⁴Te ni cahān yā jíin de:

Cuángoo te castūhun ró nuū Juan tācá jniñu cájito ró jíin jnūhun cájini ró. ⁵Te cachi rō nuū de jeē ñayuu cuaá cánanune tinūú i, te ñayuu yacua cánacaca i, te ñayuu ndóho cuehyī stehyú cánduvāha i, te ñayuu sohó cánanune sōho i, te ñayuu jihí nátecu i sāha ri. Te suni nácani ri jnūhun nuū ñayuu ndahú jēe jnama Yaā Dios i. ⁶Te yōhyo ndetū tēe jeē ma nácani yátá ni de jeē ruhū cúu Cristo. Súcuan cachi rō nuū Juan. Achí yá jíin de.

⁷Te náa cuanuhun ndīndúú tēe ún, te ni quejéé Jesús cahán yā jnūhun Juan jíin ñayuu:

¿Na vé ni jécondēhe ró jijnáhan ró nde nuū ñuhun téhé? ¿A iin tēe jéni iin jéni uū ni, nájnūhun ite jeē cánda sāha tachí? ⁸Te núu tuú, ¿te na vé ni jécondēhe ró núu súcuan? ¿A iin tēe cúni cujéhu jeē ñuhun sahma lúu? Tuú chí cájini rō jeē tēe cáñuhun sahma lúu, máni ini vehe rey cáyūcú de. ⁹¿Te na vé ni jécondēhe ró núu súcuan? ¿A iin tēe nácani jnūhun Yaā Dios? Cáhan rī jíin ró jeē suu ni jecondēhe ró, te cújéhu ga Juan yáha vēsú tāca gá tēe ni canacani jnūhun Yaā Dios.

¹⁰Chi jnūhun Juan cúu jeē ni cáhān Yaā Dios jeē yosó núu tútu ii:

Tají rí tēe nacani jnūhun rī cosnūú de ichi núú Cristo, návāha coo tūhva ñayuu jeē jinú yā.

Achí Yaā Dios, achí tutu. ¹¹Te jendaá cahán rī jíin ró jeē ini ñayīvi yáha cújéhu ga Juan tēe scuándute vēsú tāca gá tēe jeē ni íyo ini ñayīví. Te vēsú súcuan te tāca tēe núu ga ini ñuu nuū ndácu Yaā andíví jniñu, cújéhu ga de vēsú Juan.

¹²Te nde quivī ní quee Juan tēe scuándute, te nde vijna, chí cánducú ndéyí ñayuu quívicoo i ndaha Yaā andíví jēe ndácu ya jniñu nuū i. Te nde ñayuu xeēn cánducú ndéyí i siquī. ¹³Chi nde ná tu quíji Juan, te ni íyo máá ley Moisés, te suni ni íyo tāca tēe ni canacani jnūhun Yaā Dios. Te ni cacastūhún de ndese coo jeē ndacu Yaā Dios jniñu. ¹⁴Te ni cacahān de jeē ndjíi Elías. Te núu cácuni rō cuatáhú ró jnūhun, te jíní rō jeē maá Juan cúu tēe jeē ní cachi tutu jeē quíji, chí cúu de nájnūhun Elías. ¹⁵Tāca róhó jēe jíni sōho, na chúsóhó ró.

¹⁶Yāhá cachi rī iin jnūhun yátá návāha na cúni rō ndese cúu ñayuu tiempo vijna. Cúu i nájnūhun sūchi lúlí cáhiin nuū yáhu cácasíquí i. Te cácana ndee i xiní jnáhan i: ¹⁷Ni cativi rī scuilí, te tu ní cájita jéhe ró. Te ni cajita ri yaa jeē cuihyá jíta, te tu ní cándahyū rō, achí i. Te nájnūhun cándāa sūchi lúlí un jēe tu ní nújnahan ni i ni iin, súcuan cándāa ró. ¹⁸Chi ni quíji Juan te cuehē jínu ni iyo ndite ni de, tu ní yéji de ni tu ní jíhi de. Te tu ní cánujnahan ni rō, chí ni cacahān rō jeē ñuhun tachí ini de. ¹⁹Yūcuán na

te ni quee maá rí, Yaā ní nduu tēe, te yéji rí jíhi ri, te tu cánujnahan ní rō, te chísoó jnúhun ró cácahān rō jeē máni máá jéē yéji rí jíhi ri vino. Te quíjnāhan ri jíin tēe cástútú xúhun renta jíin táca gá tēe cása ha cuēchi, áchí ró. Te núu cúndichí iin tēe jíin jnúhun Yaā Dios, te jíin jniñu sáha de te nátūu jeē tēe ndíchí cúu de. Achí yá.

Jeē ní cuxeēn yā nuū sava ñuu niñni ni

(Lc. 10.13-15)

²⁰Yūcuán na te ni quejéé yá cúxeēn yā nuū táca ñuu nuū ni sáha ya cuehē jniñu jéhnú, chi tu ní cánacani ni i jeē stóo i cuēchi i. Te ni cahān yā:

²¹Nacā jeē xeēn ndoho ró, ñáyuu ñuu Corazín. Te nacā jeē xeēn ndoho ró, ñáyuu ñuu Betsaida. Chi núu ini ñuu Tiro jíin ñuu Sidón ni sáha ri jniñu jéhnú jeē ni sáha ri ini ñuu maá ró, te yachí nacani ni ñáyuu ñuu un jéē stóo i cuēchi i núú. Te sáha i seña jeē steén jeē nácani ni i siquī cuéchi i, chí cuhun i sahma jnúú te chuhun i yaā xini i núú. ²²Núu súcuan te cáhān rí jíin ró jeē quivī coo juicio te xeēn gā coo castigo siquī rō jijnáhan ró vēsú jeē ni íyo siquī ñuu Tiro jíin ñuu Sidón. ²³Te róhó ñáyuu ñuu Capernaum, zá cájeni ni rō jeē cujéhnú ró nájnūhun iin jeē cáa cuahān ichi ándiví? Tuú chí sa nanuu ró ndé lugar nuū cáyūcu ánuá ndīyí. Chi núu ini ñuu Sodoma ni sáha ri jniñu jéhnú jeē ni sáha ri nuū maá ró, te coo ñuu yúcuan ndé vijna núú. ²⁴Núu súcuan te cáhān rí jíin ró jeē quivī coo juicio te xeēn

gā coo castigo siquī rō vēsú jeē ni íyo siquī ñáyuu ñuu Sodoma. Achí yá.

Nehen nuū ri ndetātu ró, achí yá

(Lc. 10.21-22)

²⁵Te suni quivī un ní cahān Jesús:

Na cútahū na núu ni Tátā, Jitoho andiví jíin ñáyiví. Chi ni jesi ní táca jnúhun ndíchí ní, jeē ma cúni ñáyuu ndichí jíin ñáyuu tūhva cuenta ñáyiví yáha. Te ni steén ni núú ñáyuu cácuu nájnūhun sūchi lúlí. ²⁶Chi súcuan ni nujnahan ni ni Tátā, achí yá.

²⁷Te ni cahān gā yā:

Ndivii ni jēhe Tátá rí nuū rí. Te tu cájini ñáyuu ndé iin cúu ruhū, Sēhe Yaā Dios, chí máá-ni Tátá rí cúu jeē jiní yā ruhū. Ni tu cájini ñáyuu ndese Yaā cúu máá Tátá, chí máá-ni Sēhe cúu jeē jiní. Te íyo ñáyuu jeē cuní maá Sēhe steén yā nuū i ndese Yaā cúu Tátá yā, te máá i suni cuni i. ²⁸Tāca ró jéē ni cuíta ró jíin táca jniñu jíin ley jeē yí sáha jíin ró, nehen quivīcoo ró ndaha ri, te ndetātu ró sáha ri. ²⁹Quiví ró núu jniñu ndácu máá rí, te scuáha ró coo ró nájnūhun íyo máá rí. Chi vītá ni rí te suchí ni rí. Te súcuan te ndetātu ró jíin ánuá rō sáha ri. ³⁰Chi tú yí jéē cuandetū rō nuū rí, ni tú yí jéē squícu ró jniñu ndácu ri. Achí yá.

Jeē ní cataxín de yoco trigo quivī ndetātu

(Mr. 2.23-28; Lc. 6.1-5)

12 Te iin quivī ndetātu ní yāha Jesús cuahān yā nuū cáa trigo. Te tēe cáscuáha jíin yá, cájii de sōco. Te ni quejéé de cátaxín de

yoco trigo cáyeji de. ²Te ni cajito tēe grupo fariseo, te ni cacahān de jíin yá:

Condēhé, chi tēe cáscuáha jíin ró casáha de jniñu jeē tu íyó váha sáha yó quivī ndétátú, áchí ley Moisés.

³Te ni cahān maá yá jíin de:

¿A tu ní cácahu ró tutu ndese ni sáha David, iin quivī jeē ni jíi de sōco jíin tēe cáhiin jíin de? ⁴Te ni quivī de ini vehe Yaā Dios. Te ni yeji de pan ii jeē yosó ndijin nuū Yaā Dios. Te tú na ley jeē cáji de, ni tēe cáhiin jíin de, chi máá-ni sutū cuu caji. Te vēsú súcuan te tú na cuēchi ní íyo siquī de. ⁵¿Te á tu ní cácahu ró tutu ley Moisés, ndese cásájniñu sutū ini templo, vēsú quivī ndétātu cúu? Te tú na cuēchi íyó siquī de, vēsú quivī ndétātu cásájniñu de jniñu jeē cácuu de sutū. ⁶Te cáhān rī jíin ró jeē maá rí jeē iyó yáha, cújéhnū ga rī vēsú templo. ⁷Te tu cájecūhun ni rō jijnáhan ró jñūhun yáha jeē yosó núu tútu ii jeē ni cáhān Yaā Dios: Jeē cuní gā rī cúu jeē cundáhu ni rō jnáhan ró, vēsú jeē socó rō quitī nuū rī, achí yá. Te núu jeē ní cajecūhun ni rō jñūhun yáha, te ma cahān rō súcuan siquī tēe jeē tú na cuēchi núu. ⁸Chi ruhū, Yaā ní nduu tēe, máá rí cúu jeē ndácu jniñu siquī ndese sáha ñayuu quivī ndétátú, áchí yá.

Jeē ní nduvāha tēe ni ichī ndaha

(Mr. 3.1-6; Lc. 6.6-11)

⁹Yūcuán na te cuahān Jesús, te ni quivī ya ini vehe ii sinagoga. ¹⁰Te yūcuan íne iin tēe ni ichī iin ndaha de. Te cácu ni tēe grupo fariseo

jeē nihin de cuēchi siquī yā, te ni cacajnūhún de ya:

¿A íyó ley jeē cuu nasávāha yó ñayuu huhú quivī ndétátú? áchí de.

¹¹Te ni cahān yā jíin de:

¿Ndé iin róhó, núu névāha ró iin lanchi, te núu nńnga ti ini iin yaū quivī ndétátú, te á tu jéhén rō natava rō tī, chí naún? ¹²¿Te á tu cánuú ndasí gá iin tēe vēsú iin lanchi? Núu súcuan te vetū-ni sáha yó jniñu váha quivī ndétátú, áchí yá.

¹³Yūcuán na te ni cahān yā jíin tēe ni ichī ndaha ún:

Scáá ndaha ró.

Te ni scaá de, te ni nduvāha-ni nájñūhun íyó inga. ¹⁴Yūcuán na te ni quendacoo tēe grupo fariseo, te ni candajnūhún de siquī Jesús, ndese cahni de ya.

Jñūhun Jesús jeē ni cáhān

Isaías nde jenahán

¹⁵Te ni jini Jesús jeē súcuan cájeni ni de, te ni quenda ya yūcuan cuáhān yā. Te cuehē ñayuu cándiquin i ya. Te ni nasávāha ya ndihī ñayuu huhú. ¹⁶Te ni ndacu ya jniñu nuū i jeē ma stéén i ya. ¹⁷Te súcuan ni cuu návāha squícu jñūhun ni cahān Yaā Dios siquī Jesús, te ni nacani Isaías jñūhun ya un ndé jenahán:

¹⁸Yāha cúu mozo rī jeē ní nacāji rī,

te manī rī jíin yá, te cúsihī ni rī jíin yá.

Te cuāha ri Espíritu rī coo jíin yá.

Te máá yá sándaa jniñu ñayuu tǎcá nación.

¹⁹Ma tejnáhan ya, ni ma cána jee ya,

te ni ma cahán jee ya ichi jeē cúni ñayuu.

²⁰Ma sáha xeēn yā jíin ñáyuu ni cunihin jnündóho siquī, ni ma snáa yā ñayuu jeē maá lulí-ni cácanđije.

Chi kujéhnú ya siquī ndihi, te ndaā ndacu ya jniñu.

²¹Te ñayuu tācá nación cocuhun ni i jeē jnáma ya i.

Achí Yaā Dios, achí Isaías nde jenahán.

Jeē ní cacahān de jeē jejniñu ya fuerza Satanás

(Mr. 3.19-30; Lc. 11.14-23; 12.10)

²²Yūcuán na te ni caquindeca i nuū yā iin tēe cuáá ñhán, chi ñúhun tachī ini de. Te ni nasávāha ya de. Te ni ndundijin tinūú de te ni nacahān de. ²³Te ndihi ñayuu cuehē un ní canaa ni i cájito i, te ni cacahān i:

¿A tēe yáha cúu jeē ni cáhān Yaā Dios jeē cacu nuū yucūn David? achí i.

²⁴Te tēe grupo fariseo, ni cajini de jeē súcuan cácahān i. Te ni cacahān de:

Tēe yáha ma cúu quenehen de tachī núu jeē tu sáha de jíin fuerza Satanás jeē kujéhnú nuū tachí, achí de.

²⁵Te Jesús ni jini yā jeē súcuan cájeni ni de, te ni cahān yā jíin de:

Tācá nación jeē casásiin máá te cájejnáhan máá, núu súcuan te snáa jeē iyó váha máá. Te núu iin ñuu chí iin vehe casásiin máá te cájejnáhan máá, te ma cúu ga coyūcu cáhnu. ²⁶Te suni súcuan Satanás núu quénehen jnáhan tachí, núu súcuan te sásiin máá.

¿Te ndese cuiñi nihin Satanás jeē ndácu jniñu núu súcuan? ²⁷Chi cácahān rō jeē jíin fuerza Satanás quénehen ri tachí. Te núu súcuan cúu núu, te ñayuu cascuáha jíin máá rō jíjnáhan rō, ¿na jíin fuerza cáquenehen máá i tachí, cájeni ni rō? Núu súcuan te máá i jíjnáhan i cachi jeē ní castívi ndasí suhva rō ni cacahān rō jeē cáquenehen ri tachí jíin fuerza Satanás. ²⁸Te tuú chi sa jíin Espíritu Yaā Dios cúu jeē quénehen ri tachí. Núu súcuan te je ndéé Yaā Dios mēhñu rō jeē ndácu ya jniñu.

²⁹¿Chi ndese cuu quívi iin tēe ini vehe tēe ndacuí jeē quenehen de ndajniñu de? Chi cánuú jeē xíhna gā cuhni de tēe ndacuí ún, te yūcuán na te cuu quenehen de ndajniñu ún. Te suni súcuan cúu jeē jíhni rī Satanás te quénehen ri tachí.

³⁰Te ñayuu tu íyó máni jíin rí, núu súcuan te jíto uhū i ruhū. Te ñayuu tu nástútú jíin rí, núu súcuan te sa jéte núu i ñayuu vējicoo nuū rī.

³¹Jeē yúcuan cáhān rī jíin rō: Iyó modo coo jnūhun cáhnu ni nuū tāca cuéchi casáha ñayuu, jíin núu tāca jnūhun néé cácahān i. Te núu cahān ndevāha i siquī Espíritu Santo, te ma cóne cáhnu ni Yaā Dios nuū i. ³²Te núu na-ni ñayuu cahān i siquī ruhū, Yaā ní nduu tēe, cuu cone cáhnu ni Yaā Dios nuū i. Te núu na-ni ñayuu cahān ndevāha i siquī Espíritu Santo, ma cóne cáhnu ni Yaā Dios nuū i, ni jeē iyó i ñayívi yáha, ni níi tiempo quíji.

Jnūhun yujnu váha jíin yujnu néé

(Lc. 6.43-45)

³³Núu yujnu váha, te váha ndehē, te núu yujnu néé, te cánéé ndehē.

Chi jíin ndéhē te jíin yō ndese yujnu cúu. Te suni súcuan ñayuu. ³⁴Va sēhe coō cácuu ró, chi xeēn rō nájnūhun coō. ¿Ndese cuu cahān rō jnūhun vāha, chi ñayuu cásáha néé cácuu ró? Chi jniñu jeē jéni ni anuá ñayuu, máni yūcuan cáhān i. ³⁵Tēe vāha cáhān de jnūhun vāha, chi íyó ndāā anuá de. Te tēe sáha néé cáhān de jnūhun néé, chi cánéé ánuá de. ³⁶Te cáhān rī jíin ró jeē tǎcá na-ni jnūhun cácahān ñayuu, nacuāha i cuenta jnūhun un quívī coo juicio. ³⁷Chi jíin jnúhun ni cahān rō sándaā yā siquī rō, núu jeē quéndōo ndāā rō chí jēē cóndee cuēchi siquī rō. Achí yá.

Jeē ní cajicān ñayuu tu cácañdije iin jniñu jéhu

(Mr. 8.12; Lc. 11.29-32)

³⁸Yūcuán na te jecu tēe grupo fariseo jíin tēe cástéén tutu ley Yaā Dios, ni cacahān de jíin yá:

Maestro, cácuu na jēē sáha ní iin jniñu jéhu jeē steén núu máá ní cúu Yaā ní tají Yaā Dios, achí de.

³⁹Te ni cahān yā jíin de:

Ñayuu yáha jeē casáha jniñu néé, tu cájetáhú cuiti i Yaā Dios. Te cájicān i iin jniñu jéhu jeē steén núu Yaā ní tají Yaā Dios cúu ri. Te tuá na inga jniñu jéhu stéén rī nuū i, chi máá-ni jniñu jéhu nájnūhun ni cuu jíin Jonás, tēe ni nacani jnūhun Yaā Dios. ⁴⁰Chi nájnūhun ni ine Jonás chíji chācá cáhnu unī nduú unī ñuú, suni súcuan ruhū, Yaā ní nduu tēe, cuu rī te cone ri chíji ñuhun unī nduú unī ñuú, te sáá te natecu rī. ⁴¹Te tǎca ñáyuu ñuu Nínive nuū ní nacani Jonás jnūhun, natecu i jíin ñáyuu tiempo

yáha, quívī juicio jeē sándaā yā cuēchi, te cahān i cuēchi siquī ñáyuu yáha. Chi máá i ni canacani ni i ni castóo i cuēchi i quívī ní nacani Jonás jnūhun nuū i. Te vijna chi cújéhu ga ruhū Yaā íne yáhá vēsú Jonás, te tu cácañdije ró rúhū. ⁴²Te reina jeē ní cujéhu nación ichi sur, natecu ña jíin ñáyuu tiempo yáha, quívī juicio jeē sándaā yā cuēchi, te cahān ña cuēchi siquī i. Chi nde jíca téyí ní quiiji ña ni jini nahín ña jnūhun ndíchí ní cahān rey Salomón. Te vijna chi cújéhu ga ruhū, Yaā íne yáhá vēsú Salomón, te tu cácañdije ró rúhū.

Tachī jeē nastútú jnáhan ndívi ini ñayuu

(Lc. 11.24-26)

⁴³Núu ni quenda iin tachī ini iin tēe tu cándije, te jíca cuu nuū ñūhun téhé, ndúcú núu ndétátú, te tu níhín, yūcuán na te jéni ni maá: ⁴⁴Na quínuhun rī vehe nuū ní quenda ri. Te núu ni ndee tucu, te jíto jeē tēe tu cándije ún, cúu de nájnūhun iin vehe íyú te ni ndundoo. ⁴⁵Yūcuán na te jéquihiñ uxā gā tachī neé gá vēsú maá. Te quívicoo ini tēe un jéē cóyūcu yūcuan. Núu súcuan te xeēn gā ndoho tēe un jéē sándíhí vēsú jeē xíhna ñúhún. Te suni súcuan ndoho ñayuu tiempo yáha jeē casáha néé. Achí yá.

Náná yā jíin ñani yā

(Mr. 3.31-35; Lc. 8.19-21)

⁴⁶Te níní súcuan cáhān yā jíin ñáyuu ún, te ni quee naná yā jíin tǎca ñani yā, íin ña nuū quéhe, te cúní ña cahān ña jíin yá. ⁴⁷Te ni cachi iin tēe nuū yā:

Náná ni jíin táca ñani ni cáhiin nuū quéhe, te cácuni cahān jíin ní, achí de.

⁴⁸Te ni cahān yā jíin tēe ni cahān súcuan jíin yá:

¿Ndé iin cúu náná rī, te ndé iin cácuu ñani rī? Achí yá.

⁴⁹Te ni steén ndaha yá nde nuū cáyūcu tēe cáscuáha jíin yá. Te ni cahān yā:

Suni náná rī jíin ñani rī cácuu táca jéé yáha. ⁵⁰Chi táca ñáyuu casquícu jniñu cúní maá Tátá rī, Yāā ndeé andíví, suu cácuu ñani rī, cuāha rī, náná rī. Achí yá.

Jnūhun yátá síquī tēe jéte trigo

(Mr. 4.1-9; Lc. 8.4-8)

13 Te quivī un ní quenda Jesús vehe cuahān yā, te ni jinū yā ni cucōo ya yumar. ²Te ni cutútú cuéhē ndasí ñayuu nuū yā. Te ni quivī ya ini iin barco, ni cucōo ya. Te táca ñáyuu un cáyūcú i yumar. ³Te jíin jnúhun yátá ni cahān yā cuehē jnūhun nuū i, te súcuan ni cahān yā:

Iin tēe cate trigo, ni quenda de jeē cáte de. ⁴Te ná ni quejéé de jéte de, te jecu trigo ni jitē yuhíchi. Te ni quecoo saa, ni cayejí tī. ⁵Te jecu gā trigo ni jitē nuū ñúhun yuū, nuū tú cuehē ñuhun. Te yachī-ni ni cane, chi tu cóquin ñuhun. ⁶Te nuū ní cane niāndii, te ni ichī-ni, te ni casun, chi tu ní níhín nuū quihín yoho. ⁷Te jecu gā trigo ni jitē nuū náne iñu. Te ni jehnu iñu ún, te ni jesí nuū. ⁸Te jecu ni jitē nuū ñúhun váha, te ni jēhe cuehē nunī. Sava ni jēhe ciento jeē iin iin, te sava ni jēhe unī xico, te sava ga ni jēhe ocō

uxī. ⁹Tāca róhó jéé jíni sōho, na chúsóhó ró. Achí yá.

Najehē cahán yā máni jnūhun yátá

(Mr. 4.10-12; Lc. 8.9-10)

¹⁰Yūcuán na te tēe cáscuáha jíin yá un ní quecoo de nde nuū yā, te ni cacajñuhún de ya:

¿Najehē cúu jeē máni jnūhun yátá cáhán ni jíin ñáyuu? achí de.

¹¹Te ni cahān yā jíin de:

Róhó jíjnáhan ró chi sáha ya jeē cájecūhun ni rō jnūhun ni yisāhi yáha, ndese quívicoo ñayuu ndaha Yāā andíví jeē ndacu ya jniñu nuū i. Te ñayuu yáha jéé tu cácandíje, chi ma jécūhun ni i. ¹²Chi ñayuu je jécūhun ni, chi steén gā yā nuū i, te víhyá gā cuni i. Te ñayuu tu cándíje, sa suhva naa jecu jeē je jíni i ún.

¹³Jeē yúcuan cáhán rī jnūhun yátá jíin i. Chi vēsú cájito i, te quendōo i nájnūhun jeē tú na vé ni cájito i. Te vēsú cájini sōho i, te ma jécūhun ni i, te quendōo i nájnūhun jeē tú na vé ni cájini i. ¹⁴Ñayuu yāhá chi squícu síquī i jnūhun ni cahān Yāā Dios jeē ní nacani Isaías, tēe ni nacani jnūhun nde jenahán:

Vēsú cuni nahín ró, te ma jécūhun ni rō,

te vēsú coto ró, te ma nácuni rō.

¹⁵Chi ñayuu yáha yōhyo ni ndunihni ni i, te yōhyo uhū chusóhó i, te nájnūhun cájesi i tinúú i, návaha coo nájnūhun jeē tu cájito i, ni tu cájini nahín i, te ni ma jécūhun ni i, ni ma násāma ini i quívicoo i nuū rī

jeē nasávāha ri anuá i nuū
cuéchi i.

Achí Yaā Dios, achí tutu.

¹⁶Te máá ró jijnáhan ró, yōhyo ndetū rō, chí cájito ró jíin tñūu ró, te cájini nahín ró jíin sóho ró. ¹⁷Chi jendaá cahán rī jíin ró jeē cuehē tēe ni canacani jñūhun Yaā Dios jíin cuehē tēe ndaā, ni cacuni de coto de jeē cájito máá ró, te tu ní cájito de. Te suni ni cacuni de cuni sōho de jeē cájini sōho máá ró, te tu ní cájini de. Achí yá.

**Jeē ní castūhun cáji yá jñūhun yátá
téé jéte trigo**

(Mr. 4.13-20; Lc. 8.11-15)

¹⁸Núu súcuan te cuni nahín jíjnáhan ró na vé cuni cahān jñūhun yátá téé jéte trigo: Trigo un cúu jñūhun Yaā Dios. ¹⁹Te ñayuu cájini sōho jñūhun ndese ndácu Yaā andíví jniñu, núu tu cájecūhun ni i te cácuu i nájñūhun trigo jeē ni jítē yuhíchi. Yūcuán na te quíji jexeén te quénde-ni jñūhun ini anuá i. ²⁰Te trigo jeē ni jítē nuū ñūhun yuū cúu nájñūhun ñayuu cájini sōho jñūhun, te yachī-ni cájetáhú i te cácusī ni i jíin. ²¹Te tu cúcutú jñūhun ún ini anuá i, te jecu-ni quivī cájetáhú i. Te núu ni quejéé jnúndóho, chí jító xeēn ñayuu i síquī jñūhun ún, te quejéé nácani yátá ni i. ²²Te jeē ni jítē nuū náne iñu cúu ñayuu cájini nahín jñūhun, te cándihvī ni i síquī jeē iyó ini ñayívi yáha, te cúní i cucúcá i, te stáhú un i cujnéñu i jíin. Te ndíhi jeē yáha jési nuū jñūhun ya, te tu íje i jíin jñūhun ya. ²³Te trigo jeē ni jítē nuū ñūhun váha cúu nájñūhun ñayuu cájini nahín jñūhun, te cájecūhun ni i, te

cáhije i jíin jñūhun ya. Te sava i cúu nájñūhun nuni jeē jéhe ciento jeē ñin ñin, te sava ga i jéhe uní xico, te sava ga i jéhe ocō uxí. Achí yá.

Jñūhun yátá síquī ite lasú

²⁴Te ni cahān yā inga jñūhun yátá jíin de:

Jeē ndácu Yaā andíví jniñu cúu nájñūhun ñin tēe jeē ní jete de trigo váha nuū ñūhun de. ²⁵Te íyó ñin tēe jító uhū de tēe chíí trigo. Te náa cáquixí tēe chíí trigo jíin táca jnáhan de, te ni jehēn ni jete ndiquín lású nuū trigo de, te cuahān. ²⁶Te nuū ní cane trigo ún, te ni cane yoco i, te suni súcuan ni jehnu ite lasú un. ²⁷Yūcuán na te ni jengoo mozo ni cacahān i jíin patrón i: ¿A násūu trigo váha ní jéte ní núu ñūhun ní? ¿Te ndese cúu jeē ní canecoo ite lasú nuū? ²⁸Te ni cahān de jíin i: ñin tēe jító uhū ruhū ni sáha jeē yáha. Te ni cacahān mozo un jíin de: ¿Núu súcuan te á cúní ni jéé na quíngoo ná te jñūhun ná? achí i. ²⁹Te ni cahān de: Tuú, chí núu jñūhun ró lású un te sanaa te jñūhun ró ndé jíin trigo. ³⁰Váha ga na cuehnu máá ndé quivī tahndé. Te quivī un cahān rī jíin téé cahnde jeē xihna gā ite lasú cahnde de, te chucú tútú de návāha cahmu yó. Yūcuán na te trigo chí cahnde de ndívi ini yacā rī, achí de. Achí yá.

Jñūhun yátá síquī ndiquín mostaza

(Mr. 4.30-32; Lc. 13.18-19)

³¹Te suni ni cahān yā inga jñūhun yátá jéé steén yā ndese ndúcuehē ñayuu ndácu Yaā andíví jniñu nuū:

Ndúcuehē i nájñūhun jéhu ñin ndiquín mostaza jeē ní jequin ñin

tēe nuū ñúhun de. ³²Te jendaá jeē ñin ndiquin lúlí gá cúu vēsú tāca gá ndiquin. Te núu ni jehnu, te cúu cáhnu ga vēsú tāca gá yucū, chí ndúu nájnūhun ñin yujnu. Te quǵijicoo saa, te cásáha tí tacā tí chíji ndaha ún. Achí yá.

Jnūhun yátá síquī levadura

(Lc. 13.20-21)

³³Te inga jnūhun yátá ní cahān yā jijn de:

Jeē ndácu Yaā andiví jniñu nuū ñáyuu cúu nájnūhun levadura jeē ní quihin ñin ñahan. Te ni saca ña jíin úní kilo harina, nde ni ndaa ndihí ñujen ni sáha. Achí yá.

Jeē máni jnūhun yátá cáhán yā jíin i

(Mr. 4.33-34)

³⁴Tāca jnúhun yáha ní cahān Jesús jíin ñáyuu cuehē ún. Te tāca jeē ní stéén yā, máni jnūhun yátá ní cahān yā jíin i. ³⁵Súcuan ni sáha ya návaha squícu jnūhun ni cahān tēe ni nacani jnūhun Yaā Dios nde jenahán:

Cahān rī tāca jnúhun yátá jíin ñáyuu,
te cachí rī tāca jnúhun yísāhí
ndé quiví ní jecōo ñayiví.
Achí tutu, áchí yá.

Jeē ní castūhun cájí yá jnūhun ite lasú

³⁶Yūcuán na te ni nacuatáhú Jesús nuū ñáyuu. Te ni ndiví ya ini vehe. Te tēe cáscuáha un ní jinūcoo de nuū yā, te ni cacahān de jíin yá: Nacani cájí ní jnūhun yátá ite lasú nuū ná, áchí de.

³⁷Te ni cahān yā jíin de:

Jeē jéte trigo vāha un cúu máá rí, Yaā ní nduu tēe. ³⁸Te ñuhun un cúu

ñayiví. Te trigo vāha un cúu ñayuu cáyihí ndaha Yaā Dios jeē ndácu ya jniñu nuū i. Te ite lasú un cúu ñayuu cáyihí ndaha jexeén. ³⁹Te tēe jíto uhū jeē ní jete lasú un cúu máá jexeén. Te quiví tahndé cúu quiví jínu ñayiví. Te tēe cahnde un cácuu ndajéhé Yaā Dios. ⁴⁰Te nájnūhun tahndé ite lasú te cayū nuū ñuhún, súcuan coo quiví jínu ñayiví. ⁴¹Chí máá rí, Yaā ní nduu tēe, tají rí ndajéhé rí quingoo. Te nastútú yá tāca ñáyuu casquíví jnáhan nuū cuéchi, jíin ñáyuu casáha jniñu néé, quenehen ya i mēhñu ñáyuu ndácu rí jniñu nuū. ⁴²Te jnaa ya i cayū i nuū ñuhún. Te yūcuan ndáhyū i te nacayihí yuhu i jeē ndoho xeēn i. ⁴³Yūcuán na te ñayuu squícu nuū yā chí ndindēé i nájnūhun niāndii, te coyūcú i nuū ndácu máá Tátá i jniñu. Tāca róhó jéé jíni sōho, na chúsóhó ró.

**Jnūhun yátá síquī yejnū
xūhún jeē yísāhí**

⁴⁴Te jeē ndácu Yaā andiví jniñu nuū ñáyuu, suni cúu nájnūhun ñin yejnū xūhún jeē yísāhí chíji ñin ñuhun. Te ni nanihín ñin tēe, te ni nacasi tucu de síquī. Te jeē cúsiñ ní de jíin, te ni jehēn de ní xicó ndihí de jeē névaha de, te ni jeen de ñuhun ún.

**Jnūhun yátá síquī perla
jeē ndeé yahu**

⁴⁵Te jeē ndácu Yaā andiví jniñu nuū ñáyuu, suni cúu nájnūhun ñin tēe jéen xíco, te ndúcú de perla vāha. ⁴⁶Te ni jini de ñin perla jeē yáhu ndasí, te ni jehēn de ní xicó ndihí de jeē névaha de, te ni jeen de perla un.

Jnūhun yátá síquī ñunu jní chācá

⁴⁷Te jeē ndácu Yaā andiví jniñu nuū ñáyuu, suni cúu nájñūhun iin ñunu jeē cásingava de ini mar, te quívicoo ndinuū chācá. ⁴⁸Te núu ni chitú ñunu ún, te cánatava de yundúte. Te cáucucōo de cánacāji de chācá. Te chācá váha cájnaa de ini jica, te chācá tú váha cáscáne de. ⁴⁹Te suni súcuan coo quiví jínu ñayiví. Chi quijicoo ndajéhé yā, te sásin ya ñayuu casáha jniñu néé méhñu ñáyuu casáha jniñu váha. ⁵⁰Te ñayuu cunéé chi jnaa ya i cayū i nuū ñuhún. Te yūcuan ndáhyū i te nacayihí yuhu i jeē ndoho xeēn i. Achí yá.

Jnūhun yátá síquī ndajniñu ndéé yahu

⁵¹Te ni cajñūhun yá de jijnáhan de:

¿A ní cajecūhun ni rō tāca jnúhun yáha, chí tuú? áchí yá.

Te ni cacahān de jíin yá:
Ni cajecūhun ni ná, áchí de.

⁵²Te ni cahān yā jíin de:

Iyó váha núu súcuan. Te iin tēe stéén tutu ley Yaā Dios, núu je ni cutūhva de ndese ndácu Yaā andiví jniñu, te cuu stéén de tāca jnúhun síquī ún. Chi cúu de nájñūhun iin tēe chíí vehe. Te ini yejñū de táva de ndajniñu ndéé yahu, sava jeē jeé jíin sava jeē je ni cunahán iyó. Achí yá.

Jeē cuánuhun yā ñuu Nazaret

(Mr. 6.1-6; Lc. 4.16-30)

⁵³Te ná ni ndihí ni cahān Jesús tāca jnúhun yátá yáha, te ni quenda ya yūcuan cuáhān yā. ⁵⁴Te ni

najinū yā ñuu yā Nazaret. Te ni stéén yā jnūhun ini vehe i sinagoga yūcuán. Te ni canaa ni ñayuu cájini nahín i, te ni cacahān i:

¿Ndé nuū ní cutūhva tēe yáha tāca jnúhun ndíchí? ¿Te ndese cúu sáha de tācá jniñu jéñu yāhá? ⁵⁵Chi sēhe carpintero cúu tēe yáha, te náná de cúu María, te ñani de cácuu Jacobo, José, Simón, jíin Judas. ⁵⁶Te suni cáyūcu cuáha de jíin yó yāhá. ¿Te ndese jíin de tāca jnúhun yáha núu súcuan? Achí ñayuu.

⁵⁷Te súcuan ni cacujéé ni i nuū Jesús. Te ni cahān yā jíin i:

Tāca tēe nácani jnūhun Yaā Dios, iyó yíñuhún ñayuu jíin de, te máni ñayuu ñuu maá de jíin ñáyuu vehe máa de cúu jeē tu iyó yíñuhún jíin de. Achí yá.

⁵⁸Te tu ní sáha ya cuehē jniñu jéñu yūcuán, chi tu cácanđije i ya.

Jeē ni jíihí Juan tēe scuándute

(Mr. 6.14-29; Lc. 9.7-9)

14 Te tiempo yūcuan te Herodes, tēe ndácu jniñu región Galilea, ni jini jnūhun de jnūhun Jesús. ²Te ni cahān de jíin ñáyuu cáhiin jíin de:

Tēe yūcuan cúu Juan tēe ni scuándute, te ni natecu de. Jeē yūcuan iyó poder de sáha de jniñu jéñu. Achí de.

³Chi Herodes, je ni ndacu de jniñu jeē na quívi Juan vecāa, jíin jéē na cónuhni de jíin cadena. Súcuan ni sáha de jeē síquí Herodías, ñasihí ñani de Felipe.

⁴Chi Juan ni cahān de nuū Herodes: Tu iyó ley condeca ró ña, áchí de.

⁵Te jeē yūcuan ní cuni Herodes cahni de Juan. Te yúhú de jeē quití

ni ñayuu, chi ndihi i jéni ndije ni i jeē iin tēe nácani jnūhun Yaā Dios cúu Juan. ⁶Te iin quivī ni sáha Herodes iin vico quivī ní cacu de. Te sēhe síhí Herodías ni quivī i ni jita jéhé i nuū ñáyuu ní cana de ún. Te ni cusihī ni Herodes ni sáha i. ⁷Te ni jejnūhun téyí de jeē cuáha de núu na vé cacān i nuū de. ⁸Te ni jehēn i ni cajnūhún i náná i na vé cacān i. Te ni ndīvi i nuū Herodes, te ni cahān i:

Cuāha ní xíní Juan tēe scuándute, cone nuū iin cohō, achí i.

⁹Yūcuán na te rey Herodes ni cucuíhyá ni de. Te siquī jeē ni jéjnūhun téyí de, jíin jéē ní cajini sōho tēe cáyeji staā jíin de, jeē yúcuan ní ndacu de jniñu jeē na cuáha nuū i. ¹⁰Te ni tají de soldado jeē na quícahnde xinī Juan ini vecāa. ¹¹Te ni quee soldado un jíin xíní Juan, íne nuū iin cohō, te ni jēhe nuū súchi síhí un. Te máá i ni jendeca i nuū naná i.

¹²Yūcuán na te ni jengoo tēe cáscuáha jíin Juan, te ni candonehen de yiqui cúñu Juan, te ni cachindūji de. Yūcuán na te ni jengoo de ni cacastūhún de nuū Jesús.

Jeē ni scáji yā uhūn mil tēe

(Mr. 6.30-44; Lc. 9.10-17; Jn. 6.1-14)

¹³Te ná ni jini Jesús jnūhun, te ni cujiyo ya yūcuan cuáhān yā jíin barco, jeē cóne síin ya iin lugar nuū tú ñayuu. Te ni cajini ñayuu jeē cuahán yā. Te tācá ñuu ni quendaco i cájica jéhé i, cuajnanan i ya. ¹⁴Te nuū ní quenda Jesús ini barco, te ni jito ya ñayuu cuehē ún. Te ni cundáhú ni yā i, te ni

nasávāha ya tāca ñáyuu cácuñu jeē véjicoo i jíin. ¹⁵Te nuū ní ini, te tēe cáscuáha jíin yá, ni quecoo de nuū yā, te ni cacahān de:

Je ni ini, te yāhá chi tú na ñayuu yúcu. Núu súcuan te tají ní ñayuu na quíngoo i tācá ñuu, te cuaan i jeē cáji i.

¹⁶Te ni cahān Jesús jíin de:

Tu jíini ñūhún quíngoo i, chi cuāha máá ró jeē cáji i, achí yá.

¹⁷Te ni cacahān de jíin yá:

Tú na vé cánevāha ná yāha, chi uhūn-ni staā jíin úu-ni chācá, achí de.

¹⁸Te ni cahān yā jíin de:

Cuāha na quíji, achí yá.

¹⁹Te ni cahān yā jíin ñáyuu un jéē na cúcōo i nuū íte. Te ni quihin ya ndihúhún staā jíin úu chācá un. Te ni ndacoto ya ichi ándiví, te ni nacuatáhú yá. Te ni tahú cuéchí yá staā ún, te ni jēhe ya nuū tēe cáscuáha jíin yá. Te máá de ni casaja de nuū ñáyuu cuehē ún. ²⁰Te ndivii i ni cayejí, te ni candutú chíji i. Te ni canastútú de pedazo jeē ní quendōo, te ni chitú úxí uū jica. ²¹Te tēe ni cayejí un cúu nájñūhun uhūn mil, te síin ga cúu ñahan jíin súchi lúlí.

Jeē ní jica jéhé yá nuū mar

(Mr. 6.45-52; Jn. 6.16-21)

²²Yūcuán na te ni cahān-ni Jesús jíin tēe cáscuáha jíin yá jeē na quívicoo de barco, te cosnūú de quíngoo de nde inga lado mar, níni jéē nátají yá ñayuu un quíngoo i. ²³Te nuū ní cuu ni nacuatáhú yá nuū i, te máñúhún-ni ya ni caa ya yucu, cuacacān tahú yā. Te ni cuaa, te íne máñúhún yá yūcuán.

²⁴Te barco un, je ni cuu sava nuū mar cuahān. Te ndute mar un nátundahá níhin barco, chi vēji tachī ichi núú de. ²⁵Te jeē yínee gā ni quee Jesús nuū de, jíca jéhé yá nuū mar. ²⁶Te tēe cáscuáha ún, ni cajito de ya jeē jíca ya nuū mar. Te ni candondava de, te ni cacana cóhó de jeē cáyuhú de.

Jíhná cúu, áchí de.

²⁷Te ni cahān-ni Jesús jíin de:

Ndeyí coo ni rō, te ma yūhu ró, chi máá rí cúu, áchí yá.

²⁸Yūcuán na te ni cahān Pedro jíin yá:

Núu máá ní cúu, te cahān ni jíin ná jēe na cáca jéhé ná nuū mar te jeē na núu ní, áchí de.

²⁹Te ni cahān yā:

Nehen núu súcuan, áchí yá.

Te ni quenda Pedro ini barco, te ni jica de nuū ndúte cuahān de nuū Jesús. ³⁰Te nuū ní jini de jeē níhin yíhi tachī, te ni yūhú de. Te ni quejéé de quee de chíji ndute. Te ni cana cóhó de:

Jnama ní sáña, áchí de.

³¹Te Jesús ni jni-ni ya ndaha de. Te ni cahān yā jíin de:

Tēe tu cándíje níhin cúu ró.

¿Naun ni nayūhu ró? Achí yá.

³²Te ni quívi ya ini barco un jíin de, te ni jecuñi-ni tachī. ³³Yūcuán na te tēe cáhiin ini barco un, ni cajecuñi yití de nuū yā. Te ni cacahān de:

Jendaá ndije jeē Sēhe Yaā Dios cúu ní, áchí de.

**Jeē ní nasávāha ya ñayuu cácuñi
región Genesaret**

(Mr. 6.53-56)

³⁴Te ni quenda jíyo ya jíin de nuū mar un, ní jinū yā región Genesaret.

³⁵Te ñayuu yūcuan ní canacuni i ya. Te ni cascáca i jñuhun tēcá ndañū yūcuan jēe ni jíin yā. Te ñayuu ni caquindeca i ñayuu cácuñi nuū yā.

³⁶Te ni cacahān ndahú i jíin yá jeē na quéhé i vēsú yusáhma ya. Te tēe cáca ñayuu jeē ní caquehé sahma ya, ni canduvāha i.

Siquí ndese cújnehén ñayuu

(Mr. 7.1-23)

15 Yūcuán na te jecu tēe grupo fariseo jíin tēe cástéen tutu ley Yaā Dios, ni quendacoo de ñuu Jerusalén, te ni quecoo de nuū yā. Te ni cacahān de jíin yá:

²Tēe cáscuáha jíin ró, ¿naun cástívi de costumbre jeē ní cajequin ñayuu jenahán? Chi tu ní cáscuicu de costumbre jeē nándahá de nuū yā te caji de staā. Achí de.

³Te Jesús ni cajñuhun yá de:

Te máá ró jíin náhan ró, ¿suni naun cástívi ró jñiñi ní ndacu Yaā Dios nuū rō? Chi sa costumbre maá ró cúu jeē casquicu ró. ⁴Chi ni cahān Yaā Dios: Coó yíñuhún ró jíin tátá rō jíin náná rō. Te núu ndé iin cahān siquí tata chí síquí naná, na cúu nahín, áchí Yaā Dios. ⁵Te máá ró chi cacahān rō jeē cuu cahān iin tēe jíin tátá de jíin náná de: Ma cúu chindéé ñáhán ná níhin cuáha na jēe cáji ni jēe cúhun ní, chi ndíhi jeē névāha ná, je ni socō na núu Yaā Dios. ⁶Te tēe cahān súcuan, tuá cánuu chindéé ñáhán de tátá de náná de, áchí ró jíin náhan ró. Te súcuan cástívi ró jñiñi ní ndacu Yaā Dios, jeē siquí costumbre ni cajequin máá ró. ⁷Tēe stáhú-ni cácuu ró. Ndañi na nacani Isaías jñuhun siquí rō nde jenahán, yósó núu tútu i jeē ni cahān Yaā Dios:

⁸ Ñayuu yáha chi máá yuhu-ni i cájetáhú i ruhū,
te nasūu ndé jíin ini jíin ánuá i.

⁹ Te cáchiñúhún sáá-ni i ruhū,
chi jñūhun cástéén i cúu jñiñu
ní candacu tēe,
te nasūu jéé ní ndacu máá rí
cúu.

Achí Yaā Dios. Achí yá.

¹⁰ Te ni cana ya ñayuu cuehē ún,
te ni cahān yā jíin i:

Cuni sōho vāha jíjnáhan ró, te
chuhun ni rō: ¹¹ Nasūu jéé quívī ini
yuhu ñayuu cujnéhén i sáha. Chi
jñūhun jeé quénda yuhu i, yūcuan
cúu jeé cujnéhén i sáha, áchí yá.

¹² Yūcuán na te tēe cáscuáha
jíin yá, ni quecoo de nuū yā, te ni
cacahān de:

¿A jíiní ni jéé ní caquitī ni tēe
fariseo jeé ní cajini sōho de jñūhun
ni cahān ní? áchí de.

¹³ Te ni cahān maá yá:

Cácuu de nájñūhun yujnu jeé tu ní
náchuhun Tátá rī, Yaā ndeé andívī,
te ñin quívī te jñuhun ya quihīn.

¹⁴ Na quíngoo máá de. Chi cácuu de
nájñūhun tēe cuáá cástéén ichi nuū
inga tēe cuáá. Chi núu ñin tēe cuáá
stéén de ichi nuū inga tēe cuáá, te
ndíndúú de ñinga de xehvā. Achí yá.

¹⁵ Te ni cahān Pedro jíin yá:

Castūhun cájī ní jñūhun yátá yáha
nuū na jíjnáhan ná, áchí de.

¹⁶ Te ni cahān Jesús:

¿Te á suni máá ró ná tu jecūhun
ni rō chí naún? ¹⁷ ¿A tu cájecūhun
ni rō jeé tāca jéé yéji ñayuu, chi
quívī chíji i, te quénda-ni cuahān?

¹⁸ Te jñūhun jeé quénda yuhu ñayuu,
chi nde ini anuá i vēji, te yūcuan
cúu jeé cujnéhén i sáha. ¹⁹ Chi nde
ini anuá ñayuu quénda jeé jéni néé

ni, jeé jéhni ndīyī, jeé casíquí ndeé
jnáhan, jeé jíca jnéni, jeé sacuíhná,
jeé cahán jñūhun stáhú, jeé cahán
yāa síquí jnáhan. ²⁰ Tāca jéé yáha
cúu jeé cujnéhén ñayuu sáha. Te
núu tu squícu i costumbre jeé
nándahá i te caji i staā, tu cúnéhén
i sáha. Achí yá.

**Ñahan inga nación jeé ní candíje
ñihin**

(Mr. 7.24-30)

²¹ Te ni quenda Jesús yūcuan
cuáhān yā región Tiro jíin Sidón.

²² Te ñin ñahan ñuu Canaán, néne
ña región Tiro jíin Sidón, te ni quee
ña nuū Jesús. Te ni cana jee ña:

Tátā, Sēhe yucūn David, cundáhú
ni ni sáña víi. Chi sēhe síhí ná,
ñūhun tachī ini i, te yōhyo xeēn
ndóho i, áchí ña jíin yá.

²³ Te tu ní cáhán cuítī yā jeé ni
cáhān ña. Yūcuán na te ni quecoo
tēe cáscuáha jíin yá, te ni cacahān
de:

Cahān ni jíin ña na quíhín ña, chi
cána jee ña vēji ña yatā yō, achí de.

²⁴ Te ni cahān yā jíin ña:

Nuū maá-ni ñayuu nación Israel
ni tají Yaā Dios sáña vēji ná, chi
cácuu i nájñūhun lanchi, quítī ní
sana.

²⁵ Te ñahan ún chi ni quee ña,
te ni jecuíñī yītī ña nuū yā, te ni
cahān ña:

Tátā, chindéé ñáhán ní sáña víi,
achí ña.

²⁶ Te ni cahān yatá yá jíin ña:

Tu íyó váha jeé quénde yō staā
sēhe, te cuāha yó núu ína, achí yá.

²⁷ Te ni cahān ña:

Jendaá cahán ni Tátā, te
chindéé ñáhán ní sáña vēsú cúu

ná nájñuhun ina. Chi suni máá tí cániñin nahín tí pedazo staā cuechí jéē cóyo chíji mesa jitoño tī cáyeji tī, achí ña jíin yá.

²⁸Yūcuán na te ni cahān Jesús:

Yōhyo vāha jeē cándíje nihin ní súcuān, nánā. Te na sáha ná jéē cuní ni, achí yá.

Te máá hora un ní nduvāha-ni sēhe síhí ña.

Jeē ní nasávāha ya cuehē ñayuu cácuñū

²⁹Te ni quenda Jesús cuahān yā yūcuán, te ni yāha ya yumar Galilea. Te ni caa ya ñin yucu, te yūcuān ní cucōo ya. ³⁰Te cuehē ñayuu ni quecoo i nuū yā, te cándeca i tāca jéē cájica chácua, jeē cuaá, jeē ñihín, jeē cacúhndú, jíin cuéhē gā ñayuu cácuñū. Te ni cajequin i nuū jehé Jesús. Te ni nasávāha ya i jíināhan i. ³¹Te ni canaa ni ñayuu un cájito i jeē nácāhān ñayuu ñihín, ndúvāha ñayuu cuhndú, nácaca vāha ñayuu chacuá, nánune tinūu ñayuu cuaá. Te ni cacahān i jeē yóhyo vāha Yaa cúu Yaa Dios ñuu i Israel.

Jeē ni scáji yā cuñ mil tēe

(Mr. 8.1-10)

³²Yūcuán na te ni cana Jesús tēe cáscuáha jíin yá, te ni cahān yā jíin de:

Cúndáhú ni rī ñayuu cuehē yāhá, chí je ni cuu unī quivī cáyucú i jíin rí, te tuá na vé caji i. Te tu cúní rí natají rí i nuhun ndite i, chí núu súcuān te sava ichi te cuíta í i. Achí yá.

³³Te ni cacahān tēe cáscuáha jíin yá:

¿Te ndé nuū nihín yō staā caji ñayuu cuehē yāhá? Chí yāhá tú na ñayuu yúcu, achí de.

³⁴Te ni cajñuhun yá de:

¿Nasaa staā cánevāha ró?

Te ni cacahān de:

Uxā-ni, jíin jecu chācá lúlí, achí de.

³⁵Yūcuán na te ni cahān yā jíin ñayuu cuehē un jéē na cúcōo i.

³⁶Te ni quihin ya ndihúxá staā jíin chāca ún, te ni nacuatáhú yá nuū Yaa Dios. Te ni tahu cuéché yá, te ni jēhe ya nuū tēe cáscuáha jíin yá, te máá de ni casaja nuū ñayuu.

³⁷Te ndihí i ni cayeji, te ni candutú chíji i. Yūcuán na te ni canastútú de pedazo jeē ní quendōo, te ni chitú úxā jica. ³⁸Te tēe ni cayeji ún, nde cuñ mil de cúu, te sñin ga cúu ñahan jíin súchi lúlí. ³⁹Yūcuán na te ni nacuatáhú yá nuū ñayuu ún, te cuanungoo i. Te ni ndēvi ya ini barco, te cuahān yā región Magdala.

Jeē cájicān de ñin jñiñu jéñnu nuū yā

(Mr. 8.11-13; Lc. 12.54-56)

16 Te ni quecoo tēe grupo fariseo jíin tēe grupo saduceo nuū yā. Chí cácuñi de coto ndee de ya, te ni cajicān de jeē na sáha ya ñin jñiñu jéñnu jeē coo ñin seña ichi ándiví. ²Te máá yá ni cahān yā jíin de:

Núu ni ini, te cacahān rō: Nandii, chí ni nasácuéhé i andiví, achí rō.

³Te jenéhen chí cacahān rō: Vijna te cuun saū, chí ni nasácuéhé i andiví, achí rō. Tēe stáhú-ni cácuu rō. Chí cájecūhun ni rō ndese stéén seña andiví, te tu cájecūhun ni rō ndese stéén tēcá jñiñu jéñnu sáha

ri tiempo yáha. ⁴Ñayuu yáha jeē casáha jniñu néé, tu cájetáhú cuíti i Yaā Dios. Te cájicān i jeē sáha ri ñin jniñu jéhnú jeē coo ñin seña andiví. Te tuá na inga jniñu jéhnú stéén rī nuū i, chí máá-ni jniñu jéhnú nájñuhun ni cuu jíin Jonás, tēe ni nacani jñuhun Yaā Dios nde jenahán. Achí yá.

Te ni stóo ya de jíjnáhan de, te cuahān yā.

Jñuhun levadura tēe fariseo

(Mr. 8.14-21)

⁵Te tēe cáscuáha jíin yá ni canaa ni de condiso de staā náa cuangoo de jíin barco inga lado mar. ⁶Te ni cahān Jesús jíin de:

Coto má candíje ró levadura tēe grupo fariseo jíin tēe grupo saduceo, achí yá.

⁷Te tēe cáscuáha un ní cacahān maá de:

Va siquī jeē tú na staā ndíso yó, jeē yúcuan cáhán yā súcuan, áchí de.

⁸Te ni jini Jesús, te ni cahān yā:

¿Najehē cácahān rō jeē ni cáhān rī súcuan siquī jeē tú na staā cándiso ró? Tēe tu cándíje nihin cácuu ró. ⁹¿A ná tu jecūhun ni rō jeē tu ní cáhán rī súcuan siquī jeē tu ndíso ró stáá? ¿A tu cánucūhun ni rō jeē ní tahú cuéché rí uhūn staā ni cayejí uhūn mil tēe, te nasaa jīca ní canastútú ró jeē ni quéndōo? ¹⁰¿Te á tu cánucūhun ni rō jeē ní tahú cuéché rí uxā staā ni cayejí cuūn mil tēe, te nasaa jīca ní canastútú tucu ró? ¹¹¿Te najehē tu cájecūhun ni rō jeē násūu siquī staā ni cahān rī jíin ró jeē ni cáhān rī jeē coto má candíje ró levadura

tēe fariseo jíin tēe saduceo? Achí yá jíin de.

¹²Yūcuán na te ni cajecūhun ni de jeē tu ní cáhán yā jeē coto de jeē ma cáji de pan jeē yíhi levadura, chí sa suhva ni cahān yatá yá jeē ma cándíje de jñuhun stáhú cástéén tēe fariseo jíin tēe saduceo.

Jeē ni cáhān Pedro jeē Jesús cúu Cristo

(Mr. 8.27-30; Lc. 9.18-21)

¹³Te nuū ni jíinū Jesús región Cesarea Filipino jíin tēe cáscuáha jíin yá, te ni cajñuhun yá de:

Ruhū, Yaā ní nduu tēe, ¿ndé ñin cúu ri cácahān ñayuu?

¹⁴Te ni cacahān de:

Sava i cácahān jeē cúu ní Juan tēe ni scuándute. Te sava ga i cácahān jeē cúu ní Elías, tēe ni nacani jñuhun Yaā Dios nde jenahán. Te sava ga i cácahān jeē Jeremías chí inga tēe ni nacani jñuhun Yaā Dios cúu ní. Achí de.

¹⁵Te ni cahān yā jíin de:

Te máá ró, ¿ndé ñin cúu ri cácahān rō? achí yá.

¹⁶Te ni cahān Simón Pedro:

Máá ní cúu Cristo, Yaā ní tají Yaā Dios. Te cúu ní Sēhe Yaā Dios, Yaā técu ní cáni, áchí de.

¹⁷Te ni cahān Jesús:

Yōhyo ndetū rō, Simón sēhe Jonás, chí nasūú ñin ñayuu ni steén jñuhun yáha nuū rō, chí sa suhva máá Tátá rī, Yaā ndeé andiví, ní steén yā nuū rō. ¹⁸Te ruhū suni cáhán rī jíin ró jeē maá ró cúu Pedro, jeē cuní cahān: yuū. Te jñuhun ndaā jeē ni cáhān rō jeē maá rí cúu Cristo, suu cúu nájñuhun ñin yuū cáhnu. Te siquī yuū cáhnu yáha sáha rí jeē

quítuu vehe, te vehe un cúu ñayuu cácañdeje ruhū. Te tu ndé vé cundeyí cuítí siquí i, ni jñūhun xeēn jeē cájihī i, tuá na vé cúu sáha jíin ánuá i. ¹⁹Te máá ró condiso jñiñu ró sáha ró jéē quívicoo ñayuu ndaha Yaā andiví jeē ndacu ya jniñu nuū i. Te tāca jéē cási rō jeē ma sáha ñayuu ini ñayiví yáha, suni casi jeē cáyucú nde andiví. Te tāca jéē cuáha ró jñūhun sáha i ini ñayiví yáha, suni jeē cáyucú nde andiví cuáha jñūhun. Achí yá.

²⁰Yūcuán na te ni ndacu ya jniñu nuū tée cáscuáha jíin yá, jeē ma cáchi de nuū ní ñin ñayuu jeē cúu ya Cristo.

Jeē ní castūhún Jesús jeē cúu yā

(Mr. 8.31-9.1; Lc. 9.22-27)

²¹Te nde saá ní quejéé Jesús cástūhun cájí yá nuū tée cáscuáha jíin yá jeē jíini ñūhún quihīn yā ñuu Jerusalén. Te tāca téē jéñu jíin sūtū cácujeñu jíin téē cástéén tutuley, stóho ndasí de ya. Te cahni de ya, te nuū uní quiví te natecu yā, achí yá. ²²Yūcuán na te Pedro, ni cana máñuhún de ya, te ni quejéé de cáhán de nuū yā:

¿Naun cáhán ni súcuan? Chi tu cúní Yaā Dios jeē cuu súcuan. Tu jíini ñūhún cuítí ndoho ní jñúndóho yáha, áchí de.

²³Te ni ndió cóto ya nuū Pedro, te ni cahān yā jíin de:

Cujiyo quihīn rō, chi cáhán rō ná cáhán Satanás. Chi tēē ndúcú stfívi rúhū cúu ró. Te tu jéni ni rō nájnūhun jéni ni Yaā Dios, chi sa suhva jéni ni rō nájnūhun cájeni ni ñayuu. Achí yá.

²⁴Yūcuán na te ni cahān yā jíin téē cáscuáha jíin yá:

Na-ni ñayuu núu cúní i condiquīn i ruhū, na cási i jeē cuní maá i, te na cónduquīn i ruhū te cuáha i jñūhun ndoho i jñúndóho jeē siquí rī, vésú na cúu i. ²⁵Chi núu ndé ñayuu cuní i cácu i nuū jñúndóho quiji nuū i jeē siquí ruhū, núu súcuan te jnahnū ndetū i níí cáni. Te núu ndé ñayuu, vésú na cúu i jeē siquí ruhū, te cotecu i níí cáni. ²⁶¿Chi ndé cuajniñu vésú na cundeyí ñayuu nihīn i níí ñáyiví, te núu quiví i nuū jnahnū ndetū i? Chi tú na jíin cuítí chunaa ñayuu jeē cácu ánuá i. ²⁷Chi ruhū, Yaā ní nduu tēē, ndiji ri jíin táca ndajéhé rī, te yōhyo luu cujéñu ri nájnūhun cújéñu Tátá rī. Yūcuán na te cuáha ri tahū nuū ñin ñin ñayuu núu ndese jniñu ni casáha i. ²⁸Te jendaá cahán rī jíin ró jeē sava tēē cáhiin yāhá, ma cúu de chi nde cuni de jeē maá rí, Yaā ní nduu tēē, ndácu ri jniñu jíin poder rī.

Jeē tucu ni nduu ya

(Mr. 9.2-13; Lc. 9.28-36)

17 Yūcuán na te nuū inū quiví te Jesús ni jeca ya Pedro jíin Jacobo jíin Juan ñani Jacobo, cuahān sñin ya jíin de ñin yucu súcún. ²Te yūcuán, tucu ni nduu ya nuū de. Chi ni ndindēe núu yā nájnūhun niāndii. Te sahma ya ni nducujín quiyi ndasí, nájnūhun nduva luz. ³Te ni cajito-ni de jeē Moisés jíin Elías, tēē ni cahiyó jenahán, cándajnūhún de jíin yá. ⁴Te ni cahān Pedro jíin yá:

Nacā jeē váha jeē cáhiin ná yáha. Te núu cúní ni te na sáha ná uní vehe ramada, ñin cuu máá ní, inga cuu Moisés, te inga cuu Elías, achí de.

⁵Te níní cáhán gā de, te ni quiiji vicō nūhun jēē yaa ndasí, ni jesi-ni nuū de. Te nuū vicó un ní cahān iin jnūhun:

Yāha cúu Sēhe ri jeē maní ndasí rí jíin, te cúsihí ni rí jíin. Na cúni nahín ró jnūhun cáhán yā. Achí.

⁶Te jeē súcuan ni cajini sōho tēe cáscuáha ún, te ni cajecava ndeyi de, chi yōhyo ni cayūhú de.

⁷Yūcuán na te ni quee Jesús, te ni soó yá ndaha ya siquī de. Te ni cahān yā:

Ndocuñī, te ma yūhu ró jijnáhan ró, achí yá.

⁸Te ni candacoto de, te tuá tēe un ní cájito de, chi máá iin na Jesús.

⁹Te ni cananuu de jíin yá yucu ún. Te ni ndacu ya jniñu nuū de:

Ma cáchi rō nuū ní iin jeē súcuan ni cajito ró, chi nde na nátecu maá rí, Yāa ní nduu tēe, achí yá.

¹⁰Yūcuán na te tēe cáscuáha jíin yá, ni cacajnūhún de ya:

Núu súcuan te tēe cástéén tutu ley Yāa Dios, ¿najehe cácahān de jeē cánuú ndiji Elías xihna gā, te sáá te quiiji Yāa cúu Cristo? achí de.

¹¹Te ni cahān Jesús jíin de:

Jendaá cúu jeē xihna gā quiiji iin tēe cuu nájnūhun Elías, te sātūhva de ndihi, achí tutu. ¹²Te cáhán rí jíin ró jeē jé ni quiiji tēe ni cuu nájnūhun Elías, te tu ní jíiní ñayuu jeē suu de cúu. Te ni casáha ndevāha ñayuu jíin de ndihi jeē ní cacuu ni maá i. Te suni súcuan stóho i ruhū, Yāa ní nduu tēe. Achí yá.

¹³Yūcuán na te tēe cáscuáha un, ní cajecūhun ni de jeē cahán yā jeē Juan tēe scuándute, ni cuu de nájnūhun Elías.

Jeē ní nasávaha ya iin sūchi jíhí yīhí

(Mr. 9.14-29; Lc. 9.37-43)

¹⁴Te ni najinū yā jíin de nuū ñayuu cuehē ún. Te ni quee iin tēe, ni jecuñī yití de nuū yā, te ni cahān de:

¹⁵Cundáhú ni ni séhe yīí ná, chi yōhyo xeēn ndóho i cuehyī jíhí yīhí. Te je ni cuu cuehē jínu cótúú i nuū ñuhún jíin núu ndúte. ¹⁶Te ni quindeca ná i nuū tēe cáscuáha jíin ní, te tu ní cúu sávaha de i, achí de.

¹⁷Te ni cahān Jesús:

Ñayuu yōhyo nihni ni cácuu ró chi tu cácañdeje ró jēē cuu nduvāha i. ¿Nasaa ga quivī condee ri jíin ró? ¿Te nasaa ga quivī cuandeyí ni rí jíin ró? Cuáquihin sūchí un na quíji i, achí yá.

¹⁸Te ni cahān yā nuū tachí, te ni quenda-ni ini sūchí un. Te ni nduvāha-ni i máá hora un.

¹⁹Yūcuán na te tēe cáscuáha un, ní cacajnūhun síin de ya:

¿Najehe tu ní cúu quenehen ná tachí un jijnáhan ná? achí de.

²⁰Te ni cahān yā:

Siquī jeē tu cácañdeje nihin ró jēē cuu sáha ró. Chi jendaá cahán rí jíin ró, jeē núu candíje ró vēsú iin tíhli-ni, cūhva nájnūhun iin ndiquin mostaza, te cuu sáha ró táca-ni jniñu yí. Chi cuu cahān rō jeē na cújiyo yucu yāha quihīn inga lado, te cújiyo-ni. Te tēcá-ni jniñu chi cuu sáha ró, te núu candíje nihin ró jēē cúu. ²¹Te iin tachí súcuan chi ma quénda cuiti quihīn, te núu tu cacān tahú rō te coo ndite ni rō. Achí yá.

Jeē ni cáhán tucu ya jeē cúu yā

(Mr. 9.30-32; Lc. 9.43-45)

²²Te jíca cuu Jesús jíin de jijnáhan de región Galilea, te ni cahān yā jíin de:

Máá rí, Yaā ní nduu tēe, nastúu i ruhū nuū tāca tēe xeēn. ²³Te cahni de ruhū, te nuū uní quivī te natecu rī, achí yá.

Te ni canducuíhyá ndasí ni de jeē ni cáhān yā jñuhun yáha.

Siquī xúhun cuajníñu ini templo

²⁴Te ni jinū yā ñuu Capernaum jíin tēe cáscuáha jíin yá. Te tēe cástútú xúhun templo ni quecoo de, te ni cacajñuhún de Pedro:

Te maestro maá ró jijnáhan ró, ¿á tu cuáha de xuhún cuajníñu ini templo, chí naún? áchí de.

²⁵Te ni cahān Pedro:

Cuu, áchí de.

Te ná ni quivī de ini vehe, te xihna gā Jesús ni cahān yā jíin de:

¿Ndese jéni ni rō, Simón? Tāca tēe cácuu rey ini ñayiví yáha, ¿ndé nuū cájicān de xuhun renta jíin xuhun cuajníñu ñuu? ¿A nuū séhe de chí nuū ñáyuu sīn vehe? áchí yá.

²⁶Te ni cahān Pedro:

Nuū ñáyuu sīn vehe, áchí de.

Te ni cahān Jesús:

Núu súcuan te tú na inga cujéhnu nuū séhe rey jeē cacán xuhún un núu i.

Súcuan ni cahān yā jeē cujéhnu ya cúu ya Sēhe Yaā Dios. Te ni cahān yā:

²⁷Te na chúnaa yō, návāha tu squítí ni yō de. Núu súcuan te cuáhān ndé yumar, te scāne ró gancho jeē jníi chācá, te tava rō chācá jéē jníi xihna gā. Te ndica rō yuhu tí, te yūcuan níhīn rō ñin xuhun jéē cánda chunaa rō jeē cájicān de. Te quindēca ró núu de jeē cúu ruhū jíin rōhó. Achí yá.

Ndé ñáyuu cúu jeē cujéhnu ga

(Mr. 9.33-37; Lc. 9.46-48)

18 Te suni quivī un ní quecoo tēe cáscuáha un núu yā, te ni cacajñuhún de ya:

¿Ndé ñin cujéhnu ga nuū ñáyuu jeē ndácu Yaā andiví jniñu nuū? achí de.

²Te ni cana ya ñin sūchi lúlí, te ni jeni ya i mēhñú de. ³Te ni cahān yā:

Jendaá cahān rī jíin ró, núu tú nandió cóo ni rō te cani ni rō nájnūhun ñin sūchi lúlí, ma quíví cuítí rō ndaha Yaā andiví jéē ndacu ya jniñu nuū rō. ⁴Núu súcuan te ñáyuu jeē jéni ni i jeē tu cujéhnu i, nájnūhun jéni ni sūchi lúlí yáha, suu i cujéhnu ga nuū ñáyuu jeē ndácu Yaā andiví jniñu nuū. ⁵Te na-ni ñáyuu núu jeē siquí ruhū jetáhú i ñin sūchi lúlí nájnūhun sūchi yáha, te ruhū jetáhú i. Achí yá.

Xeēn coo siquí ñáyuu quíví nuū cuéchi

(Mr. 9.42-48; Lc. 17.1-2)

⁶Te núu ñin sūchi lúlí yáha cándíje i ruhū, te núu quiví i cuéchi sáha na-ni ñáyuu, te vāha ga núu ni conuhni ñin yōso cáhnu sucūn ñáyuu ún, te quēe i chíji ndute mar nuú. ⁷Nacā xeēn cúu jíin ñáyuu ñayiví, chí mání íyó jéē nducú squíví ñáyuu nuū cuéchi. Te mání súcuan coo ini ñayiví. Te nacā xeēn ndoho ñáyuu jeē squíví jnāhan nuū cuéchi.

⁸Núu súcuan te núu ndaha ró chí jéhē rō sáha jeē quíví ró cuéchi, vāha ga cahnde rō te scāne ró na quíhīn, návāha tuá sáha ró cuéchi.

Chi vāha ga jeē coo chácuá ró chí coo tícúhndu ró te quívi ró núu cotecu ró ní cáni, vēsú jeē cóndee ndíndúú ndaha ró jéhē rō te quívi ró núu ñuhún jeē cayú ní cáni.

⁹Te núu tinūu ró sáha jeē quívi ró cuéchi, vāha ga tava rō te scáne ró na quíhín, návāha tuá sáha ró cuéchi. Chi vāha ga jeē coo ñin-ni tinūu ró te quívi ró núu cotecu ró ní cáni, vēsú jeē cóndee ndíndúú tinūu ró te quívi ró núu ñuhún infierno.

Jnūhun yátá síquī lanchi jeē ní sana

(Lc. 15.3-7)

¹⁰Coto ma sájéē ni rō nuū ní ñin sūchi lúlí yáha. Chi cáhán rī jíin ró jeē tāca ndajéhé andíví jéē ndíto ya i, níni cáhīin ya nuū maá Tátá rī andíví. ¹¹Chi ruhū, Yaā ní nduu tēe, vēji rī jeē jnáma rī ñayuu jeē ní sana i nuū Yaā Dios.

¹²¿Te ndese cájeni ni rō? Núu ñin tēe ndéca de ñin ciento lanchi, te núu sana ñin tí, ¿á tu stóo de cuūn xico xahūn cuūn gā tī yucu, te ndicó de quinanducú de quítí ní sana ún? ¹³Te núu ni nanihīn de tí, te ndaā jeē yóhyo ga cúsiñ ni de jíin quítí ún vēsú jíin cúūn xico xahūn cuūn gā quítí jeē tu ní sána. ¹⁴Te suni súcuan máá Tátá rō, Yaā ndeé andíví, tu cúní yā jeē jnahnú ndetū ni ñin sūchi lúlí yáha.

Siquī jeē cóne cáhnu ni yō nuū jnáhan yó

(Lc. 17.3)

¹⁵Te núu jnáhan ró ní sáha de cuēchi síquī rō, núu súcuan te castūhun ró nuū mañúhún-ni de jeē ní sáha de cuēchi síquī rō. Te núu ni jetáhú de jnūhun ni cahān

rō jíin de, núu súcuan te je ni ndumanī de jíin ró ni sáha ró. ¹⁶Te núu tu ní jétáhú de jnūhun cáhán rō, te quicāna ró ñin chí úú gā ñayuu quihīn rō jíin núu de, cuu i testigo jíin ró, te cundaā cuēchi de te ndumanī de jíin ró. ¹⁷Te núu tu ní jétáhú tucu de jnūhun cácahān tēe ún, yūcuán na te castūhun ró nuū ñayuu cácañdije. Te núu tu ní jétáhú tucu de jnūhun cahān ñayuu cácañdije ún, te siáá rō de na cóo de nájñūhun ñin tēe tu cáñdije nuū Yaā Dios chí tēe stútú xūhun renta.

¹⁸Jendaá cahán rī jíin ró jéē tāca jéē cási rō jeē ma sáha ñayuu ini ñayívi yáha, suni casi jeē cáyūcú nde andíví. Te tāca jéē cuáha ró jnúhun sáha i ini ñayívi yáha, suni jeē cáyūcú nde andíví cuáha jnūhun.

¹⁹Te suni cáhán rī jíin ró, núu uū jnáhan ró ini ñayívi yáha, ñnuu canī ni rō síquī ñin jeē cacán tahú rō, núu súcuan te máá Tátá rī andíví cuáha ya jeē cájicān rō. ²⁰Chi núu ndé mí ndútútú úú chí únī ñayuu jeē cáchiñúhún i ruhū, te yūcuán íne rī jíin i, áchí yá.

²¹Yūcuán na te ni quee Pedro nuū yā, te ni cajñúhún de ya:

¿Nasaa jínu cone cáhnu ni na núu jnáhan ná jéē sáha de cuēchi síquī ná? ¿A ndé uxā jínu chí naún? áchí de.

²²Te ni cahān Jesús:

Tu cáhán rī jíin ró jeē maá úxā jínu, chí nde uxā jínu jeē uní xico uxí.

Jnūhun yátá síquī mozo jeē tu ní íne cáhnu ni

²³Núu súcuan te Yaā ndeé andíví, suhva cúu jeē íne cáhnu ni yā nuū

ñáyuu ndácu ya jniñu nuū: Cúu nájnūhun iin rey jeē cuní de sándaā de jíin mozo de jeē cátaū nuū de. ²⁴Te ni quejéé de sándaā de jíin i. Te ni caquindeca i iin mozo jeē taú tijni millón peso nuū de. ²⁵Te tú na vé névāha mozo un chunaa nuū de. Te ni ndacu de jniñu jeē na cúyāhu mozo un jíin ñasihí jíin séhe jíin táca ndajniñu, te nucūnaa xūhun táu. ²⁶Yūcuán na te ni jecuiñī yití mozo un, te ni cahān ndahú de jíin patrón de ún: Condetu ní, te na chúnaa ndihi ná xūhun ní, áchí de. ²⁷Te máá patrón ni cundáhú ni de mozo de. Te ni ine cáhnu ni de jeē taú mozo de ún, te ni siaá de jeē ma chúnaa gā. ²⁸Te ni quenda mozo un cuáhān de, te ni najnáhan-ni de jíin iin jnáhan mozo de jeē taú jecu peso nuū de. Te ni jniñ de tēe ún, te ni quitu de sucūn, te ni cahān de: Chunaa jeē taú rō nuū rī, achí de. ²⁹Te jnáhan mozo de un ní jecuiñī yití núu de, te ni cahān ndahú jíin de: Condetu te na chúnaa ndihi rī xūhun ró, achí. ³⁰Te máá de tu ní cuní de, chi ni chune de tēe un vécāa nde quivī nachunaa jeē taú nuū de. ³¹Te táca jnáhan mozo de ni cajito jeē súcuan ni sáha de, te ni cajnahuhū ndasí ni de. Te cuangoo de nuū patrón de, te ni cacachi de ndihi ndese ni cuu. ³²Yūcuán na te patrón un ní nacana de mozo un, te ni cahān de jíin: Mozo ndevāha cúu ró. Chi ni ine cáhnu ni rī ndihi jeē taú rō nuū rī, chi ni cahān ndahú ró jíin rí. ³³Te nájnūhun ni cundáhú ni rī rohó, suni súcuan ni jini ñúhún cundáhú ni rō jnáhan mozo rō nuú, áchí de. ³⁴Te ni quitī ndasí ni patrón, te ni ndacu de jniñu jeē na

quíví vecāa nde nachunaa ndihi jeē taú nuū de.

³⁵Te ni jīnu ni cahān yā, te áchí yá:

Nájnūhun ni sáha rey un jíin mozo de, suni súcuan sáha máá Tátá rī andiví jíin táca róhó núu tu cone cáhnu ni rō nuū jnáhan ró nde jíin ini jíin ánuá rō, núu na-ni cuēchi sáha i nuū rō. Achí yá jíin de jijnáhan de.

Siquí jeē ma stóo jnáhan tēe jíin ñahan

(Mr. 10.1-12; Lc. 16.18)

19 Te nuū ní ndihi ni cahān Jesús táca jnúhun yáha, te ni quenda ya Galilea cuahān yā. Te ni jinū yā región Judea, inga lado yūte Jordán, ichi núu cáne niāndii. ²Te cuehē ñayuu ni candiquin i ya, te yūcuan ní nasávāha ya ñayuu cácuñu.

³Yūcuán na te ni quecoo jecu tēe grupo fariseo nuū yā, chi cácuni de coto ndee de ya núu ndese cahān yā. Te ni cacajñuhún de ya:

¿A íyó ley jeē cuu ndusñin iin tēe jíin ñasihí de núu na-ni siquí cúu, chí naún? áchí de.

⁴Te ni cahān yā:

¿A tu ní cácahu ró tutu iñ ndese ni sáha Yaā Dios ñayuu nde xihna ñúhún? Chi tēe jíin ñahan ni sáha ya, achí. ⁵Te suni ni cahān Yaā Dios: Jeē yūcuan cúu jeē stóo tēe tátá de náná de, te quijnáhan de jíin ñasihí de, te iin na cuu ndindúú de, áchí Yaā Dios, achí tutu. ⁶Núu súcuan te tuá cúu uñ jnáhan de, chi iin na cúu. Jeē yūcuan tu íyó váha jeē stóo jnáhan, chi jeē ni squíjñahan Yaā Dios cúu, áchí yá.

⁷Te ni cacajñuhún de ya:

Núu súcuan ÷te naun ni ndacu Moisés jniñu jenahán jeē núu stóo ñin tēe ñasihí de, te na cúvaha acta jeē ndusín de jíin ña? áchí de.

⁸Te ni cahān yā jíin de:

Siquí jeē níhni ni rō jijnáhan ró, jeē yúcuan ní jēhe Moisés jñuhun jeē stóo ró ñasihí ró. Te nde xihna ñuhún chi nasūu súcuan ní cuu. ⁹Te ruhū chi cáhán rī jíin ró, núu ñin tēe stóo de ñasihí de, te núu nasūu jēē tǐjni ni ña, te quijnáhan de jíin ñga ñahan, núu súcuan te cásiquí ndéē de ña. Te núu ñin tēe condeca de ñahan ní ndusín, suni cásiquí ndéē de ña, áchí yá.

¹⁰Yūcuán na te ni cacahān tēe cáscuáha jíin yá:

Te núu ma cúu stóo tēe ñasihí de, núu súcuan te vāha ga ma cóndeca de ñahan, áchí de.

¹¹Te ni cahān yā jíin de:

Jñuhun ni cahān rō yāhá, tu níhín jniñu nuū ndihí tēe, chi máá nene tēe jeē ni sáha Yaā Dios jeē nihín jniñu nuū. ¹²Chi íyó tǐjni siquí jeē jési jeē ma cóndeca tēe ñahan. Chi sava tēe ni cacacu de jeē ma cúu condeca de ñahan. Te sava ga tēe ni sáha ñayuu jeē ma cúu condeca de ñahan. Te sava ga tēe ni cajeni ni maá de jeē ma cóndeca de ñahan siquí jeē ndihví ni de jíin jniñu jeē ndácu Yaā andíví nuū de. Tēe jeē cúu cuatáhú jñuhun jeē ma cóndeca de ñahan, na cuatáhú de núu súcuan. Achí yá.

Jeē ni jícān tahú Jesús jehē sūchi lúlí

(Mr. 10.13-16; Lc. 18.15-17)

¹³Yūcuán na te ni quecoo ñayuu jíin sūchi lúlí, jēē na sóo yá ndaha

ya xiní i te cacān tahú yā jehē i. Te tēe cáscuáha jíin yá, ni cacahān de nuū ñayuu vējicoo jíin i. ¹⁴Te ni cahān Jesús:

Cuāha jñuhun na quíjicoo sūchi lúlí jíinā nuū rī, te ma cásí rō jeē quíjicoo i. Chi ñayuu jeē ndió cóo ni i cani ni i nájñuhun sūchi yáha, suu i quíví ndaha Yaā andíví jēē ndacu ya jniñu nuū i, áchí yá.

¹⁵Te ni sóo yá ndaha ya xiní i jijnáhan i. Te ni quenda ya yúcuan cuáhān yā.

Jñuhun tēe cúcá

(Mr. 10.17-31; Lc. 18.18-30)

¹⁶Te ñin tēe suchí ní quee de nuū Jesús, te ni cajñuhún de ya:

Tēe vāha cúu ní Maestro. Te cachi ní, ÷na jniñu vāha sáha ná te nihín tahú na cotecu na níí cáni andíví? áchí de.

¹⁷Te ni cahān yā jíin de:

¿Naun cáhán rō jeē tēe vāha cúu rí? Tú ni ñin tēe vāha íyó, chi máá ñin-ni Yaā Dios. Te núu cúní rō cotecu rō níí cáni, te squícu rō jniñu ní ndacu ya. Achí yá.

¹⁸Te ni cahān de:

¿Ndé-ni jniñu cúu núu súcuan?

Te ni cahān yā:

Ma cáhni rō ndīyí. Ma cosíquí ndéē jñáhan ró. Ma sacuíhná ró. Ma sajnúhún ró. ¹⁹Cuatáhú ró nuū tatá rō nuū naná rō. Te cundáhú ni rō jñáhan ró nájñuhun cundáhú ni rō maá ró, achí yá.

²⁰Te ni cahān tēe suchí un:

Tācá jniñu yáha je ni squícu ná ndé ná lulí ná. ¿Te na vé cúmaní gā sáha ná núu súcuan?

²¹Te ni cahān Jesús:

Núu cúní rō squícu ndihí ró, cuáhán te xico ró ndihí jeē névāha

ró, te cuáha ró núū ñáyuu ndahú. Te nde andiví cuáha ya jeē ndetū ndasí coo ró. Yūcuán na te quiji ró condiquīn rō ruhū quihīn yō, achí yá.

²²Te tēe suchí un, ná ni jini sōho de jñuhun yáha, te ni cucuíhyá ni de de cuahān de, chí cúcá ndasí de.

²³Yūcuán na te ni cahān Jesús jíin tēe cáscuáha jíin yá:

Jendaá cahán rī jíin ró, tēe cúcá chí yōhyo yíí quívicoo de ndaha Yaā andiví jēē ndacu ya jniñu nuū de. ²⁴Te cáhán tucu rī jíin ró jeē yachī gā yāha iin camello yaū yutúcuí, vēsú jeē quívi iin ñayuu cucá ndaha Yaā Dios jeē ndacu ya jniñu nuū i, achí yá.

²⁵Te tēe cáscuáha jíin yá, yōhyo ni canaa ni de jeē ní cajini de jñuhun yáha, te ni cacajñuhun jnáhan de:

¿Ndé ñáyuu cúu jeē cácu núu súcuan?

²⁶Te ni ndacoto Jesús nuū de, te ni cahān yā:

Ñayuu chí ma cúu squíví i máa i ndaha Yaā Dios, te máa yá chí ndihī-ni cuu sáha ya, achí yá.

²⁷Yūcuán na te ni cahān Pedro:

Sāña jíinánhan ná ní castóo ná ndihī jeē cánevāha ná, te cándiquīn na níhín. ¿Te na vé nihín na núu súcuan? achí de.

²⁸Te ni cahān Jesús jíin de:

Ruhū, Yaā ní nduu tēe, jendaá cahán rī jíin ró jíinánhan ró jēē iin quíví conene rī mesa ndacu rī jniñu, te yōhyo luu kujéhnū rī ini ñayíví jēē. Te quíví ún te máa ró jeē ní cacondiquīn rō ruhū, suni coyūcu ró nuū uxí uū mesa ndacu ró jniñu. Te sándaā rō jniñu ndihúxí

uū yucūn ñayuu Israel. ²⁹Te tāca ñáyuu jeē ni stóo vehe, chí ñani, chí cuáha, chí tátá, chí náná, chí ñasihí, chí séhe, chí ñuhun, siquī jeē cóndiquīn i ruhū, te nanihīn i iin ciento gā jeē súcuan. Te suni nihīn tahú i cotecu i níí cáni. ³⁰Te cuehē ñayuu jeē vijna cácuu i nuū, nduu i sandīhí. Te ñayuu jeē vijna cácuu i sandīhí, nduu i nuū. Achí yá.

Jñuhun yátá síquī tēe cóscájniñu

20 ¹Te suhva cúu jeē ndacu Yaā andiví jniñu nuū ñáyuu: Cúu nájnñuhun iin tēe chíí ñuhun. Te iin nehen ni quenda de, ndúcú de tíjni mozo jeē taxín ndéhē uva de. ²Te ni sándaā de jíin mozo un jēē chúnaa de iin denario jeē quíví. Te ni tají de tēe un cuángoo jeē taxín uva de. ³Yūcuán na te ni quenda tucu de nájnñuhun cahīin. Te ni jito de nuū sava ga tēe cáyūcu sáa-ni de nuū yáhu. ⁴Te ni cahān de jíin: Róhó jíinánhan ró, cuángoo taxín ró uva rī, te chunaa vāha rī yáhu ró, achí de. Te tēe un cuángoo de. ⁵Te ni quenda tucu de jeē cuácuu cahuxí uū jíin jēē cuácuu cahuní, te suni súcuan ni nihīn tucu de mozo. ⁶Te jeē cuácuu cahuhūn ni quenda tucu de. Te ni nihīn tucu de jecu gā tēe cáyūcu sáa-ni nuū yáhu. Te ni cahān de jíin: ¿Najehē cáhiin sáa-ni ró yáha níí ndiáca? achí de. ⁷Te ni cacahān tēe ún: Siquī jeē tú ni iin ní cána sāña jēē sájniñu ná. Te ni cahān de jíin tēe ún: Núu súcuan te suni máa ró quingoo ró taxín ró ndehē uva rī, chí chunaa vāha rī yáhu ró, achí de. ⁸Te nuū ní ini, te tēe chíí ñuhun ni cahān de jíin tēe cóscájniñu nuū

mozo de: Cana xinī tēe cásajniñu te chunaa rō yāhu de, te xihna gā tēe ni quīvicoo sandīhí, te sáa te tēe ni quīvicoo xihna ñúhún, áchí de. ⁹Te ni quecoo tēe jeē ni quīvicoo cahuhún. Te ñin denario ni caquihin ñin ñin de. ¹⁰Yūcuán na te ni quecoo tēe jeē ni quīvicoo xihna ñúhún. Te cājeni ni de jeē cuehē gā quiyāhu de. Te ñin-ni denario ni caquihin ñin ñin de. ¹¹Te nuū ní caquihin de, te ni caquejéé de cácahān sōo de siquī tēe chíí ñuhun, áchí de: ¹²Máa ná jijnáhan ná, ndiáca ni casájniñu ná, te ni candoho ná jéé jihní. Te tēe yáha jéé ni quīvicoo sandīhí, chí máá ñin hora-ni ni casájniñu de. Te ñnuú-ni ni chiyāhu ní sáña jíin de, áchí de. ¹³Te tēe chíí ñuhun ni cahān jíin ñin de: Amigo, nasūu jéé tú vāha sáha ri jíin rō. ¿A tu ní sándaā yō jeē ñin denario quiyāhu rō, chí naún? ¹⁴Núu súcuan te quihin yāhu rō te quinhun rō. Chí cúní rī jeē tēe ni quīvicoo sandīhi yáha, ñnuú quiyāhu de jíin máá rō. ¹⁵¿Te á tu cuu sáha ri ndese cúní rī jíin xúhun máá rí? ¿Te chí cúcuésún ni rō jeē ní chiyāhu vāha ri de jijnáhan de siquī jeē vāha ni rī? áchí de. ¹⁶Te nájnūhun ni sáha tēe chíí ñuhun, suni súcuan sáha Yaā Dios. Chí ñayuu cácuu sandīhí, nduu i nuū. Te ñayuu cácuu nuū, nduu i sandīhí. Chí cuehē ñayuu cána ya jeē candíje i ya. Te jecu-ni i cándíje, te nácāji ya maá i jeē ndúu i sēhe ya. Achí yá.

Jeē ni cáhān tucu Jesús jeē cúu yā

(Mr. 10.32-34; Lc. 18.31-34)

¹⁷Yūcuán na te ná ni quihin Jesús ichi cuahān yā ñuu Jerusalén, te ni cana sñin ya ndihúxí uū tēe

cáscuáha jíin yá. Te ni cahān yā jíin de:

¹⁸Cuni sōho rō, chí je cuángoo yó ñuu Jerusalén vijna, te yūcuán nastúu ñayuu ruhū, Yaā ní nduu tēe, nuū sutú cácujeñnu jíin núu tēe cástéén tutu ley. Te ndonda de siquī rī jeē cúu rī. ¹⁹Te squívi de ruhū nuū tēe nación Roma jeē cáyucú Jerusalén cándacu jniñu. Te tāca tēe un sácata de nuū rī. Te cani de ruhū, te sáa te cahni de ruhū jicā cruz. Te nuū uní quivī te natecu rī. Achí yá.

Jeē ni jícān naná Jacobo jíin Juan ñin favor nuū yā

(Mr. 10.35-45)

²⁰Yūcuán na te ni quee ñasihí Zebedeo nuū yā jíin séhe ña Jacobo jíin Juan. Te ni jecuññi yití ña nuū yā, jícān ña ñin favor nuū yā. ²¹Te ni cajñūhun yá ña:

¿Na vé cuní rō?

Te ni cahān ña:

Cuāha ní jnúhun jeē quivī ndácu ní jniñu te conēne ndindúu séhe ná yáha xiin ní, ñin i lado vāha ní, te inga i lado jecó ní, achí ña.

²²Yūcuán na te ni cahān Jesús jíin Jacobo jíin Juan:

Tu cājini rō na vé cúu jeē cájicān rō. ¿A cuu ndoho rō jnúndóho nájnūhun jeē quíji siquī rī? ¿Te á canda rō ndoho xeēn rō nájnūhun ndoho rī? Achí yá.

Te ni cacahān de:

Cuu sáha ná.

²³Te ni cahān yā jíin de:

Jendaá jeē ndoho rō jnúndóho nájnūhun jeē quíji siquī rī, te ndoho xeēn rō nájnūhun ndoho rī. Te jeē conēne rō lado vāha ri jíin lado

jecó rí, nasūu rúhū cúu jeē cuáha jnūhun. Chi je íyó túhva cuu tāca tēe jeē ní nacāji Tátá rí, te tēe un níhín. Achí yá.

²⁴Te uxí gā tēe cáscuáha jíin yá ní cajini de jnūhun yáha. Te ni caquití ni de nuū uú ñani ún. ²⁵Te Jesús ni cana ya de, te ni cahān yā jíin de:

Cájini rō ndese cásáha tēe cácujuhnu nuū ñayuu tācá nación. Chi cándacu nihin de jniñu nuū i, te máá de cáchí ndese coo. ²⁶Te máá ró jijnáhan ró, chi ma sáha ró súcuan. Chi núu ndé ñin ró cúni cujéhnú, sa suhva cuajniñu ró núu jnáhan ró. ²⁷Te núu ndé ñin ró cúni cuu nuū, sa suhva sáha ró máá ró mozo nuū jnáhan ró. ²⁸Chi suni súcuan sáha ruhū, Yaā ní nduu tēe, chi nasūu jéē véji ri jeē cuajniñu ñayuu nuū rí, chi sa suhva véji ri jeē cuajniñu ri nuū ñáyuu. Te cuāha ri maá rí cuu rí návāha jnama ri cuehē ñayuu, achí yá.

Jeē ní nasávāha ya uū tēe cuáá

(Mr. 10.46-52; Lc. 18.35-43)

²⁹Yūcuán na te ni quenda ya jíin de ñuu Jericó. Te cuehē ndasí ñáyuu ni candiquín i ya. ³⁰Te yuhíchi un cáyūcu úū tēe cuáá. Te ni cajini de jnūhun jeē yáha Jesús cuahān yā, te ni cacana jee de:

Máá ní jeē cúu ní Séhe yucūn David, cundáhú ni ni sáña, áchí de.

³¹Te ñayuu un ní cacahān i nuū de jeē na cási de yuhu de. Te víhyá gā ni cacana jee de:

Máá ní jeē cúu ní Séhe yucūn David, cundáhú ni ni sáña víi, achí de.

³²Te ni jecuiñi Jesús, te ni cana ya ndíndúú tēe cuáá un, te ni cajnūhun yá de:

¿Na vé sáha ri jíin ró cácu ni rō?

³³Te ni cacahān de jíin yá:

Jeē na ndúndijin tinūu ná cácu ni ná, áchí de.

³⁴Te ni cundáhú ni yā de. Te ni tee ya ndaha ya tinūu de. Te ni candundijin-ni tinūu de. Te ni candiquín de ya cuango de jíin yá.

Jeē ni quívi Jesús ñuu Jerusalén

(Mr. 11.1-11; Lc. 19.28-40; Jn. 12.12-19)

21 Te nuū cuácuyajni ya ñuu Jerusalén, te ni jinū yā jíin tēe cáscuáha jíin yá ñuu Betfagé, jeē íne jehē yucu Olivos. Te ni tají yá uū tēe cáscuáha jíin yá jeē quíngoo de. ²Te áchí yá jíin de:

Cuáhán ñuu lúlí íne ichi núu. Te yūcuan níhín rō ñin burra, núhni tí jíin ñin burro lúlí. Te ndají ró tí, quijicoo ró jíin tí nuū rí. ³Te núu ndé ñin cahān jíin ró, te cachi rō nuū: Máá Jítoho yō jíni ñúhún yá tí, achi rō. Yūcuán na te siáá-ni i tí, quiji ró jíin tí, achí yá.

⁴Te súcuan ni cuu tācá jniñu yáha návāha squícu jnūhun ni cahān tēe ni nacani jnūhun Yaā Dios nde jenahán, yósó nuū tútu:

⁵Cachí rō nuū ñáyuu ñuu

Jerusalén jeē naní ñuu Sión:

Yāhá condēhe ró jeē véji Rey rō.

Tu sájéhnú ya maá yá, chi máá burra-ni yósó yá,

jíin burrito, sēhe quiti ndíso.

Achí tutu.

⁶Yūcuán na te tēe cáscuáha un cuángoo de, te ni casáha de nájñūhun ni ndacu Jesús jniñu nuū de. ⁷Te ndéca de burra jíin séhe tí, ni ndecoo de nuū yā. Te ni casoó de sahna de siquí tí, te ni jecosó yā tí. ⁸Te cáhiin cuehē

ñayuu, te ni cascáa i sahma i ini ichi. Te sava ga i ni cajehnde ndaha ñúú, te ni cachucun i ini ichi. ⁹Te ñayuu cuangoo ichi núú jíin ñayuu cuangoo ichi yátá, cácana jee i:

Yōhoyo cújéhnú Yaā cúu Sēhe yucūn rey David. Yōhoyo vāha Yaā cúu Yaā jeē véji jíin jniñu máá Jítóho yō Yaā Dios. Te yōhoyo cújéhnú máá Yaā Dios. Achí i.

¹⁰Te nuū ni quívi ya ñuu Jerusalén, te ndíhi ñayuu ñuu un ní cacuvaā i, te cuehē i cájnūhun jnáhan:

¿Ndé tée cúu tēe yáha? áchí i.

¹¹Te ni cacahān ñayuu vējicoo jíin yá:

Yāha cúu Jesús jeē nácani jnūhun Yaā Dios, jeē véji nde ñuu Nazaret ndañúú Galilea. Achí i.

Jeē ní quenehen ya ñayuu ini templo

(Mr. 11.15-19; Lc. 19.45-48; Jn. 2.13-22)

¹²Yūcuán na te ni quívi Jesús ini templo cáhnu Yaā Dios. Te ni quenehen ya tāca ñayuu cájeen quítí te cánaxico núú ñayuu jeē socō i. Te ni scotúú ndeyi ya tāca mesa tēe cástáyí xūhún, jíin silla tēe cáxicō paloma. ¹³Te áchí yá jíin i:

Yósó núú tútu ii jeē cahán Yaā Dios: Vehe ri chi vehe nuū cájicān tahu cúu, áchí Yaā Dios. Te máá ró jijnáhan ró, chi nájñūhun yaū cava ñacuñhá ni canasáha ró. Achí yá.

¹⁴Yūcuán na te sava ñayuu cuaá jíin ñayuu chacuá ni quecoo i nuū yā ini templo un. Te ni nasávāha ya i. ¹⁵Te sutū cácujeñnu jíin tēe cástéén tutu ley Yaā Dios, ni cajito de táca jniñu jéhnú sáha ya, te ni cajini de jeē cácana jee sūchi lúli

ini templo: Yōhoyo cújéhnú Yaā cúu Sēhe yucūn rey David, achí i. Te ni caquítí ni de. ¹⁶Te ni cacahān de jíin yá:

¿A tu jíni ró jēe súcuan cácahān sūchi yáha? áchí de.

Te ni cahān Jesús jíin de:

Jíni ri. ¿Te á ná tu cahu ró jēe yosó núú tútu ii jeē suhva cáhán iin tēe jíin Yaā Dios?

Sáha ní jēe tāca sūchi lúli jíin sūchi cájexin, vāha ndasí cáhán i jeē Yaā cújéhnú cúu Cristo.

Achí.

¹⁷Te ni stóo ya de. Te ni quenda ya ñuu Jerusalén, cuahān yā nde ñuu Betania. Te yūcuan ní ndōo ya jecuáá ún.

Jeē ni cáhán yā nuū yújnu higo

(Mr. 11.12-14, 20-26)

¹⁸Te jenéhen inga quiví cuanuhun yā ñuu Jerusalén, te jíi yā sōco.

¹⁹Te ni jito ya iin nundēhe higo, iin yuhíchi. Te ni jehēn yā jehē. Te tú na ndehē ni níhín yā, chí máá ndaha-ni iin. Te ni cahān yā jíin:

Vijna te ma cúun cuítí gā ndehē xiní rō, achí yá.

Te ni ichi-ni yujnu higo ún. ²⁰Te tēe cáscuáha jíin yá, ni canaa ni de cájito de. Te ni cacajnūhún de ya:

¿Ndese ni sáha ní jēe yachí-ni ni ichi yujnu higo? achí de.

²¹Te ni cahān yā jíin de:

Jendaá cahán ri jíin ró, núu candíje ró te tú cani síquí ni rō, te cuu sáha ró jniñu jéhnú nájñūhun ni sáha ri jíin yujnu higo. Te nde jniñu jéhnú ga cuu sáha ró, chí nde cuu cahān rō jeē cújiyo yucu yáha, quihín nuū mar, te sáha nájñūhun

cahān rō. ²²Te tāca jēē cacán tahu rō jijnáhan rō, te núu candíje ró jēē nihīn rō, te nihīn rō. Achí yá.

Siquī jeē ndíso jniñu Jesús

(Mr. 11.27-33; Lc. 20.1-8)

²³Te ni quīvi tucu ya ini templo cáhnu. Te níni stéén yā jñuhun, te sutū cácujeñhu jíin táca tée jéñhu jeē cándacu jniñu nuū ñayuu hebreo, ni quecoo de nuū yā. Te ni cacajñuhún de ya:

¿Ndé ní nihīn jniñu ró jēē sáha ró jniñu yáha? ¿Te ndé ñi ni tee jniñu siquī rō jeē sáha ró súcuan? Achí de.

²⁴Te ni cahān Jesús:

Suni ruhū, cajñuhun rí rohó ñi jñuhun jíjnáhan rō, te núu cuu stío cuñí rō, yūcuán na te cachi rí nuū rō ndé ní nihīn jniñu ri jeē sáha ri jniñu yáha. ²⁵¿Ndé ñi ni tee jniñu siquī Juan jeē ni scuándute de? ¿A Yaā Dios chí táca tée? achí yá jíin de.

Yūcuán na te ni candajñuhun máá de:

Núu cahān yō jeē Yaā Dios ni tee ya jniñu un síquī Juan, te cahān de jíin yó: Núu súcuan ¿te najehē tu ní cácuandíje ró de? ²⁶Te núu cahān yō jeē ñayuu ni catee jniñu un síquī de, te cáyūhu yó ñayuu, chí ndívi i cácuandíje i jeē tée ni nacani jñuhun Yaā Dios ni cuu ndije Juan. Achí de cácahān maá de.

²⁷Te ni cacahān de jíin Jesús:

Tu cájini rí, achí de.

Yūcuán na te ni cahān yā jíin de:

Ni ruhū, suni ma cáchi rí nuū rō ndé ñi ni tee jniñu siquī rí sáha ri jniñu yáha, achí yá.

Jñuhun yátá síquī uú sēhe yíi

²⁸Te ni cahān gā yā jíin de:

Cuni nahín ró jñuhun yátá yáha: ñi tēe ni iyo uū sēhe yíi de. Te ni cahān de jíin ñi i: Séhē, quihīn rō taxín ró ndehē uva rí vijna, áchí de. ²⁹Te ni cahān i: Ma quihín na, áchí i. Te ni cunúu, te ni nacani ni i, te cuahān i nuū jniñu ún. ³⁰Te tēe un ní jehēn de nuū ñnga sēhe de, te suni súcuan ni cahān de jíin i. Te ni cahān i: Cuu núu súcuan, te quihīn na, áchí i. Te tu ní jéhén i. ³¹¿Te ndese cájeni ni rō? Jeē ndíndúú i, ¿ndé ñi ni siquīcu jniñu cúní tatá i? achí yá.

Te ni cacahān de:

Sūchi jēē ni cáhān de jíin xíhna gā, achí de.

Te ni cahān Jesús jíin de:

Súcuan cúu, te jendaá cahán rí jíin ró jeē tée cástútú xúhun renta jíin ñahan cájica jnéni, yachi cánacani ni i jeē stóo i cuēchi i te quívicoo i ndaha Yaā Dios jeē ndacu ya jniñu nuū i, te máá ró jijnáhan ró chí ma quívi ró. ³²Chi ni quiji Juan, ni steén de ndese condiquin rō jñuhun ndaā, te tu ní cácuandíje ró jñuhun ni cahān de. Te sa suhva tēe cástútú xúhun renta jíin ñahan cájica jnéni, ni cacandíje i jñuhun ni cahān de. Te máá ró, vésú ni cajito ró jēē ní cacandíje i, te tu ní cánacani cuiti ni rō jeē candíje ró. Achí yá.

Jñuhun yátá síquī tēe néé casájniñu nuū uva

(Mr. 12.1-12; Lc. 20.9-19)

³³Cuni sōho ñga jñuhun yátá jíjnáhan ró: Ni iyo ñi tēe chíi ñuhun. Te ni nachuhun de cuehē ndehē uva. Te ni jesí de corral, te ni sáha de ñi nuū cúhun ndehē un

táxin. Te ni jeni de iin vehe súcún náváha cuu coto de níí cáhnu.

'Te ni stóo de nuū sava tēe sájniñu nuū, te cuu sava de ndehē jíin. Te ni tee de ichi cuahān jicá de. ³⁴Te máá tiempo ndutútú uva, te ni tají de jecu mozo cuanuquihin sava uva nuū tēe cásájniñu ún. ³⁵Te tēe un ní cajniñi de mozo un. Te iin i ni cacani de, te inga i ni cajehni de, te inga i ni cajēhe de yuū xiní. ³⁶Te tēe chíí uva ni tají tucu de jecu gā mozo cuangoo, cuehē gā vēsú jeē xíhna ñúhún. Te suni súcuan ni casáha tēe un jíin ndihi mozo un.

³⁷Te jeē sándihí na te ni tají de sēhe de cuahān. Te jéni ni de: Tēe ún chi cuatáhú de jíjnáhan de nuū séhe ri. ³⁸Te tēe cásájniñu ún, núu ní cajito de nuū séhe tēe chíí uva, te ni cacahān maá: Tēe chíí táhú cúu jeē yáha. Na cáhni yō de, te ndōo tahū de cuu yó, áchí. ³⁹Te ni cajniñi de i, te ni caquenehen de i inga lado, te ni cajehni de i. Achí yá.

⁴⁰Yūcuán na te ni cajñuhun yá de: Núu súcuan te núu na quíji tēe chíí uva un, ¿te ndese sáha de jíin tēe cásájniñu ún? áchí yá.

⁴¹Te ni cacahān de jíin yá:

Ma cundáhú cuiti ni de tāca tēe casáha jniñu néé un, chi cahni de. Te cuāha de ñuhun cáa uva un núu inga sava tēe sájniñu nuū, cuu sava de ndehē jíin. Te quivī ndutútú ndehē, te tēe ún nacuāha de sava ndehē nuū tēe chíí uva. Achí de.

⁴²Te ni cahān Jesús jíin de:

¿Te á ná tu cahu ró jnúhun yáha jeē yosó núu tútu ii, jeē ruhū cúu nájnūhun iin yuū? Chi áchí tutu:

Yuū jeē ní casquéhichí tēe cájeni vehe,

yuū yáha nduu jeē quítuu vehe.

Máá Jítóho yō Yaā Dios ni sáha ya súcuan,

te cánaa ni yō jíto yó jniñu yáha.

Achí tutu. ⁴³Núu súcuan te cáhán rí jíin ró jeē cujiyo-ni jeē ndácu Yaā Dios jniñu nuū rō jíjnáhan ró, te nacuāha ya jniñu un núu inga ñayuu jeē squícu váha i jniñu ndácu ya nájnūhun cúni yá. ⁴⁴Te ñayuu tu cáchandíje, ndoho i nájnūhun ndóho ñayuu jeē cotúú siquī yuū te jnáhnú i. Te quivī sándaā Yaā Dios cuēchi, te ñayuu tu cáchandíje, ndoho i nájnūhun ndóho ñayuu jeē nínga yuū siquī i te cundihí i sáha. Achí yá.

⁴⁵Te sutú cácujeñhu jíin tēe grupo fariseo ni cajini sōho de tāca jnúhun yátá ní cahān yā. Te ni cajecūhun ni de jeē siquī maá de cúu jnúhun yátá ní cahān yā siquī tēe cásájniñu nuū uva jíin tēe cájeni vehe. ⁴⁶Te ni canducú de modo jniñi de ya. Te cáyūhú de jeē quitī ni ñayuu, chi cájeni ni i jeē tēe nácani jnúhun Yaā Dios cúu ya.

Jnúhun yátá síquī vico nándāha

22 Yūcuán na te ni cahān tucu Jesús inga jnúhun yátá jíin de jíjnáhan de:

²Súcuan cúu jeē ndácu Yaā andiví jniñu nuū ñayuu: Cúu nájnūhun iin rey jeē sáha de iin vico jeē nándāha sēhe yí de. ³Te ni tají de tāca mozo de cuacana ñayuu jeē ni cáhán de jíin jéē quíjicoo. Te ñayuu ún tu ní cácuni i quíjicoo i. ⁴Te ni tají tucu de jecu gā mozo quingoo, te áchí de jíin: Cahān jíin ñayuu ní cana ri un jéē iyó túhva ndeyu. Chi je ni jehni rí stiquí rí jíin táca gá quití ní

nduu, te ndihi je íyó túhva. Nehen jijnáhan ró vico nándāha. Achi rō jíin i. Achí de. ⁵Te ñayuu ní cana de ún tu ní cásáha i cuenta. Chi iin i cuahān nuū itu i, te inga i cuahān nuū jñíñu sáha i. ⁶Te sava ga i ni cajni i tāca mozo rey, te ni casácatā i nuū, te ni cajehni i. ⁷Yūcuán na te yōhyo ni quitī ni rey. Te ni tají de soldado de ni jengoo, ni cajehni de ñayuu ní cajehni ndīyí ún, te ni cajehmu de ñuu i. ⁸Yūcuán na te ni cahān de jíin sava ga mozo de: Ndihi je íyó túhva jeē cóo vico nándāha. Te ñayuu ní cana ri ún, tu íyó váha jeē quíjicoo i chi nasūu ñáyuu vāha cácuu i. ⁹Núu súcuan te cuáhán jijnáhan ró tāca núu náquijnáhan calle. Te cana ró núu nasaa ñayuu nihīn rō, na quíjicoo i vico nándāha. Achí de. ¹⁰Te ni quendacoo mozo un cuángoo tācá ichi. Te ni castútú de ndihi ñayuu ní canihīn de, cúu ñayuu cunéé, cúu ñayuu váha. Te súcuan te ni chitú ñáyuu ini vehe nuū iyó vico nándāha.

¹¹Te ni quīvi rey ini vehe jeē cahán de jíin ñáyuu ni cutútú. Te ni jito de nuū iin tēe jeē tu ñúhun sahma jeē ni jéhe de cuhun ñayuu quijicoo vico nándāha. ¹²Te ni cahān de jíin tēe ún: Amigo, ¿ndese ni quīvi ró yáha jeē tu ñúhun ró sahma vico nándāha? áchí de. Te máá tēe ún tu ní cáhán cuiti de. ¹³Yūcuán na te ni cahān rey jíin tēe cájeni cohō: Jni de te cuhni rō ndaha de jehē de, te quenehen ró de na quíhín de nuū quéhe nuū néē. Te yūcuan ndáhyū de te nacayihí yuhu de jeē ndóho xeēn de. Achí rey. ¹⁴Chi cána Yaā Dios cuehē

ñayuu jeē na cándíje i. Te jecu-ni i cándíje, te máá i nácāji ya jeē ndúu i sēhe ya. Achí Jesús.

Siquí xúhun renta

(Mr. 12.13-17; Lc. 20.20-26)

¹⁵Yūcuán na te cuangoo tēe grupo fariseo. Te ni candajnūhún de núu ndese sáha de návāha cahān yā iin jñūhun jeē nihín de cuēchi siquí yā. ¹⁶Te ni catajé de jecu tēe cáscuáha jíin máá de jíin tēe grupo Herodes cuangoo de. Te ni cacahān de jíin yá:

Maestro, cájini na jēe tēe cáhán ndaā cúu ní, te stéén ndaā ní ndese squícu ñayuu nuū Yaā Dios. Te tu yúhú ní jeē cahán ni iin ñayuu siquí ní, chi tu sáha ní cuenta ndese cúu iin iin i, chi inuú-ni sáha ní jíin i. ¹⁷Núu súcuan te cahān ní ndese jéni ni ní: ¿A íyó váha jeē chúnaa yō renta nuū rey nación Roma jeē jñí nación yō, chí tuú? áchí de.

¹⁸Te ni jini Jesús jeē cájito ndee de ya. Te ni cahān yā jíin de:

Tēe stáhú-ni cácuu ró. ¿Najehē cájito ndee rō ruhú? ¹⁹Stéén xūhun jéj jéconaā renta na cóto ri, achí yá.

Te ni castéén de iin denario nuū yā. ²⁰Te ni jito ya, te ni cajñūhun yá de: ¿Ndé iin nuū cúu jeē ndeé nuū xúhun yáha, te ndé síhví cúu jeē ndeé yáhá?

²¹Te ni cacahān de jíin yá:

Nuū jíin síhví rey un cúu, áchí de. Yūcuán na te ni cahān yā jíin de:

Núu súcuan te nacuāha ró núu rey un jēe yíhi cuenta nuū de, te nacuāha ró núu Yaā Dios tāca jēe yíhi cuenta nuū maá yá, achí yá.

²²Te nuū ní cajini de jeē ndichí ní cahān yā jñūhun yáha, te ni canaa

ni de, te ni castoo de ya, te cuango de de.

Jeē ní cacajñuhún de siquī jeē nátecu ndīyi

(Mr. 12.18-27; Lc. 20.27-40)

²³Te suni quivī un ní quecoo jecu tē grupo saduceo nuū yā. Te tē un cacahān jeē tu nátecu cuiti ndīyi. Te ni cacahān de jíin yá siquī iin jñuhun, achí de:

²⁴Maestro, Moisés ni cahān de jeē núu iin tē cuu de, te ndōo ñasihí de, te núu tú sēhe de ní iyo jíin ña, núu súcuan te cánuú jeē ñani de naquihin ñasihí de, te sēhe de jeē cácu jíin ña nucuñi nuū ndíyi ñani de. Achí Moisés. ²⁵Te ñuu na ní iyo uxā ñani. Te tē núu ní quijnāhan de jíin ñahan. Te ni jihí de. Te jeē tú sēhe de ní iyo, te ni ndōo ñasihí de nuū ñani de. ²⁶Te tē ún suni ni jihí de, te tú na sēhe de ní iyo tucu. Te suni súcuan tē unī, nde jíin ndihúxá de. ²⁷Te nuū ní ndihí de ni cajihí, te suni ni jihí ñahan ún. ²⁸Núu súcuan te quivī nátecu ndīyi, ¿ndé iin de cuu ña ñasihí de? Chi ndihúxá de ni condeca de ña. Achí de jíin yá.

²⁹Yūcuán na te ni cahān yā jíin de:

Yōhyo cástívi ró jñuhun siquī jeē tu cájecūhun ni rō jeē cahán tutu iī, ni tu cájini rō jeē iyó poder Yaā Dios jeē nastécu yā ndīyi. ³⁰Chi quivī nátecu ndīyi, te tuá na jñuhun quijnāhan tē jíin ñahan coo. Chi coo i nájñuhun ndajéhé Yaā Dios andíví. ³¹Te siquī jeē nátecu ndīyi, ¿á tu ní cácahu ró tutu jñuhun jeē cahán Yaā Dios jíin ró? ³²Máá rí cúu Yaā Dios Abraham jíin Isaac

jíin Jacob, achí Yaā Dios. Chi vēsú je ni cajihí de, te cátecu de nuū iyó máá yá, chi cúu ya Yaā sáha jeē técu ñayuu ní cáni. Achí yá jíin de.

³³Te ñayuu un ní canaa ni i cájini nahín i jñuhun stéén yā.

Jniñu cánuú ndasí gá jeē ní ndacu Yaā Dios

(Mr. 12.28-34)

³⁴Yūcuán na te tē grupo fariseo ni cajini de jeē ní cajesi tē saduceo yuhu de ni sáha ya. Te ni candutútú de nuū yā. ³⁵Te iin de jeē cúu tē stéén tutu ley Yaā Dios, ni cajñuhún de ya, chi coto ndee de ya cuní de:

³⁶Maestro, ¿ndé iin cúu jñuhun ndácu jniñu cánuú ndasí gá nuū tutu ley? achí de.

³⁷Te ni cahān Jesús jíin de:

Coo maní ndasí ró jíin máá Jítoho rō Yaā Dios, nde jnāā ndasí ró sáha ró ndihí jeē cúsi ni yā, nde jíin ini jíin ánuá rō, jíin ní jéē nijnūní rō, achí tutu. ³⁸Yāha cúu jniñu ndácu ya jeē cujéhnu ga te cánuú ndasí gá. ³⁹Te jniñu uū jeē ní ndacu ya, suni súcuan cáhán: Cundáhú ni rō jnāhan ró nájñuhun cundáhú ni rō maá ró. ⁴⁰Te chiji ndíndúú jñuhun yáha ní quenda ndihí ley jeē ní tee Moisés, jíin ndihí jeē ní castéén tē ni canacani jñuhun Yaā Dios, achí yá.

Siquī jeē cúu Cristo sēhe yucūn David

(Mr. 12.35-37; Lc. 20.41-44)

⁴¹Te níni cáyūcu tútú gá tē fariseo un, te Jesús ni cajñuhun yá de:

⁴²¿Ndese cájeni ni rō siquī Cristo? ¿Sēhe ndé yucūn cúu ya?

Te ni cacahān de:

Sēhe yucūn David, achí de.

⁴³Te ni cahān yā jíin de:

Núu súcuan ¿te ndese cúu jeē David ni cahān de Jitoho de ya, ni sáha Espírиту Santo nde jenahán? Chi ni cahān de:

⁴⁴Máá Jítóho yō Yaā Dios ni cahān yā jíin Jítóho rī, Yaā quiji: Cucōo ró lado váha ri nuū cujéhnu ró, te na sáha ri jeē quende rō poder tāca jēē cájito uhū rohó. Achí Yaā Dios. Achí David. ⁴⁵Te núu sēhe yucūn David cúu Cristo, ¿te ndese cúu jeē ni cáhān de jeē Jítóho de cúu ya? áchí yá.

⁴⁶Te ni ñin de tu ní cúu stió cuñí cuíti de jnúhun nuū yā. Te nde quiví ún tuá ni ñin de ní chúndeyí ni de cajnúhún de ya.

Jeē ni cáhān yā jeē iyó cuéchi de jíināhan de

(Mr. 12.38-40; Lc. 11.37-54; 20.45-47)

23 Yūcuán na te ni cahān Jesús jíin ñayuu jíin tēe cáscuáha jíin yá:

²Tēe cástéén tutu ley Yaā Dios jíin tēe grupo fariseo, cájeni ni de jeē ndíso jníñu de jeē steén de ley jeē ni jéhe ya nuū Moisés. ³Núu súcuan te cuatáhú ró te squícu ró táca jēē cándacu de nuū rō. Te ma sáha ró nájnūhun cásáha máá de. Chi cácahān-ni de, te tu cásquícu de. ⁴Chi suni cástéén de tāca ley ni catava maá de jeē yá sáha, te cátee de squícu ñayuu, te tu cácuñdeyí i squícu i. Te máá de jíināhan de, chi ni ñin xini ndáha de tu cáscánda de jeē squícu de. ⁵Te máni squícu jeē na cuájnúhún ñayuu de cúu ndíhi

jeē casáha de. Chi cánujnahan ni de cuhni de cuehē jnúhun tutu i jneē de jíin ndaha de. Te suni cásácáni ga de yuhvā yusáhma de jeē steén jeē cácujeñnu ga de vésú inga ñayuu. ⁶Te cánujnahan ni de cucōo de nuū silla yíñúhún gá nuū cáyeji ñayuu vico, jíin silla yíñúhún gá ini vehe i sinagoga. ⁷Te suni cánujnahan ni de jeē cahán yíñúhún ñayuu jíin de nuū calle, jíin jēē cahán i maestro jíin de.

⁸Te máá ró jíināhan ró, ma cuáha ró jnúhun jeē cahán ñayuu maestro jíin ró. Chi inuú cácuu ndíhi ró jēē cácuu ró hermano, te íyó ñin-ni Maestro rō jeē cúu ruhū, Cristo. ⁹Te ma chiñúhún ró ni ñin tēe ñayiví yáha jeē cahán rō padre jíin de. Chi íyó ñin-ni Tátá rō jíināhan ró, Yaā ndeé andiví. ¹⁰Te suni ma cuáha ró jnúhun jeē cahán i jitoho jíin ró. Chi íyó ñin-ni Jitoho rō, te suu cúu ruhū, Cristo. ¹¹Te tēe mēñhu ró jíināhan ró jeē jejniñu nuū jnāhan, suu de cúu jeē cujéhnu ga. ¹²Chi tēe jeē sajeñnu de máá de, sa ndululí de. Te tēe jeē sálulí de máá de, sa ndujéhnu de.

¹³Nacā xeēn ndoho róhó tēe cástéén tutu ley jíin róhó tēe fariseo, chi tēe stáhú-ni cácuu ró. Chi cájesi rō jeē quíví ñayuu ndaha Yaā andiví jēē ndacu ya jniñu nuū i. Chi tu quívicoo máá ró, ni tu cájēhe ro jnúhun quívicoo ñayuu nducú quíví.

¹⁴Nacā xeēn ndoho róhó tēe cástéén tutu ley jíin róhó tēe fariseo, chi tēe stáhú-ni cácuu ró. Chi cáquende rō vehe ñahan ní caquendō ndáhú. Yūcuán na te cájicān tahú nahán ró návaha cani ni ñayuu jeē tú na cuéchi ró. Jeē yúcuán xeēn gā ndoho ró castigo.

¹⁵'Nacā xeēn ndoho róhó tée cástéén tutu ley jíin róhó tée fariseo, chi tée stáhú-ni cácuu ró. Chi níí ñuhun íchi jíin níí mar cájica cuu ró cánducú ró ñin ñayuu scandíje ró sáhān maá ró. Te núu ni candíje i, te casáha ró jéē vihyá gā cúu cuēchi i jeē quihín i infierno vésú maá ró.

¹⁶'Nacā xeēn ndoho ró, chi cácuu ró nájnūhun tée cuáá jéē steén ichi nuū ñayuu. Chi cácahān rō: Núu ndé tée jéjnūhun téyí de, te núu cahān de jeē Yaā Dios jeē ndeé ini templo na cuáha ya castigo núu ma squícu de, yūcuán na te tu cánuú squícu de. Te núu cahān de jeē Yaā Dios jeē chíí oro jeē iyó ini templo, na cuáha ya castigo núu ma squícu de, yūcuán na te cánuú squícu nahín de, cácahān rō. ¹⁷Tée cánéé tée cuáá cácuu ró jéē castívi ró jnūhun cácahān rō. ¿Ndé ñin cúu jeē cujéhnu ga, á oro un chí Yaā Dios jeē ndeé ini templo jeē sáhíi oro un? ¹⁸Te suni cácahān rō: Núu ndé tée jéjnūhun téyí de, te núu cahān de jeē Yaā Dios jeē chíí altar na cuáha ya castigo núu ma squícu de, yūcuán na te tu cánuú squícu de. Te núu cahān de jeē Yaā Dios jeē chíí ndajníñu jeē cásocō nuū altar, na cuáha ya castigo núu ma squícu de, yūcuán na te cánuú squícu nahín de, cácahān rō. ¹⁹Tée cánéé tée cuáá cácuu ró jéē castívi ró jnūhun cácahān rō. ¿Ndé ñin cúu jeē cujéhnu ga, á ndajníñu yúcu nuū altar, chí Yaā Dios jeē sáhíi yā ndajníñu ún? ²⁰Núu súcuān te tée jéjnūhun téyí, te núu ndácunehen de Yaā Dios jeē chíí altar, núu súcuān te nde jíin ndajníñu

yúcu nuū altar ndácunehen de.

²¹Te tée jeē jéjnūhun téyí, te núu ndácunehen de templo, núu súcuān te nde jíin Yaā Dios jeē ndeé ini templo ndácunehen de. ²²Te tée jéjnūhun téyí, te núu ndácunehen de andiví, núu súcuān te suni ndácunehen de mesa Yaā Dios te nde jíin máá Yaā Dios jeē ndeé nuū mesa un.

²³'Nacā xeēn ndoho róhó tée cástéén tutu ley jíin róhó tée fariseo, chi tée stáhú-ni cácuu ró. Chi casáha ró úxí uxí nuhní tamínú jíin yucū anís jíin yucū comino, te cásocō rō ñin ñin siquí tāca úxí un núu Yaā Dios. Te cástóo ró jnūhun cánuú ndasí gá nuū ley, suu jeē cáca ndaā rō, jíin jéē cundáhú ni rō jnāhan ró, jíin jéē candíje ró. Tāca jéē yáha cánuú sáha ró núu, te suni ma stóo ró jéē socó rō tāca yúcū ún. ²⁴Cácuu ró nájnūhun tée cuáá jéē steén ichi nuū ñayuu. Chi cásquícu ró ñin jeē lulí gá un, te cástóo ró jéē cánuú gá. Te suu cúu nájnūhun jeē cátava rō chūcún ndíhí jeē ñūhun nuū ndúxi, te cácocó ró ñin quití cáhnu jeē naní camello.

²⁵'Nacā xeēn ndoho róhó tée cástéén tutu ley jíin róhó tée fariseo, chi tée stáhú-ni cácuu ró. Chi nájnūhun jeē cánacate ró yátā vaso jíin yátā cohó. Te ichi íni rō chi nūhun máni máá jnūhun cuíhna jíin jnūhun ndíyo ni. ²⁶Tée cuáá cácuu ró, fariseo. Xihna gā sáha ró jéē coo ndoo ini anuá rō, te yūcuán na te suni coo ndoo tāca jéē casáha ró jéē cájito ñayuu nuū.

²⁷'Nacā xeēn ndoho róhó tée cástéén tutu ley jíin róhó tée fariseo, chi tée stáhú-ni cácuu ró.

Chi cándāa ró nájñuhun vehe ndīyi nuū panteón jeē cáyaa. Chi ichi yátá jíto luu, te ichi íni ñuhun chítú yiqui ndíyi jíin táca jéē tehyú. ²⁸Te súcuan cácuu máá ró, chi ichi yátá rō casáha ró jeē tée ndaā cácuu ró núū ñayuu. Te ichi íni rō ñuhun chítú jñuhun stáhú-ni jíin jñuhun néé.

²⁹Nacā xeēn ndoho rōhó tée cástéén tutu ley jíin rōhó tée fariseo, chi tēe stáhú-ni cácuu ró. Chi casáha ró vehe siquī nuū yíndūji ndīyi jíí rō, tēe ni canacani jñuhun Yaā Dios nde jenahán. Te casáha luu ró vehe siquī nuū yíndūji táca tēe ni iyo ndaā. ³⁰Te cácahān rō: Núu jeē suni yúcu yó tiempo jeē ní cotecu ndīyi jíí yō, te ma squívi nduu yō jíin de jeē cáhni yō tēe ni canacani jñuhun Yaā Dios, achí ró. ³¹Te súcuan cácahān ndaā rō jeē maá ró cácuu yucūn ñayuu ni cajehni tēe ni canacani jñuhun ya. ³²Núu súcuan te táca cuéchi jeē ní casquéjéé ndíyi jíí rō, máni un casáha ga maá ró.

³³Va sēhe coō cácuu ró, chi xeēn rō nájñuhun coō. ¿Ndese cācu ró jéē ma jnahnú ndetū rō quingoo ró infierno? ³⁴Núu súcuan te tají rí táca tēe nacani jñuhun Yaā Dios nuū rō, jíin táca tēe ndíchí jéē castéén jñuhun ya. Te sava de cahni rō, te sava de cata caa ró jicā cruz. Te sava ga de cani ró de ini táca vehe íi sinagoga, te scúnu ró de quingoo de táca ñuu. ³⁵Te súcuan te condee cuéchi siquī maá ró jeē ní cajehni jíí rō táca tēe ndaā, xihna gā nde Abel tēe ndaā, te nde Zacarías sēhe Berequías, tēe ni cajehni de ini templo sava mēhñu

cuarto íi jíin altar. ³⁶Jendaá cahán rí jíin ró jeē táca cuéchi yáha condee siquī ñayuu iyó vijna.

Jeē cucuíhyá ni yā jíto ya ñuu

Jerusalén

(Lc. 13.34-35)

³⁷Róhó ñuu Jerusalén, jéhni rō tēe cánacani jñuhun Yaā Dios, te jéhe ro yúu xiní tēe tájí Yaā Dios vējicoo nuū rō. Te cuehē jínu ni cuni rí nastútú rí sēhe ró, nájñuhun ndují jéē nastútú tí sēhe tí chiji ndijēn tī, te tu ní cúní rō. ³⁸Núu súcuan te vijna te stóo uun na rí rohó jíin sēhe ró. ³⁹Chi cáhán rí jíin ró jéē ndé vijna te ma cóto cuítí gā rō nuū rí, chi nde quiji quiví jeē cahán sēhe ró: Yōhyo vāha Yaā cúu Yaā véndiji jíin jniñu máá Jítoho yō Yaā Dios, achi i. Achí yá.

Jeē ní cachi yā jeē náā templo

(Mr. 13.1-2; Lc. 21.5-6)

24 Te ni quenda Jesús ini templo cáhnu cuahān yā. Te ni quecoo tēe cáscuáha jíin yá, te ni cacahān de jíin yá siquī táca vehe jeē ndejnáhan jeē cúu máá templo un. ²Te ni cahān yā jíin de: Táca jéē cájito ró yáha, jendaá cahán rí jíin ró jeē quiji quiví jeē ma cóso jnáhan ga ni ñin yuū, chi ndíhi jnanū. Achí yá.

Na seña coo nuū cuácuyajni ndíhi ñayiví

(Mr. 13.3-23; Lc. 21.7-24; 17.22-24)

³Te ni jehēn yā jíin tēe cáscuáha jíin yá nde yucu Olivos, te ni cucōo ya yūcuán. Te ni quecoo de nuū yā, te ni cacajñuhun sñin de ya:

Castūhun ní ndé quívi coo táca jéē ní cachi ní jéē coo. ¿Te na seña

coo núu ni cuyajni quivī ndíji ní jín jéē jínu ñayiví? áchí de.

⁴Te ni cahān Jesús:

Coto ró jéē ma stahú ni iin de róhó. ⁵Chi quijicoo cuehē tēe jeē stahú jín síhví rí. Máá rí cúu Cristo, achi de. Te súcuan stáhú de cuehē ñayuu. ⁶Te nihīn rō jnūhun jeē tāca lado iyó guerra, chí je yajni coo guerra. Te ma yūhu ró, chi cánuú coo súcuan. Te ni ná tu jinū quivī ndíhi ñayiví. ⁷Chi ndonda nación siquī inga nación, te ndonda ñuu siquī inga ñuu jeē cuajnáhan. Te coo jnamā jín cuéhyī xeēn. Te cháha chúcuan jnāa. ⁸Te tāca jéē yáha cácuu jnūndóho quejéé xíhna ñúhún gá.

⁹Yūcuán na te nastúu i róhó jínáhan ró jéē stóho i róhó te cahni i róhó. Te ndíhi ñayuu quitī ni i nuū rō jeē siquí ruhū. ¹⁰Te quivī ún chi cuehē ñayuu candíje caca yátá i, te quitī ni i nuū jnáhan i, te nastúu jnáhan i. ¹¹Te canecoo cuehē tēe stáhú, te cahān de jeē jnúhun Yaā Dios cánacani de, te stáhú de cuehē ñayuu. ¹²Te nducuehē jniñu néé, te jeē yúcuan cuehē i ma cóo manī gā i. ¹³Te ñayuu cuiñi nihin jín jnúhun ri nde quivī jínu, ñayuu ún chi cācu. ¹⁴Te jnūhun yáha síquī ndese ndácu Yaā Dios jniñu, cuitē núu ní cáhnu ñayiví, návaha cuni ñayuu tācá nación. Yūcuán na te jínu ñayiví.

¹⁵Te Daniel, tēe ni nacani jnūhun Yaā Dios, ni tee de jnūhun iin tēe néé jéē quíji. Te róhó jéē cácahu tutu ún, na jécūhun ni rō. Chi iin quivī te cuni rō jeē sáha ndevāha de jeē stívi de tācá ndajniñu ii ini templo, te cuiñi de ini lugar ii. ¹⁶Te

núu cuni rō jeē súcuan cúu, te ñayuu cáyūcú región Judea, na cúu i caa i yucu quingoo i. ¹⁷Te ñayuu cáyūcu núu quéhe, ma ndívi i ini vehe jeē quénehen i ndajniñu i, chi cánuú cunu yachī i návaha cācu i. ¹⁸Te ñayuu cáhiin nuū itu, ma ndíji i vehe jeē quíhīn i sahma i. ¹⁹Te quivī ún nacā jeē ndahú ñahan cáñuhun sēhe jín ñahan cándeca yiquín, chi ma cúnihin ña cunu yachī ña. ²⁰Te cacān tahú rō jeē ma quíji jnūndóho un jéē cunu ró máá tiempo cúun yuhvā ni quivī ndétátú. ²¹Chi jeē quejéé un te coo cuehē jnūndóho xeēn, jeē ná tu coo súcuan nde quivī ní jecōo ñayiví te nde vijna. Te jeē ndíhi jnūndóho ún te ni ma cóo ga jeē súcuan. ²²Te núu tú nastívi Yaā Dios tiempo jnūndóho ún, te ni iin ñayuu ma cácu cuiti i. Te jeē siquí ñayuu cácandíje jeē ní nacāji ya, jeē yúcuan nastívi ya tiempo un.

²³Núu súcuan te núu iin ñayuu cahān jín ró: Yāhá condēhe ró íne Cristo, chí: Yūcuán condēhe ró íne ya, achi i, te ma candíje ró jéē cahán i. ²⁴Chi canecoo tēe cástáhú jéē achi de jeē Cristo cúu de, chí achi de jeē tēe nācāni jnūhun Yaā Dios cúu de. Te sáha de jniñu jéhu jeē naa ni ñayuu coto i, návaha stáhú de nde maá ñayuu ní nacāji ya, te núu na cúu. ²⁵Je ni castūhun rí nuū rō vijna nde ná tu coo. ²⁶Núu súcuan te núu cahān ñayuu jín ró: Cuácondēhe ró, chi nde nuū ñúhun téhé íne ya, achi i, te ma quihín rō condēhe ró. Chí núu cahān i: Nehen condēhe ró, chi ini vehe yáha íne ya, achi i, te ma candíje ró jínáhan ró. ²⁷Chi nájnūhun jeē ndíndēe

sáha taja te cúndijin nde ichi núu cáne niāndii jíin ndé ichi núu quee niāndii, suni súcuan coo quivī ndiji ruhū, Yaā ní nduu tēe, chi ndihi ñayuu coto. ²⁸Te nájnūhun jeē cutútú téji ndé-ni cúu nuū catú quitī ní jíhi, suni súcuan coo tāca jēe ni cáhān rī ndé-ni cúu-ni nuū cáhiyo ñayuu.

Ndese coo quivī ndiji Yaā ní nduu tēe

(Mr. 13.24-37; Lc. 21.25-33; 17.26-30, 34-36)

²⁹Yūcuán na te núu ni ndihi tāca jnūndóho quivī ún, te cojnúú níāndii, te yoō ma ndíi gā. Te níngoo quīmī andíví. Te tāca jēe íin andíví chi quisi i. ³⁰Yūcuán na te coto ñayuu nuū maá rí, Yaā ní nduu tēe, ndiji ri ichi ándíví. Te ndahyū ñayuu tācá nación ní cáhnu ñayīví. Te coto i nuū ruhū, Yaā ní nduu tēe, ndiji ri jíin vícō andíví, te condiso ri cuehē poder, te yōhyo luu cujéhnu ri. ³¹Te tají rí ndajéhé rí quíngoo, te tiví nihin ya trompeta. Te quinastútú yá ñayuu ní nacáji ri ndicúún lado ñayīví, nde íin lado ñayīví jíin ndé inga lado.

³²Vijna te scuáha ró ndese sáha nundēhe higo: Núu je ni nane numa, te ni najee ndaha, te cájini rō jeē jé ni cuyajni tiempo jihní.

³³Te suni súcuan núu ni cajini rō jeē ní quejéé cúu tācá jniñu jeē ni cáhān rī, yūcuán na te na jécūhun ni rō jeē ní cuyajni quivī ndiji ri, te yachī coo. ³⁴Jendaá cahán rī jíin ró jeē ma cúu ndihi ñayuu jeē cóto jnūndóho ún, chi nde squícu ndihi jniñu ún. ³⁵Andíví jíin ñayīví chi naa, te tāca jnūhun cáhān rī chi ma náa, chi ndihi squícu.

³⁶Te quivī jíin hora jeē ndíji ri, tú ni íin ñayuu jíiní, ni máá ndajéhé cáhiyo andíví, ni máá rí, Sēhe Yaā Dios. Chi máá íin ni Tátá rī Yaā Dios cúu jeē jíiní.

³⁷Chi nájnūhun ni cuu quivī ni íyo Noé, suni súcuan coo quivī ndiji ruhū, Yaā ní nduu tēe. ³⁸Chi quivī ún, nde ná tu cuun saū xeén, te cáyeji i cájiji i, cánandāha i, te cájēhe i sēhe síhí i jeē nándāha, nde ni jinū quivī jeē ni quívi Noé ini barco cáhnu jeē naní arca. ³⁹Te tu ní cácandíje ñayuu jeē cuun saū xeén, te ni cuun, te ni ndaa ndute ni cajihí ndihi i. Te suni súcuan coo núu na ndíji ruhū, Yaā ní nduu tēe. ⁴⁰Te quivī ún cone uū tēe sájniñu nuū ítu. Te íin de naquihin ri, te inga de ndōo. ⁴¹Te coo uū ñahan jeē ndíco cáhnu, te íin ña naquihin ri, te inga ña ndōo. Súcuan cuu jeē sava ñayuu naquihin ri te sava i quendōo, chi tu ní cácandíje i.

⁴²Núu súcuan te ndito na cóo ni rō, chi tu cájini rō na quivī ndiji Jitoho rō. ⁴³Te na chúhun ni rō jeē cahán jnūhun yátá yáha: Tēe chíí vehe, núu jeē jíiní de na hora quiji ñacuihná, te condito de, te ma cuáha de jnūhun sácuíhná ndajniñu vehe de núu. ⁴⁴Te rōhó jíjnáhan ró, suni súcuan coo tūhva ró, chi máá hora jeē tú na vé cájeni ni rō, te ndiji ruhū, Yaā ní nduu tēe.

Jnūhun yátá síquī mozo

(Lc. 12.41-48)

⁴⁵Núu súcuan te coo ró nájnūhun íin mozo jeē ndíto xiní te squícu vāha. Te máá patrón ni jeni de mozo un jēe cóto i ñayuu vehe de, návāha scáji i máá hora. ⁴⁶Te

yōhyo ndetū mozo un jēē nūu ni ndee patrón, te cuni de jeē súcuan squícu vāha i. ⁴⁷Jendaá cahán rī jín ró jeē cani de mozo un jēē coto i ndíhi ndajniñu de. ⁴⁸Te nūu mozo sáha néé cúu i, te jéni ni i jeē ma ndíji yachí patrón i, ⁴⁹te quejéé i cani i jnáhan mozo i, te caji i coho i jín tée cánajini, ⁵⁰núu súcuan te ndee-ni patrón quiví jeē tu ndétu i jín hora jeē tú na vé jéni ni i. ⁵¹Te stóho xeēn de i, te squíví de i nuū cáhiin tēe stáhú-ni. Te yūcuan ndáhyū i te nacayíhi yuhu i jeē ndoho xeēn i. Achí yá.

Jnūhun yátá síquī uxī sūchi síhí

25 ¹Te suhva cúu jeē ndácu Yaā andíví jniñu nuū ñáyuu: Cúu nájñūhun ñin vico nándāha. Te ni ñyo uxī sūchi síhí jeē ní caquihin i linterna cándaha i, te ni quendacoo i cuajnahan i ñin tēe nandāha. ²Te uhūn i chí tú ndito xiní i, te uhūn i chí ndito xiní i. ³Te sūchi tú ndito xiní, cándaha i linterna i, te tu cándaha i petróleo jeē náchuhun i. ⁴Te sūchí ndito xiní, chí cándaha i botella petróleo jín linterna i. ⁵Te níni cúcuéé quiji tēe nandāha ún, te ni quee māhná, te ni caquixí ndíhi i. ⁶Te nuū ní cuu sava ñuú, te ni cajini i jeē cácana jee: Je véji tēe nandāha. Cuángoo quijnahan rō de jínáhan ró, achí. ⁷Yūcuán na te táca súchi síhí un ní candonda i, te ni casátūhva i linterna i. ⁸Te sūchi tú ndito xiní, ni cacahān i jín súchi ndito xiní: Cuāha jecu petróleo nuū rī jijnáhan ró, chí cuandahvā linterna rī, achí i. ⁹Te ni cacahān sūchí ndito xiní: Ma cúu, chí ma cánda jeē cúu máa

rí jín máa ró. Vāha ga quingoo ró nūu cúyāhu, te cuaan ró jēé cúu máa ró. Achí i. ¹⁰Te níni cuángoo i cuaan i, te ni quee-ni tēe nandāha. Te sūchi cáhiyo tūhva un, ní quívicoo i jín de vico nándāha de. Te ni ndihyū yehyí. ¹¹Te ni cunúu, te ni quecoo uhūn gā sūchi síhí un. Te ni cacahān i jín tēe nándāha: Nune ní yéhyí na quívicoo ná, achí i. ¹²Te ni cahān maá de: ¿Ndé nuū véjicoo ró? Chí tu jíní rī rohó, achí de. Achí yá.

¹³Yūcuán na te ni cahān yā:

Núu súcuan te ndito coo ni rō, chí tu cájini rō na quiví na hora ndíji ruhū, Yaā ní nduu tēe. Achí yá.

Jnūhun yátá síquī tēe ní jēhe nūu xūhun nūu táca mozo

¹⁴Te suhva cúu jeē ndácu Yaā andíví jniñu nuū ñáyuu: Cúu nájñūhun ñin tēe jeē quihín jicá de ñnga ñuu. Te nde ná tu quihín de te ni cana de mozo de jínáhan, te ni jēhe núu de xūhún de nuū i, jeē na sájñiñu i jín návāha nducuehē.

¹⁵Te nuū ñin i ni jēhe de uhūn mil xūhun cáa. Te nuū ñnga i ni jēhe de uū mil. Te nuū ñnga i ni jēhe de ñin mil. Súcuan ni jēhe de, chí jíní de nasaa canda ñin ñin i sájñiñu i jín. Yūcuán na te ni quihin de ichi cuahān jicá de. ¹⁶Te mozo jeē ní quihin uhūn mil xūhún, ní sájñiñu de jín. Te ni nihín de uhūn gā mil síquī. ¹⁷Te mozo jeē ní quihin uū mil xūhún, suni ni nihín de uū gā mil síquī. ¹⁸Te mozo jeē ní quihin ñin mil xūhún, ni jehēn de ni jete de yaū, te ni chisáhí de xūhún patrón de.

¹⁹Te ni yāha cuehē tiempo, te ni ndee patrón mozo un jínáhan. Te

ni nandacān de cuenta nuū i. ²⁰Te ni quee mozo jeē ní quihin uhūn mil xūhún un, te ni nacuāha de xūhún un núū patrón de jíin úhūn gā mil jeē ni níhīn de síquī. Te ni cahān de: Ni jēhe ní úhūn mil nuū ná, te yāha íyó úhūn gā mil jeē ni níhīn na síquī. Achí de. ²¹Te ni cahān patrón jíin de: Iyó váha núu súcuan. Yōhyo váha mozo cúu ró jēē squícu vāha ró. Chi vāha ni squícu ró ĩn jniñu lúlí-ni, te vijna te cuāha ri jniñu jéhnu ndacu ró. Te quīvī ró núū cusīī ni rō jíin rí. Achí de. ²²Yūcuán na te ni quee mozo jeē ní quihin uū mil xūhún un. Te ni cahān de: Ni jēhe ní úū mil nuū ná, te yāha íyó úū gā mil jeē ni níhīn na síquī. Achí de. ²³Te ni cahān patrón jíin de: Iyó váha núu súcuan. Yōhyo váha mozo cúu ró jēē squícu vāha ró. Chi vāha ni squícu ró ĩn jniñu lúlí-ni, te vijna te cuāha ri jniñu jéhnu ndacu ró. Te quīvī ró núū cusīī ni rō jíin rí. Achí de. ²⁴Te ni quee mozo jeē ní quihin ĩn mil xūhún un, te ni cahān de jíin patrón: Je jíin na níhīn jēē tée xeēn cúu ní. Chi cuehē gā cuní ni vēsú jeē cúu sáha mozo ni, te cuehē gā nāndacān ní vēsú jeē ni jēhe ní. ²⁵Te jeē yúcuan ní yūhu ná, te ni jehēn na ní chisāhi ná xūhun ní chiji ñuhun. Te yāhá na nacuāha na xūhun ní. Achí de. ²⁶Te ni cahān patrón jíin de: Mozo cuxí cúu ró te máni jniñu néé sáha ró. Chi jéni ni rō jeē cuehē gā cuní rī vēsú jeē cuu sáha mozo rī, te cuehē gā nāndacān rī vēsú jeē ni jēhe rī. ²⁷Núu jeē ni chúne ró xūhun rí nuū banco nuú, te jeē ní ndee rī te naquihin ri xūhun rí nde jíin séhe xūhun núú.

Achí de jíin i. ²⁸Te ni cahān de jíin táca gá mozo de: Núu súcuan te quende rō mil xūhun jíinā nuū i, te cuāha ro núu mozo névāha uxī mil. ²⁹Chi ñayuu jeē névāha, sa quiji ga nuū i, te coneváha cuehē i. Te ñayuu jeē tu névāha, sa cujiyo-ni vēsú jecu jeē névāha i. ³⁰Te mozo yáha jēē tu sájniñu vāha, quenehen ró i na quíhīn i nuū quéhe nuū néē. Te yúcuan ndáhyū i te nacayīhí yuhu i jeē ndoho xeēn i. Achí patrón un.

Siquī jeē cóo juicio tācá nación

³¹Te ni cahān gā yā:

Īn quivī te ndiji máá Yaā ní nduu tēe, te cuu ya Rey nuū ñáyuu. Te tācá ndajéhé yā cuiñi ní xiin ya. Te cucōo ya mesa nuū ndácu ya jniñu, te yōhyo luu kujéhnu ya. ³²Te ndutútú ñayuu tācá nación nuū yā. Te sásīn ya i jíjnáhan i, nájñuhun cúsfīn lanchi jíin ndixúhú sáha tēe ndíto ti. ³³Te ñayuu váha jeē cúu nájñuhun lanchi, chucú yá i lado váha ya. Te ñayuu neé jeē cúu nájñuhun ndixúhú, chucú yá i lado jecó yá. ³⁴Yūcuán na te cahān Rey jíin ñáyuu cáhiin lado váha ya: Nacā ndetū rō jeē ni sáha Tátá rī jíin ró. Nehen quīvīcoo ró núū ndácu ró jniñu. Chi nde quivī ní jecōo ñayīví te je ni sátūhva ya nuū ndacu ró jniñu. ³⁵Chi ni jīi rī sōco, te ni cajēhe ro jēē ní yeji rī. Ni jichī rī ndute, te ni cajēhe ró jēē ní jihī ri. Ni quiji ri nde ñuu jicá, te ni cajēhe núú ró vehe ni ndōo ri. ³⁶Ni cumanī sahma ri, te ni cajēhe ró. Ni cocuhū rī, te ni jecōndēhe ró ruhū. Ni ine ri vecāa, te suni ni jecōndēhe ró ruhū. Súcuan cahān

yā jíin ñáyuu cáhiin lado váha ya. ³⁷Yūcuán na te cahān ñáyuu váha un jíin yá: ¿Na quivī ní cajito ná níhín jéē jíi ni sóco, te ni cajēhe na jéē ní yeji ní, chí jéē jichí ni ndute, te ni cajēhe ná ní jiji ní? ³⁸¿Te na quivī ní cajito ná jéē ní quiji ní ndé ñuu jicá, te ni cajēhe núu ná vehe ni ndōo ní, chí jéē cúmani sahma ní, te ni cajēhe ná? ³⁹¿Te na quivī ní cajito ná jéē huhú ni, chí jéē íne ní vecāa, te ni jecondēhe ná níhín? achi i. ⁴⁰Yūcuán na te cahān Rey jíin i: Jendaá cahán rī jíin ró jéē ná ni casáha ró súcuan jíin iin tǎcá hermano rī jeē cácanđíje, vēsú ñáyuu núu ga cúu i, te nuū maá rí ní casáha ró.

⁴¹Yūcuán na te suni cahān Rey jíin ñáyuu cáhiin lado jecó yá: Ñáyuu jnahnū ndetū cácuu ró. Cujíyo quingoo ró núu ñuhún jeē cayú ní cáni, nuū iyó túhva cone jexeén jíin táca táchī jeē cájejnīñu nuū. ⁴²Chi ni jíi rī sōco, te tu ní cájēhe ro jéē cáji rī. Ni jichí rī ndute, te tu ní cájēhe ro jéē coho rī. ⁴³Ni quiji ri nde ñuu jicá, te tu ní cájēhe núu ró vehe ndōo rī. Ni cumani sahma ri, te tu ní cájēhe ró. Ni cocuhū rī, ni ine ri vecāa, te tu ní jécondēhe ró ruhū. Súcuan cahān yā jíin ñáyuu cáhiin lado jecó yá. ⁴⁴Yūcuán na te cahān ñáyuu un jíin yá: ¿Na quivī ní cajito na níhín jéē jíi ni sóco, chí jéē jichí ni ndute, chí jéē ní quiji ní ndé ñuu jicá, chí jéē cúmani sahma ní, chí jéē huhú ni, chí jéē íne ní vecāa, te tu ní cájēhe na jéē cúmani nuū ní? Achi i. ⁴⁵Yūcuán na te cahān yā jíin i: Jendaá cahán rī jíin ró, jeē tu ní casáha ró súcuan jíin ni iin

tǎcá hermano rī jeē cácanđíje, vēsú ñáyuu núu ga cúu i. Núu súcuan te suni nuū maá rí cúu jeē tu ní casáha ró, achi yā. ⁴⁶Yūcuán na te quingoo ñáyuu un núu ndóho i ní cáni. Te ñáyuu váha un quívicoo i nuū cótecu i ní cáni. Achi Jesús.

Jeē ní casquijnáhan de jñuhun jeē jñii de Jesús

(Mr. 14.1-2; Lc. 22.1-2; Jn. 11.45-53)

26 Te nuū ní ndihi ni cahān Jesús táca jñuhun yáha, te ni cahān yā jíin tée cáscuáha jíin yá:

²Je cájini rō jeē uū na quivī te coo vico pascua. Te ruhū, Yaā ní nduu tēe, nastúu i ruhū jeē cúu rī jicā cruz, achi yá.

³Yūcuán na te sutū cácujeñhu, jíin tée cástéén tutu ley, jíin táca tée jéñhu jeē cándacu jñiñu nuū ñáyuu hebreo, ni candutútú de ini patio vehe palacio maá sūtū cujéñhu ga jeē naní Caifás. ⁴Te ni candajnūhún de ndese jñii de Jesús jíin jñuhun stáhú, te cahni de ya.

⁵Te ni cacahān de:

Ma jñii yó de máa quivī víco, chi ndonda ñáyuu siquī yō, achi de.

Jñuhun ñahan jeē ní chuhun perfume xini yā

(Mr. 14.3-9; Jn. 12.1-8)

⁶Te íne Jesús ñuu Betania vehe Simón, tēe ni ndoho cuehyī stehyú. ⁷Te ni quee iin ñahan nuū yā, ndáhá ña iin frasco yuū luu jeē ñuhun aceite perfume jeē yóhyo yahu ndéé. Te ni chuhun ña xini yā níni jéē yéji yā staā. ⁸Te ni cajito tée cáscuáha jíin yá, te ni caquitī ni de, te ni cacahān de:

¿Najehē cúu jeē nāā saá-ni perfume jiñā? ⁹Chi cuu xicó yahu yó núú, te cuāha yo xúhun núú ñáyyuu ndahú. Achí de.

¹⁰Te ni jini Jesús jñuhun cácahān de. Te ni cahān yā jíin de:

¿Naun cásáha ró jéē nácani uhū ni ñahan yáha? Chi ñin jniñu váha cúu jeē ni sáha ña jíin rí. ¹¹Chi níni coyūcu ñáyyuu ndahú jíin ró, te ruhū chí tuá condee rí jíin ró. ¹²Chi jeē ní chuhun ña perfume yáha ruhū, suu cúu jeē ni sátūhva ña ruhū nde quivī quíndūji ri. ¹³Jendaá cahán rí jíin ró jeē ní cáhnu ñayīvi ndé-ni cúu nuū cuité jñuhun yáha jéē jnáma ri ñayuu, suni nacani i jñuhun jeē ni sáha ñahan yáha, návāha cocuhun ni ñayuu ña, áchí yá.

Jeē ní nastúu Judas yā

(Mr. 14.10-11; Lc. 22.3-6)

¹⁴Yūcuán na te ñin jeē ndihúxi uū tēe cáscuáha ún, nání de Judas Iscariote, ni jehēn de nuū sutú cácujeñhu. ¹⁵Te ni cahān de jíin:

¿Nasaa cuāha ní núú ná, te na nastúu ná de nuū ní? áchí de.

Te ni cajēhe ocō uxī xúhun plata nuū de. ¹⁶Yūcuán na te nde quivī un ní quejéé de ndúcú de modo ndese nastúu de ya nuū sutú jijnáhan.

Jeē ní jequín yā Cena yā

(Mr. 14.12-25; Lc. 22.7-23;

Jn. 13.21-30; 1 Co. 11.23-26)

¹⁷Te máá quivī jeē quejéé vico jeē cáyeji ñayuu pan jeē tú na levadura yíhi, te ni quijicoo tēe cáscuáha un núú Jesús. Te ni cacahān de jíin yá:

¿Ndé nuū cuní ni jéē quísatūhva ná cuxíni ní vico pascua? áchí de.

¹⁸Te ni cahān yā:

Cuángoo nde ñuu, vehe tēe jeē jé ni cacahān yō, te cahān rō jíin de: Achí máá Maestro jeē ní cuyajni quivī cuu yā. Te vijna te caji yā vico pascua ini vehe ní jíin tēe cáscuáha jíin yá, achi rō. Achí yá.

¹⁹Te tēe cáscuáha jíin yá, ni casáha de nájñuhun ni ndacu Jesús jniñu nuū de, te ni casátūhva de jeē cuxíni ya vico pascua.

²⁰Te jeē cuácuaa, te ni quee yā, te ni cucōo ya mesa jíin ndihúxi uū tēe cáscuáha jíin yá. ²¹Te níni yéji yā jíin de te ni cahān yā:

Jendaá cahán rí jíin ró jeē ñin róhó nastúu ruhū vijna, áchí yá.

²²Te ni cacucuíhyá ndasí ni de. Te ná ñin ná ñin de ni cacajñuhún de ya:

¿A sáña cúu? áchí de.

²³Te ni cahān yā:

Ñin róhó jéē cáyeji cáhnu jíin rí ñin cohō, suu ró nastúu ruhū. ²⁴Te ruhū, Yaā ní nduu tēe, jendaá cúu jeē quihín rí cuu rí, nájñuhun yósó jñuhun ri nuū tútu ií. Te nacā xeēn ndoho tēe nastúu ruhū. Vāha ga núu tu ní cácu tēe un núú, áchí yá.

²⁵Yūcuán na te ni cahān Judas, tēe nastúu ya:

¿A sáña cúu, Maestro? achí de.

Te ni cahān yā jíin de:

Suu ró cúu, áchí yá.

²⁶Te níni jéē cáyeji de jíin yá, te ni quihin ya pan, te ni nacuatáhú yá, te ni tahú cuéchí yá, te ni jēhe ya nuū tēe cáscuáha jíin yá. Te ni cahān yā:

Caji rō jijnáhan ró, chí yāha cúu yiqui cúñu rí, achí yá.

²⁷Yūcuán na te ni quihin ya ñin copa ndūxi uva, te ni nacuatáhú yá, te ni jēhe ya nuū de. Te ni cahān yā:

Coho jijnáhan ró. ²⁸Chi yáha cúu niñi rī jeē cuáha ri jeē cúu contrato jeé, te cati jeē ndundoo cuēchi cuehē ñayuu, te coo jñuhun cáhnu ni nuū cuēchi i. ²⁹Te cáhán rī jín ró jeē ndé vijna te ma cóho ga rī ndūxi ndehē uva yáhá, chi nde quiji quivī ndacu Tátá rī jniñu ní ñayiví, te sáa te coho tucu ri jín ró jijnáhan ró. Achí yá.

Jeē ní cachi yā jeē yūhu Pedro cahān de jeē jíní de ya

(Mr. 14.26-31; Lc. 22.31-34; Jn. 13.36-38)

³⁰Te ni jita ya iin yaa iī jín de jijnáhan de. Te ni quenda ya cuahān yā jín de nde yucu Olivos.

³¹Yūcuán na te ni cahān yā:

Ndivii rō nayūhu ró jeē siquí ruhū jecuāa vijna. Chi suhva je yósó jñuhun ri nuū tútu iī, ni cahān Yaā Dios: Cuáha ri jñuhun jeē cáhni ñayuu tēe ndíto lanchi, te lanchi un cuítē núu tī jeē yūhu tí, achí. ³²Te jeē nátecu rī, te xihna ruhū cosnūu rí quihīn rī región Galilea, te sáa te najinūcoo ró, achí yá.

³³Yūcuán na te ni cahān Pedro:

Vēsú ndihī de na náyūhú de, te maá ná chi ma náyūhú cuítī ná, achí de jín yá.

³⁴Te ni cahān yā jín de:

Jendaá cahán rī jín ró jeē jecuāa vijna, nde ná tu cana líhli, te yūhu ró jeē jniñ ñayuu rohó, te unī jínu cahān rō jeē tu jíní rō ruhū, achí yá.

³⁵Te ni cahān Pedro jín yá:

Vēsú núu cuu na jín ní, te ma cahán cuítī na jēe tu jíní na níhín, achí de.

Te suni súcuan ni cacahān ndihī tēe cáscuáha jín yá.

Jeē ni jicān tahú yā nuū huerto Getsemaní

(Mr. 14.32-42; Lc. 22.39-46)

³⁶Yūcuán na te ni jinū Jesús jín tēe cáscuáha jín yá iin lugar nuū naní Getsemaní. Te ni cahān yā jín de:

Yáhá-ni cucōo ró, te na quihín rī yūcuan cácān tahú rī, achí yá.

³⁷Te ni jeca ya Pedro jín ndindúú séhe Zebedeo cuahān yā jín de. Te ni quejéé yá cucuíhyá ndasí ni yā te cúxí ni yā jeē quíji jñundóho siquí yā. ³⁸Yūcuán na te ni cahān yā jín de:

Yōhyo cúcuíhyá ni rī, te ndúcú sáha jeē cúu rī. Yáhá condetu ró te condito ró jín rí.

³⁹Te ni jica ya jecu gā, te ni jecuññ yití yá ni jequin ya nuū yā nuū ññuhun, te ni jicān tahú yā suhva nuū Yaā Dios:

Tátá maá ná, núu cuu te tejiyo ní jñundóho yáha jēe ma quíji siquí ná. Te nasūu jēe cuní maá ná, chi jeē cuní maá ní na cóo, achí yá.

⁴⁰Yūcuán na te ni ndee yā nuū ndinúní tēe cáscuáha jín yá, te ni jito ya jeē cáquixi de. Te ni cahān yā jín Pedro:

¿A tu ní cánda ró condito ró jín rí vēsú iin hora? ⁴¹Coo ndito ni rō te cacān tahú rō jeē chindéé ñáhán yá rohó jēe ma sáha ró cuēchi jeē coto ndee jeneé rōhó. Chi cuní ndije ánuá rō squícu vāha ró, te yiqui cúñu rō chi tu fuerza, achí yá.

⁴²Te ni jehēn tucu ya vuelta uū, te suhva ni jicān tahú yā:

Tátá maá ná, te núu ma cúu cujiyo jñundóho yáha jeē ma ndóho

ná, te na cóo jeē cuní maá ní núu súcuan, áchí yá.

⁴³Te ni ndee tucu ya nuū de, te ni jito ya jeē cáquixi tucu de, chi yōhyo cájii de māhná. ⁴⁴Te ni stóo ya de, te cuahān tucu ya cuacacān tahú yā vuelta unī. Te suni jnūhun yúcuán ní cahān yā. ⁴⁵Yūcuán na te ni ndee tucu ya nuū de jíjnáhan de, te ni cahān yā jíin de:

Vijna te cusū rō te ndetātu ró. Te je ni quee hora, te ruhū, Yaā ní nduu tēe, natūu ri te jni tēe cáhīyo cuēchi ruhū. ⁴⁶Ndocuīñi jíjnáhan ró, chi je vēji tēe nastúu ruhū, te quihīn yō jíin de, áchí yá.

Jeē ní cajniñi de Jesús

(Mr. 14.43-50; Lc. 22.47-53; Jn. 18.2-11)

⁴⁷Te sá cáhán gā yā súcuan, te ni quee-ni Judas, iin jnáhan jeē uxí uū tēe cáscuáha jíin yá. Te vējicoo cuehē tēe jíin de, cándaha de espada jíin yujnu. Chi sutū cácujuhnu jíin táca tēe jéhnú cándacu jniñu nuū ñáyuu hebreo, ni catají tēe ún. ⁴⁸Te Judas, tēe nástuu ya ún, je ni jēhe de iin seña nuū tēe un jíjnáhan, chi ni achi de:

Tēe jeē téchūhu rí un cúu. Te jniñi ró jíjnáhan ró, áchí de.

⁴⁹Te ni quee-ni de nuū Jesús, te ni cahān de:

Ta ni cuaa, Maestro, achí de.

Te ni techūhú de ya. ⁵⁰Te ni cahān Jesús jíin de:

Amigo, ¿na jniñu vēji ró? áchí yá.

Yūcuán na te ni jinūcoo tāca gá tēe ún, te ni cajniñi de Jesús.

⁵¹Te iin tēe jeē cáhiin jíin Jesús, ni tava de espada de, te ni jehnde de sōho iin mozo maá sūtū cujéhnú ga.

⁵²Yūcuán na te ni cahān Jesús jíin de:

Nachuvāha espada rō, chi tāca jeē cájejnáhan jíin espada, suni jíin espada cuu. ⁵³¿Te á tu cájini rō jeē cuu cacān tahú rī nuū Tatá rī, te vijna ñūhún tají yá víhyá gā uxí uū mil ndajéhé andiví jeē jnama ruhū? ⁵⁴Te núu súcuan, ¿te ndese cuu squícu jnūhun cáhán tutu iī jeē cánuú ndoho ri súcuan? áchí yá.

⁵⁵Yūcuán na te ni cahān yā jíin ñáyuu cuehē ún:

¿Te va tēe cuíhná cúu ri jeē véjicoo ró jíin espada jíin yujnu jeē jniñi ró rúhū jeē súcuan. Tāca quívi ni cucōo ri jíin ró jíjnáhan ró ini templo cáhnu, ni steén rī jnūhun, te tu ní cájniñi ró rúhū. ⁵⁶Te súcuan cáśáha ró návāha na squícu jeē cáhán tutu iī jeē ní catee tēe ni canacani jnūhun Yaā Dios, achí yá.

Yūcuán na te ndihi tēe cáscuáha jíin yá, ni castóo de ya, ni cajinu de cuangoo de.

Jeē ní indichi Jesús nuū junta tēe cácujuhnu ga

(Mr. 14.53-65; Lc. 22.54-55, 63-71; Jn. 18.12-14, 19-24)

⁵⁷Te tēe ni cajniñi Jesús, cuangoo de jíin yá nuū Caifás, tēe cúu sutū cujéhnú ga. Te yūcuan cáhiin tútū tēe cástéén tutu ley jíin táca tēe jéhnú cándacu jniñu. ⁵⁸Te Pedro chi jíca-ni ndíquín de ya, te ni jinū de patio sutū cujéhnú ga. Te ni quívi de ini patio, te ni cucōo de jíin táca policía, návāha coto de ndese coo síquī yā.

⁵⁹Te sutū cácujuhnu jíin táca tēe jéhnú jíin ndihi tēe cáśáha junta cujéhnú ga, ni canducú de tēe cahān jnūhun yáá síquī Jesús, chi cahni de ya cácuni de. ⁶⁰Te vēsú ni

quecoo cuehē ñayuu cácahān yaá, te tu ní cánihīn de cuēchi siquī yā jeē cáhni de ya. Te jeē sándīhí te ni quecoo uū testigo jeē cahán yaá síquī yā. ⁶¹Te áchí:

Tēe yáha ní cahán de jeē cuu canu de templo Yaā Dios, te nuū unf-ni quivī te nucondichi sáha de, áchí.

⁶²Yūcuán na te ni ndocuiñī maá sūtū cujéhnu ga, te ni cahán de jín yá:

¿Naun tu cáhán cuiti rō? ¿A íyó ndáa jeē cácahān tēe yáha síquī rō? Achí de.

⁶³Te Jesús tu ní cáhán cuiti yā. Te ni cahán maá sūtū cujéhnu ga:

Ndácu ri jniñu nuū rō jeē cahán ndáa rō cuni nahín maá Yaā Dios, Yaā técu. Cachi cají te núu maá ró cúu Cristo, Sēhe Yaā Dios, achí de jín yá.

⁶⁴Te ni cahán yā:

Suu ri cúu, nájñuhun cáhán rō. Te na cástūhun rí nuū rō jijnáhan ró jēē tāca quívī jeē quíji te coto ró rúhū, Yaā ní nduu tēe, condee rī lado váha Yaā iyó poder. Te coto ró jēē ndíji ri ichi ándiví jín vícō. Achí yá.

⁶⁵Yūcuán na te sūtū cujéhnu ga ni jehnde de sahma de jeē quití ndasí ni de, te ni cahán de:

Tēe yáha chi cáhán de jñuhun ndevāha jeē quití ni Yaā Dios, chi sáha de maá de Sēhe Yaā Dios. ¿Ndé jini nūhún gá yō testigo núu súcuan? Chi je ni cajini ró jñuhun ndevāha cáhán de. ⁶⁶¿Te ndese cájeni ni rō? achí de.

Te ni cacahán tēe cuehē ún:

Cuēchi cúu jeē cahán de súcuan, te jini nūhún cuu de, áchí.

⁶⁷Yūcuán na te ni catesihí de nuū yā, te ni cacani de ya. Te sava ga de ni cacatu de nuū yā. ⁶⁸Te ni cacahán de:

Te núu Cristo cúu ró, te cachi rō ndé iin cúu jeē ní cani róhó, áchí de.

Jeē ní cachi Pedro jeē tu jín de ya

(Mr. 14.66-72; Lc. 22.56-62;

Jn. 18.15-18, 25-27)

⁶⁹Te níni jēē súcuan cúu, te Pedro néne de nuū quéhe ini patio. Te ni quee iin ñahan jéjníñu vehe ún, te ni cahán ña jín de:

Róhó chi suni ni jica ró jín Jesús tēe Galilea, achí ña.

⁷⁰Te maá de tu ní cáchi de, chi ni cahán de ni cajini ndihi ñayuu:

Tu jín rī na jñuhun cáhán rō, achí de.

⁷¹Te ni quenda de yéhyí núu quéhe, te ni jito inga ñahan nuū de. Te ni cahán ña jín ñayuu cáhiin yūcuán:

Tēe yáha chi suni ni jica de jín Jesús, tēe ñuu Nazaret, achí ña.

⁷²Te inga jínu tu ní cáchi tucu de, chi sa ni cahán teyí de:

Tu jín rī tēe ún, achí de.

⁷³Te ni cunúu jecu gā, te ñayuu cáhiin yūcuan ní quecoo i nuū Pedro, te ni cacahán i:

Jendaá ndije jeē suni jñahan tēe un cúu ró, chi ndijin cahán rō jeē tēe Galilea cúu ró, áchí i.

⁷⁴Yūcuán na te ni quejéé de cáhán teyí de jeē na cóndee cuēchi siquī de núu tu cáhán ndáa de:

Tu jín cuiti rī tēe ún, achí de.

Te ni cana-ni líhli. ⁷⁵Te ni nucūhun ni de jñuhun ni cahán Jesús jín de: Nde ná tu cana líhli,

te yūhu ró te cahān rō unī jínu jeē tu jíní rō ruhū. Te ni quenda de cuahān de, te yōhyo ni ndahyū de jeē ní cachi de jeē tu jíní de ya.

Jeē cuángoo de jín yá nuū Pilato

(Mr. 15.1; Lc. 23.1-2; Jn. 18.28-32)

27 Yūcuán na te ni cundijin. Te tāca sūtū cácujeñnu jín táca tée jéñnu jeē cándacu jniñu nuū ñayuu hebreo, ni casquijnáhan de jñuhun ndese sáha de jeē cuu Jesús. ²Te ni cajihni de ya, te cuangoo de jín yá nuū Poncio Pilato, tēe cúu gobernador.

Jeē ni jíhī Judas

³Yūcuán na te Judas, tēe ni nastúu ya un, ní jito de jeē ní cunihin siquī yā jeē cúu yā. Te ni jnahuhū ni de, te ni nacuāha de ocō uxī xūhun plata jeē ni níhīn de nuū sutú cácujeñnu jín núu tāca tée jéñnu. ⁴Te ni cahān de jín:

Cuēchi ni sáha ná jēē ní nastúu ná iin tēe cuu de, te tú na cuēchi de.

Te máá sūtū un ní cacahān de:
¿Vé jítú ni ruhū? Cuēchi máá ró cúu. Achí de.

⁵Te ni scāne Judas xūhún un ini templo. Te ni quenda de cuahān de, te ni scuēhne de máá de.

⁶Te sutú cácujeñnu ni canastútú de xūhún un, te ni cacahān de:

Ma cúu chuhun yó xūhun yáha ini jejnū nuū cásocō ñayuu, chi xūhun jēē ni jéconaā jeē cúu iin tēe cúu, achí de.

⁷Yūcuán na te ni casándaā de jeē xūhun yúcuán cuaan de ñuhun jeē naní Lugar Ñuhun Quíxin, návāha yūcuán quindūji ñayuu ñuu jicá. ⁸Jeē yúcuán cúu jeē ndé

vijna nání ñuhun ún Lugar Ñuhun Niñí. ⁹Te súcuán ni squícu jñuhun ni cahān Jeremías, tēe ni nacani jñuhun Yaā Dios nde jenahán: Ni caquihin de ndihócó uxī xūhun plata, te súcuán-ni cúu iin yāhu jeē ní casáha ñayuu Israel cuenta jeē ndeé yā nuū i. ¹⁰Te jín xūhun un ní cajeen de ñuhun quíxin, nájñuhun ni ndacu máá Jítóho yō Yaā Dios jniñu nuū rī. Achí Jeremías.

Jeē ní indichi Jesús nuū Pilato

(Mr. 15.2-5; Lc. 23.3-5; Jn. 18.33-38)

¹¹Te nuū ní jinūcoo de jín Jesús nuū gobernador, tēe cúu Pilato, te ni cajñuhún de ya:

¿A máá ró cúu Rey ñayuu hebreo? achí de.

Te ni cahān Jesús:

Suu ri cúu, nájñuhun cáhán rō.

¹²Te sutú cácujeñnu jín tée jéñnu cándacu jniñu, ni cacahān de cuēchi siquī yā. Te tú na vé ni cáhán cuítí yā. ¹³Yūcuán na te ni cahān Pilato jín yá:

¿A tu jíní ró jēē cacahān de cuehē cuēchi siquī rō? achí de.

¹⁴Te tu ní cáhán cuítí yā ni iin jñuhun jín de. Te nahán ní naa ni gobernador jeē tú na vé ni cáhán yā jín de.

Jeē ní cundaā jeē cúu yā

(Mr. 15.6-20; Lc. 23.13-25; Jn. 18.38-19.16)

¹⁵Te iyó costumbre gobernador jeē quivī víco un siáá de iin tēe íne vecāa, núu na-ni tēe cáconi ñayuu.

¹⁶Te suu quivī un iyó iin tēe íne vecāa, nání de Barrabás, te je ni jité núu jñuhun jeē ni sáha de cuēchi xeēn. ¹⁷Te nuū ní candutútú ñayuu, te ni cahān Pilato jín i:

¿Ndé tée cécuni rō jeē siaá rī vijna: á Barrabás, chí Jesús jeē cúu Cristo, Yaá ní tají Yaá Dios? achí de.

¹⁸Súcuan ni cahān de chí cúní de siaá de Jesús. Chí je ni jecūhun ni de jeē ní cacucuésún ni tāca sūtū un cájito de ya, te jeē yúcuan ní quijicoo jíin yá nuū de.

¹⁹Te níní jéē néne Pilato silla nuū sándaā de jniñu, te ñasihí de ni tají ña jnūhun nuū de: Ma quívi nduu rō jíin ñáyuu siquī tée ndaā jiñā, chí yōhyo ni siūhu jéni ruhū cuni jeē siquí de, áchí ña.

²⁰Te sutū cácujuhnu jíin táca tée jéhu, ni cascáhán de ñayuu jeē na cacán i jeē siaá de Barrabás, te na cúu Jesús. ²¹Yūcuán na te ni cajnūhún tucu gobernador:

Jeē uú de, ¿ndé ñin de cécuni rō jeē siaá rī? achí de.

Te ni cacahān i:

Siaá ni Barrabás, achí i.

²²Te ni cajnūhún Pilato:

Núu súcuan te ¿ndese cécuni rō jeē sáha ri jíin Jesús, tēe cúu Cristo? achí de.

Te ni cacahān ndíhi i:

Cata caa ní de jicā cruz, na cúu de, áchí i.

²³Yūcuán na te ni cahān Pilato:

¿Na cuēchi ni sáha de núu súcuan? achí de.

Te ñayuu un ní cacana jee ndasí i:

Cata caa ní de jicā cruz, na cúu de, áchí i.

²⁴Te ni jini Pilato jeē tu cúndeyí de jíin ñáyuu, chí sa víhyá gā cácuvaā i. Te ni ndacu de jniñu jeē na quíji ndute, te ni nandahá de nuū ñáyuu cuehē ún. Te ni cahān de:

Jeē nándahá rí yāha cúu seña jee tú na cuēchi condee siquī rī jeē cúu

tēe vāha yāhá. Chí siquī maá ró jíjnáhan ró na cóndee. Achí de.

²⁵Te ni cacahān ndíhi ñayuu:

Suu siquī maá ná jíin síquī séhe ná na cóndee cuēchi jeē cúu de, áchí i.

²⁶Yūcuán na te ni siaá de Barrabás. Te ni ndacu de jniñu jeē na cáni tācá soldado un Jesús, jíin jéē cáta caa de ya jicā cruz.

²⁷Yūcuán na te soldado un cuangoo de jíin Jesús ini palacio. Te ni cacana de ndíhi jnáhan de ni candutútú núu yā. ²⁸Te ni caquenehen de sahma ya, te ni cachuhun de ya ñin sahma cuehé jeē cúu sahma rey. ²⁹Te ni casáha de ñin corona ñnu, ni cachuhun de xiní yā. Te ni cachihi de ndaha váha ya ñin yujnu jeē nájnūhun bastón. Te ni casácatā de nuū yā, chí ni cajecuiñí yití de, cásáha de jeē chiñúhún de ya.

Nacā jeē váha rey cúu Rey ñayuu hebreo, achí de.

³⁰Te ni catesihí de nuū yā. Te ni caquihin de yujnu jeē ní cachihi de ndaha ya, te ni cacani de xiní yā.

³¹Te nuū ní cuu ni casácatā de nuū yā, te ni catava de sahma cuehé un, te ni canachuhun de ya sahma máá yá. Te cuangoo de jíin yá jeē cata caa de ya jicā cruz.

Jeē ní cacata caa de ya jicā cruz

(Mr. 15.21-32; Lc. 23.26-43; Jn. 19.17-27)

³²Te nuū ní quendacoo soldado un jíin yá, te ni canajnáhan de jíin ñin tēe ñuu Cirene, naní de Simón. Te ni catejniñu de tēe un jéē cóndiso de cruz yā.

³³Te ni jinūcoo de ñin lugar nuū naní Gólgota, jeē cuní cahān Lugar

Yiqui Xíní. ³⁴Te ni cajēhe de vino jeē ni sácā núu jíin ñin jeē uvuá jeē cóho ya. Te nuū ní jito ndee ya, te tu ní cúní yā coho ya.

³⁵Te nuū ní cuu ni cacata caa de ya jicā cruz, te ni casáha de sorteo jeē siquí ndese nihīn ñin ñin de sahma ya. Te súcuan ni squícu jnūhun ni tee tēe ni nacani jnūhun Yaā Dios jenahán: Ni casáha de sorteo siquí ndese nihīn ñin ñin de sahma ri, achí yā, achí tutu.

³⁶Yūcuán na te ni cacucōo de yūcuan jēē cóto de nde cuu yā. ³⁷Te ni catee de ñin jnūhun xinī cruz yā jeē cahán na siquí ni jíhī yā: Yāha cúu Jesús, Rey ñayuu hebreo, achí.

³⁸Te suni ni cacata caa de uū tēe cuíhná núu uū gā cruz, ñin de lado váha ya, te inga de lado jecó yá.

³⁹Te ñayuu cáyāha yūcuan cáscuicó i xinī i, te cacahān neé i:

⁴⁰Róhó chi cáhán rō jeē cánu rō templo cáhnu, te nuū uní quivī te nacani ró. Núu súcuan te jnama ró máá ró vijna. Te núu Sēhe Yaā Dios cúu ró, te nuu ró jicā cruz viī, achí i.

⁴¹Te sutū cácujuhnu, jíin tēe cástéén tutu ley, jíin tēe grupo fariseo, jíin tēe jēhnu jíjnáhan de, suni súcuan ni cacahān catá de, te achí de cacahān maá de:

⁴²Núu inga ñayuu ni jnama de, éte naun tu cúu jnama de máá de vijna? Núu Rey ñayuu Israel cúu de, te na núu de jicā cruz, návāha candíje yó de. ⁴³Ni candíje de Yaā Dios, te na jnáma ya de vijna te núu cundáhu ni yā de, chi ni cahān de jeē cúu de Sēhe ya. Achí de jíjnáhan de.

⁴⁴Te tēe cuíhná jeē cándita caa xiin ya, suni súcuan ni cacahān neé de.

Jeē ni jíhī Jesús

(Mr. 15.33-41; Lc. 23.44-49; Jn. 19.28-30)

⁴⁵Te nuū ní cuu cahuxī uū, te ni cunee ní cáhnu nde cahunī. ⁴⁶Te nájñūhun cahunī, te ni cana jee Jesús:

Elí, Elí, ¿lama sabactani? achí yá. Te jnūhun un cúní cahān: Yaā Dios maá ná, Yaā Dios maá ná, ¿naun ni stóo ní sáña?

⁴⁷Te sava ñayuu cáhiin yūcuan ní cajini i jnūhun ún, te ni cacahān i:

Tēe yáha cána de xinī Elías, tēe ni nacani jnūhun Yaā Dios jenahán, achí i.

⁴⁸Te ni jinu-ni ñin tēe, ni jequihin de ñin cachī, te ni chundaji de nuū vinagre iyá. Te ni tee de xinī ñin yujnu, te ni tee de yuhu ya jeē coho ya. ⁴⁹Te sava ga de ni cacahān:

Condetu ró, na cóndēhe yó núu quiiji Elías jnama de chí tuú, achí de.

⁵⁰Te Jesús ni cana jee ya inga jínu, te ni jíhī-ni ya. ⁵¹Te sahma ndíta caa jeē ndihyú cuarto ñi ini templo cáhnu, ni ndatā-ni sava sava nde xinī te nde nuū jehé. Te ni jnāa, te ni catahū sáva toto. ⁵²Te ni cananune yaū nuū yíndūji ndīyi. Te cuehē ndīyi jeē ní cacandíje i Yaā Dios, ni canatecu i. ⁵³Te nuū ní natecu Jesús, te ni quendacoo i nuū yíndūji i. Te ni ndīvicoo i ini ñuu ñi Jerusalén, te cuehē ñayuu ni cajito nuū i.

⁵⁴Te ná ni jíhī Jesús, te tēe cúu capitán jíin tēe cáhiin jíin de jeē cándito de nde cuu yā, ni cajini de jeē ni jnáa, jíin táca gá jniñu ní cuu. Te yōhyo ni cayūhú de, te ni cacahān de:

Jendaá ndije jeē Sēhe Yaā Dios cúu tēe yáha, achí de.

⁵⁵Te yūcuan cáhiin cuehē ñahan, cándēhe jíca ña. Te suu ñahan un ní candiquín ña Jesús nde Galilea, vējicoo ña cájejniñu ña nuū yā. ⁵⁶Te unī ñahan un cácuu María ñuu Magdala, jíin María naná Jacobo jíin José, jíin naná ndindúú séhe Zebedeo.

Jeē ní quindūji Jesús

(Mr. 15.42-47; Lc. 23.50-56; Jn. 19.38-42)

⁵⁷Te nuū ní ini quivī ún, te ni quee iin tēe cúca, nání de José, te tēe ñuu Arimatea cúu de. Te suni tēe ni scuáha jíin Jesús cúu de. ⁵⁸Tēe un ní jehēn de nuū Pilato, te ni jicān de yiqui cúñu Jesús. Te ni ndacu Pilato jniñu jeē na cuáha nuū de. ⁵⁹Te José ni quihin de yiqui cúñu yā, te ni chusúcún de iin sahma cuitá íyo ndoo. ⁶⁰Te névāha de iin yaū jeē ní caan jeé jíca iin cava, nuū ná tu quindūji ndīyi. Te yūcuan ní chindūji de ya. Te ni jesi de iin yuū cáhnu yuhu yáú un, te cuahān de. ⁶¹Te María ñuu Magdala, jíin inga María, cáyūcú ña ichi núu nuū yíndūji ya.

Jeē ní cacondito soldado nuū yíndūji ya

⁶²Te ni cuu tācá jniñu yāha máá quivī jeē casátūhva ñayuu jeē quiji quivī ndétātú. Yūcuán na te ni cundijin maá quivī ndétātú. Te sutū cácujuhnu jíin tēe grupo fariseo ni jengoo de nuū Pilato. ⁶³Te ni cacahān de:

Cánucūhun ni na jēe nde na técu tēe stáhú néé un te ni cahān de jeē nátecu de nuū unī quivī. ⁶⁴Núu sūcuan te ndacu ní jniñu na cóto vāha tācá soldado yuhu yáú un nde

núu ni yāha unī quivī. Chi núu tuú te sanaa te quijicoo tēe ni cascuáha jíin de, te tava cuihná de ndīyi ún jecuáa, quingoo de jíin. Yūcuán na te cachi de nuū ñayuu jeē ní natecu tēe ún. Te cáhú gá cuu jnūhun stáhú yūcuan vēsú jeē xíhna ñūhún. Achí de.

⁶⁵Te ni cahān Pilato:

Yāha cáhiyo soldado. Cuángoo jíin de, te sácutú vāha ró yuhu yáú un, te coto vāha ró, núu ndese vāha ga cuu sáha ró. Achí de.

⁶⁶Te cuangoo de, te ni casácutú de yuū jeē ndihyú yuhu yáú nuū yíndūji ya, te ni castiín nihin de. Te ni castóo de tācá soldado un cándito.

Jeē ní natecu Jesús

(Mr. 16.1-8; Lc. 24.1-12; Jn. 20.1-10)

28 Te ni yāha quivī ndétātú un, te ni cundijin quivī domingo. Te María ñuu Magdala jíin inga María un, ní jecondēhé ña nuū ní yíndūji Jesús. ²Yūcuán na te iin sanaa-ni te ni jnāa nihin ndasí. Chi iin ndajéhé maá Jítóho yō Yaā Dios ni cuun ya ichi ándiví, ni quee ya nuū ní yíndūji Jesús. Te ni stāa ya yuū ndihyú yuhu yáú un, te ni cucōo ya siquī. ³Te ndíndēe núu yā nájñūhun taja, te sahma ñūhun ya yaa quiyi nájñūhun yuhvā volcán. ⁴Te soldado cándito yūcuan ní quisi i de jeē cáyūhú de cájito de ya. Te ni cacuu ndīyí de. ⁵Te ni cahān ndajéhé jíin ndindúú ñahan ún:

Ma yūhu ró, chi jíni rī jeē vécondēhe ró Jesús, Yaā ni jíhi jíca cruz. ⁶Tuá yā yāhá, chi je ni natecu yā, nájñūhun ni cahān yā. Nehen condēhe ró nuū ní cachindūji de

ya. ⁷Te yachī quingoo ró, te cachi rō nuū tée cáscuáha jíin yá jeē ní natecu yā. Te xihna gā maá yá jinū Galilea, te sáa te najinūcoo de. Te yūcuán coto de nuū yā. Achi rō na cúni de. Je ni castūhun rí nuū rō, achí ndajéhé.

⁸Te ni quendacoo ña nuū ní yindūji ya, te yachī cuangoo ña. Te cáyuhú ña, te suni yōhyo cácusī ni ña. Te ni cajinu ña cuacastūhún ña nuū tée cáscuáha jíin yá. ⁹Te níní cuángoo ña, te ni quee-ni Jesús nuū ña, te ni cahān yā jíin ña. Te ni quecoo ña nde nuū yā, te ni canundee ña jehē yā, te ni cachiñúhún ña ya. ¹⁰Te ni cahān yā jíin ña:

Ma yūhu ró jijnáhan ró. Cuángoo te castūhun ró nuū tēcá hermano rī, tēe ni cascuáha jíin rí, jeē na nungoo de nde Galilea, te yūcuán coto de nuū rī. Achí yá.

Jnūhun ní cacahān soldado

¹¹Te níní cuángoo ña, te sava soldado jeē ní condito ún, cuánungoo de nde ñuu. Te ni cacastūhún de nuū sutú cácujuhnu tēcá jniñu jeē ní cuu. ¹²Te sutū cácujuhnu ni candutútú de nuū tēcá tée jehnu cándacu jniñu, te ni casquíjnáhan de jnūhun. Yūcuán na te ni cajēhe de cuehē xūhun núū soldado jijnáhan. ¹³Te ni cacahān de jíin:

Cahān rō jijnáhan ró jēe tée cáscuáha jíin de ni quiicoo

jecuáa, te ni catava cuihna ndíyi un níní cáquixī rō, achi rō. ¹⁴Te núu na cúni gobernador jnūhun yáha, te maá rí quiscahān rī de, návāha tú nihīn rō castigo jijnáhan ró. Achí de.

¹⁵Te soldado un ní caquihin de xūhún un, te ni cacachi de nájñūhun ni cacahān jíin de. Te nde vijna chi súcuan cacahān ñayuu hebreo nájñūhun ni cacahān soldado un.

Jeē ní tejníñu ya de nacani de jnūhun

(Mr. 16.14-18; Lc. 24.36-49; Jn. 20.19-23)

¹⁶Te ndihúxí iin tēe ni cascuáha un cuánungoo de nde Galilea, nde yucu nuū ní cachi Jesús jeē quingoo de. ¹⁷Te nuū ní cajito de nuū yā, te ni cachiñúhún de ya. Te sava de tu cácdíje vāha de jeē maá yá cúu. ¹⁸Te ni quee ya nde nuū de, ni cahān yā jíin de:

Je ni jēhe Tátá rī ndihī poder nuū rī jeē ndácu ri jniñu andiví jíin ñáyiví. ¹⁹Núu súcuan te cuángoo nuū ñáyuu tēcá nación, te stéén rō jnūhun rī nuū i návāha na cándíje i. Te scuándute ró i jeē ní cacandíje i maá Tátá jíin Séhe jíin Espíritu Santo. ²⁰Te stéén rō nuū i jeē na cuátáhú i tēcá jniñu ní ndacu ri nuū rō. Te cocuhun ni rō jeē maá rí íne ri jíin ró níí cáni nde quiví jínu ñayiví. Achí yá. Te ni cuu. Amén.

JNUHUN VAHA NI TEE SAN MARCOS

Jnūhun Juan tēe scuándute

(Mt. 3.1-12; Lc. 3.1-9, 15-17; Jn. 1.19-28)

1 Yāha quėjéé jnūhun vāha máá Jesucristo Sēhe Yaā Dios, jeē ní quiji ya jeē jnama ya yohó.

²Isaías, tēe ni nacani jnūhun Yaā Dios nde jenahán, súcuan ni tee de jnūhun Juan nuū tútu:

Tají rí tēe nacani jnūhun ri
cosnūú de ichi núú rō,
návāha coo tūhva ñayuu jeē
jinú rō, achí Yaā Dios jíín
Cristo.

³Te tēe ún cana jee de nde nuū
ñūhun téhé:

Sátūhva ró máá ró jijnáhan ró,
chi quee maá Jítóho yō.
Te sáha ró jniū ndaā, chi vēji
ya, achi de.

Achí Isaías. ⁴Te Juan ni jinū de nde
nuū ñūhun téhé, scuándute de ñayuu.
Te cáhán de jíín i jeē na nácani ni
i jeē stóo i cuēchi i te cuandute
i, návāha cone cáhnu ni Yaā Dios
nuū cuéchi i. ⁵Te tāca ñáyuu región
Judea jíín ñáyuu ñuu Jerusalén, ni
quijicoo i nuū de. Te ni canacani
ndaā i cuēchi i nuū Yaā Dios, te ni
scuándute de i ini yūte Jordán.

⁶Te sahma ñūhun Juan cúu ixi
camello, te núhni ñin cinturón ññi chíji

de. Te jeē técu de cúu tíca ndicuéhyí
jíín ndúxi yocō. ⁷Te suhva ni nacani
de jnūhun:

Quiji máá Yaā cujéhnu ndasí. Chi tú
na vé jéhnu cuítì cúu ri nuū yā, ni jeē
cuajníñu ri nuū yā vēsú ñin jniñu lúli
gá nájñūhun jeē cuíta ndeyi ri ndají
rí correa ndijēn yā. ⁸Te ruhū chi jíín
ndute scuándute ri rohó jíínáhan ró,
te Yaā ún chi nájñūhun jeē scuándute
ya rohó cúu jeē cuáha ya Espíritu
Santo condee ini anuá rō, achí Juan.

Jeē ní jendute Jesús

(Mt. 3.13-17; Lc. 3.21-22)

⁹Te ni cuu jecu quivī, te Jesús ni
quenda ya ñuu Nazaret ndañúú Galilea,
te Juan ni scuándute de ya ini yūte
Jordán. ¹⁰Te ná ni quenda ya nuū
ndúte, te ni jito ya jeē ní nune-ni andiví,
te ni cuun Espíritu Santo ni quee xini
yā, te cáa nájñūhun ñin paloma. ¹¹Te
ichi ándiví ní cahān ñin jnūhun:

Máá ró cúu Sēhe ri jeē maní ndasí rí
jíín, te yōhyo cúshī ni rí jíín ró, achí.

Jeē ní jito ndee jexeén Jesús

(Mt. 4.1-11; Lc. 4.1-13)

¹²Yūcuán na te ni jinū Jesús nde
nuū ñūhun téhé ní sáha Espíritu
Santo. ¹³Te uū xico quivī ní condee yā
nuū ñūhun téhé un núú ñin quítì yúcu.

Te ni jito ndee Satanás yā, chi cúní jeē sáha ya cuēchi. Te nuū ní cujiyo Satanás cuahān, te ni quecoo ndajéhé Yaā Dios, ni cajejnīnu nuū yā.

Jeē ní quejéé Jesús nácani ya jnūhun

(Mt. 4.12-17; Lc. 4.14-15)

¹⁴Yūcuán na te ná ni cachune de Juan vecāa, te ni jinū Jesús región Galilea, nácani ya jnūhun vāha ndese ndácu Yaā Dios jniñu. ¹⁵Te ni cahān yā:

Je ni jinū quivī, te je ni cuyajni jeē ndácu Yaā Dios jniñu nuū rō. Nacani ni rō jeē stóo ró cuéchi ró jínáhan ró, te candíje ró jnūhun jeē jnāma ya rohó. Achí yá.

Jeē ní cana ya cuūn tēe jnī chācá

(Mt. 4.18-22; Lc. 5.1-11)

¹⁶Te jíca Jesús yumar Galilea cuahān yā. Te ni jito ya nuū Simón jín nani de Andrés. Te tēe cájni chācá cácuu de, te cásinga de ñunu de ini mar. ¹⁷Te ni cahān yā jín de:

Condiquin ruhū na quihín yō, te nasáha ri rohó tēe nihin cuehē ñayuu candíje ruhū, nājnūhun cánihin rō chācá, áchí yá.

¹⁸Yūcuán na te ni castóo-ni de ñunu de, te ni candiquin de ya.

¹⁹Te ni jica ya jecu gā, te ni jito ya nuū Jacobo jín nani de Juan, sēhe Zebedeo, suni cáyucú de ini barco de, cánachijnī de ñunu de. ²⁰Te suni ni cana ya de jeē cóndiquin de ya. Te ni castóo-ni de tátá de Zebedeo ini barco un jín mozo de, te ni candiquin de ya cuango de.

Jeē ní quenehen ya tachī ini iin tēe

(Lc. 4.31-37)

²¹Te ni jinū yā jín de ñuu Capernaum. Te quivī ndétātu ní

quivī ya ini vehe i sinagoga, te ni steén yā jnūhun. ²²Te ni canaa ni ñayuu ni cajini i jnūhun steén yā. Chi ni steén vāha ya nuū i, chi máá yá cúu jeē ndíso jniñu siquī ndihí. Te tēe cástéén tutu ley Yaā Dios, tu súcuán cástéén de. ²³Te ini vehe i sinagoga ñuu un íne iin tēe jeē ñūhun tachī ini. Te ni cana cóhó de:

²⁴¿Naun vēji ní núu na jínáhan ná, Jesús ñuu Nazaret? ¿A vēji ní jéé snāá ni sáña, chí naún? Je jíní na ndé iin cúu ní, chí Sēhe i Yaā Dios cúu ní. Achí de.

²⁵Te Jesús ni cahān xeēn yā jín tachī ún:

Casi yuhu ró te quenda ró ini de, áchí yá.

²⁶Te tachī ún xeēn ni jehni yíhí tēe ún. Te ni cana cóhó, te ni quenda ini de cuahān. ²⁷Te ndihí ñayuu ni cayūhí i, te cácajnūhun jnāhan i:

¿Na vé cúu jeē yáha? ¿A iin jnūhun jéé cúu jeē yáha? Chi tēe yáha cújéhnu de jeē ndácu de jniñu nde nuū tachī te quéndacoo, áchí i.

²⁸Te yachī ni jitē núu jnūhun Jesús cuahān ní cáhnu región Galilea.

Jeē ní nasávāha ya naná chisó Simón Pedro

(Mt. 8.14-15; Lc. 4.38-39)

²⁹Te ni quenda ya jín de jínáhan de ini vehe i sinagoga. Te Jesús ni jehēn yā jín Jacobo jín Juan nde vehe Simón jín Andrés. ³⁰Te náná chisó Simón, cátu ña yíhi quiji ña. Te ni cacastūhún de nuū yā jeē huhí ña. ³¹Yūcuán na te ni quindehe ya nuū catú ña, te ni jniñi ya ndaha ña, te ni ndonehen ya ña.

Te ni quenda-ni quiji ún ña, te ni sáha ña jeē ní cayeji de jíin yá.

Jeē ní nasávāha ya cuehē ñayuu

(Mt. 8.16-17; Lc. 4.40-41)

³²Te ni queē niāndii te ni cuaa. Te ni quecoo ñayuu jíin táca ñayuu cácuḥū jíin jéē nūhun tachī ini. ³³Te tāca ñayuu ñuu un ní cacutútú i yéhyí un. ³⁴Te ni nasávāha ya cuehē ñayuu cácuḥū tǐjni nuū cuehyí, te ni quenehen ya cuehē tachī un cuángoo. Te tachī chi je cájini un yá, te tu ní jéhe ya jnūhun jeē cástūhun ndé iin cúu ya.

Jeē ní nacani ya jnūhun región Galilea

(Lc. 4.42-44)

³⁵Te nehen ndasí ní ndonda ya, nde yínee gā. Te ni quenda ya cuahān sǐin ya yatā nūū nuū tú ñayuu, te yūcuan ní jicān tahu yā. ³⁶Te Simón jíin tée cáhiin jíin de, ni jenanducú de ya. ³⁷Te ni cananihīn de ya, te ni cacahān de jíin yá: Tāca ñayuu cánanducú i níhín, áchí de.

³⁸Te máá yá ni cahān yā:

Sa suhva na quíhín yō tāca gá ñuu íne yajni, návāha suni nacani rí jnūhun nuū i, chi jeē yūcuan ní quee rí. Achí yá.

³⁹Te súcuan te ni jica cuu ya ní región Galilea, ni nacani ya jnūhun ini vehe i sinagoga táca ñuu, te ni quenehen ya tachī ini ñayuu.

Jeē ní nasávāha ya iin tēe ndóho cuehyī stehyú

(Mt. 8.1-4; Lc. 5.12-16)

⁴⁰Te iin tēe ndóho cuehyī stehyú, ni quee de ni jecuiñi yití de nuū yā, te ni cahān de jíin yá:

Jíni na jeē cuu sáha ní jéē nduvāha ná, te núu cúni ni, áchí de.

⁴¹Te Jesús ni cundáhú ni yā de, te ni soó yá ndaha ya siquī de, te ni cahān yā:

Cúni rí. Te na nduvāha ró, áchí yá.

⁴²Te ná ni cahān yā súcuan, te ni nduvāha-ni tēe ndóho cuehyī stehyú un. ⁴³Yūcuán na te nátají yá de quinhun de, te ni cahān níhin ya jíin de:

⁴⁴Ma cáchi cuiti rō nuū ní iin. Chi quisteén rō maá ró nuū sutú, te condahá ró jeē socó rō nuū Yaā Dios siquī jeē ndúndoo ró núu yā, nájñūhun ni ndacu Moisés jniñū jenahán. Te súcuan te cuni ñayuu jeē ní nduvāha ró. Achí yá.

⁴⁵Te ni quenda de cuahān de, te ni quejéé de nácani de jnūhun nuū ndíhi ñayuu ndese ni nduvāha de. Te siquī yūcuan tuá ni cúu quiví Jesús táca ñuu, chi cúchitú ndasí ñayuu nuū yā. Te ni jica ya yatā táca ñuu nuū tu cúchitú ñayuu. Te tāca lado ni quijicoo ñayuu nuū yā.

Jeē ní nasávāha ya iin tēe ndóho cuehyī ni íjin

(Mt. 9.1-8; Lc. 5.17-26)

2 Te ni cuu jecu quiví, te ni quiví tucu Jesús ñuu Capernaum. Te ni cajini ñayuu jeē néne ya vehe. ²Te ni cacutútú-ni cuehē ñayuu, te ni chitú vehe jeē ndé yehyí tuá núne. Te ni nacani ya jnūhun Yaā Dios nuū i. ³Yūcuán na te ni quecoo cuūn tēe nuū yā, cándiso de iin tēe ndóho cuehyī ni íjin. ⁴Te tu ní cúu quivícoo de nuū yā siquī jeē chitú ñayuu. Te ni cacao de siquī véhe, te ni canune de ndaā nuū íin ya, te yaū un ní cascúun de tēe cúhú, cáttú de

nuū ñin camilla. ⁵Te ni jini Jesús jeē cácanđije de jeē cúu nasávaha ya tēe cúhú un. Te ni cahān yā jíin tēe cúhú un:

Séhē, je íne cáhnu ni rī nuū tāca cuéchi ró, áchí yá.

⁶Te yūcuan cáyūcú jecu tēe cástéén tutu ley Yaā Dios, te tēe un ní cajeni ni de siquī yā: ⁷¿Naun cáhán tēe yáha súcuan? Cáhán de jnūhun ndevāha jeē quití ni Yaā Dios, chi nasūu Yāā Dios cúu de jeē cóne cáhnu ni de nuū cuéchi. ⁸Te ni jini Jesús jeē súcuan cájeni ni de, te ni cahān yā jíin de:

¿Naun cájeni ni rō jeē cahán ndevāha ri? ⁹Jeē úu jnūhun yáha, ¿ndé ñin yí gá cáa? ¿A jéē cahán rī jíin tēe cúhú: Je íne cáhnu ni rī nuū tāca cuéchi ró? ¿Chí yí gá jeē cahān rī: Ndocuññi te naquihin ró camilla rō, te caca ró, achi rī? ¹⁰Te vijna te na stéén rī jeē maá rí, Yaā ní nduu tēe, ndíso jniñu ri ini ñayivi yáha jéē cóne cáhnu ni rī nuū cuéchi.

Yūcuán na te ni cahān yā jíin tēe ni ñjin ún:

¹¹Cáhán rī jíin ró, ndocuññi te naquihin ró camilla rō, te quinhun rō vehe ró, áchí yá jíin de.

¹²Yūcuán na te ni ndocuññi-ni tēe ún, te ni naquihin de camilla de, te ni quenda de cuahān de, jíto jínúū ndíhi ñayuu. Te ndivii i ni canaa ni i cájito i, te ni cacahān i jeē yóhoyo vāha Yaā cúu Yaā Dios. Te áchí i:

Ná tu coto cuiti yō ni ñin jniñu súcuan, áchí i.

Jeē ní cana ya Leví

(Mt. 9.9-13; Lc. 5.27-32)

¹³Te ni quenda tucu ya cuahān yā nde yumar. Te tāca ñayuu ni

jinūcoo i nuū yā, te ni steén yā jnūhun nuū i. ¹⁴Yūcuán na te ni yáha ya cuahān yā, te ni jito ya nuū Leví sēhe Alfeo, néne de nuū cutútú xúhun renta. Te ni cahān yā jíin de:

Condiquīn ruhū na quíhín yō.

Te ni ndocuññi de, te cuahān de jíin yá.

¹⁵Yūcuán na te ni jehēn yā ni yeji yā staā vehe de. Te cuehē tēe cástútú xúhun renta jíin inga tēe cásaaha cuéchi, suni cáyūcú de cáyeji de staā jíin Jesús jíin tēe cáscuáha jíin yá, chi íyó cuehē de jeē cándiquīn de ya. ¹⁶Te tēe cástéén tutu ley Yaā Dios jíin tēe grupo fariseo, ni cajito de jeē yéji yā staā jíin ndíhi tāca tēe ún. Te ni cacahān de jíin tēe cáscuáha jíin yá:

¿Naun yéji maestro rō jíin tēe cástútú xúhun renta jíin inga tēe cásaaha cuéchi? áchí de.

¹⁷Te ni jini Jesús, te ni cahān yā jíin de:

Ñayuu cáhiyo váha, tu jíni nūhún i tēe tájné, chi ñayuu cácuahū cúu jeē jíni nūhún. Te ruhū nasūu jéē véji ri cana ri ñayuu tú cuéchi, jeē cúu i nájñuhun ñayuu cáhiyo váha. Chi sa suhva véji ri cana ri ñayuu cáhiyo cuéchi, jeē na nácani ni i te stóo i cuéchi i. Áchí yá.

Jeē ní cacajñuhún de ya siquī jeē cóndite ni

(Mt. 9.14-17; Lc. 5.33-39)

¹⁸Te ni cuu ñin quivī jeē cáhiyo ndite ni tēe cáscuáha jíin Juan, jíin tēe cáscuáha jíin grupo fariseo. Te ni quecoo jecu tēe, ni cacahān de jíin Jesús:

Tēe cáscuáha jíin Juan jíin jéē cáscuáha jíin grupo fariseo, tijní

jínu cáhiyo ndite ni de. Te tēe cáscuáha jíin máá ní, ¿naun tu cásaáha de súcuan?

¹⁹Te ni cahān Jesús jíin de:

¿A cuu condite ni de níni jéē iyó rí jíin de? ¿A cuu condite ni ñayuu cáhiin vico nándāha, te núu níni néne tēe nándāha? Chi núu néne tēe nándāha, te ma cúu condite ni i. ²⁰Te quee quivī jeē cújiyo tēe nándāha, te quivī ún chi condite ni i.

²¹Te ni cahān yā uū jnūhun yátá síquī jeē tu quíjnāhan jnūhun jeé jéē steén yā jíin táca jnūhun jenahán. Achí yá:

Ni iin tu náchuhun iin pedazo sahma jéé núu iin sahma túhú. Chi núu súcuan te ndiyyi pedazo jeé un, te tahndē gā jeē tuhú un, te nducáhnu ga nuū cátáhdé un. ²²Te suni tu cáchuhun vino jeé ini ñii túhú. Chi núu súcuan te vino jeé un ndatá ñii ún, te naa vino jíin ñii. Jeē yúcuan cánuú jéé chúhun i vino jeé ini ñii jéé.

Jeē ní cataxín de yoco trigo quivī ndétátú

(Mt. 12.1-8; Lc. 6.1-5)

²³Te iin quivī ndétātu ní yāha Jesús cuahān yā mēhñú nuū cáa trigo. Te tēe cáscuáha jíin yá, cájica de cuahān de, te ni quejéé de cátaxín de yoco trigo cáyeji de. ²⁴Yūcuán na te tēe grupo fariseo ni cacahān de jíin yá:

Condēhé. ¿Najehē casáha tēe cáscuáha jíin ró súcuan? Chi áchí ley Moisés jeē ma cúu sáha yó ni iin jniñu quivī ndétátú. Achí de.

²⁵Te ni cahān maá yá jíin de:

¿A tu ní cácahu cuiti rō tutu ndese ni sáha David, iin quivī ní cumanī jeē cáji de, te ni jíi de sōco jíin tēe cáhiin jíin de? ²⁶Te ni quivī de ini vehe Yāā Dios. Te Abiatar ni cuu sutū cujéhnu ga. Te ni yeji de pan ii jeē yosó ndijin nuū Yāā Dios. Te tú na ley jeē cáji ni iin tēe, chi máá-ni sutū cuu caji. Te suni ni jēhe de ni cayeji tēe cáhiin jíin de. Te tú na cuēchi ní iyo síquī de. Achí yá.

²⁷Te suni ni cahān yā jíin de jíjnāhan de:

Tu ní jéconaā ñayuu jeē ndóho i nuū quivī ndétátú, chi ni jeconaā quivī un jéē ndétátú i. ²⁸Núu súcuan te ruhū, Yāā ní nduu tēe, máá rí cúu jeē ndácu jniñu síquī ndese sáha ñayuu quivī ndétátú, áchí yá.

Jeē ní nduvāha tēe ni ichī ndaha

(Mt. 12.9-14; Lc. 6.6-11)

3 Te ni quivī tucu Jesús ini vehe ii sinagoga. Te yūcuán íne iin tēe ni ichī iin ndaha de. ²Te tēe grupo fariseo cájito yuhu de ya núu nasávāha ya tēe un quivī ndétátú, návāha nihin de cuēchi síquī yā. ³Yūcuán na te ni cahān yā jíin tēe ni ichī ndaha ún:

Ndocuññi te condichi rō mēhñu yáha, áchí yá.

⁴Te ni cajnūhun yá de jíjnāhan de: ¿Ndese cáhán ley síquī quivī ndétátú? ¿A jéē sáha vāha yó, chí sáha néé yó? ¿A jéē nasávāha yó ñayuu je yajni cuu, chí sáha yó jéé cúu i? áchí yá.

Te máá de tú na vé ni cacahān de. ⁵Te ni quitī ni yā ni jito ya nuū de jíjnāhan de, te ni cucufhyá ni yā jeē

níhni ni de. Te ni cahān yā jíin tée ni ichi ndaha:

Scáá ndaha ró.

Te ni scaá de, te ni nduvāha-ni ndaha de. ⁶Yūcuán na te ni quendacoo tēe grupo fariseo, te ni casquíjnáhan de jnūhun jíin tēe grupo Herodes siquī yā, ndese cahni de ya.

**Jeē ní quecoo cuehē
ñayuu nuū yā yumar**

⁷Te Jesús cuahān yā nde yumar jíin tēe cáscuáha jíin yá. Te cuehē ñayuu región Galilea ni candiquin i ya. ⁸Te suni ñayuu región Judea, jíin ñayuu ñuu Jerusalén, jíin ñayuu Idumea, jíin ñayuu ichi nūú cáne niāndii yūte Jordán, jíin ñayuu región Tiro jíin Sidón, cuehē ndasí ñayuu ni cajini jnūhun i jniñu jēhnu ni sáha ya, te ni quecoo i nuū yā. ⁹Te ni cahān yā jíin tēe cáscuáha jíin yá jeē na cóo tūhva iin barco quīvi ya, návāha ma chítú níhin ñayuu cuehē ún xiin ya. ¹⁰Chi cuehē ñayuu je ni nasávāha ya, te jeē yúcuan vējicoo cuehē gā ñayuu cándoho tāca nūú cuehyī, te chítú níhin i xiin ya jeē quehé i ya cácuni i. ¹¹Te ñayuu cáñuhun tachī ini, nūú ni cajito nuū yā, te cájecuñī yití nūú yā, te cácana cóhó:

Máá ní cúu Sēhe Yaā Dios, achí.

¹²Te ni ndacu níhin ya nuū tachí un jēē ma cáhán gā jeē cúu ya Sēhe Yaā Dios.

Jeē ní nacāji ya uxī uū tēe apóstol

(Mt. 10.1-4; Lc. 6.12-16)

¹³Yūcuán na te ni caa ya cuahān yā iin yucu. Te ni cana ya tāca tēe jeē cuní máá yá caca jíin yá, te ni

quecoo de nuū yā. ¹⁴Te ni jeni ya uxī uū de jeē cuñī de jíin yá, te tají yá de quingoo de nacani de jnūhun. ¹⁵Te ni sáha ya jeē cóndiso jniñu de nasávāha de ñayuu cuhú te quenehen de tachī ini ñayuu. ¹⁶Te yāha cúu ndihúxí uū tēe jeē ní nacāji ya: Simón jeē ní nasnání yá de Pedro. ¹⁷Te Jacobo jíin ñani de Juan, sēhe Zebedeo. Te ni nasnání yá ndindúú de Boanerges, jeē cuní cahān: Tēe yíhi fuerza nacani jnūhun, nájñuhun yíhi fuerza taja. ¹⁸Te sava ga de nání de Andrés, Felipe, Bartolomé, Mateo, Tomás, Jacobo sēhe Alfeo, Tadeo, Simón tēe grupo cananista, ¹⁹jíin Judas Iscariote, tēe jeē ní nastúu de ya.

**Jeē ní cacahān ñayuu jeē jejniñu ya
fuerza Satanás**

(Mt. 12.22-32; Lc. 11.14-23; 12.10)

Yūcuán na te ni quīvi ya iin vehe jíin tēe cáscuáha jíin yá un. ²⁰Te ni ndutútú tucu cuehē ñayuu, te ni tuá ni cúu caji yā staā jíin de. ²¹Te tāca jnáhan vehe ya ni cajini jnūhun jeē súcuan cúu. Te ni quecoo de venūquihin de ya. Chi cácahān de jeē ní sana xinī yā.

²²Te suni tēe cástéén tutu ley Yaā Dios jeē ní quijicoo nde ñuu Jerusalén, ni cacahān de:

Tēe yáha ñuhun Satanás ini de, jeē cujēhnu nuū tachí. Te jíin fuerza un quenehen de tachí, achí de.

²³Te ni cana ya de jíjnáhan de, te ni cahān yā iin jnūhun yátá jíin de: ¿Ndese cuu quenehen Satanás máá? ²⁴Chi nūú iin nación sásiin máá te cuajnáhan máá, nación un má cúu ga coyūcu cáhnu. ²⁵Te nūú ñayuu iin vehe sásiin máá te

cuajnáhan máá, ñayuu un má cúu ga coyūcu cáhnu. ²⁶Te suni súcuan Satanás jíin jnáhan tachī, chi núu sásíin máá te cuajnáhan máá, núu súcuan te ma cóo ga, chi sa suhva naa.

²⁷Te ni ñin tēe ma cúu quīvi de ini vehe tēe ndacuī jeē quenehen de ndajniñu de. Chi cánuú jeē xíhna gā cuhni de tēe ndacuī ún. Te suni súcuan cúu jeē jíhni rī Satanás te quénehen ri tachī.

²⁸Te jendaá cahán rī jíin ró jeē iyó modo coo jñuhun cáhnu ni nuū tāca cuéchi cásáha ñayuu, te suni nuū tāca jñuhun néé cácahān i. ²⁹Te núu cahān ndevāha i siquī Espíritu Santo, te ma cóne cáhnu ni Yaā Dios nuū i, chi sa suhva condee cuéchi siquī i níí cáni, áchí yá.

³⁰Súcuan ni cahān yā, chi ni cacahān i jeē quénehen ya tachī jíin fuerza Satanás.

Náná yā jíin ñani yā

(Mt. 12.46-50; Lc. 8.19-21)

³¹Yūcuán na te ni quee naná yā jíin tāca ñani yā. Te íin ña nuū quéhe, te ni tají ña jñuhun cuahān nuū yā jeē cána ña ya. ³²Te ñayuu cáyūcu níí xiin ya, ni cacahān i jíin yá:

Náná ni jíin tāca ñani ni cáhiin nuū quéhe, te cácuni cahān jíin ní, áchí i.

³³Te ni cahān maá yá:

¿Ndé ñin cúu náná rī jíin ñani rī? achí yá.

³⁴Yūcuán na te ni ndacoto ya nuū ñayuu cáyūcú xiin ya ún, te ni cahān yā:

Suni náná rī jíin ñani rī cácuu tāca ñayuu yáha. ³⁵Chi tāca ñayuu

casquícu jniñu cúní Yaā Dios, suu cácuu ñani rī, cuāha ri, náná rī, achí yá.

Jñuhun yátá síquī tēe jéte trigo

(Mt. 13.1-9; Lc. 8.4-8)

4 Te yumar ni quejéé tucu Jesús steén yā jñuhun. Te ni cutútú cuéhē ndasí ñáyuu nuū yā, te jeē yúcuan ní quīvi ya ni cucōo ya ini ñin barco nuū mar. Te tāca ñayuu un cáyūcú i yumar. ²Te jíin jñuhun yátá ni steén yā cuéhē jñuhun nuū i, te súcuan ni cahān yā:

³Cuni nahín jíjnáhan ró: ñin tēe cate trigo, ni quenda de jeē cate de.

⁴Te ná ni quejéé de jéte de, te jecu trigo ni jité yuhíchi. Te ni quecoo saa, ni cayejí tī. ⁵Te jecu gā trigo ni jité nuū ñuhun yuū, nuū tú cuéhē ñuhun. Te yachī-ni ni cane, chi tu cóquin ñuhun. ⁶Te nuū ní cane niāndii, te ni ichī-ni, te ni casun, chi tu ní níhín nuū quihín yoho. ⁷Te jecu gā trigo ni jité nuū náne íñu. Te ni jehnu íñu ún, te ni jesi nuū, te tu ní jéhe nunī.

⁸Te jecu ni jité nuū ñuhun váha. Te ni cane, te ni jehnu, te ni jēhe cuéhē nunī. Sava ni jēhe ocō uxī jeē ñin ñin nunī, te sava ga ni jēhe unī xico, te sava ga ni jēhe ciento. Achí yá.

⁹Yūcuán na te ni cahān yā jíin de: Tāca róhó jēé jíni sōho, na chúsóhó ró. Achí yá.

Najehē cahán yā mání jñuhun yátá

(Mt. 13.10-17; Lc. 8.9-10)

¹⁰Yūcuán na te ni quendōo máá na yā, jíin ndihúxí uū tēe cáscuáha jíin yá, jíin jecu gā ñayuu cáhiin jíin de. Te ni cacajñuhún de ya na vé cuní cahān jñuhun yátá un. ¹¹Te ni cahān yā jíin de:

Róhó, chi sáha Yaā Dios jeē cájecūhun ni rō jnūhun ni yisāhi yáha, ndese quívicoo ñayuu ndaha ya ndacu ya jniñu nuū i. Te ñayuu jeē cáhiin sñin siquī, chi máni jín jnūhun yátá cáhán rī tāca jnūhun jín i. ¹²Súcuan cáhán rī návāha vēsú cájito i, te quendō i nájñūhun jeē tú na vé ni cájito i. Te vēsú cájini sōho i, te ma jécūhun ni i, te ma násāma ini i quívicoo i nuū rī, te ma cóo jnūhun cáhnu ni nuū cuéchi i, áchí yá.

Jeē ní castūhun cájí yá jnūhun yátá tée jéte trigo

(Mt. 13.18-23; Lc. 8.11-15)

¹³Te ni cahān gā yā jín de jíjnāhan de:

Núu tu cájecūhun ni rō jnūhun yátá yáha, ¿te ndese jecūhun ni rō tāca gá jnūhun yátá núu súcuan? ¹⁴Tēe jéte trigo cúu tēe scuíté núu jnūhun Yaā Dios. ¹⁵Te trigo jeē ni jítē yuhíchi cúu nájñūhun ánuá sava ñayuu. Chi cájini nahín i jnūhun ya, te ná ni cajini i, te quíji-ni Satanás te quénde-ni jnūhun ini anuá i. ¹⁶Te trigo jeē ni jítē nuū ñūhun yuū, chi cúu nájñūhun ánuá sava ñayuu cájini nahín jnūhun, te yachī-ni cájjetáhú i te cácusī ni i jín. ¹⁷Te tu cúcutú jnūhun ún ini anuá i, te jecu-ni quivī cájjetáhú i. Te núu ni quejéé jnúndóho, chí jító xeē ñayuu i siquī jnūhun ún, te quéjéé nácani yátá ni i. ¹⁸Te jeē ni jítē nuū náne iñu cúu nájñūhun jecu gā ñayuu. Chi vēsú ni cajini sōho i, ¹⁹te cándihvī ni i siquī jeē iyó ini ñayivī yáha. Te cácuni i cucúcá i, te stáhú un i jeē cutóo ni i siquī tācá ndajniñu. Te

ndihi jeē yáha cácuñéñu i jín, te jési nuū jnúhun ya, te tu ŷje i jín jnúhun ya. ²⁰Te trigo jeē ni jítē nuū ñūhun váha cúu nájñūhun ñayuu cájini nahín jnúhun, te cájjetáhú i, te cáhije i jín jnúhun ya. Te sava i cúu nájñūhun nunī jeē jéhe ocō uxī jeē ĩn ĩn, te sava i jéhe unī xico, te sava ga i jéhe ciento. Achí yá.

Jnūhun yátá síquī lámpara

(Lc. 8.16-18)

²¹Suni ni cahān yā jín de:

Núu nástñin ñayuu ĩn lámpara, ¿a chúne i chíji ĩn cajón chí chíji jito? Tuú, chí jéni i nuū súcun návāha cundijin. ²²Te suni súcuan, tu íyó ni ĩn jnūhun sāhi jéé ma cúni ñayuu, chí ndihi tāca jnúhun natūu ndijin te cuni ñayuu. ²³Tāca róhó jéé jini sōho, na chúsohó ró, áchí yá.

²⁴Te suni ni cahān yā jín i:

Cuni sōho váha ró. Chi cūhva jeē chúsohó ró jnúhun Yaā Dios, suni cūhva un cuáha ya nuū rō, te víhyá gā cuáha ya nuū maá ró jeē chúsohó váha ró. ²⁵Chi ñayuu je jécūhun ni, stéén gā yā nuū i. Te ñayuu tu cándíje, máá jecu jeē jini i ún, sa suhva naa. Achí yá.

Jnūhun yátá síquī trigo jeē jéñnu

²⁶Te ni cahān gā yā:

Súcuan cúu jeē ndácu Yaā Dios jniñu nuū ñayuu: Cúu nájñūhun trigo jeē ní jete ĩn tēe. ²⁷Yūcuán na te quíxi de te ndóna de, te súcuan jíca quivī cuahān. Te trigo un cáne te jéñnu. Te máá de tu jini de ndese cúu jeē jéñnu. ²⁸Chi máá ñūhun sáha jeē jéñnu trigo, xihna gā yucū, sáá te cáne yoco, yūcuán na te ŷje máá nuni. ²⁹Te núu ni cuan trigo

un, te quéjéé ñáyuu cájehnde i, chi je ni jinū quivī tahndé. Achí yá.

Jnūhun yátá síquī ndiquin mostaza

(Mt. 13.31-32; Lc. 13.18-19)

³⁰Te suni ni cahān yā:

Na cáhán rī iin jnūhun yátá návāha cuni rō ndese ndúcuehē ñayuu jeē ndácu Yaā Dios jniñu nuū. ³¹Ndúcuehē i nájñuhun jéhnū iin ndiquin mostaza jeē jéquin i nuū ñúhun. Te yūcuan cúu iin ndiquin lúlí gá vēsú tācá ndiquin jeē iyó. ³²Te ná ni jequin i, te cáne te jéhnū ga vēsú tāca gá yucū, te cúnáhnū ndaha. Te tācá saa chi sáha tí tacā tí nuū cuándahū xiní ún. Achí yá.

Jeē máni jnūhun yátá cáhán yā jíin i

(Mt. 13.34-35)

³³Te cuehē jnūhun yátá súcuan ni cahān yā jíin ñáyuu, núu nasaa cánda i jecūhun ni i. ³⁴Te tāca jéē ni stéén yā, máni máá jnūhun yátá ní cahān yā jíin i. Te nuū tēe cáscuáha jíin yá chi ni nacastūhun cájí yá jnūhun ún.

Jeē ní jecuiñī tachī níhin jíin mar ni sáha ya

(Mt. 8.23-27; Lc. 8.22-25)

³⁵Te jeē cuácuaa quivī ún, te ni cahān yā jíin tēe cáscuáha jíin yá:

Na yáha yó quíhin yō inga lado mar, achí yá.

³⁶Te ni casquéndō de ñayuu cuehē ún, te ni quivico de ini barco nuū je íne Jesús, cuango de jíin yá. Te suni cuango jecu gā barco jíin de jíināhan de. ³⁷Te ni jecuñī iin tachī níhin, te ni stónnda ndute mar, te ni quivī ini barco. Te je yajni chitú ndute ini barco. ³⁸Te

Jesús cáttú yá yatā de ini barco, quixí yā te yíhi iin sahma cástíhi xiní yā. Te ni castónnda de ya, te ni cacahān de:

Maestro, ¿á tu sáha ní cuenta jeē quee yó chíji ndute te cuu yō? achí de.

³⁹Te ni ndocuiñī yā, te ni cahān yā nuū tachí níhin un jíin núu mar:

Jecuiñī te nayúu-ni coo ró, áchí yá.

Te ni jecuiñī tachī, te ni cuu nayúu íi-ni. ⁴⁰Te ni cahān yā jíin de jíināhan de:

¿Naun cáyūhú ndasí ró? ¿Naun tu cácandíje ró jéē cācu ró sáha rí?

⁴¹Te yōhyo ni cayūhú de, te ni cacahān de jíin jnāhan de:

¿Ndé iin ga cúu tēe yáha jéē nde tachī níhin jíin mar cájetáhu jéē cahān de? áchí de.

Tēe Gadara jeē ndóho tachī

(Mt. 8.28-34; Lc. 8.26-39)

5 Te ni jinū Jesús jíin de jíināhan de inga lado mar, región Gadara. ²Te ná ni quenda ya ini barco un, te iin tēe ñúhun tachī ini, ni quenda de nde nuū yíndūji ndīyi, te ni quee de nuū yā. ³Tēe un ndéé de nuū yíndūji ndīyi. Te tu jéjñū jeē jñhi ñayuu de, ni jíin cadena. ⁴Chi cuehē jínu ni conuhñi jehē de ndaha de jíin cadena. Te tāca jínu jéhnde de, te sácuéchi de. Te tú ni iin cúndeyí jíin de. ⁵Te nduú ñuú jíca de yucu jíin núu yíndūji ndīyi, te cána cóhó de, te stújí de máá de jíin yúu. ⁶Te náa jíca gá vēji Jesús, te ni jito de ya. Te jínu de ni quee de nuū yā, te ni jecuiñī yití de nuū yā. ⁷Te ni cana cóhó de:

¿Naun vēji ní núū ná, Jesús Sēhe Yaā Dios, Yaā cujéhnū téyí? Cáhán ndahú ná jíin ní, jíni nahín Yaā Dios, ma stóho ní sáña, áchí de.

⁸Súcuan ni cahān de, chi je ni cahān Jesús:

Táchī, quenda ini tēe yáha quíhīn rō.

⁹Te ni cajñūhun yá de:

¿Na vé naní ró?

Te ni cahān de:

Legión naní ná, chi cuehē tachī ñūhun ini ná, áchí de.

¹⁰Te ni cahān ndahú ndasí de jíin yá jeē ma tájí yá tachī quendacoo región ún. ¹¹Te yajni yucu yúcuan cáhiin cuehē quīnī cájitu tí.

¹²Te tachī jeē ñūhun ini tēe un ní cacahān ndahú jíin yá:

Núu tají ní sāñá, te cuāha ní jñūhun quīvīcoo ná ini quīnī yūcuán, áchí.

¹³Te Jesús ni jēhe ya jñūhun.

Te ni quendacoo tachī ún ini tēe ún, te ni quīvīcoo ini quīnī, te íyó nájñūhun uū mil tí. Te quīnī un ní cajinu tí ni ñingoo tí ñin yucáva, ni quīvīcoo tí nuū mar. Te ni ndaquíhi tí ndute, ni cajihī tí.

¹⁴Te tēe cándito tí, ni cajinu de cuango de jeē ní cayūhú de. Te ni jinūcoo de ni cacastūhún de nuū ñáyuu ñuu un jíin ñáyuu tāca rancho. Te cuango ñáyuu un cuácondēhé i na vé ni cuu. ¹⁵Te ni jinūcoo i nuū íne Jesús, te ni cajito i nuū tée ni ñūhun cuehē tachī ini. Te néne de, te ñūhun de sahma, te je ni nducájí xíní de. Te ni cayūhú ñáyuu ún. ¹⁶Te tēe ní cajito, ni canacani de jñūhun nuū ñáyuu, ndese ni nduvāha tēe ni ñūhun tachī ini, jíin ndese ni candoho quīnī

ún. ¹⁷Yūcuán na te ni caquejéé i cácahān ndahú i jíin yá jeē na cújiyo ya región yūcuan quíhīn yā.

¹⁸Te ni ndīvi ya ini barco. Te tēe ni ñūhun tachī ini un ní cahān ndahú de jíin yá jeē na cuāha ya jñūhun quíhīn de jíin yá. ¹⁹Te Jesús tu ní jēhe ya jñūhun, chi ni cahān yā jíin de:

Cuánuhun vehe ró núū jnáhan ró, te nacani ró jñūhun nuū i ndese yōhyo jéhnū jniñū ni sáha máá Jítóho rō jíin ró, te ndese ni cundáhú ni yā rohó, áchí yá.

²⁰Te ni quenda de cuahān de, te ni quejéé de nácani de jñūhun tācá ñuu Decápolis ndese yōhyo jéhnū jniñū ni sáha Jesús jíin de. Te ndīvī ñáyuu un ní canaa ni i cájini nahín i.

Jñūhun sēhe síhí Jairo jíin ñahan ní quehé yusáhma ya

(Mt. 9.18-26; Lc. 8.40-56)

²¹Te ni nayāha tucu Jesús cuanuhun yā inga lado mar jíin barco. Te ni quecoo cuehē ñáyuu nuū yā, nuū íne ya yumar. ²²Te ni quee ñin tēe cújéhnū ini vehe íi sinagoga, naní de Jairo. Te ná ni jito de nuū yā, te ni jecuíñī yítí de nuū jehé yā. ²³Te ni cahān ndahú ndasí de jíin yá:

Sēhe síhí ná je yajni cuu i. Na quíhīn yō vehe ná te soó ní ndaha ní síquī i návāha na ndúvāha i te cotecu i, áchí de.

²⁴Yūcuán na te cuahān yā jíin de. Te cuehē ñáyuu cándiquīn i ya, te ni chítú níhīn i xiin ya cuango i. ²⁵Te mēhñū ñáyuu un cuáhān ñin ñahan cúhú, jeē ní cuu uxī uū cuiyā ndóho ña cuehyī ñiñī. ²⁶Te

yōhyo ni ndoho ña, chi ni jexin ña tāca jéē névāha ña jíin cuehē tēe tájñá, te tu ní jéjñíñu jeē ndúvāha ña, chi sa suhva víhyá gā sáha. ²⁷Te ñahan yáha ná ni nihin ña jñūhun Jesús, te ni quee ña ichi yátá yā mēhñu ñáyuu cuehē ún, te ni quehé ña yusáhma ya. ²⁸Chi ni jeni ni ña: Vēsú maá sahma ya na níhín rī quehé rí, te nduvāha ri, jéni ni ña. ²⁹Te ni jecuiñī-ni niñī ña, te ni jini ña jeē ní nduvāha ña cuehyī ún. ³⁰Te Jesús ni jini yā jeē ní nduvāha ñiñ ñayuu jíin fuerza yā. Te ni ndió cóto ya nuū ñáyuu cuehē, te ni cahān yā:

¿Nde ñiñ ni quehé sahma ri? Achí yá.

³¹Te tēe cáscuáha jíin yá, ni cacahān de:

Jíto ní jéē ñáyuu cuehē yāha ní chitú níhín i xiin ní te cáquīhi i níhín níf cáni ichi, te cájnūhun ní ndé ñiñ ni quehé sahma ní.

³²Te máá yá jíto ya cháha chúcuan, cúní yā jeē na cáchi ñayuu ni sáha. ³³Te ñahan un yúhú ña te quísi i ña, te je jíin ña jeē ní nduvāha ña. Te ni quee ña, te ni jecuiñī yití ña nuū yā, te ni cachi ña ndihí ndese ni cuu jíin ña. ³⁴Te ni cahān yā jíin ña:

Séhē, ni candíje ró jéē cuu nasávāha ri rohó, te jeē yúcuan ní nduvāha ró. Cuáhán te na ndúsīñ rō, chi je ni nduvāha ró cuehyī ní ndoho ró, achí yá.

³⁵Te níiní cáhán gā yā súcuan, te ni quecoo ñayuu cáyucú vehe tēe cújéñu ini vehe ñiñ sinagoga, te ni cacahān i jíin de:

Je ni jihí sēhe síhí ní. Te ma sajñéñu ga ní Maestro, achí i.

³⁶Te Jesús tu ní sáha ya cuenta jeē súcuan cácahān i, te ni cahān yā jíin tēe cújéñu ini vehe ñiñ sinagoga:

Ma yūhu ró, chi candíje ró jéē nastécu rī i, achí yá.

³⁷Te tu ní jéhe ga yā jñūhun condiquīñ ñayuu yā, chi máá-ni Pedro jíin Jacobo, jíin Juan ñani Jacobo. ³⁸Te ni jinū yā vehe tēe cújéñu ini vehe ñiñ sinagoga, te ni jito ya ñayuu, cácuvaā i, te cándahyū i, te cácana cóhó i. ³⁹Te ni quívi ya, te ni cahān yā:

¿Najehē yōhyo cásvāā rō te cándahyū rō? Sūchi síhí yáha, tu ní jíhí i, chi quíxí-ni i, achí yá.

⁴⁰Te ni cajecū catá i jeē ni cáhān yā. Te ni quenehen ndihí ya i cuahān i nuū quéhe. Te ni cana ya máá-ni tátá jíin náná sūchi síhí un, jíin tēe cáhiin jíin yá, te ni quívi ya jíin de nuū catú sūchi síhí ní jihí ún. ⁴¹Te ni jñiñ ya ndaha i, te ni cahān yā jíin i:

Talita cumi, achí yá. Te jñūhun un cúní cahān: Síhí, cáhán rī jíin ró, ndocuñīñ, achí yá.

⁴²Te ni ndocuñīñ-ni sūchi síhí un, te ni nacaca i, chi je íyó i uxí uū cuiyā. Te yōhyo ni canaa ni ñayuu cájito i. ⁴³Te ni ndacu níhín ya jñiñ nuū i jíjñáhan i jeē ma cáchi cuítí i nuū ni ñiñ. Te ni cahān yā jeē na cuáha ña jeē cáji sūchi síhí.

Jeē cuánuhun yā ñuu Nazaret

(Mt. 13.53-58; Lc. 4.16-30)

6 Te ni quenda Jesús yūcuán, te cuanuhun yā ñuu yā. Te tēe cáscuáha jíin yá cuangoo de jíin yá. ²Te máá quívi ndétātu ní steen yā jñūhun ini vehe ñiñ sinagoga. Te cuehē ñayuu ni canaa ni i cájini nahín i, te ni cacahān i:

¿Ndé nuū ní cutūhva tēe yáha tāca jnúhun yáha? ¿Te ndese cúu jeē cahán de jnúhun ndíchí yáha jíin jēe sáha de jniñu jéhu yáha? ³Chi tēe yáha cúu carpintero, te sēhe María cúu de, te ñani Jacobo jíin José jíin Judas jíin Simón cúu de. Te suni cáyūcu cuáha de jíin yó yáha. Achí i.

Te súcuan ni cacujéē ni i nuū Jesús. ⁴Te ni cahān yā jíin i:

Tāca tēe nácani jnúhun Yaā Dios, íyó yíñúhún ñayuu jíin de, chi máni ñayuu ñuu maá de, jíin jnáhan de, jíin ñayuu vehe de cúu jeē tu íyó yíñúhún jíin de. Achí yá.

⁵Te tu ní cúu sáha ya cuehē jniñu jéhu yūcuán. Chi jecu-ni ñayuu cácuñu ni soó yá ndaha ya siquī i, te ni nasávāha ya i. ⁶Te náā ni yā jíto ya jeē tu cácanđije ñayuu jijnáhan i. Yūcuán na te ni jica cuu ya tācá ñuu yajni, ni steén yā jnúhun.

Jeē ní tají yá ndihúxí uū de cuanacani de jnúhun

(Mt. 10.5-15; Lc. 9.1-6)

⁷Te ni cana ya ndihúxí uū tēe cáscuáha jíin yá, te ni tají yá ndihuū ndihuū de quingoo de. Te ni sáha ya jeē cóndiso jniñu de quenehen de tachí ini ñayuu. ⁸Te ni ndacu ya jeē tú na vé condiso de jeē cuajniñu de ichi, ni ñunu, ni staā, ni xuhún. Chi máá vara-ni condahá de. ⁹Te quíhi de ndijēn, te ma quihín de jíin úu sahma, áchí yá. ¹⁰Te suni ni cahān yā jíin de:

Na-ni vehe núu ni quivicoo ró, te yūcuán coyūcu ró ndé quenda tucu ró quíhin rō inga ñuu. ¹¹Te núu iin ñuu tu cájetáhú i róhó, ni tu cúní

i cuni nahín i jnúhun cahān rō, na quéndacoo ró yúcuán, te scóyo ró tícachā jehē rō, te súcuan steén rō jeē iyó cuēchi i jeē tu ní cájetáhú i. Jendaá cahán ri jíin ró jeē quiví coo juicio te xeēn gā coo castigo siquī ñuu casáha súcuan vēsú siquī ñuu Sodoma jíin ñuu Gomorra nuū ní casáha ndasí ñayuu cuēchi.

¹²Te ni quendacoo de cuahān de, te ni canacani de jnúhun jeē na nácani ni ñayuu jeē stóo i cuēchi i. ¹³Te suni ni caquenehen de cuehē tachí ini ñayuu. Te ni cachihí de aceite cuehē ñayuu cácuñu, te ni canduvāha i.

Jeē ni jíhi Juan tēe scuándute

(Mt. 14.1-12; Lc. 9.7-9)

¹⁴Te rey Herodes ni jini jnúhun de jnúhun Jesús, chi ni jitē núu jnúhun ya ní cáhnu. Te ni cahān de:

Tēe yúcuán cúu Juan tēe ni scuándute, te ni natecu de. Jeē yúcuán íyó poder de sáha de jniñu jéhu. Achí de.

¹⁵Te sava ga ñayuu ni cacahān i: Tēe un cúu Elías jeē ní nacani jnúhun jenahán.

Te sava ga i ni cacahān:

Tuú chí iin tēe nácani jnúhun Yaā Dios cúu de, nájnúhun tēe ni canacani jnúhun ya nde jenahán, áchí i.

¹⁶Te ná ni jini Herodes, te ni cahān de:

Tuú chí yūcuán cúu Juan jeē ní ndacu ri jniñu ni tahndē xiní, te ni natecu de núu súcuan, áchí de.

¹⁷Chi máá Herodes ni ndacu de jniñu jeē na quiví Juan vecā, jíin jēe na cónuhni de jíin cadena. Súcuan ni sáha de jeē siquí

Herodías, ñasihí ñani de Felipe. Chi Herodes ni quihin de ña jeē cúu tucu ña ñasihí de. ¹⁸Te Juan ni cahān de nuū Herodes:

Tu íyó ley jeē cóndeca ró ñasihí ñani rō, achí de.

¹⁹Te jeē yúcuan Herodías ni jito uhū ña Juan, te cúní ña jeē na cúu de, te tu ní níhín ña modo. ²⁰Chi Herodes yúhú de cahni de Juan, chi jíní de jeē tēe ndaā tēe ndoo cúu Juan. Te jeē yúcuan ní jesi de jeē nducú ña jeē cúu Juan. Te nújnahan ni de jíní nahín de jnūhun cáhán Juan, vēsú tu jécūhun vāha ni de.

²¹Te ni quee ñin quivī jeē ní cundeyí Herodías. Chi ni sāha Herodes ñin vico quivī ní cacu de, te ni jēhe de jeē ní cacuxíni tēe cándiso jníñu nuū de, jíní tēe cácuu capitán, jíní tēe cácujuhnu región Galilea. ²²Te ni quivī sēhe síhí máá Herodías, ni jita jéhé i nuū chitú un. Te ni cacusiñ ni rey Herodes jíní tēe cácuixíni jíní de. Te ni cahān de jíní súchi síhí un:

Cacān na vé cuní rō, te cuāha ri nuū rō, achí de.

²³Te ni cahān teyí de jeē cuāha de núu na vé cuní i cacān i, vēsú nde sava región jeē yíhi ndaha de. ²⁴Te ni quenda i, ni jecajñuhún i náná i: ¿Na vé cacān na núu de? áhí i.

Te ni cahān ña:

Xiní Juan tēe scuándute cacān rō nuū de, achí ña.

²⁵Yūcuán na te ni ndīvi-ni i nuū rey, te ni cahān i:

Cúní na jéē vijna ñúhún-ni cuāha ní xiní Juan tēe scuándute, cone nuū ñin cohō, achí i jíní de.

²⁶Yūcuán na te ni cucuíhyá ndasí ni rey un jeē ní cundeyí Herodías jeē cúu Juan. Te siquī jeē ni

jéjnūhun téyí de, jíní jéē ní cajini sōho tēe cáyeji staā jíní de, jeē yúcuan tu ní cúní de sásáhán de jeē ni jícān i. ²⁷Te ni tají-ni de ñin soldado jeē quíquihin de xiní Juan. ²⁸Te ni jehēn soldado un vecāa, te ni jehnde de xiní Juan. Te ni quee de jíní xiní Juan, íne nuū ñin cohō. Te ni jēhe de nuū súchi síhí un, te máá i ni jēhe i nuū naná i.

²⁹Te tēe cáscuáha jíní Juan ni canihín de jnūhun, te ni jengoo de, ni candonehen de yiqui cúñu Juan, te ni cachindūji de.

Jeē ni scáji yā uhūn mil tēe

(Mt. 14.13-21; Lc. 9.10-17; Jn. 6.1-14)

³⁰Yūcuán na te tēe cácuu apóstol jeē ní tají yá cuangoo nacani jnūhun, ni ndecoo de nuū Jesús. Te ni canacani de nuū yā tācá jniñu ni casáha de, jíní jnúhun ni castéén de. ³¹Te ni cahān yā jíní de:

Na quíngoo yó ñin lugar nuū tú ñayuu, te ndetātu yó jecu, achí yá.

Chi cuehē ñayuu cuahān i vēji i nuū yā, te ni tu ní núne ya jeē cáji yā staā jíní de. ³²Yūcuán na te ni quivī ya ñin barco jíní táca tēe apóstol un, te cuangoo síñ ya jíní de ñin lugar nuū tú ñayuu. ³³Te cuehē ñayuu ni cajito i jeē cuahán yā jíní de, te ni canacuni i jeē maá yá cúu. Te nde tācá ñuu ni quendacoo i, te yachí cuangoo i, te xihna gā i ni jinūcoo vēsú maá yá. ³⁴Te nuū ní quenda Jesús ini barco, te ni jito ya ñayuu cuehē ún. Te ni cundáhú ni yā i, chi cúu i nájnūhun lanchi jeē tú jito ho tī. Te ni steén yā cuehē jnūhun nuū i. ³⁵Te nuū ní ini, te tēe cáscuáha jíní yá, ni quecoo de nuū yā, te ni cacahān de:

Je ni ini, te yāhá chi tú na ñayuu yúcu. ³⁶Núu súcuan te tají ní ñayuu na quíngoo i tāca rancho jíin ñuu yajni, te cuaan i staā caji i, chi tú na vé cándiso i caji i, áchí de.

³⁷Te ni cahān Jesús jíin de:

Cuāha máá ró jeē caji i, áchí yá.

Te ni cacahān de:

¿Te ndese cuu? Chi ni ma cúu vesú núu quicuaan ná ndé uū ciento denario staā caji ñayuu, achí de.

³⁸Te ni cahān yā jíin de:

¿Nasaa staā cánevāha ró?

Cuacondēhe, áchí yá.

Te nuū ní cajini de, te ni cacahān de:

Uhūn-ni staā jíin úū chācá íyó, áchí de.

³⁹Yūcuán na te ni cahān yā jíin ñáyuu jeē na cúcōo sīn i cuenta grupo nuū íte. ⁴⁰Te ni cacucōo sīn ciento ciento i, jíin cincuenta cincuenta i. ⁴¹Te ni quihin ya ndihúhún staā jíin úū chācá un, te ni ndacoto ya ichi ándiví, te ni nacuatáhú yá. Te ni tahu cuéché yá staā ún, te ni jēhe ya nuū tée cáscuáha jíin yá, te máá de ni casaja de nuū ñáyuu cuehē ún. Te suni ni jēhe ya ndindúú chācá, ni casaja de nuū i. ⁴²Te ndivii i ni cayejí, te ni candutú chjíi i. ⁴³Yūcuán na te ni canastútú de pedazo staā jíin cháca jéé ní quendōo, te ni chitú úxí uū jica. ⁴⁴Te tēe ni cayejí, chi uhūn mil de cúu.

Jeē ní jica jéhé yá nuū mar

(Mt. 14.22-27; Jn. 6.16-21)

⁴⁵Yūcuán na te ni cahān-ni Jesús jíin tée cáscuáha jíin yá jeē na quívicoo de barco, te cosnūú de

yāha de inga lado mar ñuu Betsaida. Te máá yá chi natají yá ñayuu quinhun i, te sáá te suni quihin yá. ⁴⁶Te nuū ní cuu ni natají yá i, te ni caa ya yucu cuacacān tahu yá. ⁴⁷Te jeē ní cuaa, te barco un je ni cuu sava nuū mar cuahān, te máñúhún-ni ya ni quendōo nuū ñúhun íchi. ⁴⁸Te ni jito ya jeē yóhyo jnündóho cáscaca de barco, chi ñihin vēji tachí ichi núú de. Te jeē yínee gā ni quee ya nuū de, jica jéhé yá nuū mar. Te yāha ya nuū de quihin yā nuú. ⁴⁹Te ni cajito de jeē jica ya nuū mar, te ni cajeni ni de jeē jihná cúu, te ni cacana cóhó de. ⁵⁰Chi ndihí de ni cajito nuū yá, te ni cayūhú ndasí de. Te ni cahān-ni ya jíin de:

Ndeyí coo ni rō, te ma yūhu ró, chi máá rí cúu, áchí yá.

⁵¹Te ni quívi ya ini barco un, te ni jecuiñi-ni tachí. Te yóhyo ni canaa ni de cájito de. ⁵²Chi cándāa nées gá jeē níjnūní de, chi ni jíin jniñu jéhnú jeē ní nducuehē staā, tu ní cájecūhun ni de jeē máá yá cúu Yaa ní tají Yaa Dios.

Jeē ní nasávāha ya ñayuu cácuñu región Genesaret

(Mt. 14.34-36)

⁵³Te ni quenda jíyo ya jíin de nuū mar ún, ní jinū yā región Genesaret. Te yundúte un ní cajihni de barco. ⁵⁴Te nuū ní quenda ya jíin de ini barco, te ñayuu yúcuan ni canacuni-ni i ya. ⁵⁵Te yachí ni jengoo i tācá ndañúú yūcuán, te ni caquindeca i ñayuu cácuñu, cáyosó i nuū camilla, vējicoo ñayuu nuū ní jito i íne ya. ⁵⁶Te ndé-ni cúu-ni núu ní quívi ya, núu ñuu lulí, chí

ñuu cáhnu, chí rancho, te cájequin i ñayuu cácuñu yuhíchi, te cácahān ndahú i jíin yá jeē na quéhé i vēsú yusáhma ya. Te tāca ñayuu jeē ní caquehé sahma ya, ni canduvāha-ni i.

Siquī ndese cújnehén ñayuu

(Mt. 15.1-20)

7 Yūcuán na te tē grupo fariseo jíin jecu tē cástéén tutu ley Yaā Dios, ni quendacoo de ñuu Jerusalén, te ni quecoo de nuū Jesús. ²Te tē un ní cajito de jeē sava tē cáscuáha jíin Jesús, ni cayejí jnehén de staā, chí tu ní cáscuicu de costumbre jeē nāndahá de nuū Yaā Dios. Te ni cacahān siquī de. ³Chí tē fariseo jíin ndíhi ñayuu hebreo, névāha i costumbre jenahán jeē ma cáji i staā núu tu nandahá vāha i xihna gā. ⁴Te núu ni ndecoo i jeē ni jéngoo i nuū yáhu, te tu cáyeji i te núu tu nandahá i. Te íyó cuéhē gā costumbre jenahán jeē casquicu i, nájñuhun jeē ndúndoo taza, tindhō, cohō cáa, jíin jíto. ⁵Te tē fariseo jíin tē cástéén tutu ley Yaā Dios, ni cacajñuhún de ya:

Tē cáscuáha jíin ró, ¿naun tu cáscuicu de costumbre ñayuu jenahán? Chí sa cáyeji jnehén de staā, achí de.

⁶Te ni cahān yā jíin de:

Ndaā ni nacani Isaiás jñuhun siquī rō jijnáhan ró jeē tē stáhú-ni cácuu ró. Chí súcuān ni tee de jñuhun ni cahān Yaā Dios nde jenahán:

Ñayuu yáha chí máá yuhu-ni i cájetáhú i ruhū,
te nasūu ndé jíin ini jíin ánuá i.

⁷Te cáchiñuhún sáa-ni i ruhū,

chí jñuhun cástéén i cúu jniñu ní candacu tēe,

te nasūu jeē ní ndacu máá rí cúu.

Achí Yaā Dios. Achí Isaiás. ⁸Súcuān cácuu ró, chí ni casiáá rō jniñu ní ndacu Yaā Dios nuū rō, te cáscuicu ró costumbre jeē ní cajequin ñayuu, jeē ndúndoo tindhō jíin taza. Te cuéhē gā costumbre súcuān cáscuicu ró, achí yá.

⁹Te suni ni cahān yā:

Cásiáá rō jniñu ní ndacu Yaā Dios, návāha squicu ró costumbre ni cajequin máá ró. ¹⁰Chí Moisés ni cahān de: Coó yíñuhún ró jíin tátá rō jíin náná rō. Te núu ndé ññ cahān siquī tátá chí síquī naná, na cúu nahín. Achí Moisés. ¹¹Te máá ró chí cácahān rō jeē cuu cahān ññ tē jíin tátá de náná de: Ma cúu chindéé ññhán ná níhín cuáha na jeē cáji ni jeē cúhun ní, chí ndíhi jeē névāha ná, chí Corbán cúu, achí ró. (Te jñuhun Corbán cuní cahān jeē ní sócō nuū Yaā Dios.) ¹²Te cácahān rō jeē núu súcuān cahān ññ tē, te tuá cánúu chindéé ññhán de tátá de náná de. ¹³Te súcuān cástívi ró jniñu ní ndacu Yaā Dios, jeē siquí costumbre ni cajequin ñayuu jenahán vēji. Te cuéhē gā jniñu súcuān cásaaha ró, achí yá.

¹⁴Te ni cana tucu ya ñayuu cuéhē ún, te ni cahān yā jíin i:

Cuni sōho vāha ró jijnáhan ró, te chuhun ni rō: ¹⁵Tāca jeē iyó, te núu ni quívi yuhu ñayuu te tu cújnehén i sáha. Chí jeē quēnda ini anuá ñayuu, yūcuān cúu jeē cújnehén i sáha. ¹⁶Tāca róhó jeē jíni sōho, na chúsóhó ró, achí yá.

¹⁷Te ni stóo ya ñayuu cuéhē ún, te ni quívi ya ini vehe. Te tēe

cáscuáha ún, ni cacajnúhún de ya siquī jnúhun yátá yáha jéē ni cahān yā. ¹⁸Te ni cahān yā jíin de:

¿A máá ró suni ná tu jecūhun ni rō, chí naún? ¿A tu cájini rō jeē tāca jéē quívi ini ñayuu, ma cúu cujnéhén i sáha? ¹⁹Chi tu quívi ini anuá i, chi chíji i quívi, te quénda-ni cuahān, achí yá.

Súcuan ni steén yā jeē tāca jéē yéji ñayuu, tu cújnéhén ánuá i sáha. ²⁰Te ni cahān gā yā:

Jeē quénda ini anuá ñayuu, yūcuan cúu jeē cujnéhén i sáha. ²¹Chi nde ini anuá ñayuu quénda jeē jéni néé ni, jeē casíquī ndéē jnáhan, jeē jíca jnéni, jeē jéhni ndīyi, ²²jeē sacuíhná, jeē ndíyo ni ndajníñu jnáhan, jeē sáha néé, jeē stahú jnáhan, jeē máni cuēchi sáha, jeē cucuésún ni, jeē cahān yāa síquī jnáhan, jeē sandúxí máá, jeē canéé xíní. ²³Tācá jniñu néé yáha, máni ini anuá ñayuu quénda, te cújnéhén i sáha, achí yá.

Ñahan inga nación jeē ní candíje níhin

(Mt. 15.21-28)

²⁴Te ni quenda ya yūcuan cuáhān yā región Tiro jíin Sidón. Te ni quívi ya iin vehe, te cúní yā jeē tú ni iin ñayuu cuni jeē íne ya yūcuán. Te vésú súcuan, te tu ní cúu cone sáhi yá. ²⁵Te iin ñahan íyó séhe síhí ña jeē níhun tachí ini i, ni nihín-ni ña jnúhun jeē íne ya. Te ni quee ña, te ni jecuíñi yití ña nuū jehé yā. ²⁶Te ñahan ñuu jíca cúu ña, chi nde Sirofenicia cúu nación ña. Te ni cahān ndahú ña jíin yá jeē na quénehen ya tachí ini séhe síhí ña. ²⁷Te ni cahān Jesús jíin ña:

Nasūu núu máá ní vēji ná, chi máni nuū ñayuu cácuu séhe Israel. Chi tu íyó váha jeē quénde yō staa séhe te cuáha yó núu ina, achí yá.

²⁸Te ni cahān ña:

Jendaá cahān ni Tátā, te chindéē ñáhán ní sáña vésú cúu ná nájnūhun ina. Chi suni máá tí cáhiin tí chíji mesa, cánihin tí staa cuechí jéē cóyo yuhu sūchi lúli cáyeji tí, achí ña.

²⁹Yūcuán na te ni cahān yā jíin ña:

Váha ni cahān ní. Cuáhán ní núu súcuan, chí je ni quenda tachí ún ini séhe síhí ní, achí yá.

³⁰Te ni najinū ña vehe ña, te ni jito ña jeē catú séhe síhí ña nuū jito, te je ni quenda tachí ún ini i.

Jeē ní nasávāha ya iin tēe sóhó cástété

³¹Te ni quenda tucu ya región Tiro, ni yáha ya Sidón jíin táca ñuu Decápolis, te ni jinū yā mar Galilea. ³²Te ni caquindeca i iin tēe sóhó cástété nuū yā, te ni cacahān ndahú i jíin yá jeē na sóo yá ndaha ya siquī de. ³³Te ni quenehen síin ya de nuū ñayuu cuehē ún, te ni chune ya xini ndáha ya sōho de, te ni tesíhi yá, te ni quehé yá yaá de. ³⁴Te ni ndacoto ya ichi ándiví, te ni jitū ni yā, te ni cahān yā:

Efata, achí yá, jeē cuní cahān: Nanune.

³⁵Te ni nanune-ni sōho de, te ni nduvāha yáa de, te ni nacañā vāha de. ³⁶Te ni ndacu ya jniñu nuū ñayuu un jéē ma cáchi i nuū ní iin. Te vésú ni cahān níhin ya jíin i, te víhyá gā ni cajete i jnúhun. ³⁷Te yōhyo ni canaa ni i cájito i, te ni cacahān i:

Vāha sáha ya tācá jniñu, chi nde tēe cásóhó, cánacuni sōho de, te tēe cándāa ñhín, cánacahān vāha de sáha ya, achí i.

Jeē ni scáji yā cuñ mil ñayuu

(Mt. 15.32-39)

8 Te tiempo un ní candutútú cuéhē ndasí ñayuu, te tuá na vé caji i. Te ni cana Jesús tēe cáscuáha jíin yá, te ni cahān yā:

²Cúndáhú ni rī ñayuu yāhá, chi je ni cuu unī quivī cáyucú i jíin rí, te tuá na vé caji i. ³Te núu natajī rí i quinhun ndite i vehe i, te cuíta íi i sava ichi, chí íyó sava i jeē jicá véjicoo i, áchí yá.

⁴Te tēe cáscuáha un ní cacahān de:

¿Te ndé nuū nihín yō staā caji i jíjñahan i? Chi yāhá tú na ñayuu yúcu, áchí de.

⁵Te ni cajñuhun yá de:

¿Nasaa staā cánevāha ró?

Te ni cacahān de:

Uxā-ni, áchí de.

⁶Yūcuán na te ni cahān yā jíin ñayuu cuéhē un jēe na cúcōo i. Te ni quihin ya ndihúxá staā ún, te ni nacuatáhú yá nuū Yaā Dios. Te ni tahú cuéchí yá, te ni jēhe ya nuū tēe cáscuáha jíin yá. Te máá de ni casaja de nuū ñayuu cuéhē ún. ⁷Te suni cándiso de jecu chācá lúlí. Te ni nacuatáhú yá siquī, te ni cahān yā jeē suni saja de jíjñahan de. ⁸Te ndíhi i ni cayejí, te ni candutú chíjji i. Yūcuán na te ni canastútú de pedazo jeē ní quendōo, te ni chítú úxā jica. ⁹Te tēe ni cayejí un, íyó nájnūhun cuñ mil de. Te ni nacuatáhú yá nuū ñayuu ún, te cuanungoo i. ¹⁰Yūcuán na te

ni ndívi-ni ya ini barco jíin tēe cáscuáha jíin yá, te cuahān yā región Dalmanuta.

Jeē ní cajicān de iin jniñu jéhnú nuū yā

(Mt. 16.1-4; Lc. 12.54-56)

¹¹Yūcuán na te ni quecoo tēe grupo fariseo, te ni caquejéé de stíchí de Jesús. Te cācuni de coto ndee de ya, te ni cajicān de jeē sáha ya iin jniñu jéhnú jeē coo iin seña ichi ándiví. ¹²Te ni jitū ni yā siquī jeē tu cācandíje de jíjñahan de, te ni cahān yā:

¿Naun cájicān ñayuu yáha iin jniñu jéhnú nuū rí? Jendaá cahán rí jeē ma stéén rí ni iin jniñu jéhnú nuū ñayuu yāhá.

¹³Te ni squéndōo ya de jíjñahan de, te ni ndívi tucu ya ini barco, te cuahān yā inga lado mar.

Jñūhun levadura tēe fariseo

(Mt. 16.5-12)

¹⁴Te tēe cáscuáha jíin yá ni canaa ni de condiso de jeē caji de, chi iin-ni pan cánevāha de ini barco.

¹⁵Te ni ndacu ya jniñu nuū de:

Coto má candíje ró levadura tēe grupo fariseo jíin levadura Herodes, achí yá.

¹⁶Te ni cacahān tēe cáscuáha un jíin táca jñahan de:

Va siquī jeē tú na staā ndíso yó, jeē yúcuán cáhán yā súcuán, áchí de.

¹⁷Te ni jini Jesús, te ni cahān yā: ¿Najehē cándajnūhun ró jeē ni cáhán rí súcuán siquī jeē tú na staā cándiso ró? ¿A ná tu cuni rō, á ná tu jecūhun ni rō jeē tu ní cáhán rí súcuán siquī jeē tu cándiso ró

staā? ¿A yóhoyo uun ni rō candíje rō? ¹⁸Iyó tñūu rō ¿te á tu cájito rō? Iyó sóho rō ¿te á tu cájini rō? ¿Te á tu cánucūhun ni rō? ¹⁹Chi ná ni tahú cuéchí rí uhūn staā ni cayejí uhūn mil tēe, ¿te nasaa jīca ni chítú pedazo staā jeē ní canastútú rō? Achí yá.

Te ni cacahān de:

Uxī uū jīca, achí de.

²⁰Te suni súcuan ná ni tahú cuéchí rí uxā staā ni cayejí cuūn mil tēe, ¿te nasaa jīca ni chítú pedazo staā jeē ní canastútú rō? Achí yá.

Te ni cacahān de:

Uxā jīca, achí de.

²¹Te ni cahān yā jíin de:

Te nde vijna ¿á ná tu jecūhun ni rō jíjnāhan rō?

Súcuan ni cahān yatá yá jeē ma cándíje de jñūhun stáhú cástéén tēe ún.

**Jeē ní nasávāha ya tēe
cuáá ñuu Betsaida**

²²Yūcuán na te ni jinū yā jíin de ñuu Betsaida. Te ni caquindeca ñayuu ñin tēe cuáá núu yā, te ni cacahān ndahú i jíin yá jeē na tēe ya ndaha ya nuū de. ²³Yūcuán na te ni jñi ya ndaha tēe cuáá un, te ni quenehen ya de yatā ñūu ún. Te ni tee ya tesíhi yá tinūú de, te ni tee ya ndaha ya siquī. Te ni cajñūhun yá de núu cuu coto de jecu. ²⁴Te ni ndacoto de, te ni cahān de:

Jíto ná ñayuu jeē cájica i, te tu jíto cájii ná, chi ná cáa yujnu cáa i, achí de.

²⁵Yūcuán na te ni tee tucu ya ndaha ya siquī tinūú de. Te ni ndacoto vāha de, te ni nduvāha-ni

tinūú de, te ni jito cájii de ndíhi-ni.

²⁶Te ni natajii yá de quinhun de vehe de, te achí yá:

Ma quívi rō ñuu, ni ma cáchi cuitii rō nuū ní ñin, achí yá.

**Jeē ni cáhān Pedro jeē Jesús cúu
Cristo**

(Mt. 16.13-20; Lc. 9.18-21)

²⁷Yūcuán na te Jesús jíin tēe cáscuáha jíin yá, cuahān yā tēcá ndañūu Cesarea Filipo. Te ichi un ní cajñūhun yá de:

Ruhū, ¿ndé ñin cúu ri cácahān ñayuu?

²⁸Te ni cacahān de:

Sava i cácahān jeē cúu ní Juan tēe ni scuándute. Te sava ga i cácahān jeē cúu ní Elías, tēe ni nacani jñūhun Yaā Dios nde jenahān. Te sava ga i cácahān jeē inga tēe ni nacani jñūhun Yaā Dios cúu ní.

²⁹Yūcuán na te ni cajñūhun yá de: Te máá rō, ¿ndé ñin cúu ri cácahān rō?

Te ni cahān Pedro:

Máá ní cúu Cristo, Yaā ní tajii Yaā Dios, achí de.

³⁰Te ni ndacu ya jñiñu nuū de jíjnāhan de jeē ma cáchi de jñūhun yáha nuū ní ñin ñayuu.

Jeē ní castūhún Jesús jeē cúu yā

(Mt. 16.21-28; Lc. 9.22-27)

³¹Te ni quejéé yá steén yā nuū de: Máá rí, Yaā ní nduu tēe, cánuú ndoho xeēn rī. Te tēe tēe jéhu jíin sūtū cácujuhū jíin tēe cástéén tutu ley, squéhichí de ruhū, te cahni de ruhū. Te nuū uní quívi te natecu rī, achí yá.

³²Te cájii ní cahān yā jñūhun yáha. Yūcuán na te Pedro, ni cana

máñúhún de ya, te ni quejéé de cáhán de nuū yā jeē ma cuáha ya jñūhun coo súcuan. ³³Te máá yá ni ndió cóto ya ni jito ya nuū téé cáscuáha jíin yá. Te ni cahān yā nuū Pedro:

Cujiyo quihīn rō, chi cáhán rō ná cáhán Satanás. Chi tu jéni ni rō nájnūhun jéni ni Yāā Dios, chi sa suhva jéni ni rō nájnūhun cájeni ni ñayuu, achí yá.

³⁴Te ni cana ya téé cáscuáha jíin yá jíin ñayuu cuehē ún, te ni cahān yā:

Na-ni ñayuu núu cúní i condiquīn i ruhū, na cásí i jeē cuní máá i, te na cóndiquīn i ruhū te cuáha i jñūhun ndoho i jñúndóho jeē siquí rī, vēsú na cúu i. ³⁵Chi núu ndé ñayuu cuní i cācu i nuū jñúndóho quiji nuū i jeē siquí ruhū, núu súcuan te jnahnú ndetū i níí cáni. Te núu ndé ñayuu, vēsú na cúu i jeē siquí ruhū jíin síquí jeē scáca i jñūhun jeē jnáma ri ñayuu, núu súcuan te cotecu i níí cáni. ³⁶¿Chi ndé cuajníñu vēsú na cúndeyí ñayuu nihīn i níí ñáyíví, te núu quívi i nuū jnahnú ndetū i? ³⁷Chi tú na jíin cuiti chunaa ñayuu jeē cácu ánuá i. ³⁸Te ñayuu yáha tu cácadíje cuiti i, te máni máá cuéchi cásáha i. Te núu na-ni ñayuu cúcanu i nuū ñayuu yáha jeē siquí ruhū, Yāā ní nduu téé, jíin síquí jñūhun cáhán rī, suni súcuan cucanu rī jeē siquí máá i, quivī ndíji rī jíin táca ndajéhé ndoo rī. Te quivī ún chi yōhyo luu kujéhnu ri nájnūhun cújéhnu Tátá rī. Achí yá.

9 Te suni ni cahān yā jíin de jíjnáhan de:

Jendaá cahán rī jíin ró jeē sava téé cáhiin yāhá, ma cúu de chi nde cuni de jeē ndácu Yāā Dios jñiñu jíin poder yā, achí yá.

Jeē tucu ni nduu ya

(Mt. 17.1-13; Lc. 9.28-36)

²Yūcuán na te nuū iñú quivī te Jesús ni jeca ya Pedro jíin Jacobo jíin Juan, cuahān síin ya jíin de iin yucu súcún. Te yūcuán, tucu ni nduu ya nuū de. ³Te sahma ya ni ndindéé, te ni nducujíin quiyi, nájnūhun yuhvā volcán. Te tú ni iin ñayuu ñáyívi yáha cuu nacate jeē ndúquiyi ndasí súcuan. ⁴Te ni cajito de jeē Elías jíin Moisés cándajñuhún de jíin yá. ⁵Yūcuán na te ni cahān Pedro jíin Jesús:

Maestro, nacā jeē váha jeē cáhiin na yáha. Te na sáha ná úní vehe ramada, iin cuu máá ní, inga cuu Moisés, te inga cuu Elías, achí de.

⁶Chi yōhyo ni cayūhu téé cáscuáha ún, te Pedro tu ní sáha de cuenta na vé cúu jeē cahán de. ⁷Te ni quiji vicō nūhun ní jesi-ni nuū de. Te nuū vicó un ní cahān iin jñūhun:

Yáha cúu Sēhe ri jeē maní ndasí rí jíin. Te na cúni nahín ró jñūhun cáhán yā. Achí.

⁸Te ni candacoto-ni de, te tuá téé un ní cájito de, chi máá iin na Jesús.

⁹Te ni cananuu de jíin yá yucu ún. Te ni ndacu nihin ya jñiñu nuū de jeē ma cáchi de nuū ní iin jeē súcuan ni cajito de, chi nde na nátecu máá yá, Yāā ní nduu téé, achí yá. ¹⁰Jeē yúcuan ní cachuvāha de táca jéé ní cuu ún, te cácajnūhun jnáhan de na jñūhun cúu jeē nátecu yā. ¹¹Te ni cacajñuhún de ya:

Te tēe cástéén tutu ley Yaā Dios, ¿najehe cácahān de jeē cánuú ndiji Elías xihna gā, te sáa te quiji Yaā cúu Cristo? achí de.

¹²Te ni cahān yā:

Jendaá cúu jeē xihna gā quiji iin tēe cúu nájnūhun Elías, te sātūhva de ndihi, áchí tutu. ¿Te ndese cáhān tucu tutu iī siquī ruhū, Yaā ní nduu tēe? Cáhān jeē ndoho xeēn rī, te sájéē ni i nuū rī. ¹³Te cáhān rī jíin ró jeē jé ni quiji tēe ni cuu nájnūhun Elías, te ni casáha ndevāha ñayuu jíin de tāca jéē ní cacuu ni maá i, nájnūhun cáhān jnūhun de nuū tútu, áchí yá.

Jeē ní nasávāha ya iin sūchi ñūhun tachí ini

(Mt. 17.14-21; Lc. 9.37-43)

¹⁴Te ni najinū yā jíin de nuū sava ga tēe cáscuáha jíin yá, te ni cajito ya ñayuu cuehē ndasí, ni cajicó ndūū i de. Te suni cáhiin tēe cástéén tutu ley Yaā Dios, cátejnāhan jíin de. ¹⁵Te nuū ní cajito tāca ñáyuu un jéē véji ya, te ni canaa ni i. Te cájino i cuangoo i nuū yā jeē cahān i jíin yá. ¹⁶Te ni cajnūhun yá i:

¿Na siquī cátejnāhan ró jíin de jíjnāhan de? áchí yá.

¹⁷Te ni cahān iin tēe íne yūcuán:

Maestro, vendeca ná séhe ná núū ní, chí ñūhun iin tachí ini i, te ni cuñíhín i ni sáha. ¹⁸Te ndé-ni cúu nuū íne i, te tachí un scótúú i, te jéhi yíhí-ni i. Te jéē tiñū yuhu i, te squíhñi jnūhun i. Te cuacuxíí ndasí i sáha. Te ni cahān ndahú ná jíin tēe cáscuáha jíin ní jeē na quénehen de tachí ún, te tu ní cúu sáha de, áchí de.

¹⁹Te ni cahān yā jíin de jíjnāhan de:

Ñayuu tu cándíje cuiti cácuu ró. ¿Nasaa ga quiví condee rī jíin ró? ¿Te nasaa ga quiví cuandeyí ni rī jíin ró? Cuáquihin sūchí un, na quíji i, áchí yá.

²⁰Te ni caquindeca de i nuū yā.

Te nuū ní jito tachí un núū yā, te ni jehni yíhí-ni i. Te ni cotúú i, te cónéhén cócāni i, te jéē tiñū yuhu i.

²¹Te Jesús ni cajnūhun yá tatá i:

¿Nasaa cuiyā ni cuu jeē sáha súcuan jíin i?

Te ni cahān de:

Nde lulí i. ²²Te ni cuu cuehē jínu scótúú táchí ún i nuū ñūhún nuū ndúte, jeē cáhni i cúní. Te núu cuu sáha ní, te cundáhú ni ní chindéé ñáhán ní sāna jéē ndúvāha séhe ná, áchí de.

²³Te ni cahān Jesús jíin de:

Núu cuu candíje ró jéē sáha ri, chí ñayuu candíje te cuu tāca jéē cuní i, áchí yá.

²⁴Te maá tátá sūchí un ní cahān jee de:

Cándíje ná, te chindéé ñáhán ní sāna jéē candíje ñihin ga ná, áchí de.

²⁵Te ni jito Jesús jeē ní cutútú cuehē ñayuu nuū yā. Te ni cahān yā nuū tachí:

Tachí jeē sañíhín sásóhó, ruhū ndácu ri jniñu jeē na quénda ró ini sūchi yáha, te ma ndívi ga rō ini i, áchí yá.

²⁶Yūcuán na te ni cana cóhó táchí ún, te ni jehni yíhí tucu i, te ni quenda cuahān. Te sūchí un ní cuu i nájnūhun ndíyi. Te ni cacahān cuehē ñayuu jeē jé ni jihí i. ²⁷Te Jesús ni jniñi ya ndaha i, te ni ndonehen ya i, te ni nucuíñi-ni i.

²⁸Yūcuán na te ni quívi ya ini ìin vehe, te tēe cáscuáha jíin yá, ni cacajnūhun s̄h̄in de ya:

¿Najehē tu ní cúu quenehen ná tachī un jíjnáhan ná? áchí de.

²⁹Te ni cahān yā:

Ìin tachī súcuan chí ma quénda cuiti te núu tú cacān tahú rō te coo ndite ni rō, achí yá.

Jeē ni cahān tucu ya jeē cúu yā

(Mt. 17.22-23; Lc. 9.43-45)

³⁰Te ni quenda ya yūcuan jíin de jíjnáhan de, te ni yāha ya ndañū Galilea cuahān yā. Te tu ní cúni yā jeē cúni ni ìin ñayuu. ³¹Chi stéén yā nuū tēe cáscuáha jíin yá, te áchí yá:

Máá rí, Yaā ní nduu tēe, nastúu i ruhū nuū tāca tēe xeēn. Te cahni de ruhū, te núu ni jihī rī, te nuū uní quivī te natecu rī, achí yá.

³²Te tu ní cájēcūhun ni de jnūhun yáha, te cáyūhú de cajnūhún de ya siquī jnúhun ni cahān yā.

Ndé ñayuu cúu jeē cujéhnū ga

(Mt. 18.1-5; Lc. 9.46-48)

³³Te ni jinū yā jíin de ñuu Capernaum, te nuū ni quívi ya ini vehe, te ni cajnūhun yá de:

¿Na jnūhun ni candajnūhun ró ichi véji yó? áchí yá.

³⁴Te tu ní cácahān cuiti de, chí ichi un ní cacahān de siquī núu ndé ìin de cújéhnū ga. ³⁵Yūcuán na te ní cucōo ya, te ní cana ya ndihúxí uū de, te ní cahān yā:

Núu ndé ìin ró cúni cujéhnū ga, na cúu ró tēe núu ga nuū tāca jnáhan ró, te cuajniñu ró núu jnáhan ró.

³⁶Yūcuán na te ni jniñi ya ndaha ìin sūchi lúli, te ni jeni ya i mēhñū

de jíjnáhan de. Te ni nundee yā i, te ni cahān yā jíin de:

³⁷Na-ni ñayuu núu jeē siquī ruhū jetáhú i ìin sūchi lúli nájnūhun sūchi yáha, te ruhū jetáhú i. Te ñayuu jetáhú rúhū, nasūu máá ìin-ni ruhū, chí suni Yaā ní tajj rúhū jetáhú i, áchí yá.

Ñayuu tu cáhán siquī yā, ìin i jíin yā

(Mt. 10.42; Lc. 9.49-50)

³⁸Yūcuán na te ni cahān Juan jíin yá:

Maestro, ni cajito ná ìin tēe jeē jíin s̄h̄v̄i ní quenehen de tachī ini ñayuu. Te ni cajesi ná jéē sáha de, chí tu jíca de jíin yó, achí de.

³⁹Te ni cahān Jesús jíin de:

Ma cási rō jeē sáha de. Chí ni ìin tēe jeē jíin s̄h̄v̄i rí sáha de jniñu jéhnū, ma cúu nacahān de siquī rī.

⁴⁰Chi tēe tu cáhán siquī yō, ìin de jíin yó. ⁴¹Te na-ni ñayuu núu jeē siquī ruhū cuāha i vēsú ìin ñajin ndute coho ró, siquī jeē cácañdije ró ruhū, ndaa ndije cúu jeē nihín i tahū i. Achí yá.

Xeēn coo siquī ñayuu quívi nuū cuéchi

(Mt. 18.6-9; Lc. 17.1-2)

⁴²Te núu ìin sūchi lúli yáha cándije i ruhū, te núu quívi i cuéchi sáha na-ni ñayuu, te vāha ga núu ni conuhnī ìin yōso cáhnu sucūn ñayuu ún, te quēe i chíji ndute mar nuú. ⁴³Te núu ndaha ró sáha jeē quívi ró cuéchi, vāha ga cahnde rō na quíhín, návāha tuá sáha ró cuéchi. Chí vāha ga jeē cóndee ìin-ni ndaha ró te quívi ró núu cotecu rō níí cáni, vēsú jeē cóndee ndíndúú ndaha ró te quívi

ró infierno, nuū cayú ñuhūn jeē ma ndahvá cuiti. ⁴⁴Te yūcuán chi tu cájihī tindacú, te tu ndáhvá cuiti ñuhūn. ⁴⁵Te núu jehē rō sáha jeē quívi ró cuéchi, suni vāha ga cahnde rō na quíhín, návāha tuá sáha ró cuéchi. Chi vāha ga jeē cóo cúhndu ró te quívi ró núu cotecu rō níí cáni, vēsú jeē cóndee ndindúú jehē rō te quívi ró infierno, nuū cayú ñuhūn jeē ma ndahvá cuiti. ⁴⁶Te yūcuán chi tu cájihī tindacú, te tu ndáhvá cuiti ñuhūn. ⁴⁷Te núu tinūu ró sáha jeē quívi ró cuéchi, vāha ga tava ró na quíhín, návāha tuá sáha ró cuéchi. Chi vāha ga jeē quívi ró ñuu nuū ndácu Yaā Dios jniñu jíin iin na tinūu ró, vēsú jeē cóndee ndindúú tinūu ró te quívi ró infierno. ⁴⁸Te yūcuán chi tu cájihī tindacú, te tu ndáhvá cuiti ñuhūn.

⁴⁹Chi nájñuhun quénda vāha oro sáha ñuhūn, súcuan quénda vāha ñayuu sáha jñundóho. Te tāca cúñu jeē socó ñayuu nuū yā, cúhuhvuā sáha ñīī. ⁵⁰Vāha íyó ñīī, te núu ñīī ún na nāā jeē uhvuá, ¿te ndese nduu uhvuá tucu sáha ró? Núu súcuan te cuu ró ñayuu váha, nájñuhun íyó váha ñīī. Te na cóyūcu váha ró jíin jnāhan ró. Achí yá jíin de.

Siquí jeē ma stóo jnāhan tēe jíin ñahan

(Mt. 19.1-12; Lc. 16.18)

10 Te ni quenda ya ñuu Capernaum, te ni jinū yā región Judea, inga lado yūte Jordán, ichi nuū cáne niāndii. Te yūcuan ní cutútú tucu ñayuu nuū yā, te ni steén tucu ya jñuhun nuū i, nájñuhun sáha ya. ²Yūcuán na

te jecu tēe grupo fariseo ni quecoo de nuū yā, chí cáconi de coto ndee de ya núu ndese cahān yā. Te ni cacajñuhún de ya núu íyó ley jeē cuu ndusíin iin tēe jíin ñasihí de.

³Te ni cahān yā jíin de:

¿Na jniñu ni ndacu Moisés nuū rō nde jenahán?

⁴Te ni cacahān de:

Moisés ni jēhe de jñuhun jeē cúvāha iin acta jeē ndusíin de jíin ña, te ndōo ña, achí de.

⁵Te ni cahān Jesús jíin de:

Siquí jeē níhni ni rō jijnáhan ró, jeē yūcuan ní ndacu de jniñu yáha núu rō.

⁶Te nde xihna ñuhún, ná ni sáha Yaā Dios ndíhi, chí tēe jíin ñahan ni sáha ya. ⁷Jeē yūcuan cúu jeē stóo tēe tátá de náná de, te quijnáhan de jíin ñasihí de. ⁸Te iin na cuu ndindúú de, achí Yaā Dios. Núu súcuan te tuá cúu uū jnāhan de, chí iin na cúu. ⁹Jeē yūcuan tu íyó váha jeē stóo jnāhan, chí jeē ni squíjnāhan Yaā Dios cúu, achí yá.

¹⁰Te tēe cáscuáha ún nuū ni quívicoo de vehe, te ni cacajñuhún tucu de ya siquí jñuhun ún. ¹¹Te ni cahān yā jíin de:

Núu ndé tēe stóo de ñasihí de te condeca de inga ñahan, núu súcuan te cásiquí ndēe de ñasihí de. ¹²Te núu iin ñahan stóo ña yīi ña te condeca ña inga tēe, suni cásiquí ndēe ña de. Achí yá.

Jeē ni jícān tahú Jesús jehē sūchi lúli

(Mt. 19.13-15; Lc. 18.15-17)

¹³Yūcuán na te ni quecoo ñayuu jíin sūchi lúli, jēe na sóo yá ndaha ya xinī i. Te tēe cáscuáha jíin yá, ni cacahān de nuū ñayuu vējicoo jíin i. ¹⁴Te ni jito Jesús, te ni quitī ni yā, te ni cahān yā jíin de:

Cuāha jnūhun na quǵjicoo sūchi lúlí jíñā nuū rī, te ma cásí rō jeē quǵjicoo i. Chi ñayuu jeē ndió cóo ni i cani ni i nájñūhun sūchi yáha, suu i quǵvi ndaha Yaā andívi jeē ndacu ya jniñu nuū i. ¹⁵Te jendaá cahán rī jíñ rō, núu ñin ñayuu tú cuatáhú i jeē ndácu Yaā Dios jniñu nuū i, nájñūhun jétáhú ñin sūchi lúlí, ma quǵvi cuiti i ndaha ya, achí yá.

¹⁶Te ni munde de ya i, te ni soó yá ndaha ya xiní i, te ni jicān tahú yā jehē i jíñáhan i.

Jnūhun tēe cúaá

(Mt. 19.16-30; Lc. 18.18-30)

¹⁷Yūcuán na te ni quihin tucu ya ichi cuahān yā. Te jínu ñin tēe ni quee de, te ni jecuiñi yití de nuū yā, ni cajñūhún de ya:

Tēe vāha cúu ní Maestro. Te cachi ní, ¿na jniñu vāha sáha ná te nihin tahú na cotecu na ní cání andívi? achí de.

¹⁸Te ni cahān yā jíñ de:

¿Naun cáhán rō jeē tēe vāha cúu rí? Tú ni ñin tēe vāha íyó, chi máá ñin-ni Yaā Dios. ¹⁹Je jíni rō tācá jniñu ní ndacu Yaā Dios: Ma cosíquí ndéé jnáhan rō. Ma cáhni rō ndíyi. Ma sacuíhná rō. Ma sajnúhún rō. Ma stahú rō jnáhan rō. Cuatáhú rō nuū tatá rō nuū naná rō. Achí yá.

²⁰Te ni cahān tēe un jíñ yá:

Tācá jniñu yáha je ni squícu ná ndé ná lúlí ná, Maestro, achí de.

²¹Yūcuán na te ndáhú jíto ya nuū de jeē cúsiñi ni yā jíñ de. Te ni cahān yā:

Ñin na jniñu cúmaní sáha rō núu súcuán. Cuáhán te xico rō ndíhi jeē névāha rō, te cuāha rō núu ñayuu ndahú. Te nde andívi cuāha ya jeē

vāha ndasí núu rō. Yūcuán na te quiji rō condiquin rō ruhū, te cuāha rō jnūhun ndoho rō jnúndóho jeē siquí rī, achí yá.

²²Te ná ni jini sōho de jnūhun yáha, te ni jnahuhū ni de, te cúcuíhyá ni de cuahān de, chi cúcá ndasí de.

²³Yūcuán na te Jesús ni ndacoto ya ní xiin ya, te ni cahān yā jíñ tēe cáscuáha jíñ yá:

Tēe cúcá chi yōhyo yí quǵvicoo de ndaha Yaā Dios jeē ndacu ya jniñu nuū de, achí yá.

²⁴Te tēe cáscuáha jíñ yá, yōhyo ni canaa ni de jeē ní cajini de jnūhun ni cahān yā. Te ni cahān tucu ya jíñ de:

Séhē, ñayuu ténuū xūhún, yōhyo yí quǵvicoo i ndaha Yaā Dios jeē ndacu ya jniñu nuū i. ²⁵Yachí gā yāha ñin camello yaū yutícuí, vēsú jeē quǵvi ñin ñayuu cucá ndaha Yaā Dios jeē ndacu ya jniñu nuū i, achí yá.

²⁶Te víhyá gā ni canaa ni de cájini de, te ni cacajñūhun jnáhan de:

¿Ndé ñayuu cúu jeē cácu núu súcuán?

²⁷Te ni ndacoto ya nuū de, te ni cahān yā:

Ñayuu chi ma cúu squǵvi i máá i ndaha Yaā Dios, te máá yá chi cuu sáha ya, chi ndíhi-ni jniñu cuu sáha ya, achí yá.

²⁸Yūcuán na te ni cahān Pedro jíñ yá:

Sāna jíñáhan ná, ní castoo ná ndíhi jeē cánevāha ná, te cándiquin na níhín, achí de.

²⁹Te ni cahān Jesús:

Jendaá cahán rí jíñ rō jíñáhan rō, núu na-ni ñayuu stoo i vehe, chí

ñani, chí cuáha, chí tátá, chí náná, chí ñasihí, chí séhe, chí ñuhun, jeē siquí ruhū jíin siquí jeē scáca i jñuhun jeē jnáma ri ñayuu, ³⁰núu súcuan te nanihīn i iin ciento gā jeē súcuan vijna, cúu vehe, cúu ñani, cúu cuāha, cúu náná, cúu séhe, cúu ñuhun, te nde jíin jéē cóto xeēn ñayuu i. Te nde inga vida quiji te cotecu i níí cáni. ³¹Te cuehē ñayuu jeē vijna cácujeñnu, nduu i ñayuu núu ga. Te ñayuu jeē núu ga vijna, chi ndujéñnu i, áchí yá.

Jeē ni cahān tucu ya jeē cúu yā

(Mt. 20.17-19; Lc. 18.31-34)

³²Te cáñuhun de ichi jeē cáa cuahān ñuu Jerusalén. Te Jesús yósnúu yá nuū tée cáscuáha ún. Te cánaa ni de ni cajini sōho de jñuhun ni cahān yā. Te cáyūhú de cuángoo de jíin yá. Yūcuán na te ni cana sñin tucu ya ndihúxí uū tēe cáscuáha, te ni quejéé yá cástūhún tucu ya nuū de tāca jéē quíji siquí yā. ³³Achí yá:

Cuni sōho ró, chi je cuángoo yó ñuu Jerusalén vijna, te yūcuán nastúu ñayuu ruhū, Yaā ní nduu tēe, nuū sutú cácujeñnu jíin núu tēe cástéén tutu ley. Te ndonda de siquí ri jeē cúu rī, te squívi de ruhū nuū tēe nación Roma jeē cáyūcú Jerusalén cándacu jniñu. ³⁴Te tāca tēe un sácata de nuū rī, te cani de ruhū, te tesihí de nuū rī, te sáá te cahni de ruhū. Te nuū uní quívī te natecu rī, achí yá.

Jeē ni jícān Jacobo jíin Juan iin favor nuū yā

(Mt. 20.20-28)

³⁵Yūcuán na te Jacobo jíin Juan, ndindúu séhe Zebedeo, ni quecoo de nuū Jesús, te ni cacahān de:

Maestro, cácuni na jéē sáha ní iin jeē cacán na núu ní, áchí de.

³⁶Te ni cahān yā jíin de:

¿Ndese cácuni rō jeē sáha ri jíin rō? achí yá.

³⁷Te ni cacahān de:

Cuāha ní jñuhun jeē cónēne ná xiin ní quívi ndujéñnu ní, iin ná lado váha ní, te inga ná lado jecó ní, áchí de.

³⁸Yūcuán na te ni cahān Jesús jíin de:

Tu cájini rō na vé cúu jeē cájicān rō. ¿A cuu ndoho ró jnúndóho nájñuhun jeē quíji siquí rī? ¿Te á canda ró ndoho xeēn rō nájñuhun ndoho rī? achí yá.

³⁹Te ni cacahān de:

Cuu sáha ná.

Te ni cahān yā jíin de:

Jendaá jeē ndoho ró jnúndóho nájñuhun jeē quíji siquí rī, te ndoho xeēn rō nájñuhun ndoho rī. ⁴⁰Te jeē cónēne ró lado váha ri jíin lado jecó rī, nasūu rúhū cúu jeē cuáha jñuhun. Chi je íyó túhva cuu tāca tēe jeē ní nacāji Tátá rī, te tēe un níhīn, achí yá.

⁴¹Te uxí gā tēe cáscuáha un, ní cajini de jñuhun yáha, te ni caquiti ni de nuū Jacobo jíin Juan. ⁴²Te Jesús ni cana ya de, te ni cahān yā jíin de:

Cájini rō ndese cása ha tēe cácujeñnu nuū ñayuu tāca nación. Chi cándacu níhīn de jniñu nuū i, te máá de cáchí ndese coo. ⁴³Te máá ró jijnáhan ró, chi ma sáha ró súcuan. Chi núu ndé iin ró cúní cujeñnu, sa suhva cuajniñu ró núu jnánhan ró. ⁴⁴Te núu ndé iin ró cúní cuu nuū, sa suhva sáha ró máá ró mozo nuū tāca jnánhan ró. ⁴⁵Chi

suní súcuan sáha ruhū, Yaā ní nduu tēe, chí nasūu jeē vēji ri jeē cuajníñu ñayuu nuū rī, chí sa suhva vēji ri jeē cuajníñu ri nuū ñayuu. Te cuāha ri maá rí cuu rī návāha jnama ri cuehē ñayuu, achí yá.

**Jeē ní nasávāha ya Bartimeo tēe
cuáá**

(Mt. 20.29-34; Lc. 18.35-43)

⁴⁶Yūcuán na te ni jinū yā ñuu Jericó jíin tēe cáscuáha jíin yá. Te sáá te ni quenda ya yūcuan jíin de jíin ñayuu cuehē ndasí. Te Bartimeo tēe cuáá, sēhe Timeo, néne de yuhíchi, jícan de caridad. ⁴⁷Te ni jini de njūhun jeē Jesús ñuu Nazaret vēji ya. Te ni quejéé de cána jee de:

Jesús Sēhe yucūn David, cundáhú ni ni sáña, achí de.

⁴⁸Te cuehē ñayuu ni cacahān i nuū de jeē na cásí de yuhu de. Te máá de víhyá gā ni cana jee de:

Máá ní jeē cúu ní Séhe yucūn David, cundáhú ni ni sáña víi, achí de.

⁴⁹Yūcuán na te ni jecuiñī Jesús, te ni cahān yā:

Cana de na quíji de.

Te ni cacana i tēe cuáá un:

Ndeyí coo ni rō. Ndocuiñī, na quíhín yō, chí cána ya rohó, achí i jíin de.

⁵⁰Yūcuán na te ni scāne de ticāchí de, te yachī ni ndocuiñī de, te ni jinū de nuū Jesús. ⁵¹Te ni cahān yā jíin de:

¿Na vé cuní rō jeē sáha ri jíin ró?

Te máá de ni cahān de:

Maestro, jeē na ndúndijin tinūu ná cuní na, achí de.

⁵²Te ni cahān Jesús jíin de:

Cuáhán núu súcuan. Ni candíje ró jeē cuu nasávāha ri rohó, te jeē yúcuán ní nduvāha ró, achí yá.

Te ni ndundijin-ni tinūu de, te ni ndiquín de Jesús cuahān de jíin yá ichi ún.

Jeē ni quívi Jesús ñuu Jerusalén

(Mt. 21.1-11; Lc. 19.28-40; Jn. 12.12-19)

11 Te ni cuyajni ya ñuu Jerusalén, vēji ya ñuu Betfagé jíin ñuu Betania, jeē íne jehē yucu Olivos. Te ni tají yá uū tēe cáscuáha jíin yá jeē quíngoo de. ²Te achí yá jíin de:

Cuángoo ñuu lulí íne ichi núu. Te núu ni quívi-ni ró yúcuán, te nihīn rō ñin burro núhni tī, jeē ní ñin tēe ná tu coso de tī. Te ndají ró tī, quíjicoo ró jíin tī. ³Te núu ndé ñin cajnúhún naun cándají ró tī, te cachi rō: Máá Jítóho yō jíni ñúhún yá tī, te yachī natají yá tī ndiji tī, achí rō. Achí yá jíin de.

⁴Te cuangoo de, te ni canihīn de burro un núhni tī yehyí núu quéhe nuū náquijnáhan ichi. Te ni candají de tī. ⁵Te sava ñayuu cáhiin yúcuán ní cacahān jíin de:

¿Na vé cúu jeē casáha ró jeē cándají ró burro jíñā? achí i.

⁶Yūcuán na te ni cacahān de nájnūhun ni cachi Jesús. Te ni casiáá i tī vējicoo de jíin tī. ⁷Te ni ndecoo de jíin tī nuū Jesús, te ni casoó de sahma de siquī tī, te ni jecosō yā tī. ⁸Te cuehē ñayuu ni cascáá i sahma i ini ichi. Te sava ga i ni cajehnde i ndaha ñúu, te ni cachucun i ini ichi ún.

⁹Te ñayuu cuangoo ichi núu jíin ñayuu cuangoo ichi yátá, cácana jee i:

Yōhyo cújéhnu ya. Yōhyo vāha Yaā cúu Yaā jeē véji jíin jniñu máá Jítóho yō Yaā Dios. ¹⁰Te yōhyo luu coo, chi je yajni ndacu ya jniñu nájnūhun ni ndacu jíi yō rey David. Te yōhyo cújéhnu máá Yaā Dios. Achí i.

¹¹Te ni quiví Jesús ñuu Jerusalén, jíin ini templo cáhnu. Te ni jito ya nuū tācá ndajniñu yúcu níi yúcuan. Te ni quenda ya cuahān yā ñuu Betania jíin ndihúxí uū de, chi je ni ini.

Jeē ni cáhān yā nuū yújnu higo

(Mt. 21.18-19)

¹²Te inga quiví ún, nuū ní quenda ya ñuu Betania cuahān yā jíin de, te jíi yā sōco. ¹³Te nde jicá ni jito ya ñin nundēhe higo jeē íin ndaha. Te ni jecondēhe yá núu sanaa te nihīn yā ndehē caji yā. Te tú na vé ni níhīn yā, chí máá ndaha-ni íin. Chí nasūu tiempo ndehē cúu. ¹⁴Yūcuán na te ni cahān yā nuū yujnu ún:

Tuá na ndehē cuun cuítí xiní rō jeē caji ñayuu, achí yá.

Te tēe cáscuáha jíin yá ni cajini de jeē súcuan ni cahān yā.

Jeē ní quenehen ya ñayuu ini templo

(Mt. 21.12-17; Lc. 19.45-48; Jn. 2.13-22)

¹⁵Te ni najinū yā jíin de ñuu Jerusalén. Te ni quiví ya ini templo cáhnu, te ni quenehen ya ñayuu cájeen quití te cánaxico núu ñayuu jeē socó i. Te ni scotúú ndeyí ya tāca mesa tēe cástáyí xūhún, jíin silla tēe cáxicó paloma. ¹⁶Te tu ní jéhe ya jnūhun jeē yáha ñayuu ini templo jíin ndajniñu ndíso i. ¹⁷Te ni steén yá jnūhun nuū i, achí yá:

Yósó núu tútu íi jeē cahán Yaā Dios: Vehe ri chí vehe nuū cájicān

tahú ñayuu tācá nación cúu, achí yá. Te máá rō jíināhan rō chí nájnūhun yaū cava ñacuihna ní canasáha rō, achí yá.

¹⁸Te tēe cástéén tutu ley Yaā Dios jíin sūtū cácujeñnu, ni cajini de jnūhun yáha, te ni quejéé de cánducú de modo ndese cahni de ya. Chí cáyūhú de jeē ndujéhnu ga maá yá vēsú maá de, chí tāca ñayuu yōhyo cácusíi ni i cájini i jnūhun stéén yā. ¹⁹Te jeē cuácuaa, te ni quenda ya ñuu Jerusalén cuahān yā.

Jeē ni íchī nundēhe higo

(Mt. 21.20-22)

²⁰Te jenēhen inga quiví ni nayāha ya jíin de cuahān yā. Te ni cajito de jeē nundēhe higo un je ni ichí nde yoho. ²¹Yūcuán na te ni nucūhun ni Pedro, te ni cahān de jíin yá:

Maestro, cundēhe ní nundēhe higo jeē ni cáhān ni núu, te vijna je ni ichí caján, achí de.

²²Te ni cahān Jesús jíin de:

Candíje rō jéé sáha Yaā Dios jeē jicán rō. ²³Chí jendaá cahán rí jíin rō, núu ndé ñayuu cahān i jeē cújiyo yucu yáha quihīn nde nuū mar, te núu tú nacani siquí ni i, chí sa suhva candíje i jeē cóo nájnūhun ni cahān i, yūcuán na te cundaā jeē ni jíicān i. ²⁴Jeē yúcuan cáhān rí jíin rō, tāca jéé cacán tahú rō, te núu candíje rō jéé nihín rō, te nihín rō. ²⁵Te jeē cájicān tahú rō, te cone cáhnu ni rō nuū ñayuu casáha cuēchi siquí rō, návāha máá Tátá rō jeē ndeé yá andiví, suni cone cáhnu ni yā nuū cuéchi rō. ²⁶Chí núu tú cone cáhnu ni rō nuū jnáhan rō, te suni máá Tátá rō jeē ndeé yá andiví,

ma cóne cáhnu ni yā nuū cuéchi ró, áchí yá.

Siquī jeē ndíso jniñu Jesús

(Mt. 21.23-27; Lc. 20.1-8)

²⁷Yūcuán na te ni najinū tucu ya ñuu Jerusalén. Te jíca cuu ya ini templo cáhnu. Te sutū cácujeñhu jíin tée cástéén tutu ley Yaā Dios jíin tée jéñhu cándacu jniñu, ni quecoo de nuū yā. ²⁸Te ni cacajnūhún de ya:

¿Ndé ní nihīn jniñu ró jéē sáha ró jniñu yáha? ¿Te ndé ñin ni tee jniñu siquī rō jeē sáha ró súcuan? áchí de.

²⁹Te ni cahān Jesús:

Suni ruhū, cajñūhun rí rohó ñin jñūhun jíjnáhan ró. Te núu cuu stífo cuñí rō, yūcuán na te cachi rí nuū rō ndé ní nihīn jniñu ri jeē sáha ri jniñu yáha. ³⁰¿Ndé ñin ni tee jniñu siquī Juan jeē ni scuándute de? ¿A Yaā Dios chí táca tée? Cachi nuū rí, áchí yá.

³¹Yūcuán na te ni candajnūhun máá de:

Núu cahān yō jeē Yaā Dios ni tee ya jniñu un síquī Juan, te cahān de jíin yó: Núu súcuan ¿te najehē tu ní cácañdije ró de? ³²Te núu cahān yō jeē ñáyuu ni catee jniñu un síquī de, te quitī ni ñáyuu nuū yō, áchí de cácahān maá de.

Chi cáyūhú de jeē quitī ni ñáyuu, chi ndívii i cácañdije i jeē tée ni nacani jñūhun Yaā Dios ni cuu ndije Juan. ³³Jeē yúcuan ní cacahān de jíin yá:

Tu cájini rí, áchí de.

Yūcuán na te ni cahān Jesús:

Ni ruhū, suni ma cáchi rí nuū rō ndé ñin ni tee jniñu siquī rí sáha ri jniñu yáha, áchí yá.

Jñūhun yátá síquī tēē néé cásjáñiñu nuū uva

(Mt. 21.33-46; Lc. 20.9-19)

12 Te ni quejéé yá cahān yā jñūhun yátá jíin de jíjnáhan de:

Ñin tēē ni nachuhun de cuehē uva, te ni jesi de corral, te ni sáha de ñin nuū cúhun ndehē un táxin. Te ni sáha de ñin vehe súcún návāha cuu coto de níí cáhnu.

Te ni stóo de nuū sava tēē sáñiñu nuū, te cuu sava de ndehē jíin. Te ni tee de ichi cuahān jíca de. ²Te máá tiempo ndutútú uva, te ni tají de ñin mozo de cuanuquihin sava uva nuū tēē cásjáñiñu ún. ³Te tēē un ní cajñi de mozo un, te ni cacani de i, te ni canatajái de i cuanuhun i súcuan-ni. ⁴Yūcuán na te tēē chíí uva un ní tají tucu de ñinga mozo cuahān. Te tēē cásjáñiñu un ní cajēhe de yuū xiní mozo un, te ni castújí de, te ni cacahān ndevāha de nuū. ⁵Te tēē chíí uva ni tají tucu de ñinga mozo cuahān. Te ni cajehni de i. Te suni súcuan ni tají de cuehē gā mozo cuahān, te sava i ni cacani de, te sava i ni cajehni de.

⁶Te tēē chíí uva, íyó ñin sēhe de jeē maní ndasí de jíin. Te jeē sándihí na ni tají de sēhe de un cuahān nuū tēē cásjáñiñu. Te jéni ni de: Tēē ún chi cuatáhú de jíjnáhan de nuū sēhe ri. ⁷Te tēē cásjáñiñu un ní cacahān maá: Tēē chíí táhū cúu jeē yáha. Na cáhni yō de, te ndōo tahū de cuu máá yó, áchí. ⁸Te ni cajñi de i, ni cajehni de i, te ni cascāne de i ñinga lado. Achí yá.

⁹Yūcuán na te ni cajñūhun yá de:

Núu súcuan ¿te ndese sáha tēē chíí uva un? Ndiji de te cahni

de tēe cásajniñu ún, te cuāha de ñuhun cáa uva un núu inga sava tēe sájniñu nuū.

¹⁰¿Te á ná tu cahu ró jnúhun yáha jéē yosó núu tútu iī, jeē ruhū cúu nájnūhun iin yuū? Chi áchí tutu:

Yuū jeē ní casquéhichī tēe cájeni vehe,
yuū yáha nduu jeē quítuu vehe.

¹¹Máá Jítóho yō Yaā Dios ni sáha ya súcuan,
te cánaa ni yō jíto yó jniñu yáha. Achí tutu, achí yá.

¹²Yūcuán na te ni canducú de modo jniī de ya. Chi ni cajecūhun ni de jeē siquī maá de cúu jnúhun yátá ní cahān yā siquī tēe cásajniñu nuū uva jíin tēe cájeni vehe. Te siquī jeē cáyūhú de jeē quitī ni ñayuu, te ni castóo de ya te cuangoo de.

Siquī xúhun renta

(Mt. 22.15-22; Lc. 20.20-26)

¹³Yūcuán na te ni catajī de sava tēe grupo fariseo jíin tēe grupo Herodes cuangoo de nuū yā, ndúcú de ndese sáha de návāha cahān yā iin jnúhun jeē nihín de cuēchi siquī yā. ¹⁴Te ni quecoo de, te ni cacahān de jíin yá:

Maestro, cájini na jéē tēe cáhan ndaā cúu ní, te tu yúhú ní jeē cahān ni iin ñayuu siquī ní. Chi tu sáha ní cuenta ndese cúu iin iin i, chi inuú-ni sáha ní jíin i. Te stéén ndaā ní ndese squícu ñayuu nuū Yaā Dios. ¿Te á íyó váha jeē chúnaa yō renta nuū rey nación Roma jeē jniī nación yō, chí tuú? ¿A chúnaa yō, chí má chúnaa yō? Achí de jíin yá.

¹⁵Te máá yá jíin yā jeē stahú-ni de, te ni cahān yā jíin de:

¿Najehē cájito ndee rō ruhū?

Cuāha iin xūhún na cóto ri, achí yá.

¹⁶Te ni cajēhe de xūhún. Te ni jito ya, te ni cajnúhun yá de:

¿Ndé iin nuū cúu jeē ndeé nuū xúhun yáha, te ndé síhví cúu jeē ndeé yāhá?

Te ni cacahān de jíin yá:

Nuū jíin síhví rey un cúu, achí de.

¹⁷Yūcuán na te ni cahān yā jíin de:

Núu súcuan te nacuāha ró núu rey un jéē yíhi cuenta nuū de, te nacuāha ró núu Yaā Dios tāca jéē yíhi cuenta nuū maá yá, achí yá.

Te ni canaa ni de ni cajini de jeē ndichí ní cahān yā.

Jeē ní cacajnúhún de siquī jeē nátecu ndíyi

(Mt. 22.23-33; Lc. 20.27-40)

¹⁸Yūcuán na te jecu tēe grupo saduceo ni quecoo de nuū yā. Te tēe un cácahān jeē tu nátecu cuiti ndíyi. Te ni cacahān de jíin yá siquī iin jnúhun, achí de:

¹⁹Maestro, Moisés ni tee de nuū tútu jeē cánevāha yó: Núu iin tēe cuu de, te ndōo ñasihí de, te núu tu ní íyo sēhe de jíin ña, núu súcuan te cánuú jeē ñani de naquihin ñasihí de, te sēhe de jeē cácu jíin ña nucuñi i nuū ndíyi ñani de, achí tutu. ²⁰Núu súcuan te ni íyo uxā ñani. Te tēe núu ní quijnāhan de jíin ñahan. Te ni jihī de, te tú sēhe de ní íyo. ²¹Te tēe uū ni naquihin de ña, te suni ni jihī de, te tú sēhe de ní íyo. Te suni súcuan tēe unī. ²²Te ndíhúxá de ni condeca de ña, te ni iin de tú sēhe de ní íyo. Te jeē sándihí te suni ni jihī ñahan ún. ²³Núu súcuan te núu na nátecu de

jíjnáhan de quivī nátecu ndīyi, ¿te ndé iin de cuu ña ñasihí de? Chi ndihúxá de ni condeca de ña. Achí de jíin yá.

²⁴Yūcuán na te ni cahān yā jíin de:

Yōhyo cástívi ró jnūhun siquī jeē tu cájecūhun ni rō jeē cahán tutu iī, ni tu cájini rō jeē iyó poder Yaā Dios jeē nastécu yā ndīyi. ²⁵Chi quivī nátecu ndīyi, te tuá na jnūhun quijnáhan tēe jíin ñahan coo. Chi coo i nájnūhun ndajéhé Yaā Dios andíví. ²⁶Te siquī jeē nátecu ndīyi, ¿á tu ní cácahu ró tutu ní tee Moisés, ndese ni cahān Yaā Dios jíin de mēhñu yúcū jeē cayú yáñuhūn? Máá rí cúu Yaā Dios Abraham jíin Isaac jíin Jacob, achí yá jíin Moisés. ²⁷Chi vēsú je ni cajihí de, te cátecu de nuū iyó máá yá, chi cúu ya Yaā sáha jeē técu ñayuu ní cáni. Yōhyo cástívi ró jnūhun núu sūcuan. Achí yá jíin de.

**Jniñu cánuú ndasí gá jeē ní ndacu
Yaā Dios**

(Mt. 22.34-40)

²⁸Te ni quee iin tēe stéén tutu ley Yaā Dios, te ni jini de jeē castíhí jnáhan tēe un jíin Jesús. Te ni jini de jeē váha ni nastió cuñí yā jnūhun. Te ni cajnūhún de ya:

¿Nde iin cúu jnūhun ndácu jniñu cánuú ndasí gá nuū táca gá jniñu ni ndacu ya jenahán? áhí de.

²⁹Te ni cahān Jesús jíin de:

Yáha cúu jniñu jeē cánuú ndasí gá nuū táca gá. Achí tutu: Ñayuu Israel, cuni nahín ró. Máá Jítoho yō Yaā Dios, maá iin-ni ya iyó. ³⁰Núu sūcuan te coo maní ndasí ró jíin máá Jítoho rō Yaā Dios, nde jnáá

ndasí ró sáha ró ndihi jeē cúsiī ni yā, nde jíin ini jíin ánuá rō, jíin ní jeē níjnūní rō, jíin ní fuerza rō. Yáha cúu jniñu ndácu ya jeē cánuú ndasí gá. ³¹Te jniñu uū jeē ní ndacu ya, suni sūcuan cáhán: Cundáhú ni rō jnáhan ró nájnūhun cundáhú ni rō maá ró. Tuá inga jnūhun ndácu jniñu cánuú gá iyó, chi suu máá jéē yáha-ni. Achí yá jíin de.

³²Yūcuán na te ni cahān tēe stéén tutu ley jíin yá:

Váha ni cahān ní, Maestro. Chi ndaā chi iyó iin-ni Yaā Dios, te tuá na inga yā iyó. ³³Te cánuú jéē coo maní ndasí yó jíin yá nde jíin ini jíin ánuá yō, jíin ní jeē níjnūní yō, jíin ní fuerza yō, te cundáhú ni yō jnáhan yó nájnūhun cundáhú ni yō maá yó. Te cánuú ndasí gá jeē yáha vēsú jeē cáhmu yó quiti jíin táca gá jeē socó yō nuū yā. Achí de jíin yá.

³⁴Yūcuán na te ni jini Jesús jeē váha ni stió cuñí de, te ni cahān yā jíin de:

Je yajni cuu quívi ró ndaha Yaā Dios jeē ndacu ya jniñu nuū rō, achí yá.

Yūcuán na te ni iin ga de, tuá ni chūndeyí ni de cajnūhún de ya.

Siquī jeē cúu Cristo sēhe yucūn David

(Mt. 22.41-46; Lc. 20.41-44)

³⁵Te stéén Jesús jnūhun ini templo, te ni cahān yā:

¿Nde se cúu jeē cácahān tēe cástéén tutu ley Yaā Dios jeē Cristo cúu sēhe yucūn David? ³⁶Chi máá David suhva ni cahān de jnūhun ya ni sáha Espíritu Santo nde jenahán:

Máá Jítoho yō Yaā Dios ni cahān yā jíin Jítoho rí, Yaā quiji:

Cucōo ró lado váha ri nuū
 kujéhnú ró,
 te na sáha ri jeē quende rō
 poder tāca jēē cájito uhū rohó.
 Achí Yaā Dios. Achí David. ³⁷Te núu
 sēhe yucūn David cúu Cristo, ¿te
 ndese cúu jeē ni cáhān de jeē Jítóho
 de cúu ya? áhí yá.

Te ñayuu cuehē, cánujnahan ni i
 cájini nahín i tāca jnúhun cáhān yā.

Jeē ni cáhān yā jeē iyó cuéchi de jíjnāhan de

(Mt. 23.1-36; Lc. 11.37-54; 20.45-47)

³⁸Te stéén yā jnúhun, te ni cahān
 yā jíin i:

Coto má candíje ró táca tée
 cástéén tutu ley. Chi cácusī ni de
 cáñuhun de sahma cáni jeē steén
 jeē kujéhnú de, cájica cuu de jíin.
 Te cánujnahan ni de jeē cahān
 yiñúhún ñayuu jíin de ini calle.
³⁹Te cánujnahan ni de cucōo de
 nuū silla yiñúhún gá ini vehe i
 sinagoga, jíin silla yiñúhún gá nuū
 víco cáyeji ñayuu. ⁴⁰Te cáquende de
 vehe ñahan ní caquendōo ndáhú. Te
 nahán cájicān tahu de návāha cani
 ni ñayuu jeē tú na cuéchi de. Tēe
 yáha jíjnāhan de chi xeēn gā ndoho
 de castigo. Achí yá.

Jeē ni sócō ñahan viuda xūhún

(Lc. 21.1-4)

⁴¹Te iin quivī néne Jesús ini
 templo ichi núu tāca yéjnū nuū
 casocō i xūhún. Te jító ya ndese
 cáchuhun ñayuu xūhún ini yejnū
 ún. Te cuehē ñayuu cucá ní
 cachuhun i cuehē xūhún. ⁴²Te ni
 quee iin ñahan viuda jeē ndóho
 ndáhú. Te ni chuhun ña uū centavo
 lulí ini yejnū ún. ⁴³Yūcuán na te ni

cana ya tēe cáscuáha jíin yá, te ni
 cahān yā jíin de:

Jendaá cahān rī jíin ró jeē cuehē
 gā cúu jeē ni sócō ñahan viuda
 ndahú yáha, vēsú jeē ní casocō tāca
 ñayuu cucá. ⁴⁴Chi tācá i ni casocō i
 jeē ni ndóo siquī xúhun cuéhē i. Te
 ñahan yáha, vēsú ndahú ndóho ña,
 te ni chuhun ndihi ña jeē cótecu ña.
 Achí yá jíin de.

Jeē ní cachi yā jeē nāa templo

(Mt. 24.1-2; Lc. 21.5-6)

13 Te ni quenda Jesús ini
 templo cáhnu, te iin tēe
 scuáha jíin yá ni cahān de:

Maestro, condēhe ní ná luu jító
 tācá vehe yáha jēē cúu templo, jíin
 tāca yūū jeē ní cuvāha, áhí de.

²Te ni cahān yā jíin de:

Tācá vehe náhnu yāha jēē cájito
 ró, chi ma cóso jnāhan ga ni iin
 yūū, chi ndihi jnanū. Achí yá.

Na seña coo nuū cuacuyajni ndihi ñayiví

(Mt. 24.3-28; Lc. 21.7-24; 17.22-24)

³Te ni jehēn yā jíin de yucu
 Olivos jeē íne ichi núu templo
 cáhnu. Te ni cucōo ya yūcuán. Te
 Pedro jíin Jacobo jíin Juan jíin
 Andrés ni cacajnúhun sīn de ya:

⁴Castūhun ní nuū ná, ¿ndé quivī
 coo tāca jēē ní cachi ní jēē coo? ¿Te
 na seña coo núu cuacuyajni squícu
 tāca jēē ni cáhān ní? áhí de.

⁵Te ni cahān yā jíin de:

Coto ró jēē ma stahú ni iin de róhó.
⁶Chi quijicoo cuehē tēe jeē stahú jíin
 síhví rí. Máá rí cúu Cristo, achi de.
 Te súcuán stáhú de cuehē ñayuu.

⁷Te nihín rō jnúhun jeē tāca
 lado iyó guerra, chí je yajni coo

guerra. Te ma yūhu ró, chi cánuú coo súcuan. Te ni ná tu jinū quivī ndíhi ñayiví. ⁸Chi ndonda nación siquī inga nación, te ndonda ñuu siquī inga ñuu jeē cuajnáhan. Te cháha chúcuan jnáa, te coo jnamā, te ndonda ñayuu siquī jnáhan i. Te tāca jéē yáha cácuu jnūndóho quejéé xíhna ñúhún gá.

⁹Te condito ró máá ró, chi nastúu i róhó núu tāca tóhō, te ini tācá vehe ii sinagoga caní i róhō. Te quindecia i sava ró núu tācá gobernador jíin núu tāca rey, te cahān i cuēchi siquī rō siquī jeē cácañdije ró rúhū. Te súcuan te cuu nacani ró jnúhun ri nuū de.

¹⁰Te jíni ñúhún jéē xíhna gā cuitē núu jnúhun nuū tācá nación ndese jnáma ri i, te sáá te ndíhi quivī.

¹¹Te núu ni cajñii de róhó cuángoo de jíin ró nuū tāca tóhō, te ma nácani ni rō xíhna gā ndese stíó cuíñí rō nuū de te cācu ró. Chi máá hora un te máá Yaā Dios cuāha ya jnúhun nuū rō ndese cahān rō, te jnúhun ún cahān rō. Chi nasūu máá ró cúu jeē cahān, chi Espiritu Santo cúu jeē cahān. ¹²Te ñani jíin ñani nastúu jnáhan jeē na cúu. Te tátá nastúu sēhe jeē cúu. Te sēhe ndonda siquī tatá jíin náná jeē cahni. ¹³Te tāca ñáyuu quitī ni i nuū rō jeē siquí ruhū. Te ñayuu cuiñi nihin jíin jnúhun ri nde quivī jínu, chi cācu i.

¹⁴Te Daniel, tēe ni nacani jnúhun Yaā Dios, ni tee de jnúhun iin tēe néé jéé quíji. Te róhó jéé cácahu tutu ún, na jécūhun ni rō. Chi iin quivī te cuni rō jeē sáha ndevāha de jeē stívi de tācá ndajñíñu ii ini templo, te cuiñi de nuū tú na ley

cuiñi de. Te núu cuni rō jeē súcuan cúu, te ñayuu cáyūcú región Judea, na cúnu i caa i yucu quingoo i. ¹⁵Te ñayuu cáyūcu núu quéhe, ma ndívi i ini vehe jeē quénehen i ndajñíñu i, chi cánuú cunu yachí i návāha cācu i. ¹⁶Te ñayuu cáhiin nuū ítu, ma ndíji i vehe jeē quíhlin i sahma i. ¹⁷Te quivī ún nacā jeē ndahú ñahan cáñuhun sēhe jíin ñahan cándeca yiquín, chi ma cúnihin ña cunu yachí ña. ¹⁸Te cacān tahú rō jeē ma quíji jnūndóho un jéé cunu ró máá tiempo cúun yuhvā. ¹⁹Chi jeē quejéé un te coo cuehē jnūndóho xeēn, jeē ná tu coo súcuan nde quivī ní sáha Yaā Dios ñayiví te nde vijna. Te jeē ndíhi jnūndóho ún te ni ma cóo ga jeē súcuan. ²⁰Te núu tú nastíyi máá Jítóho yō Yaā Dios tiempo jnūndóho ún, te ni iin ñayuu ma cácu cuiti i. Te jeē siquí ñáyuu cácañdije jeē ní nacāji ya, jeē yúcuu nastíyi ya tiempo un.

²¹Núu súcuan te núu iin ñayuu cahān jíin ró: Yāhá condēhe ró íne Cristo, chí: Yūcuán condēhe ró íne ya, achi i, te ma candije ró jéé cahán i. ²²Chi canecoo tēe cástáhú te cahān de jeē Cristo cúu de, chí cáhān de jeē tēe nácani jnúhun Yaā Dios cúu de. Te sáha de jniñu jéñu jeē naa ni ñayuu coto i, návāha stáhú de nde maá ñáyuu ní nacāji ya, te núu na cúu. ²³Te ndito na cóo ni rō, chi je ni castūhun rí nuū rō vijna nde ná tu coo.

Ndese coo quivī ndiji Yaā ní nduu tēe

(Mt. 24.29-35, 42-44; Lc. 21.25-36)

²⁴Te quivī ún, núu je ni ndíhi jnūndóho ún, te kujnúú nfándii, te

yoō ma ndíí gā. ²⁵Te ńngoo quĩmi ĩn andĩví. Te tāca jēē ĩn andĩví chi quĩsi i. ²⁶Yūcuán na te coto ñayuu nuū maá rí, Yaā ní nduu tēe, ndiji ri jíín vícō, te condiso ri cuehē poder, te yōhyo luu cujéhnu ri. ²⁷Yūcuán na te tají rí ndajéhé rí quinastútú yá ñayuu ní nacāji ri ndicúún lado ñayĩví, nde nuū ndíhi ñayĩví te nde nuū ndíhi andĩví.

²⁸Vijna te scuáha ró ndese sáha nundēhe higo: Núu je ni nane numa, te ni najee ndaha, te cájini rō jeē jé ni cuyajni tiempo jihní. ²⁹Te suni súcuan núu ni cajini rō jeē ní quejéé cúu tācá jniñu jeē ni cáhān rī, yūcuán na te na jécūhun ni rō jeē ní cuyajni quivĩ ndiji ri, te yachī coo. ³⁰Jendaá cahán rī jíín ró jeē ma cúu ndíhi ñayuu jeē cóto jnūndóho ún, chi nde squícū ndíhi jniñu ún. ³¹Andĩví jíín ñayĩví chi naa, te tāca jnúhun cáhān rī chi ma náā, chi ndíhi squícū.

³²Te quivĩ jíín hora jeē ndíji ri, tú ni ĩn ñayuu jíín, ni máá ndajéhé cáhiyo andĩví, ni máá rí, Sēhe Yaā Dios. Chi máá ĩn ni Tátá rī cúu jeē jíín.

³³Núu súcuan te na cócūhun ni rō tāca jnúhun yáha, te ndito na cóo ni rō, te cacān tahú rō, chi tu cájini rō na quivĩ ndiji ri. ³⁴Chi coo nájñūhun ĩn tēe jeē quihín jicá de, te nde ná tu quenda de vehe de, te ni ndacu de jniñu nuū tāca mozo de ndese sáha ĩn ĩn de. Te ni ndacu de jniñu nuū tēe ndíto yéhyí jēē na cóndito de. ³⁵Te suni súcuan rōhó jíjnáhan ró, ndito na cóo ni rō. Chi cúu ri nájñūhun jitohe vehe ún, te tu cájini rō na hora ndiji ri, á jēē cuácuaa, chí ñuú, chí jēē cána líhli,

chí jénéhen. ³⁶Chi ĩn sanaa-ni te ndiji ri, te coto ró jēē ma nánihín rī rohó jēē tu ndíto ró. ³⁷Te jñūhun cáhān rī jíín ró jíjnáhan ró, suni cáhān rī jíín ndivii ñayuu: Ndíto na cóo ni rō jíjnáhan ró. Achí yá.

Jeē ní casqujínáhan de jñūhun jeē jnií de Jesús

(Mt. 26.1-5; Lc. 22.1-2; Jn. 11.45-53)

14 Te cúmanī uū gā quivĩ te quejéé vico pascua jeē cáyeji ñayuu hebreo pan jeē tú na levadura yáhi. Te sutú cácujehnú jíín tēe cástéén tutu ley, ni canducú de modo ndese jnií de Jesús jíín jnúhun stáhú, te cahni de ya. ²Te ni cacahān de:

Ma jníí yó de máá quivĩ víco, chí ndonda ñayuu siquĩ yō, achí de.

Jnúhun ñahan jeē ní chuhun perfume xinī yā

(Mt. 26.6-13; Jn. 12.1-8)

³Te íne Jesús ñuu Betania vehe Simón, tēe ni ndoho cuehyĩ stehyú. Te níni yéji yā staa, te ni quee ĩn ñahan nuū yā, ndáhá ña ĩn frasco yuū luu jeē ñúhun aceite perfume, jeē máni ita nardo cúu, te yōhyo yahu ndéé. Te ni tahú ña frasco un, te ni chuhun ña xinī yā. ⁴Te sava tēe cáhiin yūcuan ní caquĩtĩ ni de, te ni cacahān de:

¿Najehē cúu jeē náā saá-ni perfume jíñā? ⁵Chi cuu xícó yahu yó víhyá gā unī ciento denario, te cuāha yo núú ñáyuu ndahú núú, áchí de.

Te ni cacahān sōo de jíín ña.

⁶Te ni cahān Jesús:

Ma stáhān rō ña. ¿Naun casáha ró jēē nácani uhū ni ña? Chi ĩn jniñu

váha cúu jeē ni sáha ña jíin rí. ⁷Chi níní coyūcu ñayuu ndahú jíin ró, te núu cácuñi rō te cuu sáha vāha ró jíin i. Te ruhū chi tuá condee rī jíin ró. ⁸Chi ni sáha ña ndihī jeē cuu sáha ña jeē maní ña jíin rí. Chi nde ná tu quindūji ri te je ni sātūhva ña ruhū jeē ní chuhun ña perfume ruhū. ⁹Jendaá cahán rī jíin ró jeē ní cáhnu ñayīvi ndé-ni cúu nuū cuité núu jnūhun jeē jnáma ri ñayuu, suni nacani i jnūhun jeē ni sáha ñahan yáha, návāha cocuhun ni ñayuu ña, áchí yá.

Jeē ní nastúu Judas yā

(Mt. 26.14-16; Lc. 22.3-6)

¹⁰Yūcuán na te Judas Iscariote, ñin jeē ndihúxí uū tēe cáscuáha un, ní jehēn de nuū sutú cácujeñnu, ni sándaā de jíin jēe nastúu de Jesús nuū jijnáhan. ¹¹Te nuū ní cajini sōho sutū un jēe cahán de, te ni cacusiñ ni, te ni cajejnūhun jeē cuáha xūhun núu de. Te nde quivī un ní nducú de modo ndese nastúu de ya.

Jeē ní jequin yā Cena yā

(Mt. 26.17-29; Lc. 22.7-23;

Jn. 13.21-30; 1 Co. 11.23-26)

¹²Te ni quee máá quivī jeē quejéé vico pascua jeē cáyeji ñayuu pan jeē tú na levadura yíhi, te suni quivī un cájehni i londe nájñūhun ni ndacu Yaā Dios jniñu jeē sáha i vico pascua un. Te tēe cáscuáha un ní cacajnūhún de ya:

¿Ndé nuū cuní ni jēe quisátūhva ná cuxíni ní vico pascua? achí de.

¹³Te ni tají yá uū tēe cáscuáha ún quingoo de, te áchí yá jíin de:

Cuángoo nde ñuu, te yūcuán najnáhan ró jíin ñin tēe ndíso quiyi

ndute. Te condiquin rō de quihin rō jíin de. ¹⁴Te vehe jeē ndívi de, yūcuán cáhān rō jíin tēe chíi vehe: Achí máá Maestro: ¿Ndé ñin cúu cuarto vehe ní cuáha núu ní núu cuxíni ya vico pascua jíin tēe cáscuáha jíin yá? achí rō. ¹⁵Te máá de stéén de ñin cuarto cáhnu nde xiní véhe jeē je íyó túhva. Te yūcuán sātūhva ró jēe cuxíni yó, áchí yá jíin de.

¹⁶Te cuangoo tēe cáscuáha ún, te ni jinūcoo de ñuu, te ni canihin de nájñūhun ni cahán yā jíin de. Te ni casátūhva de jeē cuxíni ya vico pascua.

¹⁷Te jeē cuácuaa, te ni quee ya jíin ndihúxí uū de. ¹⁸Te ni cacucōo de mesa cáyeji de staā, te ni cahán yā:

Jendaá cahán rī jíin ró jeē ñin rōhó jēe yéji jíin rí, nastúu ro rúhū, achí yá.

¹⁹Yūcuán na te ni cacucuíhyá ni de, te ná ñin ná ñin de ni cacajnūhún de ya:

¿A sáña cúu? áchí ñin de.

Te suni súcuán inga de:

¿A sáña cúu? áchí ñin ñin de.

²⁰Te ni cahán yā jíin de:

Ñin jeē uxí uū rō jeē cáyeji cáhnu jíin rí ñin cohō, suu nastúu ruhū.

²¹Te ruhū, Yaā ní nduu tēe, jendaá cúu jeē quihín rī cuu rī, nájñūhun yósó jnūhun ri nuū tútu ii. Te nacā xeēn ndoho tēe nastúu ruhū. Vāha ga núu tu ní cácu tēe un núu, áchí yá.

²²Te níní cáyeji de jíin yá, te ni quihin ya pan, te ni nacuatáhú yá, te ni tahú cuéchí yá, te ni jēhe ya nuū tēe cáscuáha jíin yá. Te ni cahán yā:

Caji rō jijnáhan ró, chi yāha cúu yiqui cúñu rī, achí yá.

²³Yūcuán na te ni quihin ya iin copa ndūxi uva, te ni nacuatáhu yá, te ni jēhe ya ni cajihi ndihi de. ²⁴Te ni cahān yā jín de:

Yāha cúu niñī rī jeē cuáha ri jeē cúu contrato jeé, te cati jeē ndundoo cuēchi cuehē ñayuu. ²⁵Te jendaá cahán rī jín ró jeē ndé vijna te ma cóho ga rī ndūxi ndehē uva yāhá, chi nde quiji quivī ndacu Yaā Dios jniñu nñí ñayiví, te sáa te coho tucu ri jín ró jijnáhan ró. Achí yá.

Jeē ní cachi yā jeē yūhu Pedro cahān de jeē jiní de ya

(Mt. 26.30-35; Lc. 22.31-34; Jn. 13.36-38)

²⁶Te ni jita ya iin yaa iī jín de jijnáhan de. Te ni quenda ya cuahān yā jín de nde yucu Olivos. ²⁷Yūcuán na te ni cahān yā:

Ndivii rō nayūhu ró jeē siquī ruhū jecuāā vijna. Chi suhva je yósó jnúhun ri nuū tútu iī, ni cahān Yaā Dios: Cuáha ri jnúhun jeē cáhni ñayuu tēe ndíto lanchi, te lanchi un cuítē núu tí jeē yūhu tí, achí. ²⁸Te jeē nátecu rī, te xihna ruhū cosnūu rí quihin rī región Galilea, te sáa te najinūcoo ró, achí yá.

²⁹Yūcuán na te ni cahān Pedro: Vēsú ndihi de na náyūhú de, te máá ná chi ma náyūhú cuítī ná, achí de jín yá.

³⁰Te ni cahān yā jín de:

Jendaá cahán rī jín ró jeē jecuāā vijna, nde ná tu cana líhli uū jínu, te yūhu ró jeē jniñí ñayuu rohó, te unī jínu cahān rō jeē tu jíní rō ruhū, achí yá.

³¹Te ni cahān teyí de jín yá:

Vēsú núu cuu na jín ní, te ma cahán cuítī na jéē tu jíní na níhín, achí de.

Te suni súcuan ni cacahān ndihi de.

Jeē ni jicān tahú yā nuū huerto Getsemaní

(Mt. 26.36-46; Lc. 22.39-46)

³²Yūcuán na te ni jinū Jesús jín tēe cáscuáha jín yá iin lugar nuū naní Getsemaní. Te ni cahān yā jín de:

Yāhá-ni cucōo ró, te na quíhín rī cacān tahú rī, achí yá.

³³Te ni jeca ya Pedro jín Jacobo jín Juan, cuahān yā jín de. Te ni quejéé yá cucuíhyá ndasí ni yā te cúxifí ni yā jeē quíji jnūndóho siquī yā. ³⁴Te ni cahān yā jín de:

Yōhyo cúcuíhyá ni rī, te ndúcú sáha jeē cúu rī. Yāhá condetu ró te condito ró, achí yá.

³⁵Te ni jica ya jecu gā, te ni jecuñī yití yá ni jequin ya nuū yā nuū ñúhun. Te ni jicān tahú yā nuū Yaā Dios jeē núu cuu te ma ndóho ya jnūndóho jeē quejéé quiji siquī yā. ³⁶Te suhva ni cahān yā:

Tátá maá ná, ndihi-ni jniñu cuu sáha máá ní. Te tejiyo ní jnūndóho yáha jéē ma quíji siquī ná. Te nasūu jéē cuní maá ná, chi jeē cuní maá ní na cóo, achí yá.

³⁷Te ni ndee yā nuū ndinúní tēe cáscuáha jín yá, te ni jito ya jeē cáquixí de. Te ni cahān yā jín Pedro:

Simón, ¿á quíxí rō? ¿A tu ní cánda ró condito ró jín rí vēsú iin hora? ³⁸Coo ndito ni rō te cacān tahú rō jeē chindéé ñáhán yá rohó jeē ma sáha ró cuéchi jeē coto ndee jeneé róhó. Chi cuní ndije ánuá rō squícu vāha ró, te yiqui cúñu rō chi tu fuerza, achí yá.

³⁹Te ni jehēn tucu ya, ni jicān tahú yā, te suni jnūhun yúcuan ní cahān yā. ⁴⁰Te ni ndee ya nuū de, te ni jito ya jeē cáquixī tucu de, chi yōhyo cājii de māhná. Te tuá ni cánihīn de jnūhun stíó cuíñí de nuū yā. ⁴¹Te ni ndee yā jeē vuelta unī, te ni cahān yā jíin de:

Vijna te cusū rō te ndetātu rō. Te tuú chi je ni cuu, chi je ni quee hora, te ruhū, Yaā ní nduu tēe, natūu ri te jniī tēe cáhiyo cuēchi ruhū. ⁴²Ndocuiñī jijnáhan rō, chi je vēji tēe nastúu ruhū, te quihīn yō jíin de. Achí yá.

Jeē ní cajniī de Jesús

(Mt. 26.47-56; Lc. 22.47-53; Jn. 18.2-11)

⁴³Te sá cáhán gā yā súcuan, te ni quee-ni Judas, iin jnáhan jeē uxí uū tēe cáscuáha jíin yá. Te vējicoo cuehē tēe jíin de, cándaha de espada jíin yujnu. Chi sutū cácujeñnu jíin tēe cástéén tutu ley jíin tēe jéñnu cándacu jniñu, ni catají de tēe ún. ⁴⁴Te Judas, tēe nástúu ya ún, je ni jēhe de iin seña nuū tēe un jíjnáhan, chi ni cachi de:

Tēe jeē téchūhu rí un cúu. Te jniī rō jíjnáhan rō quihīn rō jíin, te ma siaá cuiti rō, achí de.

⁴⁵Te ni quee de nde nuū Jesús, te ni cahān de jíin yá:

Maestro, Maestro, achí de.

Te ni techūhú de ya. ⁴⁶Te tāca gá tēe un ní cajniī de ya, te cuango de jíin yá.

⁴⁷Te iin tēe íne jíin yá ni tava de espada de, te ni jehnde de sōho iin mozo maá sūtū cujeñnu ga. ⁴⁸Te ni cahān Jesús jíin ñáyyu cuehē ún:

¿Te va tēe cuíhná cúu ri jeē véjicoo rō jíin espada jíin yujnu jniī

ró rúhū jeē súcuan? ⁴⁹Tāca quívī ni ine ri jíin ró jijnáhan ró ini templo cáhnu, ni steén rī jnūhun, te tu ní cājniī ró rúhū. Te súcuan cásaaha ró návāha na squícu jeē cahán tutu iī, achí yá.

⁵⁰Yūcuán na te ndihi tēe cáscuáha jíin yá, ni castóo de ya, ni cajinu de cuango de.

Tēe suchí jeē ní jinu

⁵¹Te iin tēe suchí, ndíquín de ya cuahān de jíin yá. Te ndiī de máá iin sahma cuitá. Te ni cajniī tēe ún de. ⁵²Te máá sahma cuitá un ní canihīn. Te ni jinu máá ñiī-ni de cuahān de.

Jeē ní indichi Jesús nuū junta tēe cácujeñnu ga

(Mt. 26.57-68; Lc. 22.54-55, 63-71; Jn. 18.12-14, 19-24)

⁵³Yūcuán na te ni jinūcoo de jíin Jesús nuū sutū cujeñnu ga. Te tāca sūtū cácujeñnu jíin tēe jéñnu cándacu jniñu jíin tēe cástéén tutu ley, ni candutútú de. ⁵⁴Te Pedro chi jícá-ni ndíquín de ya, te ni jinū de nde ini patio sutū cujeñnu ga. Te ni cucōo de jíin táca policía, násaā de ñuhūn.

⁵⁵Te sutū cácujeñnu jíin ndihi tēe cásaaha junta cujeñnu ga, ni canducú de cuēchi siquī Jesús, chi cahni de ya cácuni de. Te tu ní cánihīn de. ⁵⁶Chi cuehē de ni cacahān yaá siquī yā, te tu ní quíjnáhan jnūhun ni cacahān de.

⁵⁷Yūcuán na te ni candocuiñī sava de, te ni catee de cuēchi siquī yā, achí de:

⁵⁸Máá ná ni cajini ná cáhán de jeē canu de templo yáha jēē ní cuvāha

ni casáha tēe, te nuū uní quivī te nacani de inga jeē násūu jíin ndaha tēe cuvāha, áchí de. Achí jíináhan.

⁵⁹Te ni jnūhun yáha tu ní quíjnáhan tucu jeē cácahān de siquī yā.

⁶⁰Yūcuán na te sutū cujéhnū ga ni ndocuiñī de nuū ñáyuu cuehē ún, te ni cajnūhún de Jesús:

¿Naun tu cáhán cuiti rō? ¿A íyó ndáa jeē cácahān tēe yáha síquī rō? achí de.

⁶¹Te máá yá tu ní cáhán cuiti yā, chí tú na vé ni stío cuñí yā. Te sutū cujéhnū ga ni cajnūhún tucu de ya:

¿A máá ró cúu Cristo, Sēhe Yaā vāha jeē cujéhnū? áchí de jíin yá.

⁶²Te ni cahān yā:

Suu ri cúu. Te coto ró jéē ruhū, Yaā ní nduu tēe, condee rī lado vāha Yaā iyó poder, te ndiji ri ichi ándiví jíin vícō, achí yá.

⁶³Yūcuán na te sutū cujéhnū ga ni jehnde de sahma de jeē quití ndasí ni de, te ni cahān de:

¿Nde jíni ñūhún gá yō testigo núu súcuan? ⁶⁴Chí je ni cajini ró jéē cahān de jnūhun ndevāha jeē quití ni Yaā Dios, chí sáha de máá de Sēhe Yaā Dios. ¿Te ndese cájeni ni rō? Achí de.

Te ndíhi de ni cacahān jeē na cúu yā.

⁶⁵Te sava de ni catesihí de nuū yā, te ni cajesí de sahma nuū yā, te ni cacani de ya. Te cácahān de jíin yá:

Cachi ndé ñin cúu jeē ní cani rōhó, achí de.

Te tāca tēe policia ni cacani de nuū yā.

Jeē ní cachi Pedro jeē tu jíni de ya

(Mt. 26.69-75; Lc. 22.56-62;

Jn. 18.15-18, 25-29)

⁶⁶Te íne Pedro ini patio ichi chíji nuū cáhiin de jíin Jesús. Te ni quee

ñin ñahan jéjnínū vehe sutū cujéhnū ga ún. ⁶⁷Te ni jito ña nuū de jeē néne de násaā de yuñūhún. Te ni

jito vāha ña nuū de, te ni cahān ña:

Róhó chí suni ní jica ró jíin Jesús, tēe ñuu Nazaret, achí ña.

⁶⁸Te máá de tu ní cáchi de, chí ni cahān de:

Tu jíni rī de, ní tu jíni rī na jnūhun cáhán rō, achí de.

Te ni quenda de yéhyí núu quéhe. Te ni cana-ni líhli. ⁶⁹Te ñahan jéjnínū un ní jito tucu ña nuū de, te ni quejéé ña cáhán ña jíin ñáyuu cáhiin yūcuán:

Tēe yáha suni jnáhan tāca tēe un cúu, achí ña.

⁷⁰Te máá de tu ní cáchi tucu de. Te ni cunúu jecu gā, te ñayuu cáhiin yūcuan ní cacahān tucu i jíin Pedro:

Jendaá ndije jeē suni jnáhan de cúu ró, chí tēe Galilea cúu ró, te ñnuú-ni cáhán rō jíin de jíináhan de. Achí i.

⁷¹Yūcuán na te ni quejéé de cáhán teyí de jeē na cóndee cuēchi siquī de núu tu cáhán ndaā de:

Tu jíni rī tēe un jéē cácahān rō jnūhun de, achí de.

⁷²Yūcuán na te ni cana-ni líhli vuelta uū. Te ni nucūhun ni de jnūhun ni cahān Jesús jíin de: Nde ná tu cana líhli uū jínu, te yūhu ró te cahān rō uní jínu jeē tu jíni rō ruhū. Te ni nacani ní de siquī jnúhun ún, te ni ndahyū de.

Jeē ní indichi Jesús nuū Pilato

(Mt. 27.1-2, 11-14; Lc. 23.1-5; Jn. 18.28-38)

15 Te jeē ní cundijin, te sutū cácujehnū ni candutútú de jíin tēe jéhnū cándacu jniñū,

jíin tée cástéén tutu ley, jíin ndihi tée casáha junta cujéhnú ga, te ni casquijnáhan de jnūhun. Te ni cajihni de Jesús, te cuango de jíin yá nuū Pilato, tée cúu gobernador.

²Te Pilato ni cajnūhún de ya:

¿A máá ró cúu Rey ñayuu hebreo? achí de.

Te ni cahān yā:

Suu ri cúu, nájñūhun cáhán rō.

³Te sutū cácujuhū un ní cacahān de cuehē cuēchi siquī yā. ⁴Te Pilato ni cajnūhún tucu de ya:

¿Naun tu cáhán cuíti rō? ¿A tu jíini ró jéē cuehē cuēchi cácahān de siquī rō? achí de.

⁵Te tu ní cáhán cuíti yā ni iin jnūhun jíin de. Te nahán ní naa ni Pilato ndéhé de nuū yā.

Jeē ní cundaā jeē cúu yā

(Mt. 27.15-31; Lc. 23.13-25; Jn. 18.38-19.16)

⁶Te íyó costumbre Pilato jeē quivī víco un siaá de iin tēe íne vecāa, núu na-ni tēe cácuñi ñayuu. ⁷Te íyó iin tēe nání Barrabás, íne de vecāa jíin táca jnáhan de siquī jeē ní candonda de siquī tohō te ni cajehni de ndīyi. ⁸Te ni quecoo ñayuu cuehē, te ni cacahān i jíin Pilato jeē na sáha de nájñūhun íyó costumbre de. ⁹Te ni cahān Pilato jíin i:

¿A tu cácuñi rō jeē siaá rí tēe cúu Rey rohó ñayuu hebreo? achí de.

¹⁰Súcuan ni cahān de, chí cúni de siaá de Jesús. Chí je ni jecūhun ni de jeē ní cacucésún ni tāca sūtū un cájito de ya, te jeē yúcuan ní quijicoo jíin yá nuū de. ¹¹Te sutū cácujuhū un ní cascáhán de ñayuu cuehē un jéē váha ga na cácan i jeē siaá Pilato Barrabás. ¹²Yūcuán na te ni cajnūhún tucu Pilato:

Núu súcuan ¿te ndese cácuñi rō jeē sáha ri jíin tēe jeē cácahān rō jeē cúu de Rey rohó ñayuu hebreo? achí de jíin i.

¹³Te ni cacana jee i:

Cata caa ní de jicā cruz, na cúu de, achí i.

¹⁴Te ni cahān Pilato:

¿Na cuēchi ni sáha de núu súcuan?

Te ñayuu un ní cacana jee tucu i:

Cata caa ní de jicā cruz, na cúu de, achí i.

¹⁵Te Pilato cuní de jeē na cúsiñ ni ñayuu jíin de, te ni siaá de Barrabás. Yūcuán na te ni ndacu de jniñu jeē na cáni tācá soldado Jesús, jíin jéē cata caa de ya jicā cruz.

¹⁶Yūcuán na te soldado un cuango de jíin yá ini patio palacio, jeē sácatā de nuū yā. Te ni canastútú de ndihi jnáhan de. ¹⁷Te ni cachuhun de ya iin sahma cuehé ndíhí jéē cúu sahma rey. Te ni casáha de iin corona iñu, ni cachuhun de xiní yā.

¹⁸Yūcuán na te ni cacana de:

Nacā jeē váha rey cúu Rey ñayuu hebreo, achí de.

¹⁹Te ni cacani de yujnu xiní yā, te ni catesihí de nuū yā, te ni cajecuiñí yití de nuū yā, casáha de jeē chiñúhún de ya. ²⁰Te nuū ní cuu ni casácatā de nuū yā, te ni catava de sahma cuehé ndíhí un, te ni canachuhun de ya sahma máa yá. Te ni caquenehen de ya jeē cata caa de ya jicā cruz.

Jeē ní cacata caa de ya jicā cruz

(Mt. 27.32-44; Lc. 23.26-43; Jn. 19.17-27)

²¹Te iin tēe nání Simón ñuu Cirene, tēe cúu tátá Alejandro jíin Rufo, vendiji de jeē ni jéhēn de rancho. Te ni yāha de yūcuán, te ni

catejníñu soldado un de jeē cóndiso de cruz yā.

²²Te cuango de jín yá ñin lugar nuū naní Gólgota, jeē cuní cahān Lugar Yiqui Xíní. ²³Te ni cajēhe de vino jeē ni sácā núu jín sūje uvuā jeē cóho ya, te tu ní jíhi ya. ²⁴Te ni cacata caa de ya jicā cruz. Te ni casáha de sorteo jeē siquí ndese nihīn ñin ñin de sahma ya.

²⁵Te cahīn ni cacata caa de ya.

²⁶Te jñūhun ni catee de xinī cruz cahán na siquí ni jihī yā: Yāha cúu Rey ñayuu hebreo, achí. ²⁷Te suni ni cacata caa de uū tēe cuíhná núu uū gā cruz, ñin de lado váha ya, te inga de lado jecó yá. ²⁸Te ni squícu jñūhun cáhán tutu i: Ni casquínáhan de ya jín tēe cásáha neé, áchí.

²⁹Te ñayuu cáyāha yūcuán cáscuicó i xinī i, te cácahān neé i:

Jājaān. Róhó chi cáhán rō jeē cánu rō templo cáhnu, te nuū uní quivī te nucondichi sáha ró. ³⁰Núu súcuan te jnama ró máá ró, te nuu ró jicā cruz vii, achí i.

³¹Te suni súcuan ni cacahān catá sutū cácujuhnu jín tēe cástéén tutu ley, te áchí de cácahān maá de:

Núu inga ñayuu ni jnama de, ¿te naun tu cúu jnama de máá de vijna? ³²Núu na cúní yō jeē Cristo, Rey ñayuu Israel, nuu de jicā cruz vijna, yūcuán na te candíje yó, áchí de jíjnáhan de.

Te tēe cándita caa jín yá, suni súcuan ni cacahān neé de.

Jeē ni jíhi Jesús

(Mt. 27.45-56; Lc. 23.44-49; Jn. 19.28-30)

³³Te nuū ní cuu cahuxī uū, te ni cunee ní cáhnu nde cahunī. ³⁴Te

nuū ní cuu cahunī, te ni cana jee Jesús:

Eloi, Eloi, ¿lama sabactani? achí yá. Te jñūhun un cúní cahān: Yā Dios maá ná, Yā Dios maá ná, ¿naun ni stóo ní sáña?

³⁵Te sava ñayuu cáhiin yūcuan, ní cajini i jñūhun ún, te ni cacahān i:

Cuni nahín, chi cána de xinī Elías, tēe ni nacani jñūhun Yā Dios jenahán, achí i.

³⁶Te ni jinu ñin tēe, ni jechundaji de cachí nuū vinagre iyá. Te ni tee de xinī ñin yujnu, te ni tee de yuhu ya jeē cóho ya. Te ni cahān de:

Na cóndēhe yó núu quiji Elías nasnúu de, áchí de.

³⁷Te máá Jesús ni cana jee ya, te ni jihī-ni ya. ³⁸Yūcuán na te sahma ndíta caa jeē ndihyú cuarto i ini templo cáhnu, ni ndatā sava sava nde xinī te nde nuū jehé. ³⁹Te tēe ñuu Roma jeē cúu capitán, índichi de nuū yā, te ni jini de jeē ní cana jee ya te ni jihī yā. Te ni cahān de:

Jendaá ndije jeē Séhe Yā Dios cúu tēe yáha, áchí de.

⁴⁰Te suni cáhiin sava ñahan, cándēhe jíca ña. Te unī ña cácuu María ñuu Magdala, jín María naná José jín Jacobo suchí, jín ñahan nání Salomé. ⁴¹Te ñahan yáha ní candiquín ña ya, ni cajejníñu ña nuū yā nde náa jíca ya Galilea. Te suni cáhiin cuehē gā ñahan jeē ni jéngoo jín yá ñuu Jerusalén.

Jeē ní quindūji Jesús

(Mt. 27.57-61; Lc. 23.50-56; Jn. 19.38-42)

⁴²Te ni ini quivī ún. Te quivī sátūhva cúu, chi sajnē cúu quivī ndétátū. ⁴³Te ni quee José, tēe

ñuu Arimatea. Te cúu de ñn tēe cújéñnu nuū junta cújéñnu ga. Te suni ñúhun ni de jeē quíjī quíivī jeē ndacu Yaā Dios jniñu. Te tu yúhú de chi ni quíivī de nuū Pilato, ni jicān de yiquí cúñu Jesús. ⁴⁴Te Pilato chi náā ni de jeē yachí ni jihí yā. Te ni cana de capitán, te ni cajñuhún de tēe un núu je ni jihí yā. ⁴⁵Yūcuán na te ni cucáñnu ni de jeē ni cáhān capitán jíin de, te ni jēhe de jñuhun jeē quihin José yiquí cúñu yā. ⁴⁶Te José ni jeen de ñn sahma cuitá váha. Te ni snúu de yiquí cúñu yā, te ni chusúcún de sahma ún. Te ni chindūji de ya ini ñn yaū jeē quíndūji ndīyī, jeē ní caan jicā ñn cava. Te ni jesi de ñn yuū yuhu yáú un. ⁴⁷Te María ñnu Magdala, jíin María naná José, ni cajito ña nuū ní cachindūji de ya.

Jeē ní natecu Jesús

(Mt. 28.1-10; Lc. 24.1-12; Jn. 20.1-10)

16 Te ni ini quíivī ndétátú, te María ñnu Magdala, jíin María naná Jacobo, jíin Salomé, ni cajeen ña tācá perfume jeē quíchuhun ña yiquí cúñu yā. ²Te jenéhen quíivī domingo, jeē ní cane niāndii, te ni jinūcoo ña nuū ní yindūji ya. ³Te cácahān ña:

¿Ndé níñin yō tēe tejiyo yuū ndihyú yuhu yáú? áchí ña.

⁴Te ni candacoto ña, te ni cajito ña jeē jé ni cujiyo yuū cáhnu un cuáhān. ⁵Te ni quíivicoo ña ini yaū ndīyī. Te ni cajito ña ñn ndajéhé Yaā Dios jeē cáa nájnūhun tēe suchí, néne ya ichi lado váha, ñúhun ya ñn sahma cuijín cáni. Te ni cayūhú ña. ⁶Te ni cahān yā jíin ña:

Ma yūhu ró jijnáhan ró. Chi vecondēhe ró Jesús ñnu Nazaret, Yaā ni jíihī jicā cruz. Tuá yā yāhá, chi je ni natecu yā. Yāhá condéhé ró nuū ní cachindūji de ya. ⁷Cuánungoo te cachi rō nuū tēe cáscuáha jíin yá, jíin núu Pedro, jeē xíhna gā maá yá jinū Galilea, te sáá te najinūcoo de. Te yūcuán coto de nuū yā, nájnūhun ni cahān yā jíin de nde saá, áchí yá jíin ña.

⁸Yūcuán na te ñahan un ní quendacoo ña nuū ní yindūji ya, te cájīnu ña cuangoo ña. Chi quísi i ña jeē cáyūhú ña. Te tu ní cácachī cuitī ña nuū ní ñn, chi cáyūhú ña.

Jeē ní nane Jesús nuū María ñnu Magdala

(Jn. 20. 11-18)

⁹Te Jesús ni natecu yā jenéhen quíivī domingo. Te xíhna gā ni nane ndijin yā nuū María ñnu Magdala, ñahan jeē ní quenehen ya uxā tachī ini. ¹⁰Te cuahān ña cuacastūhún ña nuū tāca tēe ni cajica jíin yá jeē ní nane ya nuū ña. Te cáccucuíhyá ni de te cándahyū de. ¹¹Te nuū ní cajini de jñuhun jeē ní jito ña nuū yā jeē tēcu yā, te tu ní cácandíje de jñuhun cáhān ña.

Jeē ní nane ya nuū uū tēe cáscuáha jíin yá

(Lc. 24.13-35)

¹²Yūcuán na te ni quendacoo uū jnáhan tēe ún, cájica de cuahān de ichi rancho, te sñn modo ni nane ndijin yā nuū de. ¹³Te ni canandicó de, ni cacastūhún de nuū tāca gá jnáhan de. Te ni tu ní cácandíje tucu jnáhan de jeē cácahān ndíndúú de.

**Jeē ní tejníñu ya de nacani de
jnūhun**

(Mt. 28.16-20; Lc. 24.36-49; Jn. 20.19-23)

¹⁴Te cúcuéé gá te ni nane ndijin yā nuū ndíhúxí ñin de jeē cáyūcú de mesa cáyeji de staā. Te ni cahān yā nuū de, chi nihni ni de jeē tu cácanđije de jeē cácahān jnáhan de un, jēē ní natecu yā ni cajito de ya.

¹⁵Te ni cahān yā jíin de:

Cuángoo jíjnáhan ró níí ñayīví, te nacani ró jnúhun ri nuū tāca ñáyuu ndese jnáma ri i. ¹⁶Te ñayuu candije te cuandute i, chi cācu i. Te ñayuu tú candije, chi jnahnū ndetū i. ¹⁷Te ñayuu candije, sáha i tācá jniñu jéhnū yáha jeē steén jeē iyó rí jíin i: Jíin síhví rí quenehen i tachī ini ñayuu. Te cahān i tijní yuhu jéé.

¹⁸Te núu ni jnií sanaa i coō, chí núu ni jihí i veneno, te ma sáha dañó jíin i. Te suni soó i ndaha i siquī ñáyuu cácuñū, te nduvāha. Achí yá jíin de.

Jeē ní ndaa ya cuanuhun yā andiví

(Lc. 24.50-53)

¹⁹Yūcuán na te nuū ní ndíhi ni cahān máá Jítóho yō jíin de jíjnáhan de, te ni ndaa ya cuanuhun yā andiví, te ni cucōo ya lado váha Yāā Dios nuū cujéhnū ya. ²⁰Te máá de ni quendacoo de, ni canacani de jnūhun ya tāca lado ndese jnáma ya ñayuu. Te máá Jítóho yō ni chindéé ñáhán yá de. Te ni jēhe ya fuerza jeē sáha de tācá jniñu jéhnū jeē steén jeē iyó ndāā jnūhun cánacani de. Te ni cuu. Amén.

JNUHUN VAHA NI TEE SAN LUCAS

1 Cuehē tēe ni cajicu de ni catee yúcun de historia Jesús, tāca jniñu jeē ni sāha ya ni cajito yó. ²Te ni catee de tāca jnūhun jeē ní cacastūhun ñáyuu nuū yō, jeē ní cajito i jniñu yúcuan nde ná ni quejéé, te ni canacani i jnūhun ya. ³Te máá ná, suni ni nanducú yúcun ná tāca jnūhun ya, nde nuū ní quejéé. Te ni jeni ni na jéé suni íyó váha jeē tée cájí ná tāca jnūhun yáha núu ní, amigo Teófilo. ⁴Te súcuan te cuni ni jéé iyó ndáa tāca jnūhun jeē ní cacastūhún i nuū ní.

Jeē ní cachi ndajéhé jeē cacu Juan tēe scuándute

⁵Tiempo jeē ní cuu Herodes rey región Judea, te ni iyo iin sutū ñayuu hebreo, naní de Zacarías, te grupo Abías cúu de. Te ñasihí de naní ña Elisabet, te suni sēhe yucūn maá sūtū Aarón cúu ña. ⁶Te ndíndúú de cahiyō ndaā de nuū Yaā Dios, te ndaā vāha cásquicu de jniñu ndácu ley maá Jítóho yō Yaā Dios, cájito tāca ñáyuu. ⁷Te tú sēhe de íyó, chi ñahan númá cúu Elisabet, te je jéhu ndíndúú de.

⁸Te iin quiví te jéjiniñu Zacarías nuū jniñu jeē cúu de sutū nuū Yaā Dios, chi ni quee quiví jeē ndívi

grupo de. ⁹Te ni casáha de sorteo, nájnūhun íyó costumbre sutū. Te ni sāha tocar Zacarías jeē quívi de ini cuarto i templo Jítóho yō Yaā Dios, te cahmu de sūje cūtú. ¹⁰Te hora jeē cayú sūje cūtú, te tāca ñáyuu cuehē cáhiin i fuera, cájicān tahu i. ¹¹Te ni cane iin ndajéhé maá Jítóho yō nuū de, iin ya lado váha altar nuū jéhu de sūje cūtú. ¹²Te ni cunéé ni Zacarías ni jito de nuū yā, te yōhyo ni yūhú de. ¹³Te ni cahān ndajéhé un jíin de:

Zacarías, ma yūhu ró, chi je ni chihi Yaā Dios cuenta jeē ni jíicān tahu rō. Te ñasihí ró Elisabet, scácu ña iin sēhe yíí, te snaní ró i Juan. ¹⁴Te yōhyo cusíi ni rō. Te cuehē ñayuu cusíi ni jeē cácu i. ¹⁵Chi cujéhu sēhe ró sāha máá Yaā Dios. Te ma cóho i vino ni ndixi cuií. Te cunuú máá Espíritu Santo jíin i, nde ná tu cacu i. ¹⁶Te sāha i jeē cuehē ñayuu nación rō Israel ndívicoo i nuū Jítóho i Yaā Dios. ¹⁷Te xíhna gā Juan quiji nacani jnūhun Jítóho yō Jesús, te sáa te quiji ya. Te sāha i nájnūhun ni sāha Elías, tēe ni nacani jnūhun Yaā Dios jenahán, te coneváha i poder jeē nácani i jnūhun, nájnūhun ni coneváha Elías. Te sāha i jeē tāca tátá ndumaní

de jíin séhe de. Te suni sáha i jeē ñáyuu nihni ni cuatáhú i nuū Yaā Dios, nduu i ñayuu ndaā. Súcuan sātúhva i ñayuu návaha candíje i máá Jítóho yō jeē quíji ya. Achí ndajéhé.

¹⁸Te Zacarías ni cajnúhún de ya:

¿Ndese cucáhnu ni na núu jendaá cúu? Chi tēe jéhnú cúu ná, te suni jéhnú ñasihí ná, áchí de.

¹⁹Te ni cahān ndajéhé un jíin de:

Máá rí cúu Gabriel, te íne ri nuū Yaā Dios, jejniñu ri nuū yā. Te ni tají yá ruhū vēji ri cahān rí jíin ró, te nácani ri jnúhun vāha yáha núu rō. ²⁰Te jeē tu ní cándíje ró jnúhun ni cahān rí, te cuñfín ró, te ma cúu cahān rō, chi nde na cácu séhe ró. Te squícu nahín jnúhun cáhán rí yāhá, na quée quivī, achí ndajéhé.

²¹Te ñayuu cáhiin ichi fuera, cándetu i Zacarías, te cájeni ni i na vé ni cuu jeē cucuée de ini cuarto i templo. ²²Te nuū ní quenda de, te tuá ni cúu cahān de jíin i. Te ni cajecúhun ni i jeē ini templo ni jito ndijin de ñin jeē ni stéén yā nuū de. Te máá seña na ni sáha de nuū i, chi ni cuñfín de.

²³Te nuū ni jínu quivī ni jejniñu de ini templo, te cuanuhun de vehe de. ²⁴Te ni cuu jecu quivī, te ñasihí de Elisabet ni jecúhun séhe ña. Te ni íyo ña vehe ña uhūn yoō jeē tuá nde ní jéhnú ña. Te jéni ni ña: ²⁵Súcuan ni sáha máá Jítóho yō jíin rí, te ni tejiyo ya jnúhun jeē cúcanu rí nuū ñayuu jeē tú séhe ri, jéni ni ña.

Jeē ní cachi ndajéhé jeē cacu Jesús

²⁶Te nuū ínú yoō, te ni tají Yaā Dios ndajéhé yā Gabriel, ni jehēn

yā ñin ñuu naní Nazaret, ndańúū Galilea. ²⁷Te ni jehēn yā nuū ñin sūchi síhí nání María. Te je ni cundaā jeē quijnáhan ña jíin ñin tēe nání José, te séhe yucūn rey David cúu de. ²⁸Te ni quivī ndajéhé un núu ndeé ña, te ni cahān yā:

Tandii, nacā ndetū cúu ró. Chi máá Jítóho yō Yaā Dios iyó yá jíin ró, te ni sáha ya jeē yóhyo ndetū gā cúu ró núu tāca gā ñahan, áchí yá.

²⁹Te nuū ni jíto ña nuū yā, te ni cunée ni ña jeē súcuan cáhán yā, te jéni ni ña naun cáhán yā súcuan jíin ña. ³⁰Te ni cahān gā ndajéhé un jíin ña:

Ma yūhu ró María, chi ni sáha Yaā Dios jeē váha jíin ró. ³¹Te jecúhun séhe ró te scácu ró ñin séhe yíí, te snání ró i Jesús. ³²Te kujéhnú i, te conaní i Séhe Yaā kujéhnú téyí. Te máá yá jeē cúu ya Jítóho yō Yaā Dios, sáha ya jeē cuu i rey, nájnúhun jíi i David ni cuu de rey. ³³Te níí cáni ndacu i jniñu nuū ñayuu nación Israel. Te ma ndíhi cuiti jeē ndácu i jniñu. Achí ndajéhé.

³⁴Yūcuán na te ni cajnúhún María:

¿Ndese coo jeē ni cáhán ní? Chi ná tu coo yíí ná, áchí ña.

³⁵Te ni cahān ndajéhé un:

Máá Espíritu Santo quiji siquī rō, te poder maá Yaā kujéhnú téyí sáha ñin jniñu jéhnú jíin ró. Te jeē yúcuan máá sūchi íi jeē cácu, quíhi cuenta i nuū Yaā Dios, te cahān ñayuu jeē Séhe Yaā Dios cúu i. ³⁶Te suni cástúhun rí nuū rō jeē jnáhan ró Elisabet, suni scácu ña ñin séhe vēsú je jéhnú ña. Te vijna íyó ínú yoō jeē tuá cáhán ñayuu jeē cúu

ña ñahan númá. ³⁷Chi ndihi-ni cuu sáha Yaā Dios, te tu íyó ni ñin jeē ma cúu sáha ya, achí ndajéhé un.

³⁸Yūcuán na te ni cahān María:

Cuu núu súcuan, chi sáha ná táca jniñu ndácu Jitoho yō Yaā Dios, te na cóo jíin ná nájnūhun ni cachi ní, achí ña.

Te máá ndajéhé un cuáhān-ni ya.

Jeē ni jécondēhé María Elisabet

³⁹Te ni cuu jecu quivī, te yachī cuahān María, ni caa ña yucu cuahān ña ñin ñuu región Judea.

⁴⁰Te ni jinū ña vehe Zacarías, te ni cahān ña jíin Elisabet. ⁴¹Te nuū ní jini Elisabet jeē cahán María jíin ña, te sūchi ñūhun chíji ña ni canda-ni i. Te ni cunuú Espíritu Santo ini anuá ña. ⁴²Te ni cahān jee ña:

Ni sáha Yaā Dios jeē yóhoyo ndetū gā cúu ró núu táca gā ñahan, jíin jēē yóhoyo ndetū sēhe ró. ⁴³¿Te ndese cúu jeē ní quee naná maá Jítoho rī nuū rī? Chi tu cújéhnu cuítī rī. ⁴⁴Chi jeē ní jini-ni ri jnūhun ni cahān rō jíin rí, te sūchi ñūhun chíji ri ni canda i jeē cúsiñ ni i. ⁴⁵Te nacā ndetū rō jeē ní candíje ró, chi squícu nahín táca jnúhun ni cahān maá Jítoho yō jíin ró. Achí Elisabet.

⁴⁶Yūcuán na te ni cahān María:

Cáhán rī jeē cújéhnu ndasí máá Jítoho yō Yaā Dios,

⁴⁷te cúsiñ ni rī jíin Yaā Dios, Yaā jnáma ruhū.

⁴⁸Chi ni sáha ya cuenta ruhū, vēsū tu cújéhnu ri.

Te na squícu ri jniñu ndácu ya. Te nde vijna te táca ñáyuu jeē nácacu, cahān i jeē yóhoyo ndetū rī.

⁴⁹Chi Yaā jnā ndihi poder, ni sáha ya jniñu jéhnu jíin rí.

Te Yaā ñi ndoo cúu ya.

⁵⁰Te ní cáni cundáhú ni yā táca ñáyuu ndíso iyo nuū yā.

⁵¹Ni sáha ya jniñu jéhnu jíin poder yā, chí ni scúnu ya ñayuu casándúxí máá,

⁵²te ñayuu cácujuhnu, ni quende ya jeē cújéhnu i.

Te ñayuu ndahú chi ni sajéhnu ya i,

⁵³te ñayuu cájii sōco ni jēhe ya jeē cáji vāha i.

Te ñayuu cucá ní natajé yá i súcuan-ni.

⁵⁴Te ni chindéé ñáhán yá yohó, ñáyuu nación Israel, jeē cácuu yó mozo yā, te tu náā ni yā jeē cundáhú ni yā yohó.

⁵⁵Chi súcuan ni jejnūhun ya nuū táca jíi yō, nuū Abraham jíin táca yúcūn de jeē cóo ní cáni.

Achí María.

⁵⁶Te ni condee ña jíin Elisabet nájnūhun unī yoō. Yūcuán na te cuanuhun ña vehe ña.

Jeē ní cacu Juan tēe scuándute

⁵⁷Te ni jinū quivī jeē scácu Elisabet sēhe ña, te ni scácu ña ñin sēhe yíí. ⁵⁸Te táca ñáyuu ndeé yajni jíin ña jíin táca jnáhan ña, ni cajini i jeē yóhoyo ni cundáhú ni Yaā Dios ña, te ni jengoo i ni cacahān i jnūhun siñ ni jíin ña. ⁵⁹Yūcuán na te nuū uná quivī jeē ní cacu i, te ni jengoo ñayuu ni sáha i circuncidar sūchi yíquín un. (Te yūcuán cúu ñin jnūni nuū yiquí cúñu táca sūchi yíí

hebreo jeē steén jeē cácuu i ñayuu Yaā Dios.) Te snání i sūchí un síhví tátá i Zacarías nuú. ⁶⁰Te ni cahān naná i:

Ma cúu, chi Juan conaní i, áchí ña.

⁶¹Te ni cacahān i jíin ña:

¿Te naun? Chi tú ni ñin jnāhan ró naní súcuan, áchí i.

⁶²Yūcuán na te jíin seña ni cacajnūhún i tátá sūchí un ndese cúní de jeē cónaní i. ⁶³Te máá de ni jicān ñin tutu, te ni tee de: Juan conaní i. Te tāca ñáyuu un ní canaa ni i cájito i. ⁶⁴Te ni nduvāha Zacarías jeē ní cuñhñ de, te ni quejéé de cáhān de jeē yóhyo vāha Yaā cúu Yaā Dios. ⁶⁵Te tāca ñáyuu ndeé yajni jíin de, yóhyo ni canaa ni i. Te ní yucu región Judea ni jitē núu tāca jnūhun yāha jeē súcuan ni cuu. ⁶⁶Te tāca ñáyuu jeē ní cajini jnūhun, ni quejéé i cánacani ni i, te cacajnūhun jnāhan i:

¿Ndeese coo na cuéhnu sūchi yāha? áchí i.

Chi máá Jítóho yō yóhyo ni sāha ya jeē vāha jíin i.

Jnūhun luu jeē ní nacani Zacarías

⁶⁷Te tátá i Zacarías ni cunuú Espíritu Santo jíin de, te ni nacani de jnūhun ni steén Yaā Dios nuú de:

⁶⁸Yóhyo vāha Yaā cúu máá Jítóho yō, Yaā Dios yohó ñáyuu Israel, chi ni quiji ya nuū yō jeē cácuu yó ñáyuu yā, te ni jnama ya yohó.

⁶⁹Te ni jeni ya ñin Yaā iyó poder jeē jnāma ya yohó, te Yaā ún cacu yucūn mozo yā rey David.

⁷⁰Chi súcuan ni jejnūhun ya, ni cacahān tāca téé ndoo ánuá jeē ní canacani de jnūhun ya jenahán.

⁷¹Chi ni cacahān de jeē jnāma ya yohó núu jeē cájito uhū yohó, jíin núu jeē cáquiti ni nuū yō.

⁷²Chi ni cundáhú ni yā tāca jíi yō jijnāhan, te tu ní nāá ni yā contrato ii yā.

⁷³Chi suu un ní jejnūhun téyí yá nuū jíi yō Abraham,

⁷⁴suu jeē jnāma ya yohó núu ñáyuu cájito uhū yohó, návāha cuajniñu yó núu yā, te ma yūhu yó i.

⁷⁵Te coo ndaā coo ndoo ánuá yō, cuajniñu yó núu yā tāca quívi jeē cótecu yō.

⁷⁶Te róhó súchi lúli, cuu ró téé nacani jnūhun Yaā cujéhnu téyí. Chi cosnúu ró ichi núu maá Jítóho yō, návāha sátūhva ró ñáyuu, te sáá te quiji ya.

⁷⁷Te castūhun ró nuū ñáyuu maá yá jeē jnāma ya i, jíin jéé cóne cáhnu ni yā nuū tāca cuéchi i.

⁷⁸Chi Yaā Dios maá yó, vāha ni yā te cundáhú ni yā yohó. Jeē yúcuan tají yá maá Yaā jeē sāha jeē cundijin ini anuá yō, quiji ya nde andiví,

⁷⁹návāha jecūhun ni yohó jéé cáyūcu nájñūhun nuū nēé nuū je yajni cuu yō.

Te chuhun ya yohó ichi nuū cóo ndeyí coo sñi ni yō.

Achí Zacarías.

⁸⁰Te sūchi lúli un ní jehnu i te ni ije i jíin jnūhun ya. Te ni condee i nde nuū ñūhun téhé ndé quiví ní quenda ndijin i nuū ñáyuu Israel.

Jeē ní cacu Jesús*(Mt. 1.18-25)*

2 Te ni cuu jecu quivī, te Augusto, tēe cúu rey, ni ndacu de jniñu jeē coo censo jeē núcosō sīhvī ndivii ñayuu níí cáhnu nuū ndácu de jniñu. ²Yāha cúu censo xihna ñúhún jēē ní casáha de ná ni cuu Cirenio gobernador nación Siria. ³Te ndivii ñayuu cuanungoo i ná ñuu ná ñuu maá i jeē nácuāha i sīhvī i. ⁴Te suni José ni quenda de ñuu Nazaret, ndañúú Galilea. Te cuanuhun de región Judea, te ni najinū de ñuu Belén, jeē cúu ñuu nuū ní cacu rey David jenahán. Chi sēhe yucūn David cúu de. ⁵Te ni jehēn de návāha nacuāha de sīhvī de jíin María, chi je yajni quijnáhan ña jíin de. Te ñúhun sēhe ña ni sáha Espíritu Santo. ⁶Te níni cáhiin de yūcuán te ni jinū quivī jeē cácu sēhe ña. ⁷Te ni scácu ña sēhe yíí núú ña, te ni chusúcún ña i sahma cuitá, te ni jequin ña i ini ñin nundōo núú yéji quitī, chi tuá núne mesón condee ña.

Jeē ní canecoo ndajéhé yā nuū pastor

⁸Te yajni ñuu Belén cáhiin tēe cácuu pastor, te cándito de lanchi de níí niñu jecuāā nde yucu ún. ⁹Te ñin sanaa-ni te ni cane ñin ndajéhé maá Jítóho yō nuū de, te nduva maá Jítóho yō ni ndindēe níí núú cáhiin de. Te yōhoyo ni cayūhú de. ¹⁰Te ni cahān ndajéhé un jíin de:

Ma yūhu ró jijnáhan ró, chi vēji ri castūhun rí jñūhun vāha nuū rō, te sáha jeē cúsiī ndasí ni tāca ñáyuu: ¹¹Chi vijna nde ini ñuu David ni cacu ñin Yaā jnama róhó, te maá

Jítóho yō Cristo cúu ya. ¹²Te súcuu nacuni rō sūchi yíquín un, chi ñúsúcún i sahma cuitá te catú i ini ñin nundōo núú yéji quitī. Achí yá.

¹³Te ñin sanaa-ni te ni canecoo cuehē gā ndajéhé andiví, cáhiin ya jíin ndajéhé un, te cácahān yā jeē yóhoyo vāha Yaā cúu Yaā Dios. Te áchí yá:

¹⁴Yōhoyo luu cújéhnū Yaā Dios nde nuū sucún.

Te na ndúvāha ni tāca ñáyuu ñayiví, sáha ya jeē cúsiī ni yā jíin i.

Achí tāca ndajéhé.

¹⁵Yūcuán na te cuanungoo ndajéhé un andiví. Te tēe cácuu pastor ni cacahān de jíjnáhan de:

Na quíhín yō nde ñuu Belén, te cuni yō na vé ni cuu jeē ní castūhun máá Jítóho yō nuū yō, achí de.

¹⁶Te yachī cuangoo de, te ni nanihīn de María jíin José jíin sūchi yíquín un, catú i ini nundōo núú yéji quitī. ¹⁷Te nuū ní cajini de nuū i, te ni canacani de jñūhun jeē ní cachi ndajéhé yā nuū de siquī sūchi yíquín un. ¹⁸Te ni canaa ni tāca ñáyuu cájini nahín i jñūhun cácahān tēe cácuu pastor. ¹⁹Te María, ni quendōo tāca jñūhun yáha nuū jeē níjnūní ña, te nácani ni ña siquī. ²⁰Te tēe cácuu pastor cuanungoo de, te ni cacahān de jeē yóhoyo vāha Yaā cúu Yaā Dios siquī tāca jēē ní cajini sōho de jíin jēē ní cajito de, chi ni squícu nahín nájnūhun ni cahān ndajéhé yā jíin de.

**Jeē ní castéén de i nuū
Yaā Dios ini templo**

²¹Te ni cuu unā quivī jeē ní cacu ya, te ni casáha de circuncidar

sūchi yíquín un. Te ni casnání de i Jesús, chi síhví yúcuán ní cachi ndajéhé yā nuū María nde ná tu jecūhun i.

²²Te ni jīnu quivī jeē casquícu ña costumbre jeē ndúndoo ña nuū Yaā Dios jijnáhan ña, nájnūhun cáhán ley jeē ni jéhe ya nuū Moisés. Te ni jengoo de jíin i ñuu Jerusalén jeē nácuāha de i nuū maá Jítóho yō Yaā Dios. ²³Súcuán ni casáha de, chi yósó núu tútu ley yā: Tāca sūchi yíí núú jéé cácacu, quihí cuenta i nuū Jítóho yō Yaā Dios, achí tutu. ²⁴Te suni cuasocō de nájnūhun cáhán ley maá Jítóho yō: Socō rō uū livi chí úu paloma, achí tutu.

²⁵Te ni iyo ñin tēe nání Simeón, ndéé de ñuu Jerusalén tiempo un. Te tēe ndaā, tēe chíñúhún váha nuū Yaā Dios cúu de. Te ñūhun ni de jeē quéé maá Yaā jnama ñayuu nación de Israel. Te maá Espíritu Santo íyó yá jíin de. ²⁶Te je ni castūhun yá nuū de jeē ma cúu cuiti de chi nde coto de nuū Cristo jeē tají maá Jítóho yō Yaā Dios. ²⁷Te ni steén yā nuū de jeē quihín de templo quivī ún. Te suni tátá naná sūchi yíquín Jesús, ni quívicoo de ini templo jíin i, jeē nácuāha de i nuū Yaā Dios nájnūhun cáhán ley Moisés. ²⁸Te Simeón ni ñunundee de i, te ni cahān de jeē yóhyo vāha Yaā cúu Yaā Dios, te achí de:

²⁹Tátā Yaā Dios, vijna te cuu cuāha ni jnúhun jeē cuu ná, chí je ni cusíi ni ná.

Chí je ni squícu ní jnúhun ni jejnūhun ní núu sãña jéé cúu ná mozo ni.

³⁰Chí ni jito jíinúu na núu Yaā jnáma sãña jijnáhan ná.

³¹Chí ni jeni ní yá jeē jnáma ya tāca ñayuu ñayiví.

³²Te maá yá sáha jeē cúndijin ini anuá ñayuu tācá nación, návāha jecūhun ni i siquí ní. Te sáha ya jeē cujéhnú ñayuu maá ní Israel.

Achí Simeón.

³³Te José jíin náná i cánaa ni de cájini nahín de jnúhun ni cahān Simeón siquí i. ³⁴Te ni jicān tahú Simeón jehē de jijnáhan de, te ni cahān de jíin náná i María:

Sūchi yáha vēji i jeē candíje cuehē ñayuu nación yō Israel, te cācu i jijnáhan i. Te sava i ma candíje i, te jnahnū ndetū i. Chí cúu i Yaā ní tají Yaā Dios, te sa squéhichí ni cuehē ñayuu i. ³⁵Te súcuán te quenda ndijin ndese cájeni ni tāca ñayuu. Te maá ró chí jnahuhū ndasí ni rō coto ró jéé ndóho i. Achí Simeón.

³⁶Te suni íne ñin ñahan nácani jnúhun Yaā Dios, naní ña Ana. Te sēhe Fanuel, yucūn Aser cúu ña. Te je jéhnú ndasí ña. Te nde ná lulí ña te ni condee ña jíin yíi ña uxā cuiyā. ³⁷Yūcuán na te ni quendōo ndáhú ña, te ni cuu cuūn xico cuūn cuiyā ña. Te tu cújiyo ña ini vehe íi, chí jéjníñu ña nuū Jítóho yō Yaā Dios nduú ñuú, te ndite ni ña te jícán tahú ña. ³⁸Te suni hora un ní quee ña, te ni nacuatáhú ña nuū Yaā Dios. Te ni cahān ña jnúhun sūchi yíquín un jíin tāca ñayuu Jerusalén jeē cáñuhun ni i jeē quéé Yaā jnama i.

Jeē cuáungoo de ñuu Nazaret

³⁹Te ni jīnu ni casquícu de tācá jniñu ndácu ley maá Jítóho yō Yaā Dios, te cuanungoo de ñuu de

Nazaret, ndañū Galilea. ⁴⁰Te sūchi lúfí un ní jehnu i, te ni ije i, te ni cundíhí gá i. Te ni sáha Yaā Dios jeē váha ndasí jíin i.

Jeē íne sūchi lúfí Jesús ini templo

⁴¹Te ndijnahan cuiyā jéngoo tátá i náná i ñuu Jerusalén, jeē cúu vico pascua. ⁴²Te nuū ní cuu uxí uū cuiyā i, te cuangoo tucu de Jerusalén, nájñuhun sáha sáha de quiví vico ún. ⁴³Te ni yāha vico, te cuanungoo de. Te sūchi lúfí Jesús, ni quendō i Jerusalén, te tu ní cájini José jíin náná i. ⁴⁴Te cájeni ni de jeē cuahán i mēññu ñáyuu cájica ichi ún. Te ni cajica de ññ quiví, te sáá te ni cananducú de i mēññu táca jnáhan de jíin ñáyuu cájini jnáhan de jíin. ⁴⁵Te tu ní cánanihín de i. Te ni canandicó de cuangoo de Jerusalén, cuananducú de i.

⁴⁶Te nuū uní quiví te ni cananihín de i ini templo, néne i mēññu tée cástéén tutu ley Yaā Dios, te jíni nahín i jeē cácahán de te cájñuhún i de siquí jñuhun ún. ⁴⁷Te táca ñáyuu cájini jñuhun cáhán i, cánaa ni cájito jeē váha cájí xíní i te váha nástió cuíñí i jñuhun. ⁴⁸Te nuū ní cajito tátá i náná i nuū i, te ni canaa ni de. Te ni cahán naná i jíin i:

Séhē, ¿naun ni sáha ró súcuan jíin rí? Chi ruhū jíin tátá rō, yōhyo ni canacani ni rí cánanducú rí rohó, achí ña.

⁴⁹Yūcuán na te ni cahán i:

¿Naun cánanducú ní sãña? ¿A tu cájini ni jēé cánuú cocu ná jíin jniñu Tátá na Yaā Dios? Achí i.

⁵⁰Te tu ní cájecūhun ni tátá i náná i jñuhun ni cahán i.

⁵¹Yūcuán na te cuanuhun i jíin de jíinánhan de ñuu Nazaret, te ni jendije i nuū de. Te náná i, ni quendō táca jñuhun yáha núú jeē níjñuní ña. ⁵²Te Jesús ni jehnu ga i, te ni cundíhí gá i, te cúsiñ ni Yaā Dios jíin i, te suni súcuan táca ñáyuu.

Jñuhun Juan tēe scuándute

(Mt. 3.1-12; Mr. 1.1-8; Jn. 1.19-28)

3 Te ni cuu xahūn cuiyā jeē ndácu Tiberio jniñu ní naciún. Te Poncio Pilato cúu de gobernador Judea, te Herodes cúu de gobernador Galilea, te ñani de Felipe cúu de gobernador Iturea jíin Traconite, te Lisantias cúu de gobernador Abilinia. ²Te sutū cujéñhu ga cácuu Anás jíin Caifás. Te ni quee jñuhun Yaā Dios nuū Juan sēhe Zacarías, jeē íne de nuū ñúhun téhé. ³Te ni jica nuu de táca ñuu jeē iyó yajni yūte Jordán. Te cáhán de jíin ñáyuu jeē na nácani ni i jeē stóo i cuéchi i te cuandute i, návāha cone cáhnu ni Yaā Dios nuū cuéchi i. ⁴Te súcuan ni squícu jñuhun Juan jeē yosó nuū tútu ni tee Isaías, tēe ni nacani jñuhun Yaā Dios nde jenahán:

Coo ññ tēe cana jee nde nuū ñúhun téhé:

Sátūhva ró máá ró jíinánhan ró, chi quee maá Jítoho yō.

Te sáha ró jniñu ndaā, chi vēji ya.

⁵Te táca xéhvā na ndúndaā, te táca yucu jíin loma na ndúnduhvā,

te na ndúyóhó ichi yácuá, te na ndúlñi ichi ndáyí.

Te ndíhi un cúu jeē ndúvāha ndundaā anuá ñáyuu nuū yā.

⁶Te ndihi i cuni i jeē jnáma Yaā Dios i.

Súcuam cahān Juan, achí tutu.

⁷Te ni quendacoo cuehē ñayuu, cuahān i nuū de jeē scuándute de i. Te ni cahān de nuū i:

Va sēhe coō cácuu ró, chi xeēn rō nájñuhun coō. ¿A cájeni ni rō jeē cuu cunu ró cácu ró núū castigo xeēn jeē quíji? ⁸Núu súcuam te sáha ró jniñu váha, te súcuam stéén rō jeē ní nacani ndije ni rō jeē stóo ró cuéchi ró. Te ma cáni ni rō cahān rō jeē cuu cácu ró síquī jeē cácuu ró yúcūn Abraham. Chi cáhán rī jíin ró jeē cuu sáha Yaā Dios jeē táca yūū yáha nduu sēhe Abraham jeē candíje vāha, te núu cúní yā. ⁹Te cácuu ró nájñuhun nundehé jeē tu jéhe ndehé váha. Te vijna je íyó túhva Yaā Dios jeē cuáha ya castigo xeēn, nájñuhun je íyó túhva iin cāa jeē cahnde nde yoho yujnu. Núu súcuam te sáha ya jíin ró nájñuhun jíin táca yujnu jeē tu cúun ndehé váha, jeē tahndé te cayū nuū ñuhún. Achí de.

¹⁰Te ñayuu un ní cacajñuhún i de: ¿Te ndese sáha ná núu súcuam? Achí i.

¹¹Te ni cahān de:

Róhó jéē cánevāha uū sahma, na cuáha ró iin nuū jeē tu névāha. Te róhó jéē cánevāha jeē yéji, suni súcuam na sáha ró, achí de jíin i.

¹²Te suni jecu tēe cástútú xúhun renta, ni quecoo de jeē cuándute de. Te ni cacajñuhún de Juan:

Maestro, te máá ná, ¿ndese sáha ná jíjnáhan ná?

¹³Te ni cahān Juan jíin de:

Ma scaá ró cácan rō xúhún, chi máá cúhva-ni jeē ní ndacu jniñu nuū rō, achí de.

¹⁴Te suni ni cacajñuhún jecu soldado:

Te máá ná, ¿ndese sáha ná jíjnáhan ná? achí de.

Te ni cahān Juan jíin de:

Ma quénde rō ndajniñu ni iin jíin jnúhun siúhú ni jíin jnúhun stáú yáhu, te cusihí ni rō jíin yáhu ró, achí de.

¹⁵Te táca ñáyuu cándetu i jeē quíji Cristo, Yaā jeē tají Yaā Dios, te cájeni ni i jeē sanaa te suu cúu Juan.

¹⁶Te ni cahān Juan jíin i jíjnáhan i:

Ruhū chi jíin ndute scuándute ri rohó. Te vēji iin Yaā jeē nájñuhun scuándute ya rohó cúu jeē cuáha ya Espíritu Santo condee ini anuá rō, te poder yā cúu nájñuhun ñuhún. Te cújéhnu ndasí yá, chi tú na vé jéhnu cuítí cúu ri nuū yā, ni jeē cuajniñu ri nuū yā vēsú iin jniñu lúlí gá nájñuhun jeē ndají rí vēsú correa ndijén yā.

¹⁷Te sáha ya nájñuhun sáha tēe scánda trigo, chi sásihí ya ñayuu vāha jíin ñáyuu cunéé, nájñuhun cúndoo trigo jeē quénda síin paja. Te nastútú yá trigo yā ndívi ini yacā yā. Te paja chi jnaa yā nuū ñuhún jeē ma ndahvá cuítí. Achí Juan.

¹⁸Te súcuam te jíin cuehē gā jñuhun ni stihví ni de ñayuu un, ní nacani de jñuhun vāha Yaā Dios nuū i. ¹⁹Te suni ni cahān xeēn de nuū Herodes, tēe cúu gobernador, chi tēe un ní nacueca de Herodías, ñasihí ñani de Felipe. Te cuehē gā jniñu néé súcuam ni sáha Herodes. ²⁰Te sa víhyá gā ni sáha de jeē neé gá, chi ni chune de Juan vecāa.

Jeē ní jendute Jesús

(Mt. 3.13-17; Mr. 1.9-11)

²¹Te nde ná tu quívi Juan vecāa, ná ni ine de ni scuándute de

tāca ñáyuu, te suni ni scuándute de Jesús. Te jícán tahu yā, te ni nune-ni andíví. ²²Te ni cuun Espíritu Santo ni quee xiní yā, te cáa nájñuhun iin paloma. Te ichi ándíví ní cahān iin jñuhun:
Máa ró cúu Sēhe ri jeē maní ndasí rí jíin, te yōhyo cúsiñ ni rí jíin ró, achí.

Lista ñayuu yucūn ní quiji Jesucristo
(Mt. 1.1-17)

²³Te ná ni quejéé Jesús steén yā jñuhun, te íyó yá nájñuhun ocō uxí cuiyā. Te cájeni ni ñayuu jeē séhe José cúu ya. Te José ni cuu séhe Elí, ²⁴te Elí ni cuu séhe Matat, te Matat ni cuu séhe Leví, te Leví ni cuu séhe Melqui, te Melqui ni cuu séhe Jana, te Jana ni cuu séhe José, ²⁵te José ni cuu séhe Matatías, te Matatías ni cuu séhe Amós, te Amós ni cuu séhe Nahum, te Nahum ni cuu séhe Esli, te Esli ni cuu séhe Nagai, ²⁶te Nagai ni cuu séhe Maat, te Maat ni cuu séhe Matatías, te Matatías ni cuu séhe Semei, te Semei ni cuu séhe José te José ni cuu séhe Judá, ²⁷te Judá ni cuu séhe Joana, te Joana ni cuu séhe Resa, te Resa ni cuu séhe Zorobabel, te Zorobabel ni cuu séhe Salatiel, te Salatiel ni cuu séhe Neri, ²⁸te Neri ni cuu séhe Melqui, te Melqui ni cuu séhe Adi, te Adi ni cuu séhe Cosam, te Cosam ni cuu séhe Elmodam, te Elmodam ni cuu séhe Er, ²⁹te Er ni cuu séhe Josué, te Josué ni cuu séhe Eliezer, te Eliezer ni cuu séhe Jorim, te Jorim ni cuu séhe Matat, ³⁰te Matat ni cuu séhe Leví, te Leví ni cuu séhe Simeón, te Simeón ni cuu séhe

Judá, te Judá ni cuu séhe José, te José ni cuu séhe Jonán, te Jonán ni cuu séhe Eliaquim, ³¹te Eliaquim ni cuu séhe Melea, te Melea ni cuu séhe Mainán, te Mainán ni cuu séhe Matata, te Matata ni cuu séhe Natán, ³²te Natán ni cuu séhe David, te David ni cuu séhe Isaí, te Isaí ni cuu séhe Obed, te Obed ni cuu séhe Booz, te Booz ni cuu séhe Salmón, te Salmón ni cuu séhe Naasón, ³³te Naasón ni cuu séhe Aminadab, te Aminadab ni cuu séhe Aram, te Aram ni cuu séhe Esrom, te Esrom ni cuu séhe Fares, te Fares ni cuu séhe Judá, ³⁴te Judá ni cuu séhe Jacob, te Jacob ni cuu séhe Isaac, te Isaac ni cuu séhe Abraham, te Abraham ni cuu séhe Taré, te Taré ni cuu séhe Nacor, ³⁵te Nacor ni cuu séhe Serug, te Serug ni cuu séhe Ragau, te Ragau ni cuu séhe Peleg, te Peleg ni cuu séhe Heber, te Heber ni cuu séhe Sala, ³⁶te Sala ni cuu séhe Cainán, te Cainán ni cuu séhe Arfaxad, te Arfaxad ni cuu séhe Sem, te Sem ni cuu séhe Noé, te Noé ni cuu séhe Lamec, ³⁷te Lamec ni cuu séhe Matusalén, te Matusalén ni cuu séhe Enoc, te Enoc ni cuu séhe Jared, te Jared ni cuu séhe Mahalaleel, te Mahalaleel ni cuu séhe Cainán, ³⁸te Cainán ni cuu séhe Enós, te Enós ni cuu séhe Set, te Set ni cuu séhe Adán, te Adán ni cuu séhe Yaā Dios, chi ni sáha ya de.

Jeē ní jito ndee jexeén Jesús
(Mt. 4.1-11; Mr. 1.12-13)

4 Te Jesús ni cunuú Espíritu Santo ini yā, te ni quenda ya yūte Jordán cuahān yā. Te ni jinū

yā nde nuū ñūhun téhé ní sáha Espiritu Santo. ²Te ni ine ya yūcuan úū xico quivī, te ni jito ndee jexeén yā, chí cúní jeē sáha ya cuēchi. Te tāca quívī ún tu ní yéji cuíti yā, te ná ni yāha quivī ún, te jíí yā sōco. ³Yūcuán na te ni cahān jexeén un jíín yá:

Núu máá ró cúu Sēhe Yaā Dios, te cahān rō jeē yuū yāha na ndúu staā caji rō, achí.

⁴Te ni cahān Jesús jíín:

Tuú chí yósó núū tútu íi: Nasūu máni máá jíín stāā cátecu ñayuu, chí suni jíín táca jnūhun cáhán Yaā Dios, achí yá.

⁵Yūcuán na te cuahān jexeén un jíín yá nde xinī ñin yucu súcún, te ñin núnúu-ni ni steén nuū yā tācá nación níí cáhnu ñayiví. ⁶Te ni cahān jíín yá:

Nuū maá ró cuāha ri jeē cujéhnu ró núū ndivii nación yāha, chí yōhoyo luu cáa. Chí máá rí jnīí ndíhi, te cuu cuāha ri nuū ndé ñin cúní rī.

⁷Núu súcuan te núu cuiñi yítí ró chíñúhún ró ruhū, te cuāha ndíhi ri nuū rō. Achí jexeén.

⁸Te ni cahān Jesús jíín:

Satanás, cujiyo quihīn rō, chí yósó núū tútu jeē chíñúhún ñayuu maá Jítoho i Yaā Dios, te nuū maá-ni ya cuajñīu i. Achí yá.

⁹Yūcuán na te cuahān jexeén un jíín yá nde ñuu Jerusalén. Te ni jeni ya xinī torre templo. Te ni cahān jíín yá:

Te núu Sēhe Yaā Dios cúu ró, te síngava ró máá ró nde nuū ñūhun, chí jnama ya rohó. ¹⁰Chí yósó núú tútu:

Tejnīñu ya ndajéhé yā quijicoo coto rohó.

¹¹Te cunundee yā rohó jíínáhan ya, návāha ma cáchihi ró jéhē rō nuū yuú.

Achí tutu. Achí jexeén.

¹²Te ni cahān Jesús:

Tuú chí suni yósó núū tútu jeē ma coto ndee ñayuu Jítoho i Yaā Dios, núu jnama ya i chí tuú, áchí yá.

¹³Te tuá ni níhín jexeén modo coto ndee Jesús quivī ún, te ni cujiyo cuahān jecu-ni tiempo.

Jeē ní quejéé Jesús nácani ya jnūhun región Galilea

(Mt. 4.12-17; Mr. 1.14-15)

¹⁴Te ni cunuú fuerza Espiritu Santo ini Jesús, te cuanuhun yā Galilea. Te níí región yajni yūcuan ní jítē núu jnūhun ya. ¹⁵Te ni steén yā jnūhun ini tācá vehe íi sinagoga, te ndíhi ñayuu ni cajejnúhún i ya.

Jeē cuánuhun yā ñuu Nazaret

(Mt. 13.53-58; Mr. 6.1-6)

¹⁶Te ni najinū yā ñuu Nazaret nuū ní jehnu ya. Te quivī ndétátú ni quivī ya ini vehe íi sinagoga, nájñūhun sáha sáha ya. Te ni ndocuiñi yā jeē cahu ya tutu íi.

¹⁷Te ni cajéhe de tutu ni tee Isaías, tēe ni nacani jnūhun Yaā Dios nde jenahán. Te ni nune ya tutu ún, te ni nanihīn yā nuū yosó jnūhun ni cahu ya:

¹⁸Espiritu maá Jítoho yō Yaā Dios iyó yá jíín rí, chí ni tejñīñu ya ruhū jeē nácani ri jnūhun vāha nuū ñáyuu ndahú.

Te ni tají yá ruhū vēji ri jíín jnūhun jeē ndúvāha ni ñayuu cácuuihyá ní.

Te castūhun rí nuū ñáyuu cáyihí ndaha jexeén jeē coo libre i.

Te sáha ri jeē ndúndijin ini anuá ñayuu tu cájecūhun ni, te jnama ri ñayuu jeē cándoho i sáha jnáhan i.

¹⁹Te nacani ri jnūhun jeē ní quee tiempo jeē sáha Jitoho yō Yaā Dios jeē váha ñayuu.

Achí tutu ni cahu ya.

²⁰Te ni nacasi yā tutu ún, te ni nacuāha ya nuū tée jéjníñu ini sinagoga, te ni nucōo ya jeē steén yā jnūhun nuū ñáyuu cáhiin ini sinagoga. Te tācá i cájito vāha i nuū yā. ²¹Te ni quejée yá cahán yā jíin i:

Vijna te ni squícu jnūhun cáhán tutu i yāha ní cajini sōho ró, achí yá.

²²Te ndivii i ni cacahān jeē váha tēe cúu ya, te cánaa ni i jeē ní cajini i tāca jnūhun luu ni cahān yā. Te ni cacajnūhun jnáhan i:

¿A násūo séhe José cúu tēe yáha?

²³Te ni cahān yā jíin i:

Jíní vāha ri jeē cájeni ni rō cahān rō jnūhun yátá yáha jíin rí: Tēe tájné, sátájné ró maá ró núu súcuan. Te jnūhun yáha cúní cahān jeē nájnūhun ni nasávāha ri cuehē ñayuu cácuñu ini ñuu Capernaum ni canihīn rō jnūhun, suni súcuan na sáha ri ñuu yō yāhá návāha candíje ró cájeni ni rō. Achí yá jíin i.

²⁴Te ni cahān gā yā:

Jendaá cahán rí jíin ró, ni iin tēe nácani jnūhun Yaā Dios, tu cájetáhu ñayuu ñuu maá de nuū de. ²⁵Te suni jendaá cahán rí jíin ró jeē ni íyo cuehē ñahan ní ndóo ndáhu ini nación yō Israel, tiempo ni cotecu Elías, tēe ni nacani jnūhun Yaā

Dios. Te tiempo un tu ní cúun cuiti saū uní cuiyā yosáva, te ni íyo iin jnamā xeēn ní cáhnu nación. ²⁶Te tu ní tájí Yaā Dios Elías quihīn de nuū ni iin ñahan viuda nación yō Israel, chi nuū máá iin-ni ñahan viuda jeē ndeé ñuu Sarepta ndañú Sidón, ni jehēn de ni jito de jeē ní yeji ña. ²⁷Te ini nación yō Israel suni ni íyo cuehē tēe ni candoho cuehyī stehyú, tiempo jeē ní cotecu Eliseo, tēe ni nacani jnūhun Yaā Dios. Te ni iin de tu ní cándíje jeē ndúvāha de sáha Eliseo, chi sa suhva máñúhún-ni Naamán, tēe nación Siria ni nduvāha. Achí yá.

²⁸Yūcuán na te tāca ñáyuu cáhiin ini sinagoga, yōhyo ni caquiti ni i jnūhun ní cahān yā. ²⁹Te ni candocuiñi i, te ni caquenehen i ya yatā ñúu ún, cuahān i jíin yá xini yúcu íne ñuu ún, chi cácuni i chundahá i ya inga ya cava ún. ³⁰Te tu ní cúu sáha i, chi ni yāha-ni ya mēhñú i cuahān yā.

Jeē ní quenehen ya tachī ini iin tēe

(Mr. 1.21-28)

³¹Yūcuán na te cuahān Jesús ñuu Capernaum región Galilea. Te quiví ndétatu ní steén yā jnūhun nuū ñáyuu. ³²Te ni canaa ni i cájini i jnūhun steén yā. Chi ni steén vāha ya nuū i, chi jíin vāha máá yá.

³³Te ini vehe sinagoga un íne iin tēe jeē ñúhun tachī xeén ini de. Te tēe un ní cana cóho de:

³⁴Cujiyo ní. ¿Naun véji ní núu na jíjnáhan ná, Jesús ñuu Nazaret? ¿A véji ní jée snáa ni sáña, chí naún? Je jíin na ndé iin cúu ní, chi Séhe ií Yaā Dios cúu ní. Achí de.

³⁵Te Jesús ni cahān xeēn yā nuū tachī ún:

Casi yuhu ró te quenda ró ini tēe yáha, áchí yá.

Te ni cotúú-ni tēe un núū tāca ñáyuu, ni sáha tachí ún. Te ni quenda ini de cuahān, te tú na vé ni sáha ga jíin de. ³⁶Te ndíhi ñayuu un ní cayūhú i, te ni cacahān i jíin jnáhan i:

¿Na jnūhun cúu yáha jéē ní cuu súcuan? Chi cújéhnú tēe yáha jéē ndácu nihin de jniñu nuū tachí, te quéndacoo-ni, áchí i.

³⁷Te jnūhun ya ni jitē núu cuahān ní cáhnu región yūcuán.

Jeē ní nasávāha ya naná chísó Simón Pedro

(Mt. 8.14-15; Mr. 1.29-31)

³⁸Yūcuán na te ni quenda Jesús ini vehe iī sinagoga, te cuahān yā te ni jinū yā vehe Simón. Te naná chísó Simón, yíhi xeēn quíji ña, te ni cacahān ndahú de jíin yá jehē ña. ³⁹Te ni jíta ndeyi ya nuū ña, te ni cahān yā jeē na ndíco quíji ún. Te ni nduvāha-ni ña. Te ni ndocuññi-ni ña, te ni sáha ña jeē ní yeji yā jíin de.

Jeē ní nasávāha ya cuehē ñayuu

(Mt. 8.16-17; Mr. 1.32-34)

⁴⁰Te jeē ni quée niāndii, te tāca ñáyuu jeē iyó jnáhan i cácuñú ndinuū cuehyī, ni caquindeca i jnáhan i un núū yā. Te ni soó yá ndaha ya siquī iñ iñ i, te súcuan ni nasávāha ya i. ⁴¹Te suni cuehē ñayuu ni quendacoo tachí ini i, te cácana cóhó táchí ún:

Maá ní cúu Sēhe Yaā Dios, achí.

Te ni cahān xeēn yā nuū, te tu ní jéhe ya jnūhun jeē cahán gā súcuan, chí cájini jeē maá yá cúu Cristo, Yaā ní tají Yaā Dios.

Jeē ní nacani ya jnūhun región Galilea

(Mr. 1.35-39)

⁴²Te nuū ní cundijin, te ni quenda ya cuahān sín ya yatá ñúū nuū tú ñayuu. Te tāca ñáyuu cánanducú i ya, te ni jinūcoo i nuū íne ya. Te cástétu i ya jeē tú cujiyo ya nuū i.

⁴³Te ni cahān yā jíin i:

Suni cánuú jéē nacani ri jnūhun vāha nuū tāca gā ñuu siquī ndese ndácu Yaā Dios jniñu, chí jeē yúcuán ní tají yá ruhū vēji ri. Achí yá.

⁴⁴Te ni jica cuu ya ní región Galilea, nácani ya jnūhun ini tācá vehe iī sinagoga.

Jeē ní canihin de cuehē chácá ni sáha ya

(Mt. 4.18-22; Mr. 1.16-20)

5 Te iñ quivī te íne Jesús yumar Genesaret. Te ni quecoo cuehē ñayuu, te ni chitú níhin i nuū yā, chí cácuni i cuni nahín i jnūhun Yaā Dios. ²Te ni jito ya jeē yúcu uū barco yajni yumar. Te tēe cájniñi chácá, je ni quendacoo de ini barco, te cánacate de ñunu de. ³Te ni quivī ya ini iñ barco jeē cúu barco Simón. Te ni cahān yā jíin de jeē na scáca yátá de quihín jecu gā nuū ndúte. Te ni cucōo ya, te nde ini barco un ní steén yā jnūhun nuū ñáyuu cuehē jeē yúcu i yundúte un. ⁴Te nuū ni jínu ni steén yā, te ni cahān yā jíin Simón:

Scáca ró barco na quihín yō nde nuū iyó cúnú ndute, te sínga ró ñunu ró jniñi ró chácá, áchí yá.

⁵Te ni cahān Simón:

Maestro, níñi ñiñi ni casínga ná ñunu jeē jniñi ná tí, te tu ní níhín

cuítí ná ni iin ti. Te jeē cahán maá ní súcuan, te na sínga tucu ná ñunu, áchí de.

⁶Te ni casínga de, te ni quívicoo cuehē ndasí cháca, nde nducú táhndē ñunu de. ⁷Te ni cacaja ndahá de nuū jnáhan de cáhiin ini inga barco, na quíjicoo chindéé ñájnáhan jíin de. Te ni quecoo de, te ni cascútú ndí de ti ndíndúu barco, te nde je yajni queē barco.

⁸Te ni jito Simón Pedro jeē súcuan ni cuu. Te ni jecuíñi yití de nuū Jesús, te ni cahán de:

Cujiyo ní núu ná, chi tēe íyó cuéchi cúu ná, áchí de.

⁹Chi máa de jíin táca tēe cáhiin jíin de, ni cayūhú de jeē ní canihīn de cuehē chācá un ní sáha ya. ¹⁰Te suni ni cayūhú Jacobo jíin Juan, ndíndúu séhe Zebedeo, chi tēe chindéé ñájnáhan jíin Simón cácuu de. Te ni cahán Jesús jíin Simón:

Ma yūhu ró, chi nde vijna te sáha ri jeē nihīn rō cuehē ñayuu candíje ruhū, nájnūhun ni nihīn rō cuehē chācá. Achí yá.

¹¹Yūcuán na te nuū ni jínūcoo de jíin barco nuū ñūhun íchi, te ni castóo de ndíhi ndajníñu de, te ni candiquīn de ya cuango de.

Jeē ní nasávāha ya iin tēe ndóho cuehyī stehyú

(Mt. 8.1-4; Mr. 1.40-45)

¹²Yūcuán na te íne Jesús ini iin ñuu, te ni quee iin tēe ndóho cuehyī stehyú. Te ni jito de nuū Jesús, te ni jecuíñi yití de ni jequīn de nuū de nde nuū ñūhun, te ni cahán ndahú de jíin yá:

Jíní na jēe cuu sáha ní jēe nduvāha ná, te núu cúní ni, áchí de.

¹³Yūcuán na te ni soó yá ndaha ya siquī de, te ni cahán yā:

Cúní rī. Te na ndúvāha ró, áchí yá.

Te ná ni cahán yā súcuan, te ni nduvāha-ni tēe ndóho cuehyī stehyú un. ¹⁴Te ni ndacu ya jniñu nuū de jeē ma cáchi cuítí de nuū ní iin. Te áchí yá:

Quisteén rō maá ró nuū sutú, te condahá ró jeē socó rō nuū Yaā Dios siquī jeē ndúndoo ró núu yā, nájnūhun ni ndacu Moisés jniñu jenahán. Te súcuan te cuni ñayuu jeē ní nduvāha ró. Achí yá.

¹⁵Te víhyá gā ni jitē núu jnūhun ya cuahán. Te ni cataca cuehē ñayuu jeē cúní nahín i jnūhun stéén yā, jíin jēe nasávāha ya i nuū tāca cuéhyī cándoho i. ¹⁶Te máa yá cuahán síin ya nuū tú ñayuu, te ni jicān tahú yā.

Jeē ní nasávāha ya iin tēe ndóho cuehyī ni íjin

(Mt. 9.1-8; Mr. 2.1-12)

¹⁷Te iin quivī te stéén yā jnūhun, te jecu tēe grupo fariseo jíin tēe cástéén tutu ley Yaā Dios, cáyucú de yūcuán. Te tēe un ní quecoo de nuū yā jeē véjicoo de táca ndañúu Galilea, jíin ndañúu Judea, jíin ñuu Jerusalén. Te poder maá Yaā Dios iyó jíin yá jeē nasávāha ya ñayuu cácuu. ¹⁸Yūcuán na te ni quecoo jecu tēe, cándiso de iin tēe ndóho cuehyī ni íjin, cátu de nuū iin camilla. Te cánducú de squíví de tēe ún ini vehe, te caquin de nuū íne ya. ¹⁹Te tu ní cánihīn de modo quívicoo de jíin tēe un, chi cáyucú chitú ñáyuu. Te ni cacao de siquī véhe, te ni canune de teja. Te ni cascúun de tēe cúhu un jíin camilla de nde nuū íne Jesús mēhñu ñayuu.

²⁰Te ni jini Jesús jeē cácandíje de jeē cúu nasávāha ya tēe cūhú un. Te ni cahān yā jíin tēe cūhú un:

Róhó, je íne cáhnu ni rī nuū tāca cuéchi ró, áchí yá.

²¹Yūcuán na te tēe cástéén tutu ley Yaā Dios jíin tēe grupo fariseo, ni quejéé de cájeni ni de siquī yā: ¿Ndé iin cúu tēe yáha jéé cahán de jnūhun ndevāha jeē quití ni Yaā Dios? Chi nasūu Yāā Dios cúu de jeē cóne cáhnu ni de nuū cuéchi.

²²Te ni jini Jesús jeē súcuan cájeni ni de, te ni cahān yā jíin de: ¿Naun cájeni ni rō jeē cahán ndevāha ri? ²³Jeē uú jnūhun yáha, ¿ndé iin yíí gá cáa? ¿A jéé cahán rī jíin tēe cūhú: Je íne cáhnu ni rī nuū tāca cuéchi ró? ¿Chí yíí gá jeē cahán rī: Ndocuiñī te caca ró, chí je ni nduvāha ró, achí rī?

²⁴Te vijna te na stéén rī jeē maá rí, Yaā ní nduu tēe, ndíso jniñu ri ini ñayīvi yáha jéé cóne cáhnu ni rī nuū cuéchi.

Yūcuán na te ni cahān yā jíin tēe ni íjin ún:

Cáhán rī jíin ró, ndocuiñī te naquihin ró camilla rō, te quinhun rō vehe ró, áchí yá jíin de.

²⁵Te ni ndocuiñī-ni tēe ún, jíto jínū ñayuu. Te ni naquihin de camilla nuū ni cátu de, te cuanhun de vehe de. Te nácuatáhú de nuū Yaā Dios. ²⁶Te yōhyo ni canaa ni tāca ñayuu cájito i, te ni cacahān i jeē yóhyo vāha Yaā cúu Yaā Dios. Te suni yōhyo cáyuhú i, te cacahān i:

Vijna te ni cajito yó jniñu jéhnu téyí, áchí i.

Jeē ní cana ya Leví

(Mt. 9.9-13; Mr. 2.13-17)

²⁷Yūcuán na te ni quenda ya cuahān yā, te ni jito ya nuū iin tēe

stútú xúhun renta, naní de Leví, néne de nuū cutútú xúhun renta. Te ni cahān yā jíin de:

Condiquīn ruhū na quíhín yō.

²⁸Te ni ndocuiñī de, te ni stóo de ndíhi ndajniñu de, te cuahān de jíin yá.

²⁹Yūcuán na te ni sáha Leví iin vico cáhnu vehe de, jeē cúsi ni de jíin Jesús. Te cuehē tēe cástútú xúhun renta jíin sava ga tēe, cáyūcú de mesa cáyeji de staā jíin yá. ³⁰Te tēe grupo fariseo jíin tēe cástéén tutu ley Yaā Dios, ni quejéé de cacahān de siquī tēe cáscuáha jíin yá, te ni cacajñuhún de:

¿Najehē cáyeji rō cájihu ró jíin tēe cástútú xúhun renta jíin tēe cása ha cuēchi? áchí de.

³¹Te ni cahān Jesús:

Ñayuu cáhiyo vāha, tu jíni ñuhún i tēe tájñá, chí ñayuu cácu hū cúu jeē jíni ñuhún. ³²Te ruhū nasūu jéé véji ri cana ri ñayuu tú cuēchi, jeē cúu i nájñuhun ñayuu cáhiyo vāha. Chi sa suhva véji ri cana ri ñayuu cáhiyo cuēchi, jeē na nácani ni i te stóo i cuēchi i. Achí yá.

Jeē ní cacajñuhún de ya siquī jeē cóndite ni

(Mt. 9.14-17; Mr. 2.18-22)

³³Yūcuán na te ni cacahān de jíin yá:

Tēe cáscuáha jíin Juan, jíin tēe cáscuáha jíin grupo fariseo, cuehē jínu cáhiyo ndite ni de te cájicān tahu de. Te tēe cáscuáha jíin maá ní, ¿naun tu cása ha de súcuan? Chi cáyeji de cájihu de.

³⁴Te ni cahān yā jíin de:

¿A cuu condite ni de níni jéé iyó rí jíin de? ¿A cuu sáha ró

jeē condite ni ñayuu cáhiin vico nándāha, te núu níni néne tēe nándāha? ³⁵Te quee quivī jeē cújiyo tēe ni nandāha, te quivī ún chi condite ni i. Achí yá.

³⁶Te suni ni cahān yā uū jñūhun yátá síquī jeē tu quíjnáhan jñūhun jeé jēe steén yā jíin táca jñūhun jenahán. Achí yá:

Ni iin ñayuu tu jéhnde i iin pedazo sahma jéé i, te nachuhun i nuū iin sahma túhú i. Chi núu súcuan te stívi i sahma jéé i, te suni tu quíjnáhan jeē jeé un jíin jēe tuhú. ³⁷Te tú ni iin chúhun vino jeé ini ñii túhú. Chi núu súcuan, te vino jeé un ndatá ñii, te naa vino jíin ñii. ³⁸Chi cánuú jéé cúhun vino jeé ini ñii jéé, te súcuan te quéndōo vāha ndíndúú. ³⁹Te ñayuu cájilhi vino áva, tu cúní i coho i jeé jeé, chi jeé áva cúu jeé vāha ga, achí i. Achí yá.

Jeē ní cataxín de yoco trigo quivī ndétátú

(Mt. 12.1-8; Mr. 2.23-28)

6 Te iin quivī ndétātu ní yāha Jesús cuahān yā mēhñū nuū cáa trigo. Te tēe cáscuáha jíin yá ni cataxín de yoco trigo, te ni caquiin de ini ndaha de, te ni cayeji de. ²Te sava tēe grupo fariseo ni cacajñuhún de:

¿Najehē casáha ró jniñu jeē tu íyó vāha sáha ró quivī ndétátú?

³Te ni cahān Jesús jíin de:

¿A tu ní cácahu cuíti rō tutu ndese ni sáha David, iin quivī jeē ni jíi de sōco jíin tēe cáhiin jíin de?

⁴Te ni quivī de ini vehe Yāā Dios, te ni quihín de pan iī jeē yosó ndijin nuū Yāā Dios. Te ni yeji de, te suni ni jēhe de ni cayeji tēe cáhiin jíin

de. Te tú na ley jeē cáji ni iin tēe, chí máá-ni sutū cuu caji. Te vēsú súcuan te tú na cuēchi ní íyo síquī de. Achí yá.

⁵Te ni cahān gā yā jíin de:

Ruhū, Yāā ní nduu tēe, máá rí cúu jeē ndácu jniñu síquī ndese sáha ñayuu quivī ndétátú, áchí yá.

Jeē ní nduvāha tēe ni ichi ndaha

(Mt. 12.9-14; Mr. 3.1-6)

⁶Te inga quivī ndétátú, suni ni quivī ya ini vehe iī sinagoga, te ni steén yā jñūhun. Te yūcuan íne iin tēe ni ichi ndaha vāha de. ⁷Te tēe cástéén tutu ley jíin tēe grupo fariseo, cájito yuhu de ya núu nasávāha ya tēe un quivī ndétátú, návāha nihín de cuēchi síquī yā. ⁸Te máá yá je jíin yā ndese cájeni ni de. Te ni cahān yā jíin tēe ni ichi ndaha ún:

Ndocuiñī, te condichi rō mēhñu yāha, áchí yá.

Te ni ndocuiñī de, te ni jecondichi de mēhñú. ⁹Yūcuán na te ni cahān yā jíin de jíjnáhan de:

Na cájnūhun rí rohó iin jñūhun: ¿Ndese cáhán ley síquī quivī ndétátú? ¿A jēe sáha vāha yó, chí sáha néé yó? ¿A jēe nasávāha yó ñáyuu je yajni cuu, chí sáha yó jēe cúu i? Achí yá.

¹⁰Te ndéhé yá nuū de jeē cáyūcú de ní xiin ya. Te ni cahān yā jíin tēe cúhú un:

Scáá ndaha ró.

Te ni scaá de, te ni nduvāha-ni ndaha de. ¹¹Te yōhyo ni caquitī ni tāca tēe un, te ni quejéé de cándajñuhún de síquī Jesús, ndese cahni de ya.

Jeē ní nacāji ya uxī uū tēe apóstol

(Mt. 10.1-4; Mr. 3.13-19)

¹²Te ni cuu jecu quivī, te ni quenda ya cuacacān tahú yā nde

yucu. Te ní niñu ni jicān tahú yā nuū Yaā Dios. ¹³Te nuū ní cundijin, te ni cana ya tāca tée cascuáha jíin yá. Te ni nacāji ya uxī uū de, te ni cahān yā jeē cuu de apóstol, condiso jniñu de nacani de jñuhun ya. ¹⁴Te yāha cúu síhví de jíjnáhan de: Simón jeē ní nasnání yá de Pedro, jíin ñani de Andrés, te suni Jacobo jíin Juan, Felipe jíin Bartolomé, ¹⁵Mateo, Tomás, Jacobo sēhe Alfeo, Simón tēe grupo cananista, ¹⁶Judas ñani Jacobo, jíin Judas Iscariote, tēe jeē ní nastúu de ya.

Jeē ni stéén yā nuū ñáyuu cuehē

(Mt. 4.23-25)

¹⁷Te ni nanuu ya yucu jíin táca tée un jéé cascuáha jíin yá, te ni jecuiñī yā ñin nduhvā jíin de. Te cuehē ñayuu ní región Judea jíin ñuu Jerusalén, jíin ñáyuu yumar ñuu Tiro jíin ñuu Sidón, ni quecoo i jeē cúni nahín i jñuhun stéén yā, jíin jéé ndúvāha i cuehyī cándoho i. ¹⁸Te ñayuu jeē ñuhun tachī ini i, suni ni canduvāha i ni sáha ya. ¹⁹Te ndívii ñayuu cáconi i quehé i ya, chi súcuan ndúvāha i sáha ya jíin poder yā.

Jñuhun ñayuu yōhoyo ndetū jíin ñáyuu jeē xeēn ndoho

(Mt. 5.1-12)

²⁰Te ni ndacoto ya nuū tée cascuáha jíin yá un, te ni cahān yā: Yōhoyo ndetū rohó jéé cándoho ndáhú, chi quívi ró ñuu nuū ndácu Yaā Dios jniñu.

²¹Yōhoyo ndetū rohó jéé cájii sōco vijna, chi quiji quivī jeē ndutú chiji ró.

²²Yōhoyo ndetū rohó jéé cándahyū rō vijna, chi quiji quivī jeē cuecú rō.

²²Yōhoyo ndetū rō te núu cáquitī ni ñayuu nuū rō jeē síquí ruhū, Yaā ní nduu tēe, te casquéhichī i róhó, te cácahān neé i nuū rō, te cácahān i jeē ñáyuu casáha jniñu neé cácuu ró. ²³Te na cóo síi ni rō quivī sáha i súcuan, te víhyá gā na cúsiñ ni rō, chi cáhnu téyí coo tahú rō nde andíví. Chi suni súcuan ni casáha uhū tāca jíi i jíin tée ni canacani jñuhun Yaā Dios nde jenahán.

²⁴Te nacā jeē xeēn ndoho róhó ñáyuu cucá, chi vijna-ni cúu jeē cáhīyo síi ni rō.

²⁵Nacā jeē xeēn ndoho róhó ñáyuu jeē víjna cáhīyo vetū chíji rō, chi quiji quivī jeē cuu rō sōco.

²⁵Nacā jeē xeēn ndoho róhó ñáyuu jeē víjna cájēcū rō, chi quiji quivī jeē nducuíhyá ni rō te ndahyū rō.

²⁶Nacā jeē xeēn ndoho tāca ró núu cájecnúhún ñáyuu rohó, chi suni súcuan ni cajejcnúhún jíi i tāca tée ni canacani jñuhun stáhú ndé jenahán.

Jñuhun jeē cundáhú ni yō ñayuu cájito uhū yohó

(Mt. 5.38-48; 7.12)

²⁷Te cáhán rī jíin róhó jeē cájini sōho: Cundáhú ni rō ñayuu cájito uhū rohó. Te sáha vāha ró jíin ñáyuu cáquitī ni nuū rō. ²⁸Te cacān rō jeē váha coo ñayuu cácahān ndevāha síquī rō. Te cacān tahú rō jehē ñáyuu cácahān neé núu rō. ²⁹Te núu ndé tée cani de ñin lado yiqui núu rō, te vāha ga suni cuāha ró ñga lado cani de, vēsū jeē nácuāha ró jéé ndútahū de. Te núu ndé tée cúní de quende de ticāchi

ró, suni cuāha ró jnúhun jeē na quíhín de jíin ndé camisa rō. ³⁰Te na-ni ñayuu jicán nuū rō, te cuāha ró núū i. Te ñayuu quíhin ndajníñu rō, ma nándacān rō. ³¹Te nájnūhun cácuuni rō jeē sáha vāha ñayuu jíin ró, suni súcuan na sáha vāha ró jíin i.

³²Chi núu íyó mánī rō jíin máá-ni ñayuu jeē maní jíin ró, ¿te na vé jeē váha ga sáha ró núu súcuan? Chi nde tēe cásáha cuēchi, suni maní de jíin tēe maní jíin máá de. ³³Te núu sáha vāha ró jíin máá-ni ñayuu jeē casáha vāha jíin ró, ¿te na vé jeē váha ga sáha ró núu súcuan? Chi nde tēe cásáha cuēchi, suni súcuan cásáha de. ³⁴Te núu cuāha núu ró núū maá-ni ñayuu jeē ñúhun ni rō nacuāha i nuū rō, ¿te na vé jeē váha ga sáha ró núu súcuan? Chi nde tēe cásáha cuēchi, suni jéhe núu de nuū tāca gá tēe cásáha cuēchi, návāha nanihīn tucu de. ³⁵Núu súcuan te cundáhú ni rō ñayuu cájito uhū rohó, te sáha vāha ró jíin i, te cuāha núu ró núū i. Te ma cuāha ró máá síquī jeē cani ni rō jeē suni nacuāha i nuū rō. Te súcuan te cáhnu coo tahū rō, te stéén rō jeē cácuu ró séhe Yaā kujéhnu téyí. Chi máá yá vāha ni yā jíin ñáyuu tu nácuatáhú núu yā jíin ñáyuu casáha néé. ³⁶Núu súcuan te cundáhú ni rō ñayuu, nájnūhun máá Tátá rō cundáhú ni yā i.

Ma cahán yō síquī cuēchi jnáhan yó

(Mt. 7.1-5)

³⁷Ma cahán rō síquī cuēchi ñayuu ndese sáha i, návāha suni ma cahán Yaā Dios cuēchi síquī rō jeē casáha ró súcuan. Ma cahán

xeēn rō síquī i jeē tú vāha sáha i, návāha suni ma cahán Yaā Dios súcuan síquī rō. Cone cáhnu ni rō nuū i, te suni cone cáhnu ni yā nuū rō. ³⁸Cuāha ró núū ñáyuu, te suni súcuan cuāha Yaā Dios nuū rō. Chi vāha ndasí cuáha ya nuū rō, nájnūhun jeē chícuāha váha ya, quisi ya, sáníhin ya, te nde scáa ya cuāha ya nuū rō. Chi cūhva jeē cájēhe ró núū ñáyuu, suni cūhva un cuáha ya nuū rō. Achí yá.

³⁹Te ni cahán yā ñin jnúhun yátá jíin i:

Tēe cástéén jnúhun tú ndaā, cácuu de nájnūhun tēe cuáá. Te ñin tēe cuáá, ¿á cuu stéén de ichi nuū ñga tēe cuáá? ¿A tú ñingava ndíndúú de ini xehvā? ⁴⁰Ñin tēe scuáha, tu cújéhnu de nuū maestro de. Te tēe scuáha ún, núu je ni cutūhva vāha de, te jinū de coo de nájnūhun maestro de.

⁴¹Te cuēchi jnáhan ró cúu nájnūhun jeē íne ñin yāca lúlí tinūú i. ¿Te naun cásáha ró cuenta jeē súcuan, te tu cásáha ró cuenta cuēchi máá ró jeē cúu nájnūhun jeē íne ñin nduhu tinūu máá ró? ⁴²¿Te naun cácahān rō jíin jnáhan ró: Condetu, na táva rī yāca íne tinūu ró, te tu cánacani ni rō jeē íne ñin nduhu tinūu máá ró? Tēe stáhú-ni cácuu ró núu súcuan. Xihna gā tinūu máá ró tava rō nduhu, te yūcuán na te cuu condēhe váha ró jéé táva rō yāca tinūu jnáhan ró.

Jíin jniñu cásáha ñayuu te nácuuni yó ndese ñayuu cácuu i

(Mt. 7.17-20; 12.34-35)

⁴³Tu íyó yujnu váha jeē jéhe ndehē néé, te ni tu íyó yujnu néé

jéē jéhe ndehē váha. ⁴⁴Chi jíin ndéhē jeē jéhe iin iin yujnu, te jíiní yō núu yujnu váha cúu. Chi tu scóyo yó ndehē higo xiní íñu, ni tu scóyo yó ndehē uva xiní yucú zarza. ⁴⁵Te suni súcuan tēe vāha, cāhán de jñūhun vāha, chi vāha ánuá de. Te tēe sáha néé cāhán de jñūhun néé, chi cánéé ánuá de. Chi modo ndese íyó ánuá ñayuu, máni jeē yúcuan cúu jeē cácahān i.

Siquī uú vehe

(Mt. 7.24-27)

⁴⁶¿Najehē cácahān yinñuhún ró jíin rí: Jitoho ná, áchí ró, te tu cásquicu ró jniñu ndácu ri? ⁴⁷Tāca ñáyuu vēji nuū rī te jíiní sōho jñūhun cāhán rī te squicu, na stéén rī nuū rō ndese cúu i. ⁴⁸Cúu i nájñūhun iin tēe jeē ní jeni de vehe de, te ni jete cúnú de nde ni nihin de toto, te ni jeni de siquī. Te nuū ní ndaa yūte, te ni chundahá vehe ún, te tu ní cānda cuiti sáha, chi siquī toto iin. ⁴⁹Te tāca ñáyuu jíiní sōho jñūhun cāhán rī, te tu squicu i, cúu i nájñūhun iin tēe ni jeni de vehe de nuū ñūhun, te tu yítuu jehē. Te nuū ní ndaa yūte, te ni chundahá vehe ún, te ni cotúú-ni, te ni naa i-ni. Achí yá jíin i jíināhan i.

Jeē ní nasávāha ya mozo capitán

(Mt. 8.5-13)

7 Te nuū ni jíinu ni cahān yā ni cajini nahín ñáyuu ún, te cuahān yā ñuu Capernaum. ²Te iin tēe nación Roma jeē cúu capitán, íyó iin mozo de jeē maní ndasí de jíin. Te mozo un cúhú i te je yajni cuu i. ³Te ni jini capitán jñūhun Jesús. Te ni tají de jecu tēe jéhu

cándacu jniñu nuū ñáyuu hebreo, cuangoo de nuū yā jeē cahán ndahú de jíin yá jeē na quíji ya sávāha ya mozo de. ⁴Te ni jinūcoo tēe un núu Jesús, te ni cacahān ndahú ndasí de jíin yá:

Chindéé ñáhán ní tēe cúu capitán, chi tēe vāha cúu de. ⁵Chi maní de jíin nación yō, te máá de ni ndacu jniñu ni cuvāha iin vehe sinagoga cuu yó. Achí de.

⁶Yūcuán na te cuahān Jesús jíin de jíināhan de. Te nuū ní cuyajni ya vehe capitán, te ni tají de jecu amigo de cuajnahān yā. Te ni cacahān de jíin yá:

Achí capitán jeē tu cúní de sájnéñu de níhín, chi tu cújéhu de jeē quihín ni quívi ní vehe de. ⁷Jeē yúcuan tu ní sájéhu de máá de jeē quíji de nuū ní, áchí de. Te máá jéé cahán-ni ní, te na ndúvāha-ni mozo de, áchí de. ⁸Chi máá de suni ndíso jniñu de ni casáha tēe cácujehu ga. Te cújéhu de nuū tācá soldado de, áchí de. Te núu cāhán de jíin iin tēe jeē na quíhín de, te cuahān de. Te núu cāhán de jíin inga tēe jeē na quíji de, te quíji de. Te núu ndácu de iin jniñu nuū mozo de, te sáha i, áchí de. Achí táca tēe un jíin yá.

⁹Te jeē ní jini Jesús jñūhun yāha, te ni naa ni yā. Te ni ndió cóto ya ni cahān yā jíin ñáyuu cuehē cándiquin yatā yā:

Jendaá cahán rī jíin ró jeē ni nación yō Israel tu ní níhín rī ni iin ñayuu candíje nihin súcuan, nájñūhun cándíje tēe ún, vēsú tēe nación tu jíin jñūhun Yā Dios cúu de. Achí yá.

¹⁰Te tēe ni tají capitán nuū yā, ni najinūcoo de vehe, te ni cajito de jeē jé ni nduvāha mozo un.

**Jeē ní nastécu yā sēhe
yíí ñahan viuda**

¹¹Yūcuán na te cuahān yā iin ñuu naní Naín. Te tēe cáscuáha jíin yá, jíin ñáyuu cuehē, suni cuangoo i jíin yá. ¹²Te ná ni cuyajni ya yuñúú ún, te yūcuan ní quendacoo ñayuu jeē quíchindūji i iin tēe suchí jée ni jíihī. Te máñúhún-ni i nuū naná i, te ñahan viuda cúu ña. Te cuehē ñayuu ñuu un véjicoo jíin ña. ¹³Te ná ni jito máá Jítóho yō nuū ña, te ni cundáhú ni yā ña, te ni cahān yā jíin ña:

Ma ndahyú ni, áchí yá.

¹⁴Yūcuán na te ni jinū yā nde nuū ndíyí ún, te ni jniī ya yejnū, te ni cajecuiñī tēe cándiso ún. Te ni cahān yā jíin súchi ní jihī:

Cáhán rī jíin ró, ndocuiñī, achí yá.

¹⁵Yūcuán na te ni nucōo sūchi ní jihī ún, te ni quejée i nácahān i. Te ni nacuāha ya i nuū naná i. ¹⁶Te ndivii ñayuu ni cayūhú i jeē ní cajito i, te ni cacahān i jeē yóhyo vāha Yaā cúu Yaā Dios. Te cácahān i:

Mēhñu yó ni quee iin tēe cújéhnu nácani jñuhun Yaā Dios.

Te suni cácahān i:

Máá Yaā Dios ni quejée yá chindée ñáhán yá ñayuu yā. Achí i.

¹⁷Te ni jitē núu jñuhun ya ní cáhnu región Judea jíin táca región yajni yūcuán.

Jeē ní tají Juan uū tēe nuū yā

(Mt. 11.2-19)

¹⁸Te íne Juan vecāa, te tēe cáscuáha jíin de ni cacastūhun núu de jeē súcuan ni cuu táca jniñu yáha. ¹⁹Te ni cana Juan uū

tēe ún, te ni tají de cuangoo nuū Jesús, návāha cajñuhún de ya núu máá yá cúu ndije Cristo jeē ní cachi Yaā Dios jeē tají yá, chí núu nasūu yá cúu te condetu de inga. ²⁰Te ni jinūcoo tēe un núu yā, te ni cacahān de:

Juan tēe scuándute ni tají de sãña véjicoo ná cajñuhun ná nihín núu máá ní cúu Cristo jeē achí tutu jeē quíji, chí condetu yó inga tēe quiji. Achí de.

²¹Te máá hora un ní nasávāha ya cuehē ñayuu cácuñū, jíin ñáyuu cándoho cuehyī xeēn, jíin ñáyuu ñuhun tachī ini. Te suni cuehē ñayuu cuaá ní ndundijin tinūú i ni sáha ya. ²²Te ni cahān yā jíin de:

Cuángoo te castūhun ró nuū Juan tãcá jniñu ni cajito ró jíin jñuhun ni cajini ró. Te cachi rō nuū de jeē ñáyuu cuaá cánanune tinūú i, te ñayuu yacuá cánacaca i, te ñayuu ndóho cuehyī stehyú cánduvāha i, te ñayuu sohó cánanune sōho i, te ñayuu jihí nátecu i sáha ri. Te suni nácani ri jñuhun nuū ñáyuu ndahú jée jnama Yaā Dios i. ²³Te yōhyo ndetū tēe jeē ma nácani yátá ni de jeē ruhū cúu Cristo. Súcuan cachi rō nuū Juan. Achí yá jíin de.

²⁴Te ná cuanuhun ndindúú tēe ún, te ni quejée Jesús cahān yā jñuhun Juan jíin ñayuu:

¿Na vé ni jécondēhe ró jijñahan ró ndé nuū ñuhun téhé? ¿A iin tēe jéni iin jéni uū ni, nájnūhun ite jeē cánda sáha tachī? ²⁵Te núu tuú, ¿te na vé ni jécondēhe ró núu súcuan? ¿A iin tēe cúní cújéhnu jeē ñuhun sahma lúu? Tuú chí cájini rō jeē tēe cáñuhun sahma lúu te cánducú táca jée cúsiñi ni, máni ini vehe rey

cáyūcú de. ²⁶¿Te na vé ni jécondēhe ró núu súcuan? ¿A ñin tēe nácani jnūhun Yaā Dios? Cáhán rī jíin ró jeē suu ni jecondēhe ró. Te cújēhnu ga Juan yáha vēsú tāca gá tēe ni canacani jnūhun Yaā Dios. ²⁷Chi jnūhun Juan cúu jeē ni cáhān Yaā Dios jeē yosó núu tútu ii:

Tají rí tēe nacani jnūhun rī
cosnūu de ichi núu Cristo,
návāha coo tūhva ñayuu jeē
jinú yā.

Achí Yaā Dios, achí tutu. ²⁸Te cáhán rī jíin ró jeē ini ñayīvi yáha cújēhnu ga Juan tēe scuándute vēsú tāca gá tēe jeē ni íyo ini ñayīví. Te vēsú súcuan te tāca tēe núu ga ini ñuu nuū ndácu Yaā Dios jniñu, cújēhnu ga de vēsú Juan. Achí yá.

²⁹Te tāca ñayuu jíin tāca tēe cástútú xúhun renta, ni cajini i jnūhun cáhán yā, te ni cajetáhú i jeē Yaā ndaa cúu Yaā Dios, chi je ni cajendute i nuū Juan. ³⁰Te tēe grupo fariseo jíin tēe cástéén tutu ley, ni casquéhichí de jnūhun jeē cuní Yaā Dios sáha ya jeē váha de, chi tu ní cájendute de nuū Juan.

³¹Te ni cahān gā maá Jítóho yō:

Yáhá cachi rī ñin jnūhun yátá návāha na cúní rō ndese cúu ñayuu tiempo vijna. ³²Cúu i nájñūhun sūchí lúlí cáhiin nuū yáhu cácasíquf i. Te cácana ndee i xiní jnāhan i: Ni cativi rī scuilí, te tu ní cájita jéhe ró. Te ni cajita rī yaa jeē cuihyá jíta, te tu ní cándahyū rō, achí i. Te nájñūhun cándāa sūchi lúlí un jēe tu ní núnjahan ni i ni ñin, suni súcuan cándāa ró. ³³Chi ni quiji Juan tēe scuándute, te cuehē jínu ni íyo ndite ni de, tu ní yéji de staā ni tu ní jíhi de vino. Te tu ní

cánujnahan ni rō, chi ni cacahān rō jeē ñūhun tachí ini de. ³⁴Yūcuán na te ni quee máá rí, Yaā ní nduu tēe, te yéji rī jíhi rī, te tu cánujnahan ni rō, te chísóó jnūhun ró cácahān rō jeē máni máá jēe yéji rī jíhi rī vino. Te quíjnāhan rī jíin tēe cástútú xúhun renta jíin tāca gá tēe cásáha cuēchi, áchí ró. ³⁵Te núu cúndichí ñin tēe jíin jnūhun Yaā Dios, te jíin jniñu sáha de te cájini tāca gá tēe ndíchí jeē ndichí de. Achí yá.

Jeē ñne Jesús vehe Simón tēe fariseo

³⁶Te ñin tēe fariseo ni cana de Jesús jeē cáji yā staā jíin de. Te ni jinū yā vehe de, te ni cucōo ya mesa jeē cáji yā staā. ³⁷Yūcuán na te ñin ñahan sáha cuēchi, ndéé ña ñuu yúcuán, te ni jini ña jeē ni jíin Jesús vehe tēe fariseo un, yéji yā staā. Te ni quee ña jíin ñin frasco yuū luu jeē ñūhun chitú aceite perfume. ³⁸Te íin yítí ña nuū jehé yā, te ndáhyú ña. Te ni quejéé ña stáji ña jehé yā jíin ndute t́nútú ña, te ni nasíchí ña jíin ixi xíní ña. Te ni techūhú ña jehé yā, te ni chuhun ña perfume un. ³⁹Te tēe fariseo un jeē ní cana de ya, ni jito de jeē súcuan ni sáha ña, te ni jeni ni de: Núu tēe nácani jnūhun Yaā Dios cúu tēe yáha, te cuni de ndese ñahan cúu ñahan yáha jeē quehé ña de, chi ñahan sáha cuēchi cúu ña, jéni ni de. ⁴⁰Yūcuán na te ni cahān Jesús jíin de:

Simón, cúní rī cahān rī jíin ró ñin jnūhun.

Te ni cahān maá de:

Cahān ní, Maestro.

⁴¹Te ni cahān Jesús:

Ñin tēe jéhe núu xūhún, ni íyo uū tēe táu nuū de. ñin de ni cotaū uhūn

ciento denario, te inga de ni cotaū uū xico uxī denario. ⁴²Te tú na vé cánevāha tēe un jēē náchunaa de. Te tēe jēhe núu xūhun ní ine cáhnu ni de nuū ndíndúú tēe ún. Núu súcuan te cachi rō: Jeē ndíndúú tēe ún, ¿ndé iin de coo maní gā jíin de? Achí yá.

⁴³Te ni cahān Simón:

Jéni ni na jēē tēe ni cotaū cuehē gā, achí de.

Te ni cahān yā jíin de:

Ndaā cahán rō, achí yá.

⁴⁴Te jító ya nuū ñahan ún, te ni cahān gā yā jíin Simón:

¿A jító ró na vé sáha ñahan yáha?

Jeē ní quee rī vehe ró, te tu ní jēhe ró ndute jeē ndúndoo jehē rī nájñūhun íyó costumbre. Te ñahan yáha ní stáji ña jehē rī jíin ndute tñnúú ña, te ni nasíhí ña jíin ixi xíní ña. ⁴⁵Te tu ní téchūhu ró ruhū nájñūhun íyó costumbre. Te ñahan yáha, nde jeē ni quívi ri vehe ró, tu jécuiñī ña jeē téchūhú ña jehē rī.

⁴⁶Te tu ní chūhun ró aceite xiní rī nájñūhun íyó costumbre. Te ñahan yáha ní chuhun ña aceite perfume jehē rī. ⁴⁷Núu súcuan te cáhán rī jíin ró jeē ni stéén ña jeē yóhyo maní ña jíin rí siquī jeē íne cáhnu ni rī nuū tāca cuéchi ña, vēsú cuehē cúu. Te núu cone cáhnu ni rī nuū iin ñayuu iyó jecu-ni cuéchi, te jecu-ni stéén i jeē maní i jíin rí, achí yá.

⁴⁸Te ni cahān yā jíin ña:

Je íne cáhnu ni rī nuū tāca cuéchi ró, achí yá.

⁴⁹Yūcuán na te ñayuu cáyeji staā jíin yá, ni quejéé i cácahān maá i:

¿Ndé iin ga cúu tēe yáha jéé cahán jeē íne cáhnu ni nuū cuéchi? achí i.

⁵⁰Te Jesús ni cahān gā yā jíin ñahan ún:

Ni candíje ró rúhū, te jeē yúcuán ní jnama ri rohó. Cuáhán te na ndúsiñ ni rō. Achí yá.

Jñūhun ñahan ní cajejníñu nuū yā

8 Yūcuán na te ni cuu jecu quivī, te ni jica cuu Jesús tācá ñuu náhnu jíin ñuu lulí. Te nácani ya jñūhun vāha te cástūhun yá ndese ndácu Yaā Dios jniñu. Te ndihúxí uū tēe cácuu apóstol, cájica de jíin yá. ²Te suni íyó jecu ñahan cájica jíin yá, jeē ní quenehen ya tachí ini sava ña, te ni nasávāha ya sava ña jeē cándoho cuehyī. Te iin ña cúu María ñuu Magdala, te ini ñahan un ní quenehen ya uxā tachí. ³Te inga ña cúu Juana, ñasihí Chuza, tēe ndíso jníñu ini vehe Herodes. Te inga ña cúu Susana, jíin cuéhē gā ñahan jeē cáchindéé ñáhán ña, jēhe ña tāca jéé jíni ñúhún yá jíin de jíjnáhan de.

Jñūhun yátá síquī tēe jéte trigo

(Mt. 13.1-9; Mr. 4.1-9)

⁴Te cuehē ñayuu tācá ñuu yūcuán ní jinūcoo i nuū Jesús. Te ni cacutútú cuéhē ndasí ñayuu, te ni cahān yā iin jñūhun yátá jíin i:

⁵Iin tēe cate trigo, ni quenda de jeē cáte de. Te ná ni quejéé de jéte de, te jecu trigo ni jité yuhíchi. Te ni cajeñū ñayuu siquī, te ni cayejí saa. ⁶Te jecu gā ni jité nuū ñūhun yuū. Te ni cane, te ni ichī-ni, chí tú cuehē cajin. ⁷Te jecu gā ni jité nuū náne iñu. Te inuú-ni ni canecoo iñu jíin, te ni jesí nuū. ⁸Te jecu ni jité nuū ñūhun váha. Te nuū ní jehnu, te ni jēhe cuehē nuní, chí jeē iin iin ní jēhe nde ciento. Achí yá.

Yücuán na te ni cahān jee ya:
Tāca róhó jēē jíni sōho, na
chúsóhó ró, achí yá.

Najehē cahán yā máni jnūhun yátá

(Mt. 13.10-17; Mr. 10-12)

⁹Te tēe cáscuáha jíin yá ni
cacajnúhún de ya na vé cuní cahān
jnūhun yátá yáha. ¹⁰Te ni cahān yā:

Róhó jíjnáhan ró, chí sáha Yāā
Dios jeē cájēcūhun ni rō jnūhun ni
yisáhi yáha, ndese quívícoo ñayuu
ndaha Yāā Dios jeē ndacu ya jniñu
nuū i. Te máni jíin jnúhun yátá
cáhán rī jíin sava ga i, návāha vēsú
cájito i, te quéndōo i nájnúhun jeē
tú na vé ni cájito i. Te vēsú cájini
sōho i, te ma jécūhun ni i.

**Jeē ní castūhun cájī yá jnūhun yátá
téé jéte trigo**

(Mt. 13.18-23; Mr. 4.13-20)

¹¹Jnúhun yátá yáha cúní cahān:
Trigo un cúu jnúhun Yāā Dios.
¹²Te trigo jeē ní jítē yuhíchi cúu
nájnúhun ñayuu cájini sōho jnúhun,
te quíji-ni jexeén te quénde-ni
jnūhun ini anuá i, návāha ma
candíje i te ma jnáma rī i. ¹³Te
trigo jeē ní jítē nuū ñúhun yuū cúu
nájnúhun ñayuu cájini jnúhun, te
cájetáhú i te cácusī ni i jíin. Te tu
cúcutú jnúhun ún ini anuá i. Te
jecu-ni quivī cácandíje i, te núu
ni quejéé jnúndóho, te cájica yátá
i. ¹⁴Te trigo jeē ní jítē nuū nāne
iñu cúu nájnúhun ñayuu cájini
jnūhun, te cuango i te cácujnēñu
i jíin jniñu i jíin jēē cuní i cucúca
i te coo sī ni i. Te tu íje i jíin
jnūhun ya. ¹⁵Te trigo jeē ní jítē nuū
ñúhun váha cúu nájnúhun ñayuu
cájini nahín jnúhun ya, te cájni

vāha i, chí íyó váha íyó ndāā anuá
i. Te cáhije i jíin jnúhun ya, chí
cácandíje vāha i.

Jnúhun yátá síquī lámpara

(Mr. 4.21-25)

¹⁶Núu nástíin ñayuu iin lámpara,
te tu jési i ni iin síquī, ni tu jéni i
chíji jito. Chí sa suhva jéni i nuū
sucún, návāha cundíjin nuū ñáyuu
quívícoo vehe. ¹⁷Te suni súcuan
tu íyó ni iin jnúhun sáhi jēē ma
cúni ñayuu, chí ndíhi tāca jnúhun
cácahān i nane ndíjin te cuni ñayuu.

¹⁸Núu súcuan te na cúni sōho
vāha ró, chí ñayuu je jécūhun
ni, stéén gā yā nuū i. Te ñayuu tu
cándíje, máá jecu jeē jéni ni i jeē
jini i, sa suhva naa. Achí yá.

Náná yā jíin ñani yā

(Mt. 12.46-50; Mr. 3.31-35)

¹⁹Yücuán na te ni quee naná yā
jíin táca ñani yā nuū íne ya. Te
tu ní cúu quívícoo ña nuū yā síquī
jeē chítú ñayuu. ²⁰Te iin ñayuu ni
castūhun núu yā:

Náná ni jíin táca ñani ni cáhiin
nuū quéhe, te cácuni cahān jíin ní,
áchí i.

²¹Te ni cahān maá yá:

Suni náná rī jíin ñani rī cácuu
ñayuu cájini sōho jnúhun Yāā Dios
te cáscuicu i, achí yá jíin i.

**Jeē ní jecuñī tachī níhin jíin mar ni
sáha ya**

(Mt. 8.23-27; Mr. 4.35-41)

²²Te iin quivī ni quivī ya iin
barco jíin téé cáscuáha jíin yá, te ni
cahān yā jíin de:

Na yáha yó quíhīn yō inga lado
mar.

Te ni cascáca de barco cuangoo de. ²³Te níni cáscáca de barco, te ni quixí yā. Te ni jequĩhi ñin tachí níhin nuū mar, te je yajni chitú ndute ini barco, te ndúcú quee barco. ²⁴Te ni castóna de ya, te ni cacahān de:

Maestro, Maestro, vijna te quee yó chíi ndute te naa yō, achí de.

Te ni ndocuĩñi-ni ya, te ni cahān yā nuū tachí níhin jíin núū mar. Te ni cajecuiñi-ni, te ni cuu nayúú ñi-ni. ²⁵Te ni cahān yā jíin tée cáscuáha jíin yá:

¿Naun tu cácañíje ró?

Te máá de yōhyo ni cayūhú de, te cánaa ni de, te cácahān de jíin jnáhan de:

¿Ndé ñin ga cúu tēe yáha jéē nde nuū tachí níhin jíin núū ndúte ndácu de jniñu te cájetáhu jéē cahān de? Achí de.

Tēe Gadara jeē ndóho tachí

(Mt. 8.28-34; Mr. 5.1-20)

²⁶Yūcuán na te ni cane ya jíin de región Galilea, te cuahān yā región Gadara jeē ñne ñnga lado mar Galilea. ²⁷Te nuū ní nanuu ya nuū ññhun íchi, te ñin tēe ñnuu un ní quee de nuū yā. Te je ni cuu cuehē cuiyā ññhun cuehē tachí ini de. Te tu ññhun cuiti de sahma, ni tu ndéé de vehe, chi sa suhva nuū cáyindūji ndīyi ndéé de. ²⁸Te ná ni jito de nuū Jesús, te ni jecuiñi yití de nuū yā, te ni cana cóhó de:

¿Naun vēji ní núū ná, Jesús Sēhe Yaā cujéhnu téyí? Cáhān ndahú ná jíin ní jeē ma stóho ní sáña, achí de.

²⁹Súcuan ni cahān de, chi je ni ndacu ya jniñu nuū tachí un jéē na quéndacoo ini de. Te ni cuu cuehē

jínu sáha xeēn tachí jíin de. Te cájihni ñayuu ndaha de jehē de jíin cadena, návāha tú na vé sáha de. Te ndihí-ni jéhnde de, te jínu de jéhén de nde nuū ññhun téhé sáha tachí ún. ³⁰Te Jesús ni cajñuhun yá de:

¿Na vé naní ró?

Te ni cahān de:

Legión naní ná.

Súcuan ni cahān de jeē naní de, chi ññhun cuehē tachí ini de. ³¹Te ni cacahān ndahú táchi un jíin yá jeē ma tají yá quihñin ini tñhñchi cúnú. ³²Te yucu yúcuan cáhiin cuehē quĩñi cájitu ti. Te tachí jeē cáñuhun ini tēe un ní cacahān ndahú jíin yá jeē na cuáha ya jñuhun quĩvicoo ini quĩñi ún. Te ni jēhe ya jñuhun. ³³Te ni quendacoo tachí ún ini tēe ún, te ni quĩvicoo ini quĩñi. Te quĩñi un ní cajinu ti ni ñngoo ti ñin yucáva, ni quĩvicoo ti nuū mar, te ni ndaquĩhi ti ndute, ni cajihí ti.

³⁴Te tēe cándito ti ni cajito de jeē súcuan ni cuu, te ni cayūhú de. Te ni cajinu de cuacastūhún de nuū ñáyuu ñnuu un jíin ñáyuu tāca rancho. ³⁵Te cuangoo ñayuu un cuácondéhé i na vé ni cuu. Te ni jinūcoo i nuū ñne Jesús. Te ni cajito i nuū tēe ní quendacoo tachí ini, néne de nuū jehé Jesús, te ññhun de sahma, te je ni nducájí xini de. Te ni cayūhu ñáyuu ún. ³⁶Te tēe ní cajito ni canacani de jñuhun nuū ñáyuu, ndese ni nduvāha tēe ni ññhun tachí ini.

³⁷Yūcuán na te tāca ñáyuu ní región Gadara, ni caquejéé i cácahān ndahú i jíin yá jeē na cújiyo ya quihñin yā, chi yōhyo cáyūhú i. Te ni ndīvi ya ini barco

jeē quínuhun yā. ³⁸Te tēe jeē ní quendacoo tachī ini, ni cahān ndahú de jíin yá jeē na cuáha ya jnūhun quihīn de jíin yá. Te Jesús ni cahān yā jeē na quéndōo de, te áchí yá:

³⁹Cuánuhun vehe ró, te nacani ró jnūhun ndese yōhyo jéhnū jniñu ni sáha Yaā Dios jíin ró, achí yá jíin de.

Te cuahān de, te ni nacani de jnūhun níñu ún, ndese yōhyo jéhnū jniñu ni sáha Jesús jíin de.

Jnūhun sēhe síhí Jairo jíin ñahan ní quehé yusáhma ya

(Mt. 9.18-26; Mr. 5.21-43)

⁴⁰Te nuū ní najinū Jesús inga lado mar, te ñayuu un ní cacusiñi ni i jeē ní najinū yā, chi ndihī i cándetu i ya. ⁴¹Te ni quee ñin tēe cújéhnū ini vehe i sinagoga, naní de Jairo. Te ni jecuiñi yití de nuū jehé yā, te ni cahān ndahú de jíin yá jeē na quihín yā jíin de vehe de. ⁴²Chi íyó ñin sēhe síhí de jeē mañúhún-ni i nuū de, te íyó i nájnūhun uxī uū cuiyā. Te sūchí un je yajni cuu i. Te cuahān yā jíin de. Te cuehē ñayuu cándiquin i ya, te ni chitú níhin i xiin ya cuangoo i.

⁴³Te mēhñu ñayuu un cuahān ñin ñahan cúhú jeē ní cuu uxī uū cuiyā ndóho ña cuehyī niñi. Te ni jexin ña tāca jéē névāha ña jíin tēe tájna, te tu ní ndúvāha ña sáha ni ñin de. ⁴⁴Te ni quee ña ichi yátá yā, te ni quehé ña yusáhma ya. Te ni jecuiñi-ni niñi ña.

⁴⁵Yūcuán na te ni cahān Jesús: ¿Ndé ñin ni quehé sahma ri? achí yá.

Te ndivii i ni cacahān jeē tu ní quehé i. Te Pedro jíin tēe cáhiin jíin de, ni cacahān de:

Maestro, jíto ní jéē ñayuu cuehē yāha ní chitú níhin i xiin ní, te cáquihī i níhin, te cájnūhun ní ndé ñin ni quehé sahma ní.

⁴⁶Te ni cahān Jesús:

Tuú chi ñin ñayuu ni quehé sahma ri, chi ni jini rī jeē jíin fuerza rī ni nduvāha ñin ñayuu, achí yá.

⁴⁷Te ni jini ñahan un jéē tu ní cúu coo yuhu jeē ni sáha ña. Te quísi i ña ni quee ña, te ni jecuiñi yití ña nuū jehé yā. Te jíto jínúu tāca ñayuu, te ni cachi cají ña najehē ni quehé ña yusáhma ya, jíin jéē ní nduvāha-ni ña. ⁴⁸Te ni cahān yā jíin ña:

Séhē, ni candíje ró jéē cuu nasávāha ri rohó, te jeē yúcuan ní nduvāha ró. Cuahán te na ndúsiñi ni rō, achí yá.

⁴⁹Te níni cáhán gā yā súcuan, te ni quee ñin tēe vēji vehe Jairo, tēe cújéhnū ini sinagoga, te ni cachi nuū de:

Je ni jihī sēhe síhí ní. Te ma sájnēñu ga ní Maestro, achí de.

⁵⁰Te ni jini Jesús jnūhun yāha, te ni cahān yā jíin Jairo:

Ma yūhu ró, chi candíje-ni ró, te nastécu rī sēhe ró, achí yá.

⁵¹Te ni jinū yā vehe, te tu ní jéhe ya jnūhun quivī ñayuu jíin yá, chi máa-ni Pedro jíin Juan jíin Jacobo jíin tátá naná sūchi síhí un. ⁵²Te cácuuíhyá ni ndihī ñayuu cáyūcú ini vehe, te cándahyū i jehē sūchí un. Te ni cahān yā:

Ma ndahyú rō jijnáhan ró. Tu ní jíhí i, chi quixí-ni i, achí yá.

⁵³Te ni cajecū catá i jeē ni cáhán yā, chi cájini i jeē ni jihī sūchi síhí un. ⁵⁴Yūcuán na te ni jniñi ya ndaha i, te ni cahān jee ya jíin i:

Síhī, ndocuiñī, achí yá.

⁵⁵Te ni natecu i, te ni ndocuiñī-ni i. Te ni ndacu ya jniñu jeē na cuáha ña jeē caji i. ⁵⁶Te tátá i náná i yōhyo ni canaa ni de cájito de. Te ni ndacu nihin ya jniñu nuū de jeē ma cáchi de nuū ni ñin jeē súcuan ni cuu.

Jeē ní tají yá ndihúxí uū de cuanacani de jñūhun

(Mt. 10.5-15; Mr. 6.7-13)

9 Te ni nastútú yá ndihúxí uū tēe cáscuáha jíin yá, te ni sáha ya jeē cóndiso jniñu de te coo poder de jeē quénehen de tachī ini ñayuu, jíin jēe nasávāha de ñayuu cácuñu. ²Te ni tají yá de quingoo de jeē nácani de jñūhun ndese ndácu Yaā Dios jniñu, jíin jēe nasávāha de ñayuu cácuñu. ³Te ni cahān yā jíin de:

Ma cóndiso ró jēe cuajniñu ró ichi, ni vara, ni ñunu, ni staā, ni xūhún. Te quihīn rō jíin ñin-ni camisa, te ma cóndiso ró inga. ⁴Te na-ni vehe núu ni quivicoo ró, te yūcuán coyūcu ró nde quenda tucu ró quihīn rō inga ñuu. ⁵Te núu ñin ñuu tu cájetáhú i róhó, na quéndacoo ró yúcuan, te scóyo ró tícachā jehē rō, te súcuan stéén rō jeē iyó cuéchi i jeē tu ní cájetáhú i. Achí yá.

⁶Te ni quendacoo de cuahān de, ni cajica nuu de tǎcá ñuu, ni canacani de jñūhun jnáma Yaā Dios ñayuu. Te tǎca lado ni canasávāha de ñayuu cácuñu.

Jeē ni jíhī Juan tēe scuándute

(Mt. 14.1-12; Mr. 6.14-29)

⁷Te Herodes, tēe cúu gobernador, ni jini jñūhun de tǎcá jniñu sáha

Jesús. Te ni cunéé ni de, chi cájeni ni sava ñayuu cácahān i jeē Juan ni natecu de. ⁸Te sava ga i cácahān jeē ní nane Elías, tēe ni nacani jñūhun Yaā Dios nde jenahán. Te sava ga i cácahān jeē inga tēe ni nacani jñūhun ya nde jenahán, ní natecu de. ⁹Te ni cahān Herodes:

Juan chi ni ndacu ri jniñu ni tahndē xinī. Núu súcuan ¿te ndé tée cúu tēe yáha jeē jíin jñūhun ri jeē sáha de jniñu jéñu? Achí de.

Te ni nducú Herodes modo coto de nuū Jesús.

Jeē ni scáji yā uhūn mil tēe

(Mt. 14.13-21; Mr. 6.30-44; Jn. 6.1-14)

¹⁰Te ni ndecoo tēe cácuu apóstol jeē ní tají yá ni canacani jñūhun. Te ni cacachi de nuū yā tǎcá jniñu ni casáha de. Te ni jeca ya de cuahān sīin ya jíin de ñin lugar nuū tú ñayuu, yajni ñuu Betsaida. ¹¹Te ni cajini ñayuu, te suni cuangoo i. Te ni jetáhú yá i, te ni nacani ya jñūhun ndese ndácu Yaā Dios jniñu, te ni nasávāha ya ñayuu cácuñu.

¹²Te nuū cuáhini, te ni quecoo ndihúxí uū tēe cáscuáha jíin yá, te ni cacahān de jíin yá:

Tají ní ñayuu cuehē yāhá na quingoo i tǎcá ñuu jíin tǎca rancho yajni yāhá, te nducú i nuū ndóo i te cuaan i jeē caji i, chi tú na vé iyó yáha, achí de.

¹³Te ni cahān yā jíin de:

Cuáha máá ró jeē caji i, achí yá.

Te ni cacahān de:

Tú na vé cánevāha ná, chi uhūn-ni staā jíin úū-ni chācá. Te vēsú núu quicuaan ná stāa caji ndihī ñayuu cuehē yáha, te ni ma cúu, achí de.

¹⁴Chi íyó nájñuhun uhūn mil tēe. Te ni cahān yā jíin tēe cáscuáha ún:

Cahān jíin ñáyuu na cúcoo sñin cincuenta cincuenta i, áchí yá.

¹⁵Te súcuan ni casáha de, te ni cacucōo ndíhi ñáyuu. ¹⁶Te ni quihin ya ndíhuhún staā jíin úu chācá un, te ni ndacoto ya ichi ándiví, te ni nacuatáhú yá. Te ni tahu cuéché yá staā ún, te ni jēhe ya nuū tēe cáscuáha jíin yá, te ni casaja de nuū ñáyuu cuehē. ¹⁷Te ndivii i ni cayeji, te ni candutú chíji i. Te ni canastútú de pedazo staā jeē ní quendōo, te ni chitú úxí uū jīca.

Jeē ní cahān Pedro jeē Jesús cúu Cristo

(Mt. 16.13-19; Mr. 8.27-29)

¹⁸Te ñin quiví ni cusñin Jesús, jícan tahu yā, te máa-ni tēe cáscuáha un cáhiin de jíin yá. Te ni cajñuhun yá de:

Ruhū, ¿ndé ñin cúu ri cácahān ñáyuu? achí yá.

¹⁹Te ni cacahān de:

Sava i cácahān jeē cúu ní Juan tēe ni scuándute. Te sava ga i cácahān jeē cúu ní Elías, tēe ni nacani jñuhun Yaā Dios nde jenahán. Te sava ga i cácahān jeē inga tēe ni nacani jñuhun ya ni natecu de.

²⁰Yūcuán na te ni cajñuhun yá de:

Te máa ró, ¿ndé ñin cúu ri cácahān rō?

Te ni cahān Pedro:

Máa ní cúu Cristo, Yaā ní tají Yaā Dios, achí de.

Jeē ní castühún Jesús jeē cúu yā

(Mt. 16.20-28; Mr. 8.30-9.1)

²¹Yūcuán na te ni ndacu ñihin ya jñiñu nuū de jeē ma cáchi de

jñuhun yáha núu ní ñin ñáyuu. ²²Te ni cahān yā:

Máa rí, Yaā ní nduu tēe, cánuú ndoho xeēn rī. Te tāca tēe jéhnú jíin sūtú cácujehnú jíin tēe cástéén tutu ley, squéhichí de ruhū. Te cahni de ruhū, te nuū uní quiví te natecu rī, achí yá.

²³Yūcuán na te ni cahān yā jíin ndíhi de:

Na-ni ñáyuu núu cúní i condiquin i ruhū, na cási i jeē cuní máa i, te na cóndiquin i ruhū tāca quiví, te cuāha i jñuhun ndoho i jñundóho jeē siquí rī, vēsú na cúu i. ²⁴Chi núu ndé ñáyuu cuní i cācu i nuū jñundóho quiji nuū i jeē siquí ruhū, núu súcuan te jñahnū ndetū i ñí cáni. Te núu ndé ñáyuu, vēsú na cúu i jeē siquí ruhū, te cotecu i ñí cáni. ²⁵¿Chi ndé cuajñiñu vēsú na cúndeyí ñáyuu ñihin i ñí ñáyiví, te núu squiví i máa i nuū jñahnú ndetū i ñí cáni? ²⁶Chi núu na-ni ñáyuu cúcanu i jeē siquí ruhū, Yaā ní nduu tēe, jíin síquí jñuhun cáhán rī, suni súcuan cucanu rī jeē siquí máa i, quiví ndíji ri. Te quiví ún chi yōhyo luu cujéhnú ri, nájñuhun cújéhnú Tátá rī, te suni cácujehnú ndajéhé ndoo ya sáha ya. ²⁷Te jendaá cahán rī jíin ró jeē sava tēe cáhiin yáhá, ma cúu de chi nde cuni de jeē ndácu Yaā Dios jñiñu jíin poder yā. Achí yá.

Jeē tucu ni nduu ya

(Mt. 17.1-8; Mr. 9.2-8)

²⁸Yūcuán na te nájñuhun nuū uná quiví jeē ni cáhān yā jñuhun yáha, te ni caa ya ñin yucu, cuacacān tahu yā. Te Pedro jíin Jacobo jíin Juan cuango de jíin yá. ²⁹Te níni

jícán tahú yā, te tucu ni nduu nuū yā, te sahma ya ni nducufjín quiyi, te ndíndēé. ³⁰Yūcuán na te ni canecoo uū tēe, cándajnúhún de jín yá. Te cúu de Moisés jín Elías, tēe ni cahīyo jenahán. ³¹Te luu ndíndēé de cáhiin de, te ni cacahān de jín yá siquī jeē ní cuyajni cuu yā űuu Jerusalén. ³²Te Pedro jín tēe cáyūcu jín de, yōhoyo cájii de máhna, te vēsú súcuan te tu ní cáquixi de. Te ni cajito de jeē lúu ndíndēe yá jín ndíndúu tēe cáhiin jín yá. ³³Te nuū ní cacujio tēe un nuū yā, te ni cahān Pedro jín yá:

Maestro, nacā jeē váha jeē cáhiin ná yáha. Te na sáha ná únī vehe ramada, ñin cuu máá ní, ñnga cuu Moisés, te ñnga cuu Elías, achí de.

Te tu sáha de cuenta na vé cúu jeē cahán de. ³⁴Te níni cáhán de súcuan, te ni quee vicō nūhun ní jesi nuū de jínáhan de. Te ni cayūhú de jeē cáhiin de chiji vicō ún. ³⁵Te nuū vicó un ní cahān ñin jnūhun:

Yāha cúu Sēhe ri jeē maní ndasí rí jín. Te na cúni nahín ró jnūhun cáhán yā, achí.

³⁶Te nuū ni jínu ni cahān jnūhun ún, te máá ñin na Jesús ín ya nuū de. Te máá de tu ní cácahān cuiti de, te tāca quívī ún tu ní cácachí de nuū ni ñin jeē súcuan ni cajito de.

Jeē ní nasávāha ya ñin sūchi nūhun tachī ini

(Mt. 17.14-21; Mr. 9.14-29)

³⁷Te ñnga quívī un ní nanuu ya yucu jín de. Te cuehē ñayuu ní jijnahan i ya. ³⁸Te mēhñu ñayuu cuehē un ní cana jee ñin tēe:

Maestro, jícán tahú na nuū ni jēē condēhe ní sēhe yí ná, chi máñúhún i nuū ná. ³⁹Te máni jeē sáha xeēn tachī jín i, te cána cóho i sáha, te jéhni yīhí i, te jée tiñū yuhu i. Te yōhoyo stóho i, te yōhoyo uhū siaá i. ⁴⁰Te ni cahān ndahú ná jín tēe cáscuáha jín ní jeē na quénehen te tachī ún, te tu ní cúu sáha de, achí de.

⁴¹Te ni cahān yā jín de jínáhan de:

Ñayuu yōhoyo ñihni ni cácuu ró, chi tu cácañdije ró jēē cuu nduvāha i. ¿Nasaa ga quívī condee rí jín ró jeē cuándeyí ni rí jín ró? Cuáquihin sēhe ró na quíji i, achí yá.

⁴²Te níni véji i nuū yā, te ni cotúu i ni sáha tachī, te ni jehni yīhí i. Te Jesús ni cahān xeēn yā nuū tachí un, te ni nasávāha ya sūchí un, te ni nacuāha ya i nuū tatá i. ⁴³Te ndívii ñayuu nahán ní canaa ni i cájito i jeē yóhoyo jéhnu jniñu sáha Yā Dios.

Jeē ni cáhān tucu ya jeē cúu yā

(Mt. 17.22-23; Mr. 9.30-32)

Te níni canaa ni i cájito i tāca jniñu ni sáha Jesús, te ni cahān yā jín tēe cáscuáha jín yá:

⁴⁴Chuhun vāha ni rō jnūhun cáhán rí yāhá, te ma náa ni rō, chi ruhū, Yā ní nduu tēe, nastúu i ruhū quívī ri ndaha tāca tēe xeēn, achí yá.

⁴⁵Te tu ní cájecūhun ni de jnūhun cáhán yā, chi tu ní cúu cuiti jecūhun ni de. Te ni cayūhú de cajnúhún de ya siquī jnúhun ni cahān yā.

Ndé ñáyuu cúu jeē cújéhnua ga

(Mt. 18.1-5; Mr. 9.33-37)

⁴⁶Yūcuán na te tēe cáscuáha jíin yá ni caquejéé de cácahān de siquī núu ndé iin de cújéhnua ga. ⁴⁷Te Jesús ni jini yā jeē súcuan cájeni ni de. Te ni jni ya ndaha iin sūchi lúlí, te ni jeni ya i xiin ya. ⁴⁸Te ni cahān yā jíin de:

Na-ni ñayuu núu jeē siquí ruhū jetáhú i sūchi lúlí yáha, te ruhū jetáhú i. Te ñayuu jetáhú rúhū, suni jetáhú i Yāa ní tají rúhū vēji ri. Te ñayuu núu ga mēhñu ró, máá i cújéhnua ga, achí yá.

Ñayuu tu cáhán siquī yā, iin i jíin yá

(Mr. 9.38-40)

⁴⁹Yūcuán na te ni cahān Juan: Maestro, ni cajito ná iin tēe jeē jíin síhví ní quénehen de tachí ini ñayuu. Te ni cajesi na jēe sáha de, chí tu jíca de jíin yó, achí de.

⁵⁰Te ni cahān Jesús jíin de:

Ma cási rō jeē sáha de, chí tēe tu cáhán siquī yō, iin de jíin yó, achí yá.

Jeē ni cáhān yā nuū Jacobo jíin Juan

⁵¹Te ni cuyajni quiví jeē quínuhun yā andíví, te ni tee téyí ni yā jeē quihín yā ñuu Jerusalén. ⁵²Te ni tají yá sava tēe yósnúu de jíin jnúhun jeē jinú yā. Te cuango de iin ñuu Samaria návāha nducú de nuū ndóo ya. ⁵³Te ñayuu Samaria un tu ní cájehe i vehe ndóo ya, chí ni cajini i jeē ndé Jerusalén quihín yā. ⁵⁴Te Jacobo jíin Juan, tēe cáscuáha jíin yá, ni cajini de jeē súcuan cúu, te ni cacahān de jíin yá:

¿A cúni ni jéé ndácu yó jniñu quiiji ñuhūn nde andíví, nájnūhun ni

sáha Elías, návāha naa ñayuu yáha? Achí de.

⁵⁵Yūcuán na te ni ndió cóto Jesús nuū de, te ni cahān yā nuū de:

Tu cájini rō na nuū vēji jnúhun cácahān rō. ⁵⁶Chi ruhū, Yāa ní nduu tēe, tú vēji ri jeē snáa rī ñayuu, chí sa suhva jeē jnáma ri ñayuu, achí yá.

Yūcuán na te cuahān yā jíin de inga ñuu.

Siquí ñáyuu jeē cáconi i condiquin i ya

(Mt. 8.19-22)

⁵⁷Te níni jíca ya ichi jíin de, te ni cahān iin tēe jíin yá:

Condiquin na níhín quíhín yō ndé-ni cúu-ni nuū quihín ni, áchí de.

⁵⁸Te ni cahān Jesús jíin de:

Tāca núcuui, íyó yāu cava cáñuhun tí. Te suni saa, iyó táca tí. Te ruhū, Yāa ní nduu tēe, tú nuū cusú rī, achí yá.

⁵⁹Te ni cahān yā jíin inga de:

Condiquin ruhū na quíhín yō.

Te máá tēe un ní cahān de:

Condetu ní ndé na quíchindūji ná tátá na xíhna gā. Yūcuán na te condiquin na níhín, áchí de.

⁶⁰Te ni cahān Jesús jíin de:

Stóo tāca ndíyí na chindūji jnáhan ndíyí, chí ndíyí cácuu ñayuu tu cácadíje. Te róhó, cuáhán te nacani ró jnúhun ndese ndácu Yāa Dios jniñu, achí yá.

⁶¹Yūcuán na te suni ni cahān inga de:

Cúni na condiquin na níhín, te cuāha ní jnúhun jeē xíhna gā quicahān na jíin ñáyuu cáyucú vehe ná, achí de.

⁶²Te ni cahān Jesús jíin de:

Núu na-ni tēe quéjéé de conquiñ de ruhū, te núu máni jeē nácani cuíhyá ni de siquī tāca jéé ni stóo de, núu súcuan te cúu de nájñuhun iin tēe jítu jíin yátá, te jíco coto de ichi vehe de. Te ma cuajniñu de conquiñ de ruhū siquī jñiñu ndácu Yaā Dios, achí yá.

Jeē ní tají yá uní xico uxí de

10 Te ná ni cuu tācá jniñu yáha, te máá Jítoho yō ni nacāji ya uní xico uxí gā de. Te ni tají yá ndihuū ndihuū de jeē cósnūú de nuū yā, quingoo de tācá ñuu jíin tāca lugar nuū jé yajni quihīn maá yá. ²Te ni cahān yā jíin de:

Ñayuu yáha cácuu i nájñuhun trigo jeē tahndé, te ndaā jeē cuehē cúu, te tēe cahnde chi jecu-ni de cúu. Núu súcuan te cacān tahu rō nuū maá Jítoho rō Yaā Dios jeē na tají yá cuehē tēe na quíngoo de cahnde de trigo, cúu jeē nacani de jñuhun ya nuū ñáyuu. ³Te cuángoo jíjñáhan rō, te na cástuhun rí nuū rō jeē tají rí rohó quíngoo rō nájñuhun londe mēhñu yñhī. ⁴Te ma cóndiso rō ñunu, ni yñjñi xūhún, ni ndijēn. Te ichi ma cucuéé rō ndajñuhun rō jíin ni iin. ⁵Te na-ni vehe núu ni quívi rō, te xihna gā cahān rō: Na quíji jñuhun ndeyí jñuhun sñi ni nuū rohó, ñáyuu vehe yáha, achi rō. ⁶Te núu vehe yúcuan íyo ñáyuu vāha, te jñuhun ndeyí ní cahān rō jinū siquī i. Te núu tuú, te jñuhun ndeyí ní cahān rō ma jinú siquī i. ⁷Te suni vehe yúcuan coyūcu rō, te caji rō coho rō jéé cuáha ñáyuu nuū rō. Chi siquī jniñu jeē nácani rō jñuhun nuū ñáyuu,

te cánuú coto i rōhó. Ma quéndōo rō tijñi vehe, chi iin-ni vehe. ⁸Te na-ni ñuu núu ni quívicoo rō, te núu cuatáhú i rōhó, te caji rō tāca jéé cuáha i nuū rō. ⁹Te nasávaha rō ñáyuu cácuñu ñuu yūcuán. Te cachi rō nuū i: Je ni cuyajni Yaā Dios jeē ndacu ya jniñu nuū rō, achi rō. ¹⁰Te na-ni ñuu núu ni quívicoo rō, te núu tu ní cájetáhú i rōhó, te quendacoo rō ini calle yūcuán, te cahān rō: ¹¹Nde ticachā ñuu rō yāha jéé ni jñi jehē rī, na náscóyo ri jeē cúu seña jeē iyó cuéchi rō jéé tu ní cájetáhú rō. Te na cónahán rō jeē Yaā Dios je ni cuyajni ya jeē ndacu ya jniñu nuū rō nuú. ¹²Te cáhán rī jíin rō jeē quívi juicio te xeēn gā coo castigo siquī ñuu casáha súcuan vēsú siquī ñuu Sodoma nuū ní casáha ndasí ñáyuu cuéchi.

Jeē ní cuxeēn yā nuū sava ñuu nihni ni

(Mt. 11.20-24)

¹³Nacā jeē xeēn ndoho rō, ñáyuu ñuu Corazín. Te nacā jeē xeēn ndoho rō, ñáyuu ñuu Betsaida. Chi núu ini ñuu Tiro jíin ñuu Sidón ni sáha ri jniñu jéhu jeē ni sáha ri ini ñuu maá rō, te yachí nacani ni ñáyuu ñuu un jéé stóo i cuéchi i núú. Te sáha i seña jeē steēn jeē nácani ni i siquī cuéchi i, chí cuhun i sahma jnúú te chuhun i yaā xini i núú. ¹⁴Núu súcuan te quívi coo juicio te xeēn gā coo castigo siquī rō jíjñáhan rō vēsú jeē ni íyo siquī ñuu Tiro jíin ñuu Sidón. ¹⁵Te rōhó ñáyuu ñuu Capernaum, ¿á cájeni ni rō jeē cujéhu rō nájñuhun iin jeē cáa cuahān ichi ándiví? Tuú chi

sa nanuu ró ndé lugar nuū cáyūcu ánuá ndīyí. Achí yá.

¹⁶Te ni cahān gā yā jíin tée jeē tají yá quingoo:

Ñayuu chusóhó jnúhun cahān rō, nuū maá rí chusóhó i. Te ñayuu squéhichī rohó, suni ruhū squéhichī i. Te ñayuu squéhichī ruhū, suni squéhichī i Yaā ní tají rúhū vēji ri. Achí yá.

Jeē ní ndecoo tēe ni tají yá

¹⁷Te ni ndecoo unī xico uxí tēe un, cácusī ni de te cácahān de jíin Jesús:

Nde tachī cájetáhú núu na jéē jíin sǎhví ní, chí quéndacoo ini ñayuu, achí de.

¹⁸Te ni cahān yā jíin de:

Súcuan cúu, chí ni jito ri jeē nájnūhun iin taja ni ñingava Satanás ichi ándiví, chí ni quende rī ndīhi poder un. ¹⁹Te vijna te je ni jēhe ri fuerza nuū rō jeē cueñū rō nájnūhun siquī tāca cóō jíin tísuhma, te cundeyí ró siquī tāca fuerza maá jéē jito uhū yohó, te tú na vé sáha ga jíin ró. ²⁰Te ma cúsi ni rō maá-ni jeē cájetáhú táchī nuū rō, chí sa cusī gā ni rō jeē yosó sǎhví ró nde andiví. Achí yá.

Jeē ní cusī ni Jesús

(Mt. 11.25-27; 13.16-17)

²¹Te suni hora un ní cusī ni Jesús, ni sáha Espíritu Santo, te ni cahān yā:

Na cútahū na núu ni Tátā, Jitoho andiví jíin ñáyiví. Chí ni jesi ni táca jnúhun ndíchí ní, jeē ma cúni ñayuu ndichí jíin ñayuu tūhva cuenta ñayiví yáha. Te ni steén ni núu ñayuu cácuu nájnūhun sūchi

lúlí. Chí súcuan ni nujnahan ni ni Tátā, achí yá.

²²Te ni cahān gā yā:

Ndivii ni jēhe Tátá rī nuū rī. Te tu cájini ñayuu ndé iin cúu ruhū, Sēhe Yaā Dios, chí máá-ni Tátá rī cúu jeē jiní yā ruhū. Ni tu cájini ñayuu ndese Yaā cúu máá Tátá, chí máá-ni Sēhe cúu jeē jiní. Te iyó ñayuu jeē cuni máá Sēhe stéén yā nuū i ndese Yaā cúu Tátá yā, te máá i suni cuni i. Achí yá.

²³Yūcuán na te jito ya nuū tée cáscuáha ún, te ni cahān yā jíin máá-ni de:

Yōhoyo ndetū ñayuu cájito jniñu jéhu jeē cájito máá ró. ²⁴Chí cáhán rī jíin ró jeē cuehē tēe ni canacani jnúhun Yaā Dios, jíin táca rey, ni cacuni de coto de jeē cájito máá ró, te tu ní cájito de. Te suni ni cacuni de cuni sōho de jeē cájini sōho máá ró, te tu ní cájini de. Achí yá.

Jnúhun iin tēe vāha ni nación Samaria

²⁵Yūcuán na te iin tēe stéén tutu ley Yaā Dios, ni ndocuiñí de ni jecahān de jíin Jesús, chí cúni de coto ndee de ya. Te ni cajnúhún de:

Maestro, ¿na vé sáha ná te nihin tahu na cotecu na ní cáni andiví? áchí de.

²⁶Te ni cahān yā jíin de:

¿Ndesé yósó núu tútu ley? ¿Ndesé cáhán cáhu ró? Achí yá.

²⁷Te máá tée un ní cahān de jeē cahān nuū tútu:

Coo maní ndasí ró jíin máá Jitoho rō Yaā Dios, nde jnáa ndasí ró sáha ró ndīhi jeē cúsi ni yā, nde jíin ini jíin ánuá rō, jíin ní fuerza rō, jíin ní jéē níjnūní rō. Te cundáhú ni rō

jnáhan ró nájñuhun cúndáhú ni rō maá ró, achí. Achí de.

²⁸Te ni cahān yā jíin de:

Vāha ni cahān rō. Te núu cuu sáha ró súcuan te nihin tahú rō cotecu rō níí cáni, achí yá.

²⁹Te máá téé un cúní de jeē quéndōo ndaā de nuū yā jíin jnúhun ni cajñuhún de, te ni cahān de:

¿Te ndé ñáyuu cácuu jnáhan ná? achí de.

³⁰Te ni cahān Jesús:

Īin tēe ni quenda de ñuu Jerusalén, ni cuun de cuahān de ñuu Jericó. Te ichi un ní canecoo ñacuīhna núū de, te ni caquende ndīhi ndajñíñu de, te nde sahma ñúhun de. Te ni cacani ndevāha ún de jeē jé yajni cuu de núú. Te ni castóo ún de, te cuango. ³¹Te ni cuu jeē íchi un yáha ĩin sutū quihín de, te ni jito de nuū téé ún, te ni síyo-ni de cuahān de. ³²Te suni súcuan ĩin tēe grupo levita jeē cájejníñu ini templo, vēji de ichi ún, te ni jito de nuū téé ún, te ni yāha jíca-ni de cuahān de. ³³Te ĩin tēe nación Samaria, suni vēji de ichi ún, te nuū ní jito de, te ni cundáhú ni de tēe ún. ³⁴Te ni quee de nde nuū catú téé ún, te ni chuhun de aceite jíin vino nuū ni túji tēe ún, te ni jihni de sahma nuū. Te ni soó de tēe un síquī quití de, te cuahān de jíin téé un ndé ĩin mesón, te ni condito de. ³⁵Te inga quivī ún, hora jeē quihín de, te ni tava de uū xūhun cáa, ni jēhe de nuū tēe chíí mesón. Te ni cahān de: Coto ní téé yáha, te núu caxin gā ni xúhun ní jíin de, te nuū nándicó ná te nachunaa ná núú ní, achí de. ³⁶Núu súcuan ¿te ndese jéni ni rō? Jeē ndinúní téé ún, ¿ndé

ĩin de ni chihí cuenta jeē jnáhan de cúu tēe ni canecoo ñacuīhna núū?

Achí yá jíin tēe stéén tutu ley.

³⁷Te ni cahān de:

Tēe jeē ní cundáhú ni tēe ni tuji, vēsú tēe ñuu jíca cúu de.

Yūcuán na te ni cahān Jesús jíin de:

Cuáhán núu súcuan, te suni súcuan cundáhú ni rō tāca ñáyuu, achí yá.

Jeē ni íne ya vehe Marta jíin María

³⁸Yūcuán na te ni quihín tucu ya ichi cuahān yā, te ni jinū yā ĩin ñuu lulí. Te ĩin ñahan nání Marta, ni cana ña ya ni jehēn yā vehe ña. ³⁹Te Marta, íyó ĩin cuhū ña nání María. Te María ni cucōo ña nuū jehé Jesús, jíni nahín ña jñuhun cáhán yā. ⁴⁰Te Marta chi cúnéé máá ña jíin cuéhē jniñu sáha ña. Te ni quee ña nuū yā, te ni cahān ña:

¿A tu sáha ní cuenta jeē cuhū na ní stóo máñuhún ña sāña núú jniñu? Te cahān ni jíin ña na chindéé ñáhán ña sāñá, achí ña.

⁴¹Te ni cahān Jesús jíin ña:

Marta, yōhyo ndíhví ni rō jíin cuéhē jniñu, te yōhyo stóho ró máá ró jíin. ⁴²Te íyó ĩin-ni jniñu cánuú. Te María chi ni nacāji ña jniñu cánuú, suu jeē ndíhví ni ña síquī jnúhun Yā Dios, te ma quēnehen yó ña nuū ún. Achí yá.

Jeē ni stéén yā ndese cacān tahú yō

(Mt. 6.9-15; 7.7-11)

11 Te ĩin quivī íne Jesús ĩin lugar jícan tahú yā. Te nuū ní ndíhi ní jícan tahú yā, te ĩin tēe scuáha jíin yá, ni cahān de:

Stéén ni núú ná ndese cacān tahú na jíjnáhan ná, nájñuhun ni steén

Juan nuū tée ni cascuáha jíin de, áchí de.

²Te ni cahān yā jíin de:

Jeē cacān tahu rō, te suhva cahān rō:

Tátá maá ná jijnáhan ná jéē ndeé ní andiví,

níní na cóo yíñuhún ná nuū ní, chí Yaā ií cúu ní.

Te ñuhun ni na jéē yachí quiji quiví ndacu ní jniñu níf ñáyiví yáha.

Te na cóo táca jniñu nújnahan ni ní,

nájñuhun íyó ini andiví, súcuan na cóo ini ñayiví.

³Staa jeē cátecu na táca quíví, cuáha ní núū ná vijna.

⁴Te cone cáhnu ni ni núū táca cuéchi cásaáha ná núū ní, nájñuhun cáhine cáhnu ni na núū ñáyuu casáha cuéchi nuū ná.

Te ma cuáha ní jñuhun jeē coto ndee jexeén sãñá,

chí sa suhva jnama ní sãña nuū táca jéē neé.

Achí rō jijnáhan rō. Achí yá.

⁵Te ni cahān gā yā:

Núu ndé ñin róhó íyó ñin amigo rō, te núu quihín rō vehe de sava ñuú te cahān rō jíin de: Amigo, cuáha núu uní staa nuū rí. ⁶Chí ñin amigo rí jeē jica de viaje, ni quee de vehe rí, te tú na vé névāha rí jeē cuáha rí caji de. Achí rō. ⁷Te núu cahān tēe íne ini vehe: Ma stáhān rō ruhū, chí ndíhyú yehyí rí, te ma cúu ndonda rí jeē cuáha rí nuū rō, achí de. ⁸Te cáhān rí jíin rō, vēsú ma ndóna de cuáha de nuū rō siquí jeē cúu de amigo rō, te jeē yóhoyo stáhān rō de, jeē

yúcuān ndonda de cuáha de ndíhi jeē jíni ñuhún rō. ⁹Núu súcuan te cáhān rí jíin rō jijnáhan rō jeē suni súcuan cacān tahu rō nuū Yaā Dios, te cuáha ya nuū rō. Te nducú rō táca jéē váha íyó núu yā, te nihín rō sáha ya. Te cacān tahu rō nde nihín rō, nájñuhun sáha ñayuu cahán yehyí ndé nune quíví i. ¹⁰Chí táca ñayuu jicán, cuáha ya nuū i. Te ñayuu nducú, suni nihín i. Te ñayuu cahán, nune ya ichi nihín i jeē cuní i.

¹¹¿Te ndé ñin rō cúu tátá, te núu sēhe rō jicán i staā nuū rō, te á cuáha rō ñin yuū nuū i? Te núu jicán i chācá, ¿te á cuáha rō ñin coō nuū i? ¹²Chí núu jicán i ñin ndiví, ¿te á cuáha rō ñin tisuhma nuū i? Tú cuítí súcuan. ¹³Núu súcuan te máá rō jijnáhan rō, vēsú ñáyuu íyó cuéchi cácuu rō, te cájini rō cuáha rō jéē váha nuū sēhe rō. Te nagā ni cuu máá Tátá rō andiví jéē ma cuáha ya Espíritu Santo nuū ñáyuu jicán nuū yā. Achí yá.

Jeē ní cacahān de jeē jejniñu ya fuerza Satanás

(Mt. 12.22-30; Mr. 3.19-27)

¹⁴Te quénehen ya ñin tachí ini ñin tēe, jeē ní cuñíhín de ni sáha. Te nuū ní quenda tachí, te ni nacahān tēe ni cuñíhín un. Te ni canaa ni ñayuu cájito i. ¹⁵Te sava ñayuu ún chí ni cacahān i:

Jíin fuerza Satanás jeē cujéhnu nuū tachí, quénehen tēe yáha táca táchí ini ñayuu, achí i.

¹⁶Te sava ga i cúni i coto ndee i ya, te ni cajicān i jeē sáha ya jeē coo ñin seña ichi ándiví. ¹⁷Te máá yá jiní yā jeē súcuan cájeni ni i, te ni cahān yā:

Tācá nación jeē sasín máá te cuajnáhan máá, núu súcuan te snáá jeē iyó váha máá. Te núu ñayuu iin vehe sásín máá te cuajnáhan máá, núu súcuan te ma cúu ga coyūcu cáhnu. ¹⁸Te suni súcuan Satanás, núu sásín máá jíin jnáhan tachī, ¿te ndese cuiñi nihin jeē ndácu jniñu núu súcuan? Chi cácahān rō jeē jíin fuerza Satanás quénehen ri tachī ini ñayuu. ¹⁹Te núu súcuan cúu núu, te ñayuu cascuáha jíin máá ró jijnáhan ró, ¿na jíin fuerza cáquenehen máá i tachī, cájeni ni rō? Núu súcuan te máá i jíináhan i cachi jeē ní castívi ndasí ró ni cacahān rō jeē cáquenehen ri tachī jíin fuerza Satanás. ²⁰Te tuú chi sa suhva jíin fuerza Yaā Dios cúu jeē quénehen ri tachī. Núu súcuan te je ndéé Yaā Dios mēhñu ró jéé ndácu ya jniñu.

²¹Te núu iin tēe ndacuī, ndíto de vehe de jíin nujíi de, núu súcuan te tú ni iin ndajniñu de ndoñúhún. ²²Te núu quiji inga tēe ndacuī gā, te cundeyí jíin tēe ún, núu súcuan te quende nujíi de jeē ndíto de vehe de, te sáha de ndese cúní maá de jíin ndajniñu jeē quende de. Te nájnūhun tēe ndacuī gā ún, súcuan cúu máá rí nuū Satanás.

²³Te ñayuu tu iyó mání jíin rí, núu súcuan te jító uhū i ruhū. Te ñayuu tu nástútú jíin rí, núu súcuan te sa jéte núu i ñayuu vėjicoo nuū rí.

Tachī jeē nastútú jnáhan ndívi ini ñayuu

(Mt. 12.43-45)

²⁴Núu ni quenda iin tachī ini iin tēe tu cándíje, te jíca cuu nuū ñúhun téhé, ndúcu núu ndétátú, te

tu níhín, yūcuán na te jéni ni maá: Na quínuhun rí vehe nuū ní quenda ri. ²⁵Te núu ni ndee tucu, te jító jeē tēe tu cándíje un cúu de nájnūhun iin vehe jeē ní ndundo. ²⁶Yūcuán na te jéquihiñ uxā gā tachī xeén gā vésú maá. Te quívicoo ini tēe un jéé cóyūcu yúcuán. Núu súcuan te xeén gā ndoho tēe un jéé sándíhí vésú jeē xíhna ñúhún. Achí yá.

Yōhyo ndetū ñayuu cájini nahín jnúhun ya

²⁷Te níni cáhán yā jnúhun yáha, te iin ñahan íne mēhñu ñayuu cuehē un, ní cahān jee ña jíin yá: Yōhyo ndetū ñahan ní scácu níhín te ni scáxin ña níhín, áchí ña.

²⁸Te ni cahān yā:

Sa suhva yōhyo ga ndetū ñayuu cájini nahín jnúhun Yaā Dios te cásquícu i, áchí yá.

Jeē ní cajicān ñayuu tu cácañdíje iin jniñu jéhnu

(Mt. 12.38-42; Mr. 8.12)

²⁹Te ni cataca cuehē gā ñayuu nuū Jesús, te ni quejéé yá cahán yā: Ñayuu iyó vijna mání cásáha néé i. Te cájicān i iin jniñu jéhnu jeē steén núu Yaā ní tají Yaā Dios cúu ri. Te tú na inga jniñu jéhnu stéén rí nuū i, chi máá-ni jniñu jéhnu nájnūhun ni cuu jíin Jonás, tēe ni nacani jnúhun Yaā Dios nde jenahán. ³⁰Chi nájnūhun ni cajini ñayuu ñuu Nínive jeē ní cuu iin jniñu jéhnu jíin Jonás, suni súcuan cuni ñayuu tiempo yáha jeē coo iin jniñu jéhnu jíin rúhū, Yaā ní nduu tēe, jeē quijnáhan jíin modo ni ndoho Jonás. ³¹Te reina jeē ní cujéhnu nación ichi sur, natecu ña jíin ñayuu tiempo

yáha, quivī juicio jeē sándaā yā cuēchi, te cahān ña cuēchi siquī i. Chi nde jicá téyí ní quiji ña ni jini nahín ña jnūhun ndíchí ní cahān rey Salomón. Te vijna chi cújéhnū ga ruhū, Yaā íne yáhá vésú Salomón, te tu cá candíje ró rúhū. ³²Te tāca ñáyuu ñuu Nínive nuū ní nacani Jonás jnūhun, natecu i jíin ñáyuu tiempo yáha, quivī juicio jeē sándaā yā cuēchi, te cahān i cuēchi siquī ñáyuu yáha. Chi máa i ni canacani ni i ni castóo i cuēchi i quivī ní nacani Jonás jnūhun nuū i. Te vijna chi cújéhnū ga ruhū, Yaā íne yáhá vésú Jonás, te tu cá candíje ró rúhū.

Jnūhun yátá síquī lámpara

(Mt. 5.15; 6.22-23)

³³Núu nástfín ñayuu ñin lámpara, tu chísāhí i, ni tu chúne i chíji ñin cajón. Chi sa suhva jéni i nuū sucún, návāha cundijin nuū ñáyuu quívicoo vehe. ³⁴Te tinūu ró cúu nájñūhun lámpara nuū yiqui cúñu rō. Núu súcuan te núu tinūu ró íyó ndijin, te níí-ni yiqui cúñu rō cúndijin. Te núu tinūu ró tu íyó ndijin, te níí-ni yiqui cúñu rō iyó nee. ³⁵Te suni súcuan cúu ánuá rō, te coto ró jéē ma cáni néé ni rō, návāha tú coo nee ini anuá rō. ³⁶Chi núu máni jniñu váha cásáha ró, te tú na jniñu néé cásáha ró, núu súcuan te luz yā cúndijin vāha ini anuá rō, nájñūhun ñin lámpara jeē sáha jeē cúndijin vāha. Achí yá.

Jeē ni cáhān yā jeē iyó cuēchi de jíjnāhan de

(Mt. 23.1-36; Mr. 12.38-40; Lc. 20.45-47)

³⁷Te nuū ní cuu ni cahān yā, te ñin tēe grupo fariseo ni cana de ya

jeē caji yā staā vehe de. Te ni quivī ya, te ni cucōo ya mesa jeē caji yā staā. ³⁸Te tēe fariseo un náa ni de jíto de jeē tu squícu ya costumbre jeē nandahá yá te caji yā staā. ³⁹Te ni cahān maá Jítóho yō jíin de:

Róhó tēe fariseo jíjnāhan ró, chi nájñūhun jeē cánacate ró yátā vaso jíin yátā cohó cúu jeē nándahá ró. Te ichi íni rō chi ñūhun máni máa jnūhun cuíhná jíin jnūhun néé. ⁴⁰Tēe cánéé cácuu ró. ¿A tu cájini rō jeē Yaā ni sáha yiqui cúñu rō, suni ni sáha ya anuá rō? ⁴¹Te jeē cájēhe ró caridad nuū ñáyuu ndahú, na sáha ró síquī jeē cundáhú ndije ni rō i. Te súcuan te coo ndaā anuá rō.

⁴²Nacā xeēn ndoho róhó tēe fariseo, chi cásquícu ró tācā jniñu lúlí, te tu cásquícu ró jniñu cánuú. Chi cásáha ró úxí uxí nuhni tamínu jíin ruda jíin táca yucū, te cásocō rō ñin ñin siquī tāca úxí un núu Yaā Dios. Te tu cásáha cuiti rō jniñu ndaā, ni tu cáhíyo maní rō jíin Yaā Dios. Tāca jéē yáha cánuú sáha ró núu, te suni ma stóo ró jéē socó rō tāca yúcū ún.

⁴³Nacā xeēn ndoho róhó tēe fariseo, chi máni cánujnahan ni rō cucōo ró núu silla yíñūhún gá ini vehe ñi sinagoga. Te cánujnahan ni rō jeē cahán yíñūhún ñáyuu jíin ró nuū calle.

⁴⁴Te nacā xeēn ndoho róhó tēe cástéén tutu ley Yaā Dios, jíin róhó tēe fariseo, chí tēe stáhú-ni cácuu ró. Chi cándāa ró nájñūhun yaū ndíyí jeē tú ndijin, chí cásnāa rō anuá ñayuu, te tu jíin i jeē súcuan cásáha ró jíin i. Achí yá jíin de.

⁴⁵Yúcuán na te ni cahān ñin tēe stéén tutu ley:

Maestro, jeē ni cāhān ni táca jnúhun yáha, suni nde siquī maá ná jíjnāhan ná ní cahān ní, áchí de jíin yá.

⁴⁶Te ni cahān yā:

Suni nacā xeēn ndoho rōhó tée castéén tutu ley. Chi suni castéén rō táca ley ni catava maá ró jeē yíí sáha, te tu cácuendeyí ñáyuu squícu i. Te máá ró, chi ni iin xiní ndáha ró tu cáscánda ró jéē squícu ró.

⁴⁷Nacā xeēn ndoho ró jíjnāhan ró. Chi casáha ró vehe siquī nuū yíndūji ndīyí jíí rō, tēe ni canacani jnúhun Yaā Dios nde jenahán. Te suni tāca jíí rō ni cajehni de tēe ún.

⁴⁸Te jeē casáha ró súcuan cúu jeē cáquiynáhan ró jíin de siquī níñū ní casáha de. Chi máá de ni cajehni tēe ún, te máá ró casáha ró vehe ndīyí ún.

⁴⁹Jeē yúcuān nde jenahán ní cahān Yaā Dios iin jnúhun ndíchí: Tají rí tāca tēe nacani jnúhun ri jíin táca tēe apóstol quingoo de nuū i. Te sava de cahni i, te sava ga de coto xeēn i, áchí Yaā Dios. ⁵⁰Te súcuan te siquī ñáyuu tiempo yáha na cóndee cuēchi jeē ní cajehni jíí i tēe ni canacani jnúhun Yaā Dios, nde quivī ni jécōo ñayiví te nde vijna, ⁵¹nde Abel xihna gā te nde Zacarías, tēe ni cajehni de ini templo sava mēhñu cuarto ii jíin altar. Núu súcuan te cāhán ri jíin ró jeē siquī ñáyuu tiempo yáha condee tāca cuēchi ún.

⁵²Nacā xeēn ndoho rōhó jéē castéén tutu ley, chi cájesi rō ichi jeē jécūhun ni ñayuu jnúhun ya. Chi ni máá ró tu cácuāni rō jecūhun ni rō, ni tu cájēhe ró jnúhun jeē jecūhun ni ñayuu cácuāni. Achí yá.

⁵³Te jeē ni cāhān yā jnúhun yáha, te tēe castéén tutu ley Yaā Dios jíin tēe fariseo, yōhoyo ni caquitī ni de nuū yā. Te ni caquejéé de castíchí de ya siquī cuehē gā jnúhun. ⁵⁴Chi yuhu-ni cánducú de núu sanaa te stívi yá jnúhun cahān yā, návāha nihin de cuēchi siquī yā.

Siquī jnúhun stáhú cácahān tēe fariseo

12 Te níni súcuan cúu, te ni cacutútú cuéhē mil ñayuu, chi nde cájeñū i siquī jehé jnāhan i. Te xihna gā ni quejéé yá cahán yā jíin tēe cáscuáha jíin yá:

Coto má candíje ró levadura tēe grupo fariseo, chi suu cúu jnúhun stáhú cácahān de. Chi jíté núu nuū ñáyuu, nájnūhun ndécava levadura nuū ñújen pan. ²Chi jnúhun stáhú un má quéndōo sāhí cuiti, chi ndihí natūu ndijin, te cuni ñayuu. ³Núu súcuan te suni máá ró, tāca jnúhun ni cacahān rō jeē tu ní jíiní ñayuu, iin quivī te cuni vāha i. Te tāca jnúhun ni cacahān sāhi ró jeē ndihyú yehyí, iin quivī te cahān jee ñayuu yatā tācá vehe.

Jeē ní cachi yā ndé iin cúu jeē yūhu yó

(Mt. 10.28-31)

⁴Cāhán ri jíin ró jijnāhan ró, amigo: Ma yūhu ró coto ró ñáyuu cahni yiquí cúñu rō, chi núu ni cajehni i rōhó, te tuá na vé cúu sáha ga i. ⁵Te na cáchi ri nuū rō ndé iin yūhu ró coto ró: Jeē yūhu ró coto ró cúu Yaā Dios jeē núu sáha ya jeē cúu rō, te íyó poder yā chune ya rohó infierno. Suu máá yá cúu jeē yūhu ró jeē ma stívi ró nuū yā.

⁶Te tǎcá saa chi tú yahu ndéé tǎ, chi nde uhūn tǎ jeē uú centavo lulí. Te ni iin ti tu náa ni Yaā Dios jeē tu ndító ya. ⁷Te nagā ni cuu rǎhó jǎjnáhan ró, chi nde ndihí ixi xíní rǎ je ni cahu ya. Núu súcuan te ma yūhu ró jǎjnáhan ró, chi cánuú ndasí gá rǎ nuū yā vēsú cuehē tǎcá saa.

Ñayuu jejnúhún Jesucristo nuū inga ñayuu

(Mt. 10.32-33; 12.32; 10.19-20)

⁸Te cáhán rǎ jǎjn ró, tǎca ñáyuu jeē cuajnúhún rúhū nuū inga ñayuu, suni súcuan ruhū, Yaā ní nduu tēe, cuajnúhún rǎ i nuū tǎcá ndajéhé Yaā Dios. ⁹Te tǎca ñáyuu jeē ma cuajnúhún rúhū nuū inga ñayuu, suni súcuan ma cuajnúhún rǎ i nuū tǎcá ndajéhé Yaā Dios.

¹⁰Te núu ndé ñáyuu cahān i siquī ruhū, Yaā ní nduu tēe, cone cáhnu ni Yaā Dios nuū i. Te núu ndé ñáyuu cahān ndevāha i siquī Espiritu Santo, ma cóne cáhnu ni Yaā Dios nuū i.

¹¹Te núu cuandeca i rǎhó tǎca vehe ii sinagoga nuū tēe cásandaā cuēchi, jǎjn núu tēe cácuu tohō, te ma nácani ndasí ni rǎ ndese stíó cuíñí rǎ jñuhun nuū de. ¹²Chi máa hora un te Espiritu Santo steén yā nuū rǎ ndese cahān rǎ. Achí yá.

Siquī jeē ma ténuū yō ndajniñu cúcá

¹³Yūcuán na te iin tēe íne nuū ñáyuu cuehē un ní cahān de jǎjn Jesús:

Maestro, cahān ni jǎjn ñani na jēe na táhú sáva de tahū na jǎjn de, áchí de.

¹⁴Te ni cahān yā jǎjn de:

¿Ndeé iin ni jeni ruhū jeē ndacu ri jniñu tahū sáva tahū rǎ? Achí yá.

¹⁵Te ni cahān gā yā:

Condito ró máa ró jǎjnáhan ró jēe ma ndíyo ni rǎ xūhun jǎjn tǎca gá. Chi vēsú cuehē ndasí ndajniñu névāha iin tēe, te nasūu jēe yúcuán sáha jeē quéndōo ndetū de, áchí yá.

¹⁶Yūcuán na te ni cahān yā iin jñuhun yátá jǎjn i:

Ni iyo iin tēe cúcá jeē névāha ñuhun jeē cúu vāha ndasí itu. ¹⁷Te tēe cúcá un ní nacani ni de: ¿Ndese sáha ri? Chi tuá ndé cuhun niñi ri. Achí de. ¹⁸Te ni jeni ni de: Suhva na sáha ri. Na cánu rǎ tǎca yácā rǎ, te nasáha ri jeē náhnu ga. Te yūcuán chuvāha ndihí ri niñi ri jǎjn tǎca ndajniñu ri. ¹⁹Yūcuán na te cahān rǎ jǎjn ánuá rǎ: Vijna te cuehē teyí névāha yó jēe canda cuehē cuiyā. Na ndétātu yó te caji yō coho yó, te na cúsiñi ni yō, ni jeni ni de. ²⁰Te ni cahān Yaā Dios jǎjn de: Tēe cánée cúu ró. Chi jecuāā vijna cuu rǎ, te tǎca jēe ní chuvāha ró, ¿ndé tēe cuu? Achí Yaā Dios jǎjn de. ²¹Te súcuan ndoho tǎca tēe jeē sacúcá de máa de, te tu ndúcú de jeē quendōo ndetū de sáha Yaā Dios. Achí yá.

Yaā Dios ndító ya yohó

(Mt. 6.25-34)

²²Te ni cahān yā jǎjn tēe cáscuáha jǎjn yá:

Núu súcuan te cáhán rǎ jǎjn ró: Ma nácani ndasí ni rǎ siquī jeē cótecu rǎ, núu ndese caji rǎ, ni siquī sahma, núu ndese cuhun ró. ²³Chi Yaā Dios ni sáha ya jeē técu rǎ jǎjn yiqui cúñu rǎ, te nagā ni cuu jeē ma cuáha ya jeē caji rǎ jǎjn jēe cúhun ró. ²⁴Condēhe ró ndese cátecu quití cácuu nájnūhun cálu, chi tu cátaji ti, ni tu cánastútú ti jeē chuvéha

tí, ni tú yacā tī. Te vēsú súcuan te máá Yaā Dios scáji yā tī. Te cánuú ndasí gá rō jijnáhan rō vēsú tācá quiti ún. ²⁵¿Te ndé iin ró, á cuu scuéhnu ró máá ró sava metro gā, vēsú na nácani ndasí ni rō? ²⁶Te núu ma cúu sáha ró vēsú iin jniñu lúli súcuan, ¿te najehē cánacani ndasí ni rō siquī jeē cáji rō jíin jée cuhun rō?

²⁷Condēhe jijnáhan ró ndese jée ita tāca yúcū. Chi tu sájniñu, ni tu táú. Te cáhán rī jíin ró jeē ni rey Salomón, quivī ní ñuhun de sahma váha ndasí, tu ní ñuhun de sahma lúu súcuan nájñuhun ita ún. ²⁸Te núu súcuan jéhe Yaā Dios sahma lúu ita un jée jée vijna te sajnē cayū nuū ñuhún, te nagā ni cuu róhó jijnáhan ró jée ma sáha ya jeē nihín rō sahma. ¿Te naun tu cácandíje nihin ró jée ndíto ya rohó? ²⁹Núu súcuan te ma nácani cuíhyá ni rō ndese caji rō ndese coho ró. ³⁰Chi tāca ñayuu ñayivī jée tu cácandíje cúu jeē máni siquī jeē yáha cándihvī ni i. Te máá ró jijnáhan ró, chi íyó Tátá rō andiví, te jíni yā jeē cájini ñuhún ró tāca jée yáha. ³¹Te sa suhva cánuú gá jeē cóndihvī ni rō siquī jniñu jeē ndácu Yaā Dios nuū rō. Yūcuán na te sáha ya jeē nihín rō tāca jée yáha.

Ndese coo cúcá yó nde andiví

(Mt. 6.19-21)

³²Ma yūhu ró jijnáhan ró chi cácuu ró nájñuhun lanchi ri. Chi vēsú jecu-ni cácuu ró, te máá Tátá rō cúsiñi ni yā jeē quívicoo ró ñuu nuū ndácu ya jniñu. ³³Xico ró jeē cánevāha ró, te cuāha ró xuhun un núu ñayuu ndahú. Te súcuan

caya rō tahū rō nde andiví núu ma cútúhú, nájñuhun jeē chívāha ró xuhun ini yijni. Chi nde andiví te ma náā jeē váha coneváha ró. Chi yūcuan má quívi ñacuíhna, ni ma cúu stívi tiquíxin. ³⁴Chi nde nuū nihín rō tahū váha ró, yūcuan cúu nuū cóndihvī ni rō siquī.

Jeē na cóo tūhva yó jée ndéē yā

³⁵Coo tūhva ró jijnáhan ró jée ndéē Jitoho rō, te coo ró nájñuhun mozo jeē nastíin i lámpara i. ³⁶Chi íyó tūhva i te cándetu i jeē ndéē patrón i jeē cuahán de vico nándāha. Chi núu ni ndee de te cahán de, te nune-ni i yéhyí jijnáhan i. ³⁷Te yōhyo ndetū mozo un núu ni ndee patrón i, te cuni de jeē cándito i. Jendaá cahán rī jíin ró jeē maá patrón sātūhva de máá de, te scúcoo de i mesa te caní de cohō i. ³⁸Te vēsú cucuée de ndee de nde sava ñuú, chí jée néē gā, te núu cuni de jeē súcuan cándito mozo de, te yōhyo ndetū i jijnáhan i núu súcuan. ³⁹Te na jécūhun ni rō jeē cahán jñuhun yátá yáha: Tēe chíí vehe, núu ni jini de na hora quiji ñacuíhna, te condito de, te ma cuāha de jñuhun jeē sacuíhna vehe de núu. ⁴⁰Te suni súcuan coo tūhva ró jijnáhan ró, chi núu tuú, te máá hora jeē tú na vé cájeni ni rō, te ndee ruhū, Yaā ní nduu tēe. Achí yā jíin de.

Jñuhun mozo váha jíin mozo tu squícu

(Mt. 24.45-51)

⁴¹Yūcuán na te Pedro ni cajñuhún de ya:

¿A jíin máá-ni ná jijnáhan ná cáhán ni jñuhun yátá yáha, chí suni

cáhán ni jín ndihi ga ñayuu? achí de.

⁴²Te ni cahān maá Jítoho yō:

Cáhán rī jín ndé-ni ñayuu cúu nájnūhun mozo jeē ndito xinī te squícu vāha. Te máá patrón sáha de jeē condiso jniñu i coto i ñayuu vehe de, návāha scáji i máá hora.

⁴³Te yōhyo ndetū mozo un jéé núu ni ndee patrón, te cuni de jeē súcuan squícu vāha i. ⁴⁴Jendaá cahán rī jín ró jeē cani de mozo un jéé cóto i ndihi ndajniñu de. ⁴⁵Te núu jéni ni i jeē ma ndíji yachī patrón i, te quejéé i cani i tēe jín ñahan cácuu jnāhan mozo i, te caji i coho i te najni i, ⁴⁶núu súcuan te ndee-ni patrón quivī jeē tu ndétu i jín hora jeē tú na vé jéni ni i. Te stóho xeēn de i, te squívi de i ndoho i jín ñayuu tu cásquícu.

⁴⁷Te mozo jeē jiní i ndese nújnahan ni patrón i, te núu tu sātūhva i ni tu squícu i jeē cuní de, ndoho xeēn i jín yujnu xí. ⁴⁸Te mozo jeē tu jín i ndese nújnahan ni patrón i, te núu sáha i jniñu jeē cani de i, núu súcuan te cūhva-ni cani de i. Chi ñayuu jeē steén cuehē yā nuū i, suni cuehē nandacān yā nuū i. Te ñayuu jeē cuehē gā jniñu téjniñu ya i, suni cuehē gā nandacān yā nuū i.

Jeē siquí Jesús te cusñin ini ñayuu

(Mt. 10.34-36)

⁴⁹Ni quee rī jeē nájnūhun jeē scuíquín rī ñuhūn ini ñayiví, te suu cúu jeē cusñin ini ñayuu jeē siquí ruhū. Te cúní rī jeē yachī coo súcuan, návāha quivícoo ñayuu ndaha Yaā Dios. ⁵⁰Te íyó ñin jnūndóho cánuú ndoho ri, te

cúcuíhyá ndasí ni rī chi nde jīnu ndoho ri, te ndusī ni rī. ⁵¹¿A cájeni ni rō jeē véji ri jeē cóyūcu mání ñayuu ñayiví? Cáhán rī jín ró jeē tuú, chi sa suhva jeē cusñin ini ñayuu jeē siquí ruhū. ⁵²Chi nde vijna te quejéé jéé uhūn ñayuu ñin vehe, sásñin máá jijnāhan, uni siquí uú, te uū siquí uní. ⁵³Chi tátá cusñin ini jín séhe yíí, te séhe yíí jín tátá, te náná jín séhe síhí, te séhe síhí jín náná, te náná chíso jín séhe jēnú, te séhe jēnu jín náná chíso. Achí yá.

Jeē ni cahān yā siquí seña andiví

(Mt. 16.1-4; Mr. 8.11-13)

⁵⁴Te suni ni cahān yā jín ñayuu cuehē ún:

Núu cájito ró jeē náne vicō ichi núu cáne niāndii, te cácahān rō jeē cuun saū, te súcuan cúu. ⁵⁵Te núu quee tachī véji ichi sur te cácahān rō jeē nandii, te súcuan cúu. ⁵⁶Tēe stáhū-ni cácuu ró. Chi cájecūhun ni rō ndese stéén seña andiví jín ini ñayiví, ¿te naun tu cájecūhun ni rō ndé ñin cúu ruhū jeē sáha ri tācá jniñu jéhnū tiempo yáha?

Jeē cóndihvī ni yō jeē ma cóndee cuēchi siquí yō

(Mt. 5.25-26)

⁵⁷¿Te najehē tu cánacani ni maá ró ndé ñin cúu jniñu ndaā sáha ró? ⁵⁸Te núu ñin ñayuu quihīn i jín ró nuū tohó jeē cacán i cuēchi siquí rō, núu súcuan te níni cuáhān rō jín i ichi te cóndihvī ni rō sándaā rō jín i. Chi núu tuú, te squívi i róhó núu juez, te juez síaha de róhó núu policía, te policía chune de róhó vecā. ⁵⁹Te jendaá cahán rī jín ró

jeē ma quénda cuíti rō yūcuán chi nde chunaa rō ndíhi cuíti xūhun cájicān de. Te suni súcuan condíhvī ni rō cahān ndahú ró jíin Yaā Dios, návaha ma ndácunehen ya cuēchi siquī rō. Achí yá jíin de.

**Jeē cánuú nacani ni yō
jeē stóo yó cuēchi yó**

13 Te iin quivī yúcuán ní quecoo jecu tēe, ni canacani de jnūhun nuū yā ndese ni candoho jecu tēe Galilea. Chi ná cájehni de quíti jeē socó de, te ni quecoo mozo Pilato ni cajehni tēe ún. ²Te ni cahān Jesús:

Tēe Galilea un, ¿á cájeni ni rō jeē súcuan ni candoho de siquī jeē xeēn gā ni iyo cuēchi de vēsú tāca gá ñayuu Galilea? ³Cáhán rī jíin ró jeē tuú. Te rōhó jíjnahan ró suni jnahnū ndetū rō núu tú nacani ni rō jeē stóo ró cuēchi ró. ⁴Te xahūn unī tēe jeē ní cotúú torre Siloé siquī de, te ni cajihī de, ¿á cájeni ni rō jeē ní casáha de cuēchi xeēn gā vēsú tāca gá ñayuu ñuu Jerusalén? ⁵Cáhán rī jíin ró jeē tuú. Te máá ró jíjnahan ró, suni jnahnū ndetū rō núu tú nacani ni rō jeē stóo ró cuēchi ró.

Jnūhun yátá núndēhe higo

⁶Yūcuán na te ni cahān yā jnūhun yátá yáha jéē steén yā ndese cácuu ñayuu tu squícu jnūhun Yaā Dios:

Cácuu i nájñūhun iin nundēhe higo jeē ín nuū ñūhun iin tēe. Te ni jecondēhé de núu ín ndehē xinī, te tú na vé ín. ⁷Te ni cahān de jíin mozo sájniñu nuū ñūhun de: Vijna te je íyó únī cuiyā jeē quíji ri nducú rí ndehē xinī yújnu higo yáha, te tú na vé cúun xinī. Núu súcuan

te cahnde rō, chi máá jéē sajnēñu nuū ñūhun, achí de. ⁸Te ni cahān mozo un jíin de: Stóo ní na cuíñi iin na cuiyā, te na nástáyā ná jéhē te chuhun ná jéhen. ⁹Te na cóndēhe yó núu tú cuun ndehē inga cuiyā. Te núu tuú, te tahndē, achí mozo. Achí yá.

**Jeē ní nasávaha ya iin
ñahan quivī ndétátú**

¹⁰Te iin quivī ndétátú te stéén Jesús jnūhun ini vehe iī sinagoga. ¹¹Te íyó iin ñahan jeē ní cuu xahūn unī cuiyā huhú ña. Chi iin tachī ni sáha jeē jíca tíhí ña, te tuá cúu cuíti caca jnuu ña. ¹²Te ni jito Jesús nuū ña, te ni cana ya ña, te ni cahān yā jíin ña:

Vijna te nduvāha ní jéē huhú ni.

¹³Te ni soó yá ndaha ya siquī ña, te ni nucuiñī jnuu-ni ña, te ni nacuatáhú ña nuū Yaā Dios. ¹⁴Te tēe cújéhnu ini vehe iī sinagoga, ni quitī ni de nuū Jesús jeē ní nasávaha ya ñahan un quivī ndétátú. Te ni cahān de jíin ñayuu:

Iñū quivī íyó jéē sájniñu yó, te tāca quivī ún quijicoo ró nduvāha ró. Te quivī ndétátú chi ma cúu, achí de.

¹⁵Yūcuán na te ni cahān maá Jítoho yō jíin de:

Tēe stáhú-ni cácuu ró. Quivī ndétátu ¿á tu cándají ró stiquī rō burro ró jéē quíscóho ró tí ndute?

¹⁶Te ñahan yáha jéē cúu ña iin sēhe yucūn Abraham, chi nájñūhun ni conuhni ña xahūn unī cuiyā ni sáha Satanás. ¿Te á tu íyó váha jeē nájñūhun nandají rí ña nuū cuehyī ndóho ña quivī ndétátú? Achí yá.

¹⁷Te jeē ni cahān yā súcuan, te tāca tēe cájito uhū de ya, ni

cacucanu de. Te ndihí ñayuu ún chi ni cacusií ni i jíto i tãcá jniñu jéhnú sáha ya.

Jnūhun yátá síquī ndiquin mostaza

(Mt. 13.31-32; Mr. 4.30-32)

18Te ni cahān yā:

Na cáhán rī iin jnūhun yátá návāha cuni rō ndese ndúcuehē ñayuu ndácu Yaā Dios jniñu nuū. **19**Ndúcuehē i nájñūhun jéhnú iin ndiquin mostaza jeē jéquin iin tēe nuū ñūhun de, te ndúu nájñūhun iin yujnu. Te cúu cáhnu, te tãcá saa chi cásáha ti tacā tī chiji ndaha ún. Achí yá.

Jnūhun yátá síquī levadura

(Mt. 13.33)

20Te ni cahān tucu ya:

Súcuan cúu jeē ndúcuehē ñayuu jeē ndácu Yaā Dios jniñu nuū:

21Cúu nájñūhun levadura jeē ní quihín iin ñahan, te ni saca ña jíín únī kilo harina, te ni ndaa ndihí ñujen ni sáha. Achí yá.

Siquī jeē quívi yó yéhyí túū

(Mt. 7.13-14, 21-23)

22Te jíca Jesús jeē cuahán yā ichi ñūū Jerusalén, te yáha ya tãcá ñuu náhnu jíín ñuu lulí, te stéén yā jnūhun. **23**Te iin ñayuu ni cajñūhún i ya:

¿A jecu-ni ñayuu jnama Yaā Dios, chí naún? Achí i.

Te ni cahān yā jíín i:

24Condihvī ni rō quívicoo ró ndaha Yaā Dios. Chí cúu nájñūhun iin yéhyí túū. Te cáhán rī jíín ró jeē iin quívī te cuehē ñayuu nducú i quívicoo i, te ma cúu ga. **25**Te quívī ún te sáha ri nájñūhun iin

tēe chíí vehe jeē ndocuiñī de te nacasi de yéhyí. Te ichi yátá véhe cuiñī ró jíínáhan ró, te scáján ró yehyí, te cahān rō: Nune ní yéhyí na quívicoo ná. Te cahān de jíín ró: ¿Ndé nuū véjicoo ró? Chi tu jíín rī rohó, achi de. **26**Yūcuán na te quejéé ró cahān rō jíín de: Ni cayeji ná ni cajihí ná jíín ní, te ini calle ñuu na ní steén ni jnūhun, achi rō. **27**Te cahān maá de: Cáhán rī jíín ró jeē tu jíín rī rohó ndé chi véjicoo ró. Cuiyo quingoo ró, chi ñayuu casáha jniñu néé cácuu ró. Achi de. **28**Te quívicoo ró núū ndahyú rō, te nacayihí yuhu ró jéé ndoho xeén rō. Te coto ró núū Abraham jíín Isaac jíín Jacob jíín ndihí tēe ni canacani jnūhun Yaā Dios, cáyūcú de ñuu nuū ndácu ya jniñu. Te rōhó, vēsú cácuu ró yúcūn de, te quívicoo ró núū ndoho ró. **29**Te cuehē ñayuu, vēsú tu cácuu i yucūn de, te quijicoo i ichi núū cáne niāndii jíín ichi núū queé niāndii, ichi norte jíín ichi sur. Te cucōo i mesa caji i staā ñuu nuū ndácu Yaā Dios jniñu. **30**Te sava ñayuu jeē vijna cácuu i sandihí, ichi yúcuan nduu i nuū. Te sava ñayuu jeē vijna cácuu i nuū, ichi yúcuan nduu i sandihí. Achí yá.

Jeē ní cucuíhyá ni yā siquī ñáyuu ñuu Jerusalén

(Mt. 23.37-39)

31Te máá quívī un ní quecoo jecu tēe fariseo, te ni cacahān de jíín yá: Cuiyo ní quihín ní inga lado, chí cúní Herodes cahni de níhín, áchí de.

32Te ni cahān yā:

Cuángoo te castūhun ró nuū tēe mañoso un jéé ná tu jinū quívī cuu

rī, chi vijna jíin sájnē quenehen ri tachī ini ñayuu, te nasávāha ri ñayuu cácuḥū. Te isá te jíinu jniñu sáha ri, achi rō. ³³Chi cánuú jéē cáca ri quihín rī vijna jíin sájnē jíin isá, te jíin rī Jerusalén. Chi tēe cánacani jnūhun Yaā Dios, tu cájihī de inga lado, chi máá-ni ini ñuu Jerusalén cájehni i de. Achí yá.

³⁴Róhó ñuu Jerusalén, jéehni rō tēe cánacani jnūhun Yaā Dios, te jéhe ró yúū xinī tēe tájī Yaā Dios vėjicoo nuū rō. Te cuehē jíinu ni cuni rī nastútú rí sēhe ró, nájnūhun ndují jéē nastútú tí sēhe tí chíjī ndijēn tī, te tu ní cúní rō. ³⁵Núu súcuan te vijna te stóo uun na ri rohó jíin sēhe ró. Te cáhán rī jíin ró jéē ndé vijna te ma cóto cuítī gā rō nuū rī, chi nde quiji quivī jeē cahán sēhe ró: Yōhyo vāha Yaā cúu Yaā vëndijī jíin jniñu máá Jítóho yō Yaā Dios, achi i. Achí yá.

Jeē ní nasávāha ya iin tēe
cúhú cuehyī cuiñī

14 Te iin quivī ndétātu ní jehēn yā vehe iin tēe fariseo cujéhnu, ni jecaji yā staā jíin de. Te tāca gá tēe fariseo cájito yuhu de ya núu stívi yá. ²Te yūcuan íne iin tēe cúhú de cuehyī cuiñī, índichi de nuū yā. ³Te ni cajnūhun yá tēe cástéén tutu ley Yaā Dios jíin táca tēe fariseo:

¿A íyó ley jeē nasávāha ri ñayuu cácuḥū quivī ndétātu, chí tuú? áchí yá.

⁴Te máá de tu ní cácahān cuítī de. Te ni jniñ ya tēe cúhú un, te ni nasávāha ya de, te ni cahān yā jeē na núhun de vehe de. ⁵Te ni cahān yā jíin de jíināhan de:

¿Ndé iin róhó núu burro ró chí stíquī rō ñingava tí ini pozo, te á tu yachī natava rō tí vēsú quivī ndétātu cúu, chí naún? Achí yá.

⁶Te tu ní cúu stío cuiñī de ni iin jnūhun nuū yā jeē súcuan ni cahān yā.

Jnūhun siquī ñayuu jéngoo vico

⁷Te ni jito Jesús jeē tēe ni cataca ún, cánacāji de silla yíñúhún gá nuū mesa cucōo de. Te ni cahān yā jnūhun yáha jíin de:

⁸Núu iin tēe cana de jeē quihín rō iin vico nándāha, te ma cúcōo ró lugar nuū yíñúhún gá. Chi núu súcuan te sanaa te je ni cana de iin tēe cújéhnu ga vēsú rohó. ⁹Te quee tēe ni cana róhó, te cahān de jíin ró: Ndonga, te na cúcōo tēe yáha jíñā. Yūcuán na te cucanu rō jeē quihín rō cucōo ró ndé sandíhí na.

¹⁰Chi sa suhva núu ni cana iin tēe róhó, te cucōo ró ndé lugar sandíhí na. Te núu quee tēe ni cana róhó, te cahān de jíin ró: Amigo, nehen cucōo ró iin lugar nuū yíñúhún gá, achi de. Yūcuán na te ñayuu cáyūcu mesa jíin ró coto i jeē sajuhnu de róhó. ¹¹Súcuan ni cahān rī jnūhun yáha návāha cuni rō jeē tāca ñayuu jeē sajuhnu i máá i, nuu i sáha Yaā Dios. Te ñayuu jeē snūū i máá i, ndujéhnu i sáha ya. Achí yá.

¹²Te suni ni cahān yā jíin tēe ni cana ya yéji yā staā:

Núu sáha ró iin vico cúsámá chí jéē cuxíni, te ma cána ró ñayuu cácuu amigo rō, jíin ñani rō, jíin jnāhan ró, jíin ñayuu cucá. Chi núu súcuan te suni máá i nacana i róhó, te súcuan nanihín rō jeē ni jéhe ró. ¹³Chi sa suhva núu sáha ró vico,

te cana ró ñáyuu ndahú, ñayuu cuhndú, ñayuu chacua, jíin ñáyuu cuaá. ¹⁴Te súcuan te quendōo ndetū rō, chi ma cúu nacuāha i nuū rō. Te nihin rō tahū rō quivī nátecu ñayuu ndaā, achí yá.

Jnūhun yátá síquī vico cúxíni

¹⁵Te ñin tēe yéji staā jíin yá, ni jini de jnūhun yáha, te ni cahān de jíin yá:

Yōhyo ndetū ñayuu jeē cáji staā nde ñuu nuū ndácu Yaā Dios jniñu, achí de.

¹⁶Yūcuán na te ni cahān Jesús ñin jnūhun yátá jéē steen yā jeē cána Yaā Dios ñayuu quívicoo i ñuu nuū ndácu ya jniñu:

Ñin tēe ni sáha de ñin vico cáhnu cúxíni, te ni tají de mozo ni cana cuehē ñayuu. ¹⁷Te máá quívī cúxíni, te ni tají de mozo de cuacana ñayuu jeē quíjicoo caji staā: Nehen ní jíjnáhan ní, chi je íyó túhva ndihí, achí mozo. ¹⁸Te ndihí i ni cacahān i jeē na cóne cáhnu ni de chi ma quíngoo i. Ñin tēe ni cahān de: Sáá ní jeen ri ñin ñuhun te cánuú quícondēhe rí, te na cóne cáhnu ni de chi ma jeé rī. Achí de. ¹⁹Te inga de ni cahān: Ni jeen ri uhūn yunta stíquī, te quihīn rī coto ndee rī tī, te na cóne cáhnu ni de nuū rī chi ma jeé rī, achí de. ²⁰Te inga de ni cahān de: Sáá ní quijnáhan ri, te jeē yúcuan ma cúu jeé rī, achí de. ²¹Te cuanuhun mozo un, te ni castūhún de nuū patrón de ndese ni cacahān ñayuu. Yūcuán na te ni quítī ni patrón, te ni cahān de jíin mozo de: Yachī quihīn rō tāca calle náhnu jíin calle lulí, te cana ró ñáyuu ndahú, ñayuu cuhndú, ñayuu

chacua, jíin ñáyuu cuaá, na quíjicoo i vico, achí de. ²²Te ni jehēn mozo, te ni ndee de, te ni cahān de jíin patrón de: Je ni sáha ná jéē ni cáhān ní, te cúmani gā ñayuu te chitú vehe ní, achí de. ²³Te ni cahān tucu patrón: Quihīn tucu ró táca calle jíin ichi, te cana fuerza rō ñayuu na quíjicoo i, návaha chitú vehe ri. ²⁴Chi cáhān ri jíin ró jeē ní ñin tēe ni cana ri xihna ñuhún, ma cuáha cuítī rī jnūhun jeē cúxíni de vehe ri, achí de. Achí yá.

Jnūhun jeē cánuú nacani vāha ni yō te condiquin yō Cristo

²⁵Te cuehē ndasí ñáyuu cándiquin i Jesús cuangoo i jíin yá, te ni ndió cóto ya nuū i, te ni cahān yā jíin i:

²⁶Núu na-ni ñayuu cuní condiquin ruhū, te núu manī gā i jíin tátá i, náná i, ñasihí i, sēhe i, ñani i, cuāha i, vēsú jíin rúhū, ma cúu cuu i ñayuu scuáha jíin rí. Te núu ndíhví gā ni i síquī jeē cóo vāha máá i vēsú jeē cóndiquin i ruhū, te suni ma cúu tucu. ²⁷Te na-ni ñayuu núu tu jéhe i jnūhun ndoho i jnūndóho vēsú nde cuu i jeē síquí jeē cóndiquin i ruhū, te ma cúu cuu i ñayuu scuáha jíin rí. ²⁸Chi núu ndé ñin ró cúní rō sáha ró ñin vehe cáhnu, zá tu cánuú jéē xihna gā cucōo ró te tava rō cuenta núu canda xūhun jéē sínu ró? ²⁹Chi núu tuú, te núu je ni jequin rō cimientō, te tu canda xūhun ró sínu ró, yūcuán na te tāca ñáyuu sácatā i coto i róhó. ³⁰Te cahān i: Tēe yáha ní quejéé de sáha de vehe, te tu ní canda de sínu de, achi i. ³¹Te suni súcuan núu ñin rey quihīn de cuajnáhan de jíin inga

rey jeē véji siquī de, ¿á tu cánuú jeē xíhna gā cucōo de te nacani ni de núu canda uxī mil soldado jeē cuajnáhan de jíin inga rey jeē véji siquī de jíin ócō mil soldado? ³²Chi núu tú canda de, te níní jícá gá véji inga rey, te tají de tēe cándiso jnínū, cajnúhún de na vé cuní inga rey jeē cuáha de nuū, te jecuññi-ni. ³³Te máá ró jijnáhan ró, suni súcuan cánuú jeē xíhna gā nacani ni rō cahnde ni rō stóo ró ndihí jeē névaha ró, chi núu tuú te ma cúu cuu ró ñayuu scuáha jíin rí.

Jnūhun yátá síquī ññi

(Mt. 5.13; Mr. 9.50)

³⁴Te ñayuu cácanđije cácuu i nájñūhun ññi. Vāha iyó ññi, te núu ññi ún na náa jeē uhvuá, ¿te ndese nduu uhvuá tucu? ³⁵Tuá cuajníñu cuiñi, ni jeē chúhun ñayuu nuū ítu, ni jeē ndúu jēhen, chi máá cate iñ-ni i. Tāca rōhó jeē jíni sōho, na chúsohó ró. Achí yá.

Jnūhun yátá síquī lanchi ní sana

(Mt. 18.10-14)

15 Te tāca tēe cástútú xúhun renta jíin táca gá tēe cásaaha cuēchi, ni quecoo de nuū Jesús jeē cuni sōho de jñūhun cáhán yā. ²Te tāca tēe grupo fariseo jíin tēe cástéén tutu ley Yaā Dios, ni cacahān de siquī yā:

Tēe yáha jétáhú de tāca tēe cásaaha cuēchi te yéji de jíin, áchí de.

³Te ni cahān yā jñūhun yátá yáha jíin de:

⁴¿Ndé iñ ró núu névaha ró iñ ciento lanchi, te núu scuíta ró iñ tí, te á tu stóo ró cúun xico xahūn

cuūn gā tí yucu, te quinanducú ró quiñi ní sana ún ndé nanihīn rō tí?

⁵Te núu ni nanihīn rō tí, te coso sūcun ró tí, te cusñi ni rō. ⁶Te núu ni ndee rō vehe ró, te nastútú ró tācá amigo rō jíin ñayuu yúcu yajni jíin ró, te cahān rō jíin i: Na cúsiñ ni yō, chi ni nanihīn rī lanchi ri jeē ní sana. Achí rō. ⁷Te cáhán rī jíin ró jeē suni súcuan cúu nde andiví. Chi cúsiñ gā ni yā jíin iñ ñayuu iyó cuēchi núu nacani ni i jeē stóo i cuēchi i, vēsú jíin cúun xico xahūn cuūn ñayuu iyó ndāa jeē tuá jíni ñúhún nacani ni i.

Jnūhun yátá síquī ñahan ní scuíta xūhún

⁸Te núu iñ ñahan névaha ña uxī peso cāa, te núu scuíta ña iñ, ¿á tu nastñiñ ña lámpara te nastāa ña vehe, te nanducú yúcún ña nde nanihīn ña? ⁹Te núu ni nanihīn ña, te nastútú ña tācá amiga ña jíin ñayuu yúcu yajni jíin ña, te cahān ña jíin i: Na cúsiñ ni yō, chi ni nanihīn rī xūhun jeē ni scuíta ri. Achí ña. ¹⁰Te cáhán rī jíin ró jeē suni súcuan cúsiñ ni tācá ndajéhe Yaā Dios siquī iñ ñayuu iyó cuēchi núu nacani ni i jeē stóo i cuēchi i. Achí yá.

Jnūhun yátá síquī sūchi ní jēhēn jecó

¹¹Te ni cahān gā yā:

Iñ tēe ni iyo uū sēhe yíi de. ¹²Te tēe suchí gá ni cahān i jíin tátá i: Tátá, tahú sáva ní ndajníñu ní, te cuāha ní sava cuu tahū ná, áchí i. Te ni tahú sáva de tahū ndíndúu i. ¹³Te ni cuu jecu-ni quiví, te tēe suchí gá un ní stutú ndihí i ndajníñu i. Te ni quenda i cuahān

i ñin ñuu jicá. Te yūcuan ní snāā i tahū i, chi ní jexin cāhá i. ¹⁴Te ná ni ndihī ni jexin i, te ni quee ñin jnamā xeén ini ñuu ún, te ni quejéé cúmanī jeē cāji i. ¹⁵Yūcuán na te cuanducú jnīñu i nuū ñin tēe ñuu ún. Te ni tají de i cuahān i rancho de jeē cóto i quīnī de. ¹⁶Te cúní i caji i vēsú soō ndúchi jeē cāyeji quīnī ún, návāha ndutú chíji i. Te ni ñin ñayuu tú na vé jéhe nuū i. ¹⁷Yūcuán na te ni quejéé i nácani ni i: Tāca mozo casājñiñu vehe tátá rī, íyó cuéhē staā cāyeji i. Te ruhū chí jí rī sōco yāhá. ¹⁸Na quínuhun rī nuū tátá rī, te cahān rī jíin de: Tátā, ni sáha ná cuéchi nuū Yaā Dios jíin núū maá ní. ¹⁹Vijna te nasūu gá tēe vāha cúu ná jēe cónanī ná sēhe ní. Te cuāha ní jnúhun cuu ná nájñuhun ñin mozo ni, achi rī. ²⁰Yūcuán na te ni naquihin i ichi cuanuhun i vehe tátá i.

Te níiní jíicá gá vēji i, te ni jito tátá i nuū i, te ni cundáhú ni de i. Te jíinu de cuajnahān de i, te ni nundee de sucūn i, te ni techūhú de i. ²¹Yūcuán na te ni cahān i jíin de: Tátā, ni sáha ná cuéchi nuū Yaā Dios jíin núū maá ní. Vijna te nasūu gá tēe vāha cúu ná jēe cónanī ná sēhe ní. Achí i. ²²Te maá tátá i chi sa ni cahān de jíin táca mozo de: Cuáquihin sahma váha ga te chuhun ró i. Te chuhun ró ñin xehyu ndaha i, te chíhi ró ndíjēn jehē i. ²³Te quiquihin ró becerro xéhen, te cahni rō tī na cāji yō, chí sáha yó vico. ²⁴Chi sēhe yíí rí yáha, nájñuhun je ni jihī i, te ni natecu i. Chi tu ní jíin rī ndé chí ní jéhēn i, te ni ndee i, áchí de. Te ni caquejéé de cásáha de vico.

²⁵Te sūchi jévāha, íne i nde rancho, te vēndiji i, te ni cuyajni i yatā véhe. Te ni jini i jeē cúu yaa te cājita jéhé ñayuu. ²⁶Te ni cana i ñin mozo, te ni cajñuhún i na vé cúu jeē cúu. ²⁷Te ni cachi mozo un núu i: Ni ndee ñani rō, te tátá rō ni jehni de becerro xéhen, chí ni ndee vāha i nuū de, áchí mozo. ²⁸Yūcuán na te ni quítī ni sūchi jévāha, te tu ní cúní i ndīvi i. Te ni quenda tátá i, te ni cahān ndahú de jíin i jeē na ndīvi i. ²⁹Te ni cahān i jíin tátá i: Níní sáha ná jñiñu ndácu ní, te tu cúnihni cuítī ni na núu ní. Te tu jéhe ní vēsú ñin lítú núu ná, jeē sáha ná vico caji na jíin táca amigo na. ³⁰Te ni ndee sēhe ní yáha jeē ni jéxīn cāhá i xūhun ní jíin táca ñahan. Te ni jehni ní becerro xéhen caji i, áchí i jíin tátá i. ³¹Yūcuán na te ni cahān de jíin i: Séhē, róhó chí níiní ndéé ró jíin rí, te ndihī jeē névāha rī chí suni cuenta maá ró cúu. ³²Te vijna chí íyó váha jeē sáha yó vico te cusīñ ni yō. Chí ñani rō yāhá, nájñuhun ni jihī i, te ni natecu i. Chí tu ní jíin yō ndé chí ní jéhēn i, te ni ndee i, áchí de. Achí yá.

Jñuhun yátá síquī mozo jeē ni stáhú de patrón de

16 Te suni ni cahān Jesús jíin tēe cáscuáha jíin yá:

Ñin tēe cúcá ní íyo ñin mozo de jeē ndíso jñiñu nuū táca gá mozo. Te ni cacahān jíin patrón un jēe mozo un snāā cāhá ndajñiñu de. ²Te ni cana de mozo un, te ni cahān de jíin: ¿Na jñuhun cúu yāha jēe nihín rī síquī rō? Nacuāha cuenta jñiñu ndíso ró, chí ma cóndiso jñiñu ga

rō nuū mozo rī. Achí de. ³Yūcuán na te jéni ni maá de: ¿Ndesa sáha ri vijna? Chi patrón rī quenehen de jniñu ri. Te tú ndacuī rī jeē cáte ri ñuhun, te jeē cacán rī caridad chi cúcanu rī. ⁴Núu súcuan te jíin rī ñin jeē sáha ri, návāha ñayuu cájeen nuū patrón rī, cuáha i vehe condee rī núu na quée quivī jeē quénehen de jniñu ri. ⁵Te ni cana de ná ñin ná ñin tēe jeē cátaū nuū patrón de. Te ni cajñuhún de ñin: ¿Nasaa táú rō nuū patrón rī? ⁶Te ni cahān tēe ún: ñin ciento barril aceite, achí de. Te ni cahān mozo un: Yāhá na cuáha ri lista rō, te cucōo yachī rō, te na sáha ró inga lista jeē uú xico uxī na, achí de. ⁷Yūcuán na te ni cajñuhún de inga tēe: Te rōhó, ¿nasaa táú rō? Te tēe un ní cahān de: ñin ciento cajón trigo, achí de. Te ni cahān de jíin tēe ún: Yāhá na cuáha ri lista rō, te na sáha ró inga lista jeē cuún xico na, achí de. ⁸Yūcuán na te patrón ni cahān de: Nacā jeē ndichí ní sáha tēe cúnée un, achí de. Te cáhán rī jíin ró jeē ñayuu ñayīvi yáha, ndichí gá casáha i jeē quendōo vāha i nuū jnāhan i, vēsú ñayuu cácanđije nuū Yaā Dios.

⁹Núu súcuan te cáhán rī jíin ró jeē ndichí gá na sáha ró vēsú jeē ni sáha mozo ndichí un. Chi ini ñayīvi yáha nuū yíhi cuēchi, na sáha ró jniñu vāha jíin xúhun ró, cuáha ró núu ñayuu ndahú, návāha vēsú núu ni ndíhi xúhun ró ñayīvi yáha, te quivīcoo ró andiví núu coo vehe ró ní cáni.

¹⁰Tēe jeē squícu vāha jíin ñin jniñu lúlí-ni, suni squícu vāha de jíin jniñu cáhnu. Te tēe jeē stahú jíin ñin jniñu lúlí-ni, suni stáhú de

jíin jniñu cáhnu. ¹¹Núu súcuan te núu tu squícu vāha ró jíin xúhun jeē iyó ñayīvi yáha nuū yíhi cuēchi, te ma cuáha ya jeē vāha cuu ró ní cáni andiví. ¹²Te núu tu squícu vāha ró jíin ndajniñu jeē ni jéhe núu ya nuū rō ñayīvi yáha, te ma cuáha ya tahū cuu ró ní cáni.

¹³Ni ñin mozo ma cúu cuajniñu de nuū uū patrón. Chi quitī ni de nuū ñin te coo manī de jíin inga, chí squícu vāha de nuū ñin te sájēe ni de nuū inga. Te suni súcuan ma cúu cuajniñu ró núu Yaā Dios te núu máni siquī xúhun ndíhvī ni rō, achí yá.

¹⁴Te tēe fariseo ni casácatā de nuū yā jeē ní cajini de tāca jñuhun cáhán yā, chi tēe cútóo xúhun cácuu de. ¹⁵Te ni cahān yā jíin de:

Máá ró casáha ró jēe tēe ndaā cácuu ró núu ñayuu. Te Yaā Dios chí jíin yā ndese cáa ini anuá rō. Chí jniñu cájeni ni ñayuu jeē jniñu jéhnu cúu, te nuū Yaā Dios chí jniñu née cúu.

**Siquī ley Yaā Dios jíin
síquī jeē ndácu ya jniñu**

¹⁶Nde ná tu quiji Juan tēe scuándute, te ni iyō ley jeē ni jéhe Yaā Dios nuū Moisés, te suni ní castéén tāca tēe cánacani jñuhun ya. Yūcuán na te ná ni quiji Juan, te ni quejéé jítē núu jñuhun vāha ndese ndácu Yaā Dios jniñu. Te tāca ñayuu nducú ndéyí i quivīcoo i ndaha ya.

¹⁷Te yí gá cúu jeē náā ñin letra nuū tútu ley yā vēsú jeē náā andiví jíin ñayīví, chí squícu ndíhi jñuhun cáhán.

**Siquí jeē ma stóo jnáhan tēe jín
ñahan**

(Mt. 19.1-12; Mr. 10.1-12)

¹⁸Núu iin tēe stóo de ñasihí de te quijnáhan de jín inga ñahan, núu súcuan te cásiquí ndéē de ña. Te núu iin tēe condeca de ñahan ní ndusín, suni cásiquí ndéē de ña, áchí yá.

Jnūhun tēe cúcá jín Lázaro

¹⁹Te ni cahān gā yā:

Ni iyo iin tēe cúcá, ní ñuhun de sahma lúu váha ndasí. Te ndiquiví ni iyo váha ndasí jéē ní yeji de. ²⁰Te suni ni iyo iin tēe ndáhú, nání de Lázaro, néne de yéhyí tēe cúcá un, te ní cáhnu de iin ndíhyi. ²¹Te máni cúní de jeē ndutú chíji de jín stāa cuēchi jeē stívi tēe cúcá un. Te quécóo ina te cánayuu tí nuū ndíhyi de. ²²Te ni jihí tēe ndáhú un, te tācá ndajéhé Yaā Dios cuangoo ya jín ánuá de nde andíví nuū néne Abraham. Te suni ni jihí tēe cúcá un, te ni quindūji de. ²³Te tēe cúcá un xeēn ndóho de íne de lugar nuū cáyūcu ndíyí tu ní cándíje. Te ni ndacoto de, te nde jicá ní jito de nuū Abraham, te néne Lázaro jín de. ²⁴Yūcuán na te ni cana cóho de: Tātā Abraham, cundáhú ni ni sáña, te tají ní Lázaro, na quíchundaji de xiní ndáha de nuū ndúte, te quiji de stáji de yáá ná. Chi xeēn ndóho ná núu yáñuhūn yāhá. Achí de. ²⁵Te ni cahān Abraham jín de: Séhē, nucūhun ni rō jeē ni níhīn rō ndíhi jeē váha ná ni cotecu rō, te Lázaro chí sa suhva jnūndóho ni nihīn de. Te vijna je ni ndusí ni de yāhá, te róhó chí ndóho ró jínā. ²⁶Te suni

íyó iin jeē cunú téyí, íne mēhñu yó jijnáhan yó. Te ñayuu cáhiin yāhá, vēsú cácu ni i yāha i jeē i nuū rō, te ma cúu. Te ni ma cúu yāha máá ró quijicoo ró yāha. Achí Abraham. ²⁷Yūcuán na te ni cahān tēe cúcá: Núu súcuan te cáhán ndahú ná jín ní, Tātā Abraham, tají ní Lázaro na quíhīn de vehe tātā na. ²⁸Chi íyó úhūn gā ñani ná, te na quícachi de nuū i jeē na nácani ni i te stóo i cuēchi i, návāha ma quívicoo i nuū ndóho ná yāha, áchí de. ²⁹Te ni cahān Abraham jín de: Je cánevāha i tutu jeē ní tee Moisés jín táca tēe ni canacani jnūhun Yaā Dios. Suu yūcuán na chúhun ni i, áchí Abraham. ³⁰Te ni cahān tucu tēe cúcá: Vēsú súcuan, Tātā Abraham, te núu iin ñayuu ni jihí quihīn nuū i, yūcuán na te nacani ni i jeē stóo i cuēchi i, áchí de. ³¹Te ni cahān Abraham jín de: Núu tu chúhun ni i jnūhun ni nacani Moisés jín táca tēe ni canacani jnūhun Yaā Dios, suni ma candíje cuítí i núu natecu iin ndíyí quihīn nuū i, áchí de.

**Xeēn coo siquí ñayuu squívi jnáhan
nuū cuéchi**

(Mt. 18.6-7, 21-22; Mr. 9.42)

17 Te ni cahān Jesús jín tēe cáscuáha jín yá:

Máni íyó jéē nducú squívi ñayuu nuū cuéchi. Te nacā xeēn ndóho ñayuu jeē squívi jnáhan nuū cuéchi. ²Vāha ga núu ni conuhnī iin yōso cáhnu sucūn i te quēe i chíji ndute mar, vēsú jeē squívi i iin sūchi lúlí yāha núu cuéchi. ³Coto ma sáha ró súcuan jijnáhan ró. ⁴Te núu jnáhan ró sáha de cuēchi siquí rō, te cahān rō nuū de. Te núu nacani ni

de, te cone cáhnu ni rō nuū de. ⁴Te núu uxā jínu jeē ñn quivī sáha de cuēchi siquī rō, te núu uxā jínu nácani ni de te cahān de jíin rō jeē cone cáhnu ni rō chí ma sáha ga de, te cánuú cone cáhnu ni rō nuū de. Achí yá.

Jeē yóhyo cújéhnu jñūhun cándíje

⁵Te tēe cácuu apóstol ni cacahān de jíin Jítoho yō:

Sáha ní jēe ñihin ga candíje ná jēe sáha Yaā Dios jeē cájicān na núu yā, achí de.

⁶Te ni cahān maá Jítoho yō jíin de:

Núu cácuu rō vēsū ñn tíhli-ni, nájñūhun ñn ndiquin mostaza jeē tíhli-ni cáa, te cuu cahān rō jeē núyūhndu yáha na quēnda te nucondichi nde nuū mar, te coo nájñūhun cahān rō.

Jeē cánuú squícu vāha yó núu yā

⁷Nde ñn rō íyó mozo rō jeē jítu de chí ndíto de quiti ndéca rō, te núu ni najinū de vehe rō, te tu cáhán rō jíin de jeē cúcōo de caji de staā. ⁸Chi sa suhva cáhán rō: Sáha rō ndeyu cuxini ri, te cani rō cohō ri. Te núu ni cuu ni yeji ri ni jili ri, yūcuán na te caji maá rō coho rō, cácahān rō. ⁹Te cácahān rō jeē tu cánuú nacuatáhú rō nuū mozo núu ni sáha de jniñu ní ndacu rō, chí jeē cánuú sáha de cúu. ¹⁰Te suni súcuu maá rō jijnáhan rō, cácuu rō mozo Yaā Dios. Te núu ni casquícu rō táca jniñu ní ndacu ya nuū rō, te cahān rō: Tu cánuú nacuatáhú yá nuū ri, chí ni sáha ri máa-ni jeē cánuú sáha ri, achí rō. Achí yá.

Jeē ní nasávāha ya uxí tēe ndóho cuehyī stehyú

¹¹Te jícá Jesús ichi cuahān yā ñuu Jerusalén, te ni yáha ya cuahān yā

mēhñú región Samaria jíin Galilea.

¹²Te ni jinū yā ñn ñuu, te uxí tēe ndóho cuehyī stehyú ni quendacoo de vejnahan de ya, te jícá ní cajecuñí de. ¹³Te ni cacana jee de:

Jesús, Maestro, cundáhú ni ni sáña, áchí de jíjnáhan de.

¹⁴Te ni jito Jesús nuū de, te ni cahān yā jíin de:

Cuángoo te stéén rō maá rō nuū táca sūtū jeē ní canduvāha rō, áchí yá.

Te níni cuángoo de te ni canduvāha-ni de. ¹⁵Yūcuán na te ñn-ni de ni nandió cóo de nuū Jesús, te cáhán jee de, nácuatáhú de nuū Yaā Dios jeē ní nduvāha de. ¹⁶Te ni jecuñí yití de nuū yā, te ni jequin de nuū de nde nuū ñūhun, te ni nacuatáhú de nuū yā. Te tēe Samaria cúu de. ¹⁷Te ni cahān Jesús:

¿A násūú ndihúxí de ni canduvāha? Te ñn gā de, ¿naun tu ní cánandicó de nacuatáhú de? ¹⁸¿A máñúhún-ni tēe ñuu jícá yáha cúu jeē ní nandicó de nacuatáhú de nuū Yaā Dios?

¹⁹Te ni cahān yā jíin tēe ún:

Ndocuñí quinuhun rō. Chi ni candíje rō jēe cuu nasávāha ri rohó, te jeē yúcuu ní nduvāha rō, áchí yá.

Ndese coo quivī jeē ndíji ya ndacu ya jniñu

(Mt. 24.23-28, 36-41)

²⁰Te tēe fariseo ni cacajnūhún de Jesús ndé quivī quejéé jēe ndácu Yaā Dios jniñu ini ñayiví. Te ni cahān yā jíin de:

Ma queé ndijin jeē ndácu Yaā Dios jniñu. ²¹Ni ma cúu cahān ñayuu: Yáha íne ya ndácu ya jniñu, chí:

Yūcuan íne ya, achi i. Chi je ndácu Yaā Dios jniñu mēhñu ró jijnáhan ró. Achí yá.

²²Yūcuán na te ni cahān yā jíin tēe cáscuáha jíin yá:

Quee tiempo jeē yóhyo cúu ni rō coto ró jeē ndíji ruhū, Yaā ní nduu tēe, te ma coto ró jijnáhan ró. ²³Te cahān ñayuu jíin ró: Yāha íne ya, chí: Yūcuan íne ya, achi i. Te ma quíngoo ró condēhe ró, ni ma cóndiquin rō i. ²⁴Chi nájnūhun sáha taja jeē ndíndēe ñin lado andíví te cúndijin nde inga lado, suni súcuan cuu quiví ndíji ruhū, Yaā ní nduu tēe, chi ndíhi ñayuu coto. ²⁵Te jíni ñúhún jéē xíhna gā ndoho xeēn rí, te ñayuu iyó vijna, squéhichí i ruhū. ²⁶Chi nájnūhun ni cuu quiví ni íyo Noé, suni súcuan cuu quiví ndíji ruhū, Yaā ní nduu tēe. ²⁷Chi quiví un ní cayejí i, ni cajihí i, ni canandāha i, ni cajēhe i sēhe síhí i jeē nándāha, nde ni jinū quiví jeē ni quíví Noé ini barco cáhnu jeē naní arca. Te ni cuun saū xeén, te ni ndaa ndute ni cajihí ndíhi i. ²⁸Te suni súcuan ni cuu quiví ni íyo Lot. Ni cayejí i, ni cajihí i, ni cajeen i, ni caxicó i, ni catajé i itu, ni cajeni i vehe. ²⁹Te quiví jeē ní quenda Lot ini ñuu Sodoma cuahān de, te ni cuun ñuhūn jíin azufre ichi ándíví, te ni snāā ndíhi ñayuu. ³⁰Te suni súcuan coo quiví jeē ndíji ruhū, Yaā ní nduu tēe.

³¹Te quiví ún te ñayuu cáhiin yatá véhe, te ndajníñu i ñúhun ini vehe, cáhán rí jíin i jeē ma ndívi i naquihin i, chí cánuú cunu yachí i jeē cácu i. Te suni súcuan ñayuu casájniñu nuū ítu, ma quínuhun i vehe i jeē quíhin i ndajníñu i. ³²Te

nucūhun ni rō ndese ni ndoho ñasihí Lot jeē ni jíhí ña. ³³Te núu ndé ñáyuu cuní i cácu i nuū jnúndóho quiji nuū i jeē siquí ruhū, núu súcuan te jnahnū ndetū i ní cáni. Te núu ndé ñáyuu, vēsú na cúu i jeē siquí ruhū, te cotecu i ní cáni.

³⁴Te cáhán rí jíin ró jeē quiví ndíji ri te quíxí uū tēe ñin jito jecúaā, te ñin de naquihin ri, te inga de ndōo, chí tu ní cándíje de. ³⁵Te coo uū ñahan jeē ndíco cáhnu, te ñin ña naquihin ri, te inga ña ndōo. ³⁶Te uū tēe sájniñu de nuū ítu, te ñin de naquihin ri, te inga de ndōo. Achí yá.

³⁷Te jeē ní cajini de jnūhun yáha, te ni cacajnūhún de ya:

¿Ndé mí coo súcuan nájnūhun ni cahān ní? Achí de.

Te ni cahān yā jíin de:

Nájnūhun jeē cutútú téji ndé-ni cúu nuū catú quítí ní jíhí, suni súcuan coo tāca jéē ni cáhán rí ndé-ni cúu-ni nuū cáhiyo ñayuu.

Jnūhun yatá síquí juez jíin ñahan viuda

18 Te ni cahān yā ñin jnūhun yatá jíin de jeē cánuú jeē niní cácan tahu de, te ma ndínuu ni de jíin. ²Te ni cahān yā:

Ni íyo ñin juez ini ñin ñuu. Te ni tu ndíso íyo de nuū Yaā Dios, ni tu yúhú de nuū ní ñin ñayuu. ³Te suni ñuu un íyó ñin ñahan ní ndóo ndáhú. Te ñahan un jéhén-ni jéhén-ni ña nuū de, jícan ña jeē na sándaa de síquí ñin ñayuu jeē jíto uhū i ña. ⁴Te cuehē quiví tu ní cúni de sándaa de, te yūcuán na te ni jeni ni de: Vēsú tu ndíso íyo ri nuū Yaā Dios, ni tu yúhú rí

nuū ní iin ñayuu, ⁵te ñahan viuda yáha, yōhyo stáhān ña ruhū, te jeē yúcuan na sándaā rī siquī ñayuu jeē jíto uhū i ña. Chi núu tuú, te quejéé rí jnaniní ni rī jeē quíji quíji ña. Achí de. Achí máá Jítoho yō.

⁶Te ni cahān gā yā:

Súcuan cúu jeē ni cáhān juez, tēe tú ndaā. ⁷Te Yaā Dios, nasūu súcuan cúu ya, chi sándaā yā siquī jniñu ñayuu ní nacāji ya jeē nduú ñuú cácahān ndahú i jíin yá. Chi jnama ya i nuū tāca jēé cájito uhū i. ¿Te á cuéé jnama ya i? ⁸Cáhān rī jíin ró jeē yachī. Te quivī ndíji ruhū, Yaā ní nduu tēe, ¿á níhīn gā rī ñayuu cácañdije nihin ini ñayiví? Achí yá.

Jnūhun yátá síquī tēe fariseo jíin tēe stútú xúhun renta

⁹Te suni ni cahān yā jnūhun yátá yáha jíin jecu ñayuu jeē cájeni ni i jeē ñayuu ndaā cácuu i, te cájeni ni i jeē sava ga ñayuu tu cáhīyo ndaā:

¹⁰iin tēe fariseo cuahān de templo jeē cacān tahú de. Te iin tēe stútú xúhun renta suni cuacacān tahú de templo. ¹¹Te tēe fariseo, índichi de, te súcuan ni jicān tahú de: Tātā Yaā Dios, na cútahū na núū ní, chi tu cúu ná nájnūhun cándaā sava ga tēe, tēe cuíhná, tēe néé, tēe cásíquí ndéé jnáhan cácuu de. Ni tu cúu ná nájnūhun cáa tēe yúcuan jēé stutú xúhun renta jeē scáa ga de jícān de nuū ñayuu. ¹²Te uū jínu jeē semana iyó ndite ni na núū ní, te jéhe ná nuū ní iin iin siquī tāca úxī ndajniñu níhīn na, áchí de. ¹³Te tēe stútú xúhun renta, ni jecuiñī jicá de nuū templo, ni tu ní chūndeyí ni de jeē ndonehen de nuū de, chi

sa suhva ni cani de yīqui jíca de jeē cucuíhyá ni de. Te ni cahān de: Tātā Yaā Dios, cundáhú ni ni sáña, chi tēe iyó cuéchi cúu ná, áchí de. ¹⁴Te cáhān rī jíin ró jeē tēe stútú xúhun renta, ni jetáhú Yaā Dios de, te cuanuhun de vehe de. Te tēe fariseo chi tu ní jétáhú yá de. Chi ñayuu jeē sajeñnu i máá i, sa ndululí i. Te ñayuu jeē sálulí i máá i, sa ndujéñnu i. Achí yá.

Jeē ni jícān tahú Jesús jehē sūchi lúlí

(Mt. 19.13-15; Mr. 10.13-16)

¹⁵Te ni quecoo ñayuu jíin sūchi lúlí núu Jesús, jeē na sóo yá ndaha ya xini i. Te tēe cáscuáha un ní cajini de jeē súcuan cúu, te ni cacahān de nuū ñayuu vējicoo jíin i. ¹⁶Te máá Jesús ni cana ya de, te ni cahān yā:

Cuāha jnūhun na quíjicoo sūchi lúlí jíñā nuū rī, te ma cási rō jeē quíjicoo i. Chi ñayuu jeē ndió cóo ni i cani ni i nájnūhun sūchi yáha, suu i quiví ndaha Yaā Dios jeē ndacu ya jniñu nuū i. ¹⁷Te jendaá cahān rī jíin ró, núu iin ñayuu tú cuatáhú i jeē ndácu Yaā Dios jniñu nuū i, nájnūhun jétáhú iin sūchi lúlí, ma quiví cuiti i ndaha ya, achí yá.

Jnūhun tēe cúcá

(Mt. 19.16-30; Mr. 10.17-31)

¹⁸Te iin tēe cújéñnu ni cajnūhún de ya:

Tēe vāha cúu ní Maestro. ¿Te na jniñu vāha sáha ná te nihīn tahú na cotecu na níí cáni andiví? Achí de.

¹⁹Te ni cahān Jesús jíin de:

¿Naun cáhān rō jeē tēe vāha cúu rí? Tú ni iin tēe vāha iyó, chi máá iin-ni Yaā Dios. ²⁰Je jíin rō tācá

jniñu ní ndacu Yaā Dios: Ma cosíquí ndéē jnáhan ró. Ma cáhni rō ndīyi. Ma sacuíhná ró. Ma sajnúhún ró. Cuatáhú ró nuū tatá rō nuū naná rō. Achí yá.

²¹Te ni cahān maá de:

Tācá jniñu yáha je ni squícu ná ndé ná lulí ná, achí de.

²²Te Jesús ni jini ya jñuhun yáha, te ni cahān yā jíin de:

Īin na jniñu cúmani sáha ró núu súcuan. Xícō ndīhi jeē névāha ró, te cuāha ró núū ñáyuu ndahú. Te nde andíví cuāha ya jeē váha ndasí núū rō. Yūcuán na te quiji ró condiquin rō ruhū, achí yá.

²³Te ná ni jini sōho de jñuhun yáha, te yōhyo ni cucuíhyá ni de, chí cúcá ndasí de. ²⁴Te jíto Jesús jeē súcuan cucuíhyá ni de, te ni cahān yā:

Tēe cúcá chí yōhyo yí quívicoo de ndaha Yaā Dios jeē ndacu ya jniñu nuū de. ²⁵Yachī gā yāha ĩin camello yaū yutícuí vēsú jeē quívi ĩin ñáyuu cucá ndaha Yaā Dios jeē ndacu ya jniñu nuū i, achí yá.

²⁶Te tēe ní cajini jñuhun yáha, ní cacahān de:

¿Ndé ñáyuu cúu jeē cácu núu súcuan? Achí de.

²⁷Te ni cahān yā jíin de:

Ñayuu chí ma cúu squívi i máá i ndaha Yaā Dios, te máá yá chí cuu sáha ya, achí yá.

²⁸Yūcuán na te ni cahān Pedro:

Saña jíjnáhan ná ní castóo ná ndīhi jeē cánevāha ná, te cándiquin na níhín, achí de.

²⁹Te máá yá ni cahān yā jíin de:

Jendaá cahán ri jíin ró jíjnáhan ró, núu na-ni ñáyuu stóo i vehe, chí tátá, chí ñani, chí ñasihí, chí

séhe, jeē siquí jeē scáca i jñuhun jeē ndacu Yaā Dios jniñu nuū ñáyuu, ³⁰núu súcuan te nanihín cuehē gā i ini ñayivi yáha, te tiempo quiji te cotecu i níí cáni, achí yá.

Jeē ni cahān tucu ya jeē cúu yā

(Mt. 20.17-19; Mr. 10.32-34)

³¹Te ni cana sīin ya ndihúxi uū tēe cáscuáha jíin yá, te ni cahān yā jíin de:

Vijna je cuángoo yó ñuu Jerusalén. Te yūcuan squícu ndīhi jñuhun ndese ndoho ruhū, Yaā ní nduu tēe, nájñuhun ni catee tēe ni canacani jñuhun Yaā Dios nde jenahán. ³²Chí ñáyuu nastúu i ruhū nuū tēe nación Roma jeē cáyucú Jerusalén cándacu jniñu. Te tēe un sácatā de nuū rī, te cahān neé de nuū rī, te tesihí de nuū rī. ³³Te cani de ruhū, te sáá te cahni de ruhū. Te nuū uní quivī te natecu rī. Achí yá.

³⁴Te máá de tu ní cájecūhun cuiti ni de tāca jñuhun yáha. Chí jñuhun yíí cúu, te tu ní cúu jecūhun ni de jeē cahán yā.

Jeē ní nasávāha ya ĩin tēe cuáá ñuu Jericó

(Mt. 20.29-34; Mr. 10.46-52)

³⁵Te ni cuyajni ya cuahān yā ñuu Jericó. Te ĩin tēe cuáá néne de yuhíchi, jícan de caridad. ³⁶Te ni jini sōho de jeē yáha cuehē ñáyuu cuangoo i, te ni cajnūhún de naun cuángoo i. ³⁷Te ni cacahān i jíin de jeē Jesús, tēe ñuu Nazaret, yáha ya cuahān yā. ³⁸Yūcuán na te ni cana jee de:

Jesús Sēhe yucūn David, cundáhú ni ní sáña, achí de.

³⁹Te ñáyuu cuangoo ichi núu yá, ni cacahān i nuū de jeē na cási de

yuhu de. Te máá de víhyá gā ni cana jee de:

Máá ní jeē cúu ní Séhe yucūn David, cundáhú ni ni sáña víi, achí de.

⁴⁰Yūcuán na te ni jecuiñi Jesús, te ni cahān yā jeē na quíndeca i de. Te nuū ní cuyajni de nuū yā, te ni cajñuhun yá de:

⁴¹¿Na vé cuní rō jeē sáha ri jíin ró? achí yá.

Te ni cahān de:

Jeē na ndúndijin tinūu ná cuní na, achí de.

⁴²Te ni cahān Jesús jíin de:

Ndúndijin tinūu ró núu súcuan. Ni candíje ró jeē cuu nasávāha ri rohó, te jeē yúcuan ní nduvāha ró, achí yá.

⁴³Te ni ndúndijin-ni tinūú de, te ni ndiquin de ya, te nácuatáhú de nuū Yaā Dios. Te ndíhi ñayuu jeē ní cajito i, suni ni cacahān i jeē yóhyo vāha Yaā cúu Yaā Dios.

Jnūhun Zaqueo

19 Te ni quivi Jesús ini ñuu Jericó, te ni yāha-ni ya cuahān yā. ²Te yúcuan íyó ñin tēe cúcá nání de Zaqueo, te cújéhnú de nuū tēe cástítú xūhun renta. ³Te cúní de coto de návāha cuni de ndé ñin cúu Jesús. Te tu ní cúu, chi cuehē ñayuu cuangoo i jíin yá, te ndiqui-ni cáa de. ⁴Te jínu de ni cosnūú de. Te ni caa de xiní ñin nuyühndú návāha coto de nuū yā, chi yúcuan yáha ya quihīn yā. ⁵Te ni jinū yā yūcuán, te ni ndacoto ndaa ya nuū de. Te ni cahān yā:

Zaqueo, yachí nuu ró, chi jíni ñúhún jēe ndóo ri vehe ró vijna, achí yá.

⁶Yūcuán na te ni cusii ni de, te yachí ni nanuu de, te ni jeca de ya cuahān de jíin yá vehe de. ⁷Te ni cajito ñayuu jeē súcuan ni cuu, te ni cacahān i siqui yā jeē cuahān yā ndóo ya vehe ñin tēe sáha cuēchi.

⁸Yūcuán na te ni ndocuiñi Zaqueo, te ni cahān de jíin máá Jítoho yō:

Vijna te sava ndíhi ndajniñu ná chi cuāha ná núu ñayuu ndahú. Te núu ni scáa ga na ní jicān na xūhun nuū ñayuu, te nacuāha ná úní gā siqui naquihin i, achí de.

⁹Te ni cahān Jesús:

Vijna te vehe yáha je ni cācu ñin tēe jeē ma jnahnú ndetū de, chi ni candíje de nájñuhun ni candíje jíi de Abraham. ¹⁰Chi ruhū, Yaā ní nduu tēe, ni quiji ri nducú rí ñayuu jeē jnahnú ndetū, te jnama ri i, achí yá.

Jnūhun yátá siqui uxí mozo jíin xūhun

¹¹Te nuū ñayuu ní cajini tāca jnūhun yáha, ní cahān gā Jesús ñin jnūhun yátá jēe steén yā ndese coo quiví ndíji ya. Chi je ni cuyajni ya ñuu Jerusalén, te cájeni ni i jeē vijna ñúhún quejéé jēe ndacu ya jniñu sáha Yaā Dios. ¹²Te ni cahān yā:

Ñin tēe cújéhnú cuahān jicá de inga nación, návāha nihīn jniñu de cuu de rey, te ndiji de ndacu de jniñu. ¹³Te nde ná tu quihin de, te ni cana de uxí mozo de, te nuū ñin ñin i ni jēhe de ñin xūhun jēe ndeé yahu ndasí. Te ni cahān de jíin i: Sájniñu ró jēe na ndúcuehē xūhun yáha jíjnáhan ró níni jēe quihín rí te ndee rí, achí de. ¹⁴Te ñayuu nación de cáquití ni i nuū de, te

ni catají i jecu tēe cándiso jniñu cuangoo yatā de jeē cahān: Tu cánujnahān ni ñayuu nación na jéē cuáha ní jniñu nuū tēe yáha jéē cuu de rey nuū i, áchí. ¹⁵Te vēsú súcuan te ni nihīn jniñu de cuu de rey, te vendiji de nación de. Te nuū ní ndee de, te ni ndacu de jniñu jeē na quǐjicoo mozo jeē ni jéhe de xūhun núū, návāha na cúni de nasaa ni canihīn iin iin i siquī. ¹⁶Te ni quee iin mozo un núū de, te ni cahān i: Iin xūhun jéē ni jéhe ní núū ná, ni nduu uxī, achí i. ¹⁷Te ni cahān maá rey: Vāha mozo cúu ró, te vāha ni sáha ró. Chi ni squícu vāha ró jíin iin jniñu lúlí-ni, te vijna te sáha ri jeē cujéhnu ró ndacu ró jniñu nuū uxí ñuu jniñi ri, achí de. ¹⁸Te ni quee inga mozo, te ni cahān i: Iin xūhun jéē ni jéhe ní núū ná, ni nduu uhūn, achí i. ¹⁹Te suni ni cahān de jíin mozo un: Róhó, cujéhnu ró ndacu ró jniñu nuū uhún ñuu jniñi ri, achí de. ²⁰Te ni quee inga mozo, ni cahān i: Yāha nácuāha ná xūhun ní, chi ni chuvāha ná ini iin pañuelo. ²¹Chi ni yūhu ná nihín, chi tēe xeēn cúu ní. Chi cuehē gā nándacān ní vēsú jeē ni jéhe ní, te cuehē gā cuní ni vēsú jeē cúu sáha mozo ni, achí de. ²²Yūcuán na te ni cahān rey: Mozo neé cúu ró núu súcuan, te jíin jnūhun ni cahān rō te sándaā rī jeē iyó cuéchi ró jéē tu ní sájniñu ró jíin xūhun rí. Chi jéni ni rō jeē tēe xeēn cúu ri, te cuehē gā nándacān rī vēsú jeē ni jéhe ri, te cuehē gā cuní ri vēsú jeē cúu sáha mozo rī. ²³Núu súcuan ¿te naun tu ní chúne ró xūhun rí vēsú nuū banco? Te jeē ní ndee rī te naquihin rī xūhun rí nde jíin séhe xūhun núú.

Achí de. ²⁴Te ni cahān de jíin ñáyuu cáhiin yūcuán: Quende xūhun jíinā nuū i, te cuāha ró núū mozo jeē névāha uxī, achí de. ²⁵Te ñayuu un ní cacahān i jíin de: Te ndese, chi je névāha de uxī, achí i. ²⁶Te ni cahān tucu rey: Cáhān rī jíin ró jeē ñáyuu je névāha, sa quiji ga nuū i, te cone vāha cuehē i. Te ñayuu jeē tu névāha, sa cujiyo-ni vēsú jecu jeē névāha i. ²⁷Te tēe jeē cájito uhū ruhū, jeē tu ní cánujnahān ni de jeē cuu ri rey nuū de, cuáquihin de na quǐjicoo de yāhá. Te cahni rō de coto ri, achí de. Achí Jesús.

Jeē ni quívi Jesús ñuu Jerusalén

(Mt. 21.1-11; Mr. 11.1-11; Jn. 12.12-19)

²⁸Te nuū ní ndihi ni cahān yā jnūhun yáha, te ni jica ga yā cuahān yā ñuu Jerusalén. ²⁹Te nuū ní cuyajni ya ñuu Betfagé jíin ñuu Betania, yajni nuū íne yucu nání yucu Olivos, te ni tají yá uū tēe cáscuáha jíin yá jeē quíngoo de.

³⁰Te áchí yá jíin de:

Cuáhān ñuu lúlí íne ichi núú. Te núu ni quívi ró, te nihīn rō iin burro núhni tī, jeē ní iin tēe ná tu coso de tī. Te ndají ró tī quiji ró jíin tī. ³¹Te núu ndé iin cajnūhún naun cándají ró tī, te cahān rō jíin: Máá Jítoho yō jíni nūhún yá tī, achi rō. Achí yá.

³²Te cuangoo tēe ni tají yá, te ni canihīn de tī nájnūhun ni cahān yā jíin de. ³³Te jeē cándají de tī, te ni cacahān jitoho tī jíin de:

¿Naun cándají ró burro ri? achí.

³⁴Te ni cacahān de:

Máá Jítoho yō jíni nūhún yá tī.

³⁵Te ni ndeco de jíin tī nuū Jesús. Te ni casoó de sahna de siquī tī, te

ni casáha de jeē ní jecosō yā siquī tī. ³⁶Te ná-ni cuahān yā, sáa cáscáa ñayuu sahma i ini ichi. ³⁷Te nuū ní cuyajni ya nuū cúun ichi yucu Olivos, te ndihī ñayuu cácanđije jeē cándiquin i ya, ni caquejéé i cácusī ni i, te cácana jee i jeē yóhoyo vāha Yaā cúu Yaā Dios siquī táca jniñu jéhnu ni sáha ya ni cajito i. ³⁸Te áchí i:

Yóhoyo vāha Yaā cúu Rey jeē véji jíin jniñu máa Jítoho yō Yaā Dios. Te sáha ya jeē cóo manī yō jíin Yaā Dios andiví. Te yóhoyo cújéhnu Yaā Dios, achí i jíināhan i.

³⁹Yūcuán na te jecu tēe fariseo cáhiin mēhñu ñáyuu cuehē ún, ní cacahān de jíin yá:

Maestro, cahān ni núu ñáyuu cándiquin nihín jéé na cási i yuhu i, áchí de.

⁴⁰Te ni cahān Jesús:

Cáhán rī jíin ró jeē núu ñayuu yáha na cási i yuhu i, te táca yúu chí cana jee, áchí yá.

⁴¹Te nuū ní cuyajni ya Jerusalén, te ni jito ya ñuu ún, te ni ndahyū yā siquī. ⁴²Te ni cahān yā:

Róhó ñáyuu Jerusalén, yóhoyo ni cuu ni rī jeē na jécūhun ni rō jeē cuu ndumanī rō jíin Yaā Dios sáha rī. Te siquī jeē tu cácanđije ró, te vijna chí ma cúu ga jecūhun ni rō. ⁴³Chi quee quivī jeē coo jnūndóho, te ñayuu cájito uhū rohó, cuicó ndúu i ñuu rō, te casi cutú i jíin yúu, te táca lado ndonda i siquī rō.

⁴⁴Te ndihī vehe scótúu i, te cahni i róhó jíināhan ró. Te ma stóo i ni ñin vehe jeē cóso jnáhan ga yuū. Chi ni quiji ri nde nuū Yaā Dios jeē jnáma rī rohó, te tu ní cácanđije ró. Achí yá.

Jeē ní quenehen ya ñayuu ini templo

(Mt. 21.12-17; Mr. 11.15-19; Jn. 2.13-22)

⁴⁵Te ni quivī ya ini templo cáhnu, te ni quejéé yá quenehen ya táca ñáyuu cájeen quitī te cánaxico núu ñáyuu jeē socō i. ⁴⁶Te ni cahān yā jíin i:

Yósó núu tútu ii jeē cahán Yaā Dios: Vehe ri chí vehe nuū cájicān tahu cúu, áchí Yaā Dios. Te máa ró jíināhan ró, chí nájnūhun yaū cava ñacuīhna ní canasáha ró, áchí yá.

⁴⁷Te ndiquivī ni steén yā jnūhun ini templo. Te sutū cácujeéhnu jíin tēe cástéén tutu ley Yaā Dios jíin tēe cácujeéhnu nuū ñáyuu ñuu ún, cánducú de modo ndese cahni de ya. ⁴⁸Te tu cánihin de modo sáha de, chí ndivii ñayuu yóhoyo cájetáhu i cájini nahín i jnūhun cáhán yā.

Siquī jeē ndíso jniñu Jesús

(Mt. 21.23-27; Mr. 11.27-33)

20 Te ñin quivī steén yā jnūhun nuū ñáyuu ini templo, te nácani ya jnūhun jeē jnáma Yaā Dios ñayuu. Te ni quecoo sutū cácujeéhnu jíin tēe cástéén tutu ley Yaā Dios jíin táca tēe jéhnu cándacu jniñu. ²Te ni cacahān de: Castūhún, ¿ndé ní nihin jniñu ró jéé sáha ró jniñu yáha? ¿Te ndé ñin ni tee jniñu siquī rō jeē sáha ró súcuan? Achí de.

³Te ni cahān Jesús jíin de:

Suni ruhū cajnūhun rī rohó ñin jnūhun jíināhan ró. Castūhun núu rī: ⁴¿Ndé ñin ni tee jniñu siquī Juan jeē ni scuándute de? ¿A Yaā Dios chí táca tēe? Achí yá.

⁵Yūcuán na te ni candajnūhun máa de:

¿Ndese cahān yō? Núu cahān yō jeē Yaā Dios ni tee ya jniñu un síquī Juan, te cahān de jíin yó: ¿Najehē tu ní cácanđije ró de núu súcuan?

⁶Te núu cahān yō jeē ñáyuu ni catee jniñu un síquī de, te ndivii ñayuu cahni i yóhó jíin yúu, chi cácanđije i jeē tée ni nacani jñuhun Yaā Dios ni cuu ndije Juan, achí de cacahān maá de.

⁷Te ni cacahān de jeē tu cájini de ndé ñin ni tee jniñu síquī Juan jeē ni scuándute de. ⁸Yūcuán na te ni cahān Jesús:

Ni ruhū, suni ma cáchi rī nuū rō ndé ñin ni tee jniñu síquī rī sáha ri jniñu yáha, achí yá.

Jñuhun yátá síquī tēe néé cásájniñu nuū uva

(Mt. 21.33-44; Mr. 12.1-11)

⁹Te ni quejéé Jesús cahān yā jñuhun yátá yáha jíin ñáyuu ún:

Ñin tēe ni nachuhun de cuehē uva nuū ññuhun de. Te ni stóo de nuū sava tēe sájniñu nuū, te cuu sava de ndehē jíin. Te ni tee de ichi jeē cuahān nahān de inga ñuu. ¹⁰Te máá tiempo ndutútú uva, te ni tají de ñin mozo cuahān nuū tēe cásájniñu ún, návāha naquihin de sava ndehē uva un. Te tēe un ní cacani de mozo, te ni canatajé de i cuanuhun i súcuan-ni. ¹¹Te tēe chíí uva ni tají tucu de inga mozo cuahān. Te tēe cásájniñu ún, suni ni cacahān ndevāha de nuū i, te ni cacani de i, te ni canatajé de i cuanuhun i súcuan-ni. ¹²Te tēe chíí uva ni tají tucu de inga mozo cuahān. Te tēe cásájniñu ún, suni ni castújí de mozo un, te ni cascúnu de i.

¹³Yūcuán na te ni cahān tēe chíí uva: ¿Ndese sáha ri? Na tají rí sēhe ri jeē maní ri jíin, chi sanaa te núu ni cajito de i te coo yáñuhún de nuū i. Achí de. ¹⁴Te tēe cásájniñu ún, ná ni cajito de jeē véji i, te ni cacahān de: Tēe chíí táhū cúu jeē véji ún. Na cáhni yō de, te ndōo tahū de cuu máá yó, achí. ¹⁵Te ni caquenehen de i inga lado, te ni cajehni de i, achí yá.

Te ni cajñuhun yá de:

Núu súcuan ¿te ndese sáha tēe chíí uva jíin tēe cásájniñu ún? ¹⁶Ndiji de te cahni de tēe un jíjnáhan, te cuāha de ññuhun cáá uva un núu inga sava tēe sájniñu nuū, achí yá.

Te jeē ní cajini ñayuu jñuhun yáha, te ni cacahān i:

Aī, núu ma cóo cuítí súcuan víí, achí i.

¹⁷Te ndéhé yá nuū i jíjnáhan i, te ni cahān yā:

Núu súcuan ¿te á cájecūhun ni rō jñuhun yáha jéé yosó núu tútu ñi jeē cúu ri nájñuhun ñin yuū? Chi achí tutu:

Yuū jeē ní casquéhichī tēe cájeni vehe,

yuū yáha nduu jeē quítuu vehe.

Achí. ¹⁸Te ñayuu tu cácanđije, ndoho i nájñuhun ndóho ñayuu jeē cotúú síquī yuū te jnáhnú i. Te quiví sándaā Yaā Dios cuēchi, te ñayuu tu cácanđije, ndoho i nájñuhun ndóho ñayuu jeē nínga yuū síquī i te cundihi i sáha. Achí yá.

Síquī xúhun renta

(Mt. 21.45-46; 22.15-22; Mr. 12.12-17)

¹⁹Yūcuán na te sutú cácujuhnu jíin tēe cástéén tutu ley Yaā Dios,

ni cacuni de jñi de ya maá hora un. Chi ni cajecūhun ni de jeē siquī maá de cúu jñūhun yátá ní cahān yā siquī tēe cásajniñu nuū uva jíin tēe cájeni vehe. Te tu ní cúu, chí cáyūhú de jeē quitī ni ñayuu.

²⁰Yūcuán na te ni catajī de jecu tēe cuacoto yuhu de ya, te tēe un cásáha-ni de jeē tēe ndaā cácuu de. Te cánducú de sáha de jeē cahán yā ñi jñūhun jeē nihín de cuēchi siquī yā, te quindecá de ya nuū tēe cúu gobernador. ²¹Te ni cacahān de:

Maestro, cájini na jēe cahán vāha ní, te stēén ndaā ní. Te tu sáha ní cuenta ndese cúu ñi ñi ñayuu, chí ñuú-ni sáha ní jíin i. Te stēén ndaā ní ndese squícu ñayuu nuū Yaā Dios. ²²Núu súcuan te cachi ní: ¿A íyó vāha jeē chúnaa yō renta nuū rey nación Roma jeē jñí nación yō, chí tuú? áchí de.

²³Te ni jini yā jeē cáculi de stáhú de ya, te ni cahān yā jíin de:

¿Najehē cájito ndee rō ruhū?

²⁴Stēén ñi xūhún na cóto ri. ¿Nde ñi nuū cúu jeē ndeé nuū xūhun yáha, te ndé síhví cúu jeē ndeé yāhá? áchí yá.

Te ni cacahān de jíin yá:

Nuū jíin síhví rey un cúu, áchí de.

²⁵Yūcuán na te ni cahān yā jíin de:

Núu súcuan te nacūāha ró núu rey un jēe yíhi cuenta nuū de, te nacūāha ró núu Yaā Dios tāca jēe yíhi cuenta nuū maá yá, áchí yá.

²⁶Te tāca tēe ún tu ní cúu nihín de cuēchi siquī yā jíin ni ñi jñūhun cáhán yā, cájito jíinú ñayuu. Chi sa ni canaa ni de jeē ndichí ní stió cuñí yā jñūhun nuū de, te tuá na vé ni cacahān de.

Jeē ní cacajñūhún de siquī jeē nátecu ndīyi

(Mt. 22.23-33; Mr. 12.18-27)

²⁷Yūcuán na te jecu tēe grupo saduceo ni quecoo de nuū yā. Te tēe un cacahān jeē tu nátecu cuiti ndīyi. Te ni cacahān de jíin yá:

²⁸Maestro, Moisés ni tee de nuū tútu jeē cánevāha yó: Núu ñi tēe cuu de, te ndōo ñasihí de, te núu tu ní íyo sēhe de jíin ña, núu súcuan te cánuú jeē ñani de naquihin ñasihí de, te sēhe de jeē cácu jíin ña nucuñi i nuū ndīyi ñani de, áchí tutu. ²⁹Núu súcuan te ni íyo uxā ñani. Te tēe núu ní quijnáhan de jíin ñahan. Te ni jihí de, te tú sēhe de ní íyo. ³⁰Te tēe uū ni naquihin de ña, te suni ni jihí de, te tú na sēhe de ní íyo. ³¹Te tēe uní ni naquihin de ña. Te suni súcuan ndihúxá de ni condeca de ña, te ni cajihí ndihi de, te ni ñi de tú sēhe de ní íyo. ³²Te jeē sándihí te suni ni jihí ñahan ún. ³³Núu súcuan te núu na nátecu de jíináhan de quiví nátecu ndīyi, ¿te ndé ñi de cuu ña ñasihí de? Chi ndihúxá de ni condeca de ña. Achí de jíináhan de.

³⁴Yūcuán na te ni cahān yā jíin de:

Ñayiví yáha chí cáquijnáhan tēe jíin ñahan. ³⁵Te ñayuu vāha jeē natecu i quivícoo i andiví, ma quijnáhan ga i yūcuán, chí tuá na jñūhun quijnáhan tēe jíin ñahan coo. ³⁶Ni ma cúu cuiti gā i, chí coo i nájnūhun ndajéhé Yaā Dios. Te sēhe Yaā Dios cuu i, chí je ni canatecu i. ³⁷Te suni máá Moisés cáhán de jeē nátecu ndīyi, chí ni tee de nuū tútu ndese ni cahān

yā jíin de mēhñu yúcū jeē cayú yáñuhūn. Chi ni cahān de jeē cúu ya Yaā Dios Abraham jíin Isaac jíin Jacob. ³⁸Te jeē ni cáhān de súcuan cúu jeē ní cachi de jeē cátecu tāca ndíyí. Chi vēsú je ni cajihí i, te cátecu i nuū iyó máá yá, chi cúu ya Yaā sáha jeē técu ñayuu níí cáni. Achí yá jíin de.

³⁹Te jecu tēe cástéén tutu ley Yaā Dios ni cacahān de:

Váha ni cahān ní Maestro.

⁴⁰Te tuá ni cáchundeyí ni de cajñuhún de ya.

Siquí jeē cúu Cristo sēhe yucūn

David

(Mt. 22.41-46; Mr. 12.35-37)

⁴¹Te ni cahān yā jíin de jíināhan de:

¿Ndese cúu jeē cácahān ñayuu jeē Cristo cúu sēhe yucūn David?

⁴²Chi máá David suhva ni cahān de jñuhun ya nuū tútu Salmo:

Máá Jítóho yō Yaā Dios suhva ni cahān yā jíin Jítóho rī, Yaā quiji:

Cucōo ró lado váha ri nuū cujéhnu ró,

⁴³te na sáha ri jeē quende rō poder tāca jēē cájito uhū rohó. Achí Yaā Dios. Achí David. ⁴⁴Te núu sēhe yucūn David cúu Cristo, ¿te ndese cúu jeē ni cáhān de jeē Jítóho de cúu ya? áchí yá.

Jeē ni cáhān yā jeē iyó cuéchi de jíināhan de

(Mt. 23.1-36; Mr. 12.38-40; Lc. 11.37-54)

⁴⁵Te ni cahān yā jíin tēe cáscuáha jíin yá, te suni ni cajini sōho ndíhi ñayuu:

⁴⁶Coto má cándíje ró táca tēe cástéén tutu ley. Chi cácusíi ni de cáñuhun de sahma cáni jeē steén jeē cujéhnu de, cájica cuu de jíin. Te cánujnahan ni de jeē cahán yíñúhún ñayuu jíin de nuū yáhu. Te cánujnahan ni de cucōo de nuū silla yíñúhún gá ini vehe íi sinagoga, jíin silla yíñúhún gá nuū víco cáyeji ñayuu. ⁴⁷Te cáquende de vehe ñahan ní caquendōo ndáhú. Te nahán cájicān tahú de návāha cani ni ñayuu jeē tú na cuéchi de. Tēe yáha jíināhan de chi xeēn gā ndoho de castigo. Achí yá.

Jeē ni sócō ñahan viuda xuhún

(Mr. 12.41-44)

21 Te ná ni iyo ya ini templo, te jíto ya nuū ñayuu cucá jēē cáchuhun i cuehē xuhún ini tāca yéjnū nuū cásocō i. ²Te suni ni jito ya nuū ññahan viuda jeē ndóho ndáhú, te ni chuhun ña uū centavo lulí ini yejnū ún. ³Te ni cahān yā:

Jendaá cahán rī jíin ró jeē cuehē gá cúu jeē ni sócō ñahan viuda ndahú yáha, vēsú jeē ní casocō tāca gá ñayuu. ⁴Chi tācá i ni casocō i jeē ni ndóo siquí xuhun cuéhē i. Te ñahan yáha, vēsú ndahú ndóho ña, te ni chuhun ndíhi ña jeē cótecu ña. Achí yá jíin de.

Jeē ní cachi yā jeē náā templo

(Mt. 24.1-2; Mr. 13.1-2)

⁵Te sava de ni cacahān de jeē luu cáa templo cáhnu, chi ni cuvāha jíin táca yúu luu jíin táca jēē ní casocō ñayuu. Yūcuán na te ni cahān yā:

⁶Ndihí jeē cájito ró yáha, quee quiví jeē ma cóso jnáhan ga ni iin yuū, chí ndihí jnanū, achí yá.

Na seña coo nuū cuácuyajni ndihí ñayiví

(Mt. 24.3-28; Mr. 13.3-23)

⁷Te ni cacajñuhún de ya:

Maestro, ¿ndé quíví coo tāca jéē ní cachi ní jéē coo? ¿Te na seña coo nuū cuácuyajni squícu tāca jéē ni cáhān ní? áchí de.

⁸Te ni cahān yā:

Coto ró jéē ma stahú i róhó. Chi quijicoo cuehē tēe jeē stahú jíin síhví rí, te cahān de: Máá rí cúu Cristo. Te suni cahān de: Je ni quee quiví ndihí ñayiví, achí de. Te ma cóndiquín rō de. ⁹Te núu nihín rō jñuhun jeē tāca lado iyó guerra te cándonda ñayuu siquī tohō, te ma yūhu ró, chí cánúu jéē xihna gā coo súcuan, te ni ma jinú yachí quiví ndihí ñayiví. Achí yá.

¹⁰Te ni cahān gā yā:

Ndonda nación siquī inga nación, te ndonda ñuu siquī inga ñuu jeē cuajnáhan. ¹¹Te cháha chúcuan jñāa téyí, te coo jnamā jíin cuéhyí xeēn. Te coo seña jéhu ichi ándiví jéē yūhú ndasí ñayuu coto i.

¹²Te nde ná tu coo tācá jniñu yáha, te coto xeēn i róhó, te jniñ i róhó. Te quindeca i sava ró tāca vehe i sinagoga jeē cahán i cuēchi siquī rō. Te chune i sava ró vecāa. Te quindeca i sava ró núu tāca rey jíin núu tācá gobernador, te cahān i cuēchi siquī rō jeē siquí jeē cácandíje ró rúhū. ¹³Te jeē súcuan coo, te cuitē núu ga jñuhun ri, chí nacani ndaā rō nuū de jíjñáhan de. ¹⁴Núu súcuan te cundaā ni rō jeē

ma nácani ni rō xihna gā ndese stío cuíñí rō nuū de te cācu ró. ¹⁵Chi ruhū cuāha ri jñuhun ndíchí cahān rō, návāha ñayuu jeē cájito uhū rohó, ma cúndehyí i jíin ró ni ma cúu cahān i siquī rō. ¹⁶Te nde tatá rō, naná rō, ñani rō, jnáhan ró, jíin amigo rō, nastúu i róhó núu ñayuu xeēn. Te cahni i sava ró. ¹⁷Te tāca ñayuu chí quití ni i nuū rō jeē siquí ruhū. ¹⁸Te ni iin ixi xíní rō jíjñáhan ró ma náā, chí coto ya rohó. ¹⁹Te núu cuiñi nihin ró jíin jñuhun ri, te cotecu rō níí cáni.

²⁰Te núu ni cajito ró jéē ní cajicó ndúu soldado ñuu Jerusalén, te na jécūhun ni rō jeē jé yajni naa ñuu ún. ²¹Yūcuán na te ñayuu cáyūcú región Judea, na cúnu i caa i yucu quingoo i. Te ñayuu cáyūcú Jerusalén, na quéndacoo i quingoo i. Te ñayuu cáhiin nde rancho, ma nándicó i ñuu ún. ²²Chi tāca quíví un cuāha Yaā Dios castigo nuū ñayuu jeē siquí cuéchi i, návāha squícu tāca jñuhun jeē yosó núu tútu. ²³Te quiví ún nacā jeē ndahú ñahan cáñuhun sēhe jíin ñahan cándeca yiquín, chí ma cúnihin ña cunu yachí ña. Chí yōhyo xeēn coo jñundóho ini ñayiví, te quiji castigo xeēn siquí ñayuu yáha. ²⁴Te sava i cuu nuū guerra, te sava i quingoo preso nde tācá inga nación. Te ñayuu tāca gá nación ndacu nihin i jniñu nuū ñayuu ñuu Jerusalén, nde jinu tiempo jeē jéhe Yaā Dios jñuhun ndacu i jniñu.

Ndese coo quiví ndiji Yaā ní nduu tēe

(Mt. 24.29-35, 42-44; Mr. 13.24-37)

²⁵Yūcuán na te coo seña nuū níandii jíin núu yoó jíin núu quími.

Te ini ñayiví te quiji jnündóho xeên siquī ñáyuu táca nación. Te cunéé ni i, te yúhú i jeē nǎhin xeên mar te ndóna xeên ndute mar vēji nuū ñúhun. ²⁶Te cuu sōo sava ñayuu jeē cáyúhú i cándetu i táca jnündóho quiji siquī ñayiví. Te táca jéé iin andiví chi quisi i. ²⁷Yūcuán na te coto ñayuu nuū maá rí, Yaā ní nduu tēe, ndiji ri jíin vícō, te condiso ri cuehē poder, te yōhyo luu cujéhnu ri. ²⁸Te núu ni quejéé táca jniñu yáha, te ndeyí coo ni rō, te cocunuū rō andiví, chi je yajni jnama ya rohó. Achí yá jíin de jíjnáhan de.

²⁹Te suni ni cahān yā jnūhun yátá yáha:

Condēhe jíjnáhan ró ndese sáha nundēhe higo jíin táca gá yujnu.

³⁰Núu cájito ró jéé ní quejéé náne numa yújnu ún, te cájini rō jeē je yajni coo tiempo jihní. ³¹Te suni súcuan núu ni cajito ró jéé ní quejéé cúu táca jniñu jeē ni cáhān rī, yūcuán na te na jécūhun ni rō jeē ní cuyajni quiví ndacu Yaā Dios jniñu ini ñayiví.

³²Jendaá cahān rī jíin ró jeē ma cúu ndíhi ñayuu tiempo un, chi nde squícu ndíhi jniñu ún. ³³Andiví jíin ñáyiví chi naa, te táca jnúhun cáhān rī chi ma náā, chi ndíhi squícu.

³⁴Te coto ma stívi ró maá ró jíjnáhan ró jéé sáha ró táca cuéchi, jíin jéé najini ró, jíin jéé cujnēñu ró jíin táca ndajniñu cotecu rō, návāha tú sanaa ni rō te quee quiví un siquī rō. ³⁵Chi nájnūhun jeē núu iin trampa, súcuan quee jnündóho siquī ñáyuu cáyūcu ní cáhnu ñayiví.

³⁶Núu súcuan te ndito coo ni rō, te níni cácan tahú rō, návāha cuu

cácu ró núu táca jnündóho jeē quíji ún, te cuu cuiñi ró núu ruhū, Yaā ní nduu tēe. Achí yá.

³⁷Te ndiquiví steén yā jnūhun ini templo, te ndijnahan jecuáa jéndoō ya nde yucu jeē naní Olivos. ³⁸Te táca jénéhen quécoo ñayuu nuū yā ini templo jeē cúni sōho i jnūhun steén yā.

Jeē ní casquíjnáhan de jnūhun jniñ de Jesús

(Mt. 26.1-5, 14-16; Mr. 14.1-2, 10-11; Jn. 11.45-53)

22 Yūcuán na te ni cuyajni vico pascua jeē cáyeji ñayuu hebreo pan jeē tú na levadura yíhi. ²Te sutū cácujeñu jíin tée cástéén tutu ley, ni canducú yuhu de modo cahni de Jesús, chi cáyúhú de jeē quítī ni ñayuu.

³Te ni quiví Satanás ini anuá Judas jeē nastúu de ya. Te suni nání de Iscariote, te cúu de iin jnáhan jeē ndihúxí uū tēe apóstol. ⁴Te ni jehēn de ni candajnūhún de jíin táca sūtū cácujeñu jíin tée cándiso jniñu ini templo, núu ndese nastúu de ya nuū tée un jíjnáhan. ⁵Te tēe un ní cacusiñi ni de, te ni cajejnūhun de jeē cuáha de xūhun núu Judas. ⁶Te ni jetáhú Judas, te ni nducú de modo ndese nastúu yuhu de ya hora jeē tú na ñayuu iyó.

Jeē ní jequin yā Cena yā

(Mt. 26.17-29; Mr. 14.12-25; Jn. 13.21-30; 1 Co. 11.23-26)

⁷Te ni quee maá quiví vico jeē cáyeji ñayuu pan jeē tú na levadura yíhi, te suni quiví un cájehni i londe nájnūhun ni ndacu Yaā Dios jniñu jeē sáha i vico pascua un.

⁸Te Jesús ni tají yá Pedro jíin Juan quingoo de, te áchí yá jíin de:

Cuángoo te sátühva ró jéé cuxíni yó vico pascua, achí yá.

⁹Te ni cacajñuhún de ya:

¿Ndé nuū cuní ni jéé quisátühva ná? áchí de.

¹⁰Te ni cahān yā jíin de:

Cuángoo ñuu yūcuán, te núu ni quīvicoo ró te najnáhan ró jíin ñin tēe ndíso quīyi ndute. Te condiquín rō de quihín rō jíin de nde vehe nuū ndívi de. ¹¹Te cahān rō jíin tēe chíi vehe ún: Achí máa Maestro: ¿Ndé ñin cúu cuarto vehe ní cuāha núu ní nuū cuxíni ya vico pascua jíin tēe cáscuāha jíin yá, achi rō. ¹²Yūcuán na te stéén de ñin cuarto cáhnu nde xinī véhe jeē je íyó túhva, te yūcuan sátühva ró jéé cuxíni yó, áchí yá.

¹³Te cuángoo de, te ni canihín de nájnūhun ni cahān yā. Te ni casátühva de jeē cuxíni ya vico pascua.

¹⁴Yūcuán na te ni jinū hora jeē cuxíni, te ni quee Jesús, te ni cucōo ya mesa jíin tēe cácuu apóstol. ¹⁵Te ni cahān yā jíin de:

Yōhyo ni cuu ni rī cuxíni ri jíin ró jijnáhan ró vico pascua yáha, vijna nde ná tu cuu rī. ¹⁶Chi cáhán rī jíin ró jeē ma cáji cuiti gā rī vico pascua, chi nde quiji quivī ndacu Yāa Dios jniñu ní ñayiví, te sáá te caji tucu ri, achí yá.

¹⁷Te ni quihin ya ñin copa ndūxi uva, te ni nacuatáhú yá, te ni cahān yā:

Quihin copa yáha, te coho ró jíin jnáhan ró. ¹⁸Chi cáhán rī jíin ró jeē ndé vijna te ma cóho ga rī ndūxi uva, chi nde quiji quivī ndacu Yāa

Dios jniñu ní ñayiví, te sáá te coho tucu ri. Achí yá.

¹⁹Te ni quihin ya pan, te ni nacuatáhú yá, te ni tahú cuéchí yá, te ni jēhe ya nuū de jijnáhan de. Te ni cahān yā:

Yāha cúu yiqui cúnu rī jeē socō rī jeē chunaa rī cuēchi ró jijnáhan ró. Te níni caji rō súcuan jeē cáñuhun ni rō ruhū jeē ni jíhī rī jehē rō. Achí yá.

²⁰Te suni súcuan ni sáha ya jíin copa ndūxi uva, ná ni cuu ni cuxíni ya. Te ni cahān yā jíin de:

Yāha cúu niñī rī jeē cuáha ri jeē cúu contrato jeé, te cati jeē ndundoo cuēchi ró jijnáhan ró.

²¹Te vijna chi tēe nastúu ruhū, néne de jíin rī nuū mesa yáha.

²²Chi ruhū, Yāa ní nduu tēe, jendaá cúu jeē quihín rī cuu rī nájnūhun je ni sándaā Yāa Dios jeē súcuan coo. Te nacā xeēn ndoho tēe jeē nastúu ruhū, achí yá.

²³Yūcuán na te ni caquejéé de cácajnūhun jnáhan de ndé ñin de cúu jeē nastúu de ya.

Jeē ní cacahān de siquī ndé ñin de cújéhnu ga

²⁴Yūcuán na te yōhyo ni cacahān de siquī ndé ñin de cújéhnu ga nuū jnáhan de. ²⁵Te ni cahān Jesús jíin de:

Rey tēcá nación chi cándacu ñihin de jniñu nuū ñayuu cájni de, te cácahān i jeē tēe cásaaha vāha cúu jeē cácujeñnu nuū i. ²⁶Te róhó jijnáhan ró, ma cóo ró súcuan. Chi núu ndé ñin ró cújéhnu ga, te sa nasáha lulí ró maá ró. Te núu ndé ñin ró ndácu jniñu, te sa nasáha ró máá ró tēe jéjníñu nuū jnáhan.

²⁷ ¿Te ndé iin cúu jeē cujéhnú ga, á tée yéji nuū mesa, chí tée jéni cohō? ¿A násūu tée jeē yéji nuū mesa cúu jeē cujéhnú ga? Te ruhū nasūu súcuan cúu ri, chí ni nasáha ri maá rí nájnūhun tēe jéjnīñu nuū rō, chí vēji ri sáha ri jeē nihín tahu rō.

²⁸ Te maá ró cácuu tēe jeē niní cáhiin jíin rí tāca quívī jeē ndóho ri jnūndóho. ²⁹ Nūu súcuan te nájnūhun ni sáha Tátá rī jeē ndácu ri jniñu, suni súcuan sáha ri jeē ndacu ró jniñu jíjnáhan ró. ³⁰ Te caji rō coho ró jíin rí ini ñuu nuū ndacu ri jniñu. Te cucōo ró iin iin mesa jeē sándaā rō jniñu ndihúxí uū yucūn Israel. Achí yá.

Jeē ní cachi yā jeē yūhu Pedro cahān de jeē jiní de ya

(Mt. 26.31-35; Mr. 14.27-31; Jn. 13.36-38)

³¹ Te suni ni cahān maá Jítoho yō jíin Simón Pedro:

Simón, cuni sōho ró, chí ni jicān Satanás rohó jíjnáhan ró jēē coto ndee rohó nájnūhun jeē síjin trigo, te stúu ndé iin ró cácuu nájnūhun paja jeē nayūhu ró, te ndé iin ró cácuu nájnūhun trigo jeē candíje nihin ró. ³² Te ni jicān tahu rī jehē rō návāha ma náyūhu ró jeē ma cándíje ga rō. Te jeē nácandíje tucu ró, te sáha ró jēē íje tāca jnāhan ró jíin jnūhun ri. Achí yá.

³³ Te ni cahān de jíin yá:

Je íyó túhva ná quíhīn na jíin ní vecāa te vēsú na cuu na jíin ní, achí de.

³⁴ Te ni cahān yā:

Pedro, cáhán rī jíin ró jeē nde ná tu cana líhli vijna, te yūhu ró jeē jniñi ñayuu rohó, te unī jínu cahān rō jeē tu jíin rō ruhū, achí yá.

Jeē ní cuyajni coto ya jnūndóho

³⁵ Yūcuán na te ni cajnúhun yá de jíjnáhan de:

Ná ni tají rí rohó ní jengoo ró jēē tu ní cóndiso ró ñunu ni yijni xūhún ni ndijēn, ¿te á ní íyo iin jeē ní cumanī nuū rō? Achí yá.

Te ni cacahān de:

Tú ni iin ní cúmanī.

³⁶ Te ni cahān yā:

Nde vijna sa cáhán rī jeē cóndiso ró ñunu ró, te suni yijni xūhún. Te tēe jeē tu névāha espada jeē coto de maá de, na xíco de ticāchí de te na cuáan de. ³⁷ Chi cáhán rī jíin ró jeē quee quívī ndoho yó jnūndóho, chí cánuú squícu jnūhun yáha jēē cahān nuū tútu síquī rī: Sáha ñayuu jíin yá nájnūhun cásáha i jíin tēe sáha cuēchi xeēn, áchí tutu. Chi tāca jnūhun un jēē yosó cáhán síquī rī, chí squícu nahín, áchí yá.

³⁸ Yūcuán na te ni cacahān de:

Yāha íyó úu espada, achí de.

Te ni cahān yā jíin de:

Jíin jēē yáha-ni, áchí yá.

Jeē ní jicān tahu yā nuū huerto Getsemaní

(Mt. 26.36-46; Mr. 14.32-42)

³⁹ Te ni quenda ya cuahān yā yucu Olivos nájnūhun sáha sáha ya. Te tēe cáscuáha jíin yá ni candiquin de ya cuangoo de jíin yá. ⁴⁰ Te nuū ni jínū yā yūcuán, te ni cahān yā jíin de:

Cacān tahu rō jíjnáhan ró jēē chindéē ñáhán yá rohó jēē ma sáha ró cuéchi núu coto ndee jeneé rohó, achí yá.

⁴¹ Te ni jica ya jecu, cūhva jeē jicá jíinú yuū jeē squífn. Te ni jecuññi yití yá, te suhva ni jicān tahu yá:

⁴²Tátā, núu cúní ni te tejiyo ní jnúndóho yáha jéē ma quíji síquī ná. Te nasūu jéē cuní maá ná, chí jeē cuní maá ní na cóo, áchí yá.

⁴³Te ni cane iin ndajéhé andiví núu yā, te ni jēhe fuerza nuū yā.

⁴⁴Te cúcuíhyá ndasí ni yā jeē quiji jnúndóho síquī yā, te ni nducú ndéyí gá yā ni jicān tahú yā. Te ni cane jnañū yā, te tóo nuū ññhun nájññhun yúyú náhnu ñññ.

⁴⁵Te ná ni ndocuiññ yā jeē ni jicān tahú yā, te ni ndee yā nuū téē cáscuáha jíin yá. Te ni jito ya jeē cáquixí de, chí tuá cáhiyo ndeyí ni de cacān tahú de jeē cácuquíhyá ndasí ni de. ⁴⁶Te ni cahān yā jíin de:

¿Naun cáquixí rō? Ndonga te cacān tahú rō jeē chindéé ñāhān yá rohó jéē ma sáha ró cuéchi jeē cóto ndee jeneé rohó. Achí yá.

Jeē ní cajññ de Jesús

(Mt. 26.47-56; Mr. 14.43-50; Jn. 18.2-11)

⁴⁷Te sá cáhān gā yā súcuan, te ni quecoo cuehē ñayuu. Te téē nání Judas, iin jñāhan jeē uxí uū téē scuáha jíin yá, yósnúu de nuū ñáyuu un véji de. Te ni quee de nde nuū Jesús, te ni techūhú de ya, te súcuan ni nastúu de ya. ⁴⁸Te ni cahān Jesús jíin de:

Judas, ¿á jíin jéē téchūhu ró ruhū cúu jeē nastúu ró rúhū, Yaā ní nduu téē? Achí yá.

⁴⁹Te téē cáhiin jíin yá, ni cajito de jeē ní quejéé cúu, te ni cacajññhún de ya:

¿A ndonga ná jíināhan ná síquī de jíin espada? áchí de.

⁵⁰Te iin de ni stují de mozo sutū cujéhnu ga, chí ni jehnde de sōho lado váha. ⁵¹Te ni cahān Jesús:

Siáá, na jécuiññ, achí yá.

Te ni tee ya ndaha ya sōho mozo un, te ni nasávāha ya de. ⁵²Te ni cahān yā jíin sūtū cácujeñnu jíin téē cándiso jñññ ini templo jíin táca téē jéhnu jeē ní quecoo de jeē jññ de ya:

¿Te va téē cuíhná cúu ri jeē véjicoo ró jíin espada jíin yujnu jeē jññ ró rúhū jeē súcuan? ⁵³Tāca quíiví ni ine ri jíin ró jíināhan ró ini templo cáhnu, te tu ní cájññ ró rúhū. Te vijna te ni quee hora jeē jññ ró rúhū jíin jéē sáha ró táca jñññ jeē ndácu jeneé jéē ndee núu néē. Achí yá.

Jeē ní cachi Pedro jeē tu jíin de ya

(Mt. 26.57-58, 69-75; Mr. 14.53-54, 66-72; Jn. 18.12-18, 25-27)

⁵⁴Te ni cajññ de ya cuangoo de jíin yá vehe sutū cujéhnu ga. Te Pedro chí jíicá-ni ndíquín de ya. ⁵⁵Te táca policía ni cascáyú de ññhūn ini patio, te ni condúu de yuññhún un cáyucú de. Te suni ni cucōo Pedro jíin de. ⁵⁶Te iin ñāhan jéjñññ ini vehe un, ní jito ña nuū de jeē néne de yuññhún. Te ni jito vāha ña nuū de, te ni cahān ña:

Tēē yáha suni ni jica de jíin téē ún, áchí ña.

⁵⁷Te máá de tu ní cáchi de, chí ni cahān de:

Tu jíin rí téē ún, áchí de.

⁵⁸Te ni cunúu jecu gā, te ni jito tucu inga ñayuu nuū Pedro, te ni cahān:

Róhó, suni jñāhan táca téē un cúu ró, áchí.

Te ni cahān Pedro:

Nasūu cúu ri, hombre, achí de.

⁵⁹Te ni cuu nájññhun iin hora gā, te ni cahān ñññ inga de:

Jendaá ndije jeē tée yáha ní jica de jíin tée ún, chí suni tée región Galilea cúu de, áchí de.

⁶⁰Te ni cahān Pedro:

Hombre, tu jíiní rī na jñuhun cáhān rō.

Te sá súcuan cáhān gā de, te ni cana-ni líhli. ⁶¹Yūcuán na te ni ndió cóto máá Jítóho yō, te ni jito ya nuū Pedro. Te ni nucūhun ni de jñuhun ni cahān yā jíin de: Nde ná tu cana líhli, te yūhu ró te cahān rō unī jíinu jeē tu jíiní rō ruhū. ⁶²Te ni quenda de cuahān de, te yōhyo ni ndahyū de jeē ní cachi de jeē tu jíiní de ya.

Jeē ní casácata de nuū yā

(Mt. 26.67-68; Mr. 14.65)

⁶³Te tāca tée cándito Jesús, ni casácata de nuū yā, te ni cacani de ya. ⁶⁴Te ni cajesi de sahma nuū yā, te ni cacani de nuū yā, te ni cacahān de:

Cachi ndé ñin cúu jeē ní cani róhó, áchí de.

⁶⁵Te cuehē gā jñuhun súcuan ni cacahān neé de jíin yā.

Jeē ní indichi Jesús nuū junta tēe cácujuhnu ga

(Mt. 26.59-66; Mr. 14.55-64; Jn. 18.19-24)

⁶⁶Te jeē ní cundijin, te ni candutútú tāca tée jéhnú cándacu jniñu nuū ñayuu hebreo, jíin sūtū cácujuhnu, jíin tēe cástéén tutu ley Yaā Dios. Te cuangoo de jíin yá nuū junta tēe cácujuhnu ga, te yūcuan ní cajñuhún de ya:

⁶⁷Cachi, ¿á máá ró cúu Cristo jeē ní tají Yaā Dios? Achí de.

Te ni cahān yā jíin de:

Vésú na cáhān rī jeē suu ri cúu, te ni ma candíje cuítī rō. ⁶⁸Te suni

núu cajñuhun máá rí rohó jíjnáhan ró, te suni ma stió cuíñí rō nuū rī, ni ma siaá rō ruhū. ⁶⁹Te ruhū, Yaā ní nduu tēe, tāca quívi jeē quíji conene ri lado yáha máá Yaā iyó poder, achí yá.

⁷⁰Yūcuán na te ndihi de ni cajñuhún de ya:

¿A máá ró cúu Sēhe Yaā Dios núu súcuan?

Te ni cahān yā jíin de:

Suu ri cúu, nájnuhun cácahān rō, achí yá.

⁷¹Yūcuán na te ni cacahān de:

¿Na testigo gā jíiní ñuhún yó núu súcuan? Chí ni cajini sōho yó jíin yuhu máá de jeē cahān ndevāha de jeē cúu de Sēhe Yaā Dios. Achí de jíjnáhan de.

Jeē ní indichi Jesús nuū Pilato

(Mt. 27.1-2, 11-14; Mr. 15.1-5; Jn. 18.28-38)

23 Yūcuán na te ni candociññ ndihi de, te cuangoo de jíin yá nuū Pilato. ²Te yūcuan ní caquejéé de cácahān de cuēchi siquī yā:

Ni canihīn na tēe yáha jēe stóna de ñayuu siquī tohō. Te cáhān de jeē tú vāha jeē cuāha ná xúhun renta nuū rey nación Roma jeē ndácu jniñu nuū nación na. Te suni cáhān de jeē maá de cúu Cristo, Rey jeē ní tají Yaā Dios. Achí de jíjnáhan de.

³Yūcuán na te Pilato ni cajñuhún de ya:

¿A máá ró cúu Rey ñayuu hebreo?

Te ni cahān yā:

Suu ri cúu, nájnuhun cáhān rō, achí yá.

⁴Te ni cahān Pilato jíin sūtū cácujuhnu jíin ñayuu cuehē ún:

Tú ni ñin jñuhun stívi cáhán tēe yáha jéē nihín rí cuēchi siquī de, áchí de.

⁵Te máá de víhyá gā ni cacahān de:

Tēe yáha stónnda ndasí de ñayuu siquī tohō jíin jñuhun stéén de ní Judea. Chi ni quejéé de stéén de nde Galilea, te vijna te nde yáha, áchí de.

Jeē ní indichi Jesús nuū Herodes

⁶Te nuū ní jini sōho Pilato jeē Galilea cácahān, te ni cajñuhún de ñayuu núu tēe región Galilea cúu ya. ⁷Te nuū ní cacahān ñayuu jeē cúu ya tēe Galilea, te ni ndacu de jniñu jeē na quíngoo de jíin yá nuū Herodes, tēe cúu gobernador Galilea. Chi quivī ún suni íne Herodes ñuu Jerusalén. ⁸Te nuū ní jito de nuū Jesús, te yōhyo ni cusīi ni de, chi je ni cuu cuehē tiempo jeē cuní de coto de nuū yā. Chi ni nihín de jñuhun ya, te ññuhun ni de jeē sáha ya ñin jniñu jéhnu coto de. ⁹Te ni cajñuhún de ya cuehē jñuhun, te tu ní stífo cuíñf yā ni ñin jñuhun nuū de. ¹⁰Te suni cáhiin táca sūtū cácujuhnu jíin tēe cástéén tutu ley, te nihin ni cacahān de cuēchi siquī yā. ¹¹Yūcuán na te Herodes jíin táca soldado de ni cacahān neé de jíin yá, te ni casacatā de nuū yā, chi ni cachuhun de ya sahma váha luu jeē cúu sahma rey. Te Herodes ni ndacu de jniñu jeē na quíndeca de ya nuū Pilato. ¹²Te máá quivī un ní candumaní jñáhan Pilato jíin Herodes, chi ichi yátá ni caquití jñáhan ni de.

Jeē ní cundaā jeē cúu yā

(Mt. 27.15-26; Mr. 15.6-15; Jn. 18.39-19.16)

¹³Yūcuán na te ni cana Pilato táca sūtū cácujuhnu jíin táca tēe

cándiso jññu jíin táca gá ñayuu, ni candutútú. ¹⁴Te ni cahān de:

Ni caquindeca ró tēe yáha núu rí, jeē cácahān rō jeē stónnda de ñayuu siquī tohō. Te je ni stichí rí de, ni cajito jíin rō. Te tu ní nihín rí ni ñin cuēchi siquī de nájñuhun jeē cácahān rō. ¹⁵Te ni Herodes, tu ní nihín de, chi ni natají tucu de tēe yáha núu rí. Te tú cuití ni ñin cuēchi ní sáha de jeē cúu de. ¹⁶Núu súcuan te na cuáha ri castigo de, te siáá rí de quihín de, áchí Pilato.

¹⁷Te íyó costumbre jeē tēcá vico pascua siaá Pilato ñin preso jeē cuní ñayuu. ¹⁸Te ñayuu cuehē ún, ñnuú-ni ni cacana jee i:

Na cúu tēe jíñá, te siáá ní Barrabás, áchí i.

¹⁹Te Barrabás íne de vecāa siquī jeē ni stónnda de ñayuu siquī tohō ñni ñuu ún, te ni jehni de ndīyí.

²⁰Te Pilato cuní de siáá de Jesús, te ni cahān tucu de jíin ñayuu. ²¹Te máá i víhyá gā ni cacana jee i:

Cata caa ní de jicā cruz, na cúu de, áchí i.

²²Te ni cahān tucu de jíin i vuelta uní:

¿Na cuēchi ni sáha de núu súcuan? Tu ní nihín cuití rí ni ñin cuēchi siquī de jeē cúu de. Núu súcuan te na cuáha ri castigo de, te siáá rí de quihín de, áchí Pilato.

²³Te víhyá gā ni cacana jee ñayuu un, ní cacahān nihin i jeē na cúu yā jicā cruz. Te máá i jíin táca sūtū cácujuhnu, ni cacana jee ndasí i. Te ni cacundeyí i ni cascāhān i Pilato jeē na cúu yā. ²⁴Yūcuán na te ni ndacu Pilato jniñu jeē na cóo nájñuhun cáconi i. ²⁵Te ni siaá de tēe jeē ní cajicān i, tēe jeē íne vecāa

jeē ni stónḁa de ñayuu siquī tohō te ni jehni de ndīyī. Te ni jēhe de jñūhun jeē na cúu Jesús nájñūhun cácuṇi i.

Jeē ní cacata caa de ya jicā cruz

(Mt. 27.32-44; Mr. 15.21-32; Jn. 19.17-27)

²⁶Te cuangoo tācá soldado jíin yá jeē cahni de ya jicā cruz. Te ni canihīn de iin tēe ñuu Cirene, nání de Simón, vendiji de jeē ni jēhēn de rancho. Te ni catejñīnu de tēe un jēē cóndiso de cruz yā quihīn de yatā yā.

²⁷Te cuehē ndasí ñáyuu ndíquín i yatā yā cuangoo i. Te suni cuehē ñahan cuangoo ña, te cándahyū cohó ña jeē cácuquíhyá ni ña jehē yā. ²⁸Te ni ndiō cóto Jesús nuū ña, te ni cahān yā:

Róhó ñahan Jerusalén jijnáhan ró, ma ndahyú rō jehē rī, chí sa suhva ndahyū rō jehē maá ró jíin jēhē sēhe ró jíjnáhan i. ²⁹Chí quee quivī jeē coo jñūndóho xeēn siquī rō, te cahān rō: Yōhyo ndetū tācá ñahan nómá, jíin jēē tu ní scácu sēhe, jíin jēē tu ní cóndeca yiquín, chí tú sēhe ña jeē jnahuhū ni ña jeē ndóho i, achi rō jijnáhan ró. ³⁰Quivī ún te quejéé ñáyuu cahān i jíin táca yucu: Cotúu síquī rī jijnáhan ri návāha cuu rī. Te suni jíin táca loma: Casi síquī rī jijnáhan ri, achi i. ³¹Chí núu casáha xeēn i jíin rúhū jeē tú na cuēchi rī, te nagā ni cuu jeē ma cóo xeēn siquī ndīhi ñayuu chí íyó cuēchi i. Achí yá.

³²Te suni cuangoo de jíin úu tēe ni casáha cuēchi xeēn, jeē suni cuu de jíin yá. ³³Te ni jinūcoo de lugar nuū naní Yiqui Xíní, te yūcuan ní cacata caa de ya jicā cruz. Te suni

ni cacata caa de ndíndúú tēe ni casáha cuēchi xeēn un núu uū gā cruz, iin de lado váha ya, te inga de lado jecó yá. ³⁴Te níni jēē súcuan cúu, te ni cahān Jesús:

Tátā, cone cáhnu ni ní núu de jíjnáhan de, chí tu cájini de na vé casáha de, áchí yá.

Te soldado un ní casáha de sorteo jeē siquī ndese nihīn iin de sahma ya. ³⁵Te cáhiin ñayuu yūcuan, cájito i nuū yā. Te suni nde tēe cándiso jñīnu, cácahān catá de cájito de ya:

Núu inga ñayuu ni jnama de, te na jnáma de máá de vijna, te núu ndaā jeē Cristo jeē ní nacāji Yaā Dios cúu de, áchí.

³⁶Te tācá soldado suni ni casácatā de nuū yā, chí ni quecoo de nde nuū yā, te ni cajēhe de vinagre iyá cohó ya. ³⁷Te cácahān de jíin yá:

Núu máá ró cúu Rey ñayuu hebreo, te na jnáma ró máá ró, achí de.

³⁸Te suni ní iyo jñūhun jeē ndeé xinī cruz yā jeē cahán na siquī ní jíhī yā, te suhva yósó jíin yuhu griego jíin latín jíin hebreo: Yāha cúu Rey ñayuu hebreo, achí.

³⁹Te iin jeē ndíndúú tēe ní casáha cuēchi xeēn, jeē cándita caa, ní cahān neé de nuū yā:

Núu máá ró cúu Cristo, te na jnáma ró máá ró te suni jnama ró ndíndúú rí, achí de.

⁴⁰Te inga de ní cahān de nuū jnáhan de:

¿A tu yúhú ró Yaā Dios naún? Chí inuú cándoho yó jíin Yaā yáha. ⁴¹Te máá yó chí vetū-ni cándoho yó, chí yāha cánihīn yō castigo siquī jñīnu neé ní casáha yó. Te Yaā yáha chí tú ní iin cuēchi ní sáha ya, achí de.

⁴²Te ni cahān de jíin yá:

Jesús, nucūhun ni ni sāña jēē
quéjéē ní ndacu ní jniñu, áchí de.

⁴³Yūcuán na te ni cahān Jesús jíin
de:

Jendaá cahán rī jíin ró jeē vījna te
condee rō jíin rí nuū jardín andiví,
áchí yá.

Jeē ni jihī Jesús

(Mt. 27.45-56; Mr. 15.33-41; Jn. 19.28-30)

⁴⁴Te nuū ní cuu nájnūhun cahuxī
uū, te ni cunee ní cáhnu nde
cahuni. ⁴⁵Te ni cujnúú níandii. Te
sahma ndíta caa jeē ndihyú cuarto
iī ini templo cáhnu, ni ndatā-ni
sava sava. ⁴⁶Yūcuán na te ni cana
jee Jesús:

Tátā, naquihin ní ánuá na, áchí
yá.

Te súcuan ni cahān yā, te ni
jihī-ni ya.

⁴⁷Te tēe nación Roma jeē cúu
capitán ni jito de jeē súcuan ni cuu,
te ni cahān de jeē yóhoyo cújéhnu
Yaā Dios, te áchí de:

Jendaá ndije jeē tēe tú na cuēchi
cúu tēe yāha, áchí de.

⁴⁸Te ndivii ñayuu cáhiin yūcuan
ní cajito i tāca jēē ní cuu, te cácani
i yīquī jícā i jeē cájnahuhū ni i, te
ni nandió cóo i cuanungoo i. ⁴⁹Te
tāca ñayuu cájini jnāhan jíin yá,
jíin tāca ñahan Galilea jeē ní cajica
ña jíin yá, cáhiin jícā ña cájito ña
tāca jeē ní cuu.

Jeē ní quindūji Jesús

(Mt. 27.57-61; Mr. 15.42-47; Jn. 19.38-42)

⁵⁰Te ni iyo iin tēe vāha tēe ndaā,
nání de José. Te tēe ñuu Arimatea
ndañúú Judea cúu de. Te cúu de
jnāhan tāca tēe hebreo cácujuhnu

ga jeē casáha junta. ⁵¹Te ñúhun
ni de jeē quiji quivī jeē ndacu Yaā
Dios jniñu, te suni tu ní nújnahan
ni de jeē ní casándaā junta un jēē
cúu Jesús. ⁵²Te tēe un ní jehēn de
nuū Pilato, ni jicān de yiquī cúñu
Jesús. ⁵³Te ni snúu de ya jicā cruz,
te ni chusúcún de ya iin sahma
cuitá. Te ni chindūji de ya ini iin
yaū jeē ní caan jicā iin cava, nuū ná
tu quindūji ndīyi. ⁵⁴Te quivī un cúu
quivī casátūhva ñayuu, chí jehíni
un quéjéē quivī ndétátú.

⁵⁵Te ñahan ní quijicoo jíin yá nde
Galilea, ni jengoo ña jíin José, te ni
cajito vāha ña yaū ún, jíin ndese ni
cachindūji de ya. ⁵⁶Te cuanungoo
ña vehe ña, te ni casátūhva ña tācá
perfume jíin aceite yucū jeén asīn.
Te ni candetátú ña quivī ndétátú,
nájnūhun ndácu ley Yaā Dios jniñu.

Jeē ní natecu Jesús

(Mt. 28.1-10; Mr. 16.1-8; Jn. 20.1-10)

24 Te jenéhen ndasí quívī
domingo, te ni jinūcoo tucu
ñahan un núu ní yindūji Jesús, te
cándahá ña tācá perfume jíin aceite
ni casátūhva ña. Te suni cuanungoo
sava ga ñahan jíin ña. ²Te nuū ni
jínūcoo ña, te ni cajito ña jeē ní
cujiyu yuū ndihyú yuyáú ndīyi. ³Te
ni quivīcoo ña yaū ún, te tuá yiquī
cúñu Jitoho yō Jesús ní cájito ña. ⁴Te
ni cacunéé ni ña cájito ña jeē tuá
ndīyi. Sáá te ni cajito ña uū ndajéhé
Yaā Dios jeē cáa nájnūhun tēe, cáhiin
ya xiin ña, te cáñūhun ya sahma
ndíndéé. ⁵Te yóhoyo ni cayūhú ña, te
ni cajexin ña nuū ña nde nuū ñúhun.
Te ni cacahān ndajéhé un jíin ña:
¿Naun sa nuū cáyindūji ndīyi
cánanducú ró Yaā técu? ⁶Tuá

yā yāhá, chi je ni natecu yā. Te nucūhun ni rō ndese ni cahān yā jín ró ná íne ga yā región Galilea. ⁷Chi ni cachi ya jeē maá yá, Yā ní nduu tēe, cánuú natūu ya nuū tāca tēe cáhiyo cuēchi, jeē jni de ya cahni de ya jicā cruz, te nuū uní quivī te natecu yā. Achí ndajéhé un.

⁸Yūcuán na te ni canucūhun ni ña tāca jnúhun ni cahān Jesús. ⁹Te ni quendacoo ña nuū ní yindūji ya, te cuanungoo ña. Te ni canacani ña tāca jnúhun yáha núu ndihúxí ñin apóstol jín núu tāca gá de. ¹⁰Te ñahan ní canacani jnúhun yáha núu tēe cácuu apóstol, cúu ña María ñuu Magdala, jín Juana, jín María naná Jacobo, jín sava ga ña. ¹¹Te tācá apóstol chi cájeni ni de jeē jnúhun cánéé cáñúú cácahān ña, te tu ní cácañíje de.

¹²Te vēsú súcuán, te Pedro ni quenda de, te jínu de cuacondēhé de nuū ní yindūji ya. Te ni jito nihni de ini yaū, te ni jito de jeē sahna cuitá un cáyūcu máá na. Te cuanuhun de vehe de, te nahán náa ni de jeē ní jito de jeē tuá yā.

Jeē ní ndajnúhun yá jín úu de ichi cuahán Emaús

(Mr. 16.12-13)

¹³Te suu quivī un cuángoo uū jnáhan de ñin ñuu naní Emaús, jeē jicá nájnūhun uxí ñin kilómetro jín ñuu Jerusalén. ¹⁴Te cándajnúhún de siquī tācá jniñu jeē ní cuu ún. ¹⁵Te níni cándajnúhún de te cácajnūhun jnáhan de, te máá Jesús ni cuyajni ya yatā de, te jica ya cuahān yā jín de. ¹⁶Te ni sáha jín de jeē tu ní cánacuni de ya, vēsú cájito de nuū yā. ¹⁷Te ni cajnúhun yá de:

¿Na jnúhun cándajnúhun ró cájica ró? ¿Te najehē cácuquíhyá ni rō? Achí yá.

¹⁸Te ñin de jeē naní Cleofas ni cahān de jín yá:

Ndihí cuití ñayuu cájini i tācá jniñu ní cuu ini ñuu Jerusalén tāca quivī yáha. ¿Te á máñúhún-ni níhín cúu jeē ní quee ní ñuu un jéé tu jín ni na vé ni cuu? Achí de.

¹⁹Te ni cajnúhun yá de:

¿Te na vé ni cuu? Achí yá.

Te ni cacahān de jín yá:

Jeē ní ndoho Jesús ñuu Nazaret, Yā ní nacani jnúhun Yā Dios. Te jín poder Yā Dios ni sáha ya tācá jniñu jéhu te ni nacani ya jnúhun, jito jínúu Yā Dios jín tāca ñayuu. ²⁰Te sutū cácujuhnu jín tēe cándiso jniñu nuū ná, ni canastúu de ya nuū tāca tēe Roma, te tēe un ní casándaá de jeē cúu yā jicā cruz. ²¹Te máá ná ní cañuhun ni na jéé maá yá jnama ya nación na Israel nuū ñayuu Roma nuú. Te siquī tācá jniñu yáha, te ni cane ñnga jnúhun. Chi vijna je íyó úní quivī jeē ní cuu ún. ²²Te sava ñahan cájini jnáhan ná jín, ni canacani ña ñin jnúhun jeē yóhoyo cánaa ni na sáha, chi cácahān ña jeē ní natecu yā. Chi jenéhen ndasí ní jengoo ña yaū ndīyí ún. ²³Te tuá ni cájito ña yiquí cúnu yā. Te ni ndecoo ña nuū na jínjáhan ná, te cácahān ña jeē ní cajito ña jeē ní canecoo ndajéhé Yā Dios nuū ña, te ni cacahān jeē ní natecu Jesús. ²⁴Te ni jengoo sava jnáhan ná ndé yaū ndīyí ún, te ni cajito de jeē súcuán íyó, nájnūhun ni cacahān ñahan ún, te tu ní cájito cuití de nuū yā.

²⁵Yūcuán na te ni cahān maá yá jín de:

Tēe tu cájēcūhun cuiti ni cácuu ró. Yōhoyo uhū cácañdije ró táca jnúhun Cristo ni cacahān tēe ni canacani jnúhun Yaā Dios nde jenahán. ²⁶¿Te á tu súcuan ní jíni ñúhún ndoho Cristo táca jnúndóho yáha, te sáá te quinhun yā nuū lúu cujéhu ya? Achí yá.

²⁷Te ni nacani cáji yá táca jnúhun jeē yosó nuū tútu ii jeē cahán siquī maá yá. Te ni quejéé yá jíin jnúhun ni tee Moisés, te ni cahān gā yā táca jnúhun jeē ní catee tēe ni canacani jnúhun ya nde jenahán.

²⁸Te nuū ni jínūcoo de ñuu nuū cuángoo de ún, te Jesús ni sáha ya jeē cáca ga yā quihīn yā. ²⁹Te máá de ni castétu de ya, ni cacahān de jíin yá:

Ndōo ní vehe ná, chi je ni ini te je yajni cuaa, áchí de.

Yūcuán na te ni quīvi ya jeē quéndōo ya jíin de. ³⁰Te nuū ní cucōo ya mesa jeē cáji yā jíin de jíjnáhan de, te ni quihīn ya staā, te ni jicān tahú yā, te ni tahú cuéchí yá, te ni jēhe ya nuū de. ³¹Te jeē sáha ya súcuan, te nájnūhun ni cananune tinūú de, te ni canacuni de ya. Te ni ndoñúhún-ni ya nuū de cuahān yā. ³²Te ni cacahān maá de:

Jendaá jeē yóhoyo ni cacusiī ni yō ná ni nacani ya jnúhun nuū yō ichi ún te ni castūhun cáji yá jnúhun cáhán tutu ii. Achí de.

³³Yūcuán na te yachī ni canaquihīn de ichi, ni canandicó de cuanungoo de ñuu Jerusalén. Te ni canajnáhan de jíin ndihúxi iin ga apóstol, cáyūcu tútú de jíin sava ga jnáhan de. ³⁴Te ni cacahān tēe cáyūcu tútú un:

Jendaá ndije jeē ní natecu maá Jítóho yō, te ni nane ndijin yā nuū Simón, achí de jíjnáhan de.

³⁵Yūcuán na te ndindúú tēe un ní canacani de jnúhun ndese ni najnáhan ya jíin de ichi, jíin ndese ni canacuni de ya ná ni tahú cuéchí yá staā.

Jeē ní nane ya nuū tēe cáscuáha jíin yá

(Mt. 28.16-20; Mr. 16.14-18; Jn. 20.19-23)

³⁶Te sá cácahān gā de táca jnúhun yáha, te ni jecuiñī-ni Jesús mēhñú de jíjnáhan de. Te ni cahān yā jíin de:

Ndeyí sñi coo ni rō jijnáhan ró, áchí yá.

³⁷Te ni candacoto iyo de, ni cayūhú ndasí de, chi ni cajeni ni de jeē iin ánuá cúu ya. ³⁸Te ni cahān yā jíin de:

¿Naun cáyūhu ró, te naun cájeni siquí ni rō súcuan? ³⁹Condēhē ndaha ri jíin jēhē rī, te cuni rō jeē maá rí cúu. Jñi ruhū te cuni rō, chi iin ánuá tu névaha cūñu ni yiqui nájnūhun cájito ró jēē névaha máá rí, achí yá.

⁴⁰Te jeē ni cáhān yā súcuan, te ni steén yā ndaha ya jehē yā nuū ni yíhi ndūyu cāa. ⁴¹Te yōhoyo ni cacusiī ni de, te cánaa ni de. Te vēsú súcuan te ná tu candíje vāha vāha de jeē maá yá cúu. Te ni cahān yā jíin de:

¿A cánevāha ró jecu jeē cáji rī yāhá? áchí yá.

⁴²Yūcuán na te ni cajēhe de iin pedazo chācá ní tau nuū yā, jíin iin pedazo ñahmā ndūxi yocō. ⁴³Te ni quihīn ya, te ni yeji yā nuū de

jíjnáhan de. ⁴⁴Te ni cahān yā jíin de:

Tāca jēē ní cuu jíin rí cúu jeē ni cáhān rī ná ni ine ri jíin ró jíjnáhan ró ndé saá, jeē cánuú squícu tāca jnūhun ri jeē yosó núū tútu ley Moisés, jíin núū tācá tutu tēe ni canacani jnūhun Yaā Dios, jíin núū tútu salmo, achí yá.

⁴⁵Te ni nune ya jeē níjnūn í de, návāha cuu jecūhun ni de tāca jēē cahán tutu íi. ⁴⁶Te ni cahān yā:

Súcuan cáhān nuū tútu jeē ruhū Cristo, cánuú cuu rī, te nuū uní quívī natecu rī. ⁴⁷Te cuitē núu jnūhun ri jeē cánuú nacani ni ñayuu jeē stóo i cuēchi i, te cone cáhnu ni Yaā Dios nuū i. Te ñuu Jerusalén quejéé cuitē núu jnūhun yáha, te quihīn nuū ñayuu tācá nación. ⁴⁸Te máá ró cácuu tēe nacani jnūhun tācá jniñu ní cajito ró. ⁴⁹Te tají rí Espíritu

Santo quiji ya nuū rō jíjnáhan ró, nájnūhun ni jejnūhun Tátá rī. Te na quéndōo ró ñuu Jerusalén condetu ró ndé nihīn rō poder Espíritu Santo jeē quíji nde andíví. Achí yá.

Jeē ní ndaa ya cuanuhun yā andíví

(Mr. 16.19-20)

⁵⁰Yūcuán na te ni quenda ya ñuu Jerusalén, cuahān yā nde ñuu Betania jíin de jíjnáhan de. Te ni ndonehen ya ndíndúú ndaha ya, te ni jicān tahu yā jehē de. ⁵¹Te níní jícán tahu yā jehē de, te ni cujiyo-ni ya nuū de, ni ndaa ya cuanuhun yā andíví. ⁵²Te máá de ni cachiñúhún de ya. Te saá te cuanungoo de ñuu Jerusalén, te yōhyo cácusīi ni de. ⁵³Te níní cáhiin de ini templo cáhnu, cánacuatáhú de nuū Yaā Dios. Te ni cuu. Amén.

JNUHUN VAHA NI TEE SAN JUAN

Yaā naní Jnúhun Yaā Dios ni nduu ya tēe

1 Nde xíhna ñúhún ná ni jecōo ndíhi jeē iyó, te je íyó Yaā naní Jnúhun Yaā Dios, chi stéén yā ndíhi jnúhun ndese Yaā cúu Yaā Dios. Te Yaā naní Jnúhun un ndéé yá jíín Yaā Dios, te Yaā Dios cúu ya. ²Máá yá ndéé yá nde jeē xíhna ñúhún jíín Yaā Dios. ³Te ni sáha Yaā Dios jeē jíín máá yá ni jecōo ndíhi tāca jéé iyó. Te ma jécōo ni ñin jeē iyó núu tu ní sáha máá yá. ⁴Máá yá sáha jeē técu ndíhi-ni, te máá yá cúu luz jeē steén ini anuá ñayuu, cúu jeē sáha ya jeē jécúhunu ni i síquī Yaā Dios. ⁵Te Yaā cúu luz ún ndíndēe núu ñayuu tu cájica ndaā, jeē nájnúhun cáhīyo i nuū néē. Te ñayuu cáhīyo nuū néē tu cúu ndahva i luz yā.

⁶Te ni iyo ñin tēe jeē ní tají Yaā Dios, naní de Juan. ⁷Tēe un ní quiji de jeē nácani cájī de jnúhun máá Yaā cúu luz, návāha candíje tāca ñayuu jeē jíín jnúhun cáhán de. ⁸Nasūu máá Juan cúu luz ún, chi cúu de ñin jeē ní nacani cájī jnúhun máá luz un. ⁹Te máá Yaā cúu luz ndíje jeē steén ini anuá tāca ñayuu, nde saá ní quiji ya ini ñayiví.

¹⁰Te Yaā cúu Jnúhun Yaā Dios ni condee yā ini ñayiví, te vésú jeē jíín

máá yá ni sáha Yaā Dios ñayiví, te ñayuu ñayiví tu ní cácu ni i cuatáhú i jeē maá yá cúu. ¹¹Ni quiji ya nuū ñayuu maá yá nación hebreo, te ñayuu ún tu ní cájetáhú i ya. ¹²Te vésú súcuani te sava ñayuu chi ni cájetáhú i ya, te ni cacandíje i jeē sáha ya jehē i. Te nuū maá i ni jēhe ya jnúhun jeē ndúu i sēhe Yaā Dios. ¹³Te jeē ndúu i sēhe Yaā Dios, nasūu jíín modo jeē cácacu ñayuu ini ñayiví, ni nasūu síquī jeē cácu ni tēe, chi máá Yaā Dios sáha ya jeē ndúu i sēhe ya.

¹⁴Te máá Yaā cúu Jnúhun Yaā Dios ni nduu ya tēe, te ni condee yā jíín yó. Te ni cajito yó jéé yóhoyo luu cújéhnu ya, chi máñúhún-ni ya cúu Sēhe Tátá yā, Yaā cújéhnu súcuani. Te máni máá jéé sáha ya jeē váha yóhó, te máni máá jnúhun ndaā cahán yā. ¹⁵Te Juan ni nacani de jnúhun ya, te ni cahán de:

Yaā váha cúu jeē ni cáhán rí náa áchí rí jeē Yaā quiji chi cújéhnu ga yā vésú ruhū, chi je íyó yá nde ná tu cacu ri, achí de.

¹⁶Te ndíhi yó ní canihín yō cuehē ndasí jeē váha íyó núu yā, chi máni jeē váha sáha sáha ya jíín yó.

¹⁷Moisés ni steén de ley Yaā Dios nuū ñayuu jenahán, te Jesucristo

chi sáha ya jeē váha yóhó te stéén yā tāca jnúhun ndaā Yaā Dios nuū yō. ¹⁸Tú ni iin ñayuu ni jító cuíti nuū Yaā Dios. Te máñúhún-ni Sēhe ya jeē ndeé yá jíin Tátá yā, suu ya ni steén nuū yō ndese Yaā cúu Yaā Dios.

Jnúhun Jesús jeē ni cáhān Juan tēe scuándute

(Mt. 3.11-12; Mr. 1.7-8; Lc. 3.15-17)

¹⁹Te ñayuu hebreo ñuu Jerusalén, ni catajǎ i jecu sutú jíin tēe grupo levita jeē cájejnǎnu ini templo, ni jengoo de nuū Juan, návāha cajnúhún de ndé iin cúu Juan te na jniñu ndíso de. ²⁰Te Juan cájǎ ní cachi de:

Nasūu rúhū cúu Cristo, achí de.

²¹Te ni cacajnúhún tucu de:

Núu súcuan ¿te ndé iin cúu ró? ¿A cúu ró Elías, tēe ni nacani jnúhun Yaā Dios nde jenahán, chí naún?

Te ni cahān Juan:

Nasūú de cúu ri.

Te ni cacajnúhún tucu de:

Núu súcuan ¿te á cúu ró tēe nacani jnúhun Yaā Dios jeē achí tutu ii jeē quǎji?

Tuú, áchí tucu Juan.

²²Te ni cacahān tucu jíin de:

¿Te ndé iin cúu ró núu súcuan? Cachi nuū ri jijnáhan ri, chi jíni ñúhún castúhun rí nuū tāca tēe ni catajǎ rúhū vējicoo ri. Cachi na jniñu ndíso ró ví.

²³Te ni cahān Juan:

Máá rí cúu tēe jeē ni cáhān Isaías, tēe ni nacani jnúhun Yaā Dios nde jenahán, jeē quǎji ri cana jee rí nde nuū ñúhun téhé. Te cáhān ri jíin ñáyuu jeē na sátúhva i máá i, chi quǎji máá Jítóho yō. Achí Juan.

²⁴Te tēe grupo fariseo cácuu jeē ní catajǎ tēe ni quǎjicoo ún. ²⁵Te ni cacajnúhún de Juan:

Núu súcuan ¿te naun scuándute ró te núu nasūu Cristo ni Elías ni máá tēe quǎji nacani jnúhun Yaā Dios cúu ró?

²⁶Te ni cahān Juan:

Ruhū chi jíin ndute scuándute ri. Te mēhñu ró jijnáhan ró íne iin Yaā jeē tu cájini rō. ²⁷Te Yaā un cúu jeē ni cáhān rí jeē quǎji ya te cújéhnu ga yā vēsú ruhū. Chi tú na vé jéhnu cuíti cúu ri nuū yā, ni jeē cuajniñu ri nuū yā vēsú iin jniñu lúli gá nájnúhun jeē ndajǎ rí correa ndijēn yā. Achí de.

²⁸Súcuan ni cuu jeē ní candajnúhún de jíin Juan nde Betábara jeē íne ichi núu cáne niándii yúte Jordán, nuū scuándute Juan.

Siquǎ jeē cúu ya Londe Yaā Dios

²⁹Te inga quǎvǎ un ní jito Juan nuū Jesús jeē véji ya nuū de. Te ni cahān de jíin ñáyuu:

Condēhe jijnáhan ró, chi yāha véji Yaā cúu Londe jeē ní tajǎ Yaā Dios, te cuu yā jeē sándoo ya cuēchi ñayuu ñayǎví. ³⁰Yaā yāha cúu jeē ni cáhān rí jeē quǎji iin Yaā cújéhnu ndasí, chi je íyó yá nde ná tu cacu ri. ³¹Te nde saá te tu ní jíin rí jeē yāha cúu Yaā ní tajǎ Yaā Dios. Te ni quǎji ri jeē scuándute ri ñayuu ñuu yō Israel jíin ndute, návāha stéén rí nuū i jeē suu ya cúu, áchí Juan.

³²Te suni ni cahān gā de jnúhun ya:

Ni jito ri Espírиту Santo, ni cuun ya ichi ándiví, cáa ya nájnúhun paloma, te ni quee ya xiní Jesús.

³³Te nde saá te ná tu cuni rī jeē Jesús cúu. Te máá Yaā Dios jeē ní tají yá ruhū jeē scuándute ri jíin ndute, ni cahān yā jíin rí: Núu ni jito ró jēē cúun Espíritu Santo te quendōo xinī iin tēe, yūcuan cúu Yaā jeē cuáha Espíritu Santo condee ini anuá ñayuu, achí Yaā Dios. ³⁴Te je ni jito ri ún, te nácani cájī rí jnūhun jeē máá yá cúu Sēhe Yaā Dios. Achí Juan.

Uū tēe jeē ní cana ya xihna gā

³⁵Te inga quivī ún te Juan íne tucu de yūcuan jíin úu tēe cájica jíin de. ³⁶Te ni jito de nuū Jesús jeē jíica ya yūcuán. Te ni cahān de:

Condēhe jíjnáhan ró, chí yūcuan cúu Yaā cúu Londe jeē ní tají Yaā Dios.

³⁷Te ndíndúú tēe cájica jíin Juan ni cajini sōho de jnūhun yáha, te ni candiquín de Jesús. ³⁸Te ni ndió cóto Jesús, te ni jito ya jeē cándiquín de yatā yā. Te ni cahān yā jíin de:

¿Na vé cánanducú ró?

Te ni cacahān de jíin yá:

Maestro, ¿ndé nuū ndeé ní?

³⁹Te ni cahān yā jíin de:

Quíngoo yó te cuni rō.

Te ni jengoo de, te ni cajito de nuū ndeé yá. Te ni caquendōo de jíin yá quivī ún, chí nájñūhun cacuūn jehíni cúu.

⁴⁰Te Andrés, ñani Simón Pedro, cúu iin jeē ndíndúú tēe un jēē ní cajini sōho jnūhun ni cahān Juan, te ni candiquín Jesús. ⁴¹Te Andrés, yachī ni jenanducú de ñani de Simón, te ni cahān de jíin:

Ni caquijnáhan ri jíin Mesías, achí de. Te jnūhun un cúní cahān Cristo, Yaā ní tají Yaā Dios.

⁴²Yūcuán na te cuanuhun de nuū Jesús jíin Simón. Te nuū ní jito Jesús nuū Simón, te ni cahān yā:

Máá ró cúu Simón sēhe Jonás. Te nde vijna te conaní ró Cefas, achí yá. Te jnūhun un cúní cahān Pedro, jeē cuní cahān yuū.

Jeē ní cana ya Felipe jíin Natanael

⁴³Te inga quivī un cúní Jesús quihīn yā región Galilea. Te ni nihīn jnáhan ya jíin Felipe, te ni cahān yā jíin de:

Condiquín ruhū na quihín yō.

⁴⁴Te Felipe cúu tēe ñuu Betsaida, jeē cúu ñuu Andrés jíin Pedro. ⁴⁵Te ni jenanducú de Natanael, te ni cahān de jíin:

Ni canihīn jnáhan ri jíin Yaā jeē yosó jnūhun ya nuū tútu ley jeē ní tee Moisés, jíin núu tútu ni catee tēe ni canacani jnūhun Yaā Dios nde jenahán. Te Jesús sēhe José ñuu Nazaret cúu ya. Achí de.

⁴⁶Te ni cahān Natanael jíin de:

¿Te ndese cúu kujéhnu iin tēe jeē ní cacu ñuu ndahú Nazaret?

Te ni cahān Felipe:

Quihín yō de cuni rō, achí de.

⁴⁷Te ni jito Jesús jeē véjī Natanael, te ni cahān yā:

Yáha véjī iin tēe ndaā jeē cúu ndije yucūn Israel, chí tu stáhú cuíti de, achí yá.

⁴⁸Te ni cahān Natanael jíin yá:

¿Ndese jíiní ni sáña?

Te ni cahān Jesús:

Je ni jito ri rohó ndé ná tu cana Felipe xinī rō, ná íne ró jéhē nundéhe higo, achí yá.

⁴⁹Yūcuán na te ni cahān Natanael jíin yá:

Maestro, máá ní cúu Sēhe Yaā Dios, máá ní cúu Rey ñuu yō Israel, achí de.

⁵⁰Te ni cahān Jesús:

¿A máá jéē ni cáhān rī jeē ní jito rī rohó ná íne ró jéhē nundéhe higo, te jeē yúcuan cándíje ró rúhū naún? Tuú chí coo jniñu jéhnū ga coto ró vesú jeē yáha, áchí yá jíin de.

⁵¹Te ni cahān gā yā:

Jendaá cahán rī jíin ró jijnáhan ró jéē nde vijna te coto ró jéē núne andíví, te táca ndajéhé Yaā Dios cándaa cánuu nuū ruhū, Yaā ní nduu tēe, áchí yá.

**Jeē ni jéhēn yā iin vico
nándāha ñuu Caná**

2 Te ni yāha unī quivī, te ni iyo iin vico nándāha ñuu Caná ndañú Galilea. Te yúcuan íne náná Jesús. ²Te suni ni cacana i Jesús jíin tēe cáscuáha jíin yá, ni jehēn yā vico un jíin de. ³Te ni ndoco vino. Te náná Jesús ni cahān ña jíin yá:

Ni ndoco vino i, áchí ña.

⁴Te ni cahān Jesús jíin ña:

¿Naun cáhān ni súcuan jíin ná náná? Chí ná tu quee quivī jeē sáha ná jniñu jéhnū, áchí yá.

⁵Te náná yā chí ni cahān ña jíin ñáyuu cájeni cohō:

Sáha ró jijnáhan ró táca jéē cahān yā jíin ró. Achí ña.

⁶Te yúcuan íyó íñū tenéjā yuū jeē ñúhun ndute cájichi ñáyuu hebreo jeē ndúndoo i nuū Yaā Dios. Te iin iin tenéjā un cánda cuhun cuñ xico chí ciento litro ndute. ⁷Te ni cahān Jesús jíin ñáyuu cájeni cohō:

Scútú ndíí rō táca tenéjā yáha.

Te ni cascútú ndíí i. ⁸Te ni cahān yā jíin i:

Vijna te quēen ró jecu te quindecia ró coto ndee tēe ndíto vico, áchí yá.

Te ni cajendeca i nuū de. ⁹Te ni séyūhú de ndute jeē ní nduu vino, te tu jíin de ndé ní canihīn i. Chí máni mozo un cúu jeē cájini, chí máá i ni caquēen ndute ún. Yúcuán na te tēe ndíto vico ni cana de tēe nándāha. ¹⁰Te ni cahān de jíin:

Tāca ñáyuu chí xihna gā vino váha cájēhe i, te núu je ni cajihī vāha ñáyuu cáhiin vico, yúcuán na te jéhe de vino ndahú na. Te máá ró tucu ni sáha ró, chí nde jeē sándíhí te jéhe ró vino jeē yóhoyo vāha ga jíhī, áchí de.

¹¹Jniñu yáha jéē ni sáha Jesús ini ñuu Caná ndañú Galilea cúu jniñu jéhnū xihna ñúhún jéē ni sáha ya jeē steén yā poder yā. Te súcuan ni steén yā jeē yóhoyo cújéhnū ya. Te tēe cáscuáha jíin yá ni cacandíje de ya.

¹²Te ná ni yāha jniñu yáha, te cuahān yā ñuu Capernaum jíin náná yā jíin táca ñani yā jíin tēe cáscuáha jíin yá. Te ni coyūcu yá yúcuán jecu quivī.

Jeē ní quenehen ya ñáyuu ini templo

(Mt. 21.12-13; Mr. 11.15-18; Lc. 19.45-46)

¹³Te jeē cuácuyajni vico pascua casáha jnāhan ñuu yā hebreo, te cuahān yā ñuu Jerusalén. ¹⁴Te ini templo cáhnu ni jito ya ñáyuu cáxicó stiquī jíin lanchi jíin paloma, jíin ñáyuu castáyí xūhun, cáyúcú i nuū mesa i. ¹⁵Te jeē súcuan ni jito ya, te ni sáha ya iin cuarta ñi. Te ni scúnu ya táca i ini templo, nde jíin lanchi jíin stiquī i. Te ni jete yā xūhun ñáyuu castáyí. Te ni scotúú yá táca mesa i. ¹⁶Te ni cahān yā jíin ñáyuu cáxicó paloma:

Tava t̄acá quiti yáha. Te ma sáha ró yáhu ini vehe Tátá rī. Achí yá.

¹⁷Yūcuán na te t̄e cáscuáha jíin yá, ni canucūhun ni de jnūhun yósó núū tútu ii: Je yajni cuu na j̄e yóhyo nd̄hvi ní na síquī vehe ní, achí yá jíin Tátá yā, achí tutu.

¹⁸Te t̄e ñuu yā hebreo ni cacajnūhún de ya:

¿Na jniñu j̄hnu sáha ró j̄e steén rō poder rō, te cucáhu ni rī jeē nd̄iso jniñu ró sáha ró súcuán? achí de jíin yá.

¹⁹Te ni cahān yata Jesús:

Canu rō templo yáha, te nuū uní quivī te nucondichi sáha ri, achí yá.

²⁰Yūcuán na te ni cacahān t̄e hebreo un:

Uū xico iñū cuiyā te ni jīnu ni cuvāha templo yáha. Te rōhó, ¿á núū uní-ni quivī te nucondichi sáha ró naún? Achí de.

²¹Te templo jeē cahān Jesús cúu máá yiqui cúñu yā, chi cahni ñayuu yā te natecu yā nuū uní quivī. ²²Jeē yúcuán cúu jeē ná ni natecu yā jeē ni jíhi yā, te t̄e cáscuáha jíin yá ni canucūhun ni de jeē ni cáhān yā jnūhun yáha. Te ni cacand̄ije de jnūhun jeē yosó núū tútu ii, jíin jnúhun yáha j̄e ni cáhān Jesús.

Jeē jíiní Jesús ndese cáa ini anuá ñayuu

²³Te ná íne Jesús ñuu Jerusalén máá vico pascua, te cuehē ñayuu ni cacand̄ije i jeē cúu ya Cristo, chi ni cajito i t̄acá jniñu j̄hnu sáha ya jeē steén yā poder yā. ²⁴Te máá Jesús chi tu ní jétahú yá i, chi je jíiní yā ndese cáa ini anuá i jíináhan i. ²⁵Te tu jíiní nūhún yá jeē cáchi ni iin ñayuu nuū yā ndese íyo táca ñayuu,

chi máá yá je jíiní yā ndese cáa ini anuá i.

Jeē ní candajnūhún Jesús jíin Nicodemo

3 Te ni íyo iin t̄e grupo fariseo, naní de Nicodemo, te cúj̄hnu de nuū ñáyuu ñuu de hebreo. ²T̄e yáha ní quiji de nuū Jesús iin jecuáa, te ni cahān de jíin yá:

Maestro, je cájini na j̄e maá Yaā Dios ni tají yá nihín j̄e steén ni jnūhun ya nuū na jíináhan ná. Chi núu tu íyo Yaā Dios jíin ní, te ma cúu sáha ní ni iin jniñu j̄hnu nájñūhun sáha máá ní jeē steén ni poder ní, achí de.

³Te ni cahān Jesús:

Jendaá cahān rī jíin ró jeē núu tu nacacu jeē iin ñayuu, te ma cúu quivī i ndaha Yaā Dios jeē ndacu ya jniñu nuū i, achí yá jíin de.

⁴Te ni cahān Nicodemo jíin yá:

¿Te ndese cuu nacacu iin t̄e te núu je ni j̄hnu de? ¿A cuu nucūhun tucu de chiji náná de te nacacu tucu de? achí de.

⁵Te ni cahān Jesús:

Jendaá cahān rī jíin ró jeē núu tú nacacu iin ñayuu, te ma cúu quivī i ndaha Yaā Dios jeē ndacu ya jniñu nuū i. Te jeē nácacu i cúu jeē ndúndoo cuēchi i nájñūhun jíin ndute, te condee Espírиту Santo ini anuá i. ⁶Jeē cácu sáha ñayuu, chi s̄he ñayuu cúu. Te jeē cácu sáha Espírиту yā, chi s̄he ya cúu. ⁷Ma náa ni rō cani ni rō ndese cúu jnūhun ni cahān rī jíin ró jeē cánuú j̄e nacacu jeē ró jíináhan ró. ⁸Te tachī chi quée cuahān ndé-ni cúu nuū cuní máá, te jíiní sōho ró j̄e cáyu, te tu jíiní rō ndé nuū véji ni

ndé nuū quihín. Te suni súcuan cúu tãca ñáyuu jeē nácacu sáha Espiritu, chi tu jíni rō ndese sáha ya jniñu ún, áhí yá.

⁹Te ni cahān tucu Nicodemo:

¿Ndese ga cúu núu súcuan?

¹⁰Te ni cahān Jesús:

Máa ró cúu ñin maestro jeē cujúhnu nuū ñáyuu ñuu yō Israel, te zá tu jécūhun ni rō jñūhun yáha naún? ¹¹Jendaá cahān rī jíni ró jeē jñūhun cájecūhun ni rī cúu jeē cácahān rī jíni ró. Te cánacani cáji rí jñūhun jniñu ní cajito ri. Te tu cácañdije ró jñūhun cácahān rī. ¹²Chi ni cahān rī jñūhun ndese sáha Yaā Dios ini ñayiví, te tu cácañdije ró. Núu súcuan ¿te ndese candije ró núu cahān rī jñūhun tãcá ndese sáha ya nde andiví?

¹³Chi ni ñin tu ní cáa andiví jeē cúni ndese íyó yúcuan, chi mañúhún-ni ruhū, Yaā ní nduu tēe. Chi andiví ndéé rí, te ni cuun ri vēji ri. ¹⁴Te nájnūhun ni cata caa Moisés ñin coō cāa nuū ñin yujnu, ná ni cajica ñayuu nuū ñūhun téhé, suni súcuan máa rí, Yaā ní nduu tēe, cánuú jéé cóndita caa ri jicā cruz. ¹⁵Te súcuan cánuú návāha tãca ñáyuu jeē candije i jeē jnáma ri i, ma jnahnú ndetū i, chi sa suhva cotecu i ní cáni andiví.

Yōhyo ni cundáhú ni yā ñayuu ñayiví

¹⁶Chi Yaā Dios yōhyo ni cundáhú ni yā ñayuu ñayiví. Jeē yúcuan ní tají yá Sēhe ya ni quiji, vēsú mañúhún-ni ya iyó, návāha tãca ñáyuu jeē candije i jeē jnáma ya i, ma jnahnú ndetū, chi sa suhva cotecu i ní cáni andiví. ¹⁷Chi tu ní tají Yaā Dios Sēhe ya ini ñayiví

jeē snahnú ndetū yā ñayuu, chi sa suhva jeē jnáma ya ñayuu.

¹⁸Ñayuu jeē candije i jeē jnáma ya i, ma jnahnú ndetū i. Te ñayuu tu cándije, je ni jnahnú ndetū i, chi tu ní cándije i máa Sēhe Yaā Dios, te máa ñin-ni ya iyó. ¹⁹Máa Yaā jeē stíndéé ini anuá ñayuu, je ni quee ya ini ñayiví. Te cánujnahān gā ni ñayuu caca i nájnūhun nuū néé vēsú nuū luz yā, chi jniñu cásáha i cúu jniñu néé. Jeē yúcuan cúu jeē jnahnú ndetū ñayuu tu cácañdije ún. ²⁰Chi tãca ñáyuu casáha jniñu néé, tu újnahan cuiti ni i luz yā. Te tu jéhe i jñūhun jeē stíndéé yá ini anuá i, chi tu cúni i jeē natūu jniñu néé cásáha i. ²¹Te ñayuu jeē cájica jíni jniñu ndaā, jéhe i jñūhun jeē stíndéé yá ini anuá i, návāha natūu ndijin jeē tãcá jniñu cásáha i cúu jniñu cúni Yaā Dios. Achí yá jíni de.

Jeē ni cáhān tucu Juan jñūhun Jesús

²²Yūcuán na te Jesús jíni tēe cáscuáha jíni yá, cuahān yā región Judea. Te ni condee yā yūcuán jecu tiempo jíni de, te cáscuándute de ñayuu. ²³Te suni scuándute Juan, íne de lugar jeē naní Enón yajni ñuu Salim, chi yūcuán íyó cuéhē ndute. Te ni quijicoo ñayuu nuū de, te ni scuándute de i. ²⁴Súcuan ni sáha Juan nde ná tu quiví de vecāa.

²⁵Yūcuán na te sava tēe cáscuáha jíni Juan yōhyo ni cacahān de jíni sava jnáhan de hebreo siquí núu ndé ñin cúu modo vāha ga jeē cúchi ñayuu ndundoo i nuū Yaā Dios.

²⁶Te ni quecoo de nuū Juan, te ni cacahān de:

Maestro, tēe ní ine jíni ní yūte Jordán ichi núu cáne niāndii, jeē ní

nacani ní jnúhun de nuū ná, vijna te scuándute máá de, te ndívii ñayuu cuangoo i nuū de.

²⁷Te ni cahān Juan:

Ni ñin tēe ma cúu sáha de jniñu Yaā Dios te núu ma tejníñu ya de.

²⁸Máá ró jijnáhan ró chi ni cajini sōho ró jēe ni cáhān cají rí jēe násūu máá rí cúu Cristo, chi cúu ri ñin jēe ní tají Yaā Dios jēe cósnūú nacani jnúhun jēe quíji ya. ²⁹Te núu cásáha vico quíjnáhan, te máá yii cúu jēe ndéca ñasihí. Te amigo yii un íne jíin de, te jíni sōho jnúhun cáhān de. Te yōhyo cúsiñi ni jíni sōho jnúhun cáhān yii ún. Te suni súcuan ruhū, chi cúu ri nájñuhun amigo yii, chi ni quee maá Cristo, te yōhyo cúsiñi ni rí jíni sōho ri jnúhun cáhān yā. ³⁰Te jíni ñúhún jēe ndujéhu ga maá yá te ndululí gá máá rí, achí Juan.

Jeē ní quíji ya nde nuū sucún

³¹Te Yaā jēe véji nde andíví, cújéhu ya nuū ndíhi. Chi tāca jēe ní cacu ini ñayívi yáha, sēhe ñayívi cúu, te máni jnúhun ñayívi cáhān. Te Yaā jēe véji ichi ándíví, chi cújéhu ya nuū ndíhi ñayuu. ³²Te nácani ya jnúhun jēe ní jito ya jíin jēe ní jini sōho ya. Te ñayuu chi tu cándíje i jnúhun cáhān yā. ³³Te núu ñin ñayuu candíje i jnúhun cáhān yā, suu cúu jēe jejnúhún i jēe Yaā ndaā cúu Yaā Dios. ³⁴Chi Yaā ní tají Yaā Dios véji, máni máá jnúhun Yaā Dios cahán yā. Chi Yaā Dios tu yícuāha jéhe ya Espíritu ya nuū Yaā ní tají yá. ³⁵Máá yá jēe cúu ya Tatá, yōhyo maní yā jíin Séhe ya, te ndívii ni jēhe ya ndaha Séhe ya jēe ndacu ya jniñu nuū. ³⁶Ñayuu jēe

candíje máá Séhe ya jēe jnáma ya i, cotecu i níí cáni andíví. Te ñayuu tu cúní candíje Séhe ya, ma cótecu i níí cáni andíví, chi sa suhva cuāha Yaā Dios castigo jēe ndoho i níí cáni.

Jeē ni cáhān Jesús jíin ñahan ñúu Samaria

4 Te tēe grupo fariseo, ni canihín de jnúhun jēe iyó cuéhē gā tēe cáscuáha jíin Jesús vésú jíin Juan, jíin jēe cuehē gā ñayuu scuándute ya vésú Juan. ²Te násūu jēe scuándute máá yá, chi tēe cáscuáha jíin yá cúu jēe cascuándute. ³Te ná ni jini Jesús jēe súcuan ni canihín de jnúhun, te ni quenda ya región Judea, te cuanuhun yā región Galilea. ⁴Te ichi jēe nuhún yā chi yáha región Samaria. ⁵Te ni jinū yā ñin ñuu región Samaria jēe naní Sicar, yajni ñuhun jēe ni jéhe Jacob nuū séhe de José nde jenahán. ⁶Te yūcuan íne pozo jēe naní pozo Jacob. Te ni cucōo Jesús xiin pozo un, chi ni cuíta yá jēe cuahán yā ichi. Te nájñuhun cahuxí uū cúu. ⁷Te ni quee ñin ñahan Samaria, véji ña vequihin ña ndute. Te ni cahān Jesús jíin ña: Cuāha ní ndute coho ná, áchí yá. ⁸Te tēe cáscuáha jíin yá, chi je cuangoo de nde ñuu, cuacuaan de jēe cáji de jíin yá. ⁹Te ñahan Samaria un ní cahān ña jíin yá: ¿Ndese cúu jēe jicán ní ndute nuū ná coho ní? Chi tēe hebreo cúu ní, te ñahan Samaria cúu ná, áchí ña. Súcuan ni cahān ña, chi ñayuu hebreo tu cácahān i jíin ñayuu Samaria. ¹⁰Te ni cahān Jesús: Núu jēe jíni ni ndese cúní Yaā Dios sáha ya jēe váha níhín, jíin

ndé ìn cúu sãña jéé jicán na ndute nuū ní, yūcuán na te máá ní cacān ni nuū ná, te cuāha ná ndute jeē cótecu ni ní cāni sáha, áchí yá.

¹¹Te ni cahān ña jíin yá:

Tátā, yōhyo cúnú pozo yáha, te tú na vé ndahá ní jéé táva ní ndute. Núu súcuan ¿te ndé nuū nihín ni ndute jeē cótecu na sáha? ¹²¿Te á cújéhnú ga maá ní vēsú jíi yō Jacob, chí naún? Chi máá de ni stóo de pozo yáha nuū yō. Te yāha ní cajihí máá de ndute, jíin táca séhe de, jíin quiti ndéca de. Achí ña.

¹³Te ni cahān Jesús:

Tāca ñayuu jeē jíhi ndute yáha, chí jichí tucu i. ¹⁴Te ñayuu coho ndute jeē cuāha na nuū i, chí ma jichí cuiti gā i. Chi ndute jeē cuāha ná un, cane ini i nájñuhun ndute jeē cáne ñuhún, te sáha jeē cotecu i ní cāni, áchí yá jíin ña.

¹⁵Te máá ña tu ní jécūhun ni ña, te ni cahān ña jíin yá:

Tátā, cuāha ní ndute ún coho ná, návāha ma jichí cuiti gā ná, ni tuá jíni ññuhun quiquihin ná ndute pozo yáha, áchí ña.

¹⁶Te ni cahān Jesús jíin ña:

Cuácana ní yíi ní te quiji ní jíin de, áchí yá.

¹⁷Te ni cahān ña:

Tú yíi ná íyó.

Te ni cahān Jesús:

Ndaā cahán ni jéé tú yíi ní íyó.

¹⁸Chi je ni cuu uhūn yíi ní, te tēe ndéca ní vijna chí nasūú yíi ní cúu de. Yāha cúu jeē ni cahān ndaā ní, áchí yá.

¹⁹Te jeē súcuan ni cahān yā, te ni cahān ña:

Tátā, ìn tēe nácani jñuhun Yaā Dios cúu ní, jéni ní ná. ²⁰Tāca jíi

na ñáyuu Samaria, yucu yáha ní cachiñúhún i Yaā Dios. Te máá ní ñayuu hebreo, cácahān ni jéé ñuu Jerusalén cúu nuū cánuú chiñúhún yó yā, áchí ña.

²¹Te ni cahān Jesús jíin ña:

Nánā, candíje ní jnúhun cáhán na, chí quee quiví jeē ni nasūú yucu yáha ni nasūú ñuu Jerusalén cúu nuū chiñúhún ní maá Yaā cúu Tátā, chí ndíhi-ni lugar te cuu chiñúhún ní yá. ²²Máá ní ñayuu Samaria tu cájini ni ndé ìn cúu jeē cáchiñúhún ní. Te máá ná jijnáhan ná chí cájini na ndé ìn cúu jeē cáchiñúhún ná. Chi nde nuū maá ná jijnáhan ná ñáyuu hebreo cúu nuū véji Yaā jnama ñayuu. ²³Te je ni quee quiví jeē ñáyuu cáchiñúhún ndáā, vijna te chiñúhún ndije i Yaā cúu Tátā nde jíin ini jíin ánuá i. Chi máá Tátā cúní yā jeē súcuan chiñúhún ñáyuu yā. ²⁴Yaā Dios cúu Espiritu, te ñayuu jeē cuní i chiñúhún i ya, cánuú jéé chiñúhún ndije i ya jíin ini jíin ánuá i, áchí yá.

²⁵Te ni cahān ñahan ún:

Jíni na jéé quíji Mesías jeē cúu Cristo, Yaā jeē tají Yaā Dios. Te núu ni quee maá yá, te stéén cají yá tāca jnúhun nuū yō.

²⁶Te ni cahān Jesús:

Máá ná jeē cahán jíin ní, suu ná cúu Yaā ún.

²⁷Te sá cáhán gā yā súcuan, te ni ndecoo-ni tēe cáscuáha jíin yá. Te ni canaa ni de cájito de jeē ndájñuhun yá jíin ñahan yúcuan. Te ni ìn de tu ní cájñuhún de ya núu na vé cájñuhun yá ña chí na vé ndájñuhun yá jíin ña. ²⁸Yūcuán na te ñahan un ní stóo ña quiyí ña, te cuahān ña nde ñuu. Te ni cahān ña jíin ñáyuu ún:

²⁹Nehen na quíngoo yó te coto ró ìn tēe jeē ní cachi ndìhì tāca jēē ni sáha ri. Sanaa te máá yá cúu Cristo, jeē cándetu yó quiji, áchí ña.

³⁰Yücuán na te ni quendacoo i ñuu ún, te cuangoo i nuū íne Jesús. ³¹Te nde ná tu jinūcoo i, te tēe cáscuáha jíin yá ni cacahān ndahú de jíin yá:

Maestro, caji ni stáā víí, achí de.

³²Te ni cahān yā jíin de:

Iyó stáā caji rī jeē tu cājini rō ndese cúu.

³³Yücuán na te tēe cáscuáha jíin yá, ni cacajnūhun jnáhan de:

¿A ní quindeca ìn ñayuu jeē ní yeji yā, chí naún? áchí de.

³⁴Te ni cahān Jesús:

Jeē ní cachi rī jeē iyó jēē caji rī cúu jeē cúsiñ ni rī sáha ri jniñu cúní Yaā ní tají rúhū vēji ri, jíin jēē sínu ri jniñu ún. ³⁵Te cacahān rō jeē cúmaní cuūn gā yoō te tahndē trigo. Te ruhū chi cáhán rī jíin ró: Condēhe jíjnáhan ró, chí ñayuu cuehē cácuu i nájnūhun trigo jeē jé ni cuaan jeē tahndé, chí je cáhiyo tūhva i candíje i ruhū. ³⁶Te tēe scándíje ñayuu cácuu de nájnūhun tēe cājehnde trigo, te nihin de yāhu de. Te jeē cánastútú de ñayuu cúu jeē cótecu i níí cáni andiví. Te tēe cáscuíté núu jnūhun ri, inuú-ni cusíñ ni de jíin tēe cástéén gā jnūhun ri.

³⁷Chi ndaā cúu jnūhun jeē cahán: ñin tēe jéte, te inga tēe nástútú, áchí. ³⁸Te suu cúu jeē ní tají rí rohó jíjnáhan ró jēē scándíje ró ñayuu jeē jé ni canihin jnūhun ya ni casáha inga tēe. Chi inga tēe je ni canacani de jnūhun nuū ñáyuu, te máá ró chí nájnūhun cánastútú ró i cúu jeē scándíje ró i.

³⁹Te cuehē ñayuu Samaria jeē cáyucú ñuu ún, ni cacandíje i Jesús jeē ní jini sōho i jnūhun ni cahān ñahan ún. Chi ni cahān ña: Ni cachi ya ndìhì tāca jēē ni sáha ri. ⁴⁰Te jeē yúcuan cúu jeē ñayuu Samaria un ní jinūcoo i nuū yā, te ni cacahān ndahú i jíin yá jeē na quéndōo ya ñuu i. Te ni ndōo ya yúcuan úu quiví. ⁴¹Te cuehē gā i ni cacandíje i ya jíin jnūhun cáhán maá yá. ⁴²Te ni cacahān i jíin ñahan ún:

Tuá niní jēē cahán maá ró te candíje ri yā, chí je ni cajini sōho ri jnūhun cáhán maá yá. Te cājini yō jeē maá yá cúu ndije Cristo, Yaā jnama ñayuu ñayiví. Achí i.

Jeē ní nasávāha ya sēhe tēe ndíso jniñu nuū rey

⁴³Te nuū ni yáha uū quiví ún, te Jesús ni quenda ya Samaria, te ni quihin tucu ya ichi cuanuhun yā región Galilea. ⁴⁴Chi je ni cahān maá yá jeē tēe cánacani jnūhun Yaā Dios, tu cáhiyo yíñúhún ñáyuu ñuu de jíin de, te suni súcuan ni cuu jíin máá yá. ⁴⁵Te ná ni najinū yā Galilea, te ñayuu un ní cajetáhú i ya, chí suni máá i ni jengoo i vico pascua ñuu Jerusalén, te ni cajito i tēcá jniñu ní sáha ya quiví ní iyo vico ún.

⁴⁶Yücuán na te ni jehēn tucu ya ñuu Caná ndañū Galilea, nuū ni sáha ya jeē ndúte ni nduu vino. Te ini ñuu Capernaum ni iyo ñin tēe cújéhnu jeē ndíso jniñu nuū rey. Te cúhú sēhe de. ⁴⁷Tēe un ní jini jnūhun de jeē ní najinū Jesús región Galilea jeē ní jéhēn yā región Judea. Te ni jecondéhé de ya, te ni cahān ndahú de jíin yá jeē na quíhín yā

jiín de vehe de, te nasávāha ya sēhe de, chi je yajni cuu i. ⁴⁸Te ni cahān Jesús jiín de:

Núu tú coto ró jniñu jéhnū jeē nāā ni rō sāha, te ma candíje cuiti rō jijnāhan ró, áchí yá.

⁴⁹Te tēe ndíso jniñu nuū rey, ni cahān de:

Cava vāha ni ní na quíhín yō, chi núu cucuée ní te cuu sēhe ná, áchí de.

⁵⁰Yūcuán na te ni cahān Jesús:

Cuánuhun vehe ró, chi cotecu sēhe ró.

Te tēe un ní candíje de jnūhun ni cahān Jesús, te cuanuhun-ni de. ⁵¹Te níni jíca de cuanuhun de vehe de, te ni quijicoo mozo de ni caquijnahan i de, te ni cacahān i:

Je ni nduvāha sēhe ní, áchí i.

⁵²Te ni cajñuhún de na hora ni quejéé nduvāha i. Te ni cacahān i jiín de:

Cahiin jeē ícu ni quenda quiji i.

⁵³Yūcuán na te máá tátá i ni sāha de cuenta jeē hora un cúu jeē ni cáhān Jesús jiín de jeē cótecu sēhe de. Te ni candíje de jíin ní vehe de jeē cúu ya Yaā ní tají Yaā Dios.

⁵⁴Yāha cúu vuelta uū jeē ni sāha Jesús jniñu jéhnū jeē ni stéén yā poder yā región Galilea, jeē ní najinū yā jeē ni jéhēn yā región Judea.

**Jeē ní nasávāha ya iin tēe
cátú yuhu pila Betesda**

5 Yūcuán na te cuahān tucu Jesús ñuu Jerusalén, chi íyó tucu vico cásāha jnáhan ñuu yā hebreo. ²Te Jerusalén íyó iin pila ndute yajni yéhyí jēē naní yéhyí lanchí. Te yuhu hebreo

naní Betesda. Te nuū íne pila un íyó úhūn corredor. ³Te ini tācá corredor un cācāa cuehē ñayuu cācuhū, jeē cuaá, jeē chacuá, jeē ni íjin. Te cāndetu i jeē canda ndute ún. ⁴Chi íyó quívī jeē cúun iin ndajéhé yā ini pila un, te scānda ya ndute. Te ñayuu quívī xihna gā ini pila un ná scānda ya ndute, te nduvāha i na-ni cuehyī ndóho i. ⁵Te yūcuán íyó iin tēe jeē ní cuu ocō xahūn unī cuiyā huhú de. ⁶Te ni jito Jesús jeē catú de, te ni jini yā jeē ní cuu cuehē cuiyā huhú de. Te ni cahān yā jiín de:

¿A cúní rō nduvāha ró? áchí yá.

⁷Te ni cahān tēe cūhú un jíin yá:

Tu níhín na ni iin tēe squívī sāñá ini pila hora jeē cānda ndute. Chi tāca jínu jeē cuní na quívī ná, te quívī-ni inga ñayuu xihna gā. Achí de.

⁸Te ni cahān Jesús:

Ndocuñī te naquihin ró camilla rō te caca ró, áchí yá.

⁹Te tēe un ní nduvāha-ni de. Te ni naquihin de camilla de, te ni quejéé de jíca de. Te quívī ndétātu cúu quívī ún. ¹⁰Yūcuán na te jnáhan de tēe hebreo un ní cacahān jiín de:

Quívī ndétātu cúu vijna. Te áchí ley jeē ma cúu condiso ró camilla rō.

¹¹Te ni cahān tēe ni nduvāha ún:

Tēe ni nasávāha ruhū, ni cahān de jíin rí jeē náquihin rí camilla rí te caca rí, achí de.

¹²Yūcuán na te ni cacajñuhún un de:

¿Ndé tēe ni cahān jiín ró jeē náquihin ró camilla rō te caca ró?

¹³Te tēe ni nduvāha ún, tu jíni de ndé iin cúu jeē ní nasávāha de.

Chi cáhiin cuehē ñayuu yūcuán, te Jesús je cuahān yā. ¹⁴Te cúcuéé gá te ni najnáhan Jesús jíin de ini templo cáhnu. Te ni cahān yā:

Vijna chi je ni nduvāha ró. Ma sáha ga rō cuēchi, chi núu tuú, te quiji iin jnūndóho xeēn gā siquī rō, achí yá.

¹⁵Yūcuán na te cuahān tēe ún, te ni castúhún de nuū jnáhan de hebreo un jéé Jesús cúu jeē ní nasávāha ya de. ¹⁶Te siquī jeē ní sáha Jesús jniñu yáha quivī ndétátú, jeē yúcuan cúu jeē tēe hebreo un cájito xeēn de ya, te cácuni de cahni de ya. ¹⁷Te ni cahān Jesús jíin de:

Máa Tátá rī chi níí cáni te nde vijna sáha ya jniñu váha, te suni súcuan ruhū sáha ri jniñu váha.

¹⁸Te siquī jeē ni cáhān yā súcuan, te tēe hebreo un víhyá gā cácuni de cahni de ya. Chi nasūu máa iin-ni jeē tu squícu ya jeē cahán ley siquī quivī ndétátú, chi suni jeē ni cáhān yā jeē Tátá yā cúu Yaā Dios, te súcuan sáha inuú yá maá yá jíin Yaā Dios.

Siquī jeē ndíso jniñu Sēhe Yaā Dios

¹⁹Te ni cahān Jesús:

Jendaá cahán rī jíin ró jijnáhan ró: Ruhū jeē cúu Sēhe Yaā Dios, tú na vé cúu sáha ri jeē maá rí, chi máni sáha ri jeē jito ri sáha Tátá rī. Chi tāca jéé sáha Tátá rī, suni sáha ruhū jeē cúu ri Sēhe ya. ²⁰Chi máa Tátá rī, manī yā jíin ruhū jeē cúu ri Sēhe ya, te stéén yā nuū rī ndíhi jeē sáha ya. Te jéhnu ga jniñu stéén yā vēsú jeē ní cuu vijna, jeē naa ni rō coto ró jijnáhan ró. ²¹Te nájnūhun jeē nastécu maá Tátá rī

ndīyi te cotecu tucu i, suni súcuan ruhū jeē cúu ri Sēhe ya, nastécu rī ndé-ni cúu jeē cuní maá rí. ²²Te máa Tátá rī, tu sándaā yā siquī ni iin ñayuu, chi ni jēhe ya jnūhun jeē sándaā maá rí siquī tāca ñáyuu, chi Sēhe ya cúu ri. ²³Te súcuan te coo yíñúhún ndíhi ñayuu nuū rī, nájnūhun yíñúhún i nuū Tátá rī. Te ñayuu tu íyó yíñúhún núu rī, núu súcuan te suni tu yíñúhún i nuū maá Tátá rī jeē ní tají yá ruhū vēji ri.

²⁴Jendaá cahán rī jíin ró: Núu iin ñayuu chuhun ni i jnūhun cáhán rī, te candíje i jeē Yaā ndaā cúu Yaā ní tají rúhū vēji ri, ñayuu ún cotecu i níí cáni andiví, te ma jnahnú ndetū i. Chi ma cúu ga i nájnūhun ndīyi, chi sa suhva cotecu i níí cáni. ²⁵Jendaá cahán rī jíin ró jeē quiji quivī, te vijna je ni quejéé, jeē tāca ñáyuu cácuu nájnūhun ndīyi, cuni nahín i jnūhun cáhán ruhū, Sēhe Yaā Dios. Te ñayuu cuatáhú, chi cotecu i níí cáni. ²⁶Chi nájnūhun íyó poder maá Tátá rī jeē sáha ya jeé técu ndíhi-ni, suni súcuan ni jēhe ya poder nuū ruhū jeē sáha ri jeē cotecu ndíhi-ni. ²⁷Te suni ni sáha ya jeē ndíso jniñu ri sándaā rī siquī ñayuu, chi cúu ri Yaā ní nduu tēe. ²⁸Ma náa ni rō cani ni rō siquī jnūhun cáhán rī. Chi quee quivī jeē tāca ndīyi cuni sōho i jnūhun cahán rī, ²⁹te quendacoo i nuū yíndūji i. Te ndīyi jeē ní casáha jniñu váha, natecu i jeē cótecu i níí cáni. Te ndīyi jeē ní casáha jniñu néé, natecu i te quivícoo i nuū jnahnú ndetū i.

Ndé vé cúu jeē steén jeē ní tají Yaā Dios yā

³⁰Tú na vé cúu sáha ri jeē maá rí. Chi nájnūhun ndácu Yaā Dios jniñu

nuū rī, súcuan sándaa rī jniñu. Te ndaa sándaa rī, chi tu sáha ri jeē cuní maá rí, chi sáha ri jeē cuní maá Tátá rī, Yaā ní tají rúhū vēji rī. ³¹Núu ruhū cahán rī jeē cúu ri Sēhe Yaā Dios, te cachi ñayuu jeē tu jéjníñu jñuhun cáhán rī. ³²Te íyó ñga jeē cahán jeē cúu ri Sēhe ya. Te jíní rī jeē jñuhun un jéē cahán yā, chi níhín jñíñu. ³³Máá ró ni catají ró tēe ni cacajñuhún de Juan. Te Juan chi ndaa ni cahán de jñuhun rī. ³⁴Te vēsú súcuan te nasūu rúhū cúu jeē jíní ñúhún jeē steén ñn tēe jeē Séhe Yaā Dios cúu ri. Chi máá ró cúu jeē jíní ñúhún návaha candíje ró te cācu ró jíjñáhan ró. Jeē yúcuan ní cahán rī jeē iyó ndaa jñuhun ri jeē ní nacani Juan. ³⁵Máá Juan ni cuu de ñajñuhun ñn lámpara jeē cayú te cúndijin, cúu jeē ní nacani de jñuhun rī. Te máá ró, jecu-ni quivī ni canujnahan ni rō jeē ni steén de nuū rō. ³⁶Te íyó jéē steén cají gá jeē kujéñu ri vēsú jeē ni cáhán Juan. Suu jñíñu sáha ri, jñíñu jeē ní tejñíñu Tátá rī ruhū jeē sáha ri, jñíñu un steén ndije jeē maá yá ni tají rúhū vēji rī. ³⁷Te Tátá rī jeē ní tají yá ruhū vēji rī, suni máá yá cahán nuū tútu ñi jeē kujéñu ri, vēsú tu ní cājini sōho cuiti rō jeē cahán yā, ni tu ní cājito ró yá. ³⁸Te tu ní cáchuhun ni rō jñuhun un jéē ni cáhán Tátá rī, chi tu cácandíje ró rúhū, Yaā ní tají yá vēji. ³⁹Cánanducú vii rō tāca jñuhun cáhán tutu ñi, chi cājeni ni rō jeē yúcuan níhín rō jñuhun jeē cótecu rō níí cáni sáha. Te jñuhun síquī maá rí cúu jeē cahán tutu ún. ⁴⁰Te vēsú súcuan te tu cácuni rō

cuatáhú ró ruhū quívicoo ró ndaha ri návaha cotecu rō níí cáni.

⁴¹Tu chíhi ri cuenta jñuhun jeē cácahán ñayuu jeē kujéñu ri. ⁴²Chi je jíní rī ndese cándaa ánuá rō jeē tu cáhíyo maní rō jíin Yaā Dios. ⁴³Ruhū vēji ri jíin jñíñu cúní Tátá rī, te tu cájetáhú ró ruhū. Te núu ñga tēe quee de jíin jñíñu cúní maá de, sa tēe un yáchí cuatáhú ró de. ⁴⁴¿Ndese cuu candíje ró jíjñáhan ró? Chi máni cácuni rō jeē kujéñu ró sáha jñáhan ró, te tu cánducú ró jeē kujéñu ró sáha Yaā Dios, jeē maá ñn-ni ya iyó. ⁴⁵Ma cáni ni rō jeē cáquin rī cuēchi síquī rō nuū Tátá rī. Chi íyó ñn jeē cáquin cuēchi síquī rō, suu Moisés, tēe jeē cáñuhun ni rō jeē quendōo ndaa rō jíin ley jeē ní tee de. ⁴⁶Chi núu ní cácandíje ró jéē ní tee Moisés, te suni candíje ró rúhū nuú, chi jñuhun máá rí ni tee de. ⁴⁷Te núu tu cácandíje ró jñuhun ri jeē ní tee de, ¿te ndese candíje ró jñuhun cáhán maá rí núu súcuan? Achí yá jíin de.

Jeē ni scáji yā uhūn mil tēe

(Mt. 14.13-21; Mr. 6.30-44; Lc. 9.10-17)

6 Yūcuán na te cuahán Jesús ñga lado mar Galilea, jeē cúu mar Tiberias. ²Te yōhyo cuehē ñayuu ni candiquín i ya, chi ni cajito i tācá jñíñu jéñu jeē steén yā poder yā jeē ní nasávaha ya ñayuu cácuñu. ³Te ni caa ya ñn yucu, te ni cucōo ya yúcuan jíin tēe cáscuáha jíin yá. ⁴Te je ni cuyajni vico pascua jeē cánucuhun ni jñáhan ñuu yā hebreo jeē ní cacācu i nuū ñayuu nación Egipito. ⁵Te ni ndacoto ya,

te ni jito ya jeē véjicoo cuehē ndasí ñáyuu. Te ni cahān yā jíin Felipe:

¿Ndé nuū cuaan yó jéé caji ñayuu yáha jíjnáhan i?

⁶Te súcuan ni cahān yā jeē jító ndee yā de núu ndese cahān de. Chi je jíiní maá yá ndese sáha ya. ⁷Te ni cahān Felipe jíin yá:

Te ni ma cánda uū ciento denario staā, ni vēsú jeē caji i jecu jecu jíjnáhan i, áchí de.

⁸Yūcuán na te ni cahān Andrés, ñani Simón Pedro, inga tēe scuáha jíin yá un:

⁹Yāha íne iin sūchi yí jéé ndíso i uhūn staā cebada jíin úu chāca. ¿Te ndé canda cuiti ún, chi ñayuu cuehē ndasí cúu?

¹⁰Yūcuán na te ni cahān Jesús:

Cahān jíin ñayuu na cúcōo i, áchí yá.

Te yūcuan cáa cuehē ite, te ni cacucōo i, te nájnūhun uhūn mil tēe cúu. ¹¹Te ni quihin Jesús staā ún, te ni nacuatáhu yá nuū Yaā Dios. Te ni jēhe ya nuū tēe cáscuáha jíin yá, te máá de ni casaja de nuū ñáyuu ní cacucōo ún. Te suni súcuan ni sáha ya jíin cháca, te ni cayeji i nasaa cācuni maá i. ¹²Te nuū ní candutú chíji i, te ni cahān yā jíin tēe cáscuáha ún:

Nastútú ró tācá pedazo jeē ni ndóo, návāha tu stívi cuiti yō.

¹³Te ni canastútú de, te ni chitú úxi uū jica pedazo jeē ni ndóo siquī ndíhúhún staā cebada un jeē tuá ni ndíhi caji ñayuu. ¹⁴Te ñayuu un ní cajito i jniñu jéhnu ni sáha Jesús jeē ní stéén yā poder yā. Te ni cacahān i:

Jendaá ndije jeē tēe yáha cúu jeē cahán tutu jeē quíji ini ñayivi jéé nācani jnūhun Yaā Dios. Achí i.

¹⁵Te ni jini Jesús jeē cācuni i sáfuerza i ya jeē cuu ya rey i núú. Te ni cujiyo tucu máá iin-ni ya, ni caa ya cuahān yā nuū sucún gá yucu.

Jeē ní jica jéhé yá nuū mar

(Mt. 14.22-27; Mr. 6.45-52)

¹⁶Te nuū cuácuaa, te tēe cáscuáha jíin yá ni nanuu de cuangoo de nde mar. ¹⁷Te ni ndívicoo de ini barco, te ni cascáca de jeē quíngoo de nde inga lado mar nde ñuu Capernaum. Te je ni cunee, te ná tu ndee Jesús nuū de. ¹⁸Yūcuán na te ni jequīhi iin tachí níhin, te sáha jeē ndóna ndute mar un. ¹⁹Te jeē ní cuu nájnūhun uhūn chí íñu kilómetro cājica de jíin barco, te ni cajito de jeē jica Jesús nuū mar, te ni cuyajni ya vēji ya nuū barco. Te ni cayūhú de. ²⁰Te máá yá ni cahān yā jíin de:

Máá rí cúu. Ma yūhu ró jíjnáhan ró.

²¹Te ni cacusií ni de jeē na quívi ya ini barco. Te ni sáha ya jeē yachí-ni ni jinūcoo-ni de ñuhun íchi núu cuángoo de ún.

Jeē cánanducú ñayuu Jesús

²²Te inga quiví ún, te ñayuu jeē ní caquendōo inga lado mar, ni cajini i jeē tēe cáscuáha jíin yá cuangoo de jíin máñuhún-ni barco ni íne yūcuán, jíin jéé tu ní quívi Jesús quihín yā jíin de jíjnáhan de. ²³Te sava ga barco jeē véjicoo ichi ñúu Tiberias, ni quecoo yajni lugar nuū ní cayeji i staā jeē ní nacuatáhu máá Jítoho yō jehē. ²⁴Te jeē ní cajito ñayuu un jéé tuá Jesús íne ya yūcuán, ni tēe cáscuáha jíin yá, te ni quívicoo i tāca barco

un, te cuangoo i ñuu Capernaum cuananducú i ya.

Jesús cúu staā jeē cótecu yō níí cáni

²⁵Te nuū ni jínūcoo i nde inga lado mar, te ni nanihīn jnāhan i jín Jesús. Te ni cacajñūhún i ya:

Maestro, ¿na hora ni quee ni yáha?

²⁶Te ni cahān Jesús:

Jendaá cahán rī jín ró jeē cánanducú ró ruhū siquī jeē ní cayeji rō nde ni candutú chíji ró, te nasūu siquī jeē ní cajito ró táca jniñu jéhu jeē steén rī poder rī.

²⁷Ma condihvī ni rō maá siquī jeē caji rō jeē yachī nataxīn, chí sa suhva condihvī ni rō siquī jeē nihín rō jeē cótecu rō níí cáni sáha. Te máá rí, Yaā ní nduu tēe, cuāha ri nájñūhun staā jeē cótecu rō níí cáni sáha. Chí Tátá rī Yaā Dios ni jeni ya ruhū jeē sáha ri súcuan. Achí yá jín i.

²⁸Yūcuán na te ni cacajñūhún i ya:

¿Ndese sáha ná návāha squícu ná jniñu cúní Yaā Dios?

²⁹Te ni cahān Jesús:

Jniñu jeē cuní Yaā Dios cúu jeē candíje ró rúhū, Yaā ní tají yá vēji.

³⁰Yūcuán na te ni cacahān i:

Núu súcuan ¿te na jniñu jéhu sáha ní coto ná jínáhan ná te candíje ná jéé ní tají yá nihín? ¿Na jniñu cúu jeē sáha ní? ³¹Chí tāca jí yō jenahán ni cayeji de maná jeē ní cuun ichi ándiví ndé nuū ñūhun téhé, nájñūhun yósó núu tútu: Yaā Dios ni jēhe ya staā ni cuun ichi ándiví, ni cayeji i, áchí tutu. Achí i jín yá.

³²Te ni cahān Jesús:

Jendaá cahán rī jín ró: Nasūu Moisés ni jēhe staā un núu de jínáhan de jeē ní cuun ichi ándiví, chí máá Tátá rī ni jēhe. Te máá yá jēhe staā ándiví jéé cótecu rō níí cáni sáha. ³³Chí staā jēhe Yaā Dios cúu máá Yaā ní quiji ichi ándiví, te sáha ya jeē ñáyuu ñayiví cotecu i níí cáni ándiví. Achí yá.

³⁴Te ni cacahān i jín yá:

Níní cuāha ni stāā ún caji na núu súcuan.

³⁵Te ni cahān Jesús:

Máá rí cúu máá stāā jeē cótecu rō níí cáni sáha. Ndé vé quiví ndaha ri, ma cúu cuiti gā sōco. Te ndé vé candíje ruhū, ma jichí cuiti gā. ³⁶Te nájñūhun je ni cahān rī jín ró, tu cáncandíje ró rúhū, vēsú ni cajito ró núu rī. ³⁷Tāca ñáyuu jeē sáha Tátá rī jeē candíje i ruhū, máá i quívicoo ndaha ri. Te jétáhu rí tāca jéé cuní quiví ndaha ri, chí ma squéhichí cuiti rī quihīn. ³⁸Chí ni quiji ri ichi ándiví návāha sáha ri jniñu jeē cuní Yaā ní tají rúhū, te nasūu jéé sáha ri jeē cuní máá rí. ³⁹Te jniñu jeē cuní Tatá rī, Yaā ní tají rúhū, cúu jeē ma scuíta ri ni ñayuu ni jēhe ya nuū rī, chí condito rī i te nastécu rī i quiví jínu ñayiví. ⁴⁰Te Yaā ní tají rúhū, cuní yá jeē tāca ñáyuu jeē nihín i jñūhun ruhū, Sēhe Yaā Dios, te candíje i ruhū, cotecu i níí cáni ándiví. Chí nastécu rī i quiví jínu ñayiví. Achí yá.

⁴¹Yūcuán na te ni caquejéé jnāhan ñuu yā hebreo cácahān de siquī yā, chí ni cahān yā jeē maá yá cúu staā ní quiji ichi ándiví. ⁴²Te ni cacahān de:

¿A násūu tēe yáha cúu Jesús, sēhe José? Te cájini yō tatá de náná de.

¿Te ndese cúu jeē cahán de jeē ni quíji de ichi ándiví núu súcuan?

⁴³Te ni cahán Jesús jíin de:

Ma cahán rō siquī rī jijnáhan rō. ⁴⁴Ni iin ñayuu ma cúu quívi i ndaha ri núu ma sáha Tátá rī jeē cúu ni i quívi i, chi máá yá ni tají rúhū vēji ri. Te nastécu rī i quívi jínu ñayívi. ⁴⁵Te suhva yósó núu tútu ni catee tēe ni canacani jnūhun Yaā Dios: Tācá i chi steén Yaā Dios nuū i, áchí. Núu súcuan te tāca ñayuu jíni sōho jnūhun cáhán Tátá rī, te jétáhú i jeē steén yā nuū i, ñayuu ún chi quívicoo i ndaha ri.

⁴⁶Te tu ní jíto ni iin ñayuu nuū maá Tátá rī. Chi máñúhún-ni ruhū ni jito ri nuū yā, chi nde nuū maá yá vēji ri. ⁴⁷Jendaá cahán rī jíin ró jijnáhan ró jéē ñayuu jeē candíje i jeē jnáma ri i, máá i cotecu i ní cání. ⁴⁸Máá rí cúu staā jeē cótecu rō ní cání sáha. ⁴⁹Tāca jíi rō jenahán, ni cayejí de staā maná jeē ní cuun ichi ándiví ndé nuū ñūhun téhé, te tu ní sáha jeē cótecu de ní cání andiví. ⁵⁰Te staā jeē cahán rī jeē vēji ichi ándiví, chi na-ni ñayuu caji, te cotecu i ní cání andiví. ⁵¹Te suu máá rí cúu staā un jéē ní quíji ichi ándiví jéē sáha jeē cótecu rō ní cání. Te ñayuu jeē caji staā yáha, cotecu i ní cání andiví. Te staā jeē cuáha ri un cúu yiqui cúñu rī, te cuáha ri návaha ñayuu ñayívi cotecu i ní cání andiví. Achí yá.

⁵²Yūcuán na te jnáhan ñuu yā hebreo ni cacahán de jíin táca jnáhan de:

¿Ndese cuu cuáha tēe yáha yiqui cúñu de caji yō? achí de.

⁵³Te ni cahán Jesús jíin de:

Jendaá cahán rī jíin ró: Núu tú candíje ró jéē yiqui cúñu ruhū, Yaā

ní nduu tēe, cúu nájnūhun staā, te níñi rī cúu nájnūhun ndute, núu súcuan te ma cótecu rō ní cání andiví. ⁵⁴Chi ñayuu cácandíje jeē yiqui cúñu rī cúu nájnūhun staā te níñi rī cúu nájnūhun ndute, máá i cotecu i ní cání. Te nastécu rī i quívi jínu ñayívi. ⁵⁵Chi yiqui cúñu rī jíin níñi rī cúu ndije jeē sáha jeē cótecu i ní cání. ⁵⁶Te ñayuu cácandíje jeē yiqui cúñu rī jíin níñi rī cúu nájnūhun staā jíin ndute jeē cótecu i ní cání sáha, máá i níni ndúú i jíin rí, te ndúú rí jíin i. ⁵⁷Máá Tátá rī, Yaā técu, ni tají yá ruhū vēji ri, te técu rī sáha máá yá. Te suni súcuan, ñayuu cácandíje jeē cúu ri nájnūhun staā i ndute i, suni súcuan cotecu i ní cání sáha ri. ⁵⁸Máá rí cúu staā ní quíji ichi ándiví. Te staā jeē cahán rī tu cúu nájnūhun staā maná jeē ní cayejí tāca jíi rō jenahán, chi tu ní sáha jeē cótecu de ní cání. Te staā jeē cahán rī, chi ñayuu caji, cotecu i ní cání sáha, áchí yá.

⁵⁹Tāca jnúhun yáha ní steén Jesús nuū ñayuu ní candutútú ini vehe ii sinagoga ñuu Capernaum.

Jnūhun cotecu yō ní cání

⁶⁰Te cuehē ñayuu cascuáha jíin yá, ni cajini sōho i jnūhun yáha jéē ni stéén yā. Te ni cacahán maá i:

Yōhyo yíi jnúhun cáhán yā yāhá. ¿Ndese cuu cuatáhú yō?

⁶¹Te ni jini Jesús jeē cacahán i jeē yíi cúu jnūhun yáhá, te ni cahán yā jíin i:

¿A yíi sáha jnūhun yáha jíin ró jijnáhan ró? ⁶²¿Te ndese sáha ró núu coto ró jéē ruhū, Yaā ní nduu tēe, ndaa ri nuhun rī nuū ni cóndee

rī xihna ñúhún? ⁶³Máá ánuá ñayuu cúu jeē sáha jeē técu i. Chi yiqui cúñu i tu jéjníñu cuiti súcuan. Te táca jnúhun ni cahān rī jín ró cúu jeē quéndōo vāha ánuá rō, te cotecu rō níf cáni sáha. ⁶⁴Te sava ró chi tu cácanđije ró. Achí yá.

Chi nde xihna ñúhún je jíní Jesús ndé-ni cúu ñayuu jeē ma cándije, jín ndé ñin de cúu jeē nastúu de ya. ⁶⁵Te ni cahān gā yā:

Jeē yúcuān ní cahān rī jín ró jeē ma cúu quivī ni ñin ñayuu ndaha rī, te núu tu sáha Tátá rī jeē cúu ni i quivī i, áchí yá.

⁶⁶Te nde quivī ún te cuehē ñayuu cascuáha jín yá, ni castóo i ya, te tuá ni cájica i jín yá. ⁶⁷Yúcuán na te ni cahān yā jín máá ndihúxí uū tēe cáscuáha jín yá:

¿A suni cácani máá ró quingoo ró, chí naún?

⁶⁸Te ni cahān Simón Pedro:

¿Nde núu gā quingoo ná? Chi máá ní cúu jeē nácani jnúhun jeē cótecu na níf cáni sáha. ⁶⁹Te ni cacandije ná te cájini na jéé máá ní cúu Cristo, Sēhe Yaā Dios, Yaā técu, achí de.

⁷⁰Te ni cahān Jesús:

Te vēsú ni nacāji rī ndihúxí uū rō, te íyó ñin ró jeē ní quivī jexeén ini. Achí yá.

⁷¹Te súcuan ni cahān yā siquī Judas Iscariote, sēhe Simón. Chi máá de nastúu de ya, vēsú ñin jnáhan jeē uxí uū tēe cáscuáha jín yá cúu de.

Jeē tu ní cácanđije ñani Jesús

7 Yúcuán na te jica cuu Jesús región Galilea. Chi tu cúní yā caca cuu ya región Judea, chi jnáhan ñuu yā hebreo jeē cáyūcu

yúcuān, cácani de cahni de ya. ²Te cuacuyajni vico jeē casáha ñayuu yā hebreo vehe ramadá, cáyūcú i chíji. ³Te ñani yā ni cacahān de jín yá:

¿Naun máá yáha-ni íne ró? ¿Naun tú quihín rō región Judea, návāha tēe yúcuān jéé cácanđije de rōhó, suni coto de jniñu jéhu sáha ró. ⁴Chi núu cúní ñin tēe jeē cuité núu jnúhun de, te tu sáha yuhu de jniñu. Te núu sáha nde ró táca jniñu jéhu, vāha ga na sáha ró jéé cúní ndivii ñayuu.

⁵Súcuan ni cacahān ñani yā jín yá, chi ni máá de tu cácanđije de ya.

⁶Yúcuán na te ni cahān Jesús:

Ná tu quee máá quivī jeē quihín rī. Te máá ró jijnáhan ró chi na-ni quivī-ni te cuu quingoo ró. ⁷Chi ma quití ni ñayuu ñayivī núu rō, te máá rí chí quití ni i jíto i ruhū, chí cáhān rī jeē jíní rī jeē máni jniñu néé casáha i. ⁸Cuángoo máá ró vico ún. Te máá rí chí ma quihín rī vijna, chí ná tu quee máá quivī cánuú quihín rī. Achí yá.

⁹Súcuan ni cahān yā jnúhun yáha jín de, te ni quendōo ya Galilea.

Jeē ni jéhēn Jesús vico vehe ramadá

¹⁰Te nuū ni yáha ñani yā cuangoo de vico ún, te sáa te suni cuahān máá yá. Te tú cuahān ndijin yā, chí tu ní stēen yā máá yá. ¹¹Te jnáhan ñuu yā hebreo cácanđucú i ya nuū víco ún, te cacahān i:

¿Nde nuū íne tēe ún? áchí i.

¹²Te yōhyo ni cacahān ñayuu jeē siquí yā, chí sava i cacahān: Tēe vāha cúu de. Te sava ga i cacahān: Tuú chí stáhú de ñayuu.

¹³Te yuhu-ni ni cacahān i jnúhun ya, chí cáyūhú i jeē quití ni jnáhan i tēe hebreo.

¹⁴Te jeē ní cuu sava vico, te ni quee Jesús, ni quívi ya templo cáhnu, te ni quejéé yá steén yā jnūhun. ¹⁵Te ni canaa ni jnáhan ñuu yā hebreo cájini sōho i, te ni cacahān i:

¿Ndese jíní tēe yáha cuéhē jnūhun ndíhí, chí tu ní jíca de escuela? áhí i.

¹⁶Yūcuán na te ni cahān Jesús:

Jnūhun stéén rī chí nasūu jnúhun máá rí cúu, chí jnūhun jeē ni jéhe máá Yaā ní tají rúhū cúu. ¹⁷Núu ñin ñayuu cumí i sáha i jniñu cúní Yaā Dios, ñayuu ún chí jecūhun ni i núu nde nuū Yaā Dios vēji jnūhun stéén rī, chí jnúhun jeē jéni ni maá-ni rí cúu. ¹⁸Tēe cáhán jnūhun jéni ni maá de, tēe un ndúcú de jeē na sájéhnu ñayuu de. Te núu ñin tēe ndúcú de jeē sajéhnu de Yaā ní tají de, tēe un cúu tēe ndaā, te tú na jnūhun stáhú íyó jíin de.

¹⁹¿A násūu jéē ni jéhe Moisés ley yā nuū rō jeē squícu ró? Te ni ñin ró tu cásquícu. Chí sa jeē cáconi rō cahni rō ruhū, ¿te najehē cúu? Achí yá.

²⁰Te ni cacahān ñayuu cuehē ún: Tachí ndóho ró. ¿Ndé ñin cúní cahni rohó?

²¹Te ni cahān Jesús:

Ni nasávāha rí ñin tēe quivī ndétátú, te ndívii rō ni canaa ni rō ni cajito ró jéē quiví ndétátú ni sáha rí jniñu ún. ²²Te Moisés ni jéhe de ley jeē cúu circuncidar nuū rō. Te cásáha ró circuncidar sūchi yíí núu uná quivī jeē ní cacu i, vēsú quivī ndétātu cúu. (Te nasūu máá Moisés ní jéquin ley un, chí je ni iyo nuū tāca jíí de.) ²³Núu súcuan te núu cásáha ró circuncidar vēsú

quivī ndétātu cúu, návāha squícu ró ley Moisés, ¿te najehē cáquitī ni rō jeē ní nasávāha ndíhí rí ñin tēe quivī ndétátú? ²⁴Ma yachí caní ni rō jeē cuéchi cúu jeē sáha rí. Chí sa caní vāha ni rō siquī tācá jniñu váha. Achí yá.

Jeē ní cachi Jesús ndé nuū véji ya

²⁵Yūcuán na te sava ñayuu ñuu Jerusalén ni cacajñūhun jnáhan i:

¿A násūu tēe yáha cúu jeē cánanducú tēe cácujeñnu jeē cáhni de, chí naún?

²⁶Te yāha cáhán ndíjin de nuū chítú, te tú na jnūhun cacahān jíin de. ¿A sanaa te ni cacundaā ni tēe cácujeñnu jeē tēe yáha cúu Cristo jeē achí tutu jeē quiji, chí naún? ²⁷Te tuú chí je cájini yō nuū véji tēe yáha. Te jeē quíji Cristo, chí ni ñin yó má cúní ndé chí quíji ya. Achí i.

²⁸Yūcuán na te ni cahān jee Jesús jeē steén yā jnūhun ini templo:

Cájini rō ruhū, te cájini rō ndé ñuu vēji rí. Te vēsú súcuan te máá Yaā ndaā cúu jeē ní tají rúhū vēji rí, te tú vēji rí jeē cúní máá rí. Te tu cájini rō ndese Yaā cúu ya. ²⁹Te máá rí chí jíin rí yā, chí nde nuū máá yá vēji rí, te máá yá ni tají rúhū, achí yá.

³⁰Yūcuán na te ni canducú de jniñ de ya. Te ni ñin de tu ní cúu jniñ de ya, chí ná tu quee máá quíví jeē jniñ de ya. ³¹Te cuehē ñayuu chí ni cacandíje i ya, te ni cacahān i:

¿A násūu tēe yáha cúu Cristo, Yaā ndétu yó jéē quiji? Chí cuehē ndasí jniñu jéhnu sáha ya jeē steén yā poder yā. Achí i.

**Jeē ní catajé de policía
jeē jniñ de Jesús**

³²Te ni cajini tēe fariseo jeē súcuan cacahān ñayuu jnūhun ya.

Te máá de jín sūtū cácujuhnu, ni catajé de policía cándito templo jeē jnái de ya. ³³Te ni cahān Jesús:

Jecu na quivī condee ri jín ró jijnáhan ró. Yūcuán na te nuhun ri nuū Yaā ní tají rúhū vēji ri. ³⁴Te nanducú ró ruhū, te ma nánihīn rō ruhū. Chi ma cúu jinūcoo ró núu cóndee ri. Achí yá.

³⁵Yūcuán na te máá téē un ní cacajnūhun jnáhan de:

¿Te ndé nuū quihín téē yáha jeē ma nánihīn yō de? ¿A quihīn de nuū jnáhan yó hebreo jeē ní cajitē núu cáyūcu ndé nación Grecia? ¿Te á stéén de jnūhun nuū ñáyuu Grecia, chí naún? ³⁶¿Te na jnūhun cúu jeē ni cáhān de jín yó jeē nanducú yó de te ma nánihīn yō de, chi ma cúu jinūcoo yó núu cóndee de? Achí téē un jijnáhan de.

Siquī ndute jeē cótecu yō ní cáni sáha

³⁷Te quivī sándihí vico ún te cúu vico cáhnu ga. Te quivī un ní ndocuīñī Jesús, te ni cahān jee ya:

Núu ndé ñáyuu jnáa ndasí i tāca jéē váha jeē sáha ri jehē i, nájñūhun jeē jichí i ndute, núu súcuan te na quívi i ndaha ri te coho i ndute, cúu jeē nihín i jeē váha ún. ³⁸Te ñáyuu jeē candíje jeē jnáma ri i, chi ini anuá i condee Espírītu Santo, te cuu ya nájñūhun yūte cáne ñuhún jeē sáha ya jeē cótecu i ní cáni, nájñūhun cáhān tutu iī. Achí yá.

³⁹Te súcuan ni cahān yā jeē ñáyuu candíje jeē jnáma ya i, nihīn i Espírītu Santo. Chi ná tu quee Espírītu ún, chi ná tu ndaa Jesús quínuhun yā nuū ndujéhu ya.

Jeē ní cacusín ñáyuu siquī yā

⁴⁰Te sava ñáyuu cuehē ún, ná ni cajini sōho i jnūhun yáha, te ni cacahān i:

Jendaá jeē téē yáha cúu jeē achí tutu jeē quiji de nacani de jnūhun Yaā Dios, achí i.

⁴¹Te sava ga i ni cacahān:

Tēē yáha cúu Cristo, Yaā ní tají Yaā Dios.

Te sava ga i chi ni cacahān i:

Tuú chi nasúu Galilea quiji Cristo.

⁴²Chi cáhān tutu iī jeē ndé yucūn rey David cacu Cristo, te cacu ya ñuu Belén, ñuu nuū ní cacu máá David. Achí i.

⁴³Te súcuan te ni cacusín ñáyuu jeē siquī yā. ⁴⁴Te sava i cácumi i jni i ya, te ni iin i tu ní jnái i ya.

Jeē tu ní cácandíje téē cácujuhnu

⁴⁵Yūcuán na te policía cándito templo tu ní cájni de Jesús, te cuanungoo de nuū tāca téē fariseo jín núu sutú cácujuhnu. Te téē ún ni cacajnūhún de policía:

¿Najehē tu ní quécoo ró jín de? áhí.

⁴⁶Te ni cacahān policía un:

Tú cuiti ni iin téē cáhān vāha ndasí nájñūhun cáhān téē yúcuan, áhí.

⁴⁷Te ni cacahān téē fariseo:

¿Te á suni nde máá ró jijnáhan ró ní stáhú de naún? ⁴⁸Ni iin jnáhan ruhū téē cácujuhnu jín téē fariseo, tu cácandíje ri jnūhun cáhān téē ún, ¿te naun cácandíje máá ró? ⁴⁹Te ñáyuu cuehē yāhá jéē tu cájecūhun ni i ley Moisés, chí jnahnū ndetū i jeē cácandíje i téē ún, áhí de jijnáhan de.

⁵⁰Te ni cahān Nicodemo, téē ni jéhēn nuū yā iin jecuāā, te suni iin téē fariseo cúu de:

⁵¹Cáhān ley yō jeē ma cúu tee yó cuéchi siquī iin téē, te núu tú xihna

gā cuni sōho yó ndese cáhán de, návāha cucáhnū ni yō na cuēchi ni sáha de. Achí de.

⁵²Te ni cacahān jíin de:

Te rōhó, ¿á suni nde Galilea vēji ró jēē cahán rō jehē tēē ún? Nanducú váha ró núū tútu íi te cuni rō jeē ndé Galilea tu quénda cuíti ni íin tēē nácani jñūhun Yaā Dios. Achí jíin de. ⁵³Te cuanungoo de ná vehe ná vehe de.

Jñūhun ñahan ní casíquí ndéē jnáhan

8 Te ni caa Jesús cuahān yā yucu Olivos. ²Te jeē cuácundijin inga quiví, te ni ndee tucu ya templo. Te ndíhi ñayuu ni quecoo i nuū yā. Te ni cucōo ya, te ni steén yā jñūhun nuū i. ³Yūcuán na te tēē cástéén tutu ley Yaā Dios jíin tēē grupo fariseo, ni quecoo de jíin íin ñahan jeē ní canihīn de ña jeē casíquí ndéē ña. Te ni cajeni de ña mēhñú. ⁴Te ni cacahān de jíin yá:

Maestro, ni canihīn ná ñahan yáha jēē casíquí ndéē ña. ⁵Te ley Moisés ndácu jñíñu nuū yō jeē cuáha yó yúū xiní ñahan cásáha súcuan návāha cuu ña. Te máá ní, ¿ndese cáhán ni?

⁶Te súcuan ni cacahān de jeē cájito ndee de ya núu cuatáhú yá jeē cahán ley un, chi núu tuú te caquin de cuēchi siquī yā. Te Jesús ni jita ndeyi ya, te ni tee ya nuū ñūhun jíin xiní ndáha ya. ⁷Te jeē cácajnūhun cácajnūhún de ya, te ni ndonehen ya maá yá, te ni cahān yā jíin de:

Núu ndé íin máá ró tú na cuēchi ró, te xihna gā maá ró cuáha yuū xiní ña núu súcuan, achí yá.

⁸Te ni jita ndeyi tucu ya, te ni tee tucu ya nuū ñūhun. ⁹Te nuū ní cajini de jeē súcuan ni cahān yā, te ni cajecūhun ni de jeē suni cáhīyo cuēchi de. Te ná íin ná íin de ni quendacoo de cuahān de, xihna gā tēē jéhnū ga te nde nuū ní ndíhi na. Te ni ndōo máá íin na Jesús jíin ñahan índichi mēhñú un. ¹⁰Te ni ndonehen tucu ya maá yá, te tuá ni íin tēē un ní jító ya, chi máá na ñahan ún. Te ni cahān yā jíin ña:

¿Ndé chi cuángoo tēē cájequin cuēchi siquī rō? ¿A tú ni íin de ní ndóna cahān gā cuēchi siquī rō?

¹¹Te ni cahān ña:

Tú ni íin de, achí ña. Yūcuán na te ni cahān Jesús jíin ña:

Ni ruhū, ma cahán rī cuēchi siquī rō. Cuáhán te ma sáha ga rō cuēchi, achí yá.

Jesús cúu máá luz jeē steén ini anuá ñayuu

¹²Te inga jíinu ni cahān Jesús jíin ñayuu:

Máá rí cúu nájnūhun luz jeē steén ini anuá ñayuu ñayiví, jeē sáha jeē jécūhun ni i siquī Yaā Dios. Ñayuu candíje ruhū chi ma cáca i nájnūhun nuū néē, chi sa suhva coneváha i luz ini anuá i jeē sáha jeē cótecu i níí cáni.

¹³Yūcuán na te ni cacahān tēē fariseo jíin yá:

Róhó chi cáhán rō jñūhun jehē maá ró, te tu jéjníñu jñūhun cáhán rō.

¹⁴Te ni cahān Jesús jíin de jíjnáhan de:

Vēsú cáhán rī jehē maá rí, te íyó ndáa jñūhun cáhán rī. Chi jíin rí

ndé nuū véji ri jíin ndé nuū quihín rī. Te róhó tu cájini rō ndé nuū véji ri ni ndé nuū quihín rī. ¹⁵Máá ró chi cuenta ñayuu ñayīvi cásandaā rō siquī jnūhun cáhán rī. Te ruhū chi tu sándaā mañúhún rí siquī ni ñin ñayuu. ¹⁶Te núu sándaā rī siquī i, te ndaā sáha ri, chi tu sáha mañúhún rí, chi sándaā rī nde jíin máá Tátá rī, Yaā ní tají rúhū véji ri. ¹⁷Te yósó núu tútu ley cánevāha ró jéé núu inuú cácahān uū testigo, te jíni ñúhún cuatáhú ró jeé cácahān, chi íyó ndāā jnūhun ún. ¹⁸Núu súcuan te ruhū cúu ñin jeé cáhán ndaā rī jehē rī. Te inga jeé cáhán ndaā jehē rī cúu máá Tátá rī, Yaā ní tají rúhū. Achí yá.

¹⁹Te ni cacahān de jíin yá:

¿Ndé nuū ndeé Tátá rō?

Te ni cahān Jesús:

Tu cájini rō ruhū ni Tátá rī. Te núu jeé cájini rō ruhū, suni cuni rō Tatá rī nuú.

²⁰Tāca jnūhun yáha ní cahān Jesús jeé steén yā ini templo nuū cáyūcu yéjnū jeé cásocō i xūhún. Te tú ni ñin de ní jnī de ya, chi ná tu quee maá quívī jeé jnī de ya.

**Jeé ni cáhān yā jeé ma cúu
jinūcoo de nuū cóndee yā**

²¹Te ni cahān tucu Jesús jíin de:

Ruhū chi quihín rī, te nanducú ró rúhū, te ma nánihín rō ruhū, chi quendōo cuēchi ró siquī rō quívī cúu rō. Te jeé yúcuan má cúu jinūcoo ró núu quihín rī, achí yá.

²²Yūcuán na te tēe hebreo un ní cacahān maá de:

¿A cahni tēe yáha máá de, te jeé yúcuan cáhán de jeé ma cúu jinūcoo yó núu quihín de, chí naún? Achí de.

²³Te ni cahān yā:

Máá ró jijnáhan ró chi ñayīvi yáha véjicoo ró, te ruhū chi nde andívī véji ri. Máá ró cácuu ñayuu ñayīvi yáha, te ruhū chi nasūu tēe ñayīvi yáha cúu ri. ²⁴Jeé yúcuan ní cahān rī jeé quendōo cuēchi ró siquī rō quívī cúu rō. Chi núu ma candíje ró jéé maá rí cúu Cristo, te quendōo nahín cuēchi ró siquī rō quívī cúu rō. Achí yá.

²⁵Te ni cacajñuhún de ya:

Núu súcuan ¿te ndé ñin cúu ró?

Te ni cahān yā:

Je ni cachi ri nuū rō nde xihna ñúhún ndé ñin cúu ri. ²⁶Te íyó cuéhē gā jnūhun cuu cahān rī jíin ró te sándaā rī siquī rō. Te ma cahán rī, chi ini ñayīvi yáha cáhán rī maá-ni jnūhun jeé ní jini ri ni cahān Yaā ní tají rúhū véji ri. Te máni jnūhun ndaā cahán yā. Achí yá.

²⁷Te tu ní cájecūhun ni de jeé cahán yā jnūhun Tátá yā andívī jíin de. ²⁸Jeé yúcuan ní cahān gā yā:

Nde na yáha jeé cáta caa ró rúhū, Yaā ní nduu tēe, jicā cruz, yūcuán na te cuni rō ndé ñin cúu ri. Te cuni rō jeé tú na vé sáha ri jeé maá rí, chi cáhán rī maá-ni jnūhun ni steén Tatá rī nuū rī. ²⁹Chi máá Tátá rī, Yaā ní tají rúhū, ndeé yá jíin rí. Te tu stóo mañúhún yá ruhū, chi níni sáha ri jniñu jeé nújnahān ni maá yá. Achí yá.

³⁰Te jeé ni cáhān yā jnūhun yáha, te cuehē ñayuu ni cacandíje i ya.

**Siquī ndé-ni cúu sēhe Yaā
Dios jíin sēhe jexeén**

³¹Yūcuán na te ni cahān Jesús jíin jnáhan ñuu yā hebreo jeé ní cacandíje i ya:

Te núu cuiñi ñihin ró jíin jnūhun steén rī nuū rō, te cuu ndíje ró

ñáyuu scuáha jíin rí. ³²Te jecūhun ni rō jnūhun ndaā, te jnūhun ndaā un sáha jeē nduu libre rō nuū jeē yíhi ró ndaha.

³³Te ni cacahān i jíin yá:

Sēhe yucūn Abraham cácuu ri, te tu cáyihí cuítí rī ndaha ni ĩin. ¿Te ndese cúu jeē cahán rō jeē nduu libre rī núu súcuan?

³⁴Te ni cahān Jesús:

Jendaá cahán rī jíin ró jeē tāca ñáyuu casáha cuēchi, tu íyó libre i, chi yíhi i chíji cuēchi jeē jejníñu cāhá i nuū. ³⁵Te ñayuu jejníñu cāhá, chi tu cúu i ĩin jnáhan ñayuu vehe nuū jejníñu i. Te ĩin sēhe chi sa suhva cúu ndije i jnáhan ñayuu vehe ún. ³⁶Núu súcuan te máá rí jeē cúu Sēhe Yaā Dios, núu sáha ri jeē tuá cuajníñu cāhá ró nuū cuéchi, núu súcuan te nduu libre ndije ró jíjnáhan ró, te cuu ró sēhe ya. ³⁷Te jíin rī jeē sēhe yucūn Abraham cácuu ró, te vēsú súcuan te cácuni rō cahni rō ruhū, chi tu cájetáhú ró jnūhun cáhán rī. ³⁸Ruhū chi cáhán rī jnūhun jeē ni stéén Tatá rī nuū rī. Te máá ró chi casáha ró jniñu jeē ni cahān tatá máá ró jíjnáhan ró. Achí yá.

³⁹Te ni cacahān i:

Sēhe yucūn Abraham cácuu ri.

Te ni cahān Jesús:

Núu jeē candíje ró nájñūhun ni candíje Abraham návāha cuu ndije ró yúcūn de, yūcuán na te jniñu vāha ni sáha de suni sáha máá ró nuú. ⁴⁰Te vijna chi cácuni rō cahni rō ruhū, vēsú ni cahān ri jíin ró tāca jnúhun ndaā ni steén Tatá rī nuū rī. Te Abraham chi tu ní sáha cuítí de súcuan. ⁴¹Máá ró chi inuú casáha ró jíin tátá máá ró. Achí yá jíin i.

Yūcuán na te ni cacahān i:

Máá rí chi tu cácuu ri sēhe ndáhú jéé tu tátá. Chi íyó ĩin-ni tátá rī, te Yaā Dios cúu ya.

⁴²Te ni cahān Jesús:

Núu Yaā Dios cúu ndije tátá rō, te coo maní rō jíin rí nuú. Chi nde nuū Yaā Dios ni quenda ri vēji ri. Te tú vēji ri jeē cuní maá rí, chi máá yá ni tají rúhū. ⁴³¿Te najehē tu cájecūhun ni rō jnūhun cáhán rī núu súcuan? Suu siquī jeē tu cácuni rō chusóhó ró jnúhun nácani ri. ⁴⁴Máá ró jíjnáhan ró chi tátá rō cúu jexeén. Te cácuni rō sáha ró máá jéé cuní tátá rō ún. Máá jéxeén ni jehni ndíyi nde jeē xíhna ñúhún. Te tu ní ĩin cuítí jíin jnúhun ndaā, te tú cuítí na jnūhun ndaā cahán. Te jeē cahán jexeén jnūhun stáhú cúu jeē súcuan cáa máá. Chi máá un cúu jeē ndíso jnūhun stáhú, te máá un cúu jeē ní squéjéé ndíhi jnūhun stáhú. ⁴⁵Te ruhū chi cáhán rī jnūhun ndaā, te jeē yúcuan cúu jeē tu cácandíje ró rúhū. ⁴⁶Te ni ĩin ró ma nihín rō cuēchi siquī rī, chi tú cuítí na cuēchi ri. Te máni jnūhun ndaā cahán rī, ¿te naun tu cácandíje ró rúhū? ⁴⁷Ñayuu cácuu sēhe Yaā Dios, chi cáchusóhó i jnūhun Yaā Dios. Te nasūu sēhe Yaā Dios cácuu ró, te jeē yúcuan tu cácuni rō chusóhó ró. Achí yá jíin de.

Iyó Jesús nde ná tu coo Abraham

⁴⁸Yūcuán na te ni cacahān jnáhan ñuu yā hebreo un:

Ndaā cacahān rī jeē canéé ró nájñūhun ñayuu Samaria, te ñúhun tachī ini rō.

⁴⁹Te ni cahān Jesús:

Tu ñúhun tachī ini rī, chi yíñúhún rí jíin Tátá rī. Te máá ró jíjnáhan

ró chi tu cáhiyo yáñúhún ró jíin rí.
⁵⁰ Máá rí tu ndúcú rí jeē cujéhnú
 ri. Iyó iin jeē sáha jeē cujéhnú
 ri, te máá yá sándaá siquī jnúhun
 cácahān rō. ⁵¹ Jendaá cahán rī jíin
 ró, núu ndé ñáyuu squícu jnúhun
 cáhán rī, ma cúu cuíti i. Achí yá.

⁵² Te tēe hebreo un tu ní
 cájecūhun ni de, te ni cacahān de:

Vijna te ni cacucáhnú ni rī jeē
 ñúhun ndije tachī ini rō. Chi
 Abraham jíin táca tēe ni canacani
 jnúhun Yaā Dios nde jenahán, ni
 cajihī de. Te rōhó cáhán rō, núu ndé
 vé squícu jnúhun cáhán rō, te ma
 cúu cuíti i, áchí ró. ⁵³ ¿Te chí jéhnú
 ga rō vēsú jíi yō Abraham naún?
 Chi ni jihī de, te suni ni cajihī táca
 tēe ni canacani jnúhun ya. ¿Te ndé
 iin ga sáha ró máá ró núu súcuan?
 Achí de.

⁵⁴ Te ni cahān Jesús:

Núu ruhū sajeéhnú ri maá rí, te
 tu níhín jniñú. Máá Tátá rī cúu jeē
 sajeéhnú ruhū. Te cácahān rō jeē
 maá yá cúu Yaā Dios maá ró. ⁵⁵ Te
 vēsú súcuan te tu cájini rō ndese
 Yaā cúu ya. Te ruhū chi jíin rī yā.
 Te núu cahān rī jeē tu jíin rī yā, te
 cuu ri tēe stáhú nájnūhun máá ró
 jijnáhan ró. Te tuú chi jíin ndije ri
 yā, te squícu ri jnúhun cáhán yā.
⁵⁶ Te jíi rō Abraham ni cusīi ni de
 jeē coto de quivī quēē rī. Te je ni
 jito de, te ni jito rī jeē ní cusīi ndasí
 ni de. Achí yá.

⁵⁷ Yūcuán na te ni cacahān tēe
 hebreo un jíin yá:

Ni ná tu coo ró uū xico uxī cuiyā,
 ¿te ndese cúu jeē cahán rō jeē ní
 jito ró núu Abraham? achí de.

⁵⁸ Te ni cahān Jesús:

Jendaá cahán rī jíin ró jeē nde ná
 tu cacu Abraham te je íyó rí, achí
 yá.

⁵⁹ Yūcuán na te ni caquihin de
 yuū jeē cuáha de xinī yā. Te Jesús
 chí ni quenda sāhi yá ni yāha ya
 mēhñú de, ni quenda ya ini templo
 cuahān yā.

Jeē ní nasávāha ya iin tēe ni cacu cuáá

9 Te jeē jíca Jesús cuahān yā, te
 ni jito ya nuū iin tēe ni cacu
 cuáá. ² Te tēe cáscuáha jíin yá ni
 cacajnūhún de ya:

Maestro, ¿naun ni cacu cuáá tēe
 yáha? ¿A cuéchi tátá de náná de
 cúu, chí cuéchi máá de cúu, chí
 naún?

³ Te ni cahān Jesús:

Nasūu cuéchi máá de, ni nasūu
 cuéchi tátá de náná de cúu jeē
 ní cacu de súcuan, chi sa suhva
 návāha cuni ñáyuu jniñú jéhnú
 sáha Yaā Dios jíin de. ⁴ Níní jēe
 cúu nájnūhun nduú ini ñayīví, te
 cánuú sáha ri jniñú Yaā ní tají rúhū.
 Chi quee tiempo jeē coo nájnūhun
 jecuáá, jeē tuá cuu sájniñú ni iin.
⁵ Níní jēe iyó rí ini ñayīví te cúu
 ri luz jeē cúndijin ini anuá ñáyuu
 ñayīví, návāha jecūhun ni i siquī
 Yaā Dios. Achí yá.

⁶ Te ná ni cahān yā súcuan, te ni
 tesīhi yá nuū ñúhun, te ni sáha ya
 ndehyū jíin tésīhi yá un, te ni tee
 ya siquī tñūu tēe cuáá un. ⁷ Te ni
 cahān yā jíin de:

Cuáhán núu pila Siloé te nacate
 ró tñūu ró, achí yá. Te jnúhun Siloé
 cuní cahān, ndute ní cascáca de ni
 quee.

Yūcuán na te cuahān de, te ni nacate de tinūú de, te ni ndundijin-ni, te ni nandicó de vēji de. ⁸Yūcuán na te ñayuu yúcu yajni jíin de, jíin ñáyuu jeē ní cajito jeē cúu de tēe cuáá, ni cacajnūhun jnáhan i:

¿A násūu tēe yáha cúu jeē ndeé-ni yáhá te jíicán caridad?

⁹Te sava i ni cacahān:

Suu de cúu.

Te sava ga i ni cacahān:

Nasūú de cúu, te súcuan cúní coto de.

Te máá de chi ni cahān de:

Suu ri cúu.

¹⁰Yūcuán na te ni cacajnūhún i de:

¿Te ndese cúu jeē ní nanune tinūu ró núu súcuan?

¹¹Te ni cahān de:

Tēe nání Jesús ni sáha de ndehyū, te ni tee de tinūu rí, te ni cahān de jíin rí: Cuáhán núu pila Siloé te nacate ró tinūu ró. Te ni jehēn rí, te ni nacate ri, te ni nanune-ni tinūu rí, achí de.

¹²Yūcuán na te ni cacajnūhún i de:

¿Ndeé nuū íne tēe ún? achí i.

Tu jíin rí, achí de.

**Jeē ní castíchí tēe fariseo
tēe ni cacu cuáá**

¹³Yūcuán na te ni cajendeca i tēe ni iyo cuáá un núu tēe grupo fariseo. ¹⁴Te quivī ndétātu cúu jeē ni sáha Jesús ndehyū jeē ní nanune ya tinūú de. ¹⁵Te tēe fariseo un ní cacajnūhún tucu de tēe ún ndese ni nanune tinūú de. Te ni cahān de:

Ni tee de ndehyū siquī tinūu ná, te ni nacate ná, te ni ndundijin-ni tinūu ná, achí de.

¹⁶Yūcuán na te ni cacahān sava tēe fariseo:

Tēe ún chi nasūu ndé nuū Yaā Dios vēji de, chi tu née iī de quivī ndétátú.

Te sava ga de chi ni cacahān:

¿Ndese cuu sáha tēe un táca jniñu jéhnú yáha te núu tēe íyó cuéchi cúu de?

Te ni cacusín de siquī yā. ¹⁷Te ni cacajnūhún tucu de tēe ni iyo cuáá un:

Róhó, ¿ndese cáhán rō siquī tēe ni nanune tinūu ró núu súcuan?

Te máá de ni cahān de:

Íin tēe nácani jnūhun Yaā Dios cúu de, achí de.

¹⁸Te tēe hebreo un chi tu ní cácandíje de jeē ní íyo cuáá tēe ún te ni ndundijin tinūú de. Te ni cacana xiní tatá de náná de. ¹⁹Te ni cacajnūhún de:

¿A yáha cúu sēhe ro jéē ní cacu cuáá cacahān rō? Núu súcuan ¿te ndese ni ndundijin tinūú de vijna? achí.

²⁰Te ni cacahān tatá de náná de:

Suu sēhe ri cúu tēe yáha jéē ní cacu cuáá. ²¹Te tu cájini rī ndese ni ndundijin tinūú de vijna, ni tu cájini rī ndé tēe ni nanune tinūú de. Cajnūhun ró maá de, chi je jéhnú de, te na cáchi máá de.

²²Súcuan ni cacahān tatá de náná de, chi cáyūhú de cájito de jnáhan de tēe hebreo. Chi je ni casándaā tēe un jéē núu ndé ñáyuu cachi i jeē Jesús cúu Cristo, Yaā ní tají Yaā Dios, te quenehen de i jeē ma cúu ga quivī i ini vehe iī sinagoga. ²³Jeē yúcuan ní cacahān tatá de náná de: Cajnūhun ró maá de, chi je jéhnú de.

²⁴Yūcuán na te tēe hebreo un ní cacana tucu de tēe ni iyo cuáá un. Te ni cacahān de jíin:

Cachi cají ró nuū rī, jíto jínū Yaā Dios. Chi cājini rī jeē tēe íyó cuéchi cúu tēe ni nanune tinūu ró.

²⁵Yūcuán na te ni cahān de:

Tu jíiní na núu íyó cuéchi de, chí naún. Te íyó ĩn jeē jíiní ná, cúu jeē tēe cuáá ní cuu ná, te vijna chi ni ndundijin tinūu ná. Achí de.

²⁶Te ni cacajnuhún tucu de:

¿Ndese ni sáha de jíin ró? ¿Ndese ni nanune de tinūu ró núu súcuan?

²⁷Te ni cahān de:

Je ni cuu ni castūhun ná nuū ní, te tu ní cácu ni ní cuatáhú ní. ¿Te najehē cácu ni ní jēē cáchi tucu ná núu ní? ¿Te chí suni cácu ni ní jíjnáhan ní candíje ní yá naún?

²⁸Yūcuán na te ni cacahān neé jíin de, te áchí:

Máá ró chi cándíje ró tēe ún, te máá rí chi cácuandíje rī Moisés. ²⁹Te cājini rī jeē ni cáhān Yaā Dios jíin Moisés. Te tēe yúcuán, ni tu cājini rī ndé nuū vēji de.

³⁰Te ni cahān tēe ni iyo cuáá:

Náa ni na jēē cácuahān ni jēē tu cājini ní jeē vēji de nuū Yaā Dios, vēsú ni nanune de tinūu ná. ³¹Te cājini yō jeē Yaā Dios tu jíiní nahín yá jeē cájicān ñayuu iyó cuéchi. Chi jíiní nahín yá nuū maá-ni ñayuu jeē cáchiñhún i ya te cásáha i jeē cuní yā. ³²Te ní vēji yó te tu ní jíiní sōho cuítí yō jeē ĩn tēe nanune de tinūu inga tēe ni cacu cuáá. ³³Te núu nasūu ndé nuū Yaā Dios vēji tēe ún, te ma cúu cuítí sáha de ĩn jniñu súcuan. Achí de.

³⁴Te ni cacahān tēe hebreo un:

Róhó chí íyó ndasí cuéchi ró ndé quiví ní cacu ró, ¿te á máá ró steén nuū rī naún? áchí.

Te ni caquenehen tēe un yátā vehe ĩ sinagoga.

Siquē ñayuu cáhiyo cuáá ánuá

³⁵Te ni jini jnūhun Jesús jeē ní caquenehen de tēe ún. Te ni nihín jnáhan ya jíin de, te ni cahān yā jíin de:

¿A cándíje ró Séhe Yaā Dios?

³⁶Te ni cahān de:

¿Ndé ĩn cúu ya návāha candíje ná yá?

³⁷Te ni cahān Jesús:

Je ni jito ró núu yā, te suu cúu ruhū jeē cahán jíin ró, achí yá.

³⁸Yūcuán na te ni jecuiñí yití de nuū yā, te ni cahān de:

Cándíje ná jēē nihín cúu Jitoho ná.

³⁹Te ni cahān Jesús:

Vēji rī ini ñayivi yáha jēē sándaā rī síquē ñayuu. Chi ñayuu jeē nájnūhun cácuáá ánuá, ndundijin ini anuá i jeē jécūhun ni i síquē rī. Te ñayuu jeē jéni ni i jeē cájecūhun ni i, nájnūhun nducuáá ánuá i. Achí yá.

⁴⁰Te sava tēe fariseo jeē cáhiin jíin yá, ná ni cājini de jnūhun yáha, te ni cacahān de jíin yá:

¿Te chí jéni ni rō jeē suni tēe tu cájecūhun ni cácu máá rí naún?

⁴¹Te ni cahān Jesús:

Núu jeē cácuu ró tēe tu jécūhun ni nuú, te ma cóo cuéchi ró. Te síquē jeē ní cacahān rō jeē cájecūhun ni rō, te tu cájetáhú ró, jeē yúcuán condee cuéchi síquē rō.

Jnūhun yátá síquē lanchi

10 'Jendaá cahán rī jíin ró, núu yíhi lanchi ini corral cánevāha cáhnu ñayuu, te núu ndé tēe tu quiví de ichi yéhyí corral un, chí sa suhva inga lado cáa de

quívi de, tēe un cúu ñacuíhná, chi vēji jeē sacuíhná. ²Te tēe quívi ichi yéhyí, chi tēe un cúu pastor ndíto lanchi. ³Te tēe ndíto yéhyí, núne de te quívi tēe ún. Te lanchi de cánacuni tī tachī de. Te cána de síhví lanchi máá de, te táva de tī. ⁴Te núu ni tava de ndíhi lanchi máá de, te yósnúu de nuū tī cuahān de. Te lanchi un cándiquin tī de, chi náacuni tī tachī de. ⁵Te ma cóndiquin tī yatā inga tēe, chi sa suhva cunu tī coto tī de, chi náacuni tī jeē nasūu jítoho tī cúu.

⁶Jnūhun yátá yáha ní cahān Jesús jíin ñáyuu, te tu ní cájēcūhun ni i na jnūhun cúu jeē ni cáhān yā.

Jesus cúu máá pastor vāha

⁷Yūcuán na te ni cahān gā Jesús jíin i:

Jendaá cahán rī jíin ró: Máá rí cúu nájnūhun yéhyí corral nuū quívicoo ñáyuu cácuu nájnūhun lanchi rī. ⁸Tāca tēe jeē tu ní tájí Yāā Dios, jeē ní quijicoo de nde ná tu quee rī, cácuu de nájnūhun ñacuíhná, chi tu ní cástéén de jnūhun ndaā. Te ñáyuu cácuu nájnūhun lanchi rī, tu ní cájetáhu i de. ⁹Máá rí cúu nájnūhun yéhyí. Te ñáyuu jeē jíin máá rí quívicoo, jnama rī i. Te cuu i nájnūhun lanchi jeē ndívicoo tī nuū yíhi vāha tī, te quéndacoo tī nuū cáji vāha tī.

¹⁰Tēe cúhná chi máni vēji de jeē sacuíhná de lanchi, te cahni de, te snáa de. Te ruhū chi vēji rī návāha cotecu ñáyuu cácuu lanchi rī, te nde yōhyo vāha ndetū coo i. ¹¹Máá rí cúu máá pastor vāha. Te pastor vāha chi ndíto vāha de lanchi de, vēsú nde cuu de jeē síquí tī. ¹²Te ñin

tēe yíyāhu, nasūu pastor tī cúu de, chi nasūu lanchi máá de cúu tī. Te núu jíto de jeē vēji yihī, te stóo de lanchi, te jínu de cuahān de. Te yihī chi jnī tī lanchi, te sáha tī jeē jité núu lanchi. ¹³Te tēe yíyāhu ún chi jínu de cuahān de síquí jeē lanchi tátú cúu jeē ndíto de, te jeē yúcuu tu cúndáhu ni de tī.

¹⁴Máá rí cúu máá pastor vāha. Te jíin rī tāca ñáyuu cácuu nájnūhun lanchi rī, te máá i cájini i ruhū.

¹⁵Te yāha cúu nájnūhun jeē Tatá rī jíin yā ruhū, te máá rí jíin rī Tatá rī. Te cuu rī jeē síquí ñáyuu cácuu lanchi rī. ¹⁶Te suni íyó gá ñáyuu jeē cácuu lanchi rī, te síin síin ñáyuu cácuu i. Te cánuú jeē suni condeca rī ñáyuu ún. Te cuatáhu i jnūhun cáhán rī. Te coyūcu cáhnu-ni ndíhi ñáyuu candíje, te coo ñin-ni pastor i.

¹⁷Te Tatá rī manī ndasí yá jíin rí síquí jeē jéhe rī máá rí jeē cúu rī jehē ñáyuu, te natecu tucu rī. ¹⁸Ni ñin ma cúu cahni ruhū, chi máá rí cúu jeē jéhe jnūhun cuu rī. Jeē cachí máá rí te cuu rī, te jeē cachí máá rí te natecu rī, chi súcuu íyó poder rī. Súcuu ni cahān Tatá rī jeē sáha rī. Achí yá.

¹⁹Te jeē ní cajini jnáhan ñuu yā hebreo jnūhun yáha, te ni cacusín tucu i. ²⁰Te cuehē i ni cacahān: ¿Naun cáchusóhó ró jeē cahán de? Chi núhun tachī ini de, te ni tīvi xíni de.

²¹Te sava ga i ni cacahān:

Tu súcuu cáhán tēe núhun tachī ini, nájnūhun cáhán tēe yáha. Te tēe núhun tachī ini, ¿á cuu nanune de tinūu tēe cuáá naún? Achí.

Jeē ní casquéhichī i Jesús

²²Te tiempo mójin cúu, te ñuu Jerusalén cánasáha ñáyuu vico

jeē cānucūhun ni i quivī ní cuhiī templo cáhnu. ²³Te jíca cuu Jesús ini templo, ini corredor jeē naní Salomón. ²⁴Te jnāhan ñuu yā hebreo ni cacutútú i nuū yā, te ni cacahān i:

¿Nasaa ga quivī sáha ró jéē ma cucáhnu ni rī? Cachi cají núu rī jijnāhan ri núu máá ró cúu Cristo.

²⁵Te ni cahān Jesús:

Je ni castūhun rí nuū rō, te tu ní cácanđije ró. Tācā jniñu jeē ní tejniñu Tátá rī ruhū sáha ri, yūcuan stéén cají jéē maá yá ni tají rúhū.

²⁶Te tu cácanđije ró, chi nasūú lanchi ri cácuu ró, nájñuhun je ni cahān rī jíin ró. ²⁷Ñayuu cácuu lanchi ri, chi nácuni i jeē maá rí cúu jeē cahán jíin i. Te jíin rī i, te cándiquīn i ruhū. ²⁸Te cotecu i níí cáni sáha ri, te ma jnahnú ndetū cuiti i. Te ni ñin ma cúu quende i ndaha ri. ²⁹Máá Tátá rī ni squívi ya i ndaha ri. Te cújéhnú ga maá yá vēsú táca gá. Te ni ñin ma cúu quende i ndaha ya. ³⁰Máá rí jíin Tátá rī, chi ñin-ni cúu ri, achí yá.

³¹Yūcuán na te jnāhan ñuu yā hebreo ni caquihin tucu de yuū jeē cuáha de xiní yā. ³²Te ni cahān yā jíin de:

Ni steén rī cuehē jniñu váha nuū rō jeē ni sáha ri jíin poder Tátá rī. ¿Te á síquī jeē ni sáha ri jniñu váha cúu jeē cuáha ró yúu xiní rī núu sūcuan? Achí yá.

³³Te ni cacahān de jíin yá:

Nasūu síquī jeē ni sáha ró jniñu váha cúu jeē cuáha ri yuū xiní rō, chi síquī jeē cahán ndevāha ró jéē achí ró jeē inuú cúu ró jíin Yaā Dios. Chi tēe-ni cúu ró, te sáha ró jéē inuú cúu ró jíin Yaā Dios. Achí de jíin yá.

³⁴Te ni cahān Jesús:

Yósó núu tútu ley cánevāha ró jéē ni cahān Yaā Dios: Nájñuhun yaā cácuu ró, achí Yaā Dios, achí tutu. ³⁵Chi ñayuu jeē ní cajetáhú jñuhun ya, ni cahān yā jeē cácuu i nájñuhun yaā. Te cájini yō jeē ma cúu cahān yō jeē tú ndaā jñuhun cáhán tutu ii. ³⁶Núu sūcuan ¿te naun cácahān rō jeē jñuhun ndevāha cúu jeē ni cahān ri jeē Séhe Yaā Dios cúu ri? Chi máá Yaā Dios ni jeni ya ruhū síquī jniñu ii, te ni tají yá ruhū vēji ri ini ñayívi. ³⁷Núu tu sáha ri jniñu sáha Tátá rī, núu sūcuan te ma candíje ró rúhū. ³⁸Te núu sáha ri, te vēsú tu cácanđije ró rúhū, te na cándíje ró síquī jniñu sáha ri ún. Te sūcuan te cucáhnu ni rō jeē ñin-ni cúu Tátá rī jíin rí, te ñin-ni cúu ri jíin Tátá rī. Achí yá.

³⁹Yūcuán na te cánducú tucu de jniñ de ya. Te ni ndoñúhún-ni ya cuahān yā.

⁴⁰Te cuanuhun yā yūte Jordán ichi núu cáne niāndii, nuū ni íne Juan ni scuándute de. Te ni condee yā yūcuán. ⁴¹Te ni quijicoo cuehē ñayuu nuū yā, te ni cacahān i jíin táca jnāhan i:

Ndaā chi vēsú tu ní sáha Juan ni ñin jniñu jéhnú, te ni cundaā ndihi jñuhun ni cahān de síquī ndese sáha tēe yáha. Achí i.

⁴²Te cuehē ñayuu jeē ni jéngoo nuū yā yūcuán, ni cacandíje i ya.

Jeē ni jíhī Lázaro

11 Te ni iyo ñin tēe cúhú, nání de Lázaro. Te máá de jíin cuáha de María jíin Marta, cácuu de ñayuu ñuu Betania. ²Te María

un jeē cúu cuāha Lázaro, suu ña cúu jeē ní chihi aceite perfume jehē Jitoho yō, te ni naschí ña jíin ixi xíní ña. ³Te ndíndúú cuāha de un ní catají ña jnūhun cuahān nuū Jesús:

Tēe jeē maní ni jíin, cúhú de, áchí ña, áchí mozo.

⁴Te ná ni jini Jesús jnūhun, te ni cahān yā:

Cuehyī yáha chi nasūu cuéhyī jeē ví cuu de cúu. Chi sa suhva sáha Yaā Dios jeē cuni ñayuu ndese cújéhnú ya. Chi ruhū, Sēhe Yaā Dios, jíin cuéhyī yáha te stéén rī jeē suni cújéhnú máá rí. Achí yá.

⁵Te maní Jesús jíin Marta jíin cúhū ña jíin Lázaro. ⁶Te vēsú súcuan te nuū ni níhīn yā jnūhun jeē cuhú de, te ni quendōo ya uū gā quivī nuū ndeé yá un. ⁷Yūcuán na te ni cahān yā jíin tēe cáscuáha jíin yá:

Na quíhīn tucu yó región Judea.

⁸Te tēe cáscuáha un ní cacahān de jíin yá:

Maestro, ná tu cuu quivī jeē ní canducú jnáhan yó hebreo cuāha de yuū xiní ní. ¿Te cúní ni quíhīn tucu ní yúcuan naún? Achí de.

⁹Te ni cahān Jesús:

Ma cúu cahni ñayuu ruhū núu ná tu quee maá quivī cuu rí. Chi jeē iyó rí ñayivī yáha cúu nájnūhun jeē iyó úxi uū hora ñin nduú. Te jeē sáha ri jeē cuní Yaā Dios, cúu rí nájnūhun tēe jeē jíca nduú, te tu cáchihi de jehē de, chi cúndijin nuū de ñayivī yáha. ¹⁰Te tēe jeē tu sáha jeē cuní Yaā Dios, chi nájnūhun jíca de jecuāa, te nájnūhun cáchihi de jehē de, chi tu cúndijin ini anuá de. Achí yá.

¹¹Yūcuán na te ni cahān tucu ya:

Amigo yō Lázaro quíxí de, te quihīn rī sáha ri jeē nátahū ni de. Achí yá.

¹²Yūcuán na te tēe cáscuáha un ní cacahān de:

Núu quíxí de te jíin yō jeē nduvāha de.

¹³Te Jesús chi súcuan ni cahān yā jeē jé ni jihī de. Te cájeni ni tēe cáscuáha jeē quixí ndije de.

¹⁴Yūcuán na te ni cahān cají yá:

Je ni jihī Lázaro. ¹⁵Te cúsiñ ni rī jeē tu ní cóyūcu yó yūcuán, návāha vāha ga candije ró jéē coto ró jniñu jéhnú sáha ri. Núu súcuan te na quíngoo yó núu ndíyi ún. Achí yá.

¹⁶Yūcuán na te Tomás, tēe cúu cuatí, ni cahān de jíin jnáhan de jeē cascuáha jíin yá:

Suni na quíngoo yó návāha cuu yō jíin yá, achí de.

Jesús cúu jeē sáha jeē nátecu te cotecu níí cáni

¹⁷Te nuū ní quee Jesús, te jíin yā jeē ní cuu cuūn quivī yíndūji Lázaro. ¹⁸Te yajni-ni íne ñuu Betania jíin ñuu Jerusalén, nájnūhun uū kilómetro yosáva.

¹⁹Te Marta jíin María, ni quecoo cuehē jnáhan ña hebreo jeē cahán i jnūhun ndeyí ni jíin ña jeē siquí jeē ni jíhī cuāha ña. ²⁰Te nuū ní jini Marta jeē véji Jesús, te ni quenda ña cuajnahān ña ya. Te María chi ni ndōo ña vehe. ²¹Te ni cahān Marta jíin Jesús:

Núu ní íyo ní yáha, te ma cúu cuāha ná núu. ²²Te vēsú súcuan te jíin na jéē tāca jéē cacán ni núu Yaā Dios, te sáha ya, achí ña.

²³Te ni cahān Jesús jíin ña:

Natecu cuāha ró.

²⁴Te ni cahān Marta:

Jíní na jéē nátecu de quivī nátecu tāca ndíyí nde quivī jínu ñayiví.

²⁵Te ni cahān Jesús:

Maá rí cúu Yaā sáha jeē nátecu jíní jéē cótecu ní cání. Ñayuu candíje jeē jnáma ri i, vésú na cúu i, te natecu i. ²⁶Te ñayuu cátecu te cándíje i ruhū, cotecu i ní cání andiví. ¿A cándíje ró jnúhun yáha? Achí yá.

²⁷Te ni cahān ña:

Cándíje ná jéē maá ní cúu Cristo, Sēhe Yaā Dios, jeē achí tutu jeē quíji ini ñayiví, achí ña.

Jeē ni ndáhyū Jesús nuū yíndūji Lázaro

²⁸Te ná ni cahān ña súcuan, te cuahān-ni ña, cuacana yuhu ña cuhū ña María:

Maá Maestro ni quee yā, te cána ya rohó, achí ña.

²⁹Te jeē ní jini María jnúhun yáha, te yachí ni ndocuiñí ña, cuahān ña nuū yā. ³⁰Te ná tu quiví Jesús ñuu, chi ni ndōo-ni ya nuū ni jéjnahān Marta yā. ³¹Te ñayuu hebreo un jéē cáyucú ini vehe jíní María, jeē cacahān i jnúhun ndeyí ni jíní ña, ni cajito i jeē yachí ni ndocuiñí ña cuahān ña. Te ni candiquin i ña cuango i, chi cájeni ni i jeē cuándahyū ña nde nuū yíndūji ndíyí.

³²Yūcuán na te ni jinū María nuū íne Jesús, te ni jecuiñí yití ña nuū jehé yā, te ni cahān ña:

Núu ní íyo ní yáha, te ma cúu cuāha ná núú, achí ña.

³³Te ni jito Jesús jeē ndahyū ña jíní jéē cándahyū ñayuu vējicoo jíní ña. Te yōhyo ni nducuíhyá ni yā, te

ni jnahuhū ni yā jeē cundáhú ni yā i. ³⁴Te ni cajnúhun yá ña:

¿Ndé mí ní cachindūji ró de?

Te ni cacahān ña jíní yá:

Quíhín yō te cuni ní, achí ña.

³⁵Te ni ndahyū Jesús. ³⁶Yūcuán na te ni cacahān ñayuu hebreo un: Condēhe náa yōhyo maní de jíní ndíyí ún.

³⁷Te sava i chi ni cacahān i:

Tēe yáha jéē ní nanune de tinūu tée cuáá, ¿á tu ní cúu sáha de jeē ma cúu Lázaro nuú? achí i.

Jeē ní natecu Lázaro

³⁸Te yōhyo ni jnahuhū ni tucu Jesús, te ni quee yā nde nuū yíndūji ndíyí. Te ñin yaū cava cúu, te yuyáú un ndíhyú ñin yuū. ³⁹Te ni cahān yā:

Tejiyo yuū un jíníháhan ró, achí yá.

Te Marta, cuāha ndíyí un, ní cahān ña:

Je jéén xicō de, chi je ni cuu cuūn quiví yíndūji de.

⁴⁰Te ni cahān Jesús jíní ña:

¿A násūú je ni cahān rí jíní ró jeē núu candíje ró te coto ró jéē yōhyo cújéhnu Yaā Dios jíní poder yā? achí yá.

⁴¹Yūcuán na te ni catejiyo i yuū jeē ndési yuyáú ndíyí ún. Te ni ndacoto-ni Jesús ichi ándiví, te ni cahān yā:

Tátā, na cútahū na núu ni jéē sáha ní jéē jicán na. ⁴²Te jíní na jéē niní sáha ní jéē jicán na. Te jeē váha ñayuu cáhíin yáha cúu jeē súcuan cáhán na, návāha na cándíje i jeē maá ní ní tají sáña.

⁴³Te ná ni cahān yā súcuan, te ni cahān jee ya:

Lázaro, quenda quiji ró, achí yá.

⁴⁴Te ni quenda-ni tēe ni jihī ún, te ñúsúcún ndaha de s̄h̄in de jíin tira sahma. Te nuū de ñúsúcún iin sahma. Te ni cahān Jesús jíin i:

Nandají ró sahma ñúsúcún de, návāha cuu caca de, áchí yá. Te ni canandají i.

Jeē ní casquijnáhan de jnūhun jeē cáhni de Jesús

(Mt. 26.1-5; Mr. 14.1-2; Lc. 22.1-2)

⁴⁵Yūcuán na te cuehē ñayuu hebreo jeē ní quijicoo nuū María, ni cacandíje i Jesús, chi ni cajito i jniñu ni sáha ya. ⁴⁶Te sava i chi cuangoo i nuū tēe grupo fariseo, te ni cacastūhún i ndese ni sáha Jesús. ⁴⁷Yūcuán na te tēe fariseo un jíin sūtū cácujeñnu ni candutútú de junta jíin táca gá tēe cácujeñnu. Te ni cacahān de:

¿Ndese sáha yó? Chi tēe ún yōhyo cuehē jniñu jéñnu sáha de. ⁴⁸Te núu condēhé-ni yó, te ndivii ñayuu candíje i de. Te quijicoo táca tēe nación Roma jeē cácujeñnu, te canu de templo cáhnu yó, te scuíté núu de ñayuu nación yō, achí de jíijnáhan de.

⁴⁹Te iin jnáhan de jeē naní Caifás, jeē cúu máá sūtū cujeñnu ga cuiyā ún, ni cahān de:

Róhó chi tu cájini cuiti rō, ⁵⁰ni tu cájecūhun ni rō jeē váha ga jeē cúu iin tēe jehē ñayuu nación yō vēsú jeē náa ndivii i, áchí de.

⁵¹Te tu ní cáhán de jnūhun yáha jēe jéni ni maá de. Chi siquī jeē cúu de sutū cujeñnu ga cuiyā ún, te ni sáha Yaā Dios jíin de jeē ní nacani de jnūhun jeē cúu Jesús jehē ñayuu nación hebreo. ⁵²Te nasūu máá iin-ni jehē nación hebreo, chi

suni jehē ndivii ñayuu cácuu sēhe Yaā Dios jeē ní cajitē núu táca nación, návāha iin na cuu i jíijnáhan i. ⁵³Yūcuán na te nde quivī ún te táca tēe hebreo cácujeñnu un, ní casquijnáhan de jnūhun jeē cáhni de Jesús.

⁵⁴Jeē yūcuan tuá ní jíca ndijin yā nuū jnáhan ñuu yā hebreo un, chi ni quenda ya región Judea, te cuahān yā iin ñuu naní Efraín, nuū iyó yajni ñuhun téhé. Te ni condee yā yūcuan jíin tēe cáscuáha jíin yá.

⁵⁵Te ni cuyajni vico pascua jeē cánasáha ñayuu hebreo. Te cuehē ñayuu táca ñuu yūcuán cuángoo i ñuu Jerusalén, návāha squícu i jeē cahán ley jeē cúchi i ndundoo i nuū Yaā Dios, te sáá te quejéé vico pascua. ⁵⁶Te cánuanducú i Jesús, te cácajnūhun jnáhan i ini templo:

¿Ndese cájeni ni rō? ¿A quiji de vico, chí tuú? Achí i.

⁵⁷Te sutū cácujeñnu jíin tēe fariseo ni candacu de jniñu jeē núu ndé iin ñayuu jiní ndé nuū íne ya, te na cástūhún i, návāha jniñ de ya.

Jeē ní chuhun María perfume jehē Jesús

(Mt. 26.6-13; Mr. 14.3-9)

12 Te cúmani iñū gā quivī te coo vico pascua. Te ni jehēn tucu Jesús ñuu Betania nuū ndeé Lázaro, tēe ni jihī te ni nastécu yā de. ²Te ni casáha i iin vico xíní jeē yíñúhún i jíin yá. Te Marta ni jeni ña cohō. Te Lázaro yéji de staā jíin yá nuū mesa jíin táca gá ñayuu. ³Yūcuán na te María ni quee ña jíin nájnūhun sava litro aceite perfume jeē máni ita nardo cúu, te yōhyo yahu ndéé. Te ni

chuhun ña jehē Jesús, te ni nasíchí ña jíin ixi ña. Te ní ini vehe un ní chitú xícō perfume un. ⁴Yūcuán na te ni cahān Judas Iscariote sēhe Simón, iin tēe scuáha jíin yá un, te suu de cúu jeē nastúu de ya:

⁵¿Najehē tu ní cúyāhu perfume yáha jēē uní ciento denario, te cuāha yó núu ñáyuu ndahú núu. Achí de.

⁶Súcuan ni cahān de, nasūu jēē cundáhú ndije ni de ñayuu ndahú, chi sa suhva jeē cúu de tēe cuíhná. Chi máá de ndíso yijni xūhún, te quíhin cuíhná de jeē cájequin tāca tēe ún. ⁷Yūcuán na te ni cahān Jesús:

Ma stáhān rō ña. Chi jeē ni sáha ña yāhá cúu jeē ní sātūhva ña ruhū nde quivī jeē quíndūji ri. ⁸Chi níni cáyūcu ñáyuu ndahú jíin ró, te ruhū chi tuá condee rī jíin ró. Achí yá.

Jeē ní casquíjnáhan de jnūhun jeē cahni de Lázaro

⁹Te cuehē ñayuu hebreo ni cajini jnūhun i jeē néne ya ñuu Betania. Te ni jinūcoo i, te nasūu máá iin jeē cuní i coto i nuū Jesús, chi suni jeē cuní i coto i nuū Lázaro, tēe jeē ní nastécu yā. ¹⁰Yūcuán na te sutū cácujeñhu ni casquíjnáhan de jnūhun jeē suni cahni de Lázaro. ¹¹Chi jeē síquí Lázaro te ni cujiyo cuehē jnáhan ñuu de hebreo nuū de, te cácandíje i Jesús.

Jeē ni quivī Jesús Jerusalén

(Mt. 21.1-11; Mr. 11.1-11; Lc. 19.28-40)

¹²Te inga quivī ún, te ñayuu cuehē jeē ní quecoo vico pascua un, ní cajini jnūhun i jeē véji Jesús ñuu Jerusalén. ¹³Te ni cajehnde i ndaha

ñúu, te ni quendacoo i cuajnahān i ya. Te cácana jee i:

Yōhyo cújéñhu Yaā Dios. Yōhyo vāha Yaā cúu Yaā jeē véji jíin jniñu máá Jítóho yō Yaā Dios. Yōhyo vāha Yaā cúu Rey nación yō Israel. Achí i.

¹⁴Te ni nihīn Jesús iin burro, te ni jecosō yā tī, nájñūhun cáhān tutu ii:

¹⁵Ñayuu ñuu Jerusalén jeē naní ñuu Sion, ma yūhu ró jijnáhan ró.

Yāhá condēhe ró jeē véji Rey rō, te yósó yá iin burro.

Achí tutu.

¹⁶Te quivī ún te tēe cáscuáha jíin yá, tu ní cájecūhun ni de jeē súcuan squícu tāca jēē yosó núu tútu ii. Te nde ná ni ndujéñhu Jesús jeē cuánuhun yā andiví, te sáá te ni canucūhun ni de tāca jnúhun yósó síquī yā, jíin jēē ní casáha de súcuan jíin yá.

¹⁷Te ñayuu ní cahīin jíin yá ná ni cana ya xinī Lázaro nuū ní yíndūji de, te ni nastécu yā de, ni canacani i jnūhun ndese ni sáha ya.

¹⁸Jeē yúcuan ní quendacoo ñayuu cuehē un, ní jejnahan i ya, chi ni cajini jnūhun i jeē ni sáha ya jniñu jéñhu un jēē ni steén yā poder yā.

¹⁹Yūcuán na te ni cacahān máá tēe fariseo:

Vijna te je ni cajito yó jēē ma cúu cuitī gā casi yō. Chi jító yó jēē ndivii cuitī ñayuu cuango i jíin de. Achí de jijnáhan de.

Ñayuu nación Grecia nánducú i Jesús

²⁰Te sava ñayuu nación Grecia, suni ni quijicoo i ñuu Jerusalén vico pascua un jēē chiñúhún i Yaā

Dios. ²¹Te ni quecoo i nuū Felipe, tēe ñuu Betsaida ndañū Galilea. Te ni cacahān i jíin de:

Tátā, cáconi ná cahān na jíin Jesús, achí i.

²²Te ni jehēn Felipe, ni castūhún de nuū Andrés. Te ndindúú de cuacastūhún de nuū Jesús. ²³Te ni cahān Jesús jíin de:

Je ni quee quivī jeē ndujéhnu Yaā ní nduu tēe. ²⁴Te jendaá cahán rī jíin ró, ñin nunī trigo núu tú ñingava nuū ñūhun te quindūji, núu súcuan te quendōo máá ñin-ni. Te núu quindūji, te nacayā cuehē ndasí. Te suni súcuan cánuú cuu rī quindūji ri, návāha coo cuehē ñayuu jeē ndúu i sēhe Yaā Dios.

²⁵Te na-ni ñayuu núu tu jéhe i jnūhun ndoho i jeē siquí ruhū, te jnahnū ndetū i. Te ñayuu jeē jéhe i jnūhun ndoho i jeē siquí ruhū ini ñayīvi yáha, cotecu i níí cáni andiví.

²⁶Núu ndé ñayuu cuní i cuajññu i nuū rī, na cóndiquin i ruhū. Te nuū cóndee rī, suni yūcuán condee ñayuu jejnññu nuū rī. Te ñayuu jejnññu nuū rī, chi sáha Tátá rī jeē kujéhnu i.

Jeē ni cahān Jesús jeē cuu yā

²⁷Te vijna te cúcuíhyá ndasí ni rī sáha jnūndóho quiji siquí rī. ¿Te ndese cahān rī? ¿A cahān rī jíin Tátá rī: Jnama ní sáña núu jnūndóho jeē quiji siquí ná, achi rī? Ma cúu, chi jeē siquí yúcuan cúu jeē véji rī. ²⁸Tátā, stéén ni jéē kujéhnu ndasí ní jíin poder ni, achí yá.

Yūcuán na te ichi ándiví ní cahān ñin jnūhun:

Je ni steén rī jeē kujéhnu ri, te sáha tucu ri inga jínu, achí yá.

²⁹Te ni cajini ñayuu cáhiin yūcuán, te ni cacahān i jeē taja cáhán. Te sava ga i ni cacahān:

Ñin ndajéhé Yaā Dios ni cahān jíin yá.

³⁰Te ni cahān Jesús jíin i:

Tu ní cáhán jnūhun yáha jéē siquí ruhū, chi sa suhva návāha cuni rō siquí jnūhun jeē ni cáhán yā jíin rí. ³¹Vijna cúu jeē sándaā Yaā Dios siquí cuéchi ñayuu ñayīvi yáha. Vijna cúu jeē scúnu ya jexeén jeē ndácu jniñu ini ñayīvi yáha. ³²Te ruhū, núu na jínu condita caa ri cuu rī ini ñayīví, te sáha ri jeē jnāā tāca ñayuu quivícoo i ndaha ri, achí yá.

³³Súcuan ni cahān yā jeē steén yā ndese modo cuu yā. ³⁴Te ni cacahān ñayuu jíin yá:

Ni cajini sōho ná jéē cahán tutu ley Yaā Dios cánevāha yó, jeē Cristo cotecu yā níí cáni. ¿Te naun cáhán ni jéē Yaā ní nduu tēe, cánuú condita caa ya cuu yā? ¿Ndé ñin cúu máá Yáa ní nduu tēe núu súcuan? Achí i.

³⁵Yūcuán na te ni cahān Jesús:

Máá jecu na quiví condee rī jíin ró jeē cúu ri luz cundijin ini anuá rō. Núu súcuan te vijna jeē iyó gá luz rī jíin ró, te caca ró jíin, chi sanaa ni rō te cuahān rī, te nájñūhun quendōo ró núu néē. Chi ñayuu cájica nájñūhun nuū néē, tu cájini i ndé nuū cuángoo i. ³⁶Núu súcuan te níni ndéé gá ri jíin ró, te candíje ró rúhū jeē cúu ri luz, návāha nduu ró ñayuu cájica jíin luz, achí yá.

Súcuan ni cahān Jesús tāca jnūhun yáha, te cuahān-ni ya, te tuá ni steén yā maá yá nuū i.

Jeē tu ní cácandíje ñayuu hebreo jeē cúu ya Cristo

³⁷Te vésú cuehē jniñu jéhnu ni sáha Jesús jeē steén yā poder yā

nuū i, te tu ní cácandíje i ya. ³⁸Chi squícu nahín jnúhun ni cahān Isaías, tēe ni nacani jnúhun Yaā Dios nde jenahán:

Tátā Yaā Dios, tu ní cácandíje ñayuu jnúhun ni canacani ná, te tu ní cácandíje i jniñu jéhnú jeē ni stéén ni poder ni núū i. Achí Isaías. ³⁹Jeē yúcuau tu ní cúu candíje i, chi ni cahān tucu Isaías:

⁴⁰Ni sáha ya jeē nájñuhun cáhīyo cuáá ánuá i, jíín jéē cácanihni ni i, návāha coo nájñuhun jeē tu cájito i, te ni ma jécūhun ni i, ni ma násāma ini i quíivicoo i nuū rī, jeē nasávāha ri anuá i nuū cuéchi i.

Achí Cristo, achí tutu. ⁴¹Jnúhun yáha ní cahān Isaías, chi je ni jito de ndese yōhyo cújéhnú Jesús, te ni cahān de ndese coo quívī jeē quíji ya.

⁴²Te vēsú súcuau te cuehē ñayuu hebreo chi ni cacandíje i ya, te suni nde jíín sava tēe cándacu jniñu. Te tu ní cácachi de jeē cácandíje de ya, chi siquī jeē cáyūhú de tāca tēe fariseo. Chi núu súcuau te quenehen ún de ini vehe i sinagoga jeē ma cuáha ga jnúhun quíivicoo de. ⁴³Chi cácusī gā ni de jeē cújéhnú de sáha ñayuu, vēsú jeē cújéhnú de sáha Yaā Dios.

Jnúhun cáhán Jesús cúu jeē sándaā siquī ñayuu

⁴⁴Te ni cahān jee Jesús:

Ñayuu cácandíje ruhū, nasūu máñúhún-ni ruhū cácandíje i, chi suni cácandíje i nde maá Tátá rī,

Yaā ní tají rúhū. ⁴⁵Te ñayuu cájito nuū rī, suni cájito i nuū Yaā ní tají rúhū. ⁴⁶Maá rí jeē cúu ri luz cúndijin ini anuá ñayuu, ni quíji ri ini ñayīvi návāha tāca ñayuu cácandíje ruhū, ma cáca i nájñuhun nuū néē. ⁴⁷Te núu iin ñayuu jíín sōho i jnúhun cáhán rī, te núu tu jétáhú i, te nasūu rúhū sándaā siquī i. Chi tú vēji ri jeē ndénehen ri cuéchi siquī ñayuu ñayīví, chi sa suhva jeē jnáma ri i. ⁴⁸Te ñayuu jeē casquéhichī i ruhū te tu cájetáhú i jnúhun cáhán rī, íyó iin jeē sándaā siquī i. Suu tāca jnúhun jeē ni cáhán rī, jnúhun un cúu jeē ndenehen cuéchi siquī i quívī jíínu ñayīví. ⁴⁹Chi tu cáhán rī jeē cúu ni maá rí, chi Tátá rī, Yaā ní tají rúhū, maá yá ni ndacu jniñu nuū rī ndese cahān rī jíín ndese stéén rī. ⁵⁰Te jíín rī jeē jniñu ndácu Tátá rī sáha jeē cótecu ñayuu níí cáni. Núu súcuau te jnúhun cáhán rī, chi máni jnúhun jeē ní cachi Tatá rī cúu, áchi yá.

Jeē ní nacate ya jehē tēe cáscuáha

13 Te jehíni inga quívī te quejéé vico pascua. Te je jíín Jesús jeē ní quee quívī jeē quénda ya ñayīvi yáha quínuhun yā nuū Tatá yā. Te níni cúndáhú ni yā ñayuu maá yá jeē cáyūcú ini ñayīví. Te vijna jeē jíínu jeē íne ya ñayīví, te sáha ya iin jniñu jeē steén cají yá jeē cundáhú ni yā i.

²Te jexeén je ni squívi ini anuá Judas Iscariote sēhe Simón, jeē vijna nastúu de ya. ³Te jíín Jesús jeē vēji ya nuū Yaā Dios, te nuhūn yā nuū Yaā Dios, jíín jéē ni sáha Tátá yā jeē cújéhnú ya

siquī ndihi-ni. ⁴Te cúxini ya jíin tée cáscuáha jíin yá, te ni ndocuñī yā. Te ni stáa ya sahma ndíi ya, te ni jihni yā iin toalla chíji ya. ⁵Te ni chuhun ya ndute ini iin tijehēn. Te ni quejéé yá nácate ya jehē tée cáscuáha. Te násíchí yā jíin toalla jeē nuhní chíji ya.

⁶Te ni jinū yā nuū Simón Pedro.

Te ni cahān Pedro jíin yá:

¿Sa máá ní nacate jehē ná naún?

⁷Te ni cahān Jesús:

Tu jécūhun ni rō jeē sáha ri vijna, te cúcuéé gá te jecūhun ni rō.

⁸Te ni cahān Pedro jíin yá:

Ma nácate cuiti ni jéhē ná.

Te ni cahān Jesús:

Núu tú nacate ri jehē rō, te ma cúu cundúú rō jíin rí.

⁹Te ni cahān Simón Pedro:

Núu súcuan cúu te nasūu máá jéhē-ni ná, chi suni nacate ní ndaha ná jíin xíní ná, áchí de.

¹⁰Te ni cahān Jesús jíin de:

Tēe jeē sa ní jichi, tu jíni ñúhún ndundoo níí cáhnu de, chi máá jéhē-ni de, chi je íyó ndoo níí cáhnu de. Te máá rō chi je ni candundoo rō. Te tú ndihi rō cáhiyo ndoo.

¹¹Chi je jíni yā ndé iin de cúu jeē nastúu de ya, te jeē yúcuan ní cahān yā: Tú ndihi rō cáhiyo ndoo.

¹²Te nuū ni jínu ni nacate ya jehē de jíjnáhan de, te ni naquihin ya sahma ndíi ya, te ni nucōo tucu ya nuū mesa. Te ni cahān yā:

¿A cájecūhun ni rō na vé cuní cahān jeē ni sáha ri jíin rō?

¹³Cácahān rō jeē Maestro jíin Jítóho rō cúu ri, te ndaā cácahān rō, chi suu ndije cúu ri. ¹⁴Núu súcuan te vēsú Maestro rō jíin Jítóho rō cúu ri, te ni nacate ri jehē rō jíjnáhan

ró, te suni súcuan cánuú jéē nacate máá rō jehē jnáhan rō. ¹⁵Chi jniñu yáha ni sáha ri jeē steén rī nuū rō jeē suni súcuan sa cuajniñu rō núu jnáhan rō, nájnūhun sa máá rí ni jejniñu ri nuū rō. ¹⁶Jendaá cahán rī jíin rō jeē iin mozo tu cújéhu de nuū patrón de, te tée jíca jniñu táhú nuū de, te cújéhu de nuū tée ni tají de. Te máá rō cácuu mozo rī, te na cuajniñu rō núu jnáhan rō nájnūhun ni steén rī nuū rō. ¹⁷Te núu ni cajecūhun ni rō jnūhun yáha, te yōhyo ndetū rō te núu squícu rō.

¹⁸Te nasūu jéē cahán rī jeē ndihi rō ndetū, chi je jíni rī tāca róhó jéē ní nacāji ri. Te cánuú squícu jnūhun yáha jeē cáhán tutu i: Tēe yéji staā jíin rí, ni ndiō cuñí de siquī rī, achí tutu. ¹⁹Te vijna te je cástūhun rí tāca jéē yáha núu rō nde ná tu coo, návāha núu na cóo, te candíje rō jéē maá rí cúu Yaā ní tají Yaā Dios. ²⁰Jendaá cahán rī jíin rō jeē na-ni ñayuu jeē cuatáhu i tāca jéē tají rí, te ruhū jetáhu i. Te ñayuu jetáhu rúhū, suni jétáhu i Yaā ní tají rúhū vēji ri, achí yá.

Jeē ní cachi yā jeē nastúu Judas yā

(Mt. 26.20-25; Mr. 14.17-21; Lc. 22.21-23)

²¹Te ná ni cahān Jesús tāca jnūhun yáha, te ni cucuíhyá ndasí ni yā. Te ni cahān cají yá:

Jendaá cahán rī jíin rō jíjnáhan rō jéē iin máá rō nastúu ruhū, achí yá.

²²Yūcuán na te tée cáscuáha jíin yá, ni candacoto de nuū jnáhan de, cájeni ni de ndé iin de cúu jeē ni cáhān yā. ²³Te iin máá tée scuáha jeē maní gā yā jíin, néne de xiin ya mesa jeē cácuixini de jíin yá. ²⁴Te ni sáha Simón Pedro seña nuū de jeē

na cajnūhún de ya ndé ìn de cúu jeē ní cáhān yā. ²⁵Yūcuán na te tēe un ní scáyì de máá de nuū Jesús, te ni cajnūhún de ya:

¿Ndé ìn de cúu? áchí de jíín yá.

²⁶Te ni cahān Jesús:

Na chūndaji ri staā te cuāha ri nuū ìn de, te suu tēe un cúu, áchí yá.

Te ni chundaji ya staā, te ni jēhe ya nuū Judas Iscariote sēhe Simón.

²⁷Te jeē ní quihín de staā ún, te ni quīvi-ni Satanás ini anuá de. Yūcuán na te ni cahān Jesús jíín de:

Jniñu jeē sáha ró, na sáha yachī rō.

²⁸Te ni ìn tēe cáyeji staā jíín yá, tu ní cájecūhun ni de naun ni cahān yā súcuan jíín de. ²⁹Chi sava de cájeni ni de jeē ni cáhān Jesús jíín Judas jeē cuāan de jeē jíni ñúhún yá vico ún, chí jēe cuáha de jecu xūhun núu ñayuu ndahú. Chi máá de ndíso yíjñi xūhún. ³⁰Te jeē ní yeji de staā ún, te ni quenda-ni de cuahān de. Te je ni cuaa.

Jeē ní ndacu ya jniñu jée

³¹Yūcuán na te jeē cuahān Judas te ni cahān Jesús:

Vijna te ruhū, Yaā ní nduu tēe, stéén rī ndese cújéhnū ri, te suni jíín rúhū te cuni ñayuu ndese cújéhnū Yaā Dios. ³²Te núu jíín rúhū cuni ñayuu ndese cújéhnū Yaā Dios, núu súcuan te suni stéén Yaā Dios ndese cújéhnū ruhū jeē cúu ri Sēhe ya. Te yachī-ni stéén yā. ³³Séhē, tuá nahán condee rī jíín ró jijnáhan ró. Te nanducú ró ruhū, te nájnūhun ni cahān ri jíín táca jnáhan yó hebreo, suni súcuan cáhān ri jíín ró vijna, jeē ma cúu

jiniñu ró núu quihín rī. ³⁴Te vijna te ndácu ri ìn jniñu jée núu rō, jeē na cúndáhú ni rō jnáhan ró. Nájnūhun cúndáhú ni rī rohó, suni súcuan na cúndáhú ni rō jnáhan ró. ³⁵Te núu cúndáhú ni rō jnáhan ró, súcuan te cuni táca ñáyuu jeē cácuu ró tēe cácuáha jíín rí, achí yá.

Jeē ní cachi yā jeē yūhu Pedro cahān de jeē jíni de ya

(Mt. 26.31-35; Mr. 14.27-31; Lc. 22.31-34)

³⁶Te ni cahān Simón Pedro jíín yá:

¿Ndé nuū quihín ni núu súcuan?

Te ni cahān Jesús:

Nuū quihín rī chí ma cúu condiquín rō ruhū vijna, te cúcuéé gá te jinū rō.

³⁷Te ni cahān Pedro:

¿Najehē ma cúu condiquín na níhín vijna? Tu yúhú ná cuu na jée siquí ni.

³⁸Te ni cahān Jesús:

¿A jéni ni rō jeē tu yúhú ró cuu rō jeē siquí rí? Jendaá cahān rī jíín ró jeē nde ná tu cana líhli, te uní jínu yūhu ró te cahān rō jeē tu jíni ró ruhū. Achí yá.

Jesús cúu ichi jeē jinú yō nuū Tatá yā

14 Te ni cahān gā yā: Ma cucuíhyá ni rō siquí táca jnúndóho. Na cándíje ró jée sáha Yaā Dios jehē rō, te suni na cándíje ró jée sáha ri jehē rō. ²Chi nuū ndeé Tátá rī, íyó cuéhē vehe condee rō jijnáhan ró. Te núu jeē tu súcuan íyó, te je ni castūhun rī nuū rō nuú. Núu súcuan te quihín rī quisátūhva rī nuū cóyūcu ró. ³Te jeē quihín rī sátūhva rī nuū cóyūcu

ró, te ndiji ri quinaquihin ri rohó quihín yō, návāha suni coyūcu ró nuū cóndee maá rí. ⁴Te je cájini rō ndé nuū quihín rī, te cájini rō ndese jinū rō yūcuán. Achí yá.

⁵Te ni cahān Tomás jíin yá:

Tu cájini na ndé nuū quihín ni, ¿te ndese cuni ná ichi jínú yūcuan núu súcuan?

⁶Te ni cahān Jesús jíin de:

Máa rí cúu ichi jinū rō andiví, te máa rí cúu jnūhun ndaā jíin jnūhun cotecu rō níí cáni. Te ni ĩin ma jinū nuū Tatá rī te núu tú ruhū. ⁷Te núu je ni cajini rō ruhū, te suni je ni cajini rō Tatá rī núu súcuan. Te ndé vijna je cájini rō yā, chi je ni cajito ró núu rī, achí yá.

⁸Te ni cahān Felipe jíin yá:

Stéén ni Tatá ni núu ná, te na cúvāha ni na jíjnáhan ná, áchí de.

⁹Te ni cahān Jesús:

Felipe, je ni cuu cuehē quiví jica ri jíin ró jijnáhan ró, ¿te á ná tu cuni rō ndé ĩin cúu ri naún? Tēe jeē jito ruhū, suu Tatá rī jito de. Núu súcuan ¿te najehē cahán rō jeē steén rī Tatá rī nuū rō? ¹⁰¿A tu cándíje ró jéé ĩin-ni cúu ri jíin Tatá rī, te Tatá rī ĩin-ni cúu ya jíin rí? Tāca jnūhun cáhán rī jíin ró, nasūu jnūhun máa rí cúu. Chi Tatá rī jeē ĩin-ni cúu ya jíin rí, máa yá sáha tācá jniñu jeē sáha ri. ¹¹Candíje ró jíjnáhan ró jéé ĩin-ni cúu ri jíin máa Tatá rī, te Tatá rī ĩin-ni cúu ya jíin rí. Te núu tu cájecūhun ni rō, te cándíje ró rúhū siquī tācá jniñu sáha ri. ¹²Jendaá cahán ri jíin ró, núu ndé ñayuu cándíje ruhū, jniñu jéhnu jeē sáha ri yāhá, suni sáha i. Te jéhnu ga jniñu sáha i vesú yāhá, chi quinhun rī nuū ndeé Tatá rī.

¹³Te tācá na-ni vé cacán rō nuū Tatá rī siquī jeē cácdíje ró jéé cúu ri Sēhe ya, te sáha ri jeē cacán rō, te súcuan steén rī jeē yóhoyo cújéhnu Tatá rī. ¹⁴Chi tācá na-ni vé cacán rō siquī jeē cácdíje ró rúhū, te sáha nahín rí.

Jeē ni jéjnūhun ya jeē tají yá Espíritu Santo

¹⁵Te núu maní rō jíin rí jijnáhan ró, te na squícu ró jniñu ndácu ri nuū rō. ¹⁶Te cacān tahu rī nuū Tatá rī, te tají yá ĩnga Yaā chindéé ñáhán rōhó, te sáha ya jeē cóo siĥ ni rō jijnáhan ró. Te Yaā un cúu máa Espíritu jeē steén jnūhun ndaā, te condee yā jíin ró níí cáni. ¹⁷Te ñayuu ñayiví má cúu cuatáhú i ya, chi tu cúu coto i nuū yā, ni tu cúu cuni i ndese Yaā cúu ya. Te máa ró chi je cájini rō ndese Yaā cúu ya, chi ndeé yá jíin ró, te condee yā ini anuá rō níí cáni. ¹⁸Ma stóo uun ri rohó, chi ndiji ri nuū rō. ¹⁹Jecu na quiví te ma cóto ga ñayuu ñayiví núu rī. Te máa ró jijnáhan ró chi coto ró núu rī, chi cotecu rī níí cáni, te jeē yúcuun suni cotecu maá ró. ²⁰Te quiví ún te cuni rō jeē ĩin-ni cúu ri jíin Tatá rī, te máa ró ĩin-ni cúu ró jíin rí jeē ndeé rí ini anuá rō jijnáhan ró. ²¹Te na-ni ñayuu núu ñūhun ni i jniñu ní ndacu ri, te squícu i, ñayuu un cúu jeē maní ndije jíin rí. Te ñayuu jeē maní jíin rí, suni coo maní Tatá rī jíin i. Te suni ruhū coo maní rī jíin i, te steén rī nuū i jeē nduú rí jíin i. Achí yá.

²²Te ni cahān Judas jíin yá (te nasūu tée cúu Iscariote):

Najehē cúu jeē steén ni máa ní nuū ná, te nuū ñayuu ñayiví chi tuú?

²³Te ni cahān Jesús:

Ñayuu jeē maní jíin rí, chi cásquicu i jeē cahán rī. Te coo maní Tatá rī jíin i. Te Tatá rī jíin máá rí quiijoo ri cundúú rí jíin i. ²⁴Te ñayuu jeē tú maní jíin rí, tu cásquicu i jeē cahán rī. Te jnūhun cájini sōho ró cáhán rī, nasūu jnūhun máá rí cúu, chi jnūhun máá Tatá rī jeē ní tají rúhū cúu.

²⁵Tāca jnūhun yáha cáhán rī jíin ró níni íne ga rī jíin ró. ²⁶Te Tatá rī chi tají yá Espíritu Santo, quiji nucuíñi nuū rī. Te máá yá chindéé ñáhán yá rohó, te sáha ya jeē cóo síi ni rō. Te stéén yā tāca jnūhun nuū rō, te nacachi tucu ya tāca jéé ni cáhán rī jíin ró.

²⁷Te jeē quihín rī, te sáha ri jeē cóo ndeyí coo síi ni rō. Nájñūhun íyó ndeyí síi ni maá rí, suni súcuan coo ndeyí síi ni rō sáha ri. Te jeē sáha ri jeē cóo ndeyí síi ni rō, tu quíjnáhan jíin jnūhun ndeyí cácahān ñayuu ñayívi. Ma cucuíhyá ni rō siquī tāca jnúndóho, te ni ma yūhu ró. ²⁸Je ni cajini sōho ró jéé ni cáhán rī jeē quihín rī, te ndiji ri cundúú rí jíin ró. Te núu cáhiyo maní vāha ró jíin rí, te cusíi ni rō jeē ni cáhán rī jeē nuhún rī nuū Tatá rī. Chi cújéhnū ga Tatá rī vijna vésū ruhū. ²⁹Je ni castūhun rí nuū rō tāca jnūhun yáha nde ná tu coo, návāha núu je ni cuu, te candíje ró rúhū jijnáhan ró.

³⁰Ma cahán rī cuehē gā jnūhun jíin ró, chi je vēji jexeén jeē ndácu jniñu ini ñayívi yáha. Te tú na vé cúu sáha siquī rī nuú. ³¹Te na cóo nájñūhun ni ndacu Tatá rī jniñu nuū rī, návāha cuni ñayuu ñayívi jéé maní rī jíin Tatá rī, te

sáha ri jniñu ní ndacu ya. Ndocuíñi jijnáhan ró na quíngoo yó. Achí yá.

Jesús cúu nájñūhun yoyúcu uva

15 ¹Máá rí cúu nájñūhun yoyúcu uva váha ndaā, te Tatá rī cúu nájñūhun tēe ndíto yoyúcu uva un. ²Te máá ró chi cácuu ró nájñūhun ndaha, te núu tu jéhe ró ndéhē te quende yā rohó. Te núu cácuu ró nájñūhun ndaha jeē jéhe ndehē, te nasándoo ya nacahnde yā rohó nájñūhun jeē cúu ró ndaha ún, návāha cuāha ró cuehē gā ndehē. ³Te máá ró chi je ni candundoo ánuá rō jíin jnūhun ni steén rī nuū rō, nájñūhun ndúndoo ndaha uva. ⁴Na cundúú ró jíin rí, te suni máá rí cundúú rí jíin ró. ĩn ndaha uva ma cúu cuāha ndehē jeē maá, te núu tu yíjnī jicā yóho. Te suni súcuan máá ró, ma cúu sáha ró jniñu váha te núu tu cundúú ró jíin rí.

⁵Máá rí cúu yoyúcu un, te máá ró cácuu ndaha ri. Ñayuu jeē nduú jíin rí, te ruhū ndúú rí jíin i, máá i cúu nájñūhun ndaha jeē jéhe cuehē ndehē. Chi núu tú cundúú ró jíin rí, te tú cuiti na jniñu váha cuu sáha ró. ⁶Ñayuu jeē tu cundúú jíin rí, quende yā i nájñūhun ĩn ndaha uva, te ichī. Te ndoho i nájñūhun ndaha uva un jéé ndutútú te cayū nuū ñuhún.

⁷Núu ndúú ró jíin rí, te cáñuhun ni rō jnūhun cáhán rī, yūcuán na te cacān rō na-ni vé cácuni rō, te sáha ri jeē cácahān rō. ⁸Te núu cásáha ró cuehē jniñu váha, súcuan cástéén rō jeē cúu ndije ró ñayuu cascuáha jíin rí, te súcuan nácuni ñayuu jeē yóhoyo cújéhnū Tatá rī. ⁹Nájñūhun

manī Tatá rī jíin rí, suni súcuan manī rī jíin ró jijnáhan ró. Núu súcuan te ma siaá rō jnūhun manī rī jíin ró. ¹⁰Núu squícu ró jniñu ní ndacu ri nuū rō, te níni coo manī rī jíin ró, nájnūhun máá rí squícu ri jniñu ní ndacu Tatá rī nuū rī, te níni íyó mání yā jíin rí.

¹¹'Súcuan ni cahān rī jíin ró návaha coo siñ ni rō nájnūhun íyó siñ ni rī, chi nde cusíñ teyí ni rō. ¹²Te yāha cúu jniñu ndacu ri nuū rō jijnáhan ró: jeē na cúndáhú ni rō jnáhan ró nájnūhun cúndáhú ni rī rohó. ¹³Núu ñin tēe cuu de jehē amigo de, te tuá na vé cúmanī gā sáha de jeē cundáhú ni de amigo de. ¹⁴Te máá ró cácuu amigo rī núu squícu ró jniñu ndacu ri nuū rō. ¹⁵Ma cahān gā rī mozo jíin ró, chi ñin mozo tu cástūhún patrón nuū i ndese jéni ni de sáha de. Chi sa suhva amigo cahān rī jíin ró, chi je ni castūhun rí nuū rō tāca jnúhun ni cahān Tatá rī jíin rí. ¹⁶Máá rí ni nacāji rohó jēē jnáma ri rohó, te nasūu máá ró ni cánacani ni xihna gā jeē cóndiquín rō ruhū. Te ni jeni rī rohó jēē caca ndaā rō te scándíje ró cuéhē ñayuu jeē cuu i sēhe ri níñ cáni. Te súcuan te ndíhi jeē cacán rō nuū Tatá rī siquí jeē cácandíje ró rúhū, sáha ya jeē jicán rō. ¹⁷Te yāha cúu jniñu ndacu ri nuū rō: jeē na cúndáhú ni rō jnáhan ró.

Jeē cáquitī ni ñayuu ñayiví núu Jesús jíin núu ñayuu cácandíje

¹⁸Te núu cáquitī ni ñayuu ñayiví núu rō jijnáhan ró, te je cájini rō jeē xihna gā nuū máá rí ni caquitī ni i. ¹⁹Te núu jeē íyó gá rō jíin modo ñayuu ñayiví, te coo manī ñayuu

ñayiví jíin ró nuú, nájnūhun manī i jíin jnáhan i. Te ni nacāji ri rohó jēē tuá coo ró jíin modo ñayuu ñayiví. Te jeē yúcuan cáquitī ni i nuū rō, chi tuá cácuu ró cuenta ñayiví. ²⁰Nucūhun ni rō jnūhun ni cahān rī jíin ró: Núu tu íyó yíñūhún ñayuu nuū patrón, te nagā ni cuu nuū mozo de. Núu ni cajito xeēn i ruhū, te suni súcuan coto xeēn i rohó jēē cácuu ró mozo rī. Te núu jeē ni cájetáhú i jnūhun ni steén rī, te suni cuatáhú i jnūhun cástéén rō. ²¹Te tāca jniñu yáha sáha i jíin ró jeē siquí ruhū, chi tu cájini i Yāa ní tají rúhū vēji ri.

²²'Núu jeē tu ní quíji ri nacani ri jnūhun nuū i, te ma cóo cuēchi i núu. Te vijna chi ma cúu ga cahān i jeē tu jíin i jeē íyó cuēchi i. ²³Ñayuu jeē cáquitī ni nuū rī, suni nuū Tatá rī cáquitī ni i. ²⁴Núu jeē tu ní sáha ri jniñu jéhu nuū i jeē ní ñin tēe tu ní sáha de súcuan, te ma cóo cuēchi i núu. Te vijna je ni cajito i jniñu ún, te vēsú súcuan te cáquitī ni i nuū rī jíin núu Tatá rī. ²⁵Te súcuan cásáha i návaha squícu jnūhun yósó núu tútu ley Yāa Dios jeē cánevāha i: Ni caquitī ni i nuū rī, vēsú tú na cuēchi ri, achí.

²⁶'Te tají rí maá Yāa chindéé ñáhán rohó te sáha ya jeē cóo siñ ni rō. Te Yāa un cúu máá Espiritu jeē steén jnūhun ndaā, te quiji ya nde nuū Tatá rī, te nacani cáji yá jnūhun ri. ²⁷Te suni máá ró nacani ró jnúhun ri, chi je cáhiin ro jíin rí nde ná ni quejéé rí nácani ri jnūhun.

16 'Tāca jnúhun yáha ní cahān rī jíin ró návaha ma náyūhu ró jeē quíji jnūndóho.

²Chi quenehen i róhó jéē ma cuáha ga i jnúhun cone ró táca vehe i sinagoga. Te quee quivī jeē cahni i róhó, te cani ni i jeē iin jniñu váha ni sáha i nuū Yaā Dios. ³Te súcuan sáha i jíin ró, chi tu cájini cuiti i máá Tátá rī ni máá rí. ⁴Te ni cahān rī jnúhun yáha jíin ró návāha núu je ni quee quivī jeē súcuan coo, te nucūhun ni rō jeē jé ni cahān rī jíin ró.

Jniñu sáha Espíritu Santo

Te tu ní cáhān rī jnúhun yáha jíin ró nde xihna nūhún, chí íne máá rí jíin ró jijnáhan ró. ⁵Te vijna chi nuhūn rī condee rī jíin Yaā ní tají rúhū vēji ri. Te ni iin ró tu cájnūhun ró ndé nuū quihín rī. ⁶Chi máá jéē cácuquíhyá ndasí ni rō jeē ni cáhān rī súcuan jíin ró. ⁷Jendaá cahān rī jíin ró: Jeē váha máá ró jijnáhan ró cúu jeē quihín rī. Chi núu tú quihín rī, te ma quíji Yaā chindéé ñáhán róhó te sáha ya jeē cóo sīi ni rō. Te núu cuahān rī, te tají rí yā quíji ya nuū rō. ⁸Te jeē quée yā, te stéén yā nuū ñáyuu ñayiví jéē iyó cuéchi i, jíin ndese quivícoo i ichi ndaā, jíin jéē sándaā Yaā Dios siquī cuéchi i. ⁹Stéén yā jeē iyó cuéchi i, chi tu cácandíje i ruhū. ¹⁰Te stéén yā siquī ichi ndaā, chí máá rí nuhūn rī nuū Tatá rī, te ma cóto ga rō nuū rī. ¹¹Te stéén yā siquī jeē sándaā Yaā Dios cuéchi ñayuu, chí je ni cundaā jeē jnahnú ndetū máá jéxeén jeē cujéhu ni ñayiví yáha.

¹²Te íyó cuéhē gā jnúhun cúní rī cahān rī jíin ró, te ma cúu jecūhun ni rō vijna. ¹³Te jeē quée máá Espíritu jeē stéén jnúhun ndaā, te

máá yá steén táca jnúhun ndaā un núu rō. Chi ma cahān yā jeē maá yá, chí cahān yā táca jéē jíni sōho ya cahān Yaā Dios. Te stéén yā siquī táca jniñu jeē coo. ¹⁴Te stéén yā jeē cujéhu ri, chí nacastūhun yá nuū rō táca jnúhun jeē jé ni cahān rī, te sáha ya jeē jécūhun ni rō. ¹⁵Ndihí ndese cújéhu Tátá rī, suni súcuan cújéhu máá rí. Jeē yúcuan ní cahān rī jeē Espíritu Santo nacastūhun yá nuū rō táca jnúhun jeē jé ni cahān rī, te sáha ya jeē jécūhun ni rō jijnáhan ró.

Vēsú cácuquíhyá ni rō, te ndusiī ni rō

¹⁶Jecu na te ma cóto ga rō nuū rī. Te jecu tucu quivī te coto tucu ró núu rī, chí quínuhun rī nuū ndeé Tátá rī. Achí yá.

¹⁷Yūcuán na te sava tēe cáscuáha jíin yá, ni cacajnūhun jnáhan de:

¿Na jnúhun cúu jeē yáha jeē cahān yā jíin yó? Chí áchí yá jeē jecu na te ma cóto ga yō nuū yā, te jecu tucu quivī te coto tucu yó núu yā, chí siquī jeē quínuhun yā nuū ndeé Tátá yā. ¹⁸¿Na jnúhun cúu jeē yáha jeē cahān yā, jecu na? Tu cájecūhun ni yō na vé cúu jeē cahān yā. Achí de.

¹⁹Te ni jini Jesús jeē cácuni de cajnúhún de ya. Te ni cahān yā jíin de:

¿A cácajnūhun jnáhan ró na vé cúu jeē ní cahān rī jíin ró jeē jecu na te ma cóto ga rō nuū rī, te jecu tucu quivī te coto tucu ró núu rī? ²⁰Jendaá cahān rī jíin ró jeē ndahyū rō jijnáhan ró te cucuíhyá ni rō, te ñayuu ñayiví chí sa cusīi ni i. Te vēsú cucuíhyá ni rō, te sa ndusiī ni rō jeē cóto tucu ró núu rī.

²¹Īn ñahan núu cuacuyajni scácu ña, te jéhnde chíji ña, chí je ni quee hora jeē scácu ña. Te núu je ni scácu ña sūchi lúlí, te tuá nahán ña jeē ní ndoho ña, chí cúsī ni ña jeē ní cacu sēhe ña. ²²Te suni súcuan cúu jeē cándoho ró vijna, chí cácuquíyá ni rō jíin rí. Te jecu-ni quivī te coto jnahan tucu yó, te cusī ndasí ni rō. Te ni ĩn ma cúu casi jeē cúsī ni rō.

²³Te quivī ún chí tú na vé cacān gā rō nuū rī. Chí jendaá cahán rī jíin ró jeē nuū maá Tátá rī cacān rō, te sáha ya ndīhi jeē cájicān rō, siquī jeē cávandíje ró rúhū. ²⁴Nde vijna te ná tu cacān rō nuū Tátá rī jeē jíin síhví rí. Te vijna te na quéjéé ró cacān rō jíin síhví rí, te nihīn rō, návāha cusī ndasí ni rō.

Je ni quende yā poder ndīhi jeneé cáhīyo ini ñayiví

²⁵Tāca jnūhun yáha ní cahān yatá rí jíin ró. Te quee quivī jeē ma cahán yatá gā rī jíin ró, chí sa suhva castūhun cájī rí nuū rō siquī Tátá rī. ²⁶Te quivī ún chí cacān rō nuū Tátá rī siquī jeē cávandíje ró rúhū. Te tu cáhán rī jíin ró jeē cacān tahú rī jehē rō nuū Tátá rī. ²⁷Chí máá Tátá rī je cúndáhú ni yā rohó siquī jeē cáhīyo manī rō jíin rí, te ni cacandíje ró jéē ndé nuū maá yá vēji rí. ²⁸Ni quenda rī nde nuū Tátá rī, te ni quee rī ini ñayiví. Te vijna te quenda rī ini ñayiví, te nuhūn tucu rī nuū Tátá rī. Achí yá.

²⁹Te ni cacahān tēe cáscuáha jíin yá:

Vijna te cáhán cají ní, te tuá cahán yatá ní. ³⁰Vijna te cájini na jéé jiní ni ndivii cuiti, te tuá jini

ñúhún jeē cájnūhún ni ĩn ná níhín. Jeē yúcuan cávandíje ná jéē vēji ní ndé nuū Yaā Dios. Achí de.

³¹Te ni cahān Jesús jíin de:

¿A ndé vijna te cávandíje ró naún? ³²Te quiji quivī, te je ni quee, jeē cuité núu ró quínungoo ró ná vehe ná vehe ró, te stóo máñúhún ró ruhū. Te nasūu jéē quéndōo máñúhún rí, chí Tátá rī íne ya jíin rí. ³³Tāca jnūhun yáha ní cahān rī jíin ró návāha coo ndeyí coo sí ni rō siquī jeē cávandíje ró rúhū. Ini ñayiví chí cánúu coto ró jnúndóho. Te vēsú súcuan te na cóo sí ni rō, chí je ni quende rī poder tāca jenéé cáhīyo ini ñayiví. Achí yá.

Jeē ni jicān tahú Jesús jehē ñayuu cávandíje

17 Te ná ni cahān Jesús tāca jnūhun yáha, te ni ndacoto ya ichi ándiví, te ni cahān yā:

Tátā, je ni quee quivī jeē ndóho ná. Vijna te stéén ni jéē cujéhnú máá ná jeē cúu ná Séhe ní, návāha suni máá ná steén na jéē cujéhnú máá ní. ²Chí ni sáha ní jéē ndíso jníñu ná síquī tāca ñayuu, návāha tāca ñayuu jeē ni jéhe ní núu ná, cotecu i ní cáni sáha ná. ³Te suhva cúu jnūhun cotecu i ní cáni: suu jeē na cúni i níhín jéē mañúhún-ni ní cúu Yaā ndaá, jíin jéē cúni i saña jeē cúu ná Jesucristo, Yaā ní tají ní.

⁴Je ni steén na núu ñayuu ñayiví jéē cujéhnú ní, te je sínu ná jniñu ní ndacu ní núu ná. ⁵Te vijna, Tátā, sáha ní jéē ndujéhnú tucu ná ndé nuū néne ní, nájnūhun cújéhnú ná jíin ní nde ná tu jecōo ñayiví.

⁶Ñayuu jeē ní nacāji ní ini ñayiví, ni jéhe ní i nuū ná, te ni steén na

nūū i ndese Yaā cúu ní. Cuenta maá ní cúu i, te ni jēhe ní i nuū ná. Te ni cajetáhú i jnūhun ní, te ni casquícu i. ⁷Te vijna te cájini i jeē ndé nuū maá ní vēji tāca jēē iyó jíín ná. ⁸Chi tāca jnūhun ni cahān ni jíín ná, ní castūhun ná nūū i, te ni cajetáhú i. Te ni cajini i jeē ní quenda ndije ná ndé nuū maá ní, te ni cacandíje i jeē maá ní ni tají sāña.

⁹Te jícán tahu na jéhē maá i jíínáhan i. Tu jícán tahu na jéhē ñáyuu ñayīvi jēē tu cácandíje, chi sa jehē maá ñáyuu ni jēhe ni nūū ná, chi cuenta maá ní cácuu i. ¹⁰Te tācá i jeē yíhi i ndaha máá ná, suni cuenta maá ní cúu. Te tācá i jeē cúu i cuenta maá ní, suni cuenta maá ná cúu i. Te cástéén i ndese cújéhnú ná.

¹¹Te tuá condee ná ini ñayīvi. Te máá i chi quendōo i ini ñayīvi, te máá ná chi najeē ná condee na jíín ní. Yaā iī Yaā ndoo cúu ní, Tātā. Te jíín poder ní condito ní táca ñáyuu ni jēhe ni nūū ná, návāha inuú na cóo ni i jíínáhan i, nájnūhun cúu máá yó. ¹²Te jeē ní condee na jíín i ini ñayīvi, te jíín poder ni ní condito ná i. Tāca ñáyuu ni jēhe ni nūū ná, ni condito yúcún ná i. Te tu ní jēhe na jnūhun naa i jíínáhan i, chi máá iin-ni tēe jeē je cúu de tēe jnahnū ndetū, návāha squícu jnūhun yósó nūū tútu iī.

¹³Te vijna te najeē na nūū ní, te cáhán na táca jnūhun yáha jíín i níni jēē íne ga ná ini ñayīvi, návāha na cóo sīī ndasí ni i nájnūhun cúsiī ni maá ná. ¹⁴Ni castūhun ná jnūhun ní nūū i. Te ni caquítī ni ñáyuu ñayīvi nūū i, chi tuá cácuu i cuenta ñayīvi, nájnūhun máá ná

tu cúu ná cuenta ñayīvi. ¹⁵Te tu jícán tahu na jēē quénehen ní i ini ñayīvi, chi sa suhva jeē cóndito ní i nuū jexeén. ¹⁶Nasūu cuenta ñayīvi cácuu i, nájnūhun máá ná jēē násūu cuenta ñayīvi cúu ná. ¹⁷Jíín jnūhun ndaā ní te sáha ní jēē coo ndoo coo iī i nuū ní. Tāca jnūhun cáhán maá ní cúu jnūhun ndaā. ¹⁸Te nájnūhun ni tají ní sāña ní quiji ná ini ñayīvi, suni súcuan tají ná i nacani i jnūhun ní nūū ñáyuu ñayīvi. ¹⁹Te jehē maá i cúu jeē jēhe ná máá ná cuu ná, návāha suni máá i coo ndoo coo iī i nuū ni jēē jíín jnūhun ndaā.

²⁰Te nasūu máá iin-ni jehē ñáyuu yáha jícán tahu na, chi suni jehē tāca gá ñáyuu jeē candíje i sāña nūu na cúni sōho i jnūhun jeē nácani máá i jíínáhan i. ²¹Te jícán tahu na jēē inuú na cóo ni i jíínáhan i. Nájnūhun iin-ni cúu ní jíín ná, Tātā, te iin-ni cúu ná jíín máá ní, suni súcuan na cóo inuú i jíín yó. Te cúni na jēē inuú na cóo ni i, návāha na cándíje ñáyuu ñayīvi jēē maá ní ni tají ní sāña. ²²Ni sajuhnu ná i nájnūhun ni sajuhnu ní sāña, návāha inuú na cóo ni i, nájnūhun inuú-ni cúu yó. ²³Te ndúú ná jíín i, te ndúú ní jíín ná, te súcuan te inuú cuítī coo ni i jíínáhan i. Yūcuán na te cuni ñáyuu ñayīvi jēē maá ní ní tají ní sāña, jíín jēē maní ndasí ní jíín i nájnūhun maní ni jíín ná.

²⁴Tātā, máá ní ni jēhe ní i nuū ná. Te cúni na jēē cóyūcú i jíín ná nuū cóndee ná, návāha coto i ndese luu cújéhnú ná ni sáha ní. Chi íyó maní ndasí ní jíín ná nde ná tu jecōo ñayīvi te nde vijna. ²⁵Yaā ndaā cúu ní, Tātā, te ñáyuu ñayīvi tu jíín i

níhín, te máá ná chi jíní na níhín. Te ñayuu yáha chi cájini i jeē maá ní ni tají sáña. ²⁶Ni steén na núū i jíjnáhan i ndese Yaā cúu ní. Te stéén gā na súcuan nuū i, návāha na cóo manī ndasí i jíin jnáhan i, nájnūhun íyó manī ndasí ní jíin ná, te návāha condee ná ini anuá i. Achí yá.

Jeē ní cajnií de Jesús

(Mt. 26.47-56; Mr. 14.43-50; Lc. 22.47-53)

18 Te nuū ní cuu ni cahān Jesús tāca jnúhun yáha, te ni quenda ya jíin tée cáscuáha jíin yá, cuahān yā inga lado yuu Cedrón. Te yūcuan íyó iin huerto nuū ní quívi ya jíin tée cáscuáha jíin yá. ²Te Judas, tē jeē nastúu de ya, suni jíní de lugar un, chi cuehē jíinu ni nataca Jesús yūcuan jíin tē cáscuáha jíin yá. ³Te ni jinū de yūcuan jíin iin grupo soldado jíin jecu policía cándito templo, jeē ní catají sutū cácujeñhu jíin tē grupo fariseo. Te cándiso de machete, te cájnií de linterna jíin yiti. ⁴Te Jesús je jíní yā tāca jnúndóho jeē véji siquí yā. Te ni quenda ya ichi núu de, te ni cahān yā:

¿Ndé iin cánanducú ró?

⁵Te ni cacahān de jíin yá:

Jesús tē ñuu Nazaret cánanducú rí.

Te ni cahān yā:

Máá rí cúu.

Te Judas, tē jeē nastúu de ya, suni íne de jíin tē ún. ⁶Te jeē súcuan ni cahān yā, máá rí cúu, te ni cajica yátá de, te ni cacotúu-ni de. ⁷Yūcuán na te ni cajnúhún tucu ya de:

¿Ndé iin cánanducú ró?

Te ni cacahān de:

Jesús tē ñuu Nazaret.

⁸Te ni cahān Jesús:

Je ni cachi rí jeē maá rí cúu. Te núu ruhū cánanducú ró, te máá-ni ri jnií ró, te tē yáha na quíngoo de. Achí yá.

⁹Súcuan ni cuu návāha na squícu jnúhun jeē ni cahān yā jíin Tátá yā: Tu ní jéhe na jnúhun naa ni iin tē jeē ni jéhe ni núu na, áchí yá. ¹⁰Te Simón Pedro ndíso de iin espada.

Te ni tava de, te ni jehnde de sōho lado váha iin tē nání Malco. Te tē un cúu de mozo maá sūtū cujeñhu.

¹¹Te ni cahān Jesús jíin Pedro:

Nachuvāha espada rō ini cubierta. ¿A tu cánuú jēé ndóho ri jnúndóho yáha jeē ni sándaā Tátá rí jeē ndóho ri? Achí yá.

Jeē ní indichi Jesús nuū sutū cujeñhu

(Mt. 26.57-58; Mr. 14.53-54; Lc. 22.54)

¹²Yūcuán na te tācá soldado un, jíin capitán de, jíin tāca policía tē hebreo un, ni cajnií de Jesús, te ni cajihni de ya. ¹³Te xihna gā vehe Anás cuangoo de jíin yá. Te tátá chíso Caifás cúu Anás. Te Caifás cúu máá sūtū cujeñhu ga cuiyá ún. ¹⁴Te suu de ni cachi nuū jnáhan de hebreo jeē cánuú jēé cúu iin tē jehē nación de.

Jeē ní cachi Pedro jeē tu jíní de ya

(Mt. 26.69-70; Mr. 14.66-68; Lc. 22.55-57)

¹⁵Te Simón Pedro jíin inga tē scuáha, cándiquin de Jesús cuangoo de yatā yā. Te inga tē scuáha ún chi jíní jnáhan de jíin sūtū cujeñhu. Jeē yūcuan ní quívi de jíin Jesús ini patio vehe sutū

cujéhnú ún. ¹⁶Te Pedro ni quendōo de yatā yehyí. Te máá tēe scuáha jéē jíní jnáhan jín sūtū cujéhnú ún, ni quenda de ni cahān de jíní ñahan ndíto yéhyí, te ni squívi de Pedro ini patio. ¹⁷Yūcuán na te ñahan ndíto yéhyí un ní cajnúhún ña Pedro:

¿A násūú ñin tēe scuáha jíní tēe índichi nuū sutú un cúu ró?

Te ni cahān de:

Nasūu cúu ri, achí de.

¹⁸Te tāca mozo jíní policíá un ní cascáyú de ñuhún jíní tícāyí, chí mījin sáha. Te cáhiin de cánasaā de. Te suni índichi Pedro, násaā de jíní táca tēe ún.

Jeē ni stíchí sutū cujéhnú ún Jesús

(Mt. 26.59-66; Mr. 14.55-64; Lc. 22.66-71)

¹⁹Te sutū cujéhnú un ní stíchí de Jesús ndé-ni cúu tēe cáscuáha jíní yá, jíní na jnúhun cúu jeē steén yā.

²⁰Te ni cahān Jesús:

Níní ní cahān rī nuū chítú ñáyuu, ni cajini sōho ndíhi ñáyuu. Te níní ní steén rī jnúhun ini tēcá vehe ñi sinagoga jíní ini templo cáhnu nuū ndutútú ndívii jnáhan yó hebreo. Te tú ni ñin jnúhun ní cáhán sáhi rí. ²¹¿Te naun cájnúhun ró ruhú? Cajnúhun ñáyuu ní cajini sōho jnúhun ni cahān rī, te máá i cachi ndese ni cahān rī. Chí cájini i ndese ni cahān rī.

²²Te jeē ni cáhán Jesús súcuan, te ñin policíá ndíto templo jeē índichi de yūcuán, ní caní-ni de nuū yā. Te ni cahān de jíní yá:

¿A súcuan cáhán rō jíní sūtū cujéhnú naún?

²³Te ni cahān Jesús:

Núu ni cahān rī ñin jnúhun néé, cachi na jnúhun néé ní cahān rī. Te núu tu ní cáhán rī ñin jnúhun néé, ¿te naun cáni ró ruhú? achí yá.

²⁴Yūcuán na te Anás, sutū cujéhnú un, ní tají de ya, núhni yā cuahān yā nuū Caifás, tēe cúu máá sūtū cujéhnú ga.

Jeē ní cachi tucu Pedro jeē tu jíní de ya

(Mt. 26.71-75; Mr. 14.69-72; Lc. 22.58-62)

²⁵Te níní jéē súcuan cúu, te índichi-ni Pedro, násaā de yuñhún. Te ni cacahān jíní de:

¿A násūú ñin tēe scuáha jíní tēe un cúu ró, chí naún?

Te máá de tu ní cáchi de:

Nasūu cúu ri, achí de.

²⁶Yūcuán na te ñin mozo sutū cujéhnú, jnáhan tēe jeē ní jehnde Pedro sōho, ni cahān jíní de:

¿A násūu máá ró cúu jeē ní jito ri jíní de ini huerto?

²⁷Te Pedro tu ní cáchi tucu de. Te ni cana-ni líhli.

Jeē ní índichi Jesús nuū Pilato

(Mt. 27.1-2, 11-14; Mr. 15.1-5; Lc. 23.1-5)

²⁸Yūcuán na te ni quendacoo de jíní Jesús vehe Caifás, cuangoo de jíní yá nde palacio tēe nación Roma jeē cúu gobernador. Te je cuacundijin. Te ñáyuu hebreo tu ní quívicoo i ini palacio, návaha tu stívi i ley i jeē cahán jeē ma quívi i ini vehe ñin ñáyuu jeē násūú hebreo cúu. Chí núu súcuan te ma cúu cuxíni i vico pascua jeē cóo ñnga quíví ún. ²⁹Yūcuán na te ni quenda Pilato, tēe cúu gobernador, ni cahān de jíní i jíníhan i:

¿Na cuēchi cájicān rō siquī tée yáha?

³⁰Te ni cacahān i:

Núu jeē násūu tée cúnéé cúu tēe yáha, te ma jnī ná de jeē quíndeca ná de nuū ni núú, áchí i.

³¹Te ni cahān Pilato:

Cuángoo jíjnáhan ró, te sándaā rō siquī de jíin ley cánevāha máá ró.

Te ni cacahān ñayuu hebreo un:

Máá ná jeē cácuu ná ñáyuu hebreo, tú na permiso cánevāha ná jéé cáhni ná ni ñin ñayuu.

³²Súcuan ni cacahān i návāha squícu jnūhun jeē ní cachi Jesús jeē quívi ya ndaha tēe Roma te cahni de ya jicā cruz. ³³Te ni ndívi Pilato ini palacio, te ni cana de jeē na quíji Jesús. Te ni cajnūhún de ya:

¿A máá ró cúu Rey ñayuu hebreo naún?

³⁴Te ni cahān Jesús jíin de:

¿A cájnūhun ró ruhū jeē súcuan jéni ni maá ró, chí jéé ní cacastūhun ñáyuu hebreo nuū rō?

³⁵Te ni cahān Pilato:

¿Chí tée hebreo cúu ri jeē cúni rī? Ñayuu nación maá ró jíin sūtū cácujuhnu ni cachihí róhó ndaha ri. ¿Na vé ni sáha ró núu súcuan? Achí de.

³⁶Te ni cahān Jesús:

Nasūu jéé ndácu ri jniñu nájñūhun cándacu tāca rey ñayīvi yáha. Chi núu jeē ñáyuu ñayīvi ní casáha jeē cúu ri rey, yūcuán na te tēe cándiquin ruhū, cuajnáhan de návāha ma quívi ri ndaha jnáhan ri hebreo nuú. Te nasūu núu ñayīvi yáha cúu jeē ndácu ri jniñu vijna. Achí yá.

³⁷Yūcuán na te ni cahān Pilato jini yá:

¿Te á ñin rey cúu ró jéé súcuan?

Te ni cahān Jesús:

Rey cúu ri, nájñūhun cáhán rō. Ni quíji ri ni cacu ri ini ñayīvi yáha návāha nacani ri jnūhun ndaā. Te ndíhi ñayuu cájetáhú jnūhun ndaā, cájini nahín i jnūhun cáhán rī. Achí yá.

³⁸Te ni cahān Pilato:

¿Ndese cuni yō ndé ñin cúu máá jnūhun ndaā?

Jeē ní cundaā jeē cúu yā

(Mt. 27.15-31; Mr. 15.6-20; Lc. 23.13-25)

Te jeē ni cáhán de jnūhun yáha, te ni quenda tucu de nuū ñáyuu hebreo. Te ni cahān de jíin i:

Tú cuítí na cuēchi níhín rī siquī de. ³⁹Te íyó costumbre maá ró jíjnáhan ró jéé vico pascua te siaá rī ñin tēe íne vecāa nuū rō. ¿Te á tu cácu ni rō jeē siaá rī Rey rō nuū rō? Achí de.

⁴⁰Yūcuán na te ndívi i ni cacana jee tucu i:

Ma siaá ni tée jíiná, chi Barrabás siaá ni, áchí i.

Te tēe cuíhná cúu Barrabás.

19 Yūcuán na te ni cahān Pilato jeē na jniñ soldado Jesús, te caní de ya jíin cuarta ñiñ. ²Te ni casáha de ñin corona iñu, ni cachuhun de xinī yā. Te ni cachuhun de ya ñin sahma cuehé ndíhí jéé cúu sahma rey. ³Te ni jecondichi de nuū yā, te ni cacahān catá de:

Nacā jeē váha rey cúu Rey ñayuu hebreo.

Te ni cacani de nuū yā.

⁴Yūcuán na te ni quenda Pilato inga jínu, te ni cahān de jíin ñáyuu: Yáhá condēhe ró tava ri de, návāha na cúni rō jeē tú na cuēchi níhín rī siquī de.

⁵Te ni quenda Jesús, ñúhun ya corona iñu jíin sahma cuehé ndíhí un. Te ni cahān Pilato jíin i:

Yáhá condēhe ró de jíjnáhan ró.

⁶Te nuū ní cajito sutū cácujuhnu jíin táca policia nuū yā, te ni cacana jee de:

Cata caa ní de jicā cruz, na cúu de.

Te ni cahān Pilato:

Núu súcuan te najnií máá ró de te cahni rō de. Chi ruhū, tú na cuēchi níhín rī siquī de.

⁷Te ni cacahān ñayuu hebreo un:

Cáneváha ná iin ley, te jeē siquí ley un cánuú jéē cúu de, chi sáha de máá de jeē Séhe Yaā Dios cúu de.

⁸Te jeē ní jini sōho Pilato jñūhun yáha, te víhyá gā ni yūhú de. ⁹Te ni ndīvicoo tucu de ini palacio, te ni cajñūhún de Jesús:

¿Ndé nuū véji ró?

Te tu ní cáhán cuiti Jesús jíin de.

¹⁰Yūcuán na te ni cahān de jíin yá:

¿Naun tu cáhán rō jeē cahán rī? ¿A tu jíin rō jeē ndíso jñíñu rī jeē cáhni rī rohó jicā cruz, te suni ndíso jñíñu rī jeē siaá rī rohó quíhín rō?

¹¹Te ni cahān Jesús:

Núu tu ní sáha Yaā Dios jeē ndíso jñíñu ró, te tú na vé cúu sáha ró síquī rī. Jeē yúcuan tēe jeē ní nacuaña ruhū ndaha ró, cuēchi xeēn gā condee siquí de vésú máá ró. Achí yá.

¹²Yūcuán na te nde hora un ndúcu ndéyí Pilato ndese siaá de ya. Te ñayuu hebreo chi cácana jee i:

Núu siaá ni tée jíñā, te tu cúu ní amigo rey Roma jeē cujéhu ndácu jñíñu núu súcuan. Chi táca tēe jeē sáha de rey máá de, núu súcuan te cúu de enemigo siquí rey un. Achí i.

¹³Te jeē ní jini sōho Pilato jñūhun yáha, te ni ndacu de jñíñu jeē na quénda Jesús ini vehe quiji ya. Te ni cucōo de silla nuū cúndaā jñíñu, nuū máni máá yúu ni jecāva, te lugar un nání Gabata nuū yúhu hebreo. ¹⁴Te cuacuu cahuxī uū, te jehíni quivī ún quejéé vico pascua. Te ni cahān Pilato jíin ñáyuu hebreo:

Yāha índichi maá rey rō.

¹⁵Te ni cacana jee i:

Na cúu de. Cata caa ní de jicā cruz, achí i.

Te ni cahān Pilato jíin i:

¿A jéē cata caa rī rey rō jicā cruz naún?

Te sutū cácujuhnu un ní cacahān de:

Tuá na inga rey cánevāha ná jíjnáhan ná, chi máá-ni rey Roma jeē cujéhu ndácu jñíñu nuū ná.

¹⁶Yūcuán na te Pilato ni nacuaña de ya nuū i jeē na cúu yā jicā cruz. Te ni cajnií i ya cuango o i jíin yá.

Jeē ní cacata caa de ya jicā cruz

(Mt. 27.32-44; Mr. 15.21-32; Lc. 23.26-43)

¹⁷Te ni quenda Jesús, ndíso ya cruz yā, cuango o de jíin yá iin lugar nuū naní Yiquí Xíní, te nuū yúhu hebreo naní Gólgota. ¹⁸Te yūcuan ní cacata caa de ya jicā cruz. Te suni ni cacata caa de uū tēe nuū uū gā cruz, iin iin de iin lado yā, te máá Jesús mēhñú. ¹⁹Te suni ní ndacu Pilato jñíñu jeē na cóndee jñūhun xiní cruz yā, jeē cahán: Tēe yáha cúu Jesús ñuu Nazaret, Rey ñayuu hebreo, achí. ²⁰Te cuehē ñayuu hebreo ni cacahu i jñūhun yáha, chi máá yajni yuñúú cúu nuū ní cacata caa de ya. Te jñūhun un

yósó jíin yuhu hebreo jíin griego jíin latín. ²¹Te tāca sūtū cácujeñhu nuū ñayuu hebreo, ni cacahān de jíin Pilato:

Ma tée ní jée cúu de Rey ñayuu hebreo, chi sa suhva tee ní jée maá de ni cahān jeē cúu de Rey ñayuu hebreo.

²²Te ni cahān Pilato:

Ma násama ri jeē jé ni ndacu ri jniñu ni jecondee.

²³Te soldado un, nuū ní cuu ni cacata caa de Jesús jicā cruz, te ni caquihin de sahma ya, te ni cajehnde de ni nduu cuūn parte, te iin iin parte ni cuu iin iin soldado un. Te suni ni caquihin de camisa yā. Te camisa un tu ní quícu, chi ni cunu níí. ²⁴Te ni cacahān maá de:

Ma cáhnde yō, chi vāha ga na sáha yó sorteo, te na cóndēhe yó ndé iin yó níhīn, achí de.

Te súcuan ni squícu jñuhun yósó nuū tútu iī nde jenahān jée cahān Jesús: Ni caquihin de sahma ri cuu máá de. Te ni casáha de sorteo siquī camisa rī. Achí. Súcuan ni casáha soldado un.

²⁵Te yajni cruz nuū ndíta caa Jesús íne náná yā, jíin cúhū ña María ñasihí Cleofas, jíin María ñuu Magdala. ²⁶Te ni jito Jesús nuū naná yā jíin núu tée scuáha jeē maní gā yā jíin, suni índichi de yūcuán. Te ni cahān yā jíin náná yā:

Nánā, nde vijna te máá de nucuññi de cuu de sēhe ní.

²⁷Yūcuán na te ni cahān yā jíin tée scuáha ún:

Nde vijna te cuu ña nájñuhun náná rō, achí yá.

Te nde hora un ní cana de ña cuacondee ña vehe de condito de ña.

Jeē ni jíhī Jesús

(Mt. 27.45-56; Mr. 15.33-41; Lc. 23.44-49)

²⁸Yūcuán na te ni jini Jesús jeē jé ni jinu tācá jniñu jeē cánuu ndoho ya. Te návāha squícu jñuhun cáhān tutu iī, te ni cahān yā:

Jíchí rī ndute, áchí yá.

²⁹Te yūcuan íin iin tñdohō ñuhun chitú vinagre iyá. Te ni cachundaji de iin cachí nuū vinagre un, te ni catee de xinī iin ndaha yújnu hisopo, te ni catee de yuhu ya jeē cóho ya. ³⁰Te ná ni jihī ya vinagre un, te ni cahān yā:

Je ni jīnu, áchí yá.

Te ni cāyí-ni xinī yā, te ni jihī-ni ya.

Jeē ní cují soldado lanza xiin ya

³¹Te inga quivī ún coo vico pascua. Te tēe hebreo tu cácuñi de jeē cóndita caa ndēyi ún jicā cruz quivī ndétátú un. Chi quivī ndétátú jeē cúu vico pascua, iī ndasí gá vēsú tāca gá quivī ndétátú. Te ni cacahān de jíin Pilato jeē na ndácu de jniñu jeē jnahnú sīhin tēe cándita caa, te na cújiyo de jicā cruz. ³²Te ni quecoo soldado, te ni cajehnū de sīhin iin tēe jeē ndíta caa jíin yá, te suni súcuan inga de. ³³Te nuū ní quecoo de nuū Jesús, te ni cajito de jeē jé ni jihī yā. Jeē yūcuan tu ní cájehnū de sīhin ya.

³⁴Te iin soldado chi ni cují de lanza xiin ya, te ni cane-ni niñī jíin ndute. ³⁵Te máá rí jeē tée tutu yáha, ni jito ri jeē súcuan ni cuu, te nácani ndaā rī jñuhun ndese ni cuu. Te jíní ri jeē iyó ndaā jñuhun cáhān rī, návāha suni candíje máá ró jijnáhan ró. ³⁶Chi súcuan ni cuu

návāha squícu jnūhun cáhán tutu ii: Ma cahnú de ni iin yiqui ya, achí. ³⁷Te suni inga jnūhun cáhán tutu ii: Iin quiví te coto i nuū Yaā jeē ní cují i lanza, achí.

Jeē ní quindūji Jesús

(Mt. 27.57-61; Mr. 15.42-47; Lc. 23.50-56)

³⁸Te ni cuu tāca jéē yáha. Te íyó iin tēe nūu Arimatea jeē naní José, te cúu de tēe cándíje Jesús. Te yuhu-ni cándíje de, chi yúhú de jnáhan de hebreo. Te ni cahān ndahú de jíin Pilato jeē na cuáha jnūhun quihin de yiqui cúñu Jesús. Te ni jēhe Pilato jnūhun. Yūcuán na te cuahān José, ni snúu de yiqui cúñu Jesús. ³⁹Te suni ni jinū Nicodemo, tēe ni quiji nuū Jesús iin jecuáa. Te ndíso de nájñūhun ocō uxí kilo sūje uvuā jeē ní saca jnáhan jíin yúcū áloe. ⁴⁰Te ndíndúu de ni caquihin de yiqui cúñu Jesús, te ni cachusúcún de jíin tira sahma jeē ni quíví yucū jeē jeén asīn ún, nájñūhun íyó costumbre maá nāyuu hebreo jeē cáchindūji i ndīyí. ⁴¹Te yajni nuū ni jíhī Jesús íyó iin huerto. Te nuū huerto un ndéé iin yaū jeē ní caan jeé jicā iin cava, nuū ná tu quindūji ndīyí. ⁴²Te yūcuan ní cachindūji de Jesús, chi ine yajni yaū ndīyí ún. Chi je yajni quejéé quíví ndétátú de jeē cácuu de nāyuu hebreo, te tú na ley chindūji de ndīyí núu je ni quejéé quíví ún.

Jeē ní natecu Jesús

(Mt. 28.1-10; Mr. 16.1-8; Lc. 24.1-12)

20 Te jenéhen quiví domingo ni jinū María nūu Magdala nuū ní yindūji Jesús, te yínee gā

cúu. Te ni jito ña jeē ní cujiyo yuū ndihyú yuyáú ndīyí. ²Yūcuán na te jínu ña cuahān ña nuū Simón Pedro jíin núu inga tēe scuáha ún jeē maní gā Jesús jíin. Te ni cahān ña jíin de:

Ni catava de Jitoho yō nuū ní yindūji ya, te tu cájini yō ndé nuū ní cachune de ya, achí ña.

³Te ni quendacoo Pedro jíin inga tēe scuáha ún, cuácondéhé de yaū ndīyí. ⁴Te cájino tayí ndíndúu de. Te inga tēe scuáha ún, nīhin ga ni jinu de vēsú Pedro. Te xihna gā de ni jinū yaū ndīyí. ⁵Te ni scáyí de máá de, te ni jito nihni de ini yaū. Te ni jito de jeē tira sahma un cáyūcu máá na. Te tu ní quíví de. ⁶Te sáá te ni jinū Simón Pedro jeē ndiquín jnáhan de vēji de jíin inga tēe ún. Te ni quíví de nuū ní yindūji Jesús. Te suni ni jito de jeē tira sahma cáyūcu máá na. ⁷Te ni jito de sahma jeē ni nūsúcún xíní Jesús, tu catú jíin tira sahma, chi ni natuu te catú sīn. ⁸Yūcuán na te suni ni quíví inga tēe scuáha jeē ni jíinū xihna gā nuū ní yindūji ya. Te ni jito de ndese íyó, te ni candíje de jeē ní natecu yā. ⁹Chi nde ná tu jinūcoo de yaū ndīyí, te tu ní jécūhun ni de jnūhun cáhán tutu ii, jeē jíni nūhún natecu yā núu je ni jihí yā. ¹⁰Yūcuán na te ndíndúu tēe cáscuáha ún cuanungoo de vehe de.

Jeē ní nane ya nuū María nūu Magdala

(Mr. 16.9-11)

¹¹Te María índichi ña ndáhyú ña nuū ní yindūji ya. Te níni ndáhyú ña, te ni scáyí ña máá ña, ni jito nihni ña ini yaū ún. ¹²Te ni jito

ña uū ndajéhé andiví, cáñuhun ya sahma cuijín. Te ìin ya néne ichi xíní, te inga ya néne ichi núú jehé nuū ni cátu yiqui cúñu Jesús. ¹³Te ni cacahān yā jíin ña:

¿Najehē ndahyú rō?

Te ni cahān ña:

Ni catava de Jítoho ná, te tu jíiní na ndé nuū ní cachune de ya.

¹⁴Te jeē ni cáhān ña súcuan, te ni ndió cóto ña, te ni jito ña nuū Jesús jeē índichi yā yūcuán. Te tu ní nácuni ña jeē maá yá cúu. ¹⁵Te ni cahān yā jíin ña:

¿Najehē ndahyú rō? ¿Ndé ìin nánducú ró? achí yá.

Te maá ña jéni ni ña jeē téé ndíto huerto cúu ya. Te ni cahān ña jíin yá:

Núu maá ní ni quenehen ní yá, te cachi ní ndé nuū ni jéchune ní yá, te na quínuquihin ná yá, achí ña.

¹⁶Te ni cahān Jesús jíin ña:

María, achí yá.

Te jeē ni cáhān yā súcuan, te ni nacuni ña ya, te ni ndió cóto ña, te ni cahān ña jíin yuhu hebreo:

Raboni, achí ña. Te jñuhun un cúní cahān, Maestro.

¹⁷Te ni cahān Jesús jíin ña:

Ma quehé ró rúhū, chi ná tu ndaa ri quinhun rí nuū Tatá rí. Te cuáhán núú tǎcá hermano rí, tēe ni cascuáha jíin rí, te cachi rō nuū de jeē ndaa ri quinhun rí nuū Tatá rí, jeē suni Tatá maá ró jijnáhan ró cúu. Te cúu ya Yaā Dios maá rí jíin Yaā Dios maá ró jijnáhan ró. Achí yá.

¹⁸Yūcuán na te María ñuu Magdala un, cuáhān ña, te ni castūhún ña nuū téé cáscuáha un

jeē ní jito ña nuū maá Jítoho yō jíin jeē ni cáhān yā jñuhun yáha jíin ña.

Jeē ní nane ya nuū téé cáscuáha jíin yá

(Mt. 28.16-20; Mr. 16.14-18; Lc. 24.36-49)

¹⁹Te jeē ní cuaa maá quívī domingo un, te cáhiin tútú téé cáscuáha ún ini ìin vehe. Te cándihyū yehyí, chi cáyūhú de jñáhan de hebreo jeē coto xeēn i de. Te ni quee-ni Jesús, ni jecuiñī yā mēhñú de vēsú ndihyú yehyí, te ni cahān yā jíin de:

Ndeyí sñ coo ni rō jijnáhan ró, achí yá.

²⁰Te ná ni cahān yā súcuan, te ni steén yā ndaha ya jíin xiin ya nuū de. Te ni cacusiñi ni tēe cáscuáha un jeē ní cajito de nuū maá Jítoho yō.

²¹Yūcuán na te ni cahān tucu Jesús:

Ndeyí sñ coo ni rō jijnáhan ró. Te nájñuhun ni tají Tátá rí ruhū ini ñayīví, suni súcuan tájī rí rohó nacani ró jñuhun ri nuū ñayuu. Achí yá.

²²Yūcuán na te ni tīvi tachī yā nuū de jijnáhan de. Te ni cahān yā:

Vijna te ni canihīn rō Espiritu Santo. ²³Te tǎca ñayuu jeē cone cáhnu ni rō nuū cuéchi i, núu súcuan te coo jñuhun cáhnu ni nuū cuéchi i. Te núu tú cone cáhnu ni rō nuū cuéchi i, te ma cóo jñuhun cáhnu ni nuū cuéchi i. Achí yá.

Jeē ní nane ya nuū Tomás

²⁴Te Tomás, tēe ni cacu cuatí, ìin jñáhan jeē uxí uū tēe cáscuáha jíin yá, tu ní íne de quívī jeē ní nane Jesús nuū tǎca gá tēe cáscuáha. ²⁵Yūcuán na te sava ga

tēe cáscuáha un, ní cacahān de jíin Tomás:

Ni cajito ri nuū maá Jítóho yō.

Te ni cahān Tomás:

Núu tú coto ri nuū ni túji ndaha ya ni sáha ndūyu cāa, te núu tú chune ri xinī ndáha ri nuū ni íne ndūyu cāa, te núu tú chune ri ndaha ri xiin ya, te ma candíje cuiti rī, achí de.

²⁶Te nuū uná quivī, te tēe cáscuáha un cáhiin tútu tucu de ini iin vehe. Te íne Tomás jíin de. Yūcuán na te ni quee-ni tucu Jesús, ni jecuiñī yā mēhñú de, vēsú cándihyū yehyí. Te ni cahān yā jíin de:

Ndeyí sñi coo ni rō jijnáhan ró.

²⁷Te ni cahān-ni ya jíin Tomás:

Chune xinī ndáha ró ini ndaha ri yāhá te coto ró. Te scáa ndaha ró, te chune ró xiin ri nuū ni túji. Te ma cáni siquí gá ni rō, chi sa suhva na cándíje ró.

²⁸Yūcuán na te ni cahān Tomás jíin yá:

Aī, Jítóho maá ná jíin Yaā Dios maá ná cúu ní, achí de.

²⁹Te ni cahān Jesús jíin de:

Tomás, nde ni jito ró núu rī, te ni candíje ró. Te yōhyo ndetū tāca ñáyuu jeē candíje ruhū vēsú tu ní jito i nuū rī, achí yá.

Najehē ni tee Juan libro yáha

³⁰Te suni ni sáha Jesús cuehē gā jniñu jéhu jeē ni stéén yā poder yā nuū tēe cáscuáha jíin yá, jeē tu yósó núu tútu yáha. ³¹Te tācá jniñu yáha ní tee ri návāha candíje ró jijnáhan ró jēe Jesús cúu Cristo, maá Séhe Yaā Dios. Chi jeē candíje ró yá, te cotecu rō níí cáni sáha ya.

Jeē ní nane ya nuū uxá tēe cáscuáha jíin yá

21 Te ni cuu jecu quivī, te inga jínu ni nane Jesús nuū tēe cáscuáha jíin yá, jeē cáhiin de yumar Tiberias. Te suhva ni steén yā maá yá nuū de: ²Cáhiin tútu Simón Pedro, jíin Tomás, tēe ni cacu cuatí, jíin Natanael, tēe ñuu Caná ndañúu Galilea, jíin ndindúu séhe Zebedeo, jíin úu gā tēe cáscuáha. ³Te ni cahān Simón Pedro jíin de jijnáhan de:

Quíjni ri chācá.

Te ni cacahān de:

Suni quingoo ri jíin ró.

Te cuangoo de, te ni quivícoo de iin barco. Te tu ní cánihin cuiti de ti jecuáa yúcuan. ⁴Te jeē cuácundijin, te íne Jesús yumar. Te tēe cáscuáha ún, tu ní cánacuni de jeē maá yá cúu. ⁵Yūcuán na te ni cahān yā jíin de:

Aá rō jijnáhan ró, zá ní canihin rō chācá caji yō?

Te ni cacahān de:

Tú cuiti, achí de.

⁶Yūcuán na te ni cahān yā jíin de: Síngava ñunu ró ichi lado váha barco, te nihin rō tī.

Te ni casíngava de ñunu, te tuá ní cúu cuiti natava de, jeē ni quivícoo cuehē ndasí cháca. ⁷Yūcuán na te tēe scuáha jeē maní gā Jesús jíin, ní cahān de jíin Pedro:

Máá Jítóho yō cúu, achí de.

Te jeē ní jini sōho Simón Pedro jeē maá Jítóho yō cúu, te ni nachuhun de sahma de, chi ni tava de jeē sájniñu de. Te ni ndava-ni de nuū mar cuahān de nuū yā. ⁸Te tāca gā tēe cáscuáha ún, vendicoo

de jíin barco yundúte, cástáa de ñunu ñúhun chítú cháca. Chi tu jíicá cáhiin de jíin ñuhun íchi, chi nájnūhun ciento-ni metro cúu. ⁹Te nuū ní quendacoo de ini barco, te ni cajito de jeē nduhvá tícua ñuhūn, te íne staā jíin iin chācá chíhyó.

¹⁰Te ni cahān Jesús jíin de:

Cuáquihin jecu chācá jéē sa ní cajni ró, na táu yó, áchí yá.

¹¹Te ni quívi Simón Pedro ini barco, te ni stáa de ñunu, ni quee de jíin ndé nuū ñúhun íchi. Te ñúhun chítú cháca náhnu, iin ciento uū xico uxí unī tī cúu. Te vēsú iin súcuan tí ñúhun, te tu ní táhndé ñunu. ¹²Te ni cahān Jesús jíin de:

Nehen jijnáhan ró na cási ni yō.

Te ni iin tēe cáscuáha ún tu ní cúndeyí ni de cajnūhún de ya núu ndé iin cúu ya. Chi je cájini de jeē maá Jítóho yō cúu ya. ¹³Te ni quindēhe Jesús yuñúhún, te ni quihin ya staā ún, te ni jēhe ya nuū de, te suni súcuan chācá un.

¹⁴Yāha cúu vuelta unī jeē ní nane Jesús nuū tēe cáscuáha jíin yá, ná ni natecu yā.

Jeē ní ndajnūhún Jesús jíin Simón Pedro

¹⁵Te nuū ní cuu ni cajesi ni de, te Jesús ni cajnūhun yá Simón Pedro:

Simón sēhe Jonás, íá mánī gā rō jíin rí vēsú táca gá tēe yáha?

Te ni cahān de:

Je jíin ní jéē maní na jíin ní, achí de.

Te ni cahān yā jíin de:

Núu súcuan te stéén rō jnūhun ri nuū ñáyuu cácuu nájnūhun londe ri.

¹⁶Te ni cajnūhun yá de vuelta uū:

Simón sēhe Jonás, íá mánī rō jíin rí?

Te ni cahān de jíin yá:

Je jíin ní jéē maní na jíin ní, achí de.

Te ni cahān yā:

Condito rō ñáyuu cácuu nájnūhun lanchi ri núu súcuan.

¹⁷Te ni cajnūhún tucu ya de vuelta unī:

Simón sēhe Jonás, íá mánī rō jíin rí?

Te ni cucuíhyá ni Pedro jeē ní cajnūhun yá de vuelta unī núu maní de jíin yá. Te ni cahān de:

Máá ní jiní ni ndíhi, te jíin ní jéē maní na jíin ní.

Te ni cahān yā:

Núu súcuan te stéén rō jnūhun ri nuū ñáyuu cácuu nájnūhun lanchi ri. ¹⁸Te jendaá cahán rī jíin ró jeē nde ná suchí ró, te ni quihin máá ró sahma ró, te ni jica ró ndé nuū cuní maá ró. Te núu na yí ró, te nasūu jéē cuní maá ró, chí inga ñáyuu quindēca i róhó nuū tu cúní rō quihin rō. Te scáá rō ndíndúú ndaha ró jéē cuu rō.

¹⁹Jnūhun yáha ní cahān yā jeē ni stéén yā jeē cóndita caa de jíicá cruz cuu de, te jeē súcuan cuatáhú de cúu jeē steén de jeē yóhyo cújéhnu Yā Dios. Yūcuán na te ni cahān gā yā:

Condiquin rō ruhū jeē sáha ró jniñu ní ndacu ri nuū rō, achí yá.

Jnūhun tēe scuáha jeē maní gā yā jíin

²⁰Te ni ndió cóto Pedro, te ni jito de tēe scuáha jeē maní gā Jesús jíin, ndíquín de vēji de yatā. Tēe un cúu jeē ní conene xiin Jesús ná ni

cacuxíni de jíin yá, te ni cajnúhún de ya: ¿Ndé ñin de cúu jeē nastúu níhún? ²¹Te jeē ní jito Pedro nuū téé ún, te ni cajnúhún de Jesús:

Te tēe yáha, ¿ndese coo jíin de?

²²Te ni cahān Jesús:

Núu cúní rī jeē cótecu de nde quivī ndíji ri, ¿te naun ndíhví ni rō? Máá ró chi condiquīn rō ruhū jeē sáha ró jniñu ní ndacu ri nuū rō, achí yá.

²³Yūcuán na te jnúhun yáha ní jītē núu nuū tācá hermano, jeē téé scuáha un má cúū de. Te tu ní cáhán Jesús jeē ma cúū de, chi sa

suhva ni cahān yā: Núu cúní rī jeē cótecu de nde quivī ndíji ri, ¿te naun ndíhví ni rō?

²⁴Te tēe scuáha un jēē maní gā Jesús jíin, suu cúu ruhū jeē nácani jnúhun tācá jniñu yáha, te suu ri téé tāca jnúhun yáha. Te cájini rō jijnáhan ró jēē iyó ndāā jnúhun nácani ri.

²⁵Te suni íyó cuéhē ndasí gá jniñu ní sáha Jesús. Te núu tee yó ná ñin ná ñin, te ma cánda níí ñáyiví cuhun tutu jeē cóso jnúhun ún, jéni ni rī. Te ni cuu. Amén.

JNIÑU JEHNU JEE NI CASAHA TEE APOSTOL

Jeē ni jéjnūhun ya quiji
Espíritu Santo

1 Amigo Teófilo, nuū tútu jeē ní tee ná xíhna gā ni castūhun ná nuū ni táca jniñu ní sáha Jesús, jíin táca jnúhun ni steén yā nde quivī ní quejéé yá ni sáha ya ²te nde quivī ní ndaa ya cuanuhun yā andiví. Te nde ná tu ndaa ya quihīn yā, te ni sáha Espíritu Santo jeē ní ndacu ya jniñu nuū táca apóstol, tēe ni nacāji ya. ³Te nuū ni jínu ni ndoho ya jeē ni jíhī yā, te uū xico quivī te tijni jínu ni steén ndijin yā maá yá nuū tēe un jíjnáhan de, te súcuan ni cajini de jeē iyó ndáā jeē ní natecu yā. Te ni cahān yā jíin de siquī ndese ndácu Yaā Dios jniñu.

⁴Te ná cáhiin tútu de jíin yá, te ni cahān yā jíin ndihī de jeē ma quéndacoo de ini ñuu Jerusalén, chí áchí yá:

Condetu ró ndé quee Espíritu Santo jeē ni jéjnūhun máá Tátá rī Yaā Dios. Chí je ni cachi rī nuū rō jeē ni jéjnūhun ya quiji Espíritu Santo. ⁵Chí Juan, jendaá jeē maá ndute-ni ni scuándute de ñayuu. Te róhó jíjnáhan ró, jecu na quivī te nájnūhun cuandute ró jíin Espíritu

Santo, cúu jeē condee yā ini anuá rō, achí yá.

Jeē ní ndaa Jesús cuanuhun yā andiví

⁶Yūcuán na te tēe cáhiin tútu jíin yá, ni cacajnūhún de ya:

¿A vijna te nasáha ní jēē ñáyuu ñuu yō Israel ndujéhu i ndacu i jniñu nuū nación yō chí naún? áchí de.

⁷Te ni cahān yā:

Ma cúu cuni rō quivī chí cuíyā jeē cóo jeē ni sándaā maá Tátá rī, chí máá iin-ni máá yá jíin yā na quivī sáha ya. ⁸Te jeē cúni rō cúu jeē quée Espíritu Santo te condee yā ini anuá rō jíjnáhan ró. Yūcuán na te nihīn rō poder te nacani ró jnúhun rī ní ini ñuu Jerusalén, ní Judea, ní Samaria, nde ní cáhnu ñayiví, áchí yá jíin de.

⁹Te ni ndihī ni cahān yā táca jnúhun yáha. Te níiní cájito de nuū yā, te ni ndaa-ni ya cuanuhun yā andiví. Te ni quee vicō ni jesi-ni nuū cuahán yā, te tuá ni cájito de ya. ¹⁰Te níiní cáhiin de cájito ndaa de ichi ándiví núu ní ndaa ya cuahán yā, te uū jnáhan ndajéhé yā cáñuhun ya sahma cuijín ní cajecuiñī yā xiin de jíjnáhan de,

te cájito ya nájñuhun tēe. ¹¹Te ni cacahān yā jíin de:

Róhó tēe Galilea, ¿najehe cájito ndaa ró ichi ándiví? Chi máá Yáa Dios ni naquihin ya Jesús cuanuhun yā andiví, te suni súcuan ndiji ya nájñuhun cájito ró cuáhān yā andiví, áchí yá.

**Jeē ní canacāji de Matías jeē
nucuiñi de nuū Judas**

¹²Yūcuán na te ni nanungoo de yucu jeē naní Olivos, cuanungoo de ñuu Jerusalén. Te yajni-ni íne yucu un jíin ñuu Jerusalén, nájñuhun iin kilómetro-ni, cūhva jeē ni jéhe ley permiso caca ñayuu quiví ndétátú. ¹³Te ni ndāvicoo de ini ñuu. Te ni ndacoo de cuarto xini véhe nuū cáyūcu núu de. Te tācá de cúu Pedro, Jacobo, Juan, Andrés, Felipe, Tomás, Bartolomé, Mateo, Jacobo sēhe Alfeo, Simón jeē cúu jnāhan grupo cananista, jíin Judas ñani Jacobo. ¹⁴Tāca tēe yáha, níni cándutútú ínuu de cájicān tahu de jíin tāca ñani Jesús jíin náná yā María jíin sava ga ñahan.

¹⁵Te iin quiví te ni jecondichi Pedro nuū tācá hermano cácadíje. Te cáhiin nájñuhun ciento ocō ñayuu. Te ni cahān de:

¹⁶Hermano jijnāhan ní, ni squícu nahín jñuhun cáhān tutu ii jeē ni cáhān David nde jenahán ní sáha Espíritu Santo. Te jñuhun un ní cuu siquī Judas jeē ní yosñuu núu tēe ni cajñi Jitoho yō Jesús. ¹⁷Te suu tēe un ní jica de jíin yó, te ni chindéé ñáhān jnāhan de jíin yó siquī jñiñu ní jeni ya yohó. ¹⁸Te ni cajeen iin ñuhun jíin xúhun ní nihin tēe un síquī jñiñu neé ní sáha

de. Te ni ñinga ndeyi de, te ni ndatā sáva chíji de, te ndíhi yiti de ni jítē.

¹⁹Te ni jítē jñuhun yáha núu tāca ñayuu cáyūcu ñuu Jerusalén, te jeē yúcuan cúu jeē ní casnání i ñuhun ún Acéldama nuū yúhu máá i, jeē cuní cahān ñuhun jeē cúu cuenta niñi. ²⁰Chi súcuan je yósó núu tútu Salmo siquī Judas:

Vehe de na quéndōo iyú,
te ma cóndee ni iin ga ñayuu ini
vehe ún.

Te suni cáhān:

Jniñu ní condiso de na cóndiso
ingā tēe.

Achí.

²¹Núu súcuan te jíni ñúhún jēe núcuiñi iin tēe lugar maá de jíin yó. Te tēe nucuiñi jíin yó un, nacāji yó de mēhñu tāca tēe ni cajica jíin yó tāca quiví jeē ní jica máá Jitoho yō Jesús jíin yó. ²²Te tēe nacāji yó un cúu tēe jeē ni íyo de jíin yó nde quiví ní jendute ya ni sáha Juan, te nde quiví ní ndaa ya cuanuhun yā andiví. Te tēe nucuiñi jíin yó na cúu de testigo jíin yó jeē jé ni natecu yā, achí de.

²³Te ni catee nuū de uū jnāhan tēe: Matías jíin José jeē naní de Barsabás te suni nání de Justo. ²⁴Te ni cajicān tahu de:

Tātā Yāa Dios, máá ní chi jíni ni ndese cáa ánuá tāca ñayuu. Núu súcuan te jeē ndindúú tēe yáha, stēen ni ndé iin de cúu jeē ní nacāji ní. ²⁵Te condiso jñiñu de cuu de apóstol. Te naquihin de jñiñu ní stóo Judas, chí ni sáha de cuēchi te cuahān de lugar xeēn nuū cánuú quíhñ de, áchí de.

²⁶Yūcuán na te ni casáha de iin sorteo te ni jinū Matías, te

ni nucuĩñ de ni nduu de jnáhan ndihúxí iin apóstol.

Jeē ní quee Espíritu Santo

2 Te máá quivĩ víco Pentecostés ni cahiin tútú ñáyuu cácadnje ñuu Jerusalén. ²Te sanaa-ni te ni quejéé nñhin vēji nde andiví nájñuhun tachī nñhin queé, te tāca ñáyuu jeē cáyucú ini vehe un ní cajini sōho i jeē nñhin ún. ³Te ni cajito i nájñuhun yáñuhūn jeē ní cajitē núu te ni cacucōo xinī ná iin ná iin i. ⁴Te ndihī i, ni cunuú Espíritu Santo jíin i, te ni quejéé i cácahān i sñin sñin yuhu, ndese ni steén máá Espíritu nuū ná iin ná iin i cahān i.

⁵Te ñuu Jerusalén, suni cáhiin ñáyuu hebreo, yññuhún núū Yaā Dios, jeē ní quijicoo i nde tācá nación ní cáhnu ñayiví. ⁶Te jeē ni nñhin súcuan te ni cacutútú cuéhē ñáyuu ún. Te ni cunéé íi ni i jíjnáhan i, chi ná iin ná iin i ni cajini sōho i jeē téé ni canihin Espíritu Santo cácahān de jñuhun yuhu ñūū jicá nuū vēji i. ⁷Te ni canaa ni i cájito i te ni cacahān i:

¿A násūu téé Galilea cácuu tāca téé yáha jeē cácahān de tācá yuhu ñūū nuū vējicoo yó? ⁸¿Na vé ni cuu yáha núu súcuan? Chi ná iin ná iin yó cájini sōho yó cácahān de jñuhun yuhu ñūū nuū ní cacacu yó. ⁹Chi vējicoo yó ndé tācá ñuu jicá. Sava yó vēji nde Partia jíin Media jíin Elam. Te sava ga yō vēji yó ndé Mesopotamia jíin Judea jíin Capadocia jíin Ponto jíin Asia. ¹⁰Suni nde Frigia jíin Panfilia jíin Egipto jíin tijñi ñuu jeē íne nde yatā gā ñuu Cirene ñuhun Africa

vějicoo yó. Te sava ga yō nde ñuu Roma vējicoo yó, te cáyucu jínu-ni yó yáha. Te máá yó jeē vējicoo ñuu Roma, sava yó cácuu máá ñáyuu hebreo te sava ga yō cácuu ñáyuu sñin ñuu, ni cacandje yó ndiquín yō ley ñáyuu hebreo. ¹¹Suni nde Creta jíin Arabia vējicoo sava yó. Te cájini sōho yó jéé jíin jñuhun yuhu ñūū ná iin ná iin máá yó cácahān de tācá jñiñu jéñnu ní sáha Yaā Dios, achí i.

¹²Te ndihī i chi ni canaa íi ni i cájini nahín i. Te ni candajnūhún i jíin jnáhan i:

¿Na vé cúu jeē ní cuu núu súcuan jeē cácahān de yuhu ñūū yō? achí i.

¹³Te sava i ni cacahān catá i:

Tuú chi jeē cánajini de, achí i.

Jeē ní nacani Pedro jñuhun nuū ñáyuu

¹⁴Yūcuán na te ni candocuiñi Pedro jíin ndihúxí iin ga apóstol, te ni cahān jee Pedro jíin ñáyuu ún:

Níhín jnáhan ñuu yō hebreo, jíin ndihī níhín jéé cáyucu ní Jerusalén, jñuhun yáha na chúhun ni ni jíjnáhan ní, chi cuni nahín ní cahān na jíin ní. ¹⁵Chi máá ná jíjnáhan ná, nasūu jéé cájini ná nájñuhun cájeni ni ní, chi sáá cahñin jenéhen cúu, te nasūu hora cánajini ñáyuu cúu. ¹⁶Chi sa suhva squícu jñiñu yáha nájñuhun ni cahān Joel, téé ni nacani jñuhun Yaā Dios nde jenahán, chi súcuan ni cahān de:

¹⁷Achí Yáā Dios: Quivĩ sándihí na te tají rí Espíritu rí cunuú yá jíin tāca ñáyuu, te sēhe yíí ró jíin séhe sñhí ró, nacani i jñuhun ri, te tāca téé lulí chi coto ndijin de jeē steén rí nuū de,

te tāca tée jéhnú chi sáha ri jeē scóto jēni de.

¹⁸ Te quivī ún chi tají rí Espíritu rí cunuú yá jíin táca mozo rí, cúu tēe cúu ñahan,

te nacani i jnúhun ri.

¹⁹ Te ichi ándiví sáha ri jniñu jéhnú jeē náa ni ñayuu coto i, te sáha ri jniñu jéhnú ini ñayīvi jēe steén jeē cujéhnú ri, chi coo niñī jíin nūhūn jíin nūhmā nájñūhun vicō.

Yūcuan cúu jeē sáha ri jeē cóo jñūdóho xeēn.

²⁰ Te nduu jnúú níandii te ma cúndijin gā,

te yoō coto cuéhé nájñūhun niñī. Yūcuán na te quee quivī jeē ndíji máá Jítóho rō Jesús.

Quivī ún coo cuehē jniñu jéhnú, te cuni ndihī ñayuu jeē quiví maá Jítóho rō cúu.

²¹ Te tāca ñáyuu jeē cahān ndahú i jíin yá te jnama ya i, áchí Yáa Dios.

Achí Joel ni nacani de jnúhun ya.

²² Jeē yūcuan níhín tēe ñuu yō Israel, cuni nahín gá ni jnúhun yáha jíjnáhan ní. Ni steén Yaā Dios jeē ní tají yá maá Jesús, Yaā ní jéhnú ñuu Nazaret, chi máá Yáa Dios ni jēhe ya jeē ni sáha Jesús jniñu jéhnú mēhñu máá ní, jíin jniñu jeē steén jeē cujéhnú ya, te jniñu un ní canaa ni ní cajito ní. Te je cájini vāha ní jēe súcuan ni cuu. ²³ Te máá ní ní cajnií ní yá, te ni cajendēca ní yá nuū tēe xeēn ni cajehni de ya jicā cruz ni casáha ní. Te nde jíin tiempo je ni jini Yaā Dios jeē súcuan sáha ní jíjnáhan ní, chi súcuan je ni sándaā yā. ²⁴ Te ni nastécu Yaā Dios Jesús te tuá ní cúu

ya ndīyi, chi jnúhun xeēn jeē jihí ñayuu, tuá na vé cúu ga sáha jíin yá. ²⁵ Chi nde jenahán suhva ni tee David jnúhun ndese ni cahān Jesús jíin Yáa Dios:

Jíní na núu maá ní jeē cúu ní Jítóho ná, chi níí cáni ndéé ní jíin ná,

chi ndéé ní ichi ndáváha ná, cúu jeē chindéé ñáhán ní sāña náváha coo ndeyí ni ná.

²⁶ Jeē yūcuan cúsií ni ná te cáhán na jnúhun sií ni.

Jeē yūcuan ma nácani uhū ni na síquī jnúhun cuu ná.

²⁷ Chi ma cuáha ni jnúhun

quendō ánuá na lugar nuū cáyūcu ánuá ndīyi,

ni ma cuáha ni jnúhun tehyū ná, chi jéjníñu ná núu ní te maní ni jíin ná.

²⁸ Te ni steén ni núu na jēe nátecu ná,

te sáha ní jēe cusíí teyí ni ná condee na jíin ní níí cáni.

Achí Jesús, ni achí David.

²⁹ Tāca níhín jíjnáhan ní, na cástūhun cájí ná nuū ni jnúhun jíi yō David, chi tu ní cáhán de jnúhun yáha síquī maá de. Chi ni jihí de te ni quindūji de, te jíní yō nuū yándūji de nde vijna. ³⁰ Chi ni cuu de tēe ni nacani jnúhun Yaā Dios nde jenahán. Te ni jini de jeē váha ni jejnūhun ya nuū de jeē chíji yucūn maá de quiji Cristo, te condee yā mesa de ndacu ya jniñu nájñūhun ni ndacu de jniñu jeē ní cuu de rey.

³¹ Te nde jíin tiempo ni jini de jeē nátecu Cristo, te ni cahān de jeē anuá yā, ma ndóo lugar nuū cáyūcu ánuá ndīyi, ni yiquí cúñu yā ma tehyú. ³² Chi Yaā Dios ni nastécu yā

Jesús, te máá ná cácuu ná testigo jeē ní natecu yā. ³³Te ni ndujéhu tucu ya ni sáha Yaā Dios jíin poder yā. Te nde nuū maá Yāā Dios, Yaā cúu Tátá yā, ni nihin Jesús Espíritu Santo, chi súcuan ni jejnūhun ya. Te ni tají Jesús Espíritu Santo, te suu ya sáha jniñu jeē cájito ní te cájini sōho ní vijna. ³⁴Te David, nasūu síquī maá de ní cáhán de tāca jnúhun yáha, chi tu ní ndáa yiqui cúnu de andiví. Chi síquī Cristo cúu jeē ni cáhán de suhva:

Máá Yāā Dios ni cahān yā jíin Jítóho rí Cristo:

Cucōo ró ichi ndávaha ri jeē steén jeē kujéhu ró.

³⁵Te na sáha ri jeē quende rō poder tāca jéē cájito uhū rohó, áchí yá.

Achí David.

³⁶Núu súcuan te ndíhi ní jéē cácuu yó ñayuu Israel, na cúni vāha ní jéē vēsú ni cajehni ni yá jicā cruz, te Yaā Dios ni jeni ya maá Jesús jeē cúu ya Jítóho yō te suni cúu ya Cristo, Yaā jnáma yóhó, áchí Pedro jíin i.

³⁷Te jeē súcuan ni cajini sōho i jnūhun yáha, te ni cajnahuhū ni anuá i. Te ni cacajnūhún i Pedro jíin tāca gá apóstol:

¿Te ndese sáha ná jíjnáhan ná núu súcuan? áchí i.

³⁸Te ni cahān Pedro jíin i:

Nacani ni ní jéē stóo ni cuéchi ní jíjnáhan ní, te cuandute ní jéē ní cacandíje ní Jesucristo, návāha cone cáhnu ni Yaā Dios nuū cuéchi ní, te cuāha Yaā Dios Espíritu Santo yā condee yā ini anuá ni. ³⁹Chi súcuan ni jejnūhun máá Tátá yō Yaā Dios nuū yō jíin núu séhe yó,

te suni súcuan ni jejnūhun ya nuū ñayuu tāca gá nación, tācá i jeē cána ya i candíje i.

⁴⁰Te jíin cuéhē gā jnūhun súcuan ni cahān cají Pedro, te ni stihví ni de i:

Nducú ndéyí ní jeē na cácu ní, chi jnahnū ndetū ñayuu casáha jniñu néé, áchí de.

⁴¹Yūcuán na te tācá i jeē ní cajetáhú jnúhun ni cahān de, ni cajendute i. Te quiví un ní nducuehē gā ñayuu cácandíje, nájñuhun uní mil gā ñayuu. ⁴²Te ni cahíin nihin i síquī jnúhun cástéén apóstol. Te inuú-ni cándajnūhun máni i te cájicān tahú i, te in cáhnu-ni cáyeji i pan, nájñuhun ni steén maá Jítóho yō jeē núcūhun ni yō síquī yā.

Ndese ni coyūcu ñayuu jeē ní cacandíje jeē xihna nūhún

⁴³Te ndíhi ñayuu ni cayūhú i ni cajito i, chi cuehē jniñu jéhu jeē steén jeē kujéhu ya ni casáha tēe apóstol. ⁴⁴Te inuú ní cahíyo ni ñayuu cácandíje, te ni cacuu inuú i tāca jéē cánevāha i. ⁴⁵Te ni caxícó i na-ni na vé cánevāha i, te ni casaja i xūhún un núu tāca jnáhan i, núu ndese jíni nūhún in in i. ⁴⁶Te ndijnahan quiví ni candutútú i ini templo. Te maní ni cayeji cáhnu i pan tācá vehe jnáhan i nájñuhun ni steén yā, te ni cahíyo sñ ni i. ⁴⁷Te ni cacahān i jeē yóhyo cújéhu Yaā Dios. Te ndíhi ñayuu ñuu un ní cajejnúhún i ñayuu cácandíje. Te ndijnahan quiví ni jnama Jítóho yō sava ga ñayuu, te ni nduu inuú i jíin ñayuu cácandíje.

Jeē ní nduvāha tēe ríngo

3 Te in quiví te máá cáhuni jehíni ni caa Pedro jíin Juan

cuango de templo, chi hora un cájicān tahu jnāhan de hebreo. ²Te cájendēca ñayuu iin tēe cáríngo nde quivī ní cacu de. Te tēe un ndéé de ndijnahan quivī yehyí templo jeē naní Hermosa, jícān de caridad nuū tāca ñayuu quívicoo ini templo. ³Te tēe un ní jito de nuū Pedro jíin Juan jeē véji de quívicoo de ini templo, te ni jicān de caridad nuū Pedro jíin Juan. ⁴Te Pedro jíin Juan ni cajito vāha de nuū tēe ún. Te ni cahān Pedro jíin de:

Condēhe núū rī jijnáhan ri, achí de.

⁵Te máá tēe un ndétu tūhva de, ni jeni ni de jeē cuáha Pedro jíin Juan jecu xūhun núū de. ⁶Te ni cahān Pedro:

Tú na xūhun plata ni xūhun oro cánevāha ri. Te iyó iin jeē váha ga sáha ri jíin ró: jíin poder maá Jesucristo, Yaā ní jehnu ñuu Nazaret, cáhān rī jíin ró, ndocuiñī te caca ró, achí de.

⁷Te ni jniī de ndaváha tēe ún, te ni ndonehen de. Te jehē de jíin súcūn jehé de ni nduvāha-ni. ⁸Te iin ni scānda de máá de ni ndocuiñī de, te ni quejéé de jíca de. Te ni quivī de jíin Pedro jíin Juan ini templo, jíca de, cānda de, te nácuatáhú de nuū Yaā Dios. ⁹Te ni cajini tāca ñayuu jeē jíca de te nácuatáhú de nuū yā. ¹⁰Te ni canacuni i de jeē maá de cúu tēe ni condee yehyí templo jeē naní Hermosa, ni jicān de caridad. Te ni canaa ni i ní cajito i, te ni cayūhú i cájito i jeē ní nduvāha tēe ún.

**Jeē ní nacani Pedro jñūhun ini
corredor jeē naní Salomón**

¹¹Te tēe ni nduvāha ún, tu siáá de Pedro jíin Juan. Te ni cacutútú-ni

cuehē ñayuu nuū de ini corredor jeē naní Salomón, te ni canaa ni i cájito i. ¹²Te ni jito Pedro jeē ní cutútú ñayuu ún, te ni cahān de jíin i:

Níhín tēe ñuu yō Israel jijnáhan ní, ¿najehe cánaa ni ní cájito ní jniñu yáha? ¿Najehe cájito ní núū ná te cájeni ni ní jéé maá ná jijnáhan ná iyó poder na jéé sáha ná jéé nácaca tēe yáha? ¿Chí ní nduvāha de siquī jeē tēe cájica ndaā cácuu ná cájeni ni ní? ¹³Tuú chi máá Yáa Dios jíi yō Abraham jíin Isaac jíin Jacob jíin tāca gá jíi yō, ni sáha ya jniñu yáha návāha cuni ñayuu jeē cujéhnū Sēhe ya Jesús, Yaā jeē ní cajendēca ní núū tēe cácujehnū. Te ná ni cuni Pilato jeē siaá de ya, te tu ní cájēhe ni jnúhun. ¹⁴Te ni casquéhichī ní yá vēsú cúu ya Yaā ndaā, Yaā iī. Te sa suhva iin tēe jéhni ndīyi ni cacahān ni jíin Pilato jeē na siáá de. ¹⁵Te ni cacahān ni jéé na cúu Yaā jeē sáha jeē tēcu ndíhi-ni. Te Yaā Dios ni nastécu yā Jesús jeē ní cuu ya ndīyi, te máá ná cácuu testigo jeē ní natecu yā. ¹⁶Te tēe yáha jéé cájito ní te cánacuni ní de, ni candíje de jíin ná jeē iyó poder Jesús nasávāha ya de, te jeē yúcuan ní nasávāha ya de. Te jeē súcuan ni cacandíje ná ní sáha ya, jeē yúcuan ní nduvāha vāha de nájñūhun cájito ndíhi ní.

¹⁷Te na cástūhun ná nuū ni jijnáhan ní, je jíiní na jéé maá ní jijnáhan ní jíin tēe cácujehnū nuū yō, tu ní cájecūhun ni ní, te jeē yúcuan ní cajehni ni yá. ¹⁸Te súcuan ni squícu jñūhun ni cahān Yaā Dios nde jenahán jéé cánuú ndoho Cristo siquī cuéchi ñayuu, chi ni sáha ya jeē súcuan ni cacahān tēe ni canacani jñūhun ya nde jenahán. ¹⁹Te na

nácani ni ni jēē stóo ni cuéchi ní, te nasāma ini ní, te quivícoo ní ndaha Yaā Dios návāha ndahva yā cuéchi ní. Te quee quivī jeē ndúsī ni ni sáha máá Jítóho yō. ²⁰Te natají yá Jesús ndiji ya, chi cúu ya Cristo, Yaā ní jeni Yaā Dios jeē jnáma ya yohó. ²¹Te jíni nūhún jēē cóo ya andiví ndé nasájeé yá tāca jēē iyó, nájñuhun ni cacahān tēe ndoo ni canacani jñuhun nde jenahán ní sáha Yaā Dios. ²²Chi suhva ni nacani jíí yō Moisés jñuhun nuū tāca jíí yō: Máá Jítóho yō Yaā Dios cani ya Yaā nacani jñuhun nuū rō jijnáhan ró, nájñuhun ni jeni ya ruhū. Te cuu ya iin jnáhan ñuu yō. Te na chúhun ni rō tāca jñuhun jeē nácani ya ún. ²³Te núu ndé tée tú chuhun ni de jñuhun cahān yā, jnahnū ndetū de, te ma cúu ga de jnáhan ñayuu yā Israel, áchí Moisés.

²⁴Te tāca tēe ni canacani jñuhun nde jenahán, nde tiempo ni quiji Samuel te níí gá nde vijna, suni ni canacani de jñuhun siquī tācá jñiñu cúu quivī yáha. ²⁵Yucūn maá tēe ni canacani jñuhun ya nde jenahán cácuu yó, te suni siquī maá yó jijnáhan yó cúu jeē ni sáha Yaā Dios contrato jíín jíí yō. Chi ni cahān yā jíín Abraham: Yucūn maá ró cane Yaā sáha jeē quéndōo ndetū tāca ñáyuu níí cáhnu ñayiví, áchí yá. ²⁶Te jeē ní nastécu Yaā Dios Sēhe ya, te ni quiji ya nuū maá yó xíhna gā, návāha quéndōo ndetū yō sáha ya, chi sama ya anuá yō jeē ma sáha ga yō jñiñu neé, áchí Pedro.

Jeē ní cajendēca de Pedro jíín Juan nuū tēe cácujeñhu

4 Te Pedro jíín Juan níí cácahān gā de jíín ñáyuu ún

te ni quecoo tāca sūtū jíín tēe grupo saduceo, jíín tēe cácujeñhu nuū tēe cándito templo. ²Te yōhyo ni caquiñi ni de siquī jeē castéén Pedro jíín Juan nuū ñáyuu, jíín jēē cánacani de jñuhun jeē nátecu ndiyi chi je ni natecu Jesús. ³Te ni cajñi ún de, te ni cachuhun ún de vecāa cone de nde cundijin inga quivī, chi je ni ini. ⁴Te cuehē ñayuu jeē ní cajini sōho jñuhun ni cacahān Pedro jíín Juan ni cacandíje i. Te ni nduu nájñuhun uhūn mil jeē maá nene tēe jeē ní cacandíje.

⁵Te jeē ní cundijin inga quivī ún, te tēe cácujeñhu nuū ñáyuu hebreo jíín tēe jéñhu cándiso jñiñu jíín tēe cástéén jñuhun tutu ley yā, ni candutútú de ini ñuu Jerusalén. ⁶Te suni ni candutútú de jíín Anás jeē cúu sutū cujeñhu ga, jíín Caifás jíín Juan jíín Alejandro jíín tāca gá jeē cácuu jnáhan sutū cujeñhu ga ún. ⁷Te ni candacu jñiñu jeē na quijicoo Pedro jíín Juan condichi de mēhñū, te ni cacajñuhún de:

¿Ndé iin ni tejnñu róhó te ndese ni nihin jñiñu ró ní sáha ró jéē nduvāha tēe yáha? áchí.

⁸Yūcuán na te Pedro chi ni cunuú maá Espíritu Santo jíín de, te jíín poder yā ni cahān de jíín tāca tēe ún:

Tāca níhín tēe cácujeñhu nuū nūū yō Israel jíín tāca níhín tēe jéñhu cándiso jñiñu, ⁹vijna te cástíchí ni sáña síquī iin jñiñu váha ní casáha ná jéē ní nduvāha tēe cúhú yáha. ¹⁰Te na cástūhun ná nuū nihín jéē cácujeñhu ní, návāha suni cuni ndihí jnáhan ñuu yō Israel jeē jíín poder maá Jesucristo, Yaā ní jéñhu ñuu Nazaret, ni nduvāha tēe índichi

nuū ni yáha. Te suu ya cúu Yaā jeē ní cajehni ni jícā cruz, te ni sáha Yaā Dios jeē ní natecu yā. ¹¹Jesús cúu nájnūhun yuū cimientu jeē quítuu vehe. Te máá ní jijnáhan ní cácuu nájnūhun tēe casáha vehe, te ni casquéhichī ni yá nájnūhun jeē cátejiyo ní yūū, chi tu ní cácandíje ní yá. Te ni sáha Yaā Dios jeē cúu ya nájnūhun yuū cánuu gá jeē quítuu vehe. ¹²Te tú cuítī inga jeē cúu jnama yóhó, chi tuá na inga jeē cujéhnu ní jéni Yaā Dios ini ñayīvi yáha jēe cúu jnama yóhó, áchí Pedro.

¹³Yūcuán na te ni cajini un jēe Pedro jíin Juan jéhnu-ni cácahān de. Te je cájini jeē tú tūhva de, chi tēe súcuan-ni cácuu de. Te ni canaa ni cájito nuū de, te ni casáha cuenta jeē ní cajica de jíin Jesús. ¹⁴Te cándēhe núū tēe ni nduvāha un, índichi de jíin Pedro jíin Juan, te tu ní cánihīn gā modo ndese ga cahān. ¹⁵Yūcuán na te ni candacu jniñu jeē na quéndacoo sīin de yatā véhe juzgado te ndajnūhun máá jíjnáhan. ¹⁶Te ni cacahān:

¿Ndesa sáha yó jíin tēe yáha núu súcuan? Chi ni jitē jnūhun yáha núū tāca ñayuu ñuu Jerusalén jeē súcuan ni casáha de iin jniñu jéhnu, te ma cúu cahān yō jeē tu íyó ndāā. ¹⁷Te návāha ma cuité ga jnūhun yáha, na cúxeēn yō nuū de jeē ma cahān cuítī gā de jnūhun Jesús nuū ní iin ñayuu, áchí.

¹⁸Te ni cacana ún de, te ni cacahān nihin jíin de jeē ma cahān cuítī gā de jnūhun Jesús ni ma steén gā de jnūhun un núū ní iin ñayuu. ¹⁹Yūcuán na te ni cacahān Pedro jíin Juan:

Cani vāha ni ní te núu nújnahan ni Yaā Dios jeē stóo ná jniñu ní ndacu ya jeē sáha ná te cuandije ná máá na jniñu nándacu ní. ²⁰Chi ma cúu stóo ná jniñu jeē nácani ná jnūhun ní cajini sōho ná jíin jniñu ní cajito ná, áchí de.

²¹Yūcuán na te tēe ni cacutútú un ní cacuxeēn tucu de nuū Pedro jíin Juan. Te ni casiáá de cuango de, chi tú cuítī na modo stóho de chi cáyūhu cájito ñayuu, chi siquī jniñu jéhnu ni cuu ún te ndihi i cácahān i jeē yóhoyo cujéhnu Yaā Dios. ²²Chi tēe jeē ní sáha ya jniñu jéhnu jíin de jeē ní nduvāha de, víhyá gā uū xico cuiyā de.

Jeē ní cajicān tahú ñayuu cácandíje

²³Te ná ni casiáá un Pedro jíin Juan cuango de, te ni najinūcoo de nuū tāca gá jnáhan de, te ni cacachi de ndese ni cacahān sutū cácujeéhnu jíin tēe jéhnu cándiso jniñu. ²⁴Te jeē ní cajini sōho de jnūhun yúcuan, te inuú-ni ni cajicān tahú de nuū Yaā Dios:

Tátā Yaā Dios jeē cujéhnu ní núū ndihi, máá ní cúu Yaā Dios ni sáha andiví jíin ñayīvi jíin mar jíin tāca ndihi jeē iyó. ²⁵Te jeē jíin Espiritu Santo te ni sáha ní jēe ni cáhān mozo ní David nde jenahán:

¿Najehē cáquitī ndevāha ni ñayuu sīin nación?

¿Te najehē cájeni sáá ni i jeē ndóna i siquī ní?

²⁶Ni cacutútú jēe cácuu rey ñayīvi jíjnáhan,

te tēe cácujeéhnu ni cacutútú de, te inuú-ni ni candonda de siquī máá ní jeē cúu ní Jitoho ná, jíin siquī Cristo, Yaā jeē ní jeni ní.

Achí David.

²⁷Te jendaá chi Herodes jíin Poncio Pilato jíin táca tée ñuu yō Israel jíin tée tāca gá nación, ni cacutútu de ini ñuu yáha ní candonda de siquī Séhe ii ní Jesús, Yaā ní jeni ní. ²⁸Te súcuan ni cuu návāha squícu tācá jniñu jeē jíin poder ni ní cundaā ni ni ndé jenahán jéē súcuan coo. ²⁹Te vijna, Tātā, coto ní ndese cácahān xeēn de nuū na jíjnáhan ná, te cuāha ni fuerza ni núu na jéē cácuu ná mozo ni, návāha jéhnū-ni nacani ná jnúhun máá ní. ³⁰Te jíin poder ní nasávāha ni ñáyuu cácuñu, te sáha ní jniñu jéhnū jeē steén jeē cujéhnū ní. Te tāca jéē yáha sáha ní jíin poder Séhe ii ní Jesús, áchí i jíjnáhan i.

³¹Te nuū ní ndíhi ni cajicān tahu i, te nuū cáyūcu tútú i un ní sáha ya jeē ni jnáa. Te ndíhi i ni cunuú Espíritu Santo jíin i, te ni jēhe ya fuerza te jéhnū-ni ni canacani i jnúhun Yaā Dios.

Jeē ní canevāha cáhnu i ndajníñu

³²Te ñáyuu cuehē jeē ní cacandíje chi inuú cáhīyo ni i jíjnáhan i. Te tú ni ñin i ní cáhán jeē ndajníñu jeē névāha máá i cuu máá-ni i, chi tācá ndajníñu ni canevāha cáhnu i. ³³Te nihin cánacani apóstol jnúhun jeē ní cajito de jeē ní natecu Jitoho yō Jesús. Te yōhoyo ni chindéé ñáhán yá ñáyuu cácandíje. ³⁴Chi tú cuiti ni ñin i ní ndóho jeē cumaní nuū i, chi tāca ñáyuu cánevāha cuehē ñuhun chí vehe, ni cacicó i sava te ni caquindeca i xūhún un. ³⁵Te ni cajēhe i xūhún un núu tée apóstol, te ni casaja tée apóstol nuū ñáyuu

cacandíje núu ndese jíni ñúhún ñin ñin i. ³⁶Te íyó ñin tēe nání José jeē cúu yucūn Leví, ni cacu de Chipre, ñuhun jeē íne sñin nuū ndúte. Te tēe apóstol ni casnání de tēe ún Bernabé, jeē cuní cahān: tēe cáhán jnúhun ndeyí ni. ³⁷Te ni xícó de ñin ñuhun de, te ndáhá de xūhún un ní jēhe de nuū tēe apóstol.

**Siquī cuēchi jeē ní casáha
Ananías jíin Safira**

5 Te suni inga tēe nání Ananías jíin ñasihí de Safira, ni cacicó de ñin ñuhun de. ²Te ni chuvāha de sava xūhún un cuu máá de jíin ña, chi súcuan ni candajnúhún de jíin ña, te ndáhá de inga sava nájnúhun jeē ndíhi cúu, te ni jēhe de nuū tēe cácuu apóstol. ³Te ni cahān Pedro:

Ananías, ¿naun ni jēhe ro jnúhun jeē quívi jexeén, jeē cúu Satanás, ini anuá rō te stáhú ró Espíritu Santo cuní rō? Chi jeē ní cacicó ró ñuhun ró te cuēchi ró cúu jeē tu ní cáchi ndaā rō jeē ni squéndōo ró jecu xūhún un cuajníñu máá ró, chi ni sáha ró nájnúhun jeē ndíhi xūhun ní jēhe ró. ⁴¿Te á násūu cuenta maá ró cúu ñuhun un ndé ná tu xico ró? Te ná ni xico ró ¿te á násūu cuenta maá ró cúu xūhun jéē cuajníñu ró ndé nuū cuní máá ró? ¿Te naun ni jeni ni rō jeē stahú ró súcuan? Te nasūu máni máá tēe cúu jeē jícu ró stáhú ró, chi suni Yaā Dios, áchí Pedro.

⁵Te ná ni jini sōho Ananías tāca jnúhun yáha, te ni cotúú-ni de ni jihí de. Te tāca ñáyuu ní canihin jnúhun ún, yōhoyo ni cayūhú i.

⁶Te ni candocuiñi tēe suchí, te ni cachusúcun de ndíyi un cuáchindūji de.

⁷Te ni cunúu nájñuhun uní hora. Te ni jinū ñasihí ndíyí un ní quívi ña ini vehe ún, te tú na vé jiní cuíti ña. ⁸Te Pedro ni cajñuhún de ña:

Cachi nuū rí, ¿á ñin súcuan-ni ni caxico ró ñuhun ró chí tuú? áchí de.

Te ni cachi ña:

Suu súcuan-ni ni caxico ná, áchí ña.

⁹Te ni cahān Pedro jíin ña:

¿Naun ni casquíjnāhan jñuhun ró jēé cóto ndee rō Espiritu Santo maá Jítoho yō? Chi ni nducú ró stahú ró yā. Cuni nahín jēé cáhma nanecoo tēe cuachindūji yí ró, te suni súcuan quichindūji de rōhó, áchí de.

¹⁰Te ni cotúu-ni ña nuū jehé Pedro te ni jihí-ni ña. Te ni ndívicoo tēe suchí un te ni cajito de jēé jé ni jihí ña, te ni caquenehen de ña, te ni jechindūji de ña xiin yí ña. ¹¹Te yōhyo ni cayūhú ndívii ñayuu cáchandíje jíin táca gá ñayuu jēé ní cajini jñuhun jēé súcuan ni cuu.

Cuehē jniñu jéhnu ni casáha apóstol

¹²Te cuehē jniñu jéhnu jēé steén jēé cujéhnu Yaā Dios ni casáha tēe apóstol nuū ñayuu. Te tāca ñayuu cáchandíje, ñuú-ni cándutútú i ini corredor jēé naní Salomón. ¹³Te tu ní cáhundeyí ni inga ñayuu quijnāhan jíin i. Te cájejnūhún i ñayuu cáchandíje. ¹⁴Te ni nducuehē gā i, chi cúu tēe cúu ñahan ni cacandíje i máá Jítoho yō. ¹⁵Te cáquindeca ñayuu jnāhan i jēé cácuhū, te cájequin i ini calle cáca i nuū camilla jíin núu yúu, chi cáconi i wésú ste cuándahū Pedro na yáha siquí i te nduvāha i. ¹⁶Te suni cuehē ñayuu tācá ñuu cáhíyo

yajni yūcuan ní quiijicoo i ñuu Jerusalén ni caquindeca i jnāhan i jēé cácuhū jíin jēé cándoho tachí, te ndíhi i ni canduvāha i.

Jēé ní cajito xeēn i tēe cácuu apóstol

¹⁷Yūcuán na te sutū cujéhnu ga jíin táca gá jnāhan jēé cáchandíje sahān saduceo, ni cacucuésun ni jēé siquí tēe cácuu apóstol. ¹⁸Te ni cajni de tēe cácuu apóstol ni cachuhun de vecāa. ¹⁹Te ñin ndajéhé maá Jítoho yō ni nune ya yehyí vécaā ún jecuāā, te ni quenehen ya de jíjnāhan de. Te ni cahān yā jíin de:

²⁰Cuáhān te cuiñi ró ini templo, te yūcuán nacani cájí ró jñuhun nuū ñayuu siquí ndese nihín tahu i cotecu i níí cáni, áchí ndajéhé yā.

²¹Te ni cajini sōho de jñuhun yáha. Te nuū ní cundijin te nehen ni quívicoo de ini templo, te cástéén de jñuhun ya nuū ñayuu.

Te níni cástéén de te sutū cujéhnu ga jíin táca jnāhan de ni canastútú de tēe junta cujéhnu ga, jēé cúu ndíhi tēe jéhnu cándiso jniñu nuū ñayuu nación Israel. Te ni catají de policia cuaquenehen tēe apóstol ini vecāa. ²²Te nuū ni jínucoo te tuá gā tēe apóstol. Te ni canandió cóo te ni cacachi:

²³Jendaá cúu jēé ní cajito ná ndési vāha vecāa, te cáhiin tēe cándito yéhyí un. Te nuū ní canune ná, te tú cuíti gā tēe un cáhiin ini vecāa ún, áchí de.

²⁴Te sutū cujéhnu ga jíin tēe cujéhnu nuū tēe cándito templo jíin sūtū cácujeñnu, nuū ní cajini sōho de jñuhun yáha, te ni cajeni ni de ndese ga cúu un núu súcuan. ²⁵Te ni quee-ni ñin tēe te ni cachi:

Tēe jeē ní cachuhun ní vecāa, cáhiin de ini templo, te cástéén de jñūhun nuū ñáyuu, áchí de.

²⁶Yūcuán na te tēe cácujeñnu nuū tēe cándito templo, jíin tēe cácuu policia de, ni jengoo de, te yúcún ní nacueca de tāca tēe apóstol vendicoo de jíin, chi cáyūhú de jeē sanaa te cuāha ñayuu yuū xinī de núu sáha xeēn de jíin táca tēe apóstol. ²⁷Te nuū ní najinūcoo de jíin tēe apóstol, te ni cajecuiñī de nuū tēe cása ha junta. Te sutū cujéñnu ga ni cahān:

²⁸Ni cacahān nīhin ri jíin ró jeē ma steén cuiti gā rō jñūhun tēe nání Jesús. ¿Te naun ni casáha ró jēe ní ndecāva jñūhun un ñí ñuu Jerusalén yāhá? Te cácuni rō stau yáhu ró rúhū jijnáhan ri siquī jeē ni jíihī tēe ún, áchí.

²⁹Te Pedro jíin táca gá apóstol ni cacahān de:

Cánuu jēe squícu ná jniñu ní ndacu Yaā Dios nuū ná te nasūu jniñu nándacu tēe. ³⁰Máá Yāa Dios jíi yō ni nastécu yā Jesús, Yaā ní cajehni maá ní jeē ní cata caa ní yá jicā cruz. ³¹Te ni sáha Yaā Dios jeē ní ndujéñnu tucu Jesús néne ya ichi ndávaha Yaā Dios, te cúu ya Yaā ndácu jniñu, Yaā jnáma ñayuu. Te súcuan ni sáha Yaā Dios návaha yóhó, jēe cácuu yó ñáyuu Israel, na nácani ni yō jeē stoo yó cuéchi yó, te cone cáhnu ni yā nuū tāca cuéchi yó. ³²Te máá ná ni cajito ná táca jniñu yáha, te suni máá Espíritu Santo steén cají yá jeē súcuan cúu, chi jéhe Yaā Dios Espíritu Santo yā condee ini anuá tāca ñáyuu jeē cájendetū nuū yā, achí de.

³³Te ná ni cajini sōho un jnúhun yáha, te yōhyo ni caquiti ni, te

cahni de cácuni nuú. ³⁴Te mēhñú un jíjnáhan néne iin tēe grupo fariseo nání de Gamaliel, te cúu de maestro jeē steén ley yā, te tāca ñáyuu cájejnúhún i de. Te ni ndocuiñī de, te ni ndacu de jniñu jeē na cújiyo núu tēe apóstol. ³⁵Te ni cahān de:

Róhó jnáhan ñuu yō Israel, cani vāha ni rō núu na vé cácuni rō sáha ró jíin táca tēe yáha. ³⁶Chi nucūhun ni rō jeē iin cuiyā ni ndonda Teudas siquī gobierno, te ni cahān de jeē tēe téyí cúu de, te ni cacutútú nájñūhun cuūn ciento tēe jíin de. Yūcuán na te ni cajehni ñayuu Teudas, te tāca jēe ní caquijnáhan jíin de ni cajitē núu cuangoo sáa-ni, te ni jecuiñī-ni jniñu ún. ³⁷Yūcuán na te quivī ni íyo censo te Judas, iin tēe Galilea, ni ndonda de siquī gobierno, te ni cacutútú cuéhē tēe jíin de. Te suni ni cajehni ñayuu Judas, te tāca tēe jeē ní caquijnáhan jíin de ni cajitē núu cuangoo. ³⁸Te vijna na cuáha ri consejo rohó. Ma stáhān gā rō tēe yáha. Siáá de na quíngoo de. Chi núu ñayuu-ni ni squejéé jniñu yáha, te jecuiñī ii. ³⁹Te núu Yaā Dios ni squejéé, te ma cúu casi rō, chi sanaa te siquī Yaā Dios cándonda ró, áchí de.

⁴⁰Te ni cachusóhó jēe ni cáhān Gamaliel. Te ni canacana tēe cácuu apóstol, te ni cacani de jíin cuarta ñii te ni cacahān xeēn jíin de jeē ma cahán gā de jñūhun Jesús, te ni casiáá de cuangoo de. ⁴¹Te máá apóstol ni quendacoo de nuū junta cuangoo de, cácusii ni de jeē ni jéhe ya jñūhun ndoho de jeē cuáha ñayuu jñūhun canu de siquī jeē cácandíje de ya. ⁴²Te ndiquivī

castéén de jñuhun vāha Jesucristo, te cánacani de jñuhun ún ini templo jíín táca-ni vehe.

Jeē ní cajeni de uxā tēe cuajníñu mēhñu ñáyuu cácanđíje

6 Te ni cucuehē ñayuu cácanđíje. Te tiempo un te tēe hebreo jeē cácahān yuhu griego, ni quejéé de cácahñu de nuū jñáhan hebreo de, áchí de jeē ñahan viuda jeē cácahān yuhu griego tu cániñin vāha ña staā jeē cása de táca quívī cuu ña. ²Yūcuán na te máá ndihúxí uū apóstol ni canastútú de táca ñáyuu cácanđíje, te ni cacahān de:

Tú vāha jeē jécuiñī jniñu jeē cánacani ri jñuhun Yaā Dios siquī jeē cása rī staā. ³Núu súcuan te róhó, hermano, nacāji ró úxā jñáhan máá yó, te na cóndiso jñíñu de saja de staā. Te nacāji ró tēe jeē cájejnúhún ñáyuu de, tēe ndíchí jeē ní cunuú Espíritu Santo jíín de. ⁴Te ruhū jíjnáhan ri, máni cacān tahu rī jíín jēé nácani ri jñuhun ya, achí de.

⁵Te ndíhi ñayuu ni canujnahan ni i jñuhun ni cacahān de. Te ni canacāji i Esteban, tēe cándíje vāha jeē ní cunuú Espíritu Santo jíín de. Te suni ni canacāji i Felipe jíín Prócoro jíín Nicanor jíín Timón jíín Parmenas jíín Nicolás. Te Nicolás cúu tēe ñuu Antioquía, te ni nduu de tēe cándíje sahān ñayuu hebreo nde ná tu candíje de jñuhun Cristo. ⁶Te ni cajeni i táca tēe yáha núú tēe cácuu apóstol, te tēe apóstol un ní casoó de ndaha de xini táca tēe un ní cajicān tahu de nuū Yaā Dios siquī jñíñu condiso de.

⁷Te jñuhun Yaā Dios ni jitē gā cuahān, te ni nducuehē teyí ñáyuu

cácanđíje i jñuhun ya ini ñuu Jerusalén. Te suni cuehē sutú ni cacandíje de jñuhun ya.

Jeē ní cajnií de Esteban

⁸Te ni chindéé ñáhán yá Esteban ni jēhe ya poder nuū de, te ni sáha de táca jniñu jéhnú nuū ñáyuu, jniñu jeē steén jeē cujéhnú Yaā Dios.

⁹Te ñáyuu hebreo jeē ní cacuyāhu i te ni canduu libre i, íyó vehe ií sinagoga i. Te tēe un cácuu tēe ñuu Cirene jíín tēe ñuu Alejandría jíín tēe Cilicia jíín tēe Asia. Te sava tēe un ní caquejéé de cástáhān jñáhan de jíín Esteban. ¹⁰Te tu ní cácuñdeyí jíín de, chi ndíchí ní cahān de ni sáha máá Espíritu Santo. ¹¹Yūcuán na te ni cascáhān sava tēe jeē na cáhān jñuhun stáhú síquī Esteban. Te ni cacahān jeē ní cajini sōho cáhān ndevāha Esteban siquī

Moisés jíín síquī Yaā Dios. ¹²Te jeē súcuan ni cacahān te ni caquītī ni táca ñáyuu jíín tēe jéhnú cándiso jñíñu jíín tēe cástéén jñuhun tutu ley yā. Te ndíhi de ni candonda siquī Esteban, te ni cajnií de cuangoó jíín de nde nuū junta cujéhnú ga. ¹³Te ni cajeni de tēe cahān jñuhun yáa síquī Esteban, te suhva ni cacahān:

Tēe yáha tu ndé jécuiñī de jeē cahān ndevāha de siquī templo ií yáha jíín síquī ley yā. ¹⁴Chi ni cajini sōho ná cáhān de jeē Jesús, tēe ni jéhnú ñuu Nazaret, canu de templo yáha te nasama de jeē tajnúní ley yā jeē ni jēhe Moisés nuū yō, áchí.

¹⁵Yūcuán na te ndíhi tēe cáyūcu núú junta un ní candacoto vāha nuū Esteban, te ni cajini jeē jíto nuū de ná jíto nuū iin ndajéhé Yaā Dios.

Jnūhun ni nacani Esteban

7 Te máá sūtū cujéhnu ga ni cajnúhún Esteban:

¿A ndáa jeē súcuan ni sáha ró nájnūhun cácahān de yāhá? áchí.

²Te ni cahān Esteban:

Ndihí níhín jéē cácuu ní jnáhan ñuu yō, jíin ndihí níhín jéē cácujuhnu ní núū ñúū yō, cuni nahín ní jnūhun cahān ná: Máá Yāā Dios jeē yóhyo cújéhnu ya, ni steén yā maá yá nuū jíí yō Abraham nde na néne ga de región Mesopotamia, nde ná tu quihín de condee de ñuu Harán. ³Te ni cahān yā jíin de: Stóo ñuu rō jíin táca jnáhan ró te quihín rō nuū cuáha ri condee rō, chí máá rí steén ichi nuū quihín rō, achí yá. ⁴Yūcuán na te ni quenda de región Caldea, te ni jinū de ni condee de ñuu Harán. Te yūcuan ní jihí tatá de. Yūcuán na te ni sáha Yāā Dios jeē ní quee de ñuu yáha núū cáyūcu yó vijna. ⁵Te tu ní jéhe ya ni iin tíhlí ñuhun yáha cuu tahū de. Te vēsú súcuan te ni jejnūhun ya jeē cuáha ya ñuhun un núū de nde jíin núū táca séhe de, vēsú ná tu coo séhe de sáá. ⁶Te súcuan ni cahān Yāā Dios jíin de: Sēhe ró coyūcu jíca i inga ñuu, te cuūn ciento cuiyā sájniñu sáá-ni i te stóho ñayuu yúcuan i. ⁷Te siquī jeē súcuan sáha i jíin séhe ró, te máá rí chí stóho ri ñayuu ñuu ún. Te sáá te quendacoo séhe ró yúcuan, te nucoyúcú i yāhá chinúhún i ruhū, achí yá. ⁸Te ni cahān yā jíin Abraham jeē na cúu de circuncidar, jeē cúu iin jnuni jeē ni sáha ya contrato jíin de. Te ná ni cacu séhe de Isaac te ni sáha de circuncidar i nuū uná quivī. Te

suni súcuan ni sáha Isaac jíin séhe de Jacob, te Jacob jíin séhe yíí de jeē cácuu ndihúxí uū yucūn ñayuu Israel.

⁹Te táca séhe Jacob ni cacucuésún ni de jíin ñani maá de José, te ni caxicó de i nuū tée jeē ní cajendēca i nde nación Egipto. Te Yāā Dios chí ni ndito ya José. ¹⁰Te ni jnama ya i nuū táca jnúndóho ní jito i, te ni cundíchí i ni sáha ya. Te Faraón, tēe cúu rey nación Egipto, ni cusīi ni de jíin i ni sáha ya, te ni tejniñu de José jeē cúu de gobernador te ndacu de jniñu nación Egipto jíin núū ñayuu cáyūcú vehe Faraón.

¹¹Te ni quiji quivī jeē ni íyo iin jnamā xeēn, te ni ndoho ñayuu ní cáhnu nación Egipto jíin ndé ñuu Canaán. Te táca jíí yō ún, tuá ni cánihín de jeē cáji de. ¹²Te ni nihín Jacob jnūhun jeē iyó trigo nde nación Egipto, te ni tají de séhe de ni jengoo de ni cajeen de trigo vuelta iin. ¹³Te jeē cuángoo de vuelta uū te ni nastúu José jeē maá de cúu ñani de jíjnáhan de. Yūcuán na te ni jini rey Faraón ndé iin jnáhan cúu José. ¹⁴Te ni cahān José jíin táca ñani de jeē na cóndeca de tátá de Jacob jíin ndihí jnáhan vehe de. Te ni íyo uní xico xahūn i. ¹⁵Te súcuan ni cuu jeē ní jinū Jacob ni condee de nación Egipto nde ni jihí de. Te suni yūcuan ní coyūcu séhe de jeē cácuu jíí yō un ndé ni cajihí maá de. ¹⁶Te ná ni quee quivī jeē ndénehen ya táca yúcūn de jeē cáyūcu tátú de nación Egipto, te ni cacondiso de yiqui ndihúxí uū ndīyí jíí un jéē ndjíi ñuu Siquem, te ni cachindūji de ini yaū ndīyí ndeé

jicā cáva jeē ní jeen jíi yō Abraham nuū tāca séhe Hamor ñuu Siquem.

¹⁷Te nde ná cáyūcu gá de nación Egipto, te cuacuyajni quivī jeē squícu jñūhun ni cahān Yaā Dios jíin Abraham jeē quéndacoo séhe de nucoyūcú i ñuu ni jéjñūhun ya nuū i, te ñayuu un ní tahū cuehē i ini nación Egipto. ¹⁸Yūcuán na te ni nucuññī inga rey ñuu Egipto jeē tu ní jíin de jeē váha ni sáha ndīyi José. ¹⁹Te rey un ní stahú de tāca jíi yō te ni sáha ndevāha de jíin i, chi ni sáha fuerza de i jeē ma cóto ga i séhe yiquín i te na cúu. ²⁰Te tiempo un ní cacu Moisés, te ni cusī ni Yaā Dios jíin i. Te unī yoō ni condito sāhi náná i tátá i. ²¹Te tuá ni cúu condito sāhí de i, te ni cachune de i nuū nanihīn séhe síhí Faraón i, te ni naquihīn séhe ña i ni scuēhnu ña i nájnūhun séhe máá ña. ²²Te ni cutūhva Moisés tāca jñūhun ndíchí ñuu Egipto, te ni cujéhnu de jíin jñūhun cáhán de jíin jniñu sáha de.

²³Te nuū uú xico cuiyā de te ni jecondēhē de jnáhan de jeē cácuu ñayuu Israel. ²⁴Te ni jito de nuū ñin tēe nación Egipto jeē sáha ndevāha jíin ñin tēe Israel. Te Moisés ni jnama de jnáhan de Israel ún, chi ni jehni de tēe Egipto un. Te súcuan ni ndutahū jeē ni sáha ndevāha jíin jnáhan de ún. ²⁵Te máá Moisés jéni ni de jeē jécūhun ni tāca jnáhan de jeē Yāā Dios ni tají yá de jeē jnáma de jnáhan de ún ini nación Egipto nuú, te tu ní cájecūhun cuiti ni jnáhan de ún. ²⁶Te inga quivī suni ni jito de nuū uú tēe Israel jeē cájejnáhan, te cúní de jeē na jécuiññī. Te jeē yúcuan ní cahān de jíin: ¿Najehē casáha ndevāha ró jíin

jnáhan ró? Chi nájnūhun ñin ñani-ni cácuu ró, áchí de. ²⁷Te máá tēe cáni tahū jnáhan un ní chundahá de Moisés te ni cahān de: ¿Ndé ñin ni jeni róhó jéē cujéhnu ró núu rī te sándaā rō jniñu ri jijnáhan ri?

²⁸¿Chí suni cúní rō cahni rō ruhū nájnūhun ni jehni rō tēe Egipto icu chí naún? áchí de jíin Moisés. ²⁹Te nuū ní jini sōho Moisés jñūhun yáha, te ni yūhú de jeē cáhni rey de, te ni jinu de cuahān de inga nación. Te ni condee de ñuu jicá Madián, te yūcuan ní scácu ñasihí de uū séhe yíi de.

³⁰Te ni jinu uū xico cuiyā jeē néne de yūcuán. Yūcuán na te ñin ndajéhé Yaā Dios ni quenda ya nuū de nde nuū ñūhun téhé nuū íin yucu súcún Sinaí. Te ni quenda ya nuū de xinī ñin yucū cuíi cáhnu cándahá yáñuhūn, te tu ní cáyú yucū ún. ³¹Yūcuán na te Moisés ni naa ni de jíto de ún, te ni jehēn de nde nuū, návāha coto váha de. Te ni jini sōho de jeē cahán maá Jítoho yō jíin de: ³²Máá rí cúu Yaā Dios tāca jíi rō jenahán, Abraham jíin Isaac jíin Jacob, achí yá. Te Moisés, quísi i de jeē yūhú de, te jeē yúcuan tuá ni cúndeyí ni de coto de nuū. ³³Te máá Jítoho yō ni cahān yā jíin de: Quenehen ndijēn rō chi nuū íin ró, ñūhun íi cúu. ³⁴Je ni jini rī ñayuu maá rí jeē yóhoyo cándoho i nación Egipto, te suni jíin sōho ri jeē cájnana uhū i, te ni cuun ri vēji ri jeē jnáma ri i jíjnáhan i. Núu súcuan te vijna chi tají rí rohó ndicó ró quihīn rō nde nación Egipto, achí yá jíin de.

³⁵Te nde ná tu quenda Moisés Egipto, te tāca jnáhan de ni

casquéhichī i de jeē ní cacahān i jíin de: ¿Ndé iin ni jeni róhó jéé cujéhnū ró núū rī te sándaā rō jniñu rī? ni cacahān i jíin de. Te vēsú súcuan te máá ndajéhé Yaā Dios ni quenda nuū Moisés un jéé cándahá cáyú yucū cuíí ún. Te súcuan ni cuu jeē ní natají yá de cuanhun de nde Egipto jeē ndácu de jniñu nuū i te jnama de i. ³⁶Te máá Moisés ni sáha de jeē ní quendacoo jnáhan ñuu de ini nación yúcuan, te ni cayāha de Mar Rojo, te ni cajica cuu de ñuhun téhé úū xico cuiyā. Te níí tiempo un ní sáha de cuehé jniñu jéhnū jeē steén jeē cujéhnū Yaā Dios. ³⁷Te máá Moisés cúu jeē suhva ni cahān de jñūhun yáha jíin jnáhan ñuu yō Israel: Máá Yāā Dios cani ya Yaā nacani jñūhun nuū rō jijnáhan ró nájñūhun ni jeni ya ruhū. Te cuu ya iin jnáhan ñuu yō. Te na chúhun ni rō jñūhun cahān Yaā ún, áchí. ³⁸Te suni nde ná ni cajica cuu jíí yō nde nuū ñūhun téhé, te ni cahān ndajéhé yā jíin Moisés xinī yúcu súcún Sinaí, te ni nihīn de jñūhun jeē cahān ndese nihīn tahú yō cotecu yō, te ni nacani de jñūhun un núū tāca jíí yō, te ni quendōo jñūhun un núū yō.

³⁹Te tāca jíí yō ún tu ní cáculi de cuandetū de nuū Moisés, chi sa suhva ni cacuni de squéhichī ni de Moisés, te ni cacuni de nandicó de nungoo de Egipto nuú. ⁴⁰Te ni cacahān de jíin Aarón: Sáha ní tijnī yaā na cósnūu núū yō. Chi Moisés, jeē ní quenehen de yóhó Egipto vējicoo yó, tu cájini yō na vé ni ndoho de jeē tú de ndéé jeē cuahán de xinī yucu Sinaí, achí. ⁴¹Yūcuán na te ni cajéhe de oro ni cuvāha

iin becerro oro, te nuū becerro ídolo un ní casocō de quitī, te ni cacusiī ni de jíin ídolo ni casáha de ún. ⁴²Te Yaā Dios ni cujiyo ya cuahān yā, te ni stóo ya de na chíñúhún de nuū tāca jéé jíto yó iin andiví, nájñūhun yósó núū tútu tēe ni canacani jñūhun Yaā Dios nde jenahán:

Ni cahān yā: Róhó ñáyyu Israel, éá cájeni ni rō jeē nuū ruhū ni casocō rō quitī ná ni cajica cuu ró úū xico cuiyā nde nuū ñūhun téhé?

⁴³Tuú, chi sa suhva ni cacondiso ró nicho jeē íne ídolo jeē naní Moloc

jíin figura quīmi jeē naní Renfán,

ídolo jeē ní casáha máá ró ni cachiñúhún ró.

Jeē yúcuan cúu jeē siáha ri rohó quíhīn jicá ró nde yatā núū Babilonia, achí yá.

⁴⁴Te ni ndacu ya jniñu nuū Moisés jeē na sáha de vehe ñīi nuū chíñúhún de ya, nájñūhun cáca jeē ní steén yā nuū de. Te tāca jíí yō, nde nuū ñūhun téhé ní canevāha de vehe iī un núū ní cachuvāha de tabla yuū jeē yosó jñūhun ley yā. ⁴⁵Te ni castóo de vehe un núū ndīhi sēhe de jeē cúu jíí yō. Te ni quīvi Josué jíin jíí yō ini nación yáha, te ni sáha ya jeē ní cacundeyí de jíin tāca ñáyyu jeē ní cacoyūcu yáha ní cajinu i cuango i. Te ni quīvicoo de tāca ñuu i jíin vehe iī ún, te ni quendōo nde quīvī ní cuu David rey. ⁴⁶Te ni cusiī ni Yaā Dios jíin rey David. Te ni jicān de nuū yā jeē sáha de iin vehe iī yā nuú, chi máá yá cúu Yaā Dios jíí de Jacob. ⁴⁷Te ni

cuu jeē nde sēhe yí de Salomón ni sáha vehe ií yā. ⁴⁸Te vēsú súcuan ni cuu te Yaā cujéhnu téyí, tu ndéé yá maá vehe jeē casáha ñayuu, nájnūhun ni cahān tēe ni nacani jnūhun ya nde jengahān:

⁴⁹Ni cahān yā:

Andiví cúu nájnūhun mesa nuū ndácu ri jniñu

te ñayiví cúu nájnūhun iin nuū yítuu jehē rī.

Núu súcuan ¿te ndese cuu sáha ró vehe jeē cóndee rī, te ndese cuu sáha ró nuū ndétātu rí?

⁵⁰¿A násūu maá rí ní sáha ndihí jeē iyó?

áchí maá Jítoho yō Yaā Dios.

⁵¹Te cáhān gā Esteban:

Yōhyo cácuñihni ni ní, te tu cácuñi ní chusóhó ní, te cácuñi ní nájnūhun ñayuu táca nación jeē tu cájini i jnūhun ya ni tu cácuñije i ya. Chi níni cájesi ni nuū Espiritu Santo, te nájnūhun ni casáha jí yō jengahān, suni súcuan casáha ní vijna. ⁵²¿A ní iyo tēe nacani jnūhun ya nde jengahān jeē tu ní sáha ndevāha jí yō jíin de? Chi jí yō ni cajehni de tēe ni canacani jnūhun jeē quíji maá Yāā ndaā. Te je ni quiji Yaā ún, te maá ní ni canastúu ni yá nuū tēe ni cajehni de ya. ⁵³Te vēsú nde jíin táca ndajéhé yā ni jēhe ya ley yā nuū yō, te maá ní chi tu cásquícu ní, áchí Esteban.

Jeē ní cajehni de Esteban

⁵⁴Tāca jnūhun yáha ní cajini sōho, te yōhyo ni caquítī ni, te cácuñayihí yuhu cájito nuū Esteban. ⁵⁵Te maá Esteban chi ni cunuú Espiritu Santo jíin de. Te ni jito de ichi ándiví, te

ni jini de jeē ndíndēe núu néne Yaā Dios, te índichi Jesús ichi ndávāha ya. ⁵⁶Te ni cahān de:

Vijna te jíto ri jeē núne andiví, te jíto ri nuū maá Yāā ní nduu tēe, índichi yā nuū cujéhnu ya lado váha Yaā Dios, áchí de.

⁵⁷Yūcuán na te ni cajesi un sóho, te ni cacana cóhó, te inuú-ni ni candonda siquī Esteban. ⁵⁸Te ni caquenehen Esteban cuangoó jíin de nde yatā ñuū. Te tēe ni cacahān yaá un jíin ndihí jnahān de ni cachucú de ticāchí de ndíto iin tēe suchí nání Saulo, te ni cacani de yuū xiní Esteban. ⁵⁹Te níni jéé cácani táca tēe un yúu xiní de te ni jicān tahu de nuū yā:

Tátā Jesús jeē cúu ní Jitoho ná, naquihin ní ánuá na vijna, áchí de.

⁶⁰Te ni jecuiñí yití de te ni cahān jee de:

Tátā Yaā Dios, ma quénehen ní cuéchi siquī i jeē casáha i jíin ná, áchí de.

Súcuan ni cahān de te ni jihí-ni de.

Jeē ní jito xeēn Saulo ñayuu cácuñije

8 Te Saulo, ni nujnahan ni de jeē ni jíhí Esteban.

Te quiví un ní caquejéé de cájito xeēn ndasí de ñayuu cácuñije Jesús ini ñuu Jerusalén, te jeē yúcuan cúu jeē ní cajitē núu ñayuu cácuñije cuangoó i ní Judea jíin ní Samaria. Te tēe apóstol chi tu ní cájite núu de. ²Te sava tēe yíñuhún núu Yaā Dios, ni cachindūji de Esteban. Te yōhyo ni candahyū de jeē ni jíhí Esteban. ³Te Saulo chi jíto xeēn de ñayuu cácuñije, te

quívi de ndijnahan vehe te jní de tēe, ñahan, chúhun de i vecāa.

**Jeē ní canacani i jñuhun Yaā
Dios ndañúú Samaria**

⁴Te tācá ñuu nuū cuángoo tāca ñáyuu ní cajitē núu un ní canacani i jñuhun ndese jnáma Yaā Dios ñayuu. ⁵Te ni jinū Felipe ñin ñuu ndañúú Samaria, te nuū ñáyuu yúcuan ní nacani de jñuhun Cristo, Yaā ní jeni Yaā Dios jeē jnáma ya yohó. ⁶Te tāca ñáyuu ní cacutútú un ní cajini nahín váha i tāca jnúhun ni nacani Felipe, te ni cajito i tācá jniñu jéhu ni sáha de. ⁷Chi cuehē ñayuu cándoho tachī ni canduvāha i, te cācana cōhó táchī un ní caquendacoo. Te cuehē ñayuu ni íjin jíin ñáyuu ríngo ni canduvāha. ⁸Te jeē yúcuan ní cacusiñ teyí ni ñayuu ñuu ún.

⁹Te ini ñuu un néne ñin tēe nání Simón, te tēe tásí cúu de. Te nde ná tu jinū Felipe ñuu Samaria, te yōhyo cánaa ni ñayuu ñuu un cājito i jeē sáha Simón, te ni stahú de i ni cahān de jeē ñin tēe cújéhu tēyí cúu máa de. ¹⁰Te nde tēe cācujéhu jíin ndívii cuiti ñayuu, cājetáhú ndasí i jñuhun cāhān de, te ni cajeni ni maá i te ni cacahān i:

Tēe yáha ní jēhe Yaā Dios cuehē poder nuū de, áchí i.

¹¹Te cājetáhú váha i jñuhun cāhān de, chi cuehē tiempo ní sáha de jniñu stáhú ní canaa ni i ni cajito i.

¹²Te nuū ni jinū Felipe, ni nacani de jñuhun váha ndese ndácu Yaā Dios jniñu, jíin jnúhun Jesucristo, te ni cacandíje i te ni cajendute i, cúu tēe cúu ñahan. ¹³Te suni máa Simón ni candíje de te ni jendute de, te ni

jica cuu de jíin Felipe. Te ni naa ni de jíto de tācá jniñu jéhu jeē sáha Felipe jeē steén jeē cujéhu Yaā Dios.

¹⁴Te cáyūcu tēe apóstol ñuu Jerusalén, te ni canihin de jñuhun jeē ñáyuu Samaria ni cacandíje i jñuhun Yaā Dios. Te ni catajé de Pedro jíin Juan cuangoo de yūcuán. ¹⁵Te ni jinūcoo de, te ni cajicān tahu de jehē ñáyuu un návāha na quívi Espíritu Santo ini anuá i jíjnáhan i. ¹⁶Chi ná tu quívi ya ini anuá ni ñin i, chi máa-ni jeē ní cajendute i jeē ní cacandíje i Jitoho yō Jesús. ¹⁷Yūcuán na te Pedro jíin Juan ni casoó de ndaha de xiní i jíjnáhan i, te ni quívi Espíritu Santo ini anuá i.

¹⁸Te ni jito Simón jeē súcuan casoó apóstol ndaha de xiní ñáyuu ún te súcuan quívi Espíritu Santo ini anuá i, te cúní de cuāha de xūhun núu tēe apóstol návāha nihin de poder un núu. ¹⁹Chi ni cahān de:

Cúní na jēe cuāha ní poder yáha núu na, návāha núu ndé ñáyuu soó ná ndaha ná xiní i te quívi Espíritu Santo ini anuá i, áchí de.

²⁰Yūcuán na te ni cahān Pedro jíin de:

Na náa xūhun ró je jnahnū ndetū rō siquī jeē jéni ni rō jeē jíin xūhun te cuu cuaan ró táhū jeē véji nuū Yaā Dios. ²¹Ma nihín tahu rō jeē sáha ró jniñu yáha, chi tu íyó ndāa anuá rō nuū Yaā Dios. ²²Núu súcuan te jíni ñúhún jēe stóo rō jnúhun jeē jéni néé ni rō súcuan te cahān ndahú ró jíin Yāa Dios, te máa yá sanaa te cone cāhnu ni yā siquī jeē jéni néé ni rō súcuan. ²³Chi jíiní rī jeē cucuésún ni rō siquī

jeē sāha ri jniñu yáha. Te tāca jēē neé jéni ni rō ni cunuú un jíin ró, achí Pedro jíin de.

²⁴Yūcuán na te ni cahān Simón jíin de:

Cacān tahu ni jēhē na jíjnāhan ní núū maá Jítóho yō návāha tú jnahnū ndetū na nájñuhun ni cahān ní, achí de.

²⁵Te Pedro jíin Juan ni cacahān cají de ndese cácanđije de jñuhun Yaā Dios. Te jeē cuánungoo de ichi nūū Jerusalén, te tiji ni ndaúū Samaria ni canacani de jñuhun jeē jnáma ya ñayuu.

Felipe jíin tēe nación Etiopía

²⁶Yūcuán na te ni cahān ndajéhé maá Jítóho yō jíin Felipe:

Quihin ichi te quihīn rō ichi sur, ichi jeē quēnda Jerusalén cuahān nde ñuu Gaza, achí yá.

Te ichi chūcuan chí máá ñuhun téhé cúu. ²⁷Te ni quihin Felipe ichi cuahān de. Te nde nación Etiopía ni quiji ñin tēe eunuco jeē ndíso jniñu de cúu de tesoroerō nuū ñāhan cúu reina ndácu jniñu nación Etiopía, nání ña Candace. Tēe un ní quichiñúhún de Yaā Dios ñuu Jerusalén. ²⁸Te cuanuhun de néne de nuū carreta de, te cáhu de tutu jeē ní tee Isaías, tēe ni nacani jñuhun Yaā Dios nde jenahán. ²⁹Te máá Espíritu ni cahān yā jíin Felipe:

Cuáhán quíjnahan rō tēe cuahān jíin carreta un.

³⁰Te ni jejnahan Felipe carreta un, te ni jini sōho de jeē cáhu tēe ún tutu jeē ní tee Isaías. Te ni cajñuhún de tēe ún:

¿A jécūhun ni ni jñuhun jeē cáhu ní chí tuú? achí de.

³¹Te ni cahān maá tēe un jíin Felipe:

¿Te ndese jecūhun ni ná? Chí tú na tēe castūhun núū ná ndese cúu ún, achí de.

Te ni cahān de jíin Felipe jeē na cáa de conēne ndúú de jíin de ini carreta.

³²Te jñuhun cáhu de tutu ñi un cahán suhva:

Nájñuhun lanchi jeē cuahán tī nuū cúu tī, súcuan ni casáha ñayuu jíin yá.

Te nájñuhun ñin londe quiti sáte jēē tu dáhyú tī, súcuan ni sáha ya,

chí tú na vé ni cáhan cuiti yā ná ni cajicān i cuēchi síquī yā.

³³Te hora jeē ní cajēhe i jñuhun canu yā, tu ní casáha ndaā i síquī yā jíin jñuhun ndaā, te ni cajehni i ya ini ñayivi yáha. Te coo cuehē ñayuu candije nuū yā jeē ma cánda ni ñin ñayuu cahu i ñayuu ún.

Achí.

³⁴Yūcuán na te ni cahān tēe Etiopía un:

Cava vāha ni ní cachi ni núū ná, ¿ndé síquī cahán tēe ni nacani jñuhun yáha? ¿A síquī maá de chí síquī ínga tēe? achí de jíin Felipe.

³⁵Yūcuán na te ni nacani Felipe jñuhun vāha Jesús nuū tēe ún, chí ni quejéé de ni castūhún de jñuhun jeē ní cahu tēe ún, jíin táca gá jñuhun jeē yosó núū tútu yā.

³⁶Te níni cuángoo de ichi ún te ni jinūcoo de nuū ñuhun ndute, te ni cahān tēe Etiopía:

Yāha ñuhun ndute ¿te á tú cuu cuandute ná? achí de.

³⁷Te ni cahān Felipe:

Cuu te núu cándíje nīhin ni ndé jíin ini jíin ánuá ni táca jéē ni sáha Jítho yō Jesús jehē yō, achí de.

Te ni cahān tēe Etiopía:

Cándíje ná jéē Jesucristo cúu máá Séhe Yaā Dios, achí de.

³⁸Te ni sáha de jeē na jécuiñī carreta de, te ni nuu ndíndúu de cuangoo de ichi véyí núu ñūhun ndute ún, te ni scuándute Felipe tēe Etiopía. ³⁹Te nuū ní quendacoo de nuū ndúte, te Espírítu máá Jítho yō ni sáha ya jeē ní ndoñhún-ni Felipe. Te tēe Etiopía vēsú tuá ni jíto de nuū Felipe, te cúsiñi ni de cuahān de. ⁴⁰Te ni nane Felipe ñuu Azoto. Te nácani de jñūhun ndese jnáma ya ñayuu, cuahān de tǎcá ñuu nde ni jinū de Cesarea.

Jeē ní nasāma ini Saulo ni sáha Jesucristo

(Hch. 22.6-16; 26.12-18)

9 Te Saulo chi máni cáhán de jeē cáhni de tǎca ñayuu cácandíje i máá Jítho yō, te jeē yúcuan ní jehēn de nuū sutú cujéhnu ga. ²Te ni jicān de carta jeē cahán jeē quihín de tǎcá vehe ñi sinagoga ñuu Damasco te cuhni de tēe ñahan jeē cácandíje i Jesús, quiji de jíin i ñuu Jerusalén nuú. ³Te ni quihin de ichi cuahān de. Te cuacuyajni de ñuu Damasco, te sanaa-ni te ichi ándiví ní stíndēē ñi luz nuū de. ⁴Te ni cotúu-ni de nuū ñūhun, te ni jini sōho de ñi jñūhun cáhán jíin de:

Saulo, Saulo, ¿najehe jíto xeēn rō ruhū? achí.

⁵Te ni cahān máá de:

¿Na nihín cúu jeē cahán, Tátā?

Te ni cahān yā jíin de:

Máá rí cúu Jesús, te jeē jíto xeēn rō ñayuu cácandíje i ruhū cúu jeē jíto xeēn rō ruhū. Te jeē sáha rō súcuan cúu nájñūhun stiquí jeē tu jéndíje ti te jéñú yatá tí xinī pulla, te súcuan stóho ti máá tí, achí yá.

⁶Te máá de chi quísi i de jeē yūhú de, te ni cahān de:

Tátā, ¿na vé cumí ni jéē sáha ná núu súcuan? achí de.

Te ni cahān máá Jítho yō jíin de: Ndocuiñī, quívi rō ini ñuu, te yūcuan íyō ñi tēe jeē cachi nuū rō na vé cúu jeē cánuú sáha rō, achí yá.

⁷Te tēe cuangoo jíin Saulo, ni canaa ndasí ni de cájini sōho de ndusu jeē cahán, te tu ní cájito cuiti de nuū jeē cahán un. ⁸Yūcuán na te ni ndocuiñī Saulo. Te ni nducú de coto de, te tuá cúu coto de, te ni cajñiñi tēe ún ndaha de ni jinūcōo jíin de nde ini ñuu Damasco. ⁹Te yūcuan ní condee de unī quivī. Te tu ní cúu cuiti coto de, ni tú na vé ni yéji de, ni tú na vé ni jíhi de.

¹⁰Te ñuu Damasco néne ñi tēe cándíje, nání de Ananías. Te máá Jítho yō ni steēn ndijin ya máá yá nuū de te ni cahān yā jíin de:

Ananías, achí yá.

Te máá de ni cahān de jíin yá:

Naun ní sǎña, Tátā, achí de.

¹¹Te ni cahān máá Jítho yō jíin de:

Quihin ichi te quihin rō calle jeē naní Calle Derecha, te vehe Judas cajñūhun rō ñi tēe nání Saulo ñuu Tarso, chi jícán tahú de. ¹²Te nájñūhun ni jito ndijin de jeē máá rō, Ananías, ni jinū rō, te ni soó rō ndaha rō xíní de, te ni nanune tinūú de, achí yá.

¹³Yūcuán na te ni cahān Ananías:

Tátā, cuehē ñayuu cácahān jeē téé yúcuán yóhyo jító xeēn de ñayuu cácaandíje i níhín ñuu Jerusalén.

¹⁴Te vijna ni quee de yāhá, chi sutū cácujeñhu ni catejníñu de vēji de jñi de tāca ñayuu cácahān ndahú i jíin ní, áchí de.

¹⁵Te ni cahān maá Jítóho yō jíin de:

Cuáhán, chi máá rí ni nacāji tēe un jēe quihín de nacani de jñuhun rí nuū tāca ñayuu nación Israel jíin núu ñayuu tāca gá nación nde jíin núu tāca rey. ¹⁶Chi stéén rí nuū de jeē cánuú ndoho de cuehē jñundóho jeē siquí rí, achí yá.

¹⁷Yūcuán na te cuahān Ananías.

Te ni quiví de ini vehe nuū néne Saulo, te ni soó de ndaha de xiní Saulo, te ni cahān de:

Hermano Saulo, maá Jítóho yō Jesús, Yaā ní quenda ndijin nuū ní ichi jeē vēji ní, ni tají yá sãña vēji ná núu ni návāha na nánune tinūu ní, te návāha na cúnuú Espíritu Santo yā jíin ní, áchí de.

¹⁸Te ni nanune-ni tinūu Saulo, chi ni nungoo-ni nájñuhun soó chācá ní condihyū tinūú de ún. Te ni ndocuññ de ni jendute de.

¹⁹Yūcuán na te ni nacaji de staā, te ni nanihín ni de. Te ni condee de jecu quiví jíin téé cácaandíje jeē cáyūcú ini ñuu Damasco.

Jeē ní nacani Saulo jñuhun ini ñuu Damasco

²⁰Te ni quejéé-ni de nacani de jñuhun Jesús ini tācá vehe i sinagoga, áchí de jeē Jesús cúu Sēhe Yaā Dios. ²¹Te tāca ñayuu ni cajini sōho jñuhun cáhán de ni canaa ni i, te ni cacahān i:

¿A násūu téé yáha cúu jeē yóhyo jító xeēn de tāca ñayuu Jerusalén jeē cájicān tahú nuū Jesús? Te siquī yúcuán ní quee de yáha jēe cúhni de ñayuu cácaandíje, te quihín de jíin i nuū sutū cácujeñhu núu, áchí i.

²²Te víhyá gā ni nacani Saulo jñuhun ya, te ni steén cají de jeē Jesús cúu Cristo, Yaā ní jeni Yaā Dios jeē jnáma ya yohó. Te tēe hebreo jeē cáyūcú ñuu Damasco, tu ní cánihín de modo cahān de jeē tu íyó ndáa jeē cahán Saulo.

Jeē ni cácu Saulo nuū jnáhan de hebreo

²³Te ni yáha cuehē quiví. Te jnáhan de hebreo ni casquíjnáhan jñuhun de jeē cáhni de Saulo. ²⁴Te ni nihín Saulo jñuhun jeē cándito de nduú ñuú tāca yéhyí pared jeē ní condūu ndihyú ñuu ún. ²⁵Yūcuán na te iñ jecuāa te tēe cácaandíje ni caquihin de Saulo, te ini iñ jica cáhnu ni cascúun de Saulo jicā pared ún, te súcuán ni cácu de.

Jeē ní najinū Saulo ñuu Jerusalén

²⁶Te nuū ní najinū de ñuu Jerusalén, te cúní de najnáhan de jíin téé cácaandíje. Te ni cayūhu téé un ní cajito de Saulo, chi tu ní cácaandíje de jeē ní nduu Saulo tēe cándíje nuū Jesús. ²⁷Te Bernabé cuahān de jíin Saulo nuū cáyūcu téé apóstol, te ni nacani de jñuhun nuū téé ún ndese ni jini Saulo nuū maá Jítóho yō ichi nuū cuahán de, jíin jēe ni cáhān yā jíin de, jíin jēe jéñhu-ni ni nacani de jñuhun Jesús ini ñuu Damasco. ²⁸Te ni condee Saulo ñuu Jerusalén ni jica de jíin tāca téé apóstol. ²⁹Te jéñhu-ni ni

nacani de jnūhun máá Jítoho yō. Te jnáhan űuu de hebreo jeē cácahān yuhu griego, ni castáhān jnáhan jíin de, te máá tēe un cáconi de cahni de Saulo. ³⁰Te ni cajini tācá hermano cácaandíje, te ni cajendēca de Saulo nde űuu Cesarea. Te yūcuan ní canatají de Saulo cuanuhun de nde űuu de Tarso.

³¹Te űayuu cácaandíje Jesús jeē cáyūcú Judea jíin Galilea jíin Samaria, tuá ni cájito xeēn űayuu i. Te ni ije ga i jíin jnúhun ya, te cándiso iyo i nuū máá Jítoho yō. Te Espíritu Santo ni chindéé űáhán yá i te ni nducuehē gā i.

Jeē ní nduvāha Eneas

³²Te tāca lado jécondēhe Pedro űayuu cácaandíje, te suni ni jecondēhé de űayuu cácaandíje cáyūcú űuu Lida. ³³Te yūcuan ní jini de nuū ĩin tēe nání Eneas jeē ní cuu unā cuiyā cáa de chi ni ĩjin de.

³⁴Te ni cahān Pedro jíin de:

Eneas, Jesucristo cúu Yaā nasāvāha ya rohó. Ndocuĩĩ te natuu rō yuu ró, áchí de.

Te ni ndocuĩĩ-ni tēe ún. ³⁵Te tāca űáyuu cáyūcú űuu Lida jíin ndúhvā Sarón ni cajito i jeē ní nacaca Eneas, te ni casquéndōo i tāca jnúhun jeē tu íyó ndāā te ni cacandíje i máá Jítoho yō.

Jeē ní natecu Dorcas

³⁶Te nde űuu Jope ni iyo ĩin űahan cácaandíje, nání űa Tabita, te nuū yúhu griego nání űa Dorcas. Te űahan yáha máni jniñu váha ni sáha űa, te ni sáha űa caridad ni chindéé űáhán űa űayuu cúmani nuū. ³⁷Te tiempo yūcuan ní quejéé

cuéhyi jíin űa, te ni jihí űa. Te ni cascúchi i ndíyi ún, te ni cajequin i ndíyi un ndé ini cuarto xiní véhe.

³⁸Te yajni íne űuu Lida jíin űuu Jope, te tēe cácaandíje űuu Jope ni cajini jnūhun de jeē néne Pedro űuu Lida, te ni catají de uū tēe cuacana de Pedro, te ni cacahān de:

Ma cucuéeé ní na quíhín yachí yō űuu Jope, achí de.

³⁹Yūcuán na te ni quihin Pedro ichi cuahān de jíin tēe ún. Te nuū ni jínū de, te ni cacao tēe un jíin de nde xiní véhe nuū catú ndíyi ún. Te tācá űahan viuda ni candicó ndúū űa de cándahyū űa, te cástéén űa tācá sahma jíin tícāchi jēé ni sáha Dorcas te ni saja űa nde na técu űa. ⁴⁰Yūcuán na te ni ndacu Pedro jniñu jeē na quéndacoo ndíhi űayuu ún quingoo i nde yatā véhe. Te ni jecuiñĩ yit̄ de ni jicān tahú de, te ni nandió cóto de nuū catú ndíyi ún, te ni cahān de:

Tabita, ndocuĩĩ ní, áchí de.

Te máá űa ni ndacoto-ni űa te ni jito űa nuū Pedro, te ni nucōo-ni űa. ⁴¹Te ni jniñ de ndaha űa, te ni ndonehen de űa. Yūcuán na te ni nacana de xiní űáyuu cácaandíje nde jíin űahan viuda ni ndīvicoo i, te ni steén de űa nuū i jeē ní natecu űa. ⁴²Te ni jitē jnūhun jniñu yáha ní űuu Jope cuahān, te cuehē űayuu ni cacandíje i jnūhun máá Jítoho yō. ⁴³Te cuehē quivĩ ni ndōo Pedro ini űuu Jope, néne de vehe ĩin tēe sáha curtir ıiñ, nání de Simón.

Pedro jíin Cornelio

10 Te ini űuu Cesarea ni iyo ĩin tēe nání Cornelio, ni cuu de capitán grupo soldado jeē

naní Italiano. ²Te cúu de tēe ndíso iyo nuū Yaā Dios nde jíin ndíhi ñayuu vehe de, te yōhyo caridad ni tēe cúu de, chí jéhe de xūhun núū ñáyuu hebreo cándoho ndáhú, vēsú nasūu tēe hebreo cúu de. Te níni jíicán tahú de nuū Yaā Dios. ³Te ñin quivī ni steén ndíjin yā nuū tēe yáha nájnūhun cahunī jehíni, te ni jito de jeē ñin ndajéhé maá Yáā Dios ni quivī ya nuū néne de. Te ni cahān yā jíin de:

Cornelio, achí yá.

⁴Te maá de ni ndacoto vāha de nuū yā, te ni yūhú de. Te ni cahān de:

¿Na vé cuní ni, Tátā? achí de.

Te ni cahān yā jíin de:

Je chíhi Yaā Dios cuenta jeē jíicán tahú rō jíin jēe sáha ró caridad.

⁵Vijna te tají ró jecu tēe na quíngoo de nde ñuu Jope, quicana de Simón jeē suni nání de Pedro, na quíji de.

⁶Chí néne núu de vehe toçayo de Simón, tēe sáha curtir ñiñi, te ndéé vehe ún yajni yumar. Te maá de castūhun núū rō na vé cúu inga jeē cánuu sáhá ró, achí ndajéhé yā.

⁷Te ndajéhé yā jeē ni cáhān jíin Cornelio, cuahān-ni ya. Te ni cana de uū mozo de jíin ñin soldado jeē yíñúhún núū Yaā Dios, chí cúcáhnú ni de jeē squícu vāha tēe ún. ⁸Te ni nacani ndíhi de jnūhun nuū tāca tēe ún, te ni tají de cuangoo nde ñuu Jope.

⁹Te inga quivī un cájica de ichi cuangoo de, te cuacuyajni de ñuu Jope. Te je yajni cahuxí uū cúu, te suu hora un ní caa Pedro siquī véhe chí cándaā, te yūcuan cácan tahú de. ¹⁰Te ni quee sōco chíji de, te ni cuni de caji de staā. Te sáá casáha

ña ndeyu te ni steén ndíjin yā nuū de. ¹¹Te ni jito de jeē núne andiví. Te ni jito de nájnūhun ñin sahma manta jité cáhnú te núhni jnáhan ndicúún punta, te ni cuun vēji nuū de. ¹²Te chíji un cáñūhun ndinuū quití, tācá quití cúún ndaha jíin táca cóo jíin táca quití cándava. ¹³Te ni jini sōho de ñin jnūhun ni cahān:

Pedro, ndocuiñi te cahni rō tācá quití jíñā, te caji rō tí, achí.

¹⁴Te ni cahān Pedro:

Ma cáji na, Tátā, chí tu yéji cuiti na táca quití jeē cahān ley ni jēe tú vāha caji na tí, chí nájnūhun jeē tu cáhíyo ndoo tí nuū ní, achí de.

¹⁵Te ni cahān tucu jnūhun un jíin de:

Achí rí jeē iyó vāha caji rō tācá quití jíñā, chí ni sándoo rí, te ma cahān maá ró jeē tu cáhíyo ndoo tí, achí. Te súcuan ni steén caji yá nuū de jeē cúu quihín de nuū ñáyuu vēsú násūu jnáhan ñuu de hebreo cúu.

¹⁶Te unī jínu ni cahān súcuan jíin de. Te sahma un ní ndaa cuanuhun andiví. ¹⁷Te níni nácani ndasí ni Pedro na vé cuní cahān jeē ní jito ndíjin de ún, te ni jinūcoo-ni tēe ni tají Cornelio, cácajnūhún de vehe Simón nde ni jinūcoo de yéhyí tēe ún. ¹⁸Te cácahān jee de cácajnūhún de núu yūcuan ndéé Simón jeē suni nání de Pedro. ¹⁹Te níni nácani ga ni Pedro siquī jeē ní jito ndíjin de ún, te Espíritu Santo ni cahān yā jíin de:

Ni quecoo unī tēe cánanducú róhó. ²⁰Ndocuiñi te nanuu ró, te ma cáni ni rō jeē tú vāha quihín rō jíin de, vēsú nasūu jnáhan ñuu rō

hebreo cácuu de, chi máá rí ni tají rí de vējicoo de, áchí yá.

²¹Yūcuán na te ni nanuu Pedro nuū tēe ni tají Cornelio, te ni cahān de:

Máá ná cúu tēe cánanducú ní.

¿Te na síquī vējicoo ní núū na núu súcuan? áchí de.

²²Te ni cacahān mozo un:

Cornelio, tēe cúu capitán, ni tají de sāñá. Te tēe ndaā, tēe ndíso iyo nuū Yaā Dios cúu de, te tāca ñáyuu hebreo suni cácahān i jeē tēe vāha cúu de. Te ni cahān iin ndajéhé yā jíin de jeē na cána de níhín jeē ní vehe de te chusóhó de jnūhun cahān ni jíin de.

²³Yūcuán na te ni cahān Pedro jíin mozo un jeē na cúcōo de ini vehe ún, te ni candōo de yūcuán. Te nuū ní cundijin, te ni quihin Pedro ichi cuahān de jíin mozo un. Te suni cuangoo jecu hermano cácaandíje ñuu Jope jíin de.

²⁴Te nde inga quivī ni jinūcoo de ñuu Cesarea. Te Cornelio ndétu de jinūcoo Pedro, chi ni nastútú de tāca jnāhan de jíin táca amigo de jeē quijnáhan vāha ga de jíin. ²⁵Te nuū ni jíin Pedro jijnáhan de, te ni quenda Cornelio ni cahān de jíin Pedro, te ni jecuiñī yití de jeē chiñúhún de Pedro nuú. ²⁶Te Pedro ni ndonehen de Cornelio, te ni cahān de:

Ndocuiñī ní, chi sāñá suni iin tēe-ni cúu ná, áchí de.

²⁷Te cándajnūhún de ni quivícoo de ini vehe. Te ni jito Pedro jeē cáyūcu cuéhé ñáyuu ini vehe de.

²⁸Te ni cahān Pedro jíin ñáyuu ún:

Je cájini vāha ni jijnáhan ní jeē ley jeē cánevāha sāña ñáyuu hebreo,

cáhán jeē tú vāha jeē quijnáhan ná jíin ní quivícoo ná vehe ní síquī jeē cúu ní ñáyuu síin nación. Te Yaā Dios chi ni steén yā nuū na jéē ma cujéē ni na núū ní iin ñáyuu. ²⁹Jeē yúcuán cúu jeē vēji-ni ná, chi ni cana ní sāña, te tu ní sájéē ni ná. Te na cájnūhun ná nihín, ¿na síquī ni cana ní sāña? áchí Pedro.

³⁰Yūcuán na te ni cahān Cornelio:

Vijna íyó cúūn quivī nájnūhun máá hora yáha jeē cúu cahuní jehíni, te ndite ni ná chi súcuan chíñúhún ná nuū yā, te jícán tahu na ini vehe ná. Te ni quiji iin ndajéhé yā nuū ná, te ndíndēé sahma ñúhun ya. ³¹Te ni cahān yā jíin ná: Cornelio, je ni jini sōho Yaā Dios jeē jicán tahu rō, te chíhi ya cuenta jeē sáha ró caridad. ³²Núu súcuan te tají ró mozo na quíngoo de ñuu Jope quicana de Simón jeē suni nání de Pedro, na quíji de nuū rō. Chi tēe un néne de vehe tocayo de Simón, tēe sáha curtir ñii, te yajni yumar ndeé vehe de. Te quee tēe ún te castúhún de nuū rō jnūhun cánuú, áchí yá jíin ná.

³³Súcuan ni cuu te ni tají-ni ná mozo na cuajēcoo de cana de níhín, te na cútahū ná, chi vāha ni sáha ní jeē véji ní. Te vijna ni candutútú ná yāha návāha tāca ná cuni sōho ná ndihi jnūhun Jitoho yō Yaā Dios jeē ni jéhe ya cahān ní, áchí de.

Jeē ní nacani Pedro jnūhun ya vehe Cornelio

³⁴Yūcuán na te ni cahān Pedro:

Vijna te ni jini vāha ná jeē Yaā Dios inuú-ni sáha ya jíin táca ñáyuu, cúu ñáyuu hebreo jíin ñáyuu tāca gá nación. ³⁵Chi cúsiñi ni yā jíin

ñáyuu tācá-ni nación núu cándiso iyo i nuū ya te cásáha i jniñu ndaā. ³⁶Chi ni cahān yā jín ñáyuu Israel jeē ndávicoo tāca ñáyuu nuū jnúhun manī yā jín i sáha Jesucristo. Te máá yá cúu Jitoho tāca yóhó. ³⁷Máá ní je cájini ní ndese ni cuu. Chi ná ni jínu ni nacani Juan jnúhun jín jéē ni scuándute de ñayuu, te ni quejéé Jesús nácani ya jnúhun nde Galilea, te ni jitē jnúhun un ní cáhnu Judea. ³⁸Te cájini ni jéē Yaā Dios ni jēhe ya Espiritu Santo jín poder nuū Jesús, Yaā ní jehnu ñuu Nazaret. Te cájini ni jéē ní jica cuu ya ni sáha ya jniñu váha, te ni nasávāha ya tāca ñáyuu jeē cándoho i sáha jexeén, chi Yaā Dios ni chindéé ñáhán yá Jesús. ³⁹Chi máá ná canacani cájí ná jnúhun tācá jniñu ní cajito ná ní sáha ya ní cáhnu Judea jín ini ñuu Jerusalén. Yūcuán na te ni cajehni i ya, chi ni cata caa i ya jicā cruz. ⁴⁰Te Yaā Dios ni nastécu yā maá Jesús nuū uní quivī, te ni ndiji ya nuū na ní cajito ná núu yā ni sáha Yaā Dios. ⁴¹Te tu ní quíji ya nuū tācá inga ñayuu, chi nuū maá-ni tāca ná jeē jé ni nacāji Yaā Dios sāña jéē nácani ná jnúhun tācá jniñu jeē ní cajito ná. Chi ni cayejí na stāā ni cajihí ná ndute jín yá ná ni nane ya jeē ní natecu yā. ⁴²Te ni ndacu ya jniñu nuū na jínáhan ná jéē na nácani ná jnúhun ya nuū tāca ñáyuu te cahān cají ná jeē maá Yāā Dios ni jeni ya Jesús jeē sándaā yā jniñu ñayuu cátecu jín ñáyuu ní cajihí. ⁴³Chi jnúhun Jesús cúu jeē ní cacahān tāca téē ni canacani jnúhun Yaā Dios nde jenahán. Chi ni cacahān de jeē tāca ñáyuu jeē candíje i

Jesús, cone cáhnu ni yā nuū cuéchi i, áchí Pedro.

Jeē ni quívi Espiritu Santo ini anuá ñayuu jeē násúu hebreo cácuu

⁴⁴Te níni cáhán gā Pedro tāca jnúhun yáha te ni quívi-ni Espiritu Santo ini anuá tāca ñáyuu cájini nahín jnúhun ya jeē cahān de. ⁴⁵Te tēe hebreo jeē ni jínūcoo jín Pedro jeē suni cácandíje de Jesús, nahán ní canaa ni de ni cajito de jeē suni ni quívi Espiritu Santo ini anuá ñayuu jeē násúu hebreo cácuu.

⁴⁶Chi ni cajini sōho de cácahān ñayuu un sín yuhu, te cácahān i jeē yōhyo cújéhnu Yaā Dios.

⁴⁷Yūcuán na te ni cahān Pedro:

¿Ndé ñin casi jeē ma cuándute ñayuu yáha? Chi ni quívi Espiritu Santo ini anuá maá i, nájnūhun ni quívi ya ini anuá maá yó, áchí de.

⁴⁸Te ni cahān de jín i jeē na cuándute i siquī jeē ní cacandíje i Jesucristo. Yūcuán na te ni cacahān ndahú i jín Pedro jeē na quéndōo de jecu quivī jín i.

Jeē ní nacuāha Pedro cuenta nuū ñáyuu cácandíje ini ñuu Jerusalén

11 Te tēe apóstol jín táca hermano cáyūcú Judea, ni canihín de jnúhun jeē súní ñayuu sín nación ni cacandíje i jnúhun Yaā Dios.

²Te cuanuhun Pedro ñuu Jerusalén. Te sava tēe hebreo jeē cácandíje de ya ni cacahān de nuū Pedro:

³¿Najehē ni condee ní vehe ñayuu jeē násúu ñayuu nación yō cúu? Te ni yeji ní jín i, áchí.

⁴Yūcuán na te ni nacani cájí Pedro jnúhun nuū téē ún ndíhi ndese ni cuu siquī téē sín nación:

⁵Néne ná ñuu Jope. Te níní jícán tahú na, te ni steén ndijin yā nuū ná, te ni jito ná nájñuhun iin sahma manta jité cáhnu jeē nuhní jnáhan ndicúún punta, te nde ichi ándiví ní cuun ni quiji nuū ná. ⁶Te ni jito vāha ná, te ni jini na jéē chíji un cáñuhun quití cúún ndaha jíín quití xéén jíín cóo jíín quití cándava. ⁷Te ni jini sōho ná iin jñuhun ni cahān jíín ná: Pedro, ndocuññi te cahni rō tācá quití jiñā, te caji rō tī, áchí jíini ná. ⁸Te ni cahān ná: Ma caji na, Tātā, chi tu yéji cuiti na táca quití jeē cahán ley ni jéē tu cáhīyo ndoo tī nuū ní, áchí ná. ⁹Yūcuán na te jñuhun jeē véji nde andiví ní cahān tucu jíín ná: Ni sándoo máá rí tī, te ma cahán gā rō jeē tu cáhīyo ndoo tī, áchí jíini ná. ¹⁰Te unī jíinu ni cahān súcuan. Yūcuán na te ni ndaa sahma un cuánuhun andiví. ¹¹Te hora un ní jinūcoo unī tēe vehe nuū ni cóndee ná un, cánanducú de sãñá, te iin jnáhan ñuu de Cesarea ni tají de vējicoo de. ¹²Te máá Espíritu ni cahān yā jíín ná jeē ma cáni ni na jéē tú vāha quihīn na jíín de. Te suni iñū hermano yáha ní jengoo jíín ná, te ni quivicoo ná ini vehe tēe nání Cornelio. ¹³Te tēe un ní nacani de jñuhun nuū na jíínáhan ná jéē ní jito de iin ndajéhe Yaā Dios, índichi yā ini vehe de, te ni cahān yā jíín de: Tají ró jecu tēe na quíngoo de ñuu Jope, quicana de Simón jeē suni nání de Pedro, na quíji de. ¹⁴Te tēe ún cachi de nuū rō ndese jnama Yaā Dios rohó jíín ndíhi ñayuu cáyūcú vehe ró, áchí yá. Achí Cornelio jíín ná. ¹⁵Te nuū ní quejéé ná cahán na, te ni quivi-ni Espíritu Santo ini anuá i jíínáhan

i, nájñuhun ni quivi ya ini anuá maá yó xihna gā. ¹⁶Yūcuán na te ni nucūhun ni na jñuhun ni cahān maá Jítóho yō: Jendaá jeē maá ndute-ni ni scuándute Juan ñayuu. Te rōhó jíínáhan ró chí nájñuhun cuandute ró jíín Espíritu Santo, cúu jeē cóndee yā ini anuá rō, áchí yá. ¹⁷Te suni ni jēhe Yaā Dios Espíritu yā nuū maá i nájñuhun ni jēhe ya nuū maá yó jeē cácanđije yó Jítóho yō Jesucristo. Núu súcuan ¿te ndé iin cúu ná jéē cási ná jniñu jeē sáha Yaā Dios? áchí Pedro.

¹⁸Súcuan ni cajini sōho de jñuhun yáha, te tuá ni cácahān de nuū Pedro, chi sa suhva ni cacahān de jeē yóhoyo cújéhnū Yaā Dios. Te ni cacahān de:

Suni ni jēhe Yaā Dios jñuhun jeē na nácani ni ñayuu tāca gá nación jeē stóo i cuēchi i návāha cotecu i níí cáni núu súcuan, áchí de.

Ñayuu cácanđije ini ñuu Antioquía

¹⁹Te quiví ní cajehni de Esteban ni quejéé de cájito xeēn de ñayuu cácanđije, te jeē yúcuan ní cajitē núu ñayuu un táca ñuu cuangoo i, te ni jinūcoo i Fenicia jíín Chipre jíín ñuu Antioquía. Te ni canacani i jñuhun vāha ya nuū máni jnáhan hebreo i jeē cáyūcu yúcuan, te tu ní canacani i jñuhun ya nuū ínga ñayuu. ²⁰Te jecu tēe cácanđije jeē cáyūcu Chipre jíín ñuu Cirene ni jinūcoo de ñuu Antioquía, te suni nuū ñayuu tācá nación jeē tu cájini i jñuhun ya ni canacani de jñuhun máá Jítóho yō Jesús jeē jnáma ya i. ²¹Te máá Jítóho yō ni chindéé ñáhán yá de, te cuehē ñayuu ni castóo i jniñu jeē tu íyó ndáa te ni cacandije i máá Jítóho yō.

²²Te ñayuu cácanđíje ini ñuu Jerusalén ni cajini jñuhun i, te ni catají i Bernabé cuahān de nde ñuu Antioquía. ²³Te nuū ni jínū Bernabé yūcuán, te ni jini de jeē yóhyo vāha ni sáha Yaā Dios jíin i, te ni cusih̄ ndasí ni de. Te ni stihví ni de tāca ñáyuu un jéē jíin ini jíin ánuá i na cóndihvī ni i squícu vāha i nuū maá Jítóho yō, te ma náyūhú i. ²⁴Chi tēē vāha cúu Bernabé, te ni cunuú Espíritu Santo jíin de, te cándíje nihin de. Te ni cacandíje cuehē ñayuu nuū maá Jítóho yō ni sáha de.

²⁵Yūcuán na te cuahān de nde ñuu Tarso cuananducú de Saulo. Te ni nanihin jnáhan de jíin Saulo, te ndéca de tēē un ní ndee de ñuu Antioquía. ²⁶Te ní in cuiyā ni candutútú de jíin ñayuu cácanđíje yūcuán, te ni castéén de jñuhun ya nuū cuehē ñayuu. Te ñuu Antioquía cúu nuū xíhna ñúhún gá ni caconaní ñayuu cristiano siquī jeē ní cacandíje i Cristo.

²⁷Te suni tiempo un ní quendacoo tēē cánacani jñuhun Yaā Dios ñuu Jerusalén cuangoo de nde ñuu Antioquía. ²⁸Te in jnáhan de jeē naní Agabo ni ndocuiñī nuū hermano cácanđíje. Te ni steén Espíritu Santo nuū de, te ni castūhún de jeē cóo in jnamā xeēn ní cáhnu. Te ni cuu jnamā ún in parte tiempo jeē ní ndacu Claudio jniñu jeē ní cuu de rey. ²⁹Yūcuán na te ni candajnūhun tēē cácanđíje ñuu Antioquía jeē cuáha in in de nasaa canda de cuāha de te tají de quihin cotecu hermano cáyūcú Judea. ³⁰Te súcuán ni casáha de. Te ni catají de Bernabé jíin Saulo ni

cajendēca de nuū tēē jéhnu cándiso jniñu nuū ñayuu cácanđíje cáyūcú Judea.

Jeē ní jehni Herodes Jacobo, te ni chune de Pedro vecāa

12 Te suu tiempo un ní quejéé rey Herodes jíto xeēn de sava ñayuu cácanđíje. ²Te ni ndacu de jniñu jeē jíin espada na cáhni i Jacobo ñani Juan. ³Te ni jini de jeē ní cacusiñi ni tēē hebreo jeē ni sáha de súcuán, te jeē yúcuán suni ni jniñi de Pedro. Te máá quivī un ní cuu vico jeē yéji ñayuu pan jeē tu yíhi levadura. ⁴Te nuū ní jniñi de Pedro, te ni chune de vecāa, te ni jeni de cuūn grupo soldado jeē cóndito Pedro, cuūn cuūn soldado cúu jeē in in grupo. Chi cúní Herodes jeē na yáha vico un jéē cúu vico pascua te quenehen de Pedro vecāa un stéén de nuū ñayuu cuehē. ⁵Te súcuán íne Pedro vecāa, te cándito soldado un de. Te ñayuu cácanđíje chi nihin ni cajicān tahú i jehē Pedro nuū Yaā Dios jeē na cácu de.

Jeē ní quenehen Yaā Dios Pedro vecāa

⁶Te jéni ni Herodes jeē na cúndijin inga quivī te quenehen de Pedro vecāa, te stéén de nuū ñayuu un núú. Te núhni Pedro jíin úu cadena, cáttú de quíxi de mēhñu úu soldado jecuáa ún, te suni cáhiin ga soldado cándito yéhyí vecāa ún. ⁷Te suu jecuáa ún te sanaa-ni te ni jinū in ndajéhé maá Jítóho yō, te ni ndindēē ini vecāa. Te ni squfhi ya Pedro, te ni natahū ni de. Te ni cahān yā:

Yachī ndocuiñī rō, achí yá.

Te cadena nuhní ndaha de un ní canandajī-ni. ⁸Te ni cahān ndajéhé yā jiín de:

Nacuhni nihin chíji ró, te nuquīhi ró ndjēn rō, achí yá.

Te súcuan ni sáha de. Te ni cahān tucu ndajéhé yā jiín de:

Condii ticāchi ró, te condiquīn rō ruhū na quíhín yō, achí yá.

⁹Te ni quenda de ndíquín de ya cuahān de jíin yá, te jéni ni de jeē násūu jéndaá cúu jeē sáha ndajéhé yā jiín de, chí jéni ni de jeē iin jeē ni stéén yā jító ndijin de cúu. ¹⁰Te ni yāha ya jíin de uū nuū cándito soldado. Te ni jinū yā jíin de yéhyí cáa nuū quénda de caca de calle, te yéhyí un ní nune iī-ni máá. Te ni quenda ya jíin de, te ni yāha de iin calle cuahān de. Yūcuán na te ni cujiyo-ni ndajéhé yā nuū de cuahān yā. ¹¹Te ni nducájí ni Pedro te ni cahān maá ní cahān iin de:

Vijna te ni jini ndaā rī jeē ní tají máá Jítóho rī ndajéhé yā ni quiji, te ni jnama ya ruhū nuū Herodes jíin núu tāca ñáyuu hebreo jeē cácu ni i sáha xeēn i jíin rí nuú, achí de.

¹²Te nuū ní jini de jeē ni cácu ndije de, te ni quihin de ichi cuahān de vehe María naná Juan jeē suni nání de Marcos. Te yūcuán cáhiin tútú cuéhē ñayuu cájicān tahu i jehē Pedro. ¹³Te cáhán Pedro ni jinū de yéhyí fuera, te iin sūchi síhí nání Rode cuahān i jeē cúni i núu ndé iin cúu jeē cahán. ¹⁴Te ni nacuni i tachí Pedro, te jeē ní cusī ni i te tu ní núne i yéhyí un, chí ni nandió cóo i te jínu i ni ndīvi i ini cuarto. Te ni castūhún i jeē ní quee Pedro índichi de yéhyí fuera. ¹⁵Te ni cacahān jíin i:

Jeē cahán neé ró, achí.

Te máá i nihin cáhán i jeē maá de cúu. Yūcuán na te ni cacahān:

Ndajéhé yā jeē ndíto Pedro cúu núu súcuan, achí.

¹⁶Te víhyá gā cahán Pedro.

Yūcuán na te ni canune i yéhyí, te ni canacuni i nuū de, te nahán ní canaa ni i cájito i. ¹⁷Te máá de ni sáha de ndaha de jeē ma cúvaā gā i, te ni castūhún de ndese ni quenehen máá Jítóho yō de vecāa. Te ni cahān de:

Castūhun núu Jacobo jíin núu tāca gá hermano jeē ní quenehen ya ruhū vecāa, achí de.

Te ni quenda de cuahān de inga lugar.

¹⁸Te nuū ní cundijin, te ni cacuvaā teyí soldado jeē tuá Pedro.

¹⁹Te ni ndacu Herodes jniñu jeē na nánducú váha i Pedro. Te tu ní cánanihīn i de, te nuū ní cuu ni stichí de soldado jijnáhan, te ni ndacu de jniñu jeē na cúu. Yūcuán na te ni quenda Herodes Judea cuahān de ñuu Cesarea, te ni condee de yūcuán.

Jeē ni jíhī Herodes

²⁰Te yōhyo ni quitī ni rey Herodes nuū ñáyuu ñuu Tiro jíin ñuu Sidón. Te ñayuu un ní candajnūhún i jeē inuú-ni quívicoo ndīhi i nuū rey un. Te ni casáha i amigo i jíin Blasto, tēe cújéhnu jéjnīnu nuū rey un. Te ni cacahān ndahú i jíin de jeē na cáhán ndahú de jíin rey un jéē na ndéē ni de jíin i. Chí nde ñuu maá rey un cájeen i jeē cáyeji i. ²¹Te ni jeni Herodes iin quivī. Te ni nucūhun de sahna yíñūhún de, te ni cucōo de mesa nuū ndácu de

jniñu, te ni cahān de iin jñuhun jehū ni cajini sōho i. ²²Te ñayuu un ní caquejéé i cácahān jee i jñuhun yíñúhún jíin de:

Nasūu tée-ni cúu ní, chi iin yaā cúu ní, áchí i jíñáhan i.

²³Te máá hora un ní sáha-ni iin ndajéhé maá Jítóho yō jeē ní jñii iin cuehyī xeēn rey Herodes, te ni cayeji tĩndācú de, te ni jihí de, chi ni sandúxí-ni de máá de te tu ní cáhán de jeē Yaā Dios cúu jeē cujéhnú.

²⁴Te ni jītē gā jñuhun máá Jítóho yō, te cuehē ndasí ñayuu ni cacandíje i tēcá-ni lugar.

²⁵Te ni jĩnu jniñu jeē ní quindeca Bernabé jíin Saulo jeē cótecu ñayuu Judea. Te ni quendacoo de Jerusalén cuanungoo de Antioquía, te cándēca de Juan jeē suni nání de Marcos cuahān jíin de.

**Jeē ní caquejéé Bernabé jíin Saulo
caca cuu de nacani de jñuhun ya**

13 Te mēhñu grupo ñayuu cácanđíje ini ñuu Antioquía ni cahíyo tēe cástéén jíin tēe cánacani jñuhun Yaā Dios, te cánaní de Bernabé, Simón jeē suni nání de Negro, Lucio ñuu Cirene, Saulo, jíin Manaén tēe ni jehnu jíin inga Herodes jeē ní cuu gobernador Galílea. ²Te iin quivī jeē cáhíyo ndite ni tēe yáha cáchiñúhún de nuū maá Jítóho yō, te ni cahān maá Espíritu Santo jíin de:

Cúní rī jeē sasíin ró Bernabé jíin Saulo na quíngoo de jniñu jeē ní jeni ri de, áchí yá.

³Yūcuán na te ni cajicān tahú ndite ni de, te ni casoó de ndaha de xiní Bernabé jíin Saulo, te súcuan ni

catají de ndindúú tēe ún cuanacani de jñuhun nuū tāca ñáyuu.

**Jeē ní canacani Bernabé jíin
Saulo jñuhun ya nde Chipre**

⁴Te ni sáha Espíritu Santo jeē íchi ñúú Seleucia cuangoo de. Te yūcuan ní quivícoo de iin barco cuangoo de nde Chipre, ñuhun jeē íne sñin nuū ndúte. ⁵Te ni jinūcoo de ñuu Salamina nuū cájecuññi barco, te ni canacani de jñuhun Yaā Dios ini tēcá vehe ií sinagoga jñáhan hebreo de. Te suni cuahān Juan chindéé ñáhán jíin de. ⁶Te ni cajica nuu de nñí-ni Chipre nde ni jinūcoo de ñuu Pafos jeē suni íne nuū Chipre. Te yūcuan ní cajini de nuū íin tēe hebreo nání Barjesús. Te tēe tásí cúu de, te cáhán stahú de jeē íin tēe nácani jñuhun Yaā Dios cúu de. ⁷Te tēe tásí un jéjñíñu de nuū gobernador Sergio Paulo, te tēe ndíchí cúu gobernador ún. Te ni cana de Bernabé jíin Saulo jeē cúni nahín de jñuhun Yaā Dios. ⁸Te tēe tásí un suni nání de Elimas. Te ndúcú ndéyí de casi de jeē ma cándíje gobernador ún. ⁹Te Saulo jeē suni nání de Pablo, ni cunuú Espíritu Santo jíin de, te ni ndacoto vāha de nuū tēe tásí un. ¹⁰Te ni cahān de:

Tēe sáha jniñu néé stáhú ñáhán cúu ró, chi sēhe jexeén cúu ró te jési rō nuū tēcá jniñu ndaā. Te tu jécuiññi rō jeē sáca núu ró síquī jñuhun ndaā maá Jítóho yō návāha ma candíje ñayuu nuū yā. ¹¹Te máá Jítóho yō stóho ya rohó vijna, te cucuáá ró jeē ma cóto ga rō niāndii jecu quivī, achí Pablo.

Te ni cunee-ni nuū tēe tásí un, te quéndāha quéhíyú de cuahān de

ndúcú de ndé vé jnî ndaha de stéén ichi nuū de quinhun de. ¹²Yūcuán na te ni jini gobernador jeē súcuan ni cuu, te ni candíje de jñuhun máá Jítóho yō, te náā ni de jínî sōho de jñuhun ya.

**Jeē ní coyūcu Pablo jíin Bernabé
Antioquía ndañū Pisidia**

¹³Yūcuán na te ni quendacoo Pablo jíin Bernabé jíin Juan ñuu Pafos, te ni quivícoo de barco te cuango de ñuu Perge ndañū Panfilia. Te yūcuan ní cusín Juan, te cuanhun de ñuu Jerusalén. ¹⁴Te ni quendacoo Pablo jíin Bernabé ñuu Perge cuango de, te ni jinūcoo de ñuu Antioquía ndañū Pisidia. Te quiví ndétātu ní quivícoo de ini vehe iī sinagoga, te ni cacucōo de. ¹⁵Te ni cahu tutu ley yā jíin tutu ní catee tēe ni canacani jñuhun ya nde jenahán. Yūcuán na te tēe cácujuhnu ini vehe iī sinagoga, vii-ni ni cataj de tēe cahán jíin Pablo jíin Bernabé:

Amigo, núu íyó jñuhun cahán ni jēe stihví ni ni ñáyuu yáha, te cahán ní na cúni nahín i núu súcuan, achí de.

¹⁶Yūcuán na te ni ndocuiñi Pablo te ni sáha de seña jíin ndaha de jeē nahín-ni coo ñáyuu ún, te ni cahán de:

Níhín jnáhan ñuu yō Israel jíin níhín tēe jeē suni cáchiñuhún ní Yāā Dios, cuni nahín ní jijnáhan ní. ¹⁷Máá Yāā Dios yohó ñáyuu Israel, ni nacāji ya jíí yō jijnáhan de. Te níni jēe cáyucu tátú de ñuu Egipto, te ni sáha ya jeē ní nducuehē de. Yūcuán na te jíin poder maá yá ni quenehen ya de nación Egipto.

¹⁸Te uū xico cuiyā ni cajica de nuū ñuhun téhé, te ni jendeyí ni yā jíin de jeē ní castívi de. ¹⁹Te ni snāā yā uxā nación Canaán, te ni jēhe ya ñuhun un núū tāca jíí yō cúu tahū de. ²⁰Yūcuán na te ni jeni ya tāca tēe ni candacu jniñu nuū de nájñuhun cuūn ciento uū xico uxí cuiyā, nde quiví ní cotecu Samuel, tēe ni nacani jñuhun ya. ²¹Yūcuán na te máá ñáyuu un ní cajicān i iñ rey, te ni jeni Yāā Dios Saúl ni ndacu de jniñu nuū i uū xico cuiyā. Te yucūn Benjamín sēhe Cis ni cuu Saúl. ²²Te ni quenehen ya jniñu Saúl, te ni jeni ya David ni cuu de rey nuū i. Te ni cahán cají yá jñuhun de: Cúsiñ ni rí jíin David sēhe Isaí, chi sáha de tāca jēe cuni rí, achí yá.

²³Te cáhán gā Pablo:

Te sēhe yucūn David ni cacu Jesús, Yāā ní jeni Yāā Dios jeē jnáma ya yohó ñáyuu Israel, chi súcuan ni jejnūhun ya. ²⁴Te nde ná tu quejéé Jesús nacani ya jñuhun nuū ñáyuu, te ni nacani Juan jñuhun nuū tāca jnáhan ñuu yō Israel jeē na nácani ni i jeē stóo i cuēchi i, te cuandute i. ²⁵Te nuū cuácuyajni jeē cúu Juan, te ni cahán de: Cándetu ró jēe quíji Cristo, te jéni ni rō jeē ruhū cúu, te nasūu rí cúu. Chi quiji ya, te cújehnu ndasí yá jeē ni ndijēn yā tu cújehnu ri tava rí, achí de.

²⁶Amigo jijnáhan ní, tāca níhín jēe cácuu yó sēhe yucūn Abraham jíin tāca níhín jēe suni cándiso iyo ní núu Yāā Dios, chi cúni Yāā Dios jeē na cúni yō jñuhun yáha jeē cáhán ndese jnáma ya yohó. ²⁷Chi tāca ñáyuu ñuu Jerusalén

jiín táca tée cácujéhnu nuū i, tu ní cájecūhun ni i jeē Jesús cúu Cristo, Yaā ní jeni Yaā Dios jeē jnáma ya yohó. Te ndijnahan quivī ndétātu ní cajini sōho i jnūhun ni cacahu jeē ní catee tēe ni canacani jnūhun Yaā Dios nde jenahán. Te vēsú súcuan te tu ní cájecūhun ni i, te ni candonda i ni cacahán i jeē na cúu yā. Te súcuan ni casquícu i siquī táca jnúhun jeē ní cacahán tēe ni canacani jnūhun ya nde jenahán. ²⁸Vēsú tu ní cánihin i ni iin cuēchi siquī yā jeē cúu yā, te ni cacahán nihin i jíin Pilato jeē na cúu yā. ²⁹Te ná ni jinu ni squícu siquī yā táca jnúhun cáhán nuū tútu ii, te ni casnúu de ya jicā cruz, te ni cachindūji de ya iin yaū ní jete jicā cáva. ³⁰Te ni sáha Yaā Dios jeē ní natecu yā. ³¹Te ñayuu Galilea jeē ní jéngoo jíin yá nde Jerusalén nde na técu yā, nuū maá i ni steén ndijin yā maá yá cuehē quivī ná ni natecu yā, te ñayuu un cácuu jeē cánacani cáji jnúhun ya nuū táca gá jnáhan yó hebreo vijna.

³²Te maá ná jijnáhan ná cánacani ná jnúhun vāha yáha núu ni jíjnáhan ní jēe súcuan ni jejnūhun ya nuū táca jíi yō. ³³Te jnūhun yáha ní squícu Yaā Dios nuū maá yó jeē cácuu yó séhe yucūn de, chi ni nastécu yā Jesús. Chi suhva cáhán salmo uū jeē cahán yā jíin Séhe ya Jesús: Máá ró cúu Séhe ri, te vijna ni sajéhnu ri rohó jēe cúu ri Tatá rō, achí yá. ³⁴Te ni nastécu yā Séhe ya Jesús návāha ma tehyú cuíti yā, chi suhva cáhán tutu ii jeē ni cáhán Yaā Dios nde jenahán: Te nihin maá ró táca jēe vāha ni jejnūhun ri nuū David, achí. ³⁵Te

suní súcuan cáhán inga salmo jeē ní tee David jnūhun jeē cahán Jesús jíin Yáa Dios: Ma cuáha ni jnúhun tehyú ná, chi jéjniñu ná núu ní te maní ni jíin ná, achí. ³⁶Te David chi jíni yō jeē ní jejniñu de nuū ñáyuu ní cotecu de jíin, nájñūhun ni cuni Yaā Dios. Te ni jihí de, te ni quindūji de nájñūhun ni quindūji táca jíi yō, te ni tehyú de. ³⁷Te Jesús, Yaā ní nastécu Yaā Dios, chi tu ní téhyú cuíti yā. ³⁸Jeē yúcuan jíni ñúhún jecūhun ni ní, amigo, jeē Jesús cúu Yaā cóne cáhnu ni nuū táca cuéchi yó. ³⁹Chi ni canducú ní ndahva ni cuéchi ní jēe squícu ní ley jeē ni jéhe ya nuū Moisés, te tu ní cúu ndahvā cuéchi ní súcuan. Te Jesús cúu Yaā ndahva ndihí cuéchi ñayuu jeē cácandíje i táca jēe ni sáha ya jehē i. ⁴⁰Núu súcuan te coto ní jíjnáhan ní jēe ma ndóho ní táca castigo jeē ní cacahán tēe ni canacani jnūhun Yaā Dios nde jenahán, chi suhva ni cahán Yaā Dios:

⁴¹Tāca rohó ñáyuu jeē casácatā, na cóto ró na castigo xeēn quiji siquī rō, te naa ni rō coto ró, te cuu rō. Chi tiempo maá ró te sáha ri jniñu xeēn jeē ma cándíje cuíti rō jeē súcuan sáha ri vēsú nacani ñayuu jnūhun un núu rō, achí yá.

Achí Pablo.

⁴²Te ni quendacoo Pablo jíin táca jnáhan de vehe ii sinagoga jnáhan hebreo de. Te ñayuu sfin nación ni cacahán ndahú i jíin de jeē inga quivī ndétátú nacani tucu de jnūhun yáha núu i. ⁴³Te ni

jitē ñayuu un cuángoo i. Te cuehē ñayuu hebreo jíin ñayuu sñin nación jeē ní cacandíje sahan hebreo te cáchiñúhún i nuū Yaā Dios, cuangoo i jíin Pablo jíin Bernabé. Te ni cacahān nihin de jíin i jeē na cuñi nihin i jíin jnúhun jeē maní Yaā Dios jíin i.

⁴⁴Te quivī ndétátú inga semana te je yajni ndíhi ñayuu ñuu un ní candutútú i jeē cúni nahín i jnúhun Yaā Dios. ⁴⁵Te nuū ní cajini tēe hebreo jeē ní candutútú cuéhē ñayuu, te ni cacucuésun ni de, te ni cacahān de jeē násūu jnúhun vāha cúu jeē steén Pablo, te ni cacahān neé de nuū Pablo. ⁴⁶Yūcuán na te jéhnun-ni ni cacahān Pablo jíin Bernabé, áchí de:

Cánuú jéē xíhna gā nuū maá ní jeē cácuu ní jnáhan ñuu yō hebreo nacani ná jnúhun Yaā Dios, te tu ní cájetáhú ní. Núu súcuan te cuēchi maá ní cúu jeē ma nihín tahú ni cotecu ni ní cáni. Te vijna te quinacani ná jnúhun ya nuū ñayuu tēcá nación jeē tu cájini i jnúhun ya. ⁴⁷Chi suhva ni ndacu maá Jítóho yō jniñu nuū na jíjnáhan ná:

Ni jeni ri rohó jéē cúu ró
nájnúhun luz jeē steén ini
anuá ñayuu tēcá nación,
chi ní ñayīvi steén rō jnúhun ri
nuū ñayuu jeē jnáma ri i, áchí
yá.

Achí de.

⁴⁸Te ñayuu sñin nación, nuū ní cajini sōho i jnúhun yáha te ni cacusiñ teyí ni i. Te ni cacahān i jeē yōhoyo vāha jnúhun cúu jnúhun maá Jítóho yō, te tēcá ñayuu jeē ní nacāji Yaā Dios i jeē cótecu i ní cáni, ni cacandíje i. ⁴⁹Te ni

jitē jnúhun maá Jítóho yō cuahān ní región yūcuán. ⁵⁰Te ñuu Antioquía cáyúcú ñahan cácuu nuū te cáchiñúhún ña Yaā Dios. Te tēe hebreo ni cascáhán de ña, te suni ni cascáhán de tēe cácujeñnu ñuu ún, te ni cajito xeēn i Pablo jíin Bernabé te nde ni cascúnu i de cuangoo de. ⁵¹Te ni cascóyo de ticachā jehē de jeē steén de jeē iyó cuéchi i. Te ni jinūcoo de ñuu Iconio. ⁵²Te vēsú súcuan te ñayuu cacandíje un ní cunuú Espíritu Santo jíin i, te cácusīñ teyí ni i.

Jeē ní coyūcu Pablo jíin Bernabé ñuu Iconio

14 Te ñuu Iconio ni quivīcoo Pablo jíin Bernabé ini vehe i sinagoga jnáhan de hebreo. Te jíin jnúhun jeē ní canacani de te ni cacandíje cuehē jnáhan de hebreo, te suni súcuan cuehē ñayuu sñin nación ni cacandíje i. ²Te jnáhan de hebreo jeē tu ní cacandíje, ni cascáhán de ñayuu sñin nación, te ni cajeni ni i jeē násūu ñayuu vāha cácuu ñayuu cacandíje. ³Te ni caquendō Pablo jíin Bernabé yūcuan cuéhē gā quivī. Te jéhnun-ni ni canacani de jnúhun Jítóho yō, chi cácucañnu ni de ya jeē vāha quihín jniñu un sáha ya. Te maá yá chi ni steén yā jeē iyó ndāá jnúhun jeē yóhoyo vāha ni yā jíin i jeē canacani de, chi ni jēhe ya jeē sáha de jniñu jéhnun jeē steén jeē cujeñnu ya. ⁴Te ñayuu ñuu un ní cacusiñ ni i jíjnáhan i, sava i jíin tēe hebreo jeē tu cacandíje de Jesús, te sava ga i jíin tēe apóstol. ⁵Te ñayuu hebreo jíin ñayuu sñin nación jíin tēe cácuu tohō ni casquijnáhan jnúhun jeē

sáha xeēn jíin Pablo jíin Bernabé, jíin jéé cuáha yuū xinī de núú. ⁶Te ni cajini de jeē súcuan cáconi sáha, te ni cajinu de cuango de nde ñuu Litra jíin ñuu Derbe ndañúu Licaonia jíin táca ñuu yajni yūcuán. ⁷Te yūcuan ní canacani de jñuhun jeē jnáma ya yohó.

**Jeē ní cajēhe i yuū xinī
Pablo ini ñuu Litra**

⁸Te ñuu Litra néne iin tēe jeē tu cúu caca, te tu jíca cuiti de chi nde quivī ní cacu de cácójó de. ⁹Tēe un ní jini sōho de jñuhun jeē cahán Pablo, te ni jito vāha Pablo nuū de, te ni jini de jeē candíje vāha tēe un jéé ndúvāha de. ¹⁰Te ni cahán jee Pablo jíin de:

Ndocuiñī, condichi rō, achí de.

Te ni scánda tēe un máá de ni nucōndichi-ni de, te ni quejéé de caca de. ¹¹Te ni cajini ñayuu ún jniñu jéhu jeē ni sáha Pablo, te ni cacahán jee i jíin yuhu máá i jeē cúu yuhu Licaonia:

Ni cuun yaā ni quecoo nuū yō, te cájica nájnūhun cájica tēe, áchí i.

¹²Te ni cacahán i jeē Bernabé cúu yaā Júpiter, te Pablo cúu yaā Mercurio chi Pablo cúu tēe nácani jñuhun. ¹³Te yajni yuñúu un néne veñūhun yaā Júpiter. Te máá sūtū jejnīñu ini veñūhun un ní quihin de stiquī jijnáhan ti te ni scutú de ti ita te vēji de nde nuū quívī i yuñúu, te máá de jíin ñáyuu ñuu un cáconi de cahni de stiquī un sócō de nuū Bernabé jíin Pablo nuú. ¹⁴Te Bernabé jíin Pablo, tēe cácuu apóstol, ni cajito de jeē súcuan cáconi ñayuu un sáha i, te ni candatá de sahna de jeē steén

de jeē castívi ndasí i jeē casáha i súcuan. Te ni quenendava de ni quivícoo de mēñū ñáyuu cuehē ún, te ni cacana jee de:

¹⁵Tátā jijnáhan ní, ma sáha cuiti ni súcuan, chi sáñá suni tēe-ni cácuu ná nájnūhun máá ní jijnáhan ní. Te vējicoo ná nacani ná jñuhun vāha Yaā Dios nuū ní, chi cahán na jíin ní jeē ma sáha ga ni táca jniñu yáha jéé tu ndé jéjnīñu cuiti, chi sa suhva na chíñúhún ní maá Yáā Dios, Yaā técu, Yaā ni sáha andiví jíin ñáyiví jíin ndute mar jíin táca gá jeē iyó hí cáhnu. ¹⁶Te nde jenahán ní jēhe ya jñuhun jeē na sáha táca ñáyuu modo cáconi máá i. ¹⁷Te vēsú súcuan te níni stéén yā ndese Yaā cúu ya, chi máni sáha ya jniñu vāha jíin yó, chi scúun ya saū, te sáha ya jeē cúu vāha itu yō, te jēhe ya jeē jíni ñúhún yó návāha caji yō te coo siñ ni yō, achí ndindúú de.

¹⁸Te vēsú súcuan ni cacahán de, te yōhyo uhū ni cajesí de nuū ñáyuu un návāha tú socō i stiquī un núú de jeē chíñúhún i ndindúú de.

¹⁹Yūcuán na te ni quecoo jecu tēe hebreo ñuu Antioquía jíin ñuu Iconio, te ni cascáhán de ñayuu cuehē ún, te ni cajēhe i yuū xinī Pablo. Te ni caquenehen i de yatā ñúú ún, chi ni cajeni ni i jeē jé ni jihí de. ²⁰Te tēe cácondíje ni cacondúú de Pablo, te ni ndonda Pablo, te ni ndiví de ini ñuu. Te ñga quiví ni quihin de ichi cuahán de jíin Bernabé nde ñuu Derbe.

²¹Te ini ñuu un ní canacani de jñuhun jeē jnáma ya ñayuu, te ni cacandíje cuehē ñayuu ni casáha de. Te ni canandicó de cuanhun de ñuu Litra jíin ñuu Iconio jíin

ñuu Antioquía. ²²Te ni cahije ga ni ñayuu cácanđije yūcuan ní casáha de. Te ni castíhvi ni de i jeē na cuíñi nihin i jíin jnúhun ya, chi ni cacahān de jeē niní quiji cuehē jnūndóho siquī yō te yūcuán na te jinū yō ñuu nuū ndácu Yaā Dios jniñu. ²³Te tēcá ñuu ni cajeni de tēe jéhnū cándiso jniñu condito de ñayuu cácanđije. Te ni cahiyō ndite ni Pablo jíin Bernabé nuū yā, te ni cajicān tahu de, te ni cacahān de jíin máá Jítóho yō jeē na cóto ya ñayuu ún chi cácanđije i máá yá.

Jeē cuánuhun tucu Pablo jíin Bernabé ñuu Antioquía ndañúú Siria

²⁴Te ni cayāha de cuango de región Pisidia, te ni najinūcoo de región Panfilia. ²⁵Te ni canacani de jnúhun ya ini ñuu Perge región Panfilia, te sáá te cuango de ñuu Atalia. ²⁶Te yūcuan ní quíivicoo de barco, te ni najinūcoo de ñuu Antioquía. Te ñuu yūcuan cúu nuū ní cajicān tahu ñayuu nuū Yaā Dios jehē de jeē na chindéé ñáhán yá de jeē quíingoo de nacani de jnúhun. Te ni jinu jniñu, te ni najinūcoo de ñuu ún. ²⁷Te nuū ní najinūcoo de yūcuán, te ni casáha de junta jíin ñáyuu cácanđije, te ni canacani de jnúhun tēcá ndese cuehē jeē váha ni sáha Yaā Dios jíin de, chi ni jéhe ya jnúhun jeē suni candíje ñayuu tēcá nación jeē tu ní cājini i jnúhun ya. ²⁸Te ni caquendōo de yūcuan cuehē quivī jíin ñáyuu cácanđije.

Siquī junta ñuu Jerusalén

15 Yūcuán na te jecu tēe Judea ni quijicoo de ñuu Antioquía, te ni castéén de nuū

tēcá hermano jeē núu tu sáha i circuncidar, nájñuhun cáhán ley jeē ni jéhe ya nuū Moisés, te tú na modo cācu i. ²Te Pablo jíin Bernabé ni catejnáhan de jíin tēe ún, te tu ní cūndaā. Te jeē yūcuan ní candajnūhún de jeē quíingoo Pablo jíin Bernabé jíin jecu gā tēe cácanđije un ndé ñuu Jerusalén, te yūcuán ndajnūhún de siquī jnúhun yáha jíin tēe cácuu apóstol jíin tēe jéhnū cándiso jniñu nuū ñáyuu cácanđije yūcuán.

³Te ñayuu cácanđije un ní canachuhun íchí i de. Te ni cayāha de ichi Fenicia jíin Samaria, te cánacani de jnúhun jeē suni ñayuu tēcá gá nación jeē tu ní cājini i jnúhun ya, ni castóo i jniñu jeē tu íyó ndáá te ni cacandíje i Yaā Dios. Te yōhyo ni cacusiñi ni tēcá hermano jeē ní canihin de jnúhun jeē súcuan ni cacandíje ñayuu ún.

⁴Te ni najinūcoo de ñuu Jerusalén, te ñayuu cácanđije yūcuan jíin tēe apóstol jíin tēe jéhnū cándiso jniñu nuū ñáyuu un, ní cacusiñi ni de jeē ní najinūcoo jnáhan de ún. Te Pablo jíin Bernabé ni canacani de tēcá jnúhun ndese cuehē jeē váha ni sáha ya siquī jniñu jeē ní canacani de jnúhun ya. ⁵Te sava tēe grupo fariseo jeē cácanđije ni candocuiñi te ni cacahān:

Ñayuu síin nación jeē cácanđije i Jesús, jíni ñúhún jēe sáha i circuncidar nájñuhun casáha máá yó, te cánuú ndacu yó jniñu nuū i jeē na squícu i ley jeē ni jéhe ya nuū Moisés, áchí.

⁶Te tēcá tēe apóstol jíin tēcá tēe jéhnū cándiso jniñu nuū ñáyuu cácanđije, ni candutútú de junta

návāha ndajnúhún de te sándaā de siquī jnúhun yáha. ⁷Te tācá de ni cacahān de ndese cájeni ni de. Yūcuán na te ni ndocuīñī Pedro, te ni cahān de:

Hermano jijnáhan ní, je cájini vāha ni jéē je íyó tiempo jeē ní nacāji Yaā Dios sāña jéē quihín na núū ñáyuu sīn nación te nacani ná jnúhun nuū i jeē jnáma ya i, návāha candíje i Jesucristo. ⁸Te Yaā Dios chi jíní yā ndese cáa ánuá ndíhi ñáyuu, te ni steén yā jeē jetáhú yá i, chi suni ni jēhe ya Espíritu Santo nuū i jijnáhan i, nájnūhun ni jēhe ya nuū maá yó. ⁹Te inuú-ni sáha ya jín yó jín maá i, chi siquī jeē suni ni cacandíje i jnúhun jeē jnáma ya i, te jeē yúcuán ní sándoo ya anuá i nuū tāca cuéchi i. ¹⁰Te vijna žnaun cácuani ní ndacu ní jniñu jeē na squícu i ley un? Chi tu nújnahan ni Yaā Dios jeē súcuán. Chi cácuani ní tee ní jniñu yí yáha síquī ñáyuu cácuandíje ún, te ni tāca jí yō tu ní cácuandeyí de squícu de, te ni maá yó. ¹¹Chi sa suhva cácuandíje yó jéē jnáma ya yohó súcuán-ni siquī jeē yóhyo vāha ni maá Jítóho yō Jesús jín yó, te suni súcuán-ni jnáma ya maá i, nasūu síquī jeē squícu i ley un, áchí de.

¹²Yūcuán na te tēe cuehē un ní cacuu nayúú de, te ni cajini nahín de jnúhun cácahān Bernabé jín Pablo. Chi ni cacastūhún de jeē ni jēhe ya poder jeē ní casáha de tācá jniñu jéhu jeē steén jeē cujéhu ya, ni cajito ñáyuu tācá nación jeē tu cájini i jnúhun ya. ¹³Te nuū ni jínu ni cacahān Pablo jín Bernabé, te ni cahān Jacobo:

Hermano jijnáhan ní, cuni sōho ní na cáhán na. ¹⁴Ni nacani Simón

Pedro jnúhun ndese ni quejéé nuú jniñu jeē jnáma Yaā Dios ñáyuu tācá nación jeē tu cájini i jnúhun ya, chi suni mēhñu maá i nacāji ya ñáyuu jeē ndúu i ñáyuu maá yá.

¹⁵Te quijnáhan jnúhun ni cahān de yáha jín jnúhun ni catee tēe ni canacani jnúhun Yaā Dios nde jenahán jeē yosó nuū tútu ii:

¹⁶Achí Yáa Dios:

Nájnūhun ni cotúú vehe David cúu jeē tuá ndácu sēhe yucūn de jniñu,

nájnūhun ni ndacu maá de jniñu nde jenahán.

Te ñin quivī te ndee rī

te jeē nasáha ri vehe de cúu

jeē sáha ri jeē nandacu Sēhe yucūn de jniñu.

¹⁷Súcuán sáha ri návāha tāca gá ñáyuu na nánducú i ruhū nde jín ñáyuu tācá nación jeē tu cájini jnúhun ri, tācá i jeē cána ri i candíje i ruhū.

¹⁸Súcuán cáhán maá Jítóho yō, te nde jenahán ní steén yā jnúhun yáha núū ñáyuu.

Achí tutu ii.

¹⁹Jeē yúcuán jéni ni na jéē ñáyuu tāca gá nación jeē ní castóo i jniñu jeē tu íyó ndáa te ni cacandíje i maá Yáa Dios, ma stáhān yō i jeē ndácu yó jniñu jeē squícu i ley Moisés. ²⁰Chi sa suhva na tēe yó carta quihín nuū i jeē ma cáji i ndeyu jeē ni sócō nuū ídolo, te ma cáca jnéni i, te ma cáji i cūñu quiti jeē jihí jeē tu jéti niñī tī, te ni ma cáji i niñī. ²¹Jnúhun yáha-ni tee yó quíhín nuū i nájnūhun je cástéén nde jenahán. Chi nde jenahán je íyó tēe cástéén jnúhun ley jeē ni jēhe ya nuū Moisés, te ndijnahan quivī

ndétātu cácahu de ley un ini vehe iī sinagoga tācá ñuu, áchí Jacobo.

²²Yūcuán na te tēe apóstol, jíin tēe jéhnū cándiso jníñu, jíin ndivii ñayuu cácañdije, ni cacundaā ni de jeē nácāji de tēe quingoo jíin Pablo jíin Bernabé nde ñuu Antioquía. Te tēe ni canacāji de un cácuu Silas jíin Judas, te inga síhví de cúu Barsabás. Te cándiso jníñu de nuū tācá hermano cácañdije. ²³Te ni cajendēca de carta jeē cahán suhva:

Máá ná cácuu tēe apóstol, jíin táca tēe jéhnū cándiso jníñu nuū ñáyuu cácañdije, jíin táca gá hermano yō. Te cátee ná carta yáha cuájeē nuū ni jíjnáhan ní, hermano, jeē cácuu ní ñáyuu síin nación jeē cáyūcu ní ñuu Antioquía jíin Siria jíin Cilicia. Cuandeyí ni ni jíjnáhan ní. ²⁴Ni cajini jnūhun ná jēē ní quendacoo sava jnáhan ná yáha ní jengoo nuū ní, te jíin jnúhun jeē ní cacahān de te ni casáha jeē ní canacani ndasí ni ní, te ni cacuxí ni ní, chi cándacu de jniñu jeē sáha ní circuncidar jíin jēē squícu ní jniñu cáhán ley jenahán jēē ni jéhe ya nuū Moisés. Te nasūu sáña ní cátají tēe un jēē jeé de nuū ní. ²⁵Jeē yúcuán ní cajeni ni ná, te inuú-ni ni cacundaā ni ná, te ni nacāji ná tēe cuajēcoo nuū ni jíin úu hermano yō jeē maní yō jíin, cúu Bernabé jíin Pablo. ²⁶Te ndíndúú de je ni catana de máá de nuū jnúndóho vēsú na cúu de jeē síquí jnūhun Jitoho yō Jesucristo. ²⁷Núu súcuán te cátají ná Judas jíin Silas jeē nuū ní, te suni nájnūhun cáhán carta yáha suni súcuán castūhún de nuū ni jíjnáhan ní. ²⁸Chi máá Espíritu Santo ni steén yā iin modo jeē ní

cacundaā ni na jēē ma tēe ná táca jniñu yíí ley Moisés síquí ní, chi máá-ni jniñu yáha jēē cánuú gá: ²⁹Ma cáji ni táca jēē ní casocō nuū ídolo, ni ma cáji ni níñi ni quíti jeē jihí jeē tu jéti níñi tí, te ma cáca jnéni ní. Te vāha squícu ní núu tuá sáha ní táca jēē yáha. Súcuán na cóo te sándeýí ni ní, áchí carta.

³⁰Yūcuán na te tēe quingoo un cuángoo de nde ñuu Antioquía. Te ni cacana de xiní ñáyuu cácañdije ni candutútú de junta, te ni cajēhe de carta un núu i. ³¹Te ni cacahu i, te ni candusií ni i jeē ni níñin i jnūhun ndeyí ni nuū carta ún. ³²Te suni tēe cánacani jnūhun Yaā Dios cácuu Judas jíin Silas, te jíin cuéhē jnūhun ni cacahān de te ni candundeyí ni tācá hermano un, te ni cahije ga ni i jíin jnúhun ya. ³³Te ni coyūcú de yūcuán jecu quiví. Yūcuán na te hermano yúcuán ní canacuatáhú i nuū de jeē quínuhun de nuū tēe jeē ní catají de. ³⁴Te Silas ni nujnahan ni de ni quendōo de yūcuán. ³⁵Te suni ni caquendōo Pablo jíin Bernabé ñuu Antioquía, te máá de jíin sava ga tēe ni castéén de te ni canacani de jnūhun vāha máá Jítoho yō.

Jeē quihín Pablo inga jínu nacani de jnūhun ya

³⁶Te ni cuu ga quiví, te ni cahān Pablo jíin Bernabé:

Vijna te na quícondēhe yó tācá hermano yō ndíjnahan ñuu nuū ní nacani yó jnúhun máá Jítoho yō, na cóndēhe yó ndese cáhiyo i, áchí de.

³⁷Te Juan jeē suni nání de Marcos, cúní Bernabé jeē quihín tēe un jíin de. ³⁸Te tu ní cúní Pablo

jeē quihín tēe un jíin de, chi nde Panfilia ni cusín Marcos nuū Pablo jíin Bernabé, chi tuá ni chindéé ñáhán de ndíndúú tēe un síquī jníñu ya nde saá. ³⁹Te nahán ní candajñuhun Pablo jíin Bernabé, te tu ní cácondaā ni de síquī Marcos, te ni cacusín de. Te Bernabé ni jeca de Marcos, te ni quívicoo de barco cuangoo de nde Chipre, ñuhun jeē íne síin nuū ndúte. ⁴⁰Te Pablo ni nacāji de Silas quihín jíin de. Te tācá hermano cácondíje ni cajicān tahu de nuū maá Jítoho yō jeē síquī jeē váha ni yā te na chindéé ñáhán yá Pablo. Te cuahān Silas jíin Pablo. ⁴¹Te ni cajica cuu de nńí Siria jíin Cilicia. Te tāca grupo ñayuu cácondíje ni cahije ga ni i jíin jnúhun ya ni casáha de.

Jeē cuahán Timoteo jíin Pablo jíin Silas

16 Yūcuán na te saá te ni jinū Pablo jíin Silas ñuu Derbe jíin ñuu Listra. Te yūcuán néne ñin tēe suchí cándíje, nání i Timoteo. Sēhe yíí ñin ñahan hebrea cúu i, te ñahan cándíje cúu ña. Te tátá i chi tēe griego cúu de. ²Te tācá hermano ñuu Listra jíin ñuu Iconio cájejnúhún de Timoteo. ³Te cúní Pablo condeca de Timoteo quihín de jíin i. Te ni cahān Pablo jeē quihín i cuu i circuncidar, chi tu cúní Pablo jeē cahān ñayuu hebreo jeē tu ní squícu Timoteo costumbre un, chi ndíhi ñayuu cájini i jeē tēe griego cúu tátá i. ⁴Te tācá ñuu nuū cuángoo de te ni cacastúhún de nuū ñayuu cácondíje jeē na squícu i máá jniñu jeē ní casándaā tēe apóstol jíin táca tēe jéhnu cáyūcú

ñuu Jerusalén jeē cándiso jníñu nuū ñayuu cácondíje. ⁵Te ñayuu cácondíje ni cahije ga ni i. Te ndíjnahan quiví ni cacandíje cuehē gā ñayuu.

Jeē ní jito ndijin Pablo ñin tēe ñuu Macedonia

⁶Te tu ní jéhe Espíritu Santo yā jnúhun jeē nácani de jnúhun ya nńí Asia. Jeē yúcuán ní cayāha de ichi Frigia jíin Galacia cuangoo de. ⁷Te ni jinūcoo de nuū quijnáhan Misia jíin Bitinia. Te cáconi de quingoo de Bitinia, te máá Espíritu Jesús tu ní jéhe ya jnúhun quingoo de. ⁸Te ni cayāha de ñin lado Misia cuangoo de ñuu Troas jeē íne yajni yumar. ⁹Te ñin jecuāā te nájnúhun ñin jēni ni jito ndijin Pablo, te ni jito de jeē índichi ñin tēe ñuu Macedonia nuū de cáhán ndahú jíin de: Nehen ní ñuu ná Macedonia te chindéé ñáhán ní sāña jíjnáhan ná, áchí. ¹⁰Te súcuán ni jito ndijin de. Yūcuán na te sāña, Lucas, ni quijnáhan ná jíin de. Te ni casátúhva ná jíin de jíjnáhan de jeē quingoo ná Macedonia, chi ni cajini cají ná jeē maá Yáa Dios tájí yá sāña jíjnáhan ná jeē castúhun ná nuū ñayuu yūcuán jnúhun jnama ya i.

Jeē ní coyūcu Pablo jíin Silas ñuu Filipos

¹¹Te jíin barco ni quendacoo ná ñuu Troas, te cuangoo ndaā-ni ná ndé Samotracia, ñuhun jeē íne síin nuū ndúte. Te inga quiví ni jinūcoo ná ñuu Neápolis. ¹²Te yūcuán ní quendacoo ná, te ni jinūcoo ná ñuu Filipos jeē cúu ñuu cujéhu

ga íne Macedonia, chi máá ñáyuu ñuu Roma ni casáha i ñuu i ún. Te ni coyūcu ná ñuu Filipos jecu quivī. ¹³Te iin quivī ndétātu ní quendacoo ná ñuu ún, te ni jengoo ná iin yuyúte, chi yūcuan cúu iin lugar nuū cájicān tahuñayuu. Te ni cacucōo ná, te ni canacani ná jnúhun ya nuū tǎcá ñahan ní canataca yūcuán. ¹⁴Te iin ña nání Lidia jeē véji ña ñuu Tiatira, xíco ña sahma ndihí jéé yáhu ga ndeé. Te máá ña níní chíñúhún ña Yaā Dios. Te ni jini sōho ña jnúhun cánacani ná, te máá Jítóho yō Jesús ni sáha ya jeē ní candíje ña jnúhun jnáma ya ña jeē ni cáhān Pablo. ¹⁵Te ni jendute ña nde jíin ñáyuu cáyūcú vehe ña, te ni cahān ndahú ña jíin ná:

Núu cácuáhnu ni ni jéé candíje ndije ná máá Jítóho yō, te cuajeē ní coyūcu ní vehe ná, áhí ña.

Te ni cana fuerza ña sǎña jíjnáhan ná.

¹⁶Te iin quivī te cuangoo tucu ná suu lugar nuū jéngoo ñayuu cájicān tahuñ. Te ni canajnáhan ná jíin iin sūchi síhí jéé ñúhun tachí ini i, te máá un sáha jeē cahán i tǎcá ndese coo te cúndaā jeē cahán i. Te sūchí un ní cajeen patrón i, návāha nihin de cuehē xūhun síquī jeē cástūhún i nuū iin iin ñayuu ndese coo ichi núu. ¹⁷Te sūchí un ndíquín i sǎña jíjnáhan ná cána jee i:

Tēe yáha cájéjníñu de nuū Yaā Dios, Yaā cujéhnu téyí, te cácastūhún de ndese cácu ní núu cuéchi ní jíjnáhan ní, áhí i.

¹⁸Te cuehē quivī ni cuu súcuan te nde ni jnaniní ni Pablo. Te ni ndió cóto de nuū i, te ni cahān de jíin táchí ún:

Jíin poder máá Jesucristo ndácu ri jniñu nuū rō jeē na quénda ró ini i quihin rō, achí de.

Te hora un ní quenda-ni cuahān.

¹⁹Yūcuán na te ni cajini patrón i jeē ma níhín gā i xūhún cuu de, te jeē yūcuan ní cajniñ de Pablo jíin Silas cuangoo jíin de nde vehe juzgado nuū cáyūcu tóhō. ²⁰Te ni cajeni ún de nuū juez, tēe cásandaā jniñu, te ni cacahān:

Tēe hebreo cácuu tēe yáha, te cástóna de ñayuu ñuu yō cúvāa i. ²¹Te cájequin de inga costumbre jeē ma cúu cuatáhú cuiti yō, ni ma cúu sáha yó, chi tu jéhe ley nación yō jnúhun, chi ñayuu nación Roma cácuu yó, áhí.

²²Te suni ni candonda ñayuu síquī Pablo jíin Silas. Te tēe cácuu juez ni candacu de jniñu jeē na quénda sahma ndíndúu de te cani yujnu síquī de. ²³Te nuū ni jínu ni cacani téyí un de, te ni casquíví de vecāa. Te ni candacu jniñu nuū tēe ndíto vecāa jeē na cóndito ndasí de jeē ma cácu ndíndúu tēe ún. ²⁴Te jeē súcuan ni tahuñ jniñu nuū tēe ndíto vecāa te ni squíví de Pablo jíin Silas nde ichi íni gā, te ni squíví jehē de t̄isin yujnu ndéé yaū te ni cajihni de.

²⁵Te nuū ní cuu sava ñuu, te cájicān tahuñ Pablo jíin Silas, te cájita de yaa ii nuū máá Yāā Dios. Te ñayuu cáhiin jíin de vecāa un ní cajini nahín i. ²⁶Te sanaa-ni te ni jnāa nihin téyí, te nde nuū cimientto vecāa un ní canda. Te ni canune-ni yéhyí vecāa ún, te ni canandají-ni cadena jeē cánuhní tǎca ñáyuu ún. ²⁷Te ni natahū ni tēe ndíto vecāa, te ni jito de jeē núne yéhyí vecāa ún. Te ni tava de espada jeē cáhni

de máá de núú, chi ni jeni ni de jeē ndivii cuiti ñayuu cáhiin vecāa un cuángoo i. ²⁸Te ni cana jee Pablo:

Ma cáhni ni máá ní, chi cáhiin ndihí ná, áchí de.

²⁹Yūcuán na te máá tée ndíto vecāa ni cana de jeē na quíndeca i ñuhūn, te yachí ni quívi de ini vecāa. Te ni jecuiñi yití de nuū Pablo jíin Silas, te quísi i de jeē yūhú de. ³⁰Te ni quenehen de Pablo jíin Silas, te ni cajñuhún de:

Tátā, ¿na vé cánuú sáha ná te jnama ya sãñá? áchí de.

³¹Te ni cacahān de jíin tée ún:

Candíje ní táca jéē ni sáha Jitoho yō Jesucristo jehē ní te cācu ní, te suni súcuan cācu ndihí ñayuu cáyūcú vehe ní, áchí de.

³²Te ni canacani de jñuhun máá Jitoho yō nuū tée un jíin núú táca ñáyuu cáyūcú vehe de. ³³Te suu máá jecuāá yúcuan ní nacate tēe ndíto vecāa un núú ní catuji Pablo jíin Silas jeē ní cacani yujnu siquí de. Yūcuán na te ni jendute de jíin ndihí ñayuu cáyūcú vehe de. ³⁴Te ni jeca de Pablo jíin Silas cuahān de jíin vehe de, te ni jēhe de staā ni cayejí de, te cácusíi ni ndihí de vehe de jeē ní cacandíje de Yaā Dios.

³⁵Te nuū ní cundijin, te tēe cácuu juez ni catají de policía cuangoo jíin jñuhun jeē na siáá tēe ndíto vecāa un Pablo jíin Silas quingoo de. ³⁶Te tēe ndíto vecāa un ní castühún de jñuhun yáha núú Pablo:

Tēe cácuu juez ni catají de jñuhun vējí jeē na siáá na níhín quíngoo ní. Núú súcuan te quendacoo ní quíhín ní, te cuandeyí ni ní, áchí de.

³⁷Te ni cahān Pablo jíin policía:

Cuehē ñayuu ni cajito i jeē ní cacani de sãñá, te ni tu ní casándaā de xihna gā núu ndaā jeē iyó cuéchi ná. Te ni cachuhun de sãñá vecāa, vēsú cácuu ná sēhe nación Roma, te iyó ley jeē ma cúu sáha súcuan jíin ñáyuu cácuu sēhe nación Roma. Te vijna íá quenehen sãhí de sãña cácuu de naún? Ma cúu cuiti. Na quícoo máá de quenehen de sãña jíin náhan ná, áchí Pablo.

³⁸Te ni canandió cóo policía ni castühún de jñuhun yáha núú tēe cácuu juez, te ni cayūhú de jeē ní cajini sōho de jñuhun jeē sēhe nación Roma cácuu Pablo jíin Silas.

³⁹Te ni quecoo tēe cácuu juez ún, te yōhyo ni cacahān ndahú jíin Pablo jíin Silas jeē na cóne cáhnu ni de. Te ni caquenehen de vecāa ún, te ni cacahān ndahú jíin de jeē na quéndacoo de ñuu un quíngoo de. ⁴⁰Yūcuán na te ni quendacoo de vecāa, te ni jengoo tucu de vehe Lidia, te ni cacahān de jñuhun ndeyí ni jíin táca hermano. Te ni caquihin de ichi cuangoo de.

Jeē ní cacuvaā ñayuu Tesalónica

17 Te Pablo jíin Silas ni cayāha de ñuu Anfípolis jíin ñuu Apolonia cuangoo de, te ni jinūcoo de ñuu Tesalónica nuū iyó iin vehe ií sinagoga jñahan de hebreo. ²Te ni coyicú de yúcuan úní semana, te táca quívi ndétātu jéhén Pablo vehe ií sinagoga, nájnūhun sáha sáha de, te ni nacani de jñuhun ya nuū tēe un. ³Te jíin jñuhun cáhán tutu ií ni steén de jeē súcuan ni jini núhún ndoho Cristo jeē cúu yā te natecu yā. Te ni cahān de:

Jñuhun nácani ná núú ni cúu jñuhun Jesús, te máá yá cúu Cristo,

Yaā ní jeni Yaā Dios jeē jnáma ya yohó, áchí de.

⁴Te ni cacandíje sava jnáhan de hebreo jíin cuéhē ñayuu griego jeē cáchiñúhún i Yaā Dios, jíin cuéhē ñahan cácuu nuū, te ni nduu inuú ni i jíin Pablo jíin Silas. ⁵Yūcuán na te yōhyo ni cacucúésún ni jnáhan de hebreo jeē tu cacandíje, te ni castútú tée cunéé jéé cájica cúxí-ni, te ni quejéé cácana ndee cuangoo. Te súcuán ni casaca núu de xiní ñáyuu ñuu ún. Te ni jengoo de vehe Jasón cánanducú de Pablo jíin Silas jeē jñí de tēe un quíndēca de nuū ñáyuu cuehē. ⁶Te tu ní cánanihín de, te ni cañuhun de Jasón jíin sava ga hermano cuangoo de jíin núu tohó ñuu ún. Te jeē siquí Pablo jíin Silas ni cacana jee de:

Tēe jeē castívi xíní ñáyuu ní ñáyíví, je ni quecoo de nde yāhá. ⁷Te máá Jasón ni jēhe núu vehe cáyūcu tēe ún. Te tēe ún tu cájetáhú de ley maá rey yohó ñáyuu Roma, chí sa suhva cácahán de jeē cájetáhú de nuū inga rey jeē naní Jesús, achí de jíinánhan de.

⁸Te ñayuu jíin tēe cácuu tohó ni cajini sōho i jñuhun yáha, te ni cacuvaā i siquí. ⁹Te Jasón jíin táca gá hermano ni castóo de xūhún de, chí ni cacahán tohó un jíin de jeē nde núu tají de Pablo jíin Silas quíngoo de inga ñuu, yūcuán na te nacuāha tohó un xúhun de. Te súcuán te ni casiáá de Jasón jíin táca gá hermano cuangoo de.

**Jeē ní coyūcu Pablo jíin
Silas ñuu Berea**

¹⁰Yūcuán na te tēcá hermano un, yachí-ni ni cascáca de Pablo

jíin Silas jecuāā un, cuángoo de nde ñuu Berea. Te nuū ni jínūcoo de yūcuán, te ni quívicoo de vehe íi sinagoga jnáhan ñuu de hebreo. ¹¹Te jnáhan ñuu de hebreo cáyūcu yúcuán, vāha ga ni maá de vēsú jnáhan ñuu de hebreo cáyūcú ñuu Tesalónica, chí vāha ni cacusií ni de jíin jñuhun ni cacahán Pablo jíin Silas. Te ndíjnahan quívi cánanducú yúcuán de nuū tútu íi núu súcuán cáhán chí tuú. ¹²Jeē yúcuán ní cacandíje cuehē jnáhan ñuu de hebreo te suni nde jíin cuéhē ñayuu griego, cúu tēe cúu ñahan cácuu nuū. ¹³Te jnáhan ñuu de hebreo cáyūcú ñuu Tesalónica ni cajini jñuhun de jeē suni nde ñuu Berea nácani Pablo jñuhun Yaā Dios, te ni caquihin de ichi cuangoo de Berea, te suni yūcuán ní castónđa de ñayuu siquí Pablo. ¹⁴Yūcuán na te tēcá hermano ni catají-ni de Pablo cuahán de nde yumar. Te ni ndōo Silas jíin Timoteo ñuu Berea. ¹⁵Te jecu hermano ni cajendēca de Pablo nde ñuu Atenas. Te ni cahán Pablo jíin de jeē cahán de jíin Silas jíin Timoteo jeē na quíngoo yachí de nuū Pablo. Te vendicoo de ñuu Berea.

Jeē ni íne Pablo ñuu Atenas

¹⁶Te níní ndétu Pablo jeē jinúcoo Silas jíin Timoteo nuū de ñuu Atenas, te ni jini de jeē ñáyuu ñuu ún yōhyo cáchiñúhún i ídolo, te ni nacani cúfhyá ni de. ¹⁷Te ini vehe íi sinagoga ni cahán de jñuhun ya jíin jnáhan ñuu de hebreo jíin táca gá tēe cáchiñúhún Yáā Dios. Te suni táca quívi ni nacani de jñuhun ya nuū táca ñáyuu cáhiin nuū yáhu.

18 Te sava tēe cáscuáha jnūhun jeē castéén grupo epicúreo, jíin inga sava tēe cáscuáha jnūhun jeē castéén grupo estoico, ni caquejéé cácahān jíin Pablo. Te sava ni cacahān:

¿Na jnūhun cáhān tēe tǐlólhlé yāha? áchí.

Te sava ga de ni cacahān:

Tēe nácani jnūhun tāca yāā jeē tu cánevāha yó cúu de, áchí.

Súcuan ni cacahān de, chi nácani Pablo jnūhun vāha Jesús jeē ní natecu yā mēhñu ndáyí. 19 Te ni cajeca de Pablo cuango de, te ni jinūcoo de nde lugar nuū naní Areópago nuū cándutútú ñáyuu cándacu jniñu, te ni cacahān de:

Cácuni ná cachi ni núu na jnūhun jeé jéé steén ní. 20 Chi cáhān ni jnūhun jeē ná tu cuni cuiti na jíjnáhan ná, te jeē yúcuan cácuni ná jecūhun ni na síquī tāca jnūhun yáha, áchí jíin de.

21 Chi tāca ñáyuu ñuu Atenas jíin tāca ñáyuu inga ñuu jeē cáyūcu núu i yūcuán, tuá na inga jniñu cácusī gā ni i jíin chi máá-ni jeē cuni nahín i jnūhun jeé chí jéé cahán i jnūhun jeé.

22 Te índichi Pablo mēhñu ñáyuu ní candutútú núu naní Areópago, te ni cahān de:

Tēe ñuu Atenas jíjnáhan ní, jíto ná jéé yóhyo cáchiñúhún ní yaā maá ní. 23 Chi ni jica nuu ná, te ni jecondēhe ná nuū jeē cáchiñúhún ní, te ni jito ná ñin altar jeē yosó jnūhun yáha: Yāha cúu altar yaā jeē ná tu cuni yō jnūhun ya, achí. Te máá Yāā un jéé cáchiñúhún ní, vēsú ná tu cuni ni jnūhun ya, suu jnūhun Yaā un cúu jeē nácani ná núu ní vijna.

24 Chi Yaā un cúu Yaā jeē ni sáha ñayīvi jíin tāca ndihí jeē iyó, te máá yá cúu Jitoho andiví jíin ñayīví, te tu ndéé yá ini veñūhun cásaaha ñayuu. 25 Te ni tu cúmani ni ñin nuū yā jeē cuáha ñayuu nuū yā, chi máá yá sáha jeē técu ñayuu, jíin jéé stáa i tachí i, jíin jéé nihín i ndihí jeé jíni ñúhún i.

26 Te ni sáha ya jeē chíji ñin-ni yucūn ni tahū tāca ñáyuu jeē ní nduu tācá nación, návāha coyūcú i ní cáhnu ñayīví, te ni tana yā cuiyā cotecu ñayuu jíin lugar coyūcú i jíjnáhan i. 27 Te súcuan ni sáha ya chí cúní yā jeē nanducú yó yā, chí núu nanducú yó yā te cuni yō jeē iyó yá, chí yajni-ni cúu ya jíin ñin ñin yó. 28 Chi máá yá sáha jeē iyó yó jíin jéé cátecu yō jíin jéé cácanda yō. Chi suni súcuan ni cacahān sava tēe ñuu ni jéé cátava yaa: Suni nde yucūn maá yá cácuu yó, áchí. 29 Te núu yucūn Yaā Dios cácuu yó, te ma cáni ni yō jeē ídolo oro chí plata chí yūu cúu ya, chí cájeni ni ñayuu jeē súcuan cáa ya, te súcuan cásvāha i ídolo. 30 Te ni jendeyí ni yā síquī jeē tu ní cájecūhun ni i ní ndé saá, te vijna chí ndácu ya jniñu jeē ñáyuu ní cáhnu ñayīví na nácani ni i jeē stóo i cuēchi i. 31 Chi Yaā Dios, je ni jeni ya quiví jeē ndaā sándaā yā síquī ñayuu ñayīví, te ni jeni ya Jesús jeē maá yá sándaā. Te je ni steén cají Yaā Dios nuū tāca ñáyuu jeē maá yá ni jeni Jesús, chí ni nastécu yā Jesús, achí Pablo. 32 Te jeē ní cajini sōho i jnūhun jeē nátecu ndíyi te sava i ni cacahān catá i, te sava ga i ni cacahān i: Vāha te núu cuu cuni sōho na jnūhun cáhān ni ndé inga jínu, áchí i.

³³Te ni quenda Pablo mēhñu ñáyuu un cuáhān de. ³⁴Te cuahān jecu ñayuu jíin Pablo, te ni cacandíje. Te iin de cúu Dionisio, tēe ndútútú jíin tēe cácujuhnu cásáha junta nuū naní Areópago, jíin iin ñahan naní Dámaris, jíin jecu gā i.

Jeē ni íne Pablo ñuu Corinto

18 Yūcuán na te ni quenda Pablo ñuu Atenas, te cuahān de nde ñuu Corinto. ²Te yūcuan ní jito de nuū iin jnáhan ñuu de hebreo, naní Aquila, te tēe región Ponto cúu de. Te sáá jecu-ni tiempo ni quee de jíin ñasihí de Priscila jeē ní quenda de Italia, chi rey Claudio ni ndacu de jniñu jeē na quéndacoo tāca ñáyuu hebreo ñuu Roma, jeē cúu capital Italia. Te ni jinū Pablo vehe Aquila jíin Priscila jeē cáyūcú de ñuu Corinto. ³Te suni jniñu sáha tēe un sáha Pablo, chi cáquicu de ñii cuu vehe. Te ni quendōo Pablo jíin tēe ún, te ni casájniñu de. ⁴Te tāca quívī ndétātu ní jehēn Pablo vehe i sinagoga ni nacani de jnūhun ya, te ni nducú ndéyí de jeē na cándíje ñayuu jnūhun Jesús, cúu jnáhan ñuu de hebreo jíin ñáyuu tācá nación jeē tu ní cájini i jnūhun ya. ⁵Te ni jinūcoo Silas jíin Timoteo ñuu Corinto jeē véjicoo de nde Macedonia. Yūcuán na te tuá na inga jniñu ní sáha Pablo, chi máni jnūhun ya nácani cájī de nuū ñáyuu cácuu jnáhan de hebreo, jeē maá Jesús cúu ya Cristo, Yaā jeē cáñūhun ni i quiji ya. ⁶Te ni caquejéé i ni cacahān i siquī jnúhun ún, te ni cacahān xeēn i nuū Pablo.

Te máá de ni caja de sahma de jeē cúu seña jeē stóo de i jíin cuéchi i, te ni cahān de jíin i:

Cuéchi máá ní cúu jeē jnahnū ndetū ni núu súcuan, te nasūu cuéchi máá ná cúu. Nde vijna te quihīn na núu ñáyuu tācá nación jeē tu cájini i jnūhun ya, te nacani ná jnúhun ya nuū i, áchí de.

⁷Te ni quenda de ini vehe i sinagoga, te ni jinū de vehe iin tēe naní Justo ni condee de. Te chíñuhún tēe un Yáā Dios, te vehe tēe un néne yajni xiin véhe i sinagoga. ⁸Te Crispo, tēe cújuhnu ini vehe i sinagoga, ni candíje de máá Jítoho yō nde jíin ndihī ñayuu vehe de. Te cuehē ñayuu ñuu Corinto ni cajini nahín i jnūhun nácani Pablo, te ni cacandíje i, te ni cajendute i. ⁹Te iin jecuáā ni sáha máá Jítoho yō jeē ní jito ndijin Pablo yā ni cahān yā jíin de:

Ma yūhu ró ni ma cási rō yuhu ró, chi níní nacani ró jnúhun ri.

¹⁰Chi ndíto ri rohó, te ma cúu sáha xeēn ni iin ñayuu jíin ró. Nacani ró jnúhun ri, chi coo cuehē ñayuu candíje jnūhun ri ñuu yáha, áchí yá.

¹¹Te ni condee Pablo yūcuán iin cuiyā yosáva ni steén de jnūhun Yaā Dios nuū ñáyuu ún.

¹²Te ná cúu Galión gobernador Acaya, te ñayuu hebreo jeē cúu jnáhan ñuu Pablo, iin cáhnu-ni ni candonda i siquī Pablo. Te ni cajeca i de cuangoo i jíin de nde vehe juzgado. ¹³Te ni cacahān i jíin Galión:

Tēe yáha yōhyo scáhán de tāca ñáyuu jeē inga modo chíñuhún i Yaā Dios, suu iin modo jeē cúu contra siquī ley, achí i.

¹⁴Te quejéé Pablo cahān de núú, te ni cahān-ni Galión jíin ñáyuu hebreo un:

Ñayuu hebreo jijnáhan ró, núu iin cuēchi xeēn cúu, te cánuú cuni nahín rí jnúhun cácahān rō núú.

¹⁵Te tuú, chi máni siquī jnúhun-ni jíin síquī ley maá ró jíin síquī tée cástéén cúu. Te na sándaā maá ró síquī jníñu yáha, chi tu sándaā rí síquī maá iin jeē súcuan-ni, áchí de.

¹⁶Te ni cahān de nuū i jeē na quíngoo i fuera. ¹⁷Yūcuán na te ñayuu griego ni cajni i Sóstenes, tée cújéhnú ini vehe i sinagoga, te máá fuera yehyí vehe juzgado ni cacani i de, te Galión chi tu ní sáha cuíti de cuenta.

Jeē ní najinū Pablo ñuu Antioquía, te cuahān de vuelta uni jeē nacani de jnúhun ya

¹⁸Te cuehē gā quivī ni condee Pablo ñuu Corinto. Yūcuán na te ni nacuatáhú de nuū tǎcá hermano yúcuán, te Aquila jíin ñasihí de Priscila cuangoo de jíin Pablo, te ni jinūcoo de ñuu Cencrea. Te yūcuán ní saté lii Pablo xiní de, te súcuan stéén de jeē squícu de nuū Yaā Dios jeē ni jéjnūhun de. Te ni quívicoo de barco jíin Aquila jíin Priscila quihīn de región Siria. ¹⁹Te ni jinūcoo de ñuu Efeso, te yūcuán ní caquendōo Aquila jíin Priscila. Te ni jehēn-ni Pablo vehe i sinagoga, te ni cahān de jnúhun ya jíin jnáhan ñuu de hebreo jeē cándutútu yúcuán. ²⁰Te ni cacahān ndahú i jíin de jeē na cónēne de jecu gā quivī jíin i, te tu ní jéhe de jnúhun. ²¹Chi ni nacuatáhú de nuū i, te ni cahān de:

Cánuú jéē nuhūn ná ñuu Jerusalén cone ná vico. Te núu cúní Yaā Dios te ndee tucu ná núú ní, áchí de.

Te ni quenda de ñuu Efeso, te ni quivī de barco cuahān de. ²²Te ni jinū de ñuu Cesarea, te ni jehēn de ñuu Jerusalén. Te nuū ní ndihi ni cahān de jíin grupo ñayuu cácañdije yūcuán, te cuanuhun de ñuu Antioquía. ²³Te ni coyūcú de yūcuán jecu quivī, te sáá te ni quenda tucu de cuahān de ni jica cuu de hí Galacia jíin Frigia. Te ñayuu cácañdije ni cahije ga ni i jíin jnúhun ya ni sáha de.

Jeē ní nacani Apolos jnúhun Jesús ñuu Efeso

²⁴Te ñuu Efeso ni quee iin téē hebreo nání Apolos, te téē ñuu Alejandría cúu de. Te vāha nácani de jnúhun ya, chi vāha jíin de jnúhun jeē cahán tutu i. ²⁵Te je ni cutūhva vāha téē un jíin jnúhun máá Jítoho yō Jesús, vēsú jiní de máni máá jnúhun ya jeē ni stéén Juan ná ni scuándute de ñayuu, te ndíhví ni de stéén cají de jnúhun ya nuū ñáyuu. ²⁶Te jéhnú-ni ni nacani de jnúhun ya ini vehe i sinagoga. Te ni cajini sōho Aquila jíin Priscila jnúhun nácani de, te ni cajeca de Apolos cuangoo síin de, te ni cacastūhun yúcún ndindútu de jnúhun ya jeē ná tu cuni Apolos. ²⁷Te cúní Apolos quihīn de nde región Acaya. Te je cácañdije sava ñayuu yúcuán ní sáha Yaā Dios siquī jeē váha ni yā. Te tǎcá hermano ñuu Efeso ni cachindéé ñáhán i de, chi ni catee i carta quihīn de jíin núú ñáyuu cácañdije cáyūcú Acaya

jeē na cuátáhú i Apolos. Te nuū ni jínū de yūcuán, te vāha ni chindéé nāhán de tāca ñāyuu cácañdije un jíin jnúhun ya. ²⁸Te nuū tāca ñāyuu ñuu un ndé jíin jnáhan ñuu de hebreo jeē cáyūcu yúcuán, ní steén cají de ndese cástívi tāca jnáhan hebreo de siquī jnúhun ya. Te tu ní cánihīn jnáhan de un jnúhun cahān siquī jeē ni steén de, chí jíin jéē cahán tutu īi ni steén de jeē Jesús cúu Cristo, Yaā jeē cáñūhun ni de quiji ya.

Jeē ni íne Pablo ñuu Efeso

19 Te níni néne Apolos ñuu Corinto, te ni yāha Pablo ichi síquī ñuu Efeso, te ni nanuu de ni jinū de máá ñuu ún. Te yúcuán ní nijnáhan de jíin tijnī tēē cácañdije. ²Te ni cajñūhún de tēē ún:

¿A ní canihīn ní Espíritu Santo ná ni cacandije ní, chí ná tuú? áchí de.

Te ni cacahān de jíin Pablo:

Tuú, chí ni ná tu nihīn na jnúhun jeē iyó Espíritu Santo, achí de.

³Yūcuán na te ni cahān Pablo:

¿Na siquī ni cajendute ní núu súcuán? áchí de.

Te ni cacahān de:

Ni cajendute ná síquī jnúhun ni steén Juan, achí de.

⁴Te ni cahān Pablo:

Jeē ní scuándute Juan ñayuu cúu jeē ni steén de jeē na nácani ni i jeē stóo i cuēchi i, te ni cahān de jeē na cándije i máá Yāā quiji jeē cúu Cristo Jesús, áchí Pablo.

⁵Te nuū ní cajini sōho tēē un jnúhun yáha, te ni cajendute de jeē ní cacandije de máá Jítóho yō Jesús.

⁶Te ni soó Pablo ndīndúú ndaha

de xinī tāca tēē ún, te ni quīvi ni Espíritu Santo ini anuá de jíin náhan de, te ni cacahān de sīn sīn yuhu te ni canacani de jnúhun ya. ⁷Te ni iyo nájnūhun uxī uū jnahán tēē.

⁸Te unī yoō ni jehēn jehēn Pablo vehe īi sinagoga. Te jéhu ni nacani de jnúhun ya, te ni nducú ndéyí de jeē na cándije ñayuu jnúhun ndese ndácu Yaā Dios jniñu. ⁹Yūcuán na te sava i ni cacunihni ni i te tu ní cácañdije i, chí sa ni cacahān neé i siquī jnúhun vāha Yaā Dios jíin ñāyuu cánatata. Jeē yúcuán ní cujiyo-ni Pablo nuū ñāyuu ún, te ñayuu cácañdije

cuangoo i jíin de. Te ndijnahan quivī ni steén de nuū ñāyuu ún ini escuela īin tēē nání Tiranno. ¹⁰Te súcuán ni sáha de uū cuiyā, te tāca ñāyuu cáyūcu Asia, cúu ñayuu hebreo cúu ñayuu tāca gá nación, ni cajini sōho i jnúhun máá Jítóho yō Jesús. ¹¹Te ni jēhe Yaā Dios poder nuū Pablo jeē sáha de cuehē jniñu jéhu téyí. ¹²Te nde pañū jíin sahma jeē ní jñī de ni cajengoo jíin núu ñāyuu cácuñū, te ni canduvāha-ni i cuehyī cándoho i, te ni quendacoo tachī ini i cuangoo.

¹³Te jecu tēē hebreo cájica cuu de jeē quénehen de tachī ini ñayuu, te ni cajeni siquī ni de jeē suni jíin poder maá Jítóho yō Jesús quenehen de tachī, te suhva ni cacahān de jíin tāca táchi:

Jíin poder Jesús jeē nácani Pablo jnúhun ya, cáhán nihīn ri jíin ró jeē na quénda ró quíhīn rō, achí de.

¹⁴Te súcuán ni casáha uxā sēhe yíí īin tēē hebreo nání Esceva, cúu de īin sutū cujéhu. ¹⁵Te ná ni casáha de, te ni cahān-ni tachī ún:

Je jíinī rī Jesús, te suni jíinī rī Pablo. Te róho jíin náhan ró ĩndé tēē

cácuu ró jéē cuatáhú rí rohó? áchí jín de.

¹⁶Te tēe ndóho tachī un ní ndonda de, te ni cundeyí de siquī ndihúxá tēe ún. Te ni sáha xeēn ndasí de jín ndé ni catujī te ni cacuvichí líi ni quendacoo vehe un ní cajinu cuangoo. ¹⁷Te jnūhun yáha ní cajini táca ñáyuu cáyūcú ini ñuu Efeso, cúu ñayuu hebreo cúu ñayuu táca gá nación, te yōhyo ni cayūhú i, te ni cacahān i jeē yōhyo cújéhnú máá Jítóho yō Jesús.

¹⁸Te cuehē ñayuu jeē ní cacandíje ni quijicoo i nuū Pablo ni nacani ndaā i jnūhun tǎcá jniñu neé ní casáha i. ¹⁹Te cuehē i jeē ní casáha jniñu tásí ní jinūcoo i cándiso i tutu i, te ni cajehmu i tutu un jító nuū táca ñáyuu. Te ni catava i cuenta nasaa ndéé tutu ni cáyū ún, te ni cajini i jeē uú xico uxī mil xūhun plata cúu. ²⁰Te ni jitē jnūhun máá Jítóho yō cuahān, te ndihi ñayuu ni cajini i jeē cújéhnú ndasí jnūhun ya.

²¹Te nuū ní ndihi tǎcá jniñu yáha, te jéni téyí ni Pablo jeē quihīn de Macedonia jín Acaya, te sáa te najinū de ñuu Jerusalén. Te ni cahān de jeē na najinū de ñuu Jerusalén, yūcuán na te jini ñihún quihīn de nde ñuu Roma. ²²Te uū tēe jeē cáchindéé ñáhán jín Pablo cúu Timoteo jín Erasto, te ni scāndu de ndindúú tēe yāhá cuángoo de nde Macedonia, te ni quendōo máá de Asia jecu gā quivī.

Jeē ní cacuvaā ñayuu ñuu Efeso

²³Te suu quivī ún yōhyo ni candonda ñayuu siquī jnūhun ya.

²⁴Chí ni iyo iin tēe sájniñu siquī plata, nání de Demetrio. Te máá

de jín ndihi tēe casájniñu jín de, cánihin de cuehē xūhún, chí jín plata casáha de vehe lulí jéē modo veñūhun ídolo i jeē cúu yaā Diana.

²⁵Te Demetrio ni nastútú de tēe casájniñu jín de jín táca gá tēe jeē suni jniñu yūcuan casáha, te ni cahān de:

Tátā, cájini ni jéē siquī jniñu casáha yó yáha vāha cánihin yō xūhún. ²⁶Te cájito ní te cájini sōho ní jéē iin tēe nání Pablo chí cáhán de jeē násūu yāā cácuu jeē casáha ñayuu. Te je ni scandíje de cuehē ñayuu, nasūu máá iin-ni ñuu Efeso yāhá chí ní cáhnu Asia. ²⁷Te quíyūhú ni na jéē cahān ñayuu jeē tu ndé jéjníñu jeē casáha yó. Te sanaa te suni súcuan cahān i coto i máá veñūhun yaā sihí Diana jeē cújéhnú, te suni sájéé ni i nuū yaā Diana, te ma cúu ga cújéhnú ya vēsú ndivii ñayuu Asia jín ñayuu ní cáhnu ñayivī cáchiñūhún i ya vijna, áchí de.

²⁸Súcuan ni cajini sōho de jnūhun yáha te yōhyo ni caquitī ni de, te ni cacana jee de:

Cújéhnú téyí Diana, yaā cúu patrona ñuu yō Efeso, achí de.

²⁹Te ñayuu ñuu Efeso ni cacuvaā i, te iin cáhnu-ni ni candonda i ni cajniñi i Gayo jín Aristarco cuangoo i jín de nde vehe nuū cándutútú ñáyuu casáha i junta. Te ndindúú tēe un cácuu tēe Macedonia, te cájica de jín Pablo. ³⁰Te cúní Pablo quivī de nuū ñáyuu cuehē un cahān de jín i, te ñayuu cacandíje tu ní cájēhe i jnūhun quihīn de. ³¹Te suni sava tohō jeē cácuu amigo de cáyūcu Asia, ni catajī jnūhun cuahān nuū de, cácahān ndahú

jíin de jeē ma quihín de nuū ní cacutútú ñáyuu ún. ³²Te ñayuu ní cacutútú un, sava i ni cacana jee i iin jnūhun te sava ga i inga jnūhun, te súcuan ni cacuvaā teyí i, te cuehē i ni tu cájini cuíti i na siquī cúu jeē ní cacutútú i. ³³Te sava tēe hebreo ni cajeni de iin jnáhan de jeē naní Alejandro nuū ñáyuu cuehē ún, te ni cacastūhún de nuū tēe ún na siquī cúu jeē cacuvaā i. Yūcuán na te Alejandro ni sáha de seña jíin ndaha de jeē na cúnayúú ñáyuu, chi cúní de cahān de jíin i jeē násūu cuéchi tāca ñáyuu hebreo cúu. ³⁴Te ni canacuni ñayuu un jéē tēe hebreo cúu de, te jeē yúcuan ní cacana jee téyí gá i nájnūhun uū hora:

Cújéhnū téyí Diana, yaā cúu patrona ñuu yō Efeso, achí i.

³⁵Yūcuán na te ni cacunahín ñáyuu ni sáha tēe cúu secretario ñuu ún, te ni cahān de:

Níhín ñáyuu ñuu yō Efeso, ndihí ñayuu chi je cájini i jeē cándito vāha yó veñūhun yaā Diana jíin imagen Diana jeē ní ñinga nde andiví. ³⁶Te ni iin chi ma cúu cahān jeē tú ndaā jnūhun yáha. Núu súcuan te vāha ga na cási ní yuhu ní, te ma sáha yachí ní iin jeē tu ní nácani vāha ni ni síquī.

³⁷Chi tēe yáha ní caquindeca ní de yāhá vēsū tu ní cásáha de ni iin cuēchi siquī Diana yō, ni tu ní cacahān ndevāha de ni iin jnūhun siquī. ³⁸Te Demetrio jíin táca gá tēe jeē iin-ni jniñū cásáha jíin de, núu cácuni de cahān de cuēchi siquī iin tēe, te na quíngoo de nde vehe juzgado nuū cáyūcu juez, tēe cásándaā jniñū, te yūcuán cundaā

siquī de jíinánhan de. ³⁹Te núu íyó jnūhun jeē ma cúu cundaā yūcuán, te jíini ñūhún cundaā nuū iin junta nájnūhun tájnúní ley. ⁴⁰Chi yúhú ná jeē sanaa te cahān tāca tóhō Roma jeē siquī gobierno de ni candonda yó, chi ma nihín yō jnūhun castūhun yó na siquī cúu jeē ní cacutútú yó ni cacuvaā yō vijna, achí de.

⁴¹Te nuū ní ndihí ni cahān secretario jnūhun yáha, te ni cajitē ñayuu un cuángoo.

Jeē ni jéhēn Pablo Macedonia jíin Grecia

20 Te ná ni yāha jéē ní cacuvaā ñayuu, te ni cana Pablo ñayuu cácandíje, te ni jeni ichí de i. Te ni cañunundee jnáhan de jíin Pablo jeē ní nacuatáhu de, te cuahān de Macedonia. ²Te ni jica cuu de tācá ñuu yúcuan. Te jíin cuéhē jnūhun ni stihví ni de tācá hermano cácandíje. Te ni jinū de Grecia. ³Te ni condee de yúcuan úní yōō. Te je yajni quihín de jíin barco nde Siria nuú, te máá quívī ún te ni nihín de jnūhun jeē jnáhan ñuu de hebreo ni casquíjnáhan jnūhun jeē ndonda siquī de ichi nuū quihín de, te jeē yúcuan ní nacani ni de te cuahān tucu de ichi Macedonia. ⁴Te ni cahīyo sava tēe cájica jíin Pablo, te cánaní de Sópater ñuu Berea, Aristarco jíin tēe nání Segundo nde ñuu Tesalónica, Gayo ñuu Derbe, Tíquico jíin Trófimo nde Asia, jíin Timoteo. ⁵Te ni cacandu tēe yáha, te cándētu de Pablo jíin sáña, Lucas, nde ñuu Troas. ⁶Te nuū ni yáha vico jeē cáyeji i pan jeē tu yíhi levadura,

te jíin barco ni quendacoo ná ñuu Filipos, te nde nuū uhún quivī te ni canajnáhan ná jíin de nde ñuu Troas. Te ñuu yúcuan ní coyūcu ná uxā quivī.

Jeē ni íne Pablo ñuu Troas

⁷Te máá quívī domingo ni candutútú ñáyuu cácanđije jeē cáji i pan, nájnūhun ni steén maá Jítoho yō jeē núcūhun ni yō siquī yā. Te ni steén Pablo jnūhun nuū ñáyuu ún. Te siquī jeē inga quivī un jíni ñúhún quenda de quihín de, te nahán ní nacani de jnūhun nde ni cuñuú. ⁸Te vehe yósó jnáhan cúu vehe ún. Te nde cuarto xinī nuū ní candutútú ná un ní íyo cuehē lámpara ni cundijin. ⁹Te iin sūchi yíí nání i Eutico, néne i yuhu ventana. Te jeē ní cunahán nácani Pablo jnūhun, te yōhyo jíí i māhná, te ni quixī-ni i. Te nde piso unī un ní nīnga i nde nuū ñúhún. Te je ni jihī i ni candonehen de i. ¹⁰Yūcuán na te ni nuu Pablo te ni jita ndeyi de ni canehen de i ni ñunundee de i, te ni cahān de:

Ma yūhu ní jíjnáhan ní, chi ni natecu i, áchí de.

¹¹Te ni ndaa Pablo, te ni yeji de pan jíin i jíjnáhan i jeē cánucūhun ni de siquī yā. Te nahán gá ni nacani de jnūhun nde cuacundijin. Yūcuán na te ni quenda de cuahān de. ¹²Te Eutico chi íyó váha i cuanuhun i jíin de jíjnáhan de, te ndivii ñayuu ún yōhyo cácusii ni i.

Jeē ní quenda Pablo ñuu Troas cuahān de ñuu Mileto

¹³Te ni quivicoo ná ini barco cuangoo ná. Te Pablo chi cúní

de caca jéhé de, te ni cundaā jeē najnáhan ná jíin de nde ñuu Asón. ¹⁴Te nuū ní canajnáhan ná jíin de ñuu Asón, te ni quivī de barco te cuangoo ná jíin de nde ñuu Mitilene. ¹⁵Te yúcuan ní quendacoo tucu ná jíin barco te inga quivī ni jinūcoo ná xiin Quío, ñuhun jeē íne sáin nuū ndúte. Te quivī uní ni jinūcoo ná Samos jeē súni nuū ndúte íne, te ni caquendōo ná Trogilio. Te quivī cuún ni jinūcoo ná ñuu Mileto. ¹⁶Te tu ní jéngoo ná ñuu Efeso, chi jéni ni Pablo jeē yáha-ni de ñuu un quihín de, návāha ma cucuéé de Asia te naa tiempo nuú, chi núú de jinū yachi de ñuu Jerusalén cone de máá quívī Pentecostés núu na cúu.

Jeē ní jeni ichí Pablo tē jéhnu cándiso jníñu nuū ñáyuu cácanđije ñuu Efeso

¹⁷Te ná íne ga Pablo ñuu Mileto, te ni tají de jnūhun cuahān nde ñuu Efeso jeē na quíjicoo tē jéhnu cándiso jníñu nuū ñáyuu cácanđije yūcuán. ¹⁸Te nuū ní quecoo tē ún, te ni cahān de:

Je cájini vāha ní ndese ni jica ndaā na ndé ná ni quee nuú ná Asia te nde vijna. ¹⁹Chi níí tiempo jeē ni íne ná jíin ní te nde vijna, jéjníñu vāha na síquī jnúhun máá Jítoho yō, te tu ní sándúxí ná maá ná. Te íyó jínu ni ndahyū na jéhē ñáyuu. Te ni ndoho ná jnúndóho ni casáha jnáhan ñuu ná hebreo, chi ni casquíjnáhan jnūhun i siquī ná. ²⁰Te cájini ni jée tu ní táñúhún ná ni iin, vēsú ndese ga cácahān ñayuu siquī ná, chi ni nacani ná ndihi jnūhun ya jeē quéndōo vāha

ní sáha. Te ni steén na jnúhun ya nuū ni jínáhan ní, cúu nuū chitú cúu tãcá vehe ní. ²¹Te inuú-ni jnúhun ni nacani ná núū ndihi ní, cúu jnáhan ñuu ná hebreo cúu ñayuu tãca gá nación, chi ni cahān na jéē na nãcani ni ni jéē stóo ni cuéchi ní te na cándíje ní máá Jítóho yō Jesucristo. ²²Te vijna chi ñúhun ichí ná quihín ná ñuu Jerusalén, chi stíhvī ni Espiritu Santo sãña quíhín ná. Te tu jíní ná ndese ga coo jíín ná yūcuán. ²³Te íyó ñin jeē jiní na, cúu jeē chune i sãñá vecāa te quiji jñúndóho siquī ná, chi Espiritu Santo súcuan cáhán jíín ná ndijnahan ñuu nuū jíca ná. ²⁴Te ni tu sáha ná cuenta vēsú na cáhni i sãñá, chi jeē cuní na cúu jeē na sínu vāha ná jniñu jeē ní tee máá Jítóho yō Jesús siquī ná, te súcuan cusíñi ni ná. Te jniñu un cúu jeē nãcani ná jnúhun vāha ya nuū tãca ñayuu ndese vāha ni Yaā Dios jíín yó.

²⁵Te je ni jica cuu ná, ní nacani ná jnúhun ya nuū ní ndese ndácu Yaā Dios jniñu. Te vijna chi jíní na jéē ni ñin ní ma najnáhan ga yō nuū ñáyivi yáha. ²⁶Jeē yúcuan cástūhun cájí ná nuū ni jínáhan ní vijna jeē násūu cuéchi ná cúu núu ndé ñin ní stívi. ²⁷Chi ni nacani ná núū ní ndihi jnúhun Yaā Dios jeē ni sãndaā yā ndese coo, te tu ní quéndōo ni ñin jnúhun. ²⁸Núu súcuan te coto vāha ní máá ní jíín ndihi ñayuu cácadíje, chi Espiritu Santo ni jeni ya nihín jéē cóndito ní ñayuu maá Jítóho yō, chi ni nacuaan ya i jíín níñi yā. ²⁹Chi jeē quihín na te jíní na jéē quijicoo tēe cástáhú quívicoo mēñu ní, te nducú de snāa de

jnúhun ni cajetáhú ñayuu cácadíje, te xeēn sáha jnúhun stáhú de najnúhun xeēn sáha yihī jeē cájehni tī lanchi. ³⁰Te suni nuū grupo maá ní quejéé sava de cahān de jnúhun stáhú, te stáhú de sava ñayuu cácadíje jeē na cóndiquin i jnúhun stáhú steén de. ³¹Jeē yúcuan condito ní jéē ma cóo súcuan. Te ma náa ni ni jéē uní cuiyā ndiquivī ndíñuu ni condíhvī ndasí ni na ndé ndahyú na jéhē ni, ní jeni ichí ná ñin ñin ní jínáhan ní.

³²Te vijna, hermano, jícán tahú na núū Yaā Dios jeē coto ya nihín. Chi jnúhun jeē váha ni yā ndíso poder sáha jeē íje ga ni jíín, te suu sáha jeē ñin quivī te cuāha ya tahū jeē ndujéhnu luu ní ndé jíín ndihi ñayuu ní nacāji ya jeē cóo ndoo coo ñi i nuū yā. ³³Tu ní ndúcú ná jeē nihín na xúhun chí sahna nuū ní ñin i. ³⁴Chi je cájini vāha ni jéē sa suhva ni sájniñu nihin ná návāha nihín na jéē cótecu na ndé jíín tãca tēe cájica jíín ná. ³⁵Te níni ní steén na núū ni jéē súcuan jíni ñúhún sájniñu yó návāha nihín yō jeē cuāha yó núū ñayuu cúmani nuū. Te ma náa ni ni jnúhun jeē ni cáhān maá Jítóho yō Jesús, chi suhva ni cahān yā: Ndetū gā quendōo yó jéē cuāha yó vēsú jeē nihín yō, achí yá. Achí Pablo.

³⁶Te ni ndihi ni cahān de tãca jnúhun yáha, te ni jecuiñi yití de, te ni jicān tahú de jíín ndihi tēe ún. ³⁷Yūcuán na te ndihi de ni cajecunundee jnáhan de jíín Pablo ni catechūhú de jeē cánacuatáhú de, te ni candahyū de. ³⁸Chi cácuuíhyá ndasí ni de jíín jnúhun ni cahān Pablo jeē ma ndácoto

jnáhan ga de. Te cuangoo-ni de jín Pablo nde núu ín barco.

Jeē cuánuhun Pablo ñuu Jerusalén

21 Yūcuán na te ni caquendōo tācá hermano ñuu Efeso, te ni quívicoo ná barco, te cuangoo ndaā-ni ná ndé Cos. Te inga quivī ni jinūcoo ná Rodas, te yūcuan ní quendacoo ná te ni jinūcoo ná ñuu Pátara. ²Te ni cane ñin barco jeē quihín Fenicia, te ni quívicoo ná cuángoo ná. ³Te nuū ní cajito ná núu Chipre jeē íne sñin nuū ndúte, te ni quendōo ichi lado jecó barco, chi ni cayāha ná cuángoo ná nde Siria. Te ni jinūcoo ná ñuu Tiro, chi yūcuan ndóo jeē ndíso barco ún. ⁴Te ni jenanducú ná ñayuu cácanđije, te ni caquendōo ná jín i uxā quivī. Te máá Espíritu Santo ni steén nuū i jeē quíji jnūndóho siquī Pablo ñuu Jerusalén, te jeē yūcuan ní cacahān i jín de jeē ma quihín de. ⁵Te ni yāha uxā quivī ún, te ni quendacoo ná. Te tāca tée cácanđije jín ñasihí de jín séhe de ni cachuhun ichí de sñāna ní jengoo de jín ná nde yatā ñūū, te ni cajecuiñi yití ná jín de yumar te ni cajicān tahu na. ⁶Te ni cañunundee jnáhan ná ní canacuatáhú ná yūcuán, te ni quívicoo ná barco cuangoo ná. Te ni canandió cóo de cuanungoo de vehe de.

⁷Te ni quendacoo ná ñuu Tiro cuangoo ná jín barco, te ni jinūcoo ná ñuu Tolemaida ni quendacoo ná ñuu barco. Te yūcuan ní jengoo ná ní cacahān na jín táca hermano, te ni caquendōo ná jín de ñin quivī. ⁸Te inga quivī un ní cajica jéhé ná jín Pablo, te ni jinūcoo ná ñuu

Cesarea, te ni quívicoo ná vehe Felipe, tēe nácani jnúhun vāha ya. Tēe un cúu jnáhan jeē ndihúxá tēe jeē ní casaja staā nuū ñáhan viuda. Te ni caquendōo ná jín de. ⁹Te tēe un íyó cúun séhe síhí de jeē cáhíyo máá i, te cánacani i jnúhun Yaā Dios. ¹⁰Te ni coyūcu ná yūcuán tijní quivī. Te ichi Judea ni quiji ñin tēe nácani jnúhun Yaā Dios, nání de Agabo. ¹¹Te ni quee de nuū ná. Te ni quihin de sanchíi Pablo, te ni jihni de ndaha de jín jéhē de, te ni cahān de:

Suhva cáhán Espíritu Santo. Jnáhan yó hebreo súcuan cuhni i tēe chíi sanchíi yáha ini ñuu Jerusalén, te nastúu i de nuū ñayuu sñin nación, áchí de.

¹²Te jeē ní cajini sōho na jnúhun yáha te máá ná jín táca tée cácanđije cáyūcú ñuu Cesarea ni cacahān ndahú ná jín Pablo jeē ma quihín de ñuu Jerusalén. ¹³Yūcuán na te ni cahān Pablo:

¿Najehē cándahyū ni jínjáhan ní, te casáha ní jēe cucuíhyá ni ná? Chi sñāna je íyó túhva ná jēe násūu máá jēe cónuhni ná ini ñuu Jerusalén, chi suni jeē vēsú na cúu na jēe siquí maá Jítóho yō Jesús, áchí de.

¹⁴Te jeē tu ní cúu cuiti casicoo ná, yūcuán na te sa suhva ni cacahān ná:

Na cóo ndese cúní maá Jítóho yō nuu súcuan, áchí ná.

¹⁵Yūcuan na te sáá te ni casátúhva ná, te cuangoo ná ñuu Jerusalén. ¹⁶Te suni jecu tēe ñuu Cesarea jeē cácanđije cuangoo de jín ná. Suni cuahān ñin tēe Chipre nání de Mnasón, te je ni cuu cuehē cuiyā candíje de. Te ná ni jinūcoo

na ñuu Jerusalén, te ni cacoyūcu ná vehe de.

Jeē ni jécondēhe Pablo Jacobo

¹⁷Te nuū ni jínūcoo ná ñuu Jerusalén, te hermano cáyūcú ñuu ún yōhyo ni cacusī ni de jeē ni jínūcoo ná. ¹⁸Te inga quivī un ní cajengoo ná jínáhan ná jíin Pablo vehe Jacobo, te yūcuan ní candutútú táca tée jéhnū cándiso jníñu nuū ñayuu cácañdije. ¹⁹Te Pablo ni sáha de saludar tēe ún jínáhan de. Yūcuán na te ni castūhún de ndihī jniñu ní sáha Yaā Dios ná ni nacani de jñūhun ya nuū ñayuu tācá nación jeē tu cājini i jñūhun ya. ²⁰Te ni cajini sōho de jñūhun yáha, te ni cacahān de jeē yóhyo cújéhnū Yaā Dios. Te ni cacahān de jíin Pablo:

Hermano, vijna te jíin ni náa cuehē mil jnáhan ñuu yō hebreo ni cacandije i Jesús, te cácahān nihin i jeē cánuú squícu yó ley jeē ni jéhe ya nuū Moisés. ²¹Te ni canihīn i jñūhun cácahān jeē stívī ní steén ni núu tāca jnáhan yó ñayuu hebreo cáyūcu jíca i tāca gá nación, chi ni steén ni núu i jeē ma cuatáhú gá i nuū ley Moisés, ni ma sáha ga i circuncidar sēhe i, ni ma cuatáhú gá i tāca gá jeē tajnúní jenahán. ²²¿Nde se sáha ní núu súcuan? Chi cuni ñayuu un jēē ní ndee ní te cutútú cuéhē i. ²³Suhva sáha ní núu súcuan. Yáha íyó cúun tēe jeē ní cajejnūhun de iin jeē squícu de nuū Yaā Dios. ²⁴Cueca ní tēe yáha quíhīn ni jíin de templo, te cuchī ní nasándoo ní máá ní jíin de nuū yā, te cuaan ní jeē socó de nuū Yaā Dios jijnáhan de. Yūcuán

na te cuu sāté de xinī de, te suu stéén jeē ní casquícu de ndihī jeē ní cajejnūhun de nuū yā. Yūcuán na te cuni ndihī ñayuu jeē tú ndaā tāca jñūhun ni cajini sōho i siquī ní, chi coto i jeē suni máá ní sa squícu ní ley yā. ²⁵Te ñayuu tācá nación jeē násūu ñayuu hebreo cácuu i te ni cacandije i ya, je ni catee ná carta cuahān nuū i jeē tu cánuú squícu i ley un, chi máá-ni jeē ma cájī i cūñu jeē ni sóco nuū ídolo ni niñī quitī jeē jihī jeē tu jéti niñī tī, te ni ma cáca jnéni i, áchī de.

Jeē ní cajniī de Pablo ini templo

²⁶Yūcuán na te ni jeca Pablo tēe ún, te inga quivī un ní cajichi de ni canasándoo de máá de nuū yā. Te ni quivī Pablo ini templo ni cachi de nuū sutú na quivī jínu jeē nasándoo tēe un máá de nuū yā, te quindeca de quitī jeē socó de nuū yā.

²⁷Yūcuán na te cácuu de jeē sínu de ndihúxá quivī jeē cándundoo de nuū yā, te sava jnáhan hebreo de jeē véjicoo Asia ni cajini de jeē íne Pablo ini templo, te ni cascáhán de ndihī ñayuu, te ni cajniī i Pablo. ²⁸Te ni cacana jee i:

Tēe ñuu yō Israel, cuāha núu ní ndaha jijnáhan ní na jniī yó tēe yáha. Chi máá de cúu tēe jíca cuu ní cáhnu stéén de nuū tāca ñayuu, te cáhán de siquī nación yō jíin síquī ley jeē ni jéhe ya nuū Moisés jíin síquī templo yáha. Te suni je ni quivícoo de jíin jecu tēe griego ini templo ii yāhá, te súcuan stívī de jñūhun ii jeē cahán jeē ma cúu quivī ñayuu ini templo te núu násūu ñayuu hebreo cúu i, áchī.

²⁹Chi nde na íne Pablo ini ñuu un ní cajini tēe hebreo jeē jíca de jíín Trófimo, tēe ñuu Efeso jeē násúú hebreo cúu de, te cájeni ni de jeē ní quívi tēe un jíín Pablo ini templo.

³⁰Te ndíhi ñayuu ñuu un ní cuvaā, te ni cacutútú-ni i, te ni cajni i Pablo, te ni castáa i de ni quenehen i de ini templo un, te ni canacasi-ni i yéhyí. ³¹Te ni cacuni i cahni i de núú. Te general, tēe cújéhnú nuū ndíhi soldado, ni nihin de jnúhun jeē ndíhi ñayuu ñuu Jerusalén ni candonda i cácuvaā i. ³²Te ni jeca general tācá soldado jíín capitán, te cájini de cuango de nde nuū cáhiin ñayuu cuehē ún. Te ná ni cajito ñayuu jeē ni jíínúcoo general jíín soldado, te ni cajecuiñi i jeē cácani i Pablo. ³³Yūcuán na te ni quívi general mēhñu ñáyuu, te ni jni de Pablo, te ni ndacu de jniñu jeē conuhni de jíín úu cadena. Yūcuán na te ni cajnúhún general ndé tēe cúu Pablo te na cuēchi ni sáha de. ³⁴Te ni cacana ñayuu cuehē ún, sava i iin jnúhun te sava ga i inga jnúhun, te tu ní cúu cuni de na cuēchi ni sáha Pablo, chi cácuvaā i. Te ni ndacu de jniñu cuahán Pablo nde cuartel. ³⁵Te nuū ni jíínú Pablo escalera cuartel ún, te soldado ni cajni de Pablo cándiso de siquí jeē cácani ñayuu ún jni i Pablo sáha xeēn i jíín de. ³⁶Chi ndíhi i vejicoo i ichi yátá soldado, te cácana jee i:

Cahni ni tēe jííná, achí i.

**Jeē ni cáhán Pablo jehē
maá de nuū ñáyuu**

³⁷Te cásquívi de Pablo ini cuartel nuú, te jíín jnúhun griego ni cahán Pablo jíín general:

¿A cuáha ni jnúhun cahán ná iin jnúhun jíín ní? achí de.

Te ni cahán general jíín de:

Te jíín rō cahán rō yuhu griego jeē súcuan. ³⁸Núu súcuan te nasúu róhó cúu tēe Egipto jeē jé ni cuu quívi ni ndonda siquí gobierno te ni quenehen cuūn mil tēe jéhní ndíyi cuango jíín de nde nuū ñúhun téhé, achí.

³⁹Yūcuán na te ni cahán Pablo:

Tuú, chi tēe hebreo cúu ná, te ni cacu ná ñuu Tarso, iin ñuu jeē cújéhnú ndañú Cilicia. Te quiñúhun ni ni cuáha ní jnúhun na cáhán na jíín ñáyuu yáha jíínáhan i, achí de.

⁴⁰Te general ni jēhe de jnúhun jeē cahán de. Te ni jecondichi Pablo nuū escalera, te ni sáha de seña jíín ndaha de jeē na cúu nayúú ñáyuu ún. Te nuū ní cuu nayúú-ni i, te jíín jnúhun yuhu ñúú de hebreo ni cahán de:

22 Ndíhi níhín jeē cácuu ní jnáhan ñuu yō jíín ndíhi níhín jeē cácujehnú ní núú ñúú yō, cuni sōho ní jnúhun cahán na jéhē maá ná, achí de.

²Te ni cajini sōho i jeē cahán Pablo yuhu hebreo jeē cúu yuhu ñúú i, te víhyá gā ni cacunahín i. Te ni cahán Pablo:

³Maá ná cúu jnáhan ñuu yō hebreo, te ni cacu ná ini ñuu Tarso ndañúú Cilicia. Te ini ñuu Jerusalén yáha ní jehnu ná, te ni cutúhva ná núú Gamaliel, te ni steén de nuū ná ndíhi siquí ley jeē ni jēhe ya nuū jíí yō. Te nde jíín ini jíín ánuá na ní nducú ndéyí ná squícu ná súcuan nuū Yāa Dios, nájnúhun cása ha maá ní vijna. ⁴Te ni jito xeēn na

ñáyuu cácandíje i jnūhun Jesús te nde cuní na jéē na cúū ndihí i núú. Chi cúū tēe cúū ñahan ni jnií ná ni chuhun ná vecāa. ⁵Te sutū cujéhnu ga jíín táca tēe jéhnu cándiso jniínu nuū nūū yō, cácuu de testigo jeē súcuan ni sáha ná, te suni máá de ni cajēhe de tijni carta cuahān na jíín jéē cuáha na núū táca jnāhan yō cáyūcú ñuu Damasco. Chi cuahān ná ñuu un jéē jnií ná ñáyuu cácandíje i Jesús te quindecā ná i ñuu Jerusalén yāha, návāha ndoho i núú.

Jeē ní cachi Pablo ndese ni sama ya de

(Hch. 9.1-19; 26.12-18)

⁶Te ni quihin ná ichi cuahān ná, te cuacuyajni ná ñuu Damasco, te nájñūhun caxū cúu. Te ichi ándiví ní quiji iin nduva ní ndindēē ndaxíi núū ná. ⁷Te ni cotúú-ni ná núū ñūhun, te ni jini sōho ná iin jnūhun cáhān jíín ná: Saulo, Saulo, ¿najeheé jító xeēn rō ruhū? achí. ⁸Yūcuán na te ni cahān ná: ¿Na nihín cúu jeē cahán, Tātā? achí ná. Te ni cahān yā jíín ná: Máá rí cúu Jesús jeē ní jehnu ñuu Nazaret, te jeē jító xeēn rō ñáyuu cácandíje i ruhū cúu jeē jító xeēn rō ruhū, achí yá. ⁹Te tēe cuangoo jíín ná ni cajini ndije de jeē ndíndēē, te ni cayūhú de, te tu ní cájini sōho de ndese ni cahān yā jíín ná. ¹⁰Yūcuán na te ni cahān ná: Tātā, ¿na vé cuní ni jéē sáha ná? achí ná. Te ni cahān maá Jítóho yō jíín ná: Ndocuññi te quihin rō ñuu Damasco, te yūcuan íyō iin tēe jeē cachi nuū rō na vé cúu jeē cánuú sáha ró, achí yá jíín ná. ¹¹Te jeē ní ndindēē un ní sacuáá núū ná, te

tēe cuangoo jíín ná un ní cajnií de ndaha ná cuángoo de jíín ná ní jinūcoo ná ndé ñuu Damasco.

¹²Te yūcuan ní condee iin tēe nání Ananías, te táca jnāhan yō hebreo yūcuan cácahān jeē tēe vāha cúu Ananías, chi vāha squícu de ley jeē ni jéhe ya nuū Moisés. ¹³Te ni quee tēe un núū néne ná, te ni cahān de jíín ná: Hermano Saulo, na ndúndijin tinūu ní, achí de. Te ni ndundijin-ni tinūu ná, te ni jito ná núū de. ¹⁴Te ni cahān Ananías: Máá Yáa Dios táca jíí yō, je ni nacāji ya nihín návāha cuni ní na vé cuní yā jeē sáha ní, te coto ní núū maá Cristo, Yāa ndaā, te cuni sōho ni jnūhun jeē cahán yā. ¹⁵Te nacani ní jnūhun ya nuū ndivii ñáyuu táca jéē ní jito ní jíín jéē ní jini sōho ní. ¹⁶Ma cúhuun ni ni núu súcuan. Ndocuññi ní, te cuandute ní te cahān ndahú ní jíín máá Jítóho yō, návāha nacate ya anuá ni núū cuéchi, achí de jíín ná.

Jeē ní cachi Pablo ndese ni tají Yāa Dios de nuū ñáyuu táca gá nación

¹⁷Te ni nandió cóo na ní ndee ná ñuu Jerusalén. Te jícán tahú na ini templo, te ni sáha máá Jítóho yō jeē ní jito ndijin ná. ¹⁸Te ni jini na núū yā ni cahān yā jíín ná: Yachi quenda ró ñuu Jerusalén yāhá, chi ma cuatáhú ñáyuu yáha jéē nacani ró jnūhun ri nuū i, achí yá. ¹⁹Te ni cahān na jíín yá: Tuú, chi cuatáhú i, Tātā, chi je cájini i jeē ni quívi ná ndijnahan vehe i sinagoga ni jnií ná táca ñáyuu cácandíje i nihín, te ni cani ná i, te ni chuhun ná i vecāa. ²⁰Te je cájini i jeē quiví ní cajehni i Esteban, tēe ni nacani cáji jnūhun

ní, suni ni indichi na yúcuán, te ni jejnúhún ná jeē na cúu de, chi ni condito ná sahma tēe ni cajehni Esteban, áchí ná jíin yá. ²¹Te ni cahān yā jíin ná: Cuáhán, chí máá rí tají rí rohó quíhín jicá ró nde nuū ñáyuu tǎcá nación jeē tu cájini i jnūhun ri, achí yá jíin ná. Achí Pablo.

Jeē ni íne Pablo nuū general

²²Te tǎca ñáyuu ún vāha-ni ni cájini sōho i te nde jnūhun sandīhi yáha jēē ní tají yá de nuū ñáyuu tǎca gá nación. Yūcuán na te ni cacuvaā i, te ni cacahān jee i:

Na cúu tēe jíiná, chí tú vāha jeē cótecu gā de, áchí i.

²³Te súcuán cácana jee i, te ni cascándoó i ticāchí i, te ni cascánda i ticachā. Te súcuán cástéén i jeē cáquiti xēen ni i. ²⁴Te ni ndacu general jniñu jeē na quívi Pablo ini cuartel, te ni cahān de jeē na stíchí soldado Pablo nde jíin cuarta ñii, návāha cujnúni ni general na siquī cúu jeē ní candonda ñáyuu un síquī de. ²⁵Te ni cajihni de Pablo návāha súcuán te caní de. Te ni cahān Pablo jíin capitán jeē índichi tūhva:

¿A jéhe ley jnūhun jeē caní ní cuarta tēe cúu sēhe nación Roma núu ná tu sándaā ní núu íyó cuéchi de? áchí de.

²⁶Te ni jini sōho capitán jnūhun yáha, te ni jecahān jíin general:

Coto vāha ní jēē ma stívi ní sáha ní jíin tēe yáha, chí cúu de sēhe nación Roma, achí.

²⁷Yūcuán na te ni jinū general nuū Pablo, te ni cajnúhún de:

Cachí núu jendaá cúu jeē sēhe nación Roma cúu ró, áchí.

Te ni cahān Pablo:

Suu cúu ndije ná, áchí de.

²⁸Te ni cahān general:

Ruhū chí nde jeē ní jéhe ri cuehē xūhún te ni nduu ri sēhe nación Roma, áchí.

Te ni cahān Pablo:

Te sǎná chí nde quívi ní cacu ná cúu ná sēhe nación yō Roma, achí de.

²⁹Yūcuán na te tǎca tēe jeē cácuni caní Pablo nuū, ni cacujíyo-ni cuango, te suni nde general ní yūhú de, chí ní stívi de jeē ní jihni de Pablo, chí tu íyó vāha sáha súcuán jíin sēhe nación Roma.

Jeē ni índichi Pablo nuū junta cujéhnu ga jnāhan nuu de hebreo

³⁰Te ínga quívi un cúní general cundaā vāha ni de na siquī cúu jeē ní candonda tēe hebreo siquī Pablo. Te ni ndají de cadena jeē nuhní Pablo, te ni ndacu de jniñu ni cacutútú tǎca sūtū cácujeñnu jíin tǎca tēe cásáha junta cujéhnu ga, te ni quenehen de Pablo, te ni jeni de nuū tēe ni candutútú un.

23 Yūcuán na te ni ndacoto Pablo nuū tēe ní candutútú junta un, te ni cahān de:

Tátā jíināhan ní, ní ndé vijna vāha íyó ní anuá na jēē tú na cuéchi ná, jíto jíinū Yaā Dios, áchí de.

²Yūcuán na te Ananías, sutū cujéhnu ga, ni cahān jíin tēe cáhiin yajni nuū de jeē na cátu maá yuhu de. ³Te ni cahān Pablo jíin sūtū cujéhnu ga ún:

Yaā Dios stóho ya nihín chí tēe stáhú-ni cúu ní, chí néne ní jēē sándaā ní núu ní stívi ná ley yā, éte

naun stávi máá ní ley jeē ndácu ní jniñu jeē cáni de sãhá? áchí de.

⁴Te ni cacahān tēe cáhiin nuū de ún:

¿Naun cáhán rō súcuan jíin sútú cujéhnú ga? Chi nuū Yaā Dios jejniñu de, áchí jíin de.

⁵Te ni cahān Pablo:

Tátā jijnáhan ní, tu ní jíiní na jéē sutú cujéhnú ga cúu de, chi núu ní jíiní na te ma cahán na súcuan núu, chi yósó núu tútu ii jeē ni cáhān yā jeē ma cahán neé yó coto yó táca tēe cácujehnú nuū yō, áchí Pablo.

⁶Te nuū ní jini Pablo jeē sava de cácuu grupo saduceo te sava ga de cácuu grupo fariseo, te ni cahān jee de:

Tátā jijnáhan ní, máá ná cúu ñin jnáhan grupo fariseo, te suni súcuan ni iyo tátá na. Chi suni máá ná ñúhun ni na jéē nastécu yā ndīyi, te siquī yúcuan cúu jeē cácahān ni cuéchi siquī ná, áchí de.

⁷Te jeē súcuan ni cahān de te ni cacusñin ni tēe junta jeē cácuu grupo fariseo jíin grupo saduceo, te ni cacahān nihin. ⁸Chi cácahān tēe grupo saduceo jeē ma nátecu ndīyi, ni tu cáhiyo ndajéhé yā ni ánuá, te tēe grupo fariseo cájejnúhún de ndinúní jnúhun yáha. ⁹Te yōhyo ni cuvaā. Te sava tēe cástéén jnúhun cáhán tutu ley yā jeē cácuu jnáhan grupo fariseo, ni candocuññ de, te ni cacahān de:

Tú ni ñin cuéchi cánihin na síquī tēe yáha. Sanaa te ni cahān ndije ñin ánuá jíin de chí ñin ndajéhé yā. Ma sáníhni ni yō nuū Yaā Dios nuu súcuan, áchí.

¹⁰Te yōhyo ni catejnéhan, te yúhú general jeē quende i chiyō Pablo,

te ni ndacu de jniñu jeē na quívi soldado te quenehen de Pablo sava mēhñú i, te na ndívi de ini cuartel.

¹¹Te jecuāā un ní quee-ni máá Jítóho yō nuū de, te ni cahān yā jíin de:

Pablo, cuandeyí ni rō, chi nájnūhun ni nacani ró jnúhun ri ini ñuu Jerusalén yāhá, suni súcuan nacani nahín ró jnúhun ri ini ñuu Roma, áchí yá.

Jeē ní casquíjnáhan jnúhun cahni Pablo

¹²Te nuū ní cundijin te ni cacutútú sava ñayuu hebreo, te ni casquíjnáhan jnúhun, te ni cacahān teyí i jeē ma cáji cuíti i ni ñin ni ma cóho cuíti i nde núu tu cahni i Pablo.

¹³Te víhyá gā uū xico tēe hebreo ni cacahān teyí jnúhun yáha. ¹⁴Te ni jengoo nuū sutú cácujehnú jíin núu tēe jéhnú cándiso jniñu nuū ñáyuu hebreo, te ni cacahān jíin tēe ún:

Ni cacahān teyí ná jeē ma cáji cuíti ná ni ñin níni nde ná tu cahni na Pablo. ¹⁵Núu súcuan te máá ní jijnáhan ní jíin táca gá tēe cásaaha junta cujéhnú ga, cuácáhān ni jíin general jeē quenehen de Pablo na jéé de nuū junta sajnē, chi cachi ni jéé cácuuni ni stíchí vāha ga ní de. Te máá ná jijnáhan ná cotūhva ná cahni ná de nde ná tu quee de nuū cáhiin tútú ní, áchí.

¹⁶Te sēhe yíí cuáha Pablo ni nihin i jnúhun jeē súcuan ni cacahān, te ni jehēn i cuartel, te ni castūhún i nuū Pablo. ¹⁷Te ni cana Pablo xiní ñin jnáhan capitán, te ni cahān de:

Condeca ní súchi yáha quíhin ni jíin i nuū general, chi íyó ñin jnúhun castūhún i nuū de, áchí de.

¹⁸Te capitán un ní jeca de i cuahān i jíin de nuū general, te ni cahān de:

Pablo, tēe íne vecāa, ni cana de sañá, te ni cahān de jíin ná jeē quíndeca ná súchi yáha núu ní, chí íyó ìin jnūhun cahān i jíin ní, áchí de.

¹⁹Te ni jniī general ndaha i cuahān de jíin i ìin lado, te yuhu-ni ni cajñuhún de i:

Na jnūhun cúní rō cahān rō jíin rí, áchí de.

²⁰Te ni cahān i:

Tēe hebreo ni casquíjnáhan jnūhun de jeē cahān ndahú de jíin ní quenehen ní Pablo sajnē quihīn de nuū tāca tēe cásáha junta cujéhnu ga, chí cahān-ni de jíin ní jeē cáconi de jeē stichí vāha ga de Pablo. ²¹Te ma cuáha ni jnúhun, chí víhyá gā uū xico de cándetu sāhí de ichi, te ni cacahān teyí de jeē ma cāji cuiti de ni ìin ni ma cóho cuiti de nde núu tú cahni de Pablo, te vijna je cándetu tūhva de jeē cuáha ni jnúhun quihīn Pablo nuū junta, áchí i.

²²Te ni cahān general jíin i jeē ma cáchi i nuū ní ìin ñayuu jeē ni cáhān i jnūhun yáha jíin de, te ni tají de i cuanuhun i.

Jeē ní tají general Pablo cuahān de nuū Félix, tēe cúu gobernador

²³Yūcuán na te ni cana general uū capitán de, te ni ndacu de jniñu jeē sātūhva de uū ciento soldado cájica jéhé jíin únī xico uxi jeē cáyōsō caballo jíin úū ciento jeē cándāha lanza, chí cahīin jecuāá ún quendacoo de jíin Pablo quingoo de nde ñuu Cesarea. ²⁴Te suni

ni ndacu de jniñu jeē coo tūhva caballo jeē cóso Pablo, te condito vāha soldado un Pablo quingoo de nde nuū Félix, tēe cúu gobernador. ²⁵Te ni tee de ìin carta jeē cahán jnūhun yáha:

²⁶Máa ná cúu Claudio Lisias, te tēe ná carta yáha cuájeē nuū ní, señor Félix, gobernador cujéhnu. Ndeese tahū cúu ní. ²⁷Ñayuu hebreo ni cajniī i tēe yáha, te je yajni cahni i de núú, te ni jnama ná de jíin soldado, chí ni jini na jéé séhe nación Roma cúu de. ²⁸Te ni jendeca ná de nuū junta maá i jíjnáhan i jeē sándaā i núu na cuēchi ni sáha de. ²⁹Te ni jini na jéé siquí ley maá i cúu cuēchi cácahān i siquí de, te tu níhín na ni ìin cuēchi siquí de jeē cúu de ni jeē cóne de vecāa. ³⁰Te ni nihīn na jnúhun jeē sava tēe hebreo ni casquíjnáhan jnūhun de jeē cahni de tēe yáha, te jeē yúcuán cúu jeē yachí ni tají ná de cuajeē de nuū ní. Te suni je ni cahān na jíin ñayuu cájicān cuēchi siquí de jecoo i nuū ní, te jiñā cahān i jíin ní na cuēchi ni sáha de. Je ni cahān yō, achí carta.

³¹Te ni cajeca ñuú-ni soldado Pablo cuangoo jíin de nde ñuu Antípatris, nájnūhun ni tahū jniñu nuū de. ³²Te ìnga quivī ni canandió cóo-ni soldado cájica jéhé cuánungoo nde cuartel, te soldado cáyōsō caballo cuangoo de jíin Pablo. ³³Te ni jinūcoo ñuu Cesarea, te ni cachihí carta ndaha gobernador, te suni ni cajeni Pablo nuū de. ³⁴Te ni cahu gobernador carta un. Te ni cajñuhún de ndé ñuu cúu Pablo, te ni jini de jeē tēe

ndañū Cilicia cúu Pablo. ³⁵Te ni cahān de:

Nde na quécoo tēe cájequin cuēchi siquī rō te cuni nahín rí jñūhun cahān rō, áchí de.

Te ni cahān de jeē na quíndihyū Pablo ini palacio ndīyi Herodes.

**Jeē ni cáhān Pablo jehe
maá de nuū Félix**

24 Te nuū uhún quivī te Ananías, sutū cujéhu ga, ni quee de ñuu ún. Te suni ni quecoo sava tēe jéhu cándiso jñīñu nuū jnáhan ñuu de hebreo jíin iin tēe cúu abogado, nání de Tértulo. Te ni quívicoo de nuū gobernador jeē cahān de cuēchi siquī Pablo. ²Te ni cana gobernador Pablo ni quee de. Te ni quejé Tértulo cahán de cuēchi siquī Pablo, chi suhva ni cahān de jíin Félix:

Tátā gobernador, siquī jeē cúu ní tóhō jeē váha ndíchí ndácu ní jñīñu, te jeē yúcuan tú na jñūhun cájejnáhan íyó, chi cáyūcu váha yó. ³Te na cútahū ná, chi táca quívī váha cúu táca núu ndácu ní jñīñu jeē váha sáha ní, tátā Félix. ⁴Te tu cúni na snáa na cuéhē tiempo ni, te cáhān ndahú ná jíin ní cuni nahín ní jecu-ni jñūhun cahān na jíin ní. ⁵Chi ni cajini na tēe yáha jēe cúu de iin tēe tíxín, te sáha de jeē cánacuajnáhan máá jnáhan ñuu ná hebreo ní cáhnu-ni táca lado, te cúu de tēe cújéhu nuū ñáyuu cascuáha jñūhun tēe nání Jesús jeē ní jehnu ñuu Nazaret. ⁶Te suni je ndúcú de jeē stívi de táca jñīñu ini templo ii, te ni cajni ná de. Te cácu ni na sándaā na síquī de núu, nájnūhun cáhān ley ñuu ná. ⁷Te ni

jñū-ni general Lisias, te ni quende fuerza de tēe yáha núu na jíjnáhan ná. ⁸Te ni ndacu de jñīñu jeē táca ná jeē cácahān na cuēchi siquī tēe yáha quijicoo ná ndé nuū ní. Te vijna cuu stíchí maá ní de, te jíin jñūhun cahān maá de te cuni ni jēe ni sáha de cuēchi jeē cácahān na jíin ní, áchí Tértulo.

⁹Te suni ni cacahān tēe hebreo jeē ni jíinucoo jíin de jeē iyó ndáa jeē súcuan cúu cuēchi Pablo.

¹⁰Yūcuán na te ni sáha gobernador seña nuū Pablo jeē na cáhān de, te ni cahān Pablo:

Je jíiní na jēe cuehē cuiyā cúu ní gobernador ñuu yáha, te jeē yúcuan nújnahan ni na jēe sándaā ni síquī ná. ¹¹Chi máá ní cuu nanducú ní te cuni ni jēe sáa máá úxī uū quivī ni cuu jeē ni jéhēn ná ñuu Jerusalén jeē chiñúhún ná Yaā Dios. ¹²Te tu ní stáhān jnáhan ná jíin ni iin ñayuu, ni tu ní stónnda ná ñáyuu ini templo ni ini vehe ii sinagoga ni ini maá ñuu. ¹³Ni tú na jíin stéén de jeē iyó ndáa jñūhun cácahān de siquī ná. ¹⁴Te jñūhun cáhān cají ná jíin ní cúu jeē chiñúhún ná Yaā Dios táca jíi na, te suu cúu jeē chiñúhún ná maá Jesucristo, te máá jñūhun yáha-ni cúu jeē cácahān de jeē stívi ná. Te cándije ná táca jñūhun yósó núu tútu ley yā jíin núu tútu jeē ní catee tēe ni canacani jñūhun ya nde jenahán. ¹⁵Te inuú ñūhun ni na jíin de jeē sáha Yaā Dios jeē nátecu táca ndíyi, cúu ñayuu ní casáha váha jíin ñáyuu ní casáha néé. ¹⁶Te jeē yúcuan máni jeē váha ndíhví ni na sáha ná. Súcuan te váha íyó ni anuá na jēe tú na cuēchi ndéé siquī na núu Yaā Dios ni nuū ñáyuu.

¹⁷Te ni jica cuu ná táca ñuu jicá jecu cuiyā, te sáá te ni ndee na jíin xúhun jéé ní cajēhe tāca ñáyuu jeē chindéé ñáhán i jnáhan ñuu na cáyūcú Jerusalén. Te suni ni ndee na jéé socó na quití nuū Yaā Dios.

¹⁸Te íne ná ini templo siquī jeē cuchí ná ndundoo ná núū Yaā Dios te socó ná. Te jecu jnáhan ñuu ná hebreo jeē véjicoo Asia ni cajito de sáná ini templo, te tú na ñayuu cuehē ni cóyūcu jíin ná jeē sávaā i. ¹⁹Te núu ni stívi ná ¿te naun tu ní quíjicoo tēe Asia un návāha suni cahān de ndese ni stívi ná? ²⁰Chí tēe ni quecoo yāhá na cáhán maá de núu na cuēchi ni canihīn de siquī na ná ni indichi na núū junta tēe cácujuhnu ini ñuu ná. ²¹¿Te chí cájequin de cuēchi siquī na jéé ni cáhán jee ná suhva ná ni íyo ná nuū junta naún? Chí ni achi na jéé cándíje ná jéé nátecu tāca ndíyi, te jeē yúcuan cájequin ni cuēchi siquī ná, ni achi na jíin de. Achí Pablo.

²²Te Félix chi je jíiní vāha de ndese cácuandíje ñayuu Cristo. Te jeē ní jini sōho de jnūhun yáha te ni stétu de un jíjnáhan, te ni cahān de:

Nde na quée general Lisias te cajnūhun gá rī siquī jníñu yáha, áchí de.

²³Te ni ndacu de jniñu nuū capitán jeē na cóne ga Pablo vecāa, te ma cási jeē sáha de jeē cuní de, te ni ma cási jeē quíjicoo jnáhan de jeē chindéé ñáhán i de.

²⁴Te ni cuu jecu quivī, te ni quiji tucu Félix jíin ñasihí de Drusila, te ñahan hebrea cúu ña. Te ni ndacu de jniñu jeē na quíji Pablo návāha nacani de jnūhun ndese cándíje yó Jesucristo. ²⁵Te ni cahān Pablo jíin

de jeē cánuú sáha yó jniñu ndaā, te cánuú coto yó máá yó jeē ma sáha yó jniñu stívi, chi quivī sándihí te sándaā Yaā Dios jniñu ndívii ñayuu ndese ni casáha i. Te ni yūhu Félix te ni cahān de:

Vijna te cuáhán, te inga quivī jeē núne ri te cana ri rohó quiji ró, áchí de.

²⁶Te ñúhun ni de jeē cuāha Pablo xūhun núu de te siáá de quenda de vecāa. Jeē yúcuan tíjni jínu ni cana de Pablo ni candajnūhún de. ²⁷Te súcuan ni cuu uū cuiyā, te sáá te ni nucuíñi Porcio Festo nuū Félix. Te cúní Félix jeē na cúsiñi ni ñayuu hebreo jíin de, te jeē yúcuan ní squéndoo de Pablo vecāa.

Jeē ni indichi Pablo nuū Festo

25 Te sáá úní quivī jeē ni quivī Festo cuu de gobernador Judea, te ni quenda de ñuu Cesarea cuahān de ñuu Jerusalén. ²Te tāca sūtū cácujuhnu jíin tēe cácujuhnu nuū ñáyuu hebreo ni jinūcoo nuū Festo, te ni cajicān cuēchi siquī Pablo. ³Te ni cacahān ndahú jíin Festo jeē núu vāha ni de te na nátají de Pablo ndiji ñuu Jerusalén. Súcuan ni cacahān, chi je ni casquíjnáhan jnūhun jeē cahni Pablo ichi. ⁴Te ni cahān Festo jeē yíndesi vāha Pablo nde ñuu Cesarea, te je jéni ni de jeē jecu na quivī te nuhūn maá de ñuu Cesarea. ⁵Te jeē yúcuan ní cahān de jíin táca tēe ún:

Tāca níhín jeē cándiso jniñu, na quíngo yó nde Cesarea, te yúcuan cácuñi ni cuēchi siquī de te núu íyo cuēchi de, áchí de.

⁶Te ni íne de yúcuan únā chí úxi-ni quivī, te ni ndee de ñuu

Cesarea, te inga quivī ni cucōo de mesa nuū sándaā de jniñu, te ni cahān de jeē na quíji Pablo. ⁷Te je cáhiin tēe hebreo jeē ní quijicoo nde ñuu Jerusalén. Te ni quee Pablo, te ni cajicó ndūū nuū de, te ni caquejéé-ni cásájnúhún téyí síquī de, te tú na jíin ní cástéén jeē iyó ndāā jñuhun cácahān. ⁸Te ni cahān Pablo jehē maá de:

Tu ní sáha ná ni iin cuēchi síquī ley ñuu na jéē cácuu ná ñayuu hebreo, ni síquī templo, ni síquī rey nación Roma, achí de.

⁹Te Festo chi cúní de jeē cusīi ni ñayuu hebreo jíin de, te ni cajnūhún de Pablo:

¿A tu cúní rō quinuhun rō Jerusalén te yūcuan sándaā rī síquī rō? achí de.

¹⁰Te ni cahān Pablo:

Je índichi na núū cúndaā jniñu jeē ndácu máá tēe cúu rey nación Roma, te yāha cúu nuū cánuú cundaā jniñu ná. Máá ní je jíiní vāha ni jéē tú na cuēchi ní sáha ná síquī tāca jnáhan ñuu ná hebreo.

¹¹Chi núu ni sáha ná iin cuēchi xeēn jeē jíiní ñúhún cuu ná, te íyó vāha jeē cúu na núu súcuan. Te núu tu íyó ndāā jñuhun jeē casájnúhún tēe yáha síquī ná, te ni iin tēe ma cúu chihi de sāná ndaha tēe yáha jíjnáhan de. Núu súcuan te cúní na quíhīn na núū maá rey nación Roma sándaā de síquī na, achí de.

¹²Te ni cajnūhun Festo ndese cájeni ni tēe cándiso jniñu jíin de. Yūcuán na te ni cahān de jíin Pablo:

Je ni cahān rō jeē cuní rō quihīn rō nuū maá rey nación Roma sándaā de síquī rō. Núu súcuan te quihīn nahín ró nuū de, achí de.

Jeē ni índichi Pablo nuū rey Agripa

¹³Te ni cuu jecu quivī, te rey Agripa jíin Berenice ni jecondéhé de Festo nde ñuu Cesarea. ¹⁴Te tijni quivī ni coyūcú de yūcuán. Te ni nacani Festo jñuhun síquī Pablo nuū rey un. Te suhva ni cahān de:

Félix jeē ní cuu de gobernador, ni stóo de iin tēe íne vecāa yāhá. ¹⁵Te ná ni jehēn ná ñuu Jerusalén, te sutū cácujeñnu jíin ñáyuu jéñnu cándiso jniñu nuū ñáyuu hebreo ni jinūcoo i nuū na cájequin i cuēchi síquī tēe ún, te cácuni i jeē na cúu de. ¹⁶Te ni cahān na jíin i jeē tu íyó costumbre tāca tóhō Roma jeē cahni de iin tēe súcuan-ni, chi jíiní ñúhún condichi de jíin ñáyuu cájequin cuēchi síquī de, návāha cahān de jehē maá de te cundaā núu íyó cuēchi de. ¹⁷Yūcuán na te ni quecoo tútú i yāhá. Te inga quivī ún tu ní cúcuéé ná, chi ni cucōo na mesa nuū sándaā na síquī cuēchi, te ni ndacu ná jniñu jeē na quíji tēe ún. ¹⁸Te cáhiin ñayuu cájequin cuēchi síquī de. Te ni jeni ni na jéē iyó cuēchi xeēn cahān de síquī tēe un núu, te tú cuiti. ¹⁹Chi jeē cácahān de cúu máni síquī jñuhun cácaandíje-ni máá de, jíin síquī iin tēe nání Jesús jeē jé ni jihí de, te Pablo cahán nihin de jeē ní natecu ndije tēe ún. ²⁰Te tu ní cújñúní cuiti ni ná ndese sándaā ná, te ni cajnūhun ná de núu cúní de quihīn de ñuu Jerusalén te yūcuán cundaā síquī de. ²¹Te máá Pablo ni cahān de jeē cuní de quihīn de nuū Augusto, rey yō nación Roma, te yūcuan sándaā rey cuēchi de, ni achí de. Te ni cahān na jéē na cóne de vecāa nde tají ná de quihīn de nuū rey un, achí Festo.

²²Yūcuán na te ni cahān Agripa jíin Festo:

Suni cúní maá ná cuni sōho ná jéē cahán tēe un, áchí de.

Te ni cahān Festo:

Sajnē te cuni sōho ní jéē cahán de núu súcuan, áchí de.

²³Te inga quivī un ní quecoo Agripa jíin Berenice. Te cáñūhun de sahma cújéhnū de, ni quīvicoo de ini vehe juzgado jíin táca general jíin tēe cácujuhū ini űuu ún. Te ni ndacu Festo jniñu jeē na quíji Pablo.

²⁴Te ni cahān Festo:

Cáhán na jíin ní, tátā rey Agripa, jíin ndíhi níhín jéē cáyūcu jíin yó yāhá vijna. Yāha cúu tēe jeē síquī de ni candonda ndívii jnāhan de hebreo űuu Jerusalén jíin ndé űuu Cesarea yāhá, te máni cácahān i jeē tú vāha jeē cótecu gā de. ²⁵Te jéni ni maá ná jéē tú na cuēchi xeēn ni sáha de jeē cúu de. Te je ni cahān de jeē cuní de quihīn de nuū rey Augusto jeē sándaā rey un síquī de, te jeē yúcuán ní cahān na jéē tají ná de quihīn de nuū rey un. ²⁶Te tu cúcáhnū ni ná na jnūhun tee ná núu tútu quihīn jíin de nuū rey yō. Jeē yúcuán ní ndacu ná jniñu ni quee de nuū yō jijnáhan yó, te cánuú gá nuū maá ní, tátā rey Agripa. Te stíchí ni de návāha nihín na jnūhun tee ná síquī de, te quihīn jnūhun un jíin de nuū rey. ²⁷Chi tu jéjníñu cuítí jeē tají ná iin preso quihīn te núu tú castūhun ná nuū tútu na cuēchi ni sáha de, áchí Festo.

Jeē ni cáhān Pablo jehē maá de nuū rey Agripa

26 Yūcuán na te ni cahān rey Agripa jíin Pablo:

Vijna te jéhe ri jnūhun cahān rō jehē maá ró, achí de.

Te Pablo ni sáha de ndaha de jeē ní quejéé de cáhán de, te suhva ni cahān de:

²Tátā rey Agripa, cúsiī ni ná vijna jeē cúu cahān na jíin ní síquī ndíhi jeē casájnúhún űayuu űuu yō hebreo síquī ná. ³Chi je jíiní vāha máá ní táca jéē ní tajnúní űayuu űuu yō hebreo jíin táca jnúhun jeē tu cáhiin inuú i jíin. Jeē yúcuán cáhán ndahú ná jíin ní jeē coo paciencia ni cuni sōho ní jnúhun cahān na jíin ní.

Jeē ní cachi Pablo ndese ni sáha de nde ná tu sama ya ini de

⁴Je cájini táca jnāhan űuu yō hebreo ndese ni sáha ná ini űuu nuū ní cacu ná jíin ini űuu Jerusalén nde ná lulí ná. ⁵Te núu cácu ni maá de cahān ndaā de, te je cájini de sāña jéē ndé lulí ná ni quivī ná nuū grupo fariseo, te grupo un nihín ga cánducú ndéyí de síquī de ley yā vēsú táca gá grupo tēe nación yō. ⁶Te űúhun ni na jnúhun ni jejnūhun Yaā Dios nuū táca jíí yō jeē nastécu yā ndíyí, te máá síquī táca jnúhun yáha-ni cúu jeē cájequin de cuēchi síquī ná. ⁷Chi máá yó jeē cácuu yó jnāhan ndihúxí uū yucūn űayuu Israel, cáñūhun ni yō jnūhun ni jejnūhun ya jeē nastécu yā ndíyí, te jeē yúcuán nduú űuu cáchiñúhún yó Yaā Dios te cájejníñu yó núu yā. Te suni súcuan űúhun ni maá ná, tátā rey Agripa, te síquī jeē nácani ná jnúhun jeē natecu ndíyí cúu jeē cájicān jnāhan űuu yō hebreo cuēchi síquī ná. ⁸¿Te chí má nastécu Yaā Dios táca ndíyí cájeni ni ní naún?

**Jeē ní cachi Pablo ndese ni jito
xeēn de ñayuu cá candíje**

⁹Te máá ná chi ni jeni ni na jéē jíní ñúhún ndonda ná síquī ñayuu cá candíje i Jesús, Yaā ní jehnu ñuu Nazaret. ¹⁰Te súcuan ni sáha ná ini ñuu Jerusalén, chi tāca sūtū cá cujúehnu ni cajēhe de jñūhun jeē cóndiso jñíñu ná chuhun ná cuéhē ñayuu vecāa síquī jeē cá candíje i Jesús, te íyó váha ni na núu cá jehni de i. ¹¹Te tǐjni jínu ni sáha ndevāha na jín i ini tācá vehe ii sinagoga jeē ni sáha fuerza na i jeē na stóo i jñūhun cá candíje i. Te xeēn ni quítǐ ni na núu i, chi nde ñuu jicá ní jehēn ná ni sáha xeēn na jín i.

**Jeē ní cachi tucu Pablo ndese ni
sama ya ini de**

(Hch. 9.1-19; 22.6-16)

¹²Te sutū cá cujúehnu ni cajēhe de jñūhun jeē cóndiso jñíñu ná quíhīn na sáha xeēn na jín ñáyuu cá candíje cá yūcú ñuu Damasco nuú. ¹³Te cuahān ná ichi ún, tátā rey, te caxū cúu, te ichi ándiví ní quiji iin nduva ni ndindēē ndaxín núu na jín núu téē cuango jín ná, te víhyá gā ndí vēsú niāndii. ¹⁴Te ndíhi ná ní cacotúú ná nuú ñúhun. Te ni jini sōho ná iin jñūhun ni cahān jín ná jín jñūhun yuhu yó hebreo: Saulo, Saulo, ¿najehē jito xeēn rō ruhū? Chi jeē sáha ró súcuan cúu ná jñūhun stiquī jeē tu jéndije tǐ, te jéñú yatá tǐ xini pulla, te súcuan stóho tǐ máá tǐ, áchí. ¹⁵Yūcuán na te ni cahān ná: ¿Na nihín cúu jeē cahán, Tátā? áchí ná. Te máá Jítoho na ní cahān yā jín ná: Máá rí cúu Jesús, te jeē jito

xeēn rō ñayuu cá candíje i ruhū cúu jeē jito xeēn rō ruhū. ¹⁶Ndonda condichi rō, chi vēji ri nuū rō jeē te jñíñu ri rohó sáha ró jñíñu cúní rǐ, te nacani cá jí rō jñūhun tāca jéē ní jito ró vijna, jín jéē steén gā rǐ nuū rō tāca quívǐ quíji. ¹⁷Te jnama ri rohó núu tāca jnáhan ñuu rō jín núu ñáyuu tāca gá nación, chi nuū ñáyuu un tájí rǐ rohó quíhīn rō. ¹⁸Te tájí rǐ rohó quíhīn rō nuū i, chi ná jñūhun nanune ró tǐnūú i cúu jeē steén rō jñūhun ri nuū i te jecūhun ni i. Chi ñayuu ná tu candíje i ruhū, ná jñūhun cá jica i nuū néē. Te jeē candíje i ruhū, quívǐ i nuū luz rǐ, te tuá quíhi i chíji jñíñu jeē cúní jexeēn jeē cúu Satanás, chi sa suhva quíhi i chíji jñíñu cúní máá rǐ. Te tájí rǐ rohó quíhīn rō nuū i, návāha candíje i ruhū te cone cáhnu ni rǐ nuú cuéchi i. Yūcuán na te iñuú níhīn tahú i jín táca gá ñayuu jeē ni sándoo ri anuá i, áchí yá jín ná.

**Jeē ní cachi Pablo ndese ni
jetáhú de jñūhun ni cahān yā**

¹⁹Jeē yúcuán tu ní sánihni ni na núu jñūhun ni cahān yā ichi ándiví jín ná, tátā rey Agripa. ²⁰Chi ni jetáhú ná, te ni nacani ná jñūhun ya xihna gā nuú ñáyuu ñuu Damasco, te sáa te ni nacani ná jñūhun ya nuú ñáyuu ñuu Jerusalén jín ní región Judea jín núu ñáyuu tāca gá nación. Te jñūhun ni nacani ná núu i cúu jeē na nácani ni i jeē stóo i cuéchi i te nasāma ini i sáha Yaā Dios, te na sáha i jñíñu váha jeē steén jeē ní nasāma ini i. ²¹Te síquī jeē súcuan ni nacani ná jñūhun te ni cajni jnáhan ñuu yó hebreo sañá ini templo, te ni cacuni i cahni i

sāna núú. ²²Te ni chindéé ñáhán Yáa Dios sāná, te jeē yúcuan índichi nihin na ndé vijna nácani cájí ná jnūhun ya nuū ñáyuu cácujuhnu jíin núú tācá-ni ñayuu. Chi tu chíso gá na jnúhun siquī jnúhun jeē ní nacani Moisés jíin táca gá tēe ni canacani jnūhun Yāa Dios nde jenahán. ²³Te ni cundaā jnūhun ni canacani de un jēe cánuú ndoho Cristo nde cuu yā, te xihna gā maá yá natecu vēsú tāca gá ndīyi, te súcuan stéén cájí yá nuū ñáyuu jeē jnáma ya i, cúu ñayuu nación yō Israel jíin ñáyuu tāca gá nación, áchí Pablo.

Jeē ní nducú ndéyí Pablo scandíje de Agripa jnūhun Jesús

²⁴Te súcuan ni cahān Pablo jehē maá de, te ni cahān jee Festo:

Ni nduloco rō, Pablo. Siquī jeē ni scuáha ndasí ró te jeē yúcuan ní tívi xíní rō, áchí de.

²⁵Te ni cahān Pablo:

Tu ní tívi xíní na, tátā Festo, chí sa suhva íyó cájí ndāā jnūhun cáhán na. ²⁶Te máá rey Agripa je jíiní vāha de tācá jniñu ní íyo jeē ní nacani ná, te tu yúhú ná cahān na táca jnúhun yáha, chí je jíiní vāha na jēe jíiní de tāca jnúhun yáha, chí tú sāhi ní cúu tācá jniñu yáha. ²⁷Tátā rey Agripa, á cándíje ní jnúhun jeē ní cacahān tēe ni canacani jnūhun ya nde jenahán? Jéni ni na jēe candíje ní, áchí Pablo.

²⁸Yūcuán na te ni cahān Agripa jíin Pablo:

Va jéni ni rō jeē jíin jecu jnūhun ni cahān rō te sāha ró jeē candíje ri Cristo, achí de.

²⁹Te ni cahān Pablo:

Vēsú jíin jecu-ni jnūhun chí jíin cuéhē, te jícán tahú na jēe maá ní jíin táca gá tēe cájini sōho jnūhun cáhán na vijna, na cándíje ní nájñūhun cándíje máá ná, te tu cúni na jēe cónuhni ni nájñūhun núhni na.

³⁰Te ni ndīhi ni cahān Pablo tāca jnúhun yáha. Te ni ndocuiñī rey jíin gobernador jíin Berenice jíin táca gá tēe cácujuhnu cáyūcu jíin de. ³¹Te ni cacujiyo de, te ni candajnūhun síin máá de:

Tú ni ñin cuēchi ní sāha tēe yáha jēe cúu de ni jeē cóne ga de vecāa.

³²Te ni cahān Agripa jíin Festo:

Cuu siáá ni tēe yáha núu jeē tu ní cáhán maá de jeē quihín de nde nuū rey yō nación Roma nuú, áchí de.

Jeē ní catají de Pablo cuahān de ñuu Roma

27 Te ni cundaā jeē quihín Pablo jíin barco nde Italia, te suni quingoo ná jíin de. Te Pablo jíin sava ga tēe cáhiin vecāa ni quīvicoo de ndaha ñin capitán naní Julio jeē quíndēca de tēe un ndé Italia. Te Julio cúu ñin jnáhan grupo soldado naní Augusto. ²Te nde ñuu Adramitio nuū cájecuiñī barco ni quenda ñin barco ni quee, te ni quīvicoo ná, te quihín barco un táca ñuu jeē yfhi chíji Asia jeē yúcu yumar. Te suni cuahān Aristarco jíin ná, te máá de cúu tēe ñuu Tesalónica región Macedonia. ³Te ñga quivī ni jinūcoo ná ñuu Sidón nuū cájecuiñī barco. Te Julio ni cundáhú ni de Pablo, te ni jēhe de jnūhun ni jecondēhe Pablo tācá amigo de, te ni cachindéé ñáhán

i de. ⁴Te ñuu yúcuan ní quenda barco cuahān jíin ná. Te siquī jeē níhin yíhi tachī te tu ní cúu quihīn yohó barco, te ni tee xīin barco cuahān jíin ná xiin isla Chipre, ñuhun jeē íne sīin nuū ndúte, te lado jecó barco ni quendōo Chipre. ⁵Te ni cayāha ná yumar Cilicia jíin Panfilia cuahān ná, te ni jinūcoo ná ñuu Mira ndañúu Licia.

⁶Te ñuu yúcuan ní nihīn capitán iin barco jeē véji ñuu Alejandría te quihīn ichi Italia, te ni cahān de jíin ná ni quivīcoo ná barco un. ⁷Te cuehē quivī ni cahīin na núu ndúte jíin barco, chi cueé ní jica, te fuerza-ni ni jinūcoo ná yuñúu Gnido. Te tuá ni jéhe tachī un jnúhun quihīn yohó barco, te ni cayāha ná núu jnúhma tachī xiin ñúu Salmón jeē íne nuū isla Creta. ⁸Te yōhyo ni canducú ndéyí tée cascáca barco un, ní yāha jíin ná ñí yumar xiin Creta. Te ni jinūcoo ná iin lugar naní Buenos Puertos nuū cájecuñī barco, te yajni un íne ñuu Lasea.

⁹Te je ni cuu cuehē quivī ni cajica ná jíin barco. Te je yajni quejéé vico mójin, te yúcuan cúu tiempo jeē yí jica barco te sanaa te coo jnūndóho nuū mar. Te ni cahān nihin Pablo jíin de:

¹⁰Tātā jijnáhan ní, jíin na jéé yóhyo yí coo viaje yáha, te quiiji jnūndóho siquī barco, te naa barco jíin ndajníñu, te nde maá yó sanaa te cuu yō, achí de.

¹¹Te tu ní chúsóhó capitán jeē cahán Pablo, chi sa suhva jeē cahán tēe scáca barco un jíin tēe chíi barco. ¹²Te siquī jeē tu íyó váha lugar nuū ni jécuiñī barco

un jéé cóyucú de ní vico mójin, te ni cajeni ni cuehē gā de jeē váha ga núu quendacoo de yūcuán. Chi cájeni ni de jeē núu cuu te jinūcoo de ñuu Fenice te yūcuán coyucú de vico mójin. Chi Fenice suni íne yundúte isla Creta nuū cájecuñī barco, te ndijin ichi noroeste jíin suroeste.

**Jeē ni jécuiñī iin tachī níhin
jeē stónnda ndute mar**

¹³Te ni jequñī vīta táchi ichi sur, te ni cajeni ni de jeē jinú de Fenice nuú, te ni cascáca ga de barco jica jíin de xiin Creta. ¹⁴Te ni cunúu jecu gā, te ni quejéé-ni iin tachī níhin ndasí jeē naní táchi nordeste. ¹⁵Te tuá ni cúu ga quihīn yohó barco, chi ni chundahá-ni tachī cuahān jíin, te ni casiáa-ni de jeē cascáca de, te cháha chúcuan cuahān barco jíin ndíhi ná sáha tachī. ¹⁶Te ni yāha jíin ná xiin isla lulí jéé naní Clauda, nuū jnúhma tachī. Te vēsú súcuan te yōhyo uhū ni cascáca ná barco lulí jeē ndiquín yatā barco cáhnu. ¹⁷Te ni casquívī ná ini barco cáhnu. Te ni casucun núu de barco cáhnu jíin yoho. Te cáyuhú de jeē quihín barco nuū yaxín ndute nuū naní Sirte te jñī nuū ñíti, te jeē yúcuan ní casnúu de sahma cóquin jeē stechí te jica barco. Te ni casiáa de jeē na quíhín ndé chi chundahá táchi. ¹⁸Te tu jécuiñī cuiti jeē yíhi tachī níhin. Te inga quivī un ní caquejéé de cájete de ndajníñu ndíso barco, návāha nduñama gā barco te ma queé chíi ndute. ¹⁹Te quivī uní ni cajēhe núu ná ndaha ni cajete ná máá ndajníñu jéjníñu barco. ²⁰Te cuehē quivī tu

ní cájito ná níandii ni quĩmi siquĩ jeē ñin vicō, ni tu jécuiñĩ cuiti tachĩ ñihin ún, te tuá cáñũhun ni na cácu ná.

²¹Te ni cuu quivĩ jeē tuá cáyeji cuiti na stáa. Te ni jecondichi Pablo sava mēhũu tée ún, te ni cahān de:

Tátā jijnáhan ní, núu ní cájetáhú ní jnũhun jeē ni cáhān ná te ma quéndacoo yó Creta nuú, te ni ma cóto yó jnúndóho yáha ni ma náā ndajniñu núu. ²²Te vijna cáhān ñihin na jíin ní jeē cuandeyĩ ni ni jijnáhan ní, chi ni ñin ní má cúu ní, vēsú naa barco. ²³Chi jeē cúni ni quiji ñin ndajéhé jeē ní tají máá Yáa Dios nuú ná. Chi máá yá cúu Jitoho ná, te jéjniñu ná núu yā.

²⁴Te ndajéhé yā ún suhva ni cahān yā jíin ná: Pablo, ma yũhu ró, chi vāha-ni jinũ rō nuú rey nación Roma, te jeē siquĩ rohó te sáha Yáa Dios jeē cácu ndihi tēe cáhiin jíin ró ini barco yāhá, áchí yá jíin ná.

²⁵Tátā jijnáhan ní, ma yũhu ní núu súcuan, chi máá ná cúcáhnu ni na Yáa Dios jeē coo nájnũhun ni cahān ndajéhé yā jíin ná. ²⁶Te jinũ nahín yó ñin isla, te ma jinũ yachĩ yō nuú quíngoo yó, áchí de.

²⁷Te ni cuu uxĩ cuñ jecuáa nde jeē ní quejéé táchĩ, te jica barco nuú mar Adria, te cháha chúcuan cuahān barco sáha tachĩ. Te máá jecuáa ún te jeē ní cuu sava ñuú te cájeni ni tēe cáscáca barco jeē jé cuacuyajni jinũ barco ñuhun íchi. ²⁸Te ni casínga de ñin jeē cáchicuāhá de nasaa cúnũ ndute, te ni cajini de jeē iyó ócō xahũn ñin metro. Te ni jica barco jecu gā te ni casínga tucu de, te ni cajini de jeē iyó ócō uxā na metro. ²⁹Te

cáyũhú de jeē jécujnáhan barco jíin toto, te ni cajihni de cuñ cāa gancho náhnu yatā barco un, te ni cascāne de nde jehē ndute návāha chituu te jecuiñĩ barco. Te yōhyo jnāa de jeē na cúndijin yachĩ. ³⁰Te tēe cáscáca barco un ní canducú de cunu de quíngoo de jíin barco lulí te cácu de nuú jnúndóho quiji siquĩ barco cáhnu núu. Jeē yúcuan ní casnúu de barco lulí un núu ndute, te casáha-ni de nájnũhun jeē snúu de inga cāa gancho ichi núu barco návāha tú cuni ñayuu jeē cácuni de cunu de quíngoo de. ³¹Te ni cahān Pablo jíin capitán jíin táca soldado:

Núu tú coyũcu tēe yáha ini barco cáhnu jíin yó, te ma cácu cuiti maá ní jijnáhan ní, áchí de.

³²Yũcuán na te soldado ni cajehnde de yoho núhni barco lulí, te ni jneni-ni cuahān.

³³Te nuú cuácundijin te ni cahān Pablo jíin táca tēe un jéē na cáji de staā. Te suhva ni cahān de:

Vijna iyó úxĩ cuñ quivĩ jeē cándito ní te tu cáyeji cuiti ni stáa.

³⁴Te cáhān ndahú ná jíin ní jeē na cáji ni stáa, návāha nanihin ni ní te cácu ní, chi ni ñin yó má cúu, ni ma tují cuiti yō, achí de.

³⁵Te ni ndihi ni cahān de jnũhun yáha, te ni quihin de ñin staā, te mēhũu táca ñayuu un ní nacuatáhú de nuú Yáa Dios, te ni tahú sáva de staā ún, te ni quejéé de yéji de.

³⁶Yũcuán na te ni candusiĩ ni ndihi de, te suni ni cayejí de staā. ³⁷Te ndivii na jéē cáñũhun ná ini barco cúu uũ ciento unĩ xico xahũn ñin ná. ³⁸Te ni cayejí vāha ndihi ná. Yũcuán na te ni cajete de trigo cuahān nuú ndute un, návāha na ndũñama gā barco.

Jeē ni quée barco chiji ndute

³⁹Te nuū ní cundijin te ni cajito de ñuhun, te tu ní cánacuni de ndé nuū cúu. Te ni cajito de nuū íne cuiñi ndute, te suni máá ñíti cúu, te cájeni ni de jinū de yūcuan jíin barco núu na cúu núu. ⁴⁰Te ni cajehnde de yoho núhni cāa gancho yūcuan, te ni caquendōo cāa un núu mar. Te ni canandají de yujnu jeē scotú chíi barco, te ni nacata caa de sahna cóquin ichi núu návāha chundahá táchi barco, te ni quejéé caca quihīn jíin de ichi núu iyó ñíti. ⁴¹Te ni jinū barco nuū níhin náquijnáhan ndute. Te ni quée barco nuū ñíti ñuhun chiji ndute, te ni jñi-ni ichi núu te tuá ni jica cuiti, te yatā barco un ní cahya-ni jeē níhin ni cani suhmā ndute mar. ⁴²Yūcuán na te ni candajñuhún soldado jeē cáhni de tāca preso návāha ma sūte i te cunu i quingoo i. ⁴³Te cúní capitán un jéē cācu Pablo, te ni jesicoo de. Chi sa ni cahān de núu ndé ñáyuu jini sūté te xihna gā i na núngoo i sūté i nuū ndúte, te na quenda-ni i quihīn i nuū ñuhun íchi. ⁴⁴Te suni súcuan na quécōo ndihi i quihīn i, sava i coso candá i jíin yujnu cúnu te sava ga i jíin pedazo yujnu barco. Te súcuan ni cacācu ndihi ná ní jinūcōo ná ñuhun íchi.

Jeē ni íne Pablo isla Malta

28 Te nuū ní cacācu ná te ñayuu cáyūcu yūcuan ní cacachi i nuū na jéē isla un nání Malta. ²Te ñayuu un ní cacundáhú ni i sāna jíináhan ná, te ni cascáyú i ñin ñuhūn cáhnu, te ni cacahān i

jíin ná jeē nasaā ná, chi mijin sáha jeē cúun saū. ³Te ni stutú Pablo jecu tujnu íchi. Te jeē jnāā de tujnu un núu ñuhún te ñin coō xeén jínu ti ni quenda ti tujnu un jéē ní cujihní, te ni chiyuhú-ni ti ndaha de. ⁴Te ñayuu cáyūcu yūcuan ní cajito i jeē ndíta caa coō un yíyuhú tí ndaha de, te ni cacahān i:

Tēe yáha vā sanaa te ni jehni de ndiyi núu súcuan, te vēsú je ni cācu de nuū mar, te máá yāá sándaā jniñu ñayuu tu jéhe ga yā jñuhun jeē cótecu de, áchí i.

⁵Te ni caja Pablo ndaha de, te ni ñinga coō un núu ñuhún, te tú na vé ni ndóho de. ⁶Te cándētu tāca ñáyuu jeē chúhun i cuiñi de chí cotúú-ni de te cuu de. Te ni cunahán téyí cándētu i, te ni cajito i jeē tú na vé ni ndóho de. Yūcuán na te ni nasāma cájeni ni i, te ni cacahān i jeē ñin yāá cúu Pablo.

⁷Te yajni yūcuan íyó ñuhun tēe cújéhnu ga Malta un, nání de Publio. Te ni cana tēe un sāña jíináhan ná, te ni jéhe núu de vehe de ni coyūcu ná jíin de uní quivī, te ni jito yúcún de sāná. ⁸Te tátá Publio cāa de, chi ndóho de cuehyī quiji jíin cuehyī niñi. Te ni jecondēhe Pablo tēe ún, te ni jicān tahú de te ni soó de ndaha de siquī tēe ún, te ni nduvāha-ni de. ⁹Yūcuán na te ni quijicoo ndihi ga ñayuu cácuñu yūcuán, te suni súcuan ni canduvāha-ni i. ¹⁰Te ñayuu un ní cajéhe i cuehē ndajniñu ni cacutahū ná. Te nuū ni jínū quivī jeē quingoo tucu ná jíin barco, te ni cajéhe i táca ndajniñu cuu ná ichi.

Jeē ni jínū Pablo ñuu Roma

¹¹Te uní yoō ni coyūcu ná Malta. Te ñin barco jeē véji ñuu Alejandría

ni ine Malta ní vico m̄jín, te ichi núú barco un ndéé uū figura ídolo ñuu de nání Cástor jíín Pólux. Te ni quívicoo ná barco un cuángoo ná. ¹²Te ni jinūcoo ná ñuu Siracusa, te yūcuan ní coyūcu ná unī quivī. ¹³Te ni quenda barco cuahān jíín ná nduu nduu yundúte, te ni jinūcoo ná ñuu Regio. Te inga quivī ún vāha ni quiji tachī ichi sur, te ni quendacoo ná ñuu Regio, te uū quivī te ni jinūcoo ná ñuu Puteoli. ¹⁴Te yūcuan ní caquijnáhan ná jíín jecu hermano cácanđje, te ni cacana de sãña ní coyūcu ná jíín de ñin semana. Yūcuán na te ni quendacoo ná jéé quihīn ná ñuu Roma. ¹⁵Te hermano cáyūcú ini ñuu Roma, je ni canihīn de jnūhun jeē jinūcoo ná, te ni quendacoo de, te sava de ni caquijnahan de sãña ndé ñuu Foro de Apio te sava ga de ñuu Tres Tabernas. Te ná ni jito Pablo nuū de jíínáhan de, te ni nacuatáhú de nuū Yaā Dios, te ni ndundeyí ni de. ¹⁶Te sáa te ni jinūcoo ná ini ñuu Roma, te capitán ni squívi de tāca preso ndaha tēe cújéhnū nuū tācá soldado ñuu Roma. Te ni cajēhe de jnūhun jeē cone s̄ín Pablo te condito ñin soldado de.

**Jeē ní nacani Pablo jnūhun
ya ini ñuu Roma**

¹⁷Te nuū unī quivī te ni cana Pablo tāca tēe cácujehnū nuū jnāhan ñuu de hebreo cáyūcú ini ñuu Roma. Te ni cacutútú de, te ni cahān Pablo jíín de:

Tátā jijnáhan ní, tú cuiti na vé ni sáha ná síquī jnāhan yó hebreo ni síquī tācá jniñu ní catajnúní jíí yō. Te vēsú súcuan te ni cajni i

sãña ndé ñuu Jerusalén ni casquívi i sãñá ndaha tēe ñuu Roma jijnáhan de. ¹⁸Te tēe ñuu Roma jeē cácujehnū cáyūcú Cesarea ni castíchí de sãñá, te cácuñi de siáá de sãña núú, chi ni cajini de jeē tú na cuēchi ná jéé cúú ná. ¹⁹Te jnāhan ñuu yō hebreo tu ní cájēhe de jnūhun. Jeē yūcuan ní cahān na jéé quiji ná núú maá rey cujehnū ga nde ñuu Roma yāhá te sãndaā maá de síquī ná. Te tú vēji ná jéé cáquin na cuēchi síquī ñayuu nacióñ yō. ²⁰Jeē yūcuan ní cana ná níhín jíínáhan ní, návāha cuni na táca ní te ndajnūhun yó. Chi yóhó ñayuu Israel cáñūhun ni yō jeē nátecu ndīyí, te suu jnūhun un nácani ná, te jeē yūcuan cúu jeē nuhní na jíín cadena yáha, áchí de.

²¹Te ni cacahān tēe un jíín Pablo:

Tú ni ñin carta ni cátají ñayuu cáyūcú Judea nuū na jéé cástūhún de jnūhun ní, te tāca jnāhan yó Judea jeē ní quijicoo yāhá, tú ni ñin jnūhun néé ní cacahān de síquī ní. ²²Te cánujnahan ni ná cuni sōho ná ndese cúu jnūhun jeē cahán ni, chi je cajini na jéé tācá-ni lado cacahān ñayuu contra síquī jnúhun jeé jéé steén ni, áchí de.

²³Te ni cajeni de ñin quivī, te ni quijicoo cuehē de vehe nuū néne Pablo. Te ni nacani de jnūhun ndese ndácu Yaā Dios jniñu, te ni steén cají de jnūhun nde jenéhen te nde ní ini. Te súcuan ni nducú ndéyí de scándíje de tāca tēe un jnúhun Jesús, te ni steén de jeē suni súcuan cáhán ley jeē ni jéhe ya nuū Moisés jíín jnúhun jeē ní catee tēe ni canacani jnūhun Yaā Dios nde jenahán. ²⁴Te ni cacandíje sava de

jnūhun ni cahān Pablo, te sava ga de tu ní cájetáhú de. ²⁵Chi tú inuú cáhiyo ni de. Te sáá cánducú de quingoo de te ni cahān Pablo:

Ndaā cahán jnūhun jeē ni cáhān Isaías, tēe ni nacani jnūhun Yaā Dios nde jenahán, chi suhva ni cahān de jíin táca jíi yō ni sáha Espiritu Santo:

²⁶Ni cahān Yaā Dios:

Cuáhán núu jnáhan ñuu rō yāhá te cahān rō jíin i:

Vēsú cuni nahín váha ró te ma jécūhun ni rō,
te vēsú coto vāha ró te ma cúni rō.

²⁷Chi yōhyo nīhni ni rō,
chi tu cácuni rō cuatáhú ró.
Te yōhyo uhū cájini sōho ró,
chi tu cánujnahan ni rō cuni sōho ró jnúhun ri.
Te nájnūhun cájesi rō tinūu ró cúu jeē tu cácuni rō nanducú ró ndese cúu,

te tu cácuni rō jeē násāma ini rō návāha nasávāha ri anuá rō nuū cuéchi ró, ní achi Yaā Dios.

Achí tutu. ²⁸Núu súcuan te na cástūhun ná nuū ni jéē jnúhun ni tají Yāā Dios jeē jnáma ya yohó, nde vijna te tájí yá jnūhun yáha quíhīn nuū ñáyuu tēcá nación jeē tu cájini i jnūhun ya, te máá i chi cuni sōho i, áchí de.

²⁹Te ni jínu ni cahān de jnūhun yáha, te cuangoo jnáhan de hebreo, te yōhyo ni cacahān de siquī jnúhun yáha jíjnáhan de.

³⁰Te ni condee Pablo uū cuiyā vehe jeē ní quihīn núu de ún. Te ni cusīi ni de cahān de jíin táca ñáyuu ní quiijicoo nuū de. ³¹Te jéhnū-ni ni nacani de jnūhun ndese ndácu Yaā Dios jniñu, te ni steén de jnūhun máá Jítóho yō Jesucristo, te tú ni ñin ní jési jeē nácani de jnūhun.

CARTA JEE NI TEE SAN PABLO APOSTOL NUU ÑAYUU ÑUU ROMA

1 Máá rí cúu Pablo, mozo Jesucristo, chi ni cana Yaā Dios ruhū cúu ri apóstol yā, ni jeni ya ruhū te ni tají yá ruhū jeē nácani ri jnūhun jeē jnáma ya ñayuu.

²Te jnūhun un ní jejnūhun ya nde jenahán ndasí, te yósó núū tútu iī jeē ní catee tēe ni canacani jnūhun ya. ³Te jnūhun un cáhán siquī Jitoho yō Jesucristo, Yaā cúu Sēhe Yaā Dios. Te ni nduu ya tēe, ni cacu ya chiji yucūn rey David. ⁴Te ni natecu yā mēhñu ndíyī ni sáha EspírITU iī, te súcuan ni steén Yaā Dios jeē cúu ya Sēhe ya jeē ndíso poder. ⁵Te jeē jíin Jesucristo ni jēhe Yaā Dios jniñu luu yáha jeē cácuu ri apóstol, cájica ri jíin jnúhun Cristo, návāha coo ñayuu tācá nación jeē candíje i jeē sáha ya jehē i, te cuatáhú i nuū yā. ⁶Te suni máá ró jijnáhan ró, suni ni cana ya rohó ní quívicoo ró ndaha Jesucristo.

⁷Te tēe ri carta yáha cuajeē nuū rohó ñayuu ñuu Roma. Chi ni cundáhú ni Yaā Dios rohó, te ni cana ya rohó jēe coo ndoo coo iī rō nuū yā. Te ñúhun ni rī jeē maá Tátá yō Yaā Dios jíin Jitoho yō Jesucristo sáha ga yā jeē váha rōhó, te sáha ya jeē coo ndeyí coo siī ni rō.

Jeē cuní Pablo quihīn de ñuu Roma

⁸Te xihna gā cástūhun rí nuū rō jeē nácuatáhú rí nuū Yaā Dios jeē siquí rohó jijnáhan ró, chi ni sáha Jesucristo jeē váha rōhó. Chi ní ñáyīvi jíte núu jnūhun cuahān ndese vāha cácandíje ró yá. ⁹Te máá Yaā Dios jiní yā jeē niní jícan tahú rī jehē rō jijnáhan ró nuū jícan tahú rī. Chi yōhyo ndíhvi ní rī jejníñu ri nuū yā jeē nácani ri jnūhun Sēhe ya. ¹⁰Te níni jícan tahú rī nuū yā jeē núu cúní yā te nde vijna te cuu jecondēhe rí rohó. ¹¹Chi cúu ni rī coto ri nuū rō jijnáhan ró, te steén gā rī jnūhun ya nuū rō, návāha quendōo vāha ga anuá rō te cuiñi nihin ga rō jíin. ¹²Súcuan cúní rī návāha sáha yó jéé ínuú coo ndeyí ni yō jijnáhan yó siquí jeē ínuú cácandíje yó yá.

¹³Hermano jijnáhan ró, cúní rī jeē na jécūhun ni rō jeē tíjni jínu ni cuu ni rī jecondēhe rí rohó, te nde vijna ná tu cuu. Chi cúní rī scuiteé núu ga rī jnūhun ya mēhñu ró, nájñūhun ni sáha ri mēhñu ñayuu tāca gá nación. ¹⁴Chi cúu ri tēe táu siquí jnúhun ya, chi táu rī nacuāha ri jnūhun ya nuū ndíhi ñayuu, cúu

ñayuu jiní gā siquī ndihí jeē iyó ñayivi jín jeē tu jíní cuiti, cúu ñayuu tūhva jín jeē tú tūhva. ¹⁵Jeē yúcuan cúu jeē ndihví ni rí jeē suni nuū rohó ñayuu ñuu Roma nacani rí jnūhun jnáma ya yohó.

Jeē ndíso jnūhun vāha ya poder

¹⁶Chi tu cúcanu rí siquī jnūhun vāha ya, chi yúcuan cúu poder Yaā Dios jeē jnáma ya tāca ñayuu cácanđije, xihna gā ñayuu hebreo te suni tāca gá ñayuu. ¹⁷Chi jnūhun vāha ya un stéen nuū yō jeē ndáhva Yaā Dios cuēchi yó síquī jeē candlje yó jeē sáha ya jehē yō, te máá jeē candlje yó ní cuāhān yō. Chi súcuan cáhān nuū tútu ii: Ñayuu jeē ní ndahva yā cuēchi i, técu i jeē candlje i jeē sáha ya jehē i, áhí.

Siquī jeē iyó ndasí cuēchi ñayuu

¹⁸Chi jíní vāha yó jeē Yaā Dios andiví, cuāha ya castigo xeēn nuū tāca ñayuu tu cácanđije te máni cuēchi cásáha. Chi jín jniñu néé cásáha i te cájesi i nuū jnūhun ndaā. ¹⁹Te ma cúu cahān i jeē tu jécūhun ni i siquī ndese Yaā cúu Yaā Dios, chi máá yá ni steén nuū i. ²⁰Chi jíní tāca jeē ni sáha ya te cúu jécūhun ni ñayuu ndese Yaā cúu máá Yaā tu jító i nuū. Chi nde ni jecōo ñayivi jíní ndé vijna te cúu jécūhun vāha ni i jeē máá yá cúu Yaā Dios te iyó poder yā ní cání. Te jeē yúcuan má cúu cuiti cahān i jeē tu jíní i jeē iyó yá. ²¹Chi vēsú ni cajini i ndese Yaā cúu ya, te tu ní cáchiñúhún i ya jeē cúu ya Yaā Dios, te ni tu ní nácuatáhú i nuū yā. Chi sa suhva ni nduu i ñayuu cájeni cāhá ni, chi ni candunéé í i, te ni quendōo nee ini

anuá i. ²²Cácahān i jeē ndichí i, te sa suhva cácanéé i. ²³Chi ni castóo i Yaā Dios jeē yóhoyo luu cújéhu, jeē ma cúu cuiti. Te ni cajetáhú i tāca imagen jeē casáha i, jeē cāa nájnūhun tēe cájihí, te suni nde imagen saa jín cóo jín quiti cájica ndicúun ndaha.

²⁴Te jeē yúcuan ní siaá Yaā Dios i jeē na sáha i tāca jniñu jnéhén jniñu néé jeē cuní i. Te cásáha i jniñu néé jín jnáhan i jeē cúu máá jnūhun canu. ²⁵Chi tu ní cácanđije i jnūhun ndaā Yaā Dios, chi sa ni cacandlje i jnūhun stáhú. Te cáhiyo yíñúhún i te cáchiñúhún i nuū tāca jeē ni sáha ya, lugar jeē chiñúhún i máá Yaā ni sáha ún, Yaā jeē cánuu cahān yō jeē cújéhu ya ní cání. Amén.

²⁶Jeē yúcuan ní siaá Yaā Dios i jeē na sáha i tāca jniñu néé jeē cándiyo ni i jeē cúu máá jnūhun canu. Chi nde ñahan ni casama ña modo síhí, te ni quívi ña jín modo neé. ²⁷Te suni súcuan tēe ni casiáa de modo chíjniñu jín ñahan. Te nde ni nduquijí de ni casáha ndiyí de jín jnáhan yí de, te tēe jín tēe ni casáha de jniñu jnūhun canu. Te cándoho de castigo siquī jniñu néé ní casáha de.

²⁸Te jeē tu ní cácani i cuajnúhún i Yaā Dios, jeē yúcuan ní siaá yā i jeē na cání néé ni i, te sáha i tāca jniñu jeē tu iyó váha. ²⁹Te máni máá na jniñu jeē tu iyó ndaā cándihví ni, te cájica jnéni, cásáha jniñu néé, cándiyo ni, cájito uhū jnáhan. Te máni jeē cácuésún ni, cájehni ndiyí, cájehnáhan, cástáhú, cásáhuhū jnáhan, cásájnúhún siquī jnáhan. ³⁰Cácahān jnūhun néé

síquī jnáhan, cájito uhū Yaā Dios, cácujeē ni, cásándúxí máá, cásátéyí máá, cájequin costumbre neé, tu cájendetū nuū tatá nuū naná. ³¹Te tu cájecūhun cuiti ni, tu squícu jnūhun jéjnūhun, tu íyó mání jíin jnáhan, tu íne cáhnu ni nuū jnáhan, tu cúndáhú ni jnáhan. ³²Te je cájini vāha i jeē ni sándaā Yaā Dios jeē ñáyuu casáha súcuan, cánuú jnahnū ndetū i. Te vēsú súcuan cájini i, te níní casáha i jniñu neé un, te suni cánujnahan ni i jeē casáha jnáhan i súcuan.

Ndaā sándaā Yaā Dios síquī cuēchi

2 Núu súcuan te róhó jéē cahán cuēchi síquī jnáhan, núu na-ni ñayuu cúu ró, ma cúu cahán rō jeē tú na cuēchi máá ró. Chi jeē cahán rō cuēchi síquī jnáhan ró cúu jeē ndénehen ró cuēchi síquī maá ró. Chi róhó jéē cahán cuēchi, suni súcuan sáha máá ró cuēchi. ²Chi jíiní yō jeē Yaā Dios, ndaā sáha ya jeē ndónnda ya síquī cuēchi ñayuu casáha súcuan. ³Te róhó jéē cahán cuēchi síquī ñáyuu casáha cuēchi, te suni súcuan sáha máá ró, ¿te á jéni ni rō jeē cácu máá ró quivī ndónnda Yaā Dios síquī cuēchi, chí naún? ⁴¿A cújeē ni rō nuū jnúhun jeē yóhoyo vāha ni Yaā Dios jíin ró, jíin jéē iyó paciencia yā jeē tú yachi cuāha ya castigo nuū rō? ¿Te á tu jécūhun ni rō jeē jnúhun jeē yóhoyo vāha ni yā sáha jeē nácani ni rō síquī cuēchi ró? ⁵Chi nihni ni rō te tu nácani ni rō síquī cuēchi ró. Te jeē yúcuan cáyā gā rō castigo síquī rō quivī sáha Yaā Dios juicio, máá quivī jeē cóo ndijin jeē ndaā sándaā yā síquī cuēchi. ⁶Chi chunaa yā

nuū ná iin ná iin ñayuu núu ndese jniñu ni casáha i. ⁷Te ñayuu jeē tu jécuiñī i jeē sáha i jniñu vāha, cuāha ya jnūhun jeē cótecu i níí cáni. Chi ndúcú i quivī i nuū ndujéhnu yíñúhún i, nuū níí cáni cotecu i. ⁸Te quitī ni yā te cuāha ya castigo nuū ñáyuu cujeē ni nuū yā, te cúnihni ni nuū jnúhun ndaā, chi sa nuū jnúhun yacué yóho jetáhú i. ⁹Te tāca ñáyuu casáha jniñu neé, chi nihni i jnúndóho xeēn te cucuíhyá ndasí ni i, xihna gā ñayuu hebreo te suni súcuan ñayuu tāca gá nación. ¹⁰Te sa suhva tāca ñáyuu casáha jniñu vāha, chi quivī i nuū ndujéhnu yíñúhún i, te coo ndeyí coo sīñ ni i, xihna gā ñayuu hebreo te suni súcuan ñayuu tāca gá nación.

¹¹Chi Yaā Dios tu sáha ya cuenta ndese cúu iin iin ñayuu, chi inuú sáha ya jíin i. ¹²Chi tāca ñáyuu jeē casáha cuēchi, vēsú tu cáyihni i chíjī ley jeē ni jéhe ya nuū Moisés, te tu níní ley un te jnahnū ndetū i. Te tāca ñáyuu cáyihni chíjī ley Moisés te casáha cuēchi, jíin ley un sándaā yā cuēchi i. ¹³Chi tu ndáhva Yaā Dios cuēchi ñayuu jeē maá jéē cúni nahín-ni i jnūhun cáhán ley yā. Chi sa suhva ñayuu squícu jeē cahán ley yā cúu jeē ndáhva yā cuēchi i. ¹⁴Chi ñayuu tācá nación jeē tu cánevāha tutu ley jeē ni jéhe ya nuū ñáyuu hebreo, te núu cásquícu máá i ley yā, suu cúu jeē cánevāha i ley yā ini anuá i, vēsú tu cánevāha i tutu ley un. ¹⁵Te súcuan cástéén i jeē jnúhun ndácu ley un chi ñúhun ini anuá i. Te tāca jéē cájeni ni i jíin ánuá i, suu cúu jeē steén nuū i síquī núu ni sáha i cuēchi chí vāha

ni sáha i. ¹⁶Te súcuan coo máá quívī jeē jíin Jesucristo sándaā Yaā Dios siquī tāca jéē tu íyó váha jeē ní cajeni sáhi ní tāca ñáyuu. Súcuan cáhán jñuhun váha ya jeē nácani ri.

**Siquī jeē tu cásquícu ñáyuu
hebreo ley Moisés**

¹⁷Te róhó cácahān rō jeē tée hebreo cácuu rō, te cátenuū rō maá ley Moisés, te cácutéyí rō jeē siquī Yaā Dios. ¹⁸Te cájeni ni rō jeē jíin rō ndese nájnahān ni yā, jíin jéē cúu nácāji váha rō ndé-ni cúu jniñu váha, chi ni cacutūhva rō ley un. ¹⁹Te cájeni ni rō jeē maá rō cácuu tēe stéén ichi Yaā Dios nuū ñáyuu tu cájini cuiti, jíin jéē cúu sáha rō jéē cúndijin ini anuá ñáyuu cájica nájñuhun nuū néē. ²⁰Te cájeni ni rō jeē cúu stéén rō nuū ñáyuu tú tūhva jñuhun ya, jíin jéē maá rō cácuu maestro nuū ñáyuu tu jécūhun ni. Chi jíin tutu ley yā te cájini rō ndese cúu jñuhun ndíhí jñuhun ndaā, cájeni ni rō. ²¹Núu súcuan te máá rō jeē castéén nuū ñáyuu, ¿te naun tu cástéén rō nuū maá rō? Te máá rō jeē cácahān jeē ma sácúíhná i, ¿te naun cásácúíhná máá rō? ²²Te máá rō jeē cácahān jeē ma cósíquí ndéē i, ¿te naun cásíquí ndéē maá rō? Te máá rō jeē cácahān jeē cácuquini ni rō ídolo, ¿te naun cásácúíhná rō ndajniñu jeē yúcu ini vehe ídolo? ²³Te cácutéyí rō jíin ley Yaā Dios, te vēsú súcuan te cásáha rō jéē cácahān ñáyuu siquī yā, chi tu cásquícu máá rō jñuhun ndácu ley yā ún. ²⁴Chi súcuan yósó núu tútu ii: Ñáyuu tāca gá nación, máni cácahān ndevāha i siquī Yaā

Dios, jeē siquí cuéchi róhó ñáyuu hebreo.

²⁵Te núu cásquícu rō ley Moisés, yūcuán na te níhín jniñu ndije jeē ní canihīn rō jñunī circuncidar. Te núu tu cásquícu rō ley un, te vēsú ni cuu rō circuncidar, te nájñuhun jeē tu ní cúu rō. ²⁶Te tēe tācá nación, núu cásquícu de jniñu ndácu ley un, vēsú tu ní cānihīn de jñunī circuncidar, núu súcuan te nájñuhun ni canihīn de jñunī circuncidar. ²⁷Te tēe jeē tu ní cúu circuncidar yiqui cúñu de, te cásquícu de ley yā, máá de cahān cuéchi siquī rō. Chi tu cásquícu rō, vēsú cánevāha rō tutu ley un, te ni cuu rō circuncidar. ²⁸Chi nasūu jéē cáa ichi síquí iin tēe sáha jeē cúu ndije de tēe hebreo. Te ni nasūu jéē cúu circuncidar yiqui cúñu iin tēe sáha jeē cúu de tēe ndaā. ²⁹Chi sa suhva tēe cúu hebreo ndije, cúu jeē ini anuá de ñúhun jñuhun ndaā. Te tēe cúu circuncidar ndije, chi nde jíin ini jíin ánuá de sáha de jniñu ndaā te nasūu jéē ndíso de jñunī circuncidar jeē cahān ley un cúu. Tēe cándāa súcuan, nasūu ñáyuu cájejnúhún i de, chi máá Yaā Dios.

3 ¿Núu súcuan te na vé iyó gá nuū ñáyuu hebreo jeē quéndōo váha ga i? ¿Te ndé níhín jniñu jeē casáha i circuncidar? ²Vāha ndasí níhín jniñu. Xihna gā nihín jniñu jeē ni jéhe Yaā Dios jñuhun ya nuū maá i. ³Te vēsú sava i tu ní cácañdije, ¿te á suu sáha jeē ma squícu ga Yaā Dios jñuhun ni jejnūhun ya, chí naún? ⁴Tú cuiti jeē súcuan, chi vēsú núu ndíhi ñáyuu castáhú i, te Yaā Dios chi íyó ndáa

yā. Chi suhva yósó nuū tútu ii jeē ni cáhān iin tēe jíin yá:

Cahān ñayuu jeē iyó ndāā ni jíin táca jnúhun cáhān ni,
te cuni i jeē iyó ndāā ní vēsú núu cácahān i siquī ní.

Achí tutu.

⁵Te cácahān sava ñayuu jeē iyó váha jeē sáha yó cuēchi, chí cuēchi yó jéjníñu stéén jeē iyó ndāā Yaā Dios. Núu súcuan ¿te á cuu cahān yō jeē tú váha sáha Yaā Dios jeē jéhe ya castigo núu jéjníñu cuēchi yó súcuan? (Va cáhān-ni nde ri nájnūhun cácahān ñayuu ñayīví.)

⁶Tú cuiti jeē súcuan. Chi núu jeē tú váha sáha Yaā Dios, ¿te ndese cuu sándaā yā cuēchi ñayuu ñayīví?

⁷Te núu jnúhun stáhú cácahān ñayuu jéjníñu stéén jeē yóhoyó cújéhnu Yaā Dios siquī jeē máni cáhān ndaā yā, ¿te á cuu cahān yō jeē tú váha jeē cahān yā jeē cuēchi cúu jeē castáhú i? ⁸Tuú, chí núu jeē súcuan cúu, te cuu cahān yō jeē vetū-ni sáha yó jéé neé návāha quee jeē váha núu. Te sava ñayuu cácahān ndevāha i siquī rī jeē súcuan cástéén rī, te tú ndaā. Ñayuu ún chí iyó váha jeē ndénehen ya cuēchi siquī i.

Ndivii yō iyó cuēchi

⁹Núu súcuan ¿te á váha ga ñayuu cácuu yóhó ñayuu hebreo vēsú inga ñayuu naún? Tú cuiti jeē súcuan. Chí je ni cacahān yō jeē vēsú ñayuu hebreo chí ñayuu tāca gá nación, ndivii yō yíhi chíji cuēchi. ¹⁰Chi suhva cáhān tutu ii:

Tú cuiti na ñayuu ndaā iyó, ni iin i.

¹¹Te tú cuiti ñayuu jécūhun ni iyó,

te tú ni iin i nánducú i Yaā Dios.

¹²Ndihí i ni cascuíta i jnúhun ya, te inuú-ni ni castívi ndihí i máá i.

Te tú cuiti ñayuu sáha jniñu váha iyó, ni iin i.

¹³Yaū sucūn i cúu nájnūhun yaū ndīyi jeē núne, chí máni jnúhun stáhú cácahān i.

Te nájnūhun veneno coō yíhi yuhu i,

¹⁴chí máni máá jnúhun ndevāha jnúhun uvuā cácahān i.

¹⁵Te yóhoyó ñama jehē i jeē cáhni i ndīyi.

¹⁶Te ndé-ni cúu-ni nuū cájica i te squívi i jnúndóho jeē jnahnú ndetū ñayuu.

¹⁷Te tu cájica cuiti i jíin jnúhun coyūcu máni i,

¹⁸te ni tu cánacani ni i jeē cónso iyo i nuū Yaā Dios.

Achí tutu.

¹⁹Te jíni yō jeē tāca jnúhun cáhān ley jenahān, chí cáhān nuū ñayuu yíhi chíji ley un, návāha ndihí i ma cúu cahān i jehē i. Chi ndenehen Yaā Dios cuēchi siquī i nde jíin ñayuu ní ñayīví. ²⁰Chí tú ni iin ñayuu quendōo ndaā i nuū yā jeē nducú i squícu i jniñu ndácu ley un. Chí ley un jéjníñu máni návāha cuni yō jeē iyó cuēchi yó.

Jeē jnáma ya yohó síquī jeē candíje yó jéé sáha ya jehē yō

²¹Te vijna te je cájini váha yó ndese ndáhva Yaā Dios cuēchi yó. Te nasūu ley un sáha jeē quendōo ndaā yō, vēsú máá tutu ley jíin tēe ni canacani jnúhun ya, ni cacahān ndese ndáhva yā cuēchi ñayuu.

²²Chi tāca ñáyuu jeē cácanđije i jeē ni jíhí Jesucristo jeē chúnaa yā cuēchi i, chi ndahva Yaā Dios cuēchi i siquī jeē súcuan cácanđije i. Chi inuú-ni cúu tācá ndíhi ñayuu.

²³Chi ndíhi yó ni casáha cuēchi, te jeē yúcuan tu ní cúu quendōo ndaā yō nuū Yaā Dios. ²⁴Te siquī jeē yóhoyo vāha ni Yaā Dios, jeē yúcuan ndáhva yā cuēchi yó súcuan-ni. Chi siquī jeē ni jíhí Cristo Jesús cúu jeē jnáma ya yohó. ²⁵Chi Yaā Dios ni jeni ya Cristo návāha socō yā maá yá chunaa yā cuēchi yó jéē ni jíhí yā. Te jnáma ya yohó núu súcuan cándije yó. Te súcuan ni sáha Yaā Dios návāha stéén yā jeē Yaā ndaā cúu ya. Chi ichi yátá ni iyo paciencia yā, te tu ní chíhi ya cuenta cuēchi ñayuu. ²⁶Te tiempo yáha stéén yā jeē Yaā ndaā cúu ya, chi ndaā sáha ya jeē squéndōo ndaā yā ñayuu candíje vēsú iyó cuēchi i, chi cácanđije i jeē ní chunaa Jesús cuēchi i ni ndahva yā.

²⁷Núu súcuan ¿te á cuu cutéyí gá yō siquī maá yó? Ma cúu cuiti, chi ma cúu cutéyí yó cani ni yō jeē vāha squícu yó ley yā. Chi jnáma ya yohó máá síquī jeē candíje yó jéē sáha ya jehē yō. ²⁸Núu súcuan te je jíni yō jeē ndáhva Yaā Dios cuēchi yó síquī jeē súcuan cándije yó, te nasūu jéē nducú yó squícu yó jéē ndácu ley.

²⁹¿Te á núu maá-ni ñayuu hebreo cúu ya Yaā Dios, chí naún? Tuú, chi suni cúu ya Yaā Dios jeē jnáma ñayuu tāca gá nación. ³⁰Chi iin-ni Yaā Dios iyó, te ndáhva yā cuēchi ñayuu cácanđije jeē ni sáha ya jehē i, cúu ñayuu ndíso jnuni circuncidar, cúu ñayuu jeē tuú. ³¹Te

jeē candíje yó jéē jnáma ya yohó, ¿á sáha jeē tuá jíni ñúhún squícu yó ley yā, chí naún? Tú cuiti, chi sa suhva sáha jeē vāha ga cuu squícu yó ley yā.

Abraham cúu iin ejemplo nuū yō

4 Núu súcuan ¿te ndese cahān yō siquī tāca jéē ní cuu jíni jíi yō Abraham? ¿Ndese ni ndahvā cuēchi de? ²Nasūu jéē ni sáha máá de cúu jeē ní ndahva Yaā Dios cuēchi de. Chi núu jeē súcuan cúu núu, te cuu cutéyí de jeē vāha ni sáha de. Te tu ní cutéyí de, chi nasūu síquī jeē ni sáha máá de cúu jeē ní ndahva Yaā Dios cuēchi de. ³¿Chi ndese cáhān tutu ii? Cáhān jeē ní candíje Abraham jeē sáha ya jeē ni jéjñūhun ya nuū de, te jeē yúcuan ní ndahva yā cuēchi de. ⁴Te iin ñayuu sájniñu, te yāhu i chi nasūu jéē cútahū i cúu, chi jeē chúnaa yō nuū i cúu. ⁵Te jeē jnáma Yaā Dios ñayuu, chi jeē cútahū i cúu. Chi vēsú tu cúu squícu i tācá jniñu vāha, te núu candíje i jeē jnáma ya i nuū cuēchi i, yūcuán na te ndahva yā cuēchi i. ⁶Te David suni ni cahān de ndese yóhoyo ndetū ñayuu jeē ndáhva Yaā Dios cuēchi i, vēsú tu cúu sáha i ni iin jniñu jeē quéndōo ndaā i nuū yā. ⁷Chi ni cahān de:

Nacā ndetū ñayuu jeē íne cáhnu ni yā nuū jniñu néé ni sáha i, te tu ndénehen ya cuēchi siquī i. ⁸Te nacā ndetū tēe jeē tuá chíhi máá Jítoho yō cuenta cuēchi de.

Achí tutu.

⁹¿Te á máni máá ñayuu squícu ley circuncidar cúu jeē quéndōo ndetū?

¿Chí suni quéndōo ndetū ñayuu jeē tu cúu circuncidar naún? Suni máá i quéndōo ndetū i. Chi je ni cahān yō jeē ní candíje Abraham jeē sáha ya jeē ni jéjnūhun ya, te jeē yúcuan ní ndahva yā cuēchi de. ¹⁰Te ná ni ndahva yā cuēchi de, ¿á je ni cuu de circuncidar, chí ndé ná tuú? Nasūu jéé je ni cuu de circuncidar, chi nde ná tuú. ¹¹Te cuéé gá te ni nihīn de jnūnī circuncidar. Te suu ni cuu iin seña, nájnūhun iin sello jeē ní ndahva yā cuēchi de siquī jeē súcuan ni candíje de. Te jeē yúcuan ní cahān yā jeē cuu de jíí nuū tāca ñayuu jeē candíje i jeē sáha ya jehē i, suni nuū ñayuu tu ní cúu circuncidar, chi suni ndahva yā cuēchi máá i. ¹²Te suni cúu de jíí nuū ñayuu ní cuu circuncidar, te nasūu máni jeē ní cuu i circuncidar, chi suni jeē ní jnī i ejemplo de. Chi cáncandíje i jeē sáha ya jehē i, nájnūhun ni candíje máá de nde ná tu cuu de circuncidar.

**Núu candíje yó te sáha Yaā
Dios jeē ni jéjnūhun ya**

¹³Chi ni jejnūhun Yaā Dios nuū Abraham jíín núu tāca yúcūn de jeē cuāha ya níí ñáyívi cuu tahū de. Te nasūu síquī jeē ní nducú de squícu de ley yā cúu jeē ní jejnūhun ya un núu de, chi sa suhva síquī jeē ní candíje de jeē ni jéjnūhun ya, te ni ndahva yā cuēchi de. ¹⁴Chi núu jeē máni máá ñayuu nducú squícu ley cúu jeē nihín jeē ni jéjnūhun ya, núu súcuan te cáncandíje cāha yó nuú, te ma nihín jníñu jeē ni jéjnūhun ya ún. ¹⁵Te ley chí sáha jeē nihín ñayuu castigo síquī jeē tu cúu squícu i. Te núu jeē tu ley, te suni

tú na jnūhun stívi ñayuu síquī ley coo núu.

¹⁶Núu súcuan te ni jejnūhun ya jeē sáha ya jeē váha jíín ñayuu síquī jeē candíje i jeē súcuan sáha ya, te jeē cútahū i súcuan-ni cúu. Te jeē ni jéjnūhun ya ún, íyó cutú nuū tāca yúcūn Abraham, te nasūu núu maá-ni ñayuu jeē nducú squícu ley jenahán, chi suni nuū tāca ñayuu cáncandíje nájnūhun ni candíje Abraham. Te súcuan cúu de jíí nuū tāca yó jeē cáncandíje yó. ¹⁷Súcuan ni sáha Yaā Dios chi ni candíje de jeē sáha ya. Chi súcuan cáhán tutu ií: Ni jeni ri rohó cuu ró jíí nuū cuehē ndasí ñayuu. Súcuan ni cahān maá Yaā jeē nastécu ndíyi te cáhán yā ndese coo tāca jéé ná tu coo.

¹⁸Te ni candíje de, te ni cocuhun teyí ni de jeē ni jéjnūhun ya jeē coo cuehē yucūn de, vēsú tuá na modo coo sēhe de núu. Te jeē yúcuan ní nduu de jíí nuū cuehē ndasí ñayuu, nájnūhun ni cahān Yaā Dios: Súcuan nducuehē yucūn rō, achí yá jíín de. ¹⁹Te je yajni jinū de ciento cuiyā, te vēsú súcuan te tu ní quénda de nuū jnūhun cáncandíje de, vēsú jiní de jeē maá de jíín ñasihí de Sara je jéhnu ndasí ndíndúu de jeē ma cúu ga coo sēhe de. ²⁰Te tu ní nácani síquí ni de jeē ma cáncandíje ga de jnūhun ní jejnūhun Yaā Dios jeē coo sēhe de. Chi sa suhva ni candíje nihin ga de, te ni nacuatáhu de nuū Yaā Dios. ²¹Chi ni cucáhnu vāha ni de jeē cúu squícu Yaā Dios ndíhi jeē ni jéjnūhun ya. ²²Te jeē yúcuan ní ndahva yā cuēchi de síquī jeē súcuan ni candíje de.

²³Te nasūu máá-ni síquī Abraham cúu jeē yosó núu tútu jeē ní ndahva

yā cuēchi de jeē ní candíje de.

²⁴Chi suni yósó jéē síquí yohó jíjñáhan yó. Chi suni ndáhva yā cuēchi máá yó jéē candíje yó jéē cúu ya Yaā ní nastécu Jitoho yō Jesús. ²⁵Chi ni jihí Jesús jeē chúnaa yā cuēchi yó, te ni natecu yā návaha ndahva Yaā Dios cuēchi yó.

Ndese quéndōo ñayuu jeē ndáhva yā cuēchi

5 Núu súcuan te je ni ndahva Yaā Dios cuēchi yó síquí jeē ní candíje yó jéē sáha ya jehē yō. Te jeē yúcuan ní sáha ya jeē ní ndívi yó núu jnúhun maní yā jíin yó, síquí jeē ni jíhí Jitoho yō Jesucristo jehē yō. ²Chi máá Cristo ni sáha jeē ni quívicoo yó núu Yaā Dios, chi ni sáha ya jeē váha yóhó síquí jeē súcuan cándíje yó. Te cáhiin nihin yó jíin jnúhun jeē sáha ya jeē váha yóhó. Te cúsiñ ni yō chi ñúhun ni yō jeē jíin yō nuū lúu cujéhu yó jíin Yaā Dios. ³Te nasūu máá yáha-ni, chi suni cúsiñ ni yō jeē ndóho yó jnúndóho. Chi jíiní yō jeē maá jnúndóho sáha jeē jéndeýí ni yō. ⁴Te jeē jéndeýí ni yō sáha jeē íje váha yó cuu yó ñáyuu ndaā. Te jeē íje váha yó sáha jeē ñúhun ni yō tāca jéē váha jeē cóo. ⁵Te tāca jéē ñúhun ni yō, chi nihín nahín yó. Chi jnúhun cúndáhú ni Yaā Dios yohó, ni cunuú ini anuá yō, sáha Yaā Dios jeē jíin Espíritu Santo jeē ni jéhe ya nuū yō.

⁶Chi náa ndóho yó jéē ma cúu cuiti jnama yó máá yó, te ni jihí Cristo jehē yohó jéē cúu yó ñáyuu íyó cuéchi. Te ni jihí yā máá quíví jeē jé ni jeni Yaā Dios. ⁷Te yíí cúu jeē cúu ñayuu jehē inga ñayuu,

vēsú jehē ñin ñayuu ndaā. Chí sanaa te íyó jínu jeē chúndeýí ni ñin tēe cuu de jehē ñin tēe ndaā váha. ⁸Te máá Cristo chi ni jihí yā jehē yō náa máni cuēchi sáha yó, te súcuan ni steén Yaā Dios jeē cundáhú ni yā yohó. ⁹Te vijna je ni ndahva Yaā Dios cuēchi yó síquí jeē ni jíhí Cristo jehē yō. Núu súcuan te suni jíiní váha yó jéē jnama Cristo yohó núu castigo quií quíví sáha Yaā Dios juicio. ¹⁰Chi náa cúu ga yō enemigo Yaā Dios, te síquí jeē ni jíhí Sēhe ya jehē yō, te ni sáha ya jeē ndívi yó núu jnúhun maní yā jíin yó. Te jeē súcuan ní ndívi yó nuū jnúhun maní yā jíin yó, te suni jíiní váha yó jéē cācu yó síquí jeē técu Cristo, nduú yá jíin yó. ¹¹Te nasūu máá yáha-ni, chi suni cúsiñ ndasí ni yō jíin Yaā Dios síquí jeē ni sáha Jitoho yō Jesucristo jehē yō, chi máá yá ni sáha jeē ní ndívi yó núu jnúhun maní Yaā Dios jíin yó.

Jnúhun Adán jíin jnúhun Cristo

¹²Núu súcuan te jíiní yō jeē ni quíví cuēchi ini ñayívi ní sáha máá ñin-ni tēe Adán. Te jeē síquí cuéchi yúcuan te ni jecōo cuehyí jéhni ñayuu. Te jeē yúcuan cúu jeē jihí ndíhi ñayuu, chi ndíhi i yíhi cuéchi. ¹³Te nde ná tu cuāha ya ley nuū Moisés, te je íyó cuéchi ini ñayívi. Te síquí jeē ná tu coo ley yā, te tu ní chíhi ya cuenta jeē castívi i. ¹⁴Te vēsú súcuan te nde tiempo Adán te nde tiempo Moisés ni yíhi ñayuu chíhi cuehyí jeē jéhni i síquí jeē íyó cuéchi i. Chi ni jihí i síquí cuéchi ni casáha máá i, vēsú tu ní sáha i jnáhan cuéchi jeē ni sáha Adán jeē ní cuníhni ni de nuū ñin jniñu

ní ndacu ya. Te Adán ni cuu de iin muestra maá Yaā ní quiji cuéé gá.

¹⁵Te jnūhun jeē ni sáha Adán cuēchi, tu quíjnáhan cuíti jíin táhū jeē jnáma Yaā Dios yohó. Chi jeē ni stívi máá iin-ni tēe ún, jeē yúcuán cúu jeē jihí ndíhi yó. Te jnūhun jeē jnáma Yaā Dios yohó cújéhnū ndasí gá, chi siquī jeē ni sáha máá iin-ni tēe Jesucristo cúu jeē súcuán-ni jnáma ya ndíhi ñayuu candíje. ¹⁶Te cuēchi jeē ni sáha máá iin-ni Adán, tu quíjnáhan cuíti jíin jnūhun jeē jnáma Yaā Dios yohó. Chi siquī máá iin-ni cuēchi ún te ni quívicoo ñayuu chíji jnūhun jnahnū ndetū i. Te jnūhun jeē jnáma ya ñayuu, sa suhva sáha jeē súcuán-ni ndáhva yā cuēchi i, vésú yōhyo cuehē cuēchi ni casáha i. ¹⁷Chi siquī jeē ni sáha máá iin-ni tēe Adán cuēchi, te ni nihīn poder cuehyi jéhni ñayuu. Te sa suhva siquī jeē ni jíhi máá iin-ni tēe Jesucristo, te víhyá gā ni nihīn ñayuu maá yá poder jeē cótecu i caca ndaā i jíin yá. Chi ni ndahva yā cuēchi i siquī jeē yóhyo vāha ni yā.

¹⁸Núu súcuán te siquī jeē ni sáha máá iin-ni tēe Adán cuēchi, te ni quívicoo ndíhi ñayuu chíji jnūhun jnahnū ndetū i. Te sa suhva siquī jeē ni sáha máá iin-ni tēe Jesucristo iin jniñu váha ndasí, te ndáhva Yaā Dios cuēchi ndíhi ñayuu te cotecu i níí cáni. ¹⁹Chi siquī jeē tu ní jéndije máá iin-ni tēe, te ni quívicoo cuehē ndasí ñayuu chíji cuēchi. Te suni súcuán siquī jeē ní jendije máá iin-ni tēe Jesucristo, te ndáhva Yaā Dios cuēchi cuehē ndasí ñayuu.

²⁰Te ni jēhe ya ley yā návāha cuni yō jeē cuēhē cuēchi cásáha yó. Te

jeē ní nducuehē cuēchi yó, te víhyá gā cuehē cúu jnūhun jeē váha ni yā jeē íne cáhnu ni yā nuū yō. ²¹Núu súcuán te nájnūhun ni nihīn poder cuehyi jéhni ñayuu siquī jeē iyó cuēchi i, suni súcuán íyó poder jnūhun jeē váha ni yā jíin yó. Chi ndáhva yā cuēchi yó te cotecu yō níí cáni siquī jeē ni jíhi Jitoho yō Jesucristo jehē yō.

Jeē tuá yíhi yó chíji cuēchi chi yíhi yó ndaha Cristo

6 Núu súcuán ¿te ndese cahān yō? ¿A caca ga yō jíin cuéchi návāha víhyá gā sáha ya jeē váha yóhó jéē cóne cáhnu ni yā nuū yō? ²Ma cúu cuíti. Chi nájnūhun je ni jihí yō jeē tuá yíhi yó chíji cuēchi, te ma cúu ga caca yó jíin cuéchi núu súcuán. ³¿A tu cájécūhun ni rō jeē tāca yó jeē ní jendute yó siquī jeē ni quívi yó ndaha Cristo Jesús, suni ni jendute yó siquī jeē ni quívi yó chíji jnūhun jeē ni jíhi yō jíin yá? ⁴Chi jeē ní jendute yó cúu nájnūhun ni quindūji yó jéē ni jíhi yō jíin yá. Te vijna te cuu caca yó jíin vida jeē jeē ni jēhe ya nuū yō, chi nájnūhun suni ni natecu yō jíin yá. Chi ni natecu yā ni sáha Tátá yā jíin poder jeē cújéhnū ndasí yá.

⁵Chi núu ni cundúu yó jíin yá siquī jnūhun jeē ni jíhi yō jíin yá, te suni súcuán cundúu yó jíin yá siquī jnūhun jeē ní natecu yō jíin yá.

⁶Chi jíin yō jeē ní naa modo maá yó jeē ni jíca yó jíin ichi yátá, chi ni quívi yó núu jnūhun jeē ni jíhi yō jíin Cristo jicā cruz. Te súcuán ni naa modo yō jeē cúu yó mozo nuū cuēchi, návāha tuá cuajniñu yó núu táca jniñu jeē máni cuēchi

cúu. ⁷Chi ñayuu jeē jé ni cajihī, je ni quendacoo i chíji tāca cuéchi. ⁸Te núu je ni jihī yō jíin Cristo, te cándíje yó jéē suni súcuan ni natecu yō jíin yá. ⁹Chi jíin yō jeē ní natecu Cristo, te ma cúu cuiti ga yā, chi cuehyī jéhni yóhó, tuá na vé cúu sáha jíin yá. ¹⁰Chi jeē ni jíhi yā, te ñin jínu-ni ni jihī yā jeē siquī cuéchi ñayuu. Te jeē técu yā vijna, chi sáha ya jeē cuní Yaā Dios. ¹¹Te suni súcuan róhó jíjnáhan ró, sáha ró cuenta jeē nájnūhun ni cajihī rō jeē ní quendacoo ró chíji cuéchi. Te cátecu rō návāha sáha ró jéē cuní Yaā Dios, chi ndúu ró jíin Jítóho yō Cristo Jesús.

¹²Núu súcuan te ma cuáha ga rō jnūhun quihi ró chíji cuéchi jíin yiqui cúnu rō jeē cúu. Chi cuéchi ún stíhvī ni rohó jéē na sáha ró táca jéē ndíyo néé ni rō. ¹³Te ma cuáha ró máá ró cuajníñu ró núu cuéchi jeē cócuu ró jíin jniñu néé. Chi sa suhva cuáha ró máá ró nuū Yaā Dios, te sáha ró cuenta jeē nájnūhun je ni cajihī rō te ni canatecu rō nuū yā. Te cuáha ndihi ró máá ró nuū yā jeē cuajníñu ró núu jniñu ndaā. ¹⁴Chi tuá na poder cuéchi jeē cundeyí jíin ró, chi tuá cáyihī ró chíji ley jenahán, chi sa cáyihī ró chíji jnūhun jeē váha ni yā jíin ró.

Jnūhun mozo jeē steén ndese quéndōo ñayuu cácadíje

¹⁵¿Ndese sáha yó núu súcuan? ¿A caca ga yō jíin cuéchi siquī jeē tuá yíhi yó chíji ley jenahán, chi sa yíhi yó chíji jnūhun jeē váha ni yā jíin yó? Ma cúu cuiti. ¹⁶Chi cájini rō jeē núu cuáha ró máá ró jeē cuatáhú ró

sájniñu ró núu ñin tēe, núu súcuan te cácuu ró mozo nuū téé ún, te cánuú cuandíje ró núu de. Te suni súcuan núu cuáha ró máá ró jeē sáha ró cuéchi, te mozo cuéchi cácuu ró, te cuu rō. Te núu cuatáhú ró nuū maá yá, te mozo yā cácuu ró jéē cáca ndaā rō. ¹⁷Te na cútahū yō nuū Yaā Dios, chi vésú ni cacuu ró mozo nuū cuéchi, te vijna chi nde jíin ini jíin ánuá rō ni cajetáhú ró nuū jnúhun ya jeē ni quívicoo ró núu. ¹⁸Te vijna te je ni nduu libre rō jeē tuá cácuu ró mozo nuū cuéchi, te cájejniñu ró núu jniñu ndaā. ¹⁹(Ni cahān rī ñin jnūhun ndese cúu siquī mozo ñin ñayívi yáha, chi tu cájecūhun yachī ni rō siquī jnúhun ya.) Núu súcuan te nájnūhun ni cajéhe ró máá ró nde saá jeē ní cajejniñu ró núu táca jniñu jnéhén jniñu néé, suni súcuan cuáha ró máá ró vijna jeē cuajníñu ró núu jniñu ndaā, návāha coo ndoo coo ñi rō nuū Yaā Dios.

²⁰Chi nde náa cácuu ró mozo nuū cuéchi, te tu ní cájejniñu ró núu jniñu ndaā. ²¹¿Te na vé ni canihīn rō siquī cuéchi ni casáha ró un jéē cáccuanu rō vijna sáha? Tú cuiti, chi máá jéē jnahnú ndetū rō ní cáni sáha. ²²Te vijna te je ni canduu libre rō jeē tuá cácuu ró mozo nuū cuéchi, te cájejniñu ró núu Yaā Dios. Te suu sáha jeē quéndōo váha ró, chi cáhiyo ndoo cáhiyo ñi rō nuū yā, te nde sandíhī te cotecu rō ní cáni. ²³Chi yāhu jeē nihín ñayuu siquī cuéchi cúu jeē jnahnú ndetū i. Te sa tahū jeē jéhe Yaā Dios cúu jeē cótecu yō ní cáni andiví, siquī jeē ndúu yó jíin Jítóho yō Cristo Jesús.

Jnūhun ñasihí jín yii jeē steén ndese quéndōo ñayuu cácadíje

7 Hermano, je cájini rō ndese cáhán ley yā, te cájini rō jeē yíhi ñayuu chíji ley maá-ni núu técu i ñayivi yáha. ²Te yāha cúu nájnūhun iin ñahan jeē ní quijnáhan, chi cáhán ley jeē yíhi ña ndaha yii ña maá-ni núu técu de. Te núu ni jihí yii ña, te je ni quenda ña chíji ley jeē ní quijnáhan ña jín de. ³Núu súcuan te núu quijnáhan ña jín inga tēe níni técu gā yii ña, te casíquí ndéē ña de. Te núu je ni jihí yii ña, te je ni quenda ña chíji ley un. Te cuu quijnáhan ña jín inga tēe, chi nasūu jéē casíquí ndéē ña núu súcuan.

⁴Te suni súcuan rōhó jínáhan ró, ñání mání, chi ndúú ró jín Cristo. Chi nájnūhun ni cajihí rō jín Cristo, te ni quendacoo ró chíji ley jenahán. Te vijna chi nájnūhun ni quijnáhan ró jín inga, cúu jeē ní quivicoo ró ndaha Cristo, Yaā ni natecu mēhñu ndíyi, návāha cuu sáha ró jniñu váha jeē cuní Yaā Dios. ⁵Chi ná ni cajica yó jín modo maá yó nde saá, te ley un ní sáha jeē ní ndíyo neé ni yō tāca jéē cuní yiquí cúñu yō jeē sáha yó. Te yūcuan ní sáha jeē jnahnú ndetū yō nuú. ⁶Te vijna te je ni quenda yó chíji ley jenahán, chi nájnūhun je ni jihí yō jeē ma nihín gā poder síquī yō. Te súcuan te íyó libre yō jeē cuajniñu yó núu Yaā Dios. Te jica yó jín modo jeé jéē cuní maá Espíritu, chi tuá yíhi yó chíji ley jeē ní tee Moisés jenahán.

Síquī cuēchi jeē ñūhun ini anuá yō

⁷¿Ndese cahán yō núu súcuan? ¿A ley ndíso cuēchi? Tú cuiti jeē

súcuan. Te núu jeē tú ley yā, te ma cúni cuiti rī jeē iyó cuēchi rī. Chi ma cúni rī jeē cuēchi cúu jeē ndíyo ni rī ndajniñu jnáhan rī núu tu ní cáhán ley jeē ma ndíyo ni yō. ⁸Te súcuan ni nihín cuēchi modo cocuu jín rí. Chi síquī jeē ndácu ley jniñu jeē ma sáha yó cuēchi, te ni quejéé ndíyo ni rī sáha rī tāca jéē neé. Te núu jeē tu ley, te suni tú na jnūhun stívi yó síquī ley nuú. ⁹Chi ni iyo tiempo jeē técu rī jeē ná tu jecūhun ni rī jeē cahán ley. Te ná ni quejéé rí jécūhun ni rī jniñu jeē ndácu ley, te ni jecūhun ni rī jeē iyó cuēchi rī, te ni nduu rī nájnūhun ndíyi.

¹⁰Chi ni jini rī jeē ley jeē sáha jeē cótecu anuá rī nuú, te tuú chi sa ni sáha jeē jnahnú ndetū rī nuú. ¹¹Chi jín jéē ndácu ley un jniñu, te ni nihín cuēchi modo cocuu jín rí, te ni stahú ruhū. Chi jín jéē ndácu ley jniñu, te cuēchi ni sáha jeē ní quenda jnūhun jeē jnahnú ndetū rī.

¹²Núu súcuan te íyó ndáa maá ley, te tācá jniñu ndácu chi íyó ndoo íyó ndáa váha. ¹³Núu súcuan te ley jeē iyó váha ún, ¿a suu sáha jeē jnahnú ndetū rī naún? Tú cuiti. Chi sa suhva máa cuēchi cúu jeē sáha jeē jnahnú ndetū rī, te súcuan stúu cuēchi ndese íyó máa. Chi jín jniñu váha jeē ndácu ley te ni natūu jniñu neé jéē cúu cuēchi.

¹⁴Chi jín yō jeē nuú maá Espíritu vēji ley. Te ruhū chi sa névāha rī iin modo neé máa rí jeē ni squivi ruhū jejniñu cāha rí nuú cuēchi. ¹⁵Chi tāca jéē sáha rī, tu jécūhun ni rī najehē cúu jeē sáha rī. Chi jniñu váha jeē cuní rī sáha rī, tu ndé níhín rī fuerza sáha rī, chi sa suhva sáha rī jniñu neé jéē tu cúvāha ni rī sáha

ri. ¹⁶Te náa sáha ri jniñu néé jéé tu cúní rí sáha ri, núu súcuan te nácuni rí jeé iyó ndáa ley. ¹⁷Núu súcuan te nasūu rúhū cúu jeé sáha jniñu néé un, chi modo neé jéé ñúhun ini anuá rí cúu jeé sáha cuéchi. ¹⁸Chi jíni rí jeé modo maá rí jeé névāha ri ini anuá rí, tú cuiti na vé jeé váha íyó. Chi cúní rí sáha ri jniñu váha, te tu ndé níhín rí fuerza sáha ri. ¹⁹Chi jniñu váha jeé cuní rí sáha ri, tu sáha ri. Te jniñu néé jéé tu cúní rí, sa yūcuan sáha ri. ²⁰Te náa sáha ri jniñu jeé tu cúní rí sáha ri, te nasūu rúhū cúu jeé sáha, chi modo neé jéé ñúhun ini anuá rí cúu jeé sáha.

²¹Núu súcuan te ni jini rí jeé súcuan cúu jíni rí: Vēsú cuní rí sáha ri jniñu váha, te sa máni modo neé cúu jeé ñúhun ini anuá rí. ²²Chi cúsíi ni rí jíni ley Yaā Dios nde jíni ini anuá rí. ²³Te ni nacuni rí jeé iyó inga modo neé máá rí jeé jési nuū jeé cuní rí sáha ri jeé váha. Te cúu ri nájnūhun preso nuū cuéchi jeé jícú jíni rí.

²⁴Nacā jeé ndahú gá cúu ri núu súcuan. ¿Ndé ñin jnama ruhū nuū modo neé máá rí jeé jícú jíni rí jeé jnahnú ndetū rí? ²⁵Na cútahū ndasí rí nuū Yaā Dios, chi máá yá cúu jeé jnama ruhū nuū modo neé rí siquī jeé ni jíhi Jitoho rí Jesucristo jehē rí. Núu súcuan te vēsú cuní yō squícu yó ley Yaā Dios, te jeé jíni fuerza maá yó ma cúu, chi modo neé máá yó sáha jeé jejniñu cāha yó nuū cuéchi.

**Siquī jeé jícú yó jíni modo
cuní Espíritu Yaā Dios**

8

Núu súcuan te ma ndénehen Yaā Dios cuéchi siquī ñayuu

cáyihí ndaha Cristo. Chi tuá cájica i jíni modo neé máá i, chi sa suhva cájica i nájnūhun cúní maá Espíritu yā. ²Chi modo jeé sáha Espíritu cúu jeé técu yō siquī jeé yíhi yó ndaha Cristo Jesús. Te yūcuan ní sáha jeé ní nduu libre yō nuū jnūhun jeé ni yíhi yó chíji cuéchi jeé jnahnú ndetū yō nuú. ³Chi ni sáha Yaā Dios jeé quéndō vāha ñayuu jeé tu ní cúu quendō vāha jíni ley Moisés, siquī jeé tú na fuerza i jíni modo maá i jeé squícu i ley un. Chi ni tají yá Sēhe ya ni quiji, te ni nduu ya nájnūhun ñayuu cáhiyo cuéchi, návāha socō yā maá yá siquī cuéchi, vēsú tú na cuéchi ya. Te súcuan ni ndonda Yaā Dios siquī cuéchi jeé ní casáha ñayuu jíni modo neé máá i. ⁴Súcuan ni cuu návāha cuu squícu yó táca jniñu ndaā jeé ndácu ley, chi tuá jícú yó jíni modo neé máá yó, chi jícú yó nájnūhun cúní maá Espíritu.

⁵Chi ñayuu jeé cájica jíni modo neé máá, chi máni ndíhví ni i siquī jeé cuní maá i. Te ñayuu jeé cájica nájnūhun cúní Espíritu, chi máni ndíhví ni i siquī jniñu cúní maá Espíritu. ⁶Te jeé ndíhví ni yō siquī modo cuní maá yó sáha jeé jnahnú ndetū yō. Te jeé ndíhví ni yō siquī jniñu cúní maá Espíritu, sa suhva sáha jeé cotecu yō níí cáni te coo ndeyí coo síi ni yō. ⁷Chi ñayuu jeé ndíhví ni siquī modo neé cúní maá i, chi jító uhū i Yaā Dios, chi tu cúní i cuatáhú i ley Yaā Dios, te ni ma cúu squícu i. ⁸Jeé yúcuan, ñayuu jícú jíni modo cuní maá, tu cúu sáha i jeé cúsíi ni Yaā Dios jíni i.

⁹Te máá ró jijnáhan ró, chi tuá cájica ró jíni modo cuní maá ró, chi

cájica ró nájñuhun cúní Espíritu, chi ndéé Espíritu Yaā Dios ini anuá rō. Te ñayuu jeē tu ndéé Espíritu Cristo ini i, tu cáyihí i ndaha ya. ¹⁰Te núu ndéé Cristo ini rō, te vēsú ñin quiví te cuu yiquí cúñu rō jeē siquí cuēchi, te cotecu anuá rō siquí jeē ní ndahva Yaā Dios cuēchi ró. ¹¹Te núu ini rō jijnáhan ró ndéé Espíritu maá Yaā jeē ní nastécu Cristo Jesús mēññu ndíyí, yūcuán na te máá yá suni sáha ya jeē natecu yiquí cúñu rō jeē cúū. Te sáha ya súcuan jeē jíin máá Espíritu yá jeē ndeé ini rō.

¹²Núu súcuan, hermano jijnáhan ró, ndéé jníñu yó jéé caca ndaā yō, te nasūu jéé sáha yó modo neé cúní maá yó. ¹³Chi núu caca ró jíin modo neé máá ró, te jnahnū ndetū rō. Te núu jíin fuerza maá Espíritu snáā rō tācá jniñu cásáha ró jíin modo neé máá ró, te cotecu rō ñí cání.

¹⁴Chi tāca ñáyuu jeē cándiquin modo jeē steén Espíritu Yaā Dios, máá i cácuu sēhe Yaā Dios. ¹⁵Chi Espíritu jeē ní canihin rō, tu ní sáha ya rohó jéé cuu ró nájñuhun mozo nuū yā jeē yūhú tucu ró núū yā, chi sa ni sáha ya jeē cúu yó sēhe ya. Te jeē yúcuan cúu jeē cahán jee yó: Tátá maá ná. ¹⁶Te máá Espíritu steén yā ini anuá yō jeē cúu ndije yó sēhe Yaā Dios. ¹⁷Te núu sēhe ya cácuu yó, te suni nihin yō maá táhū jeē ni jéjñuhun ya, te ñin cáhnu-ni coo tahū yō jíin Cristo. Chi núu ndóho yó jíin yá vijna, suni kujéñnu yó jíin yá andiví.

¹⁸Núu súcuan te sáha ri cuenta jeē tāca jnúndóho jeē ndóho yó vijna, lúlí ndasí cúu nuū jnúhun

jeē kujéñnu luu yó jíin yá cucuéé gá. ¹⁹Chi ndíhi jeē ni jécōo, yōhyo cándetu jeē na sáha Yaā Dios jeē nduvāha, quiví quenda ndijin jeē kujéñnu sēhe Yaā Dios jijnáhan i. ²⁰Chi tāca jéé ni jécōo, chi ni quiví chíji jñuhun jeē tu quéndōo vāha. Te nasūu jéé ní castívi máá, chi ñayuu ni casáha cuēchi, te jeē yúcuan ní squéndōo Yaā Dios súcuan. Te máni cándetu jeē ndúvāha. ²¹Chi ñin quiví te tāca jéé ni jécōo, chi quenda chíji jñuhun jeē tívi jíin jéé tehyú. Te nduluu ndasí nájñuhun coo tāca sēhe Yaā Dios, chi cācu nuū jnúhun jeē tu quéndōo vāha. ²²Chi jíin yō jeē tāca jéé ni jécōo, chi nde vijna te nájñuhun ñnuú-ni cándoho te cájitū ni jeē na ndúvāha ndíhi. ²³Te nasūu máá-ni tāca jéé ni jécōo cúu jeē ndóho, chi suni nde maá yó ndóho yó, vēsú je névāha yó Espíritu jeē cúu seña jeē ñin quiví te nihin yō ndíhi tahū yō. Chi yōhyo ndóho yó jnúndóho, te ndétu yó jéé náquihin sēhe ya yohó te jnama ya yiquí cúñu yō jeē tuá ndoho yó jíin. ²⁴Chi ni jnama ya yohó siquí jeē ñuhun ni yō jeē súcuan coo. Te núu je ni sáha ya nájñuhun ñuhun ni yō, yūcuán na te tuá ñuhun ni yō jeē sáha ya súcuan jíin yó. Chi tuá ndétu yó te núu je ni cuu súcuan. ²⁵Te núu ná tu coto yó jéé sáha ya jeē ñuhun ni yō, yūcuán na te jíin paciencia ndétu yó jéé sáha ya.

²⁶Te suni súcuan máá Espíritu chíndéé ñáhán yá yohó jéé tú na fuerza ini yō. Chi tu jíin yō cacán tahú yō nájñuhun cánuú. Te máá Espíritu cahán ndahú yá jíin Yaā Dios jehē yō siquí tāca jéé jítu ndasí

ni yō te tu níhín yō jnūhun ndese cacān tahú yō. ²⁷Te máá Yaā Dios jeē jító ndee anuá yō, chí jíní yā tāca jéē cuní maá Espíritu cahān yā jehē yō. Chí ñayuu cáyihí ndaha Yaā Dios, cáhán ndahú Espíritu jehē i nájñuhun cúní Yaā Dios.

Vāha-ni cūndeyí yó síquī ndihí jeneé

²⁸Te jíní yō jeē tācā-ni jeē quíji nuū ñayuu maní jíin Yaā Dios, jeē váha chí jéē uhú, chí quéndōo váha ga i nuū yā, sáha ya jíin táca jéē yúcuān. Chí cácuu i ñayuu jeē ní cana ya i ni quívicoo i ndaha ya síquī jeē súcuān ni tee ni yā nde jenahán. ²⁹Chí nde ná tu coo i te je jíiní yā i, te je ni jeni ya i jeē ndoo ndaā nduu ánuá i ndacu i máá Séhe ya, návāha na cúu Séhe ya ñani jéhnū nuū cuehē ñayuu cácuu ñani cácuān. ³⁰Te jeē ní jeni ya i, te suni ni cana ya i. Te jeē ní cana ya i, te suni ni ndahva yā cuēchi i. Te jeē ní ndahva yā cuēchi i, te suni ni sáha ya jeē cujéhnū i.

³¹¿Te ndese ga cahān yō síquī jnūhun jéhnū yáha núu súcuān? Chí núu íne Yaā Dios jíin yó, ¿te ndé ñin cuu cahān síquī yō? Tú ni ñin. ³²Chí máá yá tu ní jnáma ya Séhe ya jeē ma cúu yā, chí sa suhva ni jēhe ya Séhe ya ni jihí yā jehē ndihí yó. Te núu súcuān ni jēhe ya Séhe ya, te nagā ni cuu jeē ma cuáha ya tāca gá jeē jíiní ñúhún yó. ³³¿Te ndé ñin cuu cahān cuēchi síquī ñayuu jeē ní nacāji Yaā Dios? Tú ni ñin. Chí máá yá ni ndahva yā cuēchi i. ³⁴¿Te ndé ñin cuu ndenehen cuēchi síquī yō núu súcuān? Tú ni ñin. Chí máá Cristo cúu jeē ní jihí yā jehē yō, te suni ni natecu yā. Te vijnā te ndéé

yá lado váha Yaā Dios nuū cujéhnū ya, te cáhán ndahú yá jíin Yaā Dios jehē yō. ³⁵¿Te ndé ñin cuu quenehen yóhó núu jnūhun cúndáhú ni Cristo yohó? ¿A jnúndóho, chí táca jéē yíí sáha, chí jéē cájito xeēn ñayuu yohó, chí jnámā, chí jéē cúmaní sahma, chí jnūhun yúhú, chí jéē cáhni i yóhó naún? Ni ñin tāca jéē yáha. ³⁶Chí súcuān yósó núu tútu ñi jeē cácahān ñayuu cácuān. Chí jíin Yaā Dios:

Jeē síquí maá ní te ndihí-ni hora cácuu i cahni i sāñá.

Te casáha i jíin ná nájñuhun casáha i jíin lanchi, quití cúu.

Achí tutu. ³⁷Te tuú chí vēsú cándoho yó táca jéē yáha, te vāha-ni cūndeyí yó síquī ndihí-ni, sáha máá Yaā jeē ní cúndáhú ni yohó. ³⁸Jeē yúcuān cúcáhnu ni rí jeē tú ni ñin cuu quenehen yóhó núu jnūhun cúndáhú ni Yaā Dios yohó. Ni núu cuu yō, ni núu cotecu yō, ni tācá ndajéhé andiví, ni tāca jéē neé jéē cácuajéhnū jnái poder, ni jeē iyó vijnā, ni jeē cóo, ³⁹ni jeē iyó núu súcún, ni jeē iyó núu cúnú, ni tāca gá jeē ní jecōo, ma cúu cuítí quenehen yóhó núu Yaā Dios, jeē jíin Jítóho yō Cristo Jesús ni cúndáhú ni yá yohó.

Síquī ndese ni nacāji ya yucūn Israel

9 Te cáhán ndaā rí chí cúu rí tēe cácuān. Chí Cristo, te tu stáhú rí, te jíin rí ini anuá rí jeē cahān ndaā rí sáha Espíritu Santo. ²Yóhyo cúcuíhyá ni rí, te níiní jnáhuhū ni anuá rí ³jeē síquí tāca jnāhan rí ñayuu naciún hebreo, chí ñin-ni yucūn rí jijnáhan rí. Chí jeē síquí máá i te cúu ni rí jeē núu na cúu te

cujiyo ri nuū Cristo te jnahnū ndetū rī, návāha jíin yúcuan te cuu cācu ánuá maá i núú. ⁴Chi cácuu i yucūn ñayuu Israel, te nde jenahán ni sáha Yaā Dios jeē cúu i sēhe ya, te mēhñu vícō jeē ndíndēé ní condee yā jíin i sáá. Te jíin máá i ni sáha ya tācá contrato, te ni jēhe ya ley yā nuū Moisés jeē cúu máá i, te ni steén yā ndese chiñúhún i ya ini templo, te nuū maá i ni jejnūhun ya cuehē jnūhun. ⁵Te máá i cácuu yucūn tāca jíí yō jeē ní cacujéhnu, te suni yucūn maá i ni cacu Cristo jeē ní nduu ya tēe. Te máá yá cúu Yaā Dios jeē jnāi ndihi-ni, te níí cáni cahān ñayuu jeē cujéhnu ya. Amén.

⁶Te nasūu jéé tu ní queé ndaā tāca jnūhun jeē ni jéjnūhun Yaā Dios nuū ñayuu Israel. Chi ni quee ndaā nahín núú vēsú jecu-ni i, chi tú ndihi-ni yucūn Israel cúu jeē cácadíje. ⁷Chi nasūú ndihi yucūn Abraham cácuu ndije sēhe de jeē ni jéjnūhun ya. Chi ni cahān Yaā Dios jíin de: Nuū maá-ni sēhe ró Isaac cúu nuū coo yucūn rō jeē ni jéjnūhun ri nuū rō. ⁸Te jnūhun yáha cúní cahān jeē ni iin ñayuu tu cúu i sēhe Yaā Dios síquī jeē ní cacu i iin yucūn jeē jéni ni i jeē váha ga cúu. Chi sa suhva máni yucūn jeē ni jéjnūhun ya cúu ndije yucūn jeē chíhi ya cuenta. ⁹Chi yāha cúu jnūhun jeē ni jéjnūhun ya nuū Abraham: Máá tiempo jeē ní jeni ri te quiji rī, te cacu iin sēhe yáí ñasihí ró Sara, achí yá.

¹⁰Te nasūu máá yáha-ni, chi suni Rebeca ni cacu uū sēhe yáí ña, te iin-ni tátá ndíndúú i, jeē ní cuu jíí yō Isaac. ¹¹⁻¹³Te nde ná tu cacu ndíndúú i, te ná tu sáha i jeē váha

jeē uhú, te je ni cahān yā jíin Rebeca: Sūchi ní cacu xihna gā cuajniñu i nuū sūchi sándñíhí, achí yá. Chi suni súcuan cáhán tutu i: Ni jito manī rī Jacob, te Esaú chi tuú, achí Yaā Dios. Te súcuan jíin yō jeē maá Yaā Dios cuu nacāji ya ñayuu núu ndese tēe ni maá yá, te nasūu síquī jniñu jeē sáha i, chi sa suhva síquī ndese cúní maá yá nacāji ya i.

¹⁴¿Ndese cahān yō núu súcuan? ¿A jéé tu íyó ndaā Yaā Dios jeē sáha ya súcuan, chí naún? Tú cuiti. ¹⁵Chi nde jenahán ní cahān yā jíin Moisés: Ndé-ni cúu jeē cuní rī cundáhú ni rī, te cundáhú ni rī. Te ndé-ni cúu jeē cuní rī sáha ri jeē váha jíin, te sáha ri jíin, achí yá. ¹⁶Núu súcuan te nasūu síquī jeē cuní maá ñayuu, ni nasūu jéé nducú ndéyí máá i cúu, chi síquī ndese cúní maá yá cundáhú ni yā i. ¹⁷Chi suni súcuan yósó núú tútu i jeē ni cahān yā jíin rey ñuu Egipto: Ni jeni ri rohó jéé cúu ró rey, návāha jíin rōhó te stéén rī poder rī, te návāha cuitē núu síhví rí níí ñáyiví, achí yá. ¹⁸Núu súcuan te núu ndé iin cúní yā cundáhú ni yā, te cundáhú ni yā. Te núu ndé iin cúní yā jeē cunihni ni, te sáha ya jeē cunihni ni. ¹⁹Te sanaa te cahān iin ró jíin rí: Núu súcuan cúu ¿te najehē cahān gā yā jeē cuēchi sáha yó? Chi ma cúu casi yō nuū yā jeē ndese cúní maá yá sáha ya. Achi rō. ²⁰Te sa suhva cáhán rī jíin ró: Róhó, ¿ndé iin cúu ró jéé jéni ni rō stió cuñí rō nuū Yaā Dios? ¿A cuu cahān quísi ñuhun jíin tēe ni sáha: Najehē ni sáha ró rúhū súcuan? achi. ²¹Chi tēe sáha quísi, cuu sáha de ndese

cúní maá de, chi iin-ni ñuhun cuu sáha de iin quísi fino te inga quísi corriente.

²²¿Te á tu jétáhú ró jeē suni súcuan sáha Yaā Dios jíin ñáyuu? Chi cúní yā steén yā ndese sáha ya juicio siquī ñáyuu, te súcuan te cuni i poder yā. Te vēsú súcuan te ni iyo paciencia ni yā jeē tu ní ndóna yachī yā siquī ñáyuu jeē jnahnú ndetū. ²³Te sáha ya súcuan nāvaha stéén yā ndese yōhyo luu cújéhnu ya siquī jniñu sáha ya jíin yóhó ñáyuu cúndáhú ni yā. Chi nde jenahán je ni sátühva ya yohó jēē luu cújéhnu yó jíin yá. ²⁴Chi ni cana ya yohó jēē candíje yó, te sava yó cúu ñayuu hebreo te sava yó cúu ñayuu tāca gá nación. ²⁵Chi suni súcuan ni cahān yā, yósó núu tútu Oseas:

Ñayuu jeē tu ní cúu ñayuu maá rí, vijna te cahān rī jeē cácuu i ñayuu maá rí.

Te ñayuu jeē tu ní íyo manī rī jíin, vijna te cahān rī jeē cácuu i ñayuu jeē manī rī jíin.

²⁶Te máa lugar nuū ni cáhān rī jeē násū ñáyuu rī cácuu i, suu yūcuan cáhān ñayuu jeē cácuu i sēhe Yaā Dios, Yaā técu níí cáni.

Achí yá. ²⁷Te Isaías sa suhva ni cahān de jñuhun ñayuu Israel: Vēsú ni cayā yucūn Israel nájñuhun ñīí yumar, te jecu-ni i jnama ya. ²⁸Chi Jitoho yō Yaā Dios, yachī sínu ya jniñu jeē sándaā yā cuēchi ñayuu ñayīví. Achí tutu. ²⁹Chi nájñuhun ni cahān tucu Isaías:

Máa Yāā cúu Jitoho nuū tāca ndajéhé andíví, núu tu ní jnáma ya jecu yucūn yō nuú,

te je ni ndoho yó nájñuhun ñayuu ñuu Sodoma jíin ñuu Gomorra, jeē ní naa ndihi.

Achí tutu.

Jeē tu cájetáhú ñayuu hebreo jñuhun jnama ya i

³⁰¿Ndeese cahān yō núu súcuan? Suu jeē ñáyuu tāca gá nación, vēsú tu ní cánducú i quendō ndaā i nuū Yaā Dios, te ni ndahva yā cuēchi i. Chi siquī jeē ní candíje i jeē ni jíhī Cristo jehē i cúu jeē ní ndahva yā cuēchi i. ³¹Te sa suhva ñayuu Israel, vēsú cánducú i quendō ndaā i nuū Yaā Dios sáha ley yā, te tu cúndeyí i quendō ndaā i. ³²¿Te najehē? Siquī jeē tu cánducú i jeē ndahva yā cuēchi i jeē candíje i jeē ni jíhī Cristo jehē i, chi sa jéni ni i jeē squícu máa i ley te quendō ndaā i. Te jeē stívi i súcuan cúu nájñuhun cácotúú i siquī maá yúū jeē cácachihí jehē, te suu cúu Cristo.

³³Chi súcuan cáhān nuū tútu ii:

Nde ñuu rī Sion sáha rī jeē cóne maá Yaā jeē cúu nájñuhun yuū jeē cácachihí i jehē i.

Te cúu ya nájñuhun toto jeē cotúú i sáha.

Te sa suhva ñayuu cáccandíje Yāā ún, chi jnama nahín yá i.

Achí Yāā Dios.

10 Hermano jijnáhan ró, cúu ndasí ni rī te jíicán tahu rī nuū Yaā Dios jehē ñayuu nación rī Israel, jeē na jnáma ya i jíjnáhan i. ²Chi cáhān rī jeē vāha cásáha i jeē ndíhví ni i cáchiñúhún i Yāā Dios. Te vēsú súcuan te cáchiñúhún cáhá i. ³Chi tu cájēcūhun ni i ndese ndáhva Yaā Dios cuēchi ñayuu, te ndúcú i quendō ndaā i máa-ni jeē

squícu i ley. Te tu cájetáhú i máá modo jeē ndáhva Yaā Dios cuēchi i. ⁴Chi siquī jeē ni sáha Cristo te cuu quenda ñayuu chíji ley Moisés. Te ndáhva Yaā Dios cuēchi táca ñáyuu jeē candíje i jeē ni sáha Cristo jehē i.

⁵Chi súcuan ni tee Moisés jñūhun ñayuu jeē cánducú quendōo ndaā jíin ley: Núu ñin ñayuu cuu squícu i táca jniñu ndácu ley, te cotecu i núu, áchí. ⁶Te jñūhun jeē ndáhva Yaā Dios cuēchi ñayuu siquī jeē candíje i jeē sáha ya jehē i, chi sa suhva cáhán: Ma cáni ni rō jeē jíni ñūhún caa ró andiví nasnúu ró Cristo jeē ndahva yā cuēchi ró. ⁷Ni ma cáni ni rō jeē jíni ñūhún cuun ró ndé nuū cūnú ndonehen ró Cristo mēhñu ndíyí, nájnūhun jeē tu ní nátecu yā. ⁸¿Te ndese cáhán jñūhun un núu súcuan? Yajni íyó jñūhun ya jíin ró, chi ñūhun ini yuhu ró jíin ini anuá rō, achí tutu. Te suu cúu jñūhun jeē na cándíje yó jéē jnáma ya yohó. Te jñūhun yáha cúu jeē cánacani ri. ⁹Chi núu cahán rō jeē Jítoho rō cúu Jesús, te núu candíje ró jíin ini jíin ánuá rō jeē ní natecu yā mēhñu ndíyí ni sáha Yaā Dios, yūcuán na te jnama ya rohó. ¹⁰Chi jíin ini jíin ánuá yō cándíje yó jéē ni jíhí yā jehē yō, te súcuan te ndáhva Yaā Dios cuēchi yó. Te jeē cahán yō jeē Jítoho yō cúu Jesucristo, te súcuan te jnama ya yohó.

¹¹Chi cáhán tutu i: Táca ñáyuu jeē candíje i ya, chi jnama nahín yá i, áchí. ¹²Chi inuú-ni cúu ñayuu hebreo jíin táca gá ñayuu, chi máá yá cúu Jítoho nuū ndíhi yó, te cuehē jeē váha sáha ya jíin ñáyuu cácahán ndahú jíin yá. ¹³Chi

súcuan cáhán jñūhun ya: Ndíhi ñayuu cácahán ndahú jíin máá Jítoho yō, chi jnama ya i, áchí.

¹⁴¿Te ndese cahán ndahú i jíin yá te núu tu ní cándíje i jeē jnama ya i? ¿Te ndese candíje i te núu tu ní jíni sōho i jñūhun ya? ¿Te ndese cuni sōho i te núu tú na ñayuu nacani jñūhun nuū i? ¹⁵¿Te ndese nacani ñayuu jñūhun ya te núu jeē tu tájí yá i quihín i? Chi nájnūhun cáhán tutu i: Yōhýo luu jniñu cásáha ñayuu cájica jíin jñūhun ndeyí sñi ni jeē cánacani i jñūhun vāha ya, achí.

¹⁶Te nasúu ndíhi i jétáhú nuū jñūhun jnama ya i. Chi ni cahán Isaías nde jenahán: Tátá Yaā Dios, ¿ndé ñáyuu ni candíje jñūhun jeē cánacani ná víi? áchí de. ¹⁷Núu súcuan te núu cuni nahín ñayuu te cuu candíje i. Te jñūhun cuni nahín i cúu jñūhun Cristo.

¹⁸Te cájnūhun rí: ¿A tu ní cájini sōho i jñūhun un núu súcuan? Tuú chi ni cajini sōho i, chi cáhán tutu i:

Níí ñáyívi ní cajini sōho ñayuu jñūhun jeē ní canacani de.

Te nde nuū jicá gá táca lado ni jinū jñūhun ún.

Achí tutu. ¹⁹Te suni cájnūhun rí: ¿A tu ní cájecūhun ni ñayuu Israel jñūhun ún? Tuú chi ni cajecūhun ni i, te tu ní cájetáhú i. Chi xihna gā Moisés ni cachi de jeē ni cáhán Yaā Dios:

Cucuñí ró jijnáhan ró, chi cuāha ri jñūhun ri nuū inga ñayuu jeē násúu ñin nación cúu.

Te quití ni rō coto ró jéē cuāha ri jñūhun ri nuū ñin nación jeē tu jécūhun ni.

²⁰Te suni Isaías ni chundeyí ni de ni cachi cājí de jeē ni cáhān Yaā Dios:

Ñayuu jeē tu ní cánanducú rúhū, ni cajini i ruhū.

Te nuū ñayuu jeē tu ní cácajnūhún, ni steén rī nuū i ndese Yaā cúu rī.

²¹Te siquī ñayuu Israel sa ni cahān de jeē ni cáhān yā: Ndiquivī ni canari i jeē quívicoo i nuū rī, te tu ní cácu ni i, chi ñayuu niñni ni, ñayuu jéē ni cácuu i. Achí yá, achí Isaías.

Jeē iyó jecu na ñayuu

Israel jeē jnáma ya

11 Núu súcuan te cájnūhun rí: ¿A ní stóo Yaā Dios ñayuu maá yá Israel, chí naún? Tú cuíti. Chi ruhū suni tēe Israel cúu rī, te yucūn Abraham cúu rī, te Benjamín cúu jí rī jenhán. ²Tu ní stóo Yaā Dios ñayuu maá yá, chi je ni nacāji ya i nde jenhán. ¿A tu cájini rō ndese cáhán tutu ii jñūhun Elías, tēe ni nacani jñūhun ya jenhán? Chi náa jícán tahu de, te ni cahān de siquī ñayuu Israel: ³Tátā Yaā Dios, ni cajehni i tāca tēe cánacani jñūhun ní, te ni cajenu i tācá altar ní. Te máñuhún na sāña ní quendōo, te vijna suni cácu ni i cahni i sāña, áchí de. ⁴Te Yaā Dios ni nastío cuíñí yā: Iyó nahín úxā mil ñayuu cácañdije ruhū jeē tu ní cájecuñí yití i nuū ídolo naní Baal, achí yá. ⁵Te suni súcuan vijna, chí iyó jecu na ñayuu jeē ní nacāji ya siquī jeē váha ni yā jíni i. ⁶Te núu ni nacāji ya i siquī jeē váha ni yā jíni i, te nasūu síquī jeē ni sáha i jniñu váha cúu. Chi núu siquī jeē ni sáha i

jniñu váha cúu, yūcuán na te nasūu síquī jeē váha ni yā cúu.

⁷¿Te ndese cúu núu súcuan?

Cúu jeē ñayuu Israel tu ní cundeyí i quendōo ndaā i nájnūhun ni canducú i. Te sava i jeē ní nacāji ya, chí máá i ni ndahva yā cuēchi i. Te sava ga i ni ndunihni ni i,

⁸nájnūhun cáhán tutu ii: Ni sáha Yaā Dios jeē tu jécūhun cuíti ni i siquī yā, ni tu jíni i jíni tñūu i, ni tu jíni nahín i jñūhun ya, te súcuan cúu nde vijna. Achí tutu. ⁹Te suni ni cahān David:

Vico jeē casáha i, na cóo

nájñūhun iin trampa chí iin

xeyū,

návāha nihin i castigo xeēn siquī

jeē castívi i casáha i cuēchi.

¹⁰Te ánuá i na ndúnee, nájnūhun

jeē tuá cúu coto i,

te na jécostíhí jñūndóho siquī i

ní cáni.

Achí tutu.

Siquī jeē jnáma ya ñayuu

tāca gá nación

¹¹Núu súcuan te cájnūhun rí: ¿A tuá cúu cuíti ndívi ñayuu Israel nuū Yaā Dios jeē súcuan ni castívi i? Tú cuíti. Chi sa suhva jeē ní cacuniñni ni i, te sa ñayuu tāca gá nación ni canihin tahu máá i jñūhun jeē jnáma ya i. Te yūcuán sáha tucu jeē ñayuu Israel condíhvī ni i jeē suni candíje máá i. ¹²Chi jeē ní castívi i, te sa ñayuu ní cáhnu ñayívi ní canihin maá i jñūhun ya. Te jeē ní cajica yátá i, suu ni sáha jeē ní canihin ñayuu tācá nación jñūhun ya. Núu súcuan te quívī jeē ndívicoo tucu ndíhi ñayuu Israel

ndaha ya, te ñayuu ñayīvi vīhyá gā quendōo ndetū i sáha ún.

¹³Te vijna te cáhán ri jíin róhó ñáyuu tǎcá nación jeē tu ní jíiní jnūhun ya. Chi ni tají Yaā Dios ruhū jeē scáca ri jnūhun nuū rohó ñáyuu tǎcá nación. Te ndúcú rí jeē na cuájnúhún ró jijnáhan ró jniñu sáha ri jeē nácani ri jnūhun ya. ¹⁴Chi cúní ri jeē jíin yúcuan te nacani ni sava jnáhan ri ñayuu Israel jeē suni candíje máá i, te jnama ya i. ¹⁵Chi jeē ni stóo ya ñayuu Israel, jeē yúcuan cúu jeē sa ñayuu ñayīvi ní sáha ya jeē ndívicoo i nuū jnúhun maní yā jíin i. Núu súcuan te quivī naquihín tucu ya ñayuu Israel, quivī ún suni vāha ndasí sáha ya jíin ñáyuu níi cáhnu ñayīví. Chi coo nájñūhun jeē natecu i jeē cúu i nájñūhun ndīyí. ¹⁶Te ñayuu Israel cásocō i nuū Yaā Dios pan jeē quénda xihna gā nuū ñujen, te súcuan stéén i jeē ndīhi un cúu cuenta yā. Te ñin yujnu, núu yñhi jeē cuenta yā cúu, te suu cúu nde yoho jíin ndé ndīhi ndaha. Te suni súcuan ñayuu Israel, yñhi cuenta i nuū yā, siquī jeē jíí i xihna ñúhún, ni quívicoo de ndaha ya.

¹⁷Chi ñayuu Israel cácuu i nájñūhun ndayújnu olivo váha, te sava ndaha un ní quendē. Te róhó ñáyuu tǎcá nación jeē tu jíiní jnūhun ya, cácuu ró nájñūhun ndayújnu olivo yucú, te ni nachuhun ya rohó núu ni quéndē ñayuu cácuu ndayújnu váha ún. Te nájñūhun inuú-ni cástáa ró ndúxi jíin cajin jeē véji nde yoho yújnu ún. ¹⁸Núu súcuan te ma sáha téyí ró maá ró nuū ñáyuu Israel jeē cácuu nájñūhun ndayújnu jeē ni quéndē.

Ma cutéyí ró, chi nucūhun ni rō jeē násūú jéē yoho stáa cajin nuū maá ró, chi sa máá ró stáa cajin jeē véji nde yoho.

¹⁹Te sanaa te cahān rō: Tú chi sava ndaha ni quendē návaha nachuhun ya ruhū nuū ni quéndē ún, achi rō. ²⁰Ndaā, te ni quendē i siquī jeē tu ní cácandíje i Cristo. Te róhó chi máni siquī jeē cácandíje ró, jeē yúcuan cúu jeē ni quívicoo ró lugar i. Te ma sándúxí ró maá ró núu súcuan, chi sa suhva conso iyo ró núu Yaā Dios. ²¹Chi tu ní íne cáhnu ni yā nuū maá ndaha jeē chíjñiñu, te suni súcuan ma cóne cáhnu ni yā nuū rō jijnáhan ró te núu stíví ró. ²²Núu súcuan te sáha vāha ro cuenta ndese vāha ni Yaā Dios jíin ndese xeēn ni yā. Chi ni nduxeēn ni yā jíin ñáyuu hebreo jeē ní castíví ún, te sa cúndáhú ni yā rohó. Te cánuu cuiñi ñihin ro jíin jnúhun jeē váha ni yā jíin ró. Chi núu tuú, te suni quende yā rohó. ²³Te máá i, núu candíje tucu i, te nucōndee tucu i, chi máá Yaā Dios cuu nachuhun tucu ya i. ²⁴Núu súcuan te róhó ñáyuu tǎcá nación jeē tu ní jíiní jnūhun ya, ni quendē rō xiní yújnu olivo yucú, te ni nachuhun ya rohó xiní yujnu olivo váha, vēsú nasūú ndaha máá yujnu un cácuu ró. Te nagā ni cuu ñayuu hebreo jeē ma náchuhun ya i nuū ni quéndē i, chi cácuu i máá ndayújnu váha ún.

**Íin quivī te jnama ya ndīhi
ñayuu nación Israel**

²⁵Hermano, cúní ri jeē na jécūhun ni rō jijnáhan ró ndese íyó jnúhun yáha jéē ní yisāhí, návaha

ma cutéyí ró cani ni rō jeē ndichí xíní maá ró: Chi sava ñayuu Israel ni ndunihni ni i, te súcuan coo maá-ni nde quiví jínu candíje ñayuu táca nación jeē tu jíní jnūhun ya.

²⁶Te saá te jnama ya ndíhi ñayuu nación Israel, chi cáhán tutu ii:

Ichi ñuu rí Sión quiji Yaā jnáma ñayuu,

te sáha ya jeē tuá coo cuēchi nuū tāca yúcūn Jacob.

²⁷Te yāha cúu contrato jeē sándaā rí jíin i,

quiví jeē quénde ri cuēchi i jíjnáhan i, áchí Yaā Dios.

Achí tutu.

²⁸Chi ñayuu hebreo un ní nduu i nájnūhun enemigo Yaā Dios siquí jeē tu ní cácandíje i jnūhun jnáma ya i. Te jeē yúcuan te cuu cuitē núu jnūhun un núu tāca rōhó. Te vésú súcuan te siquí jeē ní nacāji ya tāca jíí i jenahán, te cúndáhú gá ni yā i jeē ma stóo ya i ní cáni. ²⁹Chi tu nácani yátá ni yā jeē cána ya ñayuu jíin jéē jéhe ya tahū i. ³⁰Te rōhó jíjnáhan ró, suni ni cahíyo nihni ni rō nuū Yaā Dios nde saá. Te vijna jeē ní cacunihni ni maá ñayuu hebreo, te cúndáhú ni yā rohó.

³¹Te suni súcuan maá i, chi vésú cacunihni ni i vijna, te cundáhú tucu ni yā i, nájnūhun cúndáhú ni yā maá ró jíjnáhan ró. ³²Chi Yaā Dios ni sáha ya jeē ní quendóo ndívií ñayuu chíji jnúhun cúnihni ni i, návaha suni cuu cundáhú ni yā ndívií i.

³³Núu súcuan te náhán náā ni yō jeē yóhoyo cuehē jnūhun ndíchí iyó jíin Yaā Dios, te ndíhi cuiti jíin yā. Te ni ma cúu cuiti castūhun yó ndese téé ni yā sáha ya tācá-ni, te

ma cánda cuiti yō jecūhun ni yō ndese cúu tāca jéē sáha maá yá.

³⁴Chi cáhán tutu ii: ¿Ndé iin ni jecūhun ni ndese jéni ni maá Jítoho yō? ¿Chí ndé iin ni steén nuū yā?

³⁵¿Ndé iin ni jéhe xihna gā nuū maá yá, návaha nachunaa yā nuū i?

³⁶Chi nde nuū maá yá vēji tāca jéē iyó, te maá yá ni sáha ndíhi, te jeē cúu maá yá cúu. Te na cáhán yō jeē yóhoyo luu cújéhnu Yaā Dios ní cáni. Amén.

Jeē na cóo ndoo ánuá yō cuajníñu yó núu Yaā Dios

12 Núu súcuan te cáhán ndahú rí jíin ró jíjnáhan ró, hermano, jeē siquí jeē cúndáhú ni Yaā Dios yohó. Na sócō rō maá ró núu yā, coo ndoo coo ii rō cuajníñu ró núu yā, nájnūhun cúsií ni yā. Chi yāha cúu jeē chíñúhún ró yā nde jíin ini jíin ánuá rō. ²Te ma cáca ró jíin táca modo casáha ñayuu ñayívi yáha, chi sa na sáma ró modo cani ni rō, te ndujeé jéē níjnūnī rō. Te súcuan te cuu nacāji ró ndé-ni cúu jeē váha jeē níjnahan ni Yaā Dios, jeē cúsií ni yā, jíin jéē íje ni rō jíin jnúhun ya.

³Te siquí jeē váha ni yā ni jéhe ya jníñu nácani ri jnūhun ya, jeē yúcuan cáhán rí jíin ndíhi ró jéé ma cáni ni rō jeē váha ga ñayuu cúu ró núu cūhva jeē iyó ró. Chi ná iin ná iin ró na cáni ndaā ni rō siquí maá ró, te ma scáa ga rō cani ni rō jeē váha ga ñayuu cúu ró vésú nuū cūhva jeē ni jéhe Yaā Dios fuerza ini rō cándíje ró. ⁴Chi cácuu yó nájnūhun iin yiqui cúñu jeē iyó cuéhē parte, te síin síin jéjníñu iin iin. ⁵Chi vésú iyó cuéhē yō, te

nájnūhun iin-ni yiqui cúñu cúu yó jéē yíhi yó ndaha Cristo, chi iin-ni ni nduu yó jíjnáhan yó.

⁶Te sín sín tahū ni jēhe Yaā Dios nuū yō jeē cuajníñu yó núu yā, núu ndese ni nujnahan ni yā ni jēhe ya nuū iin iin yó. Núu súcuan te na cuajníñu vāha yó jíín táhū ún. Núu ni nihīn yō tahū jeē nácani yó jnúhun ya, te cánuú sáha yó ndé maá cúhva ni jēhe ya cándíje yó. ⁷Te núu ni nihīn yō tahū jeē chindéé nāhán yó jnáhan yó, te na sáha yúcún yó. Te núu ni nihīn yō tahū jeē steén yō, te na cóndihvī ni yō steén yō. ⁸Te ñayuu jeē stihvī ni inga ñayuu, suni na sáha yúcún i. Te ñayuu jéhe nuū jnáhan, na cuáha i súcuan-ni. Te ñayuu ndíso jníñu, na ndácu vāha i jniñu. Te ñayuu jíto ndáhú ñayuu ndahú, na cúsiī ni i sáha i.

Ndese cánuú squícu ñayuu cácadíje

⁹Te na cúndáhú ndije ni rō jnáhan rō, nasūu máá jéē cahán-ni rō. Te coto uhū rō jniñu néé, te condiquīn rō jniñu váha. ¹⁰Te cánuú coo maní rō jíín jnáhan rō nájnūhun jéē maní rō jíín ñani rō. Te nducú rō jeē quéndōo yíñúhún gá jnáhan rō vēsú maá rō.

¹¹Te ma cucúxí rō jíín jniñu casáha rō. Chi jíín ini jíín ánuá rō condihvī ni rō cuajníñu rō núu maá Jítóho yō.

¹²Te na cúsiī ni rō jeē cáñuhun ni rō táca jéē váha jeē cóo. Te na cuándeyí ni rō núu ndóho rō jnúndóho. Te níni na cácan tahú rō.

¹³Te coto ndáhú rō ñayuu cácadíje núu cúmani nuū i. Te cuáha núu rō vehe nuū ñayuu cájica.

¹⁴Te cacān tahú rō jehē ñayuu cájito xeēn rohó. Ma cahán ndevāha ro síquī i, chi sa cacān tahú rō jehē i.

¹⁵Te núu cúsiī ni ñayuu, te suni na cúsiī ni rō jíín i. Te núu cúcuíhyá ni ñayuu, te suni na cúcuíhyá ni rō jíín i.

¹⁶Na cóo inuú ni rō jíín táca jnáhan rō. Te ma cundúxí rō, chi sa quijnáhan rō jíín ñayuu núu ga. Ma cáni ni rō jeē ndichí xíní rō.

¹⁷Te ma nasáha ndevāha rō jíín ni iin ñayuu, núu ni sáha ndevāha i jíín rō. Na cóndihvī ni rō sáha rō jniñu váha, jíto jínúū tāca ñayuu.

¹⁸Te na cóndihvī ni rō coyūcu maní rō jíín táca ñayuu, vēsú ndese cándāa máá i. ¹⁹Ñáni maní jijnáhan rō, ma nácuāha rō jéē ndútahū ñayuu casáha ndevāha jíín rō, chi sa cuāha rō jnúhun jeē maá Yaā Dios cuāha ya castigo i. Chi cáhán tutu ii: Máá rí cuāha castigo i, máá rí nacuāha yāhu i, áchí Jítóho yō.

²⁰Te suni cáhán tutu: Tēe jíto uhū rohó, núu jí de sōco, te cuāha rō jéē cáji de. Te núu jíchí de, te cuāha rō jéē cóho de. Chi núu sáha rō súcuan, te cucanu de te nacani uhū ni de jeē ni jíto uhū de rōhó. ²¹Ma cuáha rō jnúhun jeē cúndeyí jniñu néé jíín rō, chi sa jniñu váha na sáha rō návāha ndahvā jniñu néé.

13 Tāca ñayuu na cuátáhú i nuū tohō cándiso jniñu ñuu. Chi ma cóo tēe cándiso jniñu te núu tu ní sáha máá Yaā Dios. Te tēe cándiso jniñu chi Yaā Dios ni tee jniñu síquī de. ²Te ñayuu jeē tu jétáhú núu tēe cándiso jniñu, núu súcuan te cúniñi ni i nuū jeē ní jeni Yaā Dios. Te ñayuu jeē cúniñi

ni, chi cuēchi sáha i, te nihīn i castigo. ³Chi tāca tée ndíso jniñu, nasūu jeē ndíso jniñu de jeē yūhú ñáyuu casáha jniñu váha, chi sa jeē yūhú ñáyuu casáha jniñu néé. Te núu cúní rō jeē ma cúxeēn tēe cándiso jniñu nuū rō, na sáha ró jniñu váha núu súcuan. Yūcuán na te cuajnúhún de rōhó. ⁴Chi jéjniñu Yaā Dios de jíjnáhan de, návāha coyūcu váha ró jíjnáhan ró. Te núu sáha ró jniñu néé, te sa yūhu ró, chi nasūu cáha-ni cúu jeē cándiso jniñu de stóho de ñayuu. Chi jéjniñu Yaā Dios de, návāha cuāha de castigo ñayuu casáha jniñu néé. ⁵Jeē yúcuan cánuú jeē cuatáhú ró núu tēe cándiso jniñu, te nasūu máni jeē ma níhín rō castigo, chi suni jeē tú na cuēchi coo ánuá rō. ⁶Te jeē yúcuan cúu jeē suni cájēhe ró xúhun núu tēe cándiso jniñu cuu jniñu ñuu. Chi jéjniñu Yaā Dios de, te máni jniñu yúcuan casáha de.

⁷Te chunaa rō ndihí jeē cátaū rō nuū tāca ñáyuu. Cuāha ró xúhun ñuu nuū tēe stútú xúhun ñuu, te cuāha ró xúhun renta nuū tēe stútú renta. Te na cóo respeto rō nuū ñáyuu cánuú coo respeto rō. Te na cóo yáñúhún ró nuū ñáyuu cánuú coo yáñúhún ró. ⁸Ma cótaū rō nuū ní iin. Te íyó iin jeē taú rō jeē ma tahndé cuiti, suu jeē ni cáhān Yaā Dios jeē cundáhú ni rō jnáhan ró. Chi ñayuu cundáhú ni jnáhan, je ni squícu i ndihí jeē ndácu ley yā. ⁹Chi súcuan ndácu ley jniñu: Ma cosíquí ndéē rō jnáhan ró, ma cáhni rō ndíyi, ma sacuíhna ró, ma sajnúhún ró, ma ndíyo ni rō jeē névāha jnáhan ró. Te tāca jnúhun yáha jífn táca gá jniñu ndácu ley,

ndihí-ni yíhi chiji jnúhun yáha: Cundáhú ni rō jnáhan ró nájnūhun cundáhú ni rō maá ró, áchí tutu.

¹⁰Te núu cundáhú ni yō jnáhan yó, te tu sáha yó ni iin jeē tu íyó váha nuū i. Núu súcuan te jeē cundáhú ni yō jnáhan yó, yúcuan cúu jeē squícu yó ní ley yā.

¹¹Súcuan sáha ró jíjnáhan ró, chi sáha ró cuenta jeē cuácuyajni quivī ndíji ya. Te ma cóo ga rō nájnūhun ñayuu quixí, jeē cúhuun ni rō. Chi vijna je ni cuyajni ga quivī jnáma ya yohó vésú quivī ní candíje yó jnúhun ya. ¹²Chi nájnūhun je yajni yáha jecuáā, te cuacundijin quivī jnáma ya yohó. Núu súcuan te na stóo yó jniñu jeē ni sáha yó núu néé, te na cúcutú yó jífn táca jniñu ndaā jeē caca yó jífn luz yā. ¹³Na cáca yáñúhún yó nájnūhun cánuú caca yó jífn luz yā. Ma nájni ró, ma sáha ró táca vico néé, ma cáca jnéni ró, ma sáha ró jniñu néé, ma cuajnáhan ró, ma cucuésún ni rō. ¹⁴Chi sa suhva cuiñi cutú ró jífn fuerza maá Jítoho yō Jesucristo, jeē ma cuáha ga rō jnúhun sáha ró jniñu cúní modo neé máá ró.

Ma cahán neé yó coto yó jnáhan yó

14 Cuatáhú ró ñayuu jeē ná tu ije jífn jnúhun ya, te ma tejnáhan ró jífn i síquī tāca jnúhun jeē sífn jéni ni i jífn máá ró. ²Chi íyó ñáyuu jeē jéni ni i jeē cúu caji i ndinuū-ni. Te íyó ñáyuu jeē ná tu ije jífn jnúhun ya, te cájeni ni i jeē tú vāha caji i cuñu, chi jeē ní casocō ñayuu nuū ídolo cúu. ³Te rōhó tēe jeē yéji ndinuū-ni, ma cahán rō coto ró tēe jeē tu yéji ndinuū. Te rōhó tēe jeē tu yéji

ndinuū, ma cahán rō coto ró tēe jeē yéji ndinuū. Chi Yaā Dios ni jetáhú yá tēe ún. ⁴Te rōhó, ¿ndé iin cúu ró jeē cahán neé ró jító ró mozo Yaā Dios? Chi núu vāha chí neé sáha de, te máá yá cúu jeē sándaā jíin de, nasūu máá ró. Te tuú chi cuiñi vāha de, chi mozo máá Jítóho yō cúu de, te cuu sáha ya jeē ma stívi de.

⁵Te suni íyó ñayuu jeē jéni ni jeē íi gā iin quivī vēsú inga quivī. Te inga ñayuu chi jéni ni i jeē inuū-ni cúu tāca quivī. Te tācá i na cúndaā vāha ni máá i siquī jeē jéni ni i. ⁶Chi tēe jeē nee i quivī, chíñúhún de máá Jítóho yō jeē sáha de súcuan. Te tēe jeē tu nee i quivī, suni chíñúhún de Jítóho yō jeē sáha de súcuan. Te tēe jeē yéji ndinuū-ni, chíñúhún de máá Jítóho yō jeē sáha de súcuan, chi nácuatáhú de nuū Yaā Dios. Te tēe jeē tu yéji ndinuū, suni chíñúhún de Jítóho yō jeē sáha de súcuan, te suni nácuatáhú de nuū yā.

⁷Chi ni iin yó tu técu yō jeē vāha máá-ni yó, te ni iin yó tu jíhí yō jeē cuní máá yó. ⁸Chi núu técu yō, te técu yō jeē cuajniñu yó núu máá Jítóho yō. Te núu cuu yō, te suni cuu yō siquī jeē cuní máá Jítóho yō. Núu súcuan te núu jeē cótecu yō chí jeē cuu yō, te yáhi yó ndaha Jítóho yō. ⁹Chi ni jihí Cristo te ni natecu yā, návāha cuu ya Jítóho nuū ñayuu ni jíhí jíin ñayuu técu.

¹⁰Te rōhó, ¿naun jéni neé ni rō jító ró jnáhan ró núu súcuan? ¿Te naun cújéé ni rō jító ró de? Chi tāca yó cuiñi yó yuhu mesa Cristo jeē sándaā yā jniñu yó. ¹¹Chi suhva yósó núu tútu i:

Jendaá ndije chi nuū máá rí
cuiñi yítí tāca ñayuu,

te ndihi i cahān jeē máá rí cúu
Yaā Dios, áhí máá Jítóho yō.

¹²Núu súcuan te ná iin ná iin yó nacuaña yo cuenta nuū Yaā Dios ndese jniñu ni casáha yó.

**Ma sáha yó jeē quivī
jnéhan yó cuéchi**

¹³Te jeē yúcuan ma cahán neé gá yō coto yó jnéhan yó. Chi sa tee ni rō jeē ma sáha ró ni iin jniñu jeē sáha jeē stívi jnéhan ró te quivī i cuéchi. ¹⁴Te jíin rí jeē ni iin jeē ni sáha Yaā Dios, tu stívi ánuá yō. Chi súcuan ni cucáhnu vāha ni rí siquī jeē candíje ri Jítóho yō Jesús. Te núu iin ñayuu jéni ni i jeē íyó jéé stívi ánuá i, yūcuán na te súcuan sáha un jíin máá i. ¹⁵Te núu jnéhan ró tu cúvāha ni de jeē yéji rō cūñu ni casocō ñayuu nuū ídolo, chi jéni ni de jeē stívi un ánuá rō, núu súcuan te tu cúndáhú ni rō de jeē sáha ró súcuan. Coto má snáā rō anuá jnéhan ró síquī jeē yéji rō iin jeē jéni ni de jeē cuéchi cúu. Chi suni jehē máá de ni jihí Cristo.

¹⁶Ma sáha ró jniñu jeē cahán i siquī, vēsú jiní máá ró jeē iyó váha. ¹⁷Chi jeē ndácu Yaā Dios jniñu nuū yō, nasūu síquī ndese caji yō coho yó cúu, chi sa suhva siquī jeē na sáha yó jniñu ndaā, te coyūcu mání yō jíin jnéhan yó, te cusíi ni yō sáha Espíritu Santo. ¹⁸Te ñayuu jeē súcuan jéjníñu nuū Cristo, chí cúsií ni Yaā Dios jíin i, te suni cájejnúhún ñayuu i.

¹⁹Núu súcuan te na cóndihvī ni yō coyūcu mání yō, návāha jíin yúcuan chindéé ñájnéhan yó ije yó jíin jnúhun ya. ²⁰Te ma cuáha ró jnúhun jeē ndeyu yéji rō snáā jniñu

ni sáha Yaā Dios jíin jnáhan ró. Chi iyó ndoo ndije ndihi jeē yéji yō, te vēsú súcuan te tú vāha jeē yéji rō ndeyu jeē sáha jíin jnáhan ró jéē caji de jeē jéni ni de jeē cuēchi cúu. ²¹Vāha ga ma caji rō cūñu, ni ma cóho ró vino, te ni iin ma sáha ró jéē stívi ánuá jnáhan ró, te quīvi de cuēchi, te caca yátá de nuū jnúhun cándíje de. ²²Te núu cándíje ró jéē tú na vé sáha jeē yéji rō, te súcuan na cándíje máa-ni ró núu Yaā Dios. Te nacā ndetū tēe jeē tu sáha jíin ánuá de jeē cuēchi cúu núu caji de coho de. ²³Te tēe yéji iin jeē jéni ni de sanaa te stívi ánuá de, núu súcuan te sáha de cuēchi, chi tu cándíje de jeē iyó vāha jeē yéji de. Chi tāca jéē sáha yó, núu tu cándíje yó jéē iyó vāha, te cuēchi cúu.

Jeē na sáha yó jéē cúsiī ni jnáhan yó

15 Te yóhó jéē ni ije yó jíin jnúhun ya, cánuu condito yó ñayuu jeē ná tu ije jíin jnúhun ya, návāha candíje vāha i. Te ma sáha yó jéē maá-ni yó cusíi ni. ²Chi ná iin ná iin yó na sáha yó jéē cúsiī ni jnáhan yó, návāha quendōo vāha i te ije i jíin jnúhun cándíje i. ³Chi ni Cristo, tu ní sáha ya jeē cúsiī ni maá yá, chi sa suhva jeē cúsiī ni Tatá yā. Chi suhva cáhán tutu ii: Tāca jnúhun ndevāha jeē cácahān ndevāha ñayuu siquī ní, ni ndīvi siquī maá ná, áchí Cristo jíin Tatá yā. ⁴Chi tāca jnúhun jeē ni jécósō nuū tútu ii nde jenahán, chi ni jécósō návāha stéén nuū yō, te nihin yō jnúhun jeē sáha jeē cuandeyí ni yō te ndusiī ni yō. Te súcuan te cocuhun ni yō tāca jéē vāha jeē cóo. ⁵Te máá Yaā Dios

jeē jéhe jnúhun cuandeyí ni jíin jnúhun ndúsiī ni, na sáha ya jeē cóo inuú ni rō, návñuhun cúni Cristo Jesús. ⁶Te súcuan te iin-ni coo ró te inuú-ni cuu cahān rō jeē yóhoyo vāha Yaā cúu Yaā Dios, Tatá Jitoho yō Jesucristo.

**Jeē ni jítē jnúhun vāha ya
nuū ñayuu tācá nación**

⁷Núu súcuan te cuatáhú ró tāca jnáhan ró, návñuhun ni jetáhú Cristo yohó, návāha cuni ñayuu jeē luu cújéhnu Yaā Dios. ⁸Chi cáhán rī jeē ní quiji Cristo Jesús, ni sáha ya tācá jniñu jeē quéndōo vāha ñayuu hebreo, návāha cundaā tāca jnúhun jeē ni jéjñuhun Yaā Dios nuū tāca jíi i. Te súcuan ni steén Cristo jeē squícu Yaā Dios tāca jéē ni jéjñuhun ya. ⁹Te suni ni quiji ya návāha ñayuu tācá nación jeē tu jíin jnúhun ya, cahān i jeē yóhoyo vāha ni Yaā Dios jeē cundáhú ni yā i. Chi suhva cáhán tutu ii:

Núu súcuan te cahān na jéē yóhoyo vāha ni ní, cuni ñayuu tācá nación,
te cata ná yaa jeē chiñúhún ná nihín.

¹⁰Te cáhán tucu tutu ii:

Róhó ñayuu tācá nación, inuú na cúsiī ni rō jíin ñayuu maá yá.

¹¹Te cáhán tucu:

Róhó ñayuu tācá nación, na cáhán rō jeē yóhoyo vāha ni Jitoho yō Yaā Dios,
te róhó ñayuu tācá-ni ñuu,
suni na cáhán rō jeē yóhoyo cújéhnu ya.

¹²Te suni ni tee Isaías jnúhun yáha:

Nuū yúcuñ Isaí quiji iin jeē cújéhnu,

te ndacu ya jniñu nuū ñayuu
tācá nación.

Te ñayuu ún chi cocuhun ni i
tāca jéē sāha ya.

Achí tutu.

¹³Te máá Yaā Dios jeē sāha jeē
cāñuhun ni yō tāca jéē váha jeē
coo, na sāha ya jeē cóo siī ndasí ni
rō jíin jéē cóo ndeyí ni rō siquī jeē
cācandíje nihin ró yá. Te súcuan te
cocuhun teyí gá ni rō tāca jéē váha
jeē coo, sāha poder maá Espíritu
Santo.

¹⁴Ñānī mánī, cúcáhnū ni rī jeē
váha ndasí cándihvī ni rō jíin jniñu
váha, te vāha ndasí cájecūhun ni
rō, te cúu stíhvī jnáhan ni rō. ¹⁵Te
ni jeni ni rī jeē tee ri carta yáha
cáhān cají rí jíin ró jijnáhan ró,
návāha víhyá gā na cócuhun ni rō
tāca jnúhun yáha. Chi súcuan sāha
ri siquī jeē váha ni Yaā Dios te ni
jēhe ya jniñu nuū rī ¹⁶jeē jejnīñu ri
nuū Jesucristo, jeē nácani ri jnúhun
nuū ñayuu tācá nación jeē tu jíní
jnúhun ya. Te nácani ri jnúhun
vāha Yaā Dios nuū i jeē jnáma ya i.
Súcuan sāha ri návāha ñayuu tācá
nación, cuu squívī ri i ndaha ya jeē
cúu i nájnūhun ñin jeē socó rī nuū
yā jeē cúsiī ni yā jíin. Chi ni sāha
Espíritu Santo jeē iyó ndoo íyó íi i
nuū yā.

¹⁷Núu súcuan te siquī jeē candíje
ri Cristo Jesús, te cúsiī ni rī jeē
jejnīñu vāha ri nuū Yaā Dios. ¹⁸Chi
ma cúu cahān rī siquī jniñu cásáha
inga tēe, chi máá-ni siquī ndese ni
jejnīñu Cristo ruhū jeē sāha ri jeē
ñayuu tācá nación tu ní jíní jnúhun
Yaā Dios, vijna jétáhú i nuū yā. Chi
súcuan ni cuu jíin jnúhun ni cahān
rī jíin jniñu ni sāha ri. ¹⁹Chi ni sāha

ri jniñu jéhnū ndíso poder jeē steén
jeē cujéhnū ya, te ni iyo poder
Espíritu Santo jíin rí. Te súcuan ni
nacani ndíhi ri jnúhun ndese jnáma
Cristo ñayuu. Te ni nacani ri nde
ñuu Jerusalén, jíin ndíhi tācá ñuu,
jíin nde níí región Ilírico. ²⁰Súcuan
cúu jeē ní condíhvī ni rī ni nacani
ri jnúhun jeē jnáma ya ñayuu. Te
ni jehēn rī nuū ñayuu jeē ná tu
cuni jnúhun Cristo, chi tu ní cúní rī
nacani ri nuū ñayuu jeē jé ni jini i
ni canacani inga tēe. ²¹Chi sa suhva
ni sāha ri nájnūhun cáhān tutu ii:

Tāca ñayuu jeē tu ní quíji

jnúhun ya nuū i, vijna chi
cuni i jnúhun ya,

te tāca ñayuu jeē tu ní jíní cuiti

jnúhun ya, vijna chi jecūhun
ni i.

Achí tutu.

Jeē ñúhun ni Pablo jeē quihín de Roma

²²Te jeē yúcuan cúu jeē cuehē jínu
ni cujnéñu ri, te tu ní cúu jecondēhe
rí rohó jijnáhan ró. ²³Te vijna chi ni
ndíhi jniñu ri níí cáhnū tācá región
ndañtū yáha. Te je ni cuu cuehē
cuiyā jeē cúní rī jeē rī nuū rō. ²⁴Núu
súcuan te ñúhun ni rī jecondēhe
rí rohó jijnáhan ró núu na yáha ri
quihín rī España. Te ñúhun ni rī jeē
núu je ni cusíi ni rī jeē ní jito jnáhan
yó, yūcuán na te chindéé ñáhán ró
ruhū jeē quihín gā rī. ²⁵Te xíhna gā
na quíhín rī ñuu Jerusalén quindēca
ri xūhún cuu hermano cáyūcu
yúcuan. ²⁶Chi ñayuu Macedonia jíin
Acaya ni cajeni ni i jeē cáquin i xūhun
quíhín nuū hermano cándoho ndáhú
ñuu Jerusalén. ²⁷Chi súcuan ni cacusiī
ni i ni casáha i. Te íyó váha jeē

súcuan, chi máá i jeē cácuu i ñayuu tāca gá nación, táú i jeē sáha vāha i nuū ñáyuu hebreo un. Chi ñayuu hebreo ni casáha jeē ní quiji jñuhun Yaā Dios nuū i jeē quéndōo vāha ánuá i sáha. Jeē yúcuan cánuú jéē chindéé ñáhán i ñayuu hebreo cácanđije jíin ndajniñu ñayivi yáha. ²⁸Núu súcuan te jeē jíinu jniñu yáha jéē quíndēca ri xūhun yáha nuū i, yūcuán na te jecondēhe rí rohó jíjnáhan ró jéē yáha ri quihñ rí España. ²⁹Te jíni vāha ri jeē quiví jinú rí nuū rō, te vāha ndasí quendōo ró jéē nacani ga rí jñuhun vāha Cristo nuū rō.

³⁰Hermano jijnáhan ró, cáhán ndahú rí jíin ró jeē chindéé ñáhán ró ruhū cacān tahú rō jehē rí nuū Yaā Dios siquí jniñu ndúcú ndeyí rí. Súcuan sáha ró síquí jeē candíje yó Jítoho yō Jesucristo, jíin síquí jeē cundáhú ni yō jnáhan yó sáha máá Espíritu. ³¹Te cacān tahú rō jeē na cácu ri nuū tée región Judea jeē tu cácanđije, jíin jéē na cúsiñ ni tācá hermano ñuu Jerusalén jeē quíndēca ri xūhun yáha cuu de.

³²Te súcuan te núu cúní Yaā Dios te jecondēhe rí rohó jíjnáhan ró, te cusíñ ni yō, te nanihñ ni rí jeē condee rí jíin ró. ³³Te máá Yaā Dios jeē jéhe jñuhun ndeyí sñ ni, na cóo ya jíin ró jijnáhan ró. Amén.

Jeē cahán Pablo jeē sándeýí ni i

16 Te vijna te cáhán rí jíin ró jijnáhan ró jéē na chindéé ñáhán ró hermana Febe, chi cúu ña ñahan jéjñiñu jeē síquí jnúhun ya nuū ñáyuu cácanđije ñuu Cencrea. ²Te cuatáhú ró ña nájñuhun cúní máá Jítoho yō, chi súcuan cánuú sáha hermano cácanđije. Te

chindéé ñáhán ró ña na-ni vé cúu jeē jíni ñúhún ña, chi súcuan ni chindéé ñáhán máá ña cuehē ñayuu, te suni nde ruhū.

³Cahán rō jíin Priscila jíin Aquila jeē sándeýí ni ndíndúú de, áchí rí, chi cáchindéé ñájnáhan de jíin rí síquí jniñu Cristo Jesús. ⁴Chi ná ni iyo jñúndóho jeē cuu rí nuú, te ni cachundeyí ni de ni canducú de scácu de ruhū, vēsú suni cuu maá de núú. Te nácuatáhú rí nuū ndíndúú de, te nasūu máá-ni ruhū, chi suni tāca grupo ñayuu cácanđije tācá nación. ⁵Te suni cahán rō jíin ñáyuu cácanđije ndútútú vehe de, sándeýí ni i, áchí rí. Te cahán rō jeē sándeýí ni Epeneto, tēe maní rí jíin. Chi ñuu Acaya, máá de cúu jeē ní candíje xihna gā nuū Cristo. ⁶Suni cahán rō jeē sándeýí ni María, ñahan jeē ní jejniñu ndasí jeē síquí jnúhun ya mēhñu ró jijnáhan ró. ⁷Te cahán rō jeē sándeýí ni Andrónico jíin Junias, tēe cácuu jnáhan ñuu rí jeē ní cahiñ jíin rí vecāa. Te tācá apóstol chi cájejnúhún de ndíndúú tēe jíñá, te xihna gā de ni cacandíje Cristo vēsú máá rí.

⁸Cahán rō jeē sándeýí ni Amplias, tēe maní rí jíin, chi cándíje de Jítoho yō. ⁹Te cahán rō jeē sándeýí ni Urbano, tēe chindéé ñájnáhan jíin yó síquí jniñu Cristo Jesús, te suni súcuan Estaquis, tēe jeē maní rí jíin. ¹⁰Suni cahán rō jeē sándeýí ni Apeles, tēe jeē ni stéén jeē candíje vāha de Cristo, te suni súcuan cahán rō jíin ñáyuu vehe Aristóbulo. ¹¹Cahán rō jeē sándeýí ni Herodión, tēe cúu jnáhan ñuu rí. Te suni súcuan ñayuu vehe Narciso jeē cácanđije máá Jítoho yō. ¹²Te suni cahán rō jeē sándeýí ni

Trifena jíin Trifosa, ñahan cásájniñu siquī jnúhun máá Jítóho yō. Te suni sándeýí ni Pérsida, hermana jeē maní yō jíin, chi suni ni sájniñu ndasí ña siquī jnúhun Jítóho yō. ¹³Te cahān rō jeē sándeýí ni Rufo, tēe cajejnúhún ñáyuu jeē vāha cándíje de máá Jítóho yō. Te suni súcuan cahān rō jíin náná de, te máá ña suni ni jito ña ruhū nájñuhun jeē naná rī cúu ña. ¹⁴Te cahān rō jeē sándeýí ni Asíncrito jíin Flegonte jíin Hermas jíin Patrobas jíin Hermes jíin táca hermano jeē cáyūcu jíin de. ¹⁵Te suni súcuan Filólogo jíin Julia jíin Nereo jíin cuáha de, jíin Olímpas jíin ndíhi hermano cácańdíje cáyūcu jíin de jíināhan de.

¹⁶Te jeē cahán tāca rō jíin jnáhan rō, te yǎñuhún techūhu rō ndaha i. Te tāca grupo ñayuu cácańdíje nuū Cristo, cáhán i jeē na sándeýí ni rō.

¹⁷Te cáhán ndahú rí jíin rō, hermano jijnáhan rō, jeē cóto rō máá rō nuū ñáyuu cútucu ni te ndúcú stǎvi jnáhan jíin jnúhun tu quíjnáhan jíin jeē ní cacutúhva rō. Te cujiyo rō núu i jíināhan i. ¹⁸Chi ñayuu súcuan, tu jéjníñu i nuū Jítóho yō Jesucristo, chi máni ndǎhví ni i siquī jeē cáji i. Te yóhyo ndúxí i jíin jnúhun cácahān i, te súcuan stáhú i ñayuu jeē tu jíní vāha. ¹⁹Te máá rō jijnáhan rō, chi je cájini ndíhi ñayuu ndese vāha cájetáhú rō nuū yā, te jeē yúcuan cúsiñi ni rī. Te cúni rí jeē cóo listo vāha rō sáha rō jniñu vāha, te ma sáha rō jniñu néé. ²⁰Te máá Yaā Dios jeē jéhe jnúhun ndeyí sǎi ni, yachí sáha ya jeē cúndeyí rō siquī jexeén jeē cúu Satanás. Te ñuhun ni rí jeē Jítóho yō Jesucristo na sáha ya jeē vāha róhó jíināhan rō.

²¹Sándeýí ni rō jijnáhan rō, áchí Timoteo, tēe chíndéé ñáhán jíin rí siquī jnúhun ya. Te suni súcuan cácahān jnáhan ñuu rí Lucio jíin Jasón jíin Sosípater.

²²Te ruhū jeē naní Tercio, jeē tēe rí carta yáha jeē cahán Pablo, suni cáhán rí jeē sándeýí ni rō jeē cácańdíje rō Jítóho yō.

²³Te Gayo, tēe ni jēhe núu vehe ndéé rúhū Pablo, cáhán de jeē sándeýí ni rō jijnáhan rō. Te suni jéhe núu de vehe nuū tāca ñáyuu cácańdíje. Te suni súcuan cáhán Erasto, tēe cúu tesorero ñuu yáha, te suni súcuan cáhán hermano Cuarto.

²⁴Te ñuhun ni rí jeē máá Jítóho yō Jesucristo, na sáha ya jeē vāha róhó jíināhan rō. Amén.

Jnúhun sándíhi jeē cahán jeē yóhyo cújéhnu ya

²⁵Te vijna na cáhán yō jeē yóhyo cújéhnu Yaā Dios. Chi máá yá cuu sáha jeē cuǎñi nihin ga rō jijnáhan rō jíin jnúhun jnáma ya rohó jeē nácani rí, jíin jnúhun Jesucristo jeē steén rí. Chi súcuan ni steén Yaā Dios jnúhun sáhi yá, jeē ní yisáhi níí cáni nde ná tu jecōo ñayívi. ²⁶Te vijna te je ni nane cáji. Chi jíin tútu ii jeē ní catee tēe ni canacani jnúhun ya, ni jitē núu jnúhun sáhi yáha nuū ñáyuu táca nación, návāha candíje i te cuatáhú i. Chi Yaā Dios jeē técu níí cáni, súcuan ni ndacu ya jniñu.

²⁷Te níí cáni na cáhán yō jeē yóhyo cújéhnu Yaā Dios siquī jniñu ní sáha ya jeē jíin Jesucristo. Chi máá iin-ni ya iyó te yóhyo ndíchí yá. Súcuan na cóo. Amén.

CARTA HN JEE NI TEE SAN PABLO APOSTOL NUU ÑAYUU ÑUU CORINTO

1 Máá rí cúu Pablo, te ni cana Yaā Dios ruhū cúu ri apóstol Jesucristo. Chi súcuan ni nujnahan ni yā ni tají yá ruhū nacani ri jnūhun ya. Te ndĩndúú rí jíin hermano yō Sóstenes ²cátee ri carta yáha cuájeē nuū rohó ñáyuu ñuu Corinto jeē cácanđije ró Yaā Dios. Chi cácuu ró ñayuu maá yá, chi cáyihí ró ndaha Cristo Jesús. Chi ni cana Yaā Dios rohó jíjnáhan ró jéē coo ndoo coo iĩ ró nuū yā. Te ni cana ya rohó ndé jíin táca gá ñayuu jeē ndácunehen i máá Jítóho yō Jesucristo, ndé-ni cúu nuū cáhīyo i. Chi Jítóho táca yó jíin i cúu ya. ³Te cáñuhun ni rĩ jeē Tatá yō Yaā Dios jíin Jítóho yō Jesucristo na sáha ga yā jeē váha röhó, te sáha ya jeē coo ndeyí coo sīi ni rō.

Cristo sáha ya táca jéē váha yóhó

⁴Te níní nácuatáhú rí nuū Yaā Dios jeē siquí rohó jíjnáhan ró, chi jeē jíin Cristo Jesús ni sáha ya jeē váha röhó. ⁵Chi cáyihí ró ndaha Cristo, te jeē yúcuan ní sáha Yaā Dios jeē cáhīyo cúcá ró jíin táca jnúhun ya, chi cájecūhun vāha ni rō te cúu nácani ró. ⁶Chi súcuan cúu jeē cáhīin nihin ró jíin jnúhun

Cristo jeē ní canacani ri nuū rō. ⁷Te súcuan te tu cúmanī ni iin tahū jeē jéhe ya cuu ánuá rō níní jéē cándetu ró quívī jeē quenda ndijin Jítóho yō Jesucristo. ⁸Te máá yá chi sáha ya jeē cuiñi nihin ró nde na jínu quivī, návāha ma cóo cuēchi siquī rō quivī ndíji Jítóho yō Jesucristo. ⁹Te squícu Yaā Dios táca jéē ni jéjnūhun ya, te ni cana ya rohó jíjnáhan ró návāha cuni jnáhan ró jíin Séhe ya, Yaā cúu Jítóho yō Jesucristo.

**Siquí jeē ma cóo sīin
ni i jíin jnáhan i**

¹⁰Hermano, nde jíin síhví Jítóho yō Jesucristo cahán ndahú rí jíin ró jeē inuú-ni na ndájnūhun ró jíjnáhan ró, te ma cóo sīin ni rō. Chi vāha inuú na cóo ni rō jíin táca jéē cájeni ni rō. ¹¹Súcuan cáhán rĩ, ñáni mánī, chi ni cacastūhun ñáyuu vehe Cloé nuū rĩ jeē cátejnéhan ró. ¹²Chi táca iin iin ró sīin sīin cácahān rō: Ruhū chi jíin Pablo índichi rĩ, cácahān sava ró. Te sava ga rō: Ruhū chi jíin Apolos. Ruhū chi jíin Pedro. Ruhū chi jíin Cristo. Cácahān rō. ¹³Te jeē cácahān rō súcuan éte á cájeni ni rō jeē sīin

sín Cristo iyó jéé cánacani ri jnúhun? ¿Te á rúhū Pablo ni jihī jicā cruz jehē rō? ¿Chí jíín síhví rúhū ni cajendute ró, chí naún? ¹⁴Tú cuiti. Te na cútahū rī nuū Yaā Dios jeē tú cuehē rō ni scuándute ri, chí máá Crispo jíín Gayo-ni, ¹⁵návāha ma cahán ni ìin ró jéé jíín síhví rí ni jendute ró. ¹⁶Te sá núcūhun ni rī jeē suni ni scuándute ri Estéfanas jíín ñayuu vehe de. Te sanaa te súcuan-ni cúu ñayuu ni scuándute ri, jéni ni rī. ¹⁷Chi tu ní téjníñu Cristo ruhū jeē scuándute ri, chí sa suhva jeē nácani ri jnúhun jeē jnáma ya ñayuu. Te tu ní ndúcú rí jeē steén rī nuū rō ìin modo ndichí jéé ma jécūhun ni rō, chí núu súcuan te ma cúu jecūhun vāha ni rō jnúhun jeē ni jíhī Cristo jicā cruz.

Jíín Cristo ni steén Yaā Dios poder yā jíín jnúhun ndichí yá

¹⁸Te jnúhun jeē ni jíhī yā jicā cruz jeē jnáma ya ñayuu, chí jnúhun cánéé íi cúu nuū ñayuu cuangoo nuū jnahnú ndetū. Te máá yó jeē cuahán yō nuū cácu yó, chí jíín yō jeē jnúhun Yaā Dios jeē ndíso poder cúu. ¹⁹Chi suhva yósó núu tútu ìi jeē ni cáhān Yaā Dios:

Na snāā rī jnúhun ndichí
cácahān ñayuu ndichí cuenta
ñayívi yáha,
te ma cuatáhú rí jnúhun
cácahān ñayuu jeē jéni ni jeē
jiní vāha.

Achí yá.

²⁰Núu súcuan ¿te ndé cuajníñu tēe ndichí cuenta ñayívi yáha, jíín tēe cástéén tutu, jíín tēe cánanducú yúcún síquī jeē steén ñayuu ñayívi yáha? Chí tāca jnúhun ndichí

cuenta ñayívi yáha, ni cahān Yaā Dios jeē jnúhun cánéé íi cúu. ²¹Te yōhyo ndichí sáha Yaā Dios. Chí tāca jnúhun ndichí cájini ñayuu ñayívi, ni cachi ya jeē tu jéjníñu jeē cúni i ndese Yaā cúu ya. Yūcuán na te ni nujnahan ni yā jeē jíín jnúhun ya jeē cánacani ri te jnama ya ñayuu cácañdije, vēsú cájini ni ñayuu ñayívi jéé jnúhun cánéé íi cúu.

²²Chi ñayuu hebreo, máni cáconi i jeē sáha Yaā Dios cuehē jniñu jéñu jeē steén poder yā. Te ñayuu griego chí máni síquī jnúhun ndichí cándihvī ni i. ²³Te máá rí chí sa suhva cánacani ri jnúhun jeē ni jíhī Cristo jicā cruz jeē jnáma ya ñayuu. Te jnúhun yáha sáha jeē jnánini ni ñayuu hebreo, te ñayuu tāca gá nación chí cájini ni i jeē jnúhun cánéé íi cúu. ²⁴Te ñayuu jeē ní cana ya ni quivicoo ndaha ya, vēsú ñayuu hebreo chí ñayuu griego, chí jíín i jeē jíín Cristo ni steén Yaā Dios poder yā jíín jnúhun ndichí yá. ²⁵Chi jnúhun Yaā Dios jeē cácahān ñayuu jeē jnúhun cánéé íi cúu, yōhyo ndichí gá vēsú jnúhun ndichí ñayuu. Te cájini ni ñayuu jeē tú na poder yā ná ni jihī Jesús jeē jnáma ya yohó, te tuú chí nihin téyí gá poder yā ún vēsú poder ñayuu. ²⁶Hermano, máá ró cácuu jeē ní cana ya ni quivicoo ró ndaha ya. Te condēhe ró jeē tú cuehē rō ndichí jíín jnúhun ñayívi, ni tú cuehē rō cácuu sēhe ñayuu cujéñu. ²⁷Chi sa suhva ni nacāji Yaā Dios tāca jéé cácahān ñayuu ñayívi jéé tu ndichí cuiti, návāha coo jnúhun canu nuū tāca jéé ndichí. Te ni nacāji ya ñayuu tu téyí ini ñayívi, návāha coo jnúhun

canu nuū ñayuu teyí. ²⁸Te suni ni nacāji Yaā Dios tāca jēē tu cújéhnū ini ñayíví, jíín tāca jēē sajēē ni i nuū, nde jíín tāca jēē tú jniñu cájeni ni i, návāha snúu ya tāca jēē cújéhnū ini ñayíví. ²⁹Súcuan ni sáha ya návāha ni ñin ñayuu ma cúu sátéyí i máá i nuū yā. ³⁰Te máá ró jijnáhan ró chi ni sáha Yaā Dios jeē nduú ró jíín Cristo Jesús. Chi nde nuū maá yá ni canihñ yō jñūhun ndíchí, te ni ndahva yā cuēchi yó, te ni sáha ya jeē iyó ndoo iyó íi yō nuū yā, chi ni jnama ya yohó. ³¹Te jeē yúcuan na cóo nájñūhun cáhán tutu ii: Núu ñin ñayuu cuní i cutéyí i, te na cutéyí i siquī jeē ni sáha máá Jítóho yō jehē i, áhí.

**Jeē nácani Pablo jñūhun
jeē ni jííhi Cristo**

2 Te ruhū, hermano, ná ni jeē rī nuū rō jijnáhan ró jēē nácani ndaā rī jñūhun Yaā Dios, te tu ní nácani rī jñūhun ndíchí jēē ma jécūhun ni rō. ²Chi ná ni iyo ri jíín ró te tú na inga jñūhun ní ndúcú rí castūhun rí nuū rō, chi máni máá jñūhun Jesucristo jeē ni jííhi yā jicā cruz jeē jnáma ya yohó. ³Te ná ni jinū rī nuū rō jijnáhan ró, chi tú na fuerza rī, te yúhú rí, te quísi i ruhū. ⁴Te ná ni nacani ri jñūhun nuū rō, chi nasūu jíín jñūhun ndíchí ñáyuu ñayívi ní scándije ri rohó, chi sa suhva jíín máá poder Espíritu yā ni steén rī nuū rō jijnáhan ró, ⁵návāha ma cuñi ró síquī jñūhun ndíchí cácahān ñayuu, chi cuñi ró síquī poder Yaā Dios.

**Jíín Espíritu te stéén Yaā
Dios ndese Yaā cúu ya**

⁶Te ndaā chi ndíchí cácahān rī jíín ñáyuu jeē jé ni ije jíín jñūhun

cándije i ya. Te nasūu jñūhun ndíchí jēē iyó ini ñayívi yáha, ni nasūu jñūhun ndíchí cácahān tēe cácujeñnu ñayívi yáha, chi tēe ún yáha-ni jeē cácujeñnu de. ⁷Chi jñūhun cácahān rī cúu jñūhun ndíchí máá Yaā Dios jeē ní yisāhí. Chi jñūhun ndíchí un jēē ní yisāhí, ni jequin Yaā Dios nde ná tu jecōo ñayívi, návāha cácu yó jēē cótecu yō ní cáni sáha jñūhun ún. ⁸Chi ni ñin tēe cújéhnū nuū ñayívi yáha, tu ní jécūhun ni de jñūhun ndíchí un. Chi núu ni jecūhun ni de núú, te ma cáhni cuítí de máá Jítóho yō, Yaā cújéhnū luu. ⁹Chi cúu nájñūhun cáhán tutu:

Tāca jēē ni sátūhva Yaā Dios jeē cúu ñayuu jeē maní jíín yá, ni ñin ún tu ní jíito jíínúū ñayuu, ni tu ní jíni sōho i, ni tu ní quíji jeē súcuan caní ni i.

Achí tutu. ¹⁰Te máá yó jijnáhan yó chi ni steén Yaā Dios tācá un núú yō jeē jíín Espíritu yā. Chi máá Espíritu jiní vāha ya te steén yā ndihí, chi nde ndihí jeē ndíchí gá máá Yaā Dios.

¹¹Chi ni ñin ñayuu ma cúu cuní i ndese jéni ni inga ñayuu, chi máá-ni i jíín ánuá i cúu jeē jiní. Te suni súcuan ni ñin ñayuu tu jíín i ndese jéni ni Yaā Dios, chi máá-ni Espíritu Yaā Dios cúu jeē jiní. ¹²Te máá yó chi ni nihñ yō Espíritu un jēē véji nuū Yaā Dios, te tu cájeni ni yō nájñūhun cájeni ni ñayuu ñayívi. Te jeē yúcuan cúu jeē cájecūhun ni yō ndese ni sáha Yaā Dios jeē váha yóhó síquī jeē váha ni yā. ¹³Te suu síquī tāca jēē yáha cúu jeē cácahān rī, te nasūu jíín jñūhun jeē castéén

ñayuu ndichí, chi jíin jnúhun jeē steén maá Espíritu. Chi cástéén rí jnúhun Espíritu nuū ñayuu cánevāha Espíritu.

¹⁴Te ñayuu ñayiví tu cájetáhú i tāca jnúhun jeē véji nuū Espíritu Yaā Dios, chi cájeni ni i jeē jnúhun cánée íi cúu. Te ma cúu jecūhun ni i, chi tu cánevāha i maá Espíritu jeē sáha jeē jécūhun ni i. ¹⁵Te ñayuu cánevāha Espíritu, chi cájecūhun ni i ndese íyó ndihi-ni. Te ñayuu ñayiví ma cúu jecūhun ni i ndese ñayuu cácuu ñayuu ún. ¹⁶Chi suhva cáhán tutu íi: ¿Ndé iin cuu cuni ndese jéni ni maá Jítóho yō? ¿Te ndé iin cuu stéén nuū yā? Ni iin ma cúu. Achí tutu. Te vēsú súcuan te maá yó chi cájeni ni yō nájñuhun jéni ni Cristo.

Jeē cáchindéé ñájñahan de cájejniñu de nuū Yaā Dios

3 Te ruhū, hermano, tu ní cúu cahān rí jíin ró jijnáhan ró nájñuhun cáhán rí jíin ñayuu jica jíin Espíritu. Chi ni cahān rí jíin ró nájñuhun jíin ñayuu cájica jíin modo maá, chi cácuu ró nájñuhun sūchi lúlí jéé ná tu ije ró jíin jnúhun Cristo. ²Ni steén rí nuū rō jeē tú yíí, chi cácuu ró nájñuhun sūchi lúlí jéé jéxin gā. Te tu ní cáhán rí jíin ró jnúhun yíí jeē cúu nájñuhun jeē ndáva jeē véji ñayuu ni ije, chi ná tu canda ró jíin ndé saá. Te ni vijna ná tu canda ró jíin. ³Chi cájica ga rō jíin modo neé maá ró. Chi cácuuésún ni rō, te cácajnáhan ró, te cácusíin ni rō. Núu súcuan te cácuu ró nájñuhun ñayuu ñayiví jéé cájica jíin modo neé maá. ⁴Chi iin ró cáhán: Ruhū chi jíin Pablo índichi rí. Te inga rō cahán: Ruhū

chi jíin Apolos. Te súcuan cúu jeē cájica ró jíin modo neé maá ró ⁵¿Te ndé iin cúu ruhū, te ndé iin cúu Apolos núu súcuan? Chi maá mozo-ni Yaā Dios cácuu ri, te ni jejniñu ya ruhū návāha candíje ró maá Jítóho yō. Chi ná iin ná iin ri ni sáha jniñu ndese ni jéhe maá Jítóho yō nuū rí. ⁶Ruhū, nájñuhun ni taji ri jnúhun ya ini anuá rō, te Apolos, nájñuhun ni chuhun de ndute cúu jeē ní steén gā de nuū rō. Te maá Yaā Dios cúu jeē ni scuéhnu jnúhun ini anuá rō. ⁷Núu súcuan te tú na vé cúu sáha tēe táji ni tēe chúhun ndute, chi sa suhva maá Yaā Dios cúu jeē scuéhnu. ⁸Te tēe táji jíin tēe chúhun ndute, iin-ni cácuu de. Te tācá de chi cuāha ya yāhu nuū de ndese jniñu ni casáha iin iin de. ⁹Chi ruhū jijnáhan ri chi tēe chindéé ñájñahan cájejniñu nuū Yaā Dios cácuu ri. Te maá ró jijnáhan ró cácuu nájñuhun itu Yaā Dios jeē jícu ya jíin.

Te suni nájñuhun iin vehe jeē sáha Yaā Dios cácuu ró. ¹⁰Te ruhū chi cúu ri nájñuhun iin maestro albañil jeē ní jequin rí cimientu vehe ún, cúu jeē ni scándíje ri rohó. Te inga de cásama de siquī, cúu jeē castéén gā de nuū rō. Núu súcuan te ná iin ná iin de na cóo cuidado de ndese sáma de siquī. ¹¹Te Jesucristo cúu cimientu vehe ún, te ni iin ma cúu caquin inga cimientu, chi maá yá cúu jeē ní ndahva cuēchi ró. ¹²Te tāca ñayuu cácañíje, chi sáha i vehe siquī cimientu un, núu jíin ndajniñu vāha nájñuhun oro chí plata chí yúu luu, chí jíin jéé yachí naa, nájñuhun yujnu chí ite chí ndayóhō. ¹³Te

natūu jniñu un jēē ní sáha iin iin i, te suu cúu ndese ni condihvī ni i siquī maá yá. Chi máá quivī juicio jeē sándaā yā jniñu ñayuu, quivī ún natūu cájī jniñu i. Chi jíin ñuhūn quiji quivī ún, te nájñuhun sáha ñuhūn jeē jéhu tāca jēē cúu cayū, súcuan coto ndee ya jniñu iin iin i. ¹⁴Te núu tú cayū jniñu ní sáha i siquī cimientu un, te nihīn i tahū i. ¹⁵Te núu tu ní condihvī ni i jíin jniñu ya, te ma nihīn i tahū i, chi nájñuhun cayū jniñu i. Te máá i chi cācu ánuá i, vēsú nájñuhun je yajni cayū i nuū yáñuhūn.

¹⁶¿A tu cájini rō jeē cácuu rō nájñuhun templo Yaā Dios, chi ndéé EspírITU Yaā Dios ini anuá rō? ¹⁷Te núu iin tēe stfvi de templo Yaā Dios, te snáhnú ndetū yā tēe ún. Chi ndoo ndasí cúu templo yā, te suu cácuu máá rō.

¹⁸Ni iin rō ma stahú rō maá rō jíin jēē jēni ni rō. Núu iin ñayuu jēni ni i jeē ndichí i jíin jnúhun ñayivī yáha, vāha ga na siáā i ún, návāha coo ndichí ndije i jíin jnúhun máá yá. ¹⁹Chi jnúhun ndichí jēē iyó ini ñayivī yáha, jnúhun cánéé íi cúu nuū Yaā Dios. Chi cáhán nuū tútu íi: Ñayuu ndichí cuenta ñayiví, chi nájñi ya i siquī jnúhun ndichí i jeē jēsi i jnúhun ya, achí. ²⁰Te cáhán tucu tutu: Máá Jítoho yō jini yā tāca jēē jēni ni ñayuu ndichí, chi máni jeē jēni cāhá ni i, achí. ²¹Núu súcuan te ni iin rō má cutéyí rō jeē siquí ni iin tēe ndichí. Chi cuenta maá rō cúu ndihī-ni. ²²Cúu Pablo, cúu Apolos, cúu Pedro jeē castéén nuū rō. Cúu ndihī jeē iyó ini ñayiví, jeē iyó vijná jíin jēē quíji. Te vēsú núu cotecu rō

chí cuu rō, te ndihī-ni chi cuenta maá rō cúu. ²³Te máá rō cácuu cuenta Cristo, te Cristo cúu cuenta Yaā Dios.

Jeē casájniñu apóstol siquī jnúhun ya

4 Núu súcuan te na cáni ni rō jíináhan rō jeē mozo-ni nuū Cristo cácuu ri, jeē ní tejniñu ya ruhū jeē steén rī jnúhun Yaā Dios jeē ní yisāhi ndé jenahán. ²Te ndaā chi tēe jeē sájniñu siquī ún, íyó responsable ná iin ná iin de jeē squícu vāha de. ³Te ruhū tu sáha ri cuenta núu cánanducú rō siquī rī ndese sáha ri, chí núu cánanducú ñayuu cácuujéhu ini ñayiví. Te ni máá rí tu chíhi ri cuenta siquī maá rí. ⁴Chi vēsú jini rī jíin ánuá rī jeē tú na cuēchi ri, te nasūu yúcuan cúu jeē quéndōo ndaā rī, chi máá Jítoho yō cúu jeē jíto ndee ruhū. ⁵Jeē yúcuan ma nánducú rō siquī jniñu jnáhan rō, chi nde na quēē maá quivī te cuni rō. Chi nde na ndiji máá Jítoho yō te nastúu ndijin yā tācá jniñu jeē yisāhi núu nēē, te stéén ndijin yā tāca jēē jēni ni ñayuu jíin ánuá i. Yūcuán na te máá Yaā Dios cuajnúhún yá ná iin ná iin i ndese ni casáha i.

⁶Hermano, tāca jnúhun yáha ní cahān rī návāha quendōo vāha rō jíináhan rō. Te ni cachi rī jeē maá rí jíin Apolos cácuu ri mozo-ni nuū yā, te súcuan cácuu ri iin ejemplo nuū rō. Te cáhán rī jeē súcuan cácuu ri, návāha cutühva rō cani ni rō maá-ni nájñuhun cáhán tutu íi. Chi ma sandúxí rō jeē cuajnúhún rō iin tēe steén, te inga de tuú. ⁷¿Te naun cácutéyí rō nuū jnáhan rō núu

súcuan? ¿Te na vé cúu jeē iyó núu rō jeē tu ní cacutahū rō nuū yā? Te núu ni cacutahū rō nuū yā, ¿te naun casátéyí ró maá ró jeē nájñuhun jeē nasūu jéē ní cacutahū rō cúu?

⁸Va je ni cacucúca ró, chi je cánevāha ró ndihi, cájeni ni rō. Te je cándacu maá ró jniñu, te ni tuá cájini ñúhún ró ruhū, cájeni ni rō. Tú vāha jeē súcuan cacutéyí ró. Te nacā jeē vāha núu jeē cándacu ndije nde ró jniñu núu, návāha suni cuāha ró jñuhun jeē ndacu nde ri jniñu jíin ró jijnáhan ri. ⁹Te íyó jéni ni rī jeē ruhū tēe cácuu apóstol, ni sáha Yaā Dios jeē cácuu ri nájñuhun tēe núu ga nuū ñáyuu, nájñuhun tēe jeē jé ni cundaā jeē cúu. Te níí ñáyivi jíin andiví cándēhe vāha nuū rī, cúu ndajéhé Yaā Dios jíin ñáyuu. ¹⁰Chi jeē siquí Cristo te cácahān i jeē tēe cánéé cácuu ri. Te tāca rōhó va ndichí ró jíin jñuhun Cristo, cájeni ni rō. Te tāca rúhū chi tu fuerza rī, te rōhó va íyó fuerza rō, cájeni ni rō. Te rōhó chi cáhiyo yíñúhún ñáyuu nuū rō, te nuū rī chi casájéē ni i. ¹¹Níí véjicoo ri cájii rī sōco te nde vijna. Te cájichi rī ndute, te cúmani sahma ri, te tu casáha vāha ñayuu jíin rí, te ni tu cánevāha ri vehe. ¹²Te nihin casájniñu ri jíin ndaha ri. Cácahān neé i nuū rī, te cácahān vāha ri jíin i. Cájito xeēn i ruhū, te cájendeyí ni rī. ¹³Cácahān neé i siquí rī, te sa cácahān manī ri jíin i. Te cácuu ri nájñuhun yācá ini ñáyivi, te casquéhichī i ruhū nde vijna.

¹⁴Te nasūu jéē tēe ri yāha jéē cúcanu rō, chi sa suhva jeē stihví ni rī rōhó, chi cácuu ró nájñuhun sēhe ri chi manī rī jíin ró. ¹⁵Chi vēsú

na cóo uxī mil tēe stéén jñuhun Cristo nuū rō, te iin-ni tátá rō iyó. Te maá rí cúu nájñuhun tátá rō, chi ni scandije ri rōhó jéē ní nacani ri jñuhun vāha Cristo Jesús jeē jnáma ya yohó. ¹⁶Núu súcuan te cáhān ndahú rí jíin ró jeē na ndácu ró rúhū jijnáhan ró.

¹⁷Te jeē yúcuan cúu jeē tají rí Timoteo cuajeē de nuū rō. Chi cúu de nájñuhun sēhe ri jeē maní rī jíin de, te squícu vāha de nuū maá Jítóho yō. Te maá de nacachi tucu de nuū rō ndese jíca ri jeē candije ri Cristo, jíin ndese stéén rī nuū tāca grupo ñayuu cácañdije tāca lado. ¹⁸Te sava ró chi casátéyí ró maá ró, chi cájeni ni rō jeē ma jéé cuiti gā rī nuū rō. ¹⁹Te tuú chi yachi jeē rī nuū rō te núu súcuan cúní maá Jítóho yō. Yūcuán na te nanducú rí siquí tēe cacutéyí, te ma sáha ri cuenta jñuhun cácahān-ni de, chi sa coto ndee rī de núu cuu squícu nde de. ²⁰Chi jeē ndácu Yaā Dios jniñu nuū yō, nasūu maá jéē cahán iin-ni yó cúu, chi jíni ñúhún condiso poder jñuhun cáhān yō jíin jniñu sáha yó. ²¹Núu súcuan ¿te ndese cácuni rō? ¿A jéē cuxeēn rī nuū rō núu na jéé rī, siquí jeē tu cánacani ni rō, chí nacani ni rō te jeē rī jíin jñuhun cúndáhú ni jíin jñuhun vitá ni?

Jeē sándaā Pablo siquí iin cuēchi

5 Te ni nihin rī jñuhun jeē jíca jnéni iin tēe jeē íne mēhñu ró, chi ndéca de naná uū de. Te xeēn ndasí sáha tēe ún, chi ni ñayuu jeē tu cájini jñuhun Yaā Dios, tu casáha i súcuan. ²Te vēsú súcuan te casátéyí ró maá ró jijnáhan ró.

Vāha ga jeē na cúcuíhyá ndasí ni rō. Te cánuú jéē na quénehen ró téē sáha cuēchi ún na quénda de mēhñu ró. ³Te ruhū, vēsú tu íyó rí jíin ró, te nájñuhun jeē iyó rí jíin ró cúu jeē ñúhún ni rī rohó. Te je ni sándaā rī siquī téē ni sáha cuēchi ún, chí nájñuhun jeē iyó rí jíin ró cúu. ⁴Núu súcuan te na ndútútú ró jijnáhan ró, te máá Jítóho yō Jesucristo coo ya jíin ró. Te máá rí chí nájñuhun cone ri jíin ró, chí ñúhún ni rī rohó. Te poder maá Jítóho yō Jesús suni coo jíin ró. ⁵Te na chíhi yó téē ún ndaha Satanás, návaha na ndóho yiqui cúñu de, te nacani ni de te cācu ánuá de quivī ndiji Jitoho yō Jesús.

⁶Tuú vāha jeē casátéyí ró maá ró. ¿A tu cájini rō jñuhun cáhán suhva? Vēsú jecu-ni levadura te ndáa níí ñujen sáha, áchí. ⁷Núu súcuan te quenehen ró téē un nájñuhun scáne ró levadura jeē ni tívi. Te súcuan te cuu ró nájñuhun pan jeē cúvaha jíin ñujen jéé jéé tú na levadura yíhi, jeē cáyeji i vico pascua. Te ndaā jeē súcuan cácuu ró. Chí je ni jihí Cristo jeē ni sócō yā maá yá jehē yō, chí cúu ya nájñuhun londe pascua jeē ni jíhi. ⁸Núu súcuan te na cócūhun ni yō ndese ni cuu vico pascua un, te na cóo ndije ndaā anuá yō, te suu cúu nájñuhun pan jeē tú na levadura yíhi. Te ma sáha yó jniñu néé jíin jniñu jnéhén, jeē cúu nájñuhun levadura jeē ni tívi.

⁹Nuū inga carta jeē ní tee ri nuū rō jijnáhan ró ni cahān rī jeē ma quívī nduu rō jíin ñáyuu cájica jnéni. ¹⁰Te tu ní cáchi rī jeē ma quíjnáhan cuíti rō jíin ñáyuu tu cácandíje jeē cájica jnéni, jeē ndíyo

ni, jeē sácuíhná, jeē chíñúhún ídolo. Chí núu súcuan te jíni ñúhún jeē quénda ró ini ñayīvi núú, chí tuá na inga modo jeē cújiyo ró núú i chí ndéé yó ñayīvi jíin i. ¹¹Chí sa suhva ni cachi rī jeē ma quívī nduu rō jíin máá ñáyuu jeē cácahān i jeē cúu i hermano, te núu jíca jnéni i, chí ndíyo ni i, chí chíñúhún i ídolo, chí chíso jnúhun i siquī jnáhan i, chí nájini i, chí cuíhná i. Te ni ma cájici cuíti rō staā jíin ñáyuu casáha súcuan. ¹²⁻¹³Chí nasūú jniñu ri cúu jeē sándaā rī siquī ñáyuu jeē tu cáhiin jíin yó. Yaā Dios cúu jeē sándaā siquī i. Te ñáyuu cáhiin jíin ró chí cánuú jéē sándaā rō siquī i. Núu súcuan te cánuú jéē quénehen ró téē ni sáha cuēchi un jéē íne de mēhñu ró, na quénda de.

Jeē ma cáquin i cuēchi siquī jnáhan i nuū tohó tu cácandíje

6 Te núu jnáhan ró jéē candíje ni sáha cuēchi siquī rō, ¿te naun jéngoo ró jíin de nuū tohó jeē tu cácandíje jíin yó? ¿Te naun tu cásandaā rō nuū jnáhan ró cácandíje Yaā Dios? ²¿A tu cájini rō jeē ñáyuu cácandíje Yaā Dios chí ñin quivī te sándaā i jniñu ñáyuu ñayīví? Te núu ñin quivī sándaā rō jniñu ñáyuu ñayīví, ¿te á má cúu sándaā rō vijna siquī tāca cuēchi lúlí casáha jnáhan ró? ³¿A tu cájini rō jeē ñin quivī te sándaā yō nde jniñu tācá ndajéhé andiví? Te nagā ni cuu jniñu ñayīvi yáha jeē ma cúu sándaā yō. ⁴Núu súcuan te núu jnáhan ró sáha de ñin cuēchi siquī rō, ¿te naun jéngoo ró sa nuū tāca téē jeē tu cúu de jnáhan ñáyuu cácandíje jeē sándaā de siquī cuēchi

ún? ⁵Súcuan cáhán rí návāha na cúcanu rō jijnáhan rō. ¿A tu íyó ni iin tēe jécūhun ni mēhñu rō jeē cuu sándaā de siquī rō? ⁶Tú vāha jeē iin hermano caquin cuēchi siquī inga hermano nuū tohó jeē tu cácanđije.

⁷Te jeē cájequin rō cuēchi siquī jnāhan rō, chi jeē castívi íi rō cúu. ¿A tú vāha ga cuandeyí ni rō na sáha i cuēchi siquī rō chí quende i ndajniñu rō? ⁸Te tuú chi sa máá rō cásáha cuēchi te cáquende rō ndajniñu, te nuū tācá hermano rō cúu jeē casáha rō.

⁹⁻¹⁰¿A tu cájini rō jeē ñáyuu tu íyó ndáā, ma nihín tahú i quívi i ñuu nuū ndácu Yaā Dios jniñu? Ma stahú rō maá rō cani ni rō jeē nihín tahú rō, chi ni ñayuu jeē jíca jnéni, ni ñayuu chiñúhún ídolo, ni ñayuu casíqui ndéē jnāhan, ni tēe sáha ndiyī jín jnāhan yí, ni ñayuu cuihná, ni ñayuu ndíyo ni, ni ñayuu nájini, ni ñayuu chisó jnúhun siquī jnāhan, ni ñayuu stahú jnāhan siquī xúhun, ma nihín tahú i quívicoo i ñuu nuū ndácu Yaā Dios jniñu.

¹¹Te súcuan ni candāa sava rō núu, te vijna chi je ni nacate ya rohó, te cáhíyo ndoo cáhíyo íi rō nuū yā. Chi je ni ndahva yā cuēchi rō jéē jín máá Jítoho yō Jesús jín Espíritu Yaā Dios.

**Jeē iyó ndoo íyó íi yiqui
cúñu ñayuu cácanđije**

¹²Te ndaā cúu jeē cácahān jeē ndihi-ni jniñu íyó vāha sáha yó núu ndese cúní yō. Te vēsú súcuan te nasúu ndihi sáha jeē quéndōo vāha ánuá yō. Ndihi chí cuu sáha yó, te vēsú súcuan te tu íyó vāha jeē quívi yó núu jniñu jeē stívi ánuá

yō. ¹³Te ndaā cúu jeē cácahān jeē ndeyu cúu jeē cúhun chíji, te chíji cúu jeē cúhun ndeyu. Te iin quívi te tuá coo súcuan, chí naa ndíndúú un sáha Yaā Dios. Te nasūu siquī jeē cáca jnéni yó cúu jeē iyó yiqui cúñu yō, chí sa suhva jeē sáha yó jéē cúní maá Jítoho yō. Te Jítoho yō chí ndíto ya yiqui cúñu yō. ¹⁴Te nájñuhun jeē ní nastécu Yaā Dios Jítoho yō, suni súcuan nastécu yā yohó jín poder yā.

¹⁵¿A tu cájini rō jeē yíqui cúñu tācá iin iin rō cúu nájñuhun tāca parte yiqui cúñu Cristo? Núu súcuan ¿te á cuu quende yó iin parte yiqui cúñu Cristo te squíjnāhan yó jín iin ñahan jíca jnéni? Ma cúu cuíti súcuan. ¹⁶¿A tu cájini rō jeē tēe quíjnāhan jín ñahan jíca jnéni, iin na yiqui cúñu ni nduu de jín ña? Chí cáhán tutu íi: Jeē ndíndúú chí iin na yiqui cúñu cuu, áchí. ¹⁷Te ñayuu jeē quíjnāhan jín máá Jítoho yō, chí suni súcuan iin na cúu i jín yá siquī jeē candíje i ya.

¹⁸Núu súcuan te cunu rō jéē ma quívi rō núu jnúhun jíca jnéni. Chí tāca gá cuēchi jeē sáha ñayuu, chí nasūu yiqui cúñu i stívi i. Te núu jíca jnéni i, te siquī yiqui cúñu i cúu jeē sáha i cuēchi. ¹⁹¿A tu cájini rō jeē yiqui cúñu rō cúu templo Espíritu Santo jeē ni jéhe Yaā Dios nuū rō, te ndéé yá ini rō? Te nasūu cuenta maá rō cácuu rō. ²⁰Chí Yaā Dios yahu ni cuu jeē ní nacuaan ya rohó jijnáhan rō. Te jeē yúcuan cánuú jéē cáca yíñúhún rō nuū Yaā Dios jeē sáha rō jniñu vāha nde jín yiqui cúñu rō jín ini jín ánuá rō, chí máni cuenta Yaā Dios cúu.

Jñuhun cástūhun síquī tēe jíin ñasihí

7 Vjna te na cáchi rī síquī tāca jñuhun jeē ní cacajñuhun ró ruhū nuū carta. Jendaá jeē vāha ga quendōo ñin tēe núu tú condeca de ñahan. ²Te síquī jeē iyó jñuhun jnéni, te vāha ga jeē tāca tēe na cóo ñasihí máá de, te suni tācá ñahan coo yii máá ña. ³Te yii na squícu vāha de nuū ñasihí de jeē cúu de yii ña. Te suni súcuan ñasihí na squícu vāha ña nuū yii ña. ⁴Chi ñasihí chi tu cúu sáha ña jeē cuní ña jíin yiqui cúñu ña, chi suni jeē cuní yii ña. Te suni súcuan yii tu cúu sáha de jeē cuní de jíin yiqui cúñu de, chi suni jeē cuní ñasihí de. ⁵Te ma sasáhán ró maá ró nuū jnáhan ró. Te núu cácuñi rō jeē vihyá gā cacān tahu rō jecu tiempo, te núu cáhiyo conforme ndindúú ró, te cuu sásáhán ró maá ró nuū jnáhan ró. Te yūcuán na te vāha ga naquijnáhan tucu ró, návāha ma cóto ndee Satanás rohó síquī jñuhun jnéni.

⁶Te nasūu jēe ndácu ri jniñu jeē cánuú quijnáhan ró, chi jeē jéhe rī jñuhun cúu. ⁷Chi núnjahan ni rī jeē tāca tēe na cóo máá ñin-ni de, nájñuhun iyó máá rí. Te sñin sñin ni sáha Yaā Dios jíin ñin ñin de ndese cúu máá de, chi sava de cuu quendōo máá ñin-ni de, te inga de chi tuú chi sñin ni sáha ya jíin de.

⁸Núu súcuan te cáhán rī jíin ñáyuu cáhiyo máá ñin-ni, jíin ñahan ní caquendōo ndáhú, jeē vāha ga te núu quendōo máá ñin-ni i, nájñuhun iyó máá rí. ⁹Te núu jíin i jeē ma cánda i quendōo máá ñin-ni i, te na quijnáhan i núu súcuan. Chi vāha

ga jeē quijnáhan i vēsú jeē ndúquiji i.

¹⁰Te nuū ñáyuu jeē jé ni quijnáhan chi ndácu ri jniñu jeē ñahan ma ndusñin ña jíin yii ña. Te nasūu rúhú cúu jeē ndácu jniñu, chi máá Jítóho yō. ¹¹Te núu ñin ñahan ndusñin ña jíin yii ña, te na quéndōo máá ñin-ni ña, chí cuu naquijnáhan ña jíin yii ña. Te yii suni ma ndusñin de jíin ñasihí de.

¹²Te jíin sava ga ñayuu chi cahān rī yāha jēe jéni ni maá rí, te nasūu jēe ní cachi maá Jítóho yō cúu. Núu ñin hermano ndéca de ñahan jeē tu cándíje, te núu núnjahan ni ña condee ña jíin de, te ma ndusñin de jíin ña. ¹³Te núu ñin ñahan ndéca ña tēe jeē tu cándíje, te núu núnjahan ni de condee de jíin ña, te ma ndusñin ña jíin de. ¹⁴Chi tēe tu cándíje, yñhi cuenta de nuū Yaā Dios síquī jeē ní quijnáhan de jíin ñahan cándíje. Te ñahan tu cándíje, yñhi cuenta ña nuū Yaā Dios síquī jeē ní quijnáhan ña jíin tēe cúu hermano cándíje. Chi núu tu súcuan te sēhe i ma quñhi cuenta i nuū Yaā Dios, te vjna chi yñhi cuenta i nuū yā. ¹⁵Te yii chí ñasihí tu cándíje, núu fuerza cuní i ndusñin i jíin jnáhan i, te na ndúsñin i. Chi núu súcuan cuní i, te hermano chí hermana cándíje tu cánuú casi i jeē ndusñin jnáhan i jeē tu cándíje. Chi ni cana Yaā Dios yohó jēe condee maní yō jíin jnáhan yō. ¹⁶Te rōhó jēe cácuu ñasihí, tu cájini rō, sanaa te cándíje yii ró sáha ró, te cācu de. Te suni súcuan rōhó jēe cácuu yii, tu cájini rō, sanaa te cándíje ñasihí ró sáha ró, te cācu ña.

¹⁷Te ná ñin ná ñin ró na quéndōo ró ndese ni sáha Jitoho yō jeē cúu ró, jín ndese íyó ró ná ni cana ya rohó ní candíje ró. Te súcuan ndácu ri nuū tāca grupo ñayuu cácadíje. ¹⁸Núu ni cana ya ñin tēe jeē ní cuu circuncidar, te súcuan na quéndōo de. Núu ni cana ya ñin tēe jeē tu ní cúu circuncidar, te ma cúu de circuncidar. ¹⁹Chi tú na vé sáha núu cúu yó circuncidar chí tuú, chi jeē cánuú gá cúu jeē na squícu vāha yó jniñu cúní Yaā Dios. ²⁰Ná ñin ná ñin ró na quéndōo ró ndese íyó ró ná ni cana ya rohó ní candíje ró. ²¹Núu mozo jeē ní jeen ñayuu cúu ró ná ni cana ya rohó, te ma cóndihví ni rō jeē quénda ró. Te núu íyó modo jeē quénda ró nduu libre rō, te íyó váha jeē sáha ró. ²²Chi tēe cúu mozo jeē ní jeen ñayuu, te núu ni cana Jitoho yō de, te vijna chi ni nduu libre de nuū cuéchi de, jéjníñu de nuū maá Jítoho yō. Te suni súcuan tēe sájniñu cuenta maá, te núu ni cana ya de, te vijna chi ni nduu de mozo jejníñu nuū Cristo jeē ní nacuaan ya de. ²³Chi yahu ni cuu jeē ní nacuaan Yaā Dios rohó jijnáhan ró, cúu jeē ni jíhi Sēhe ya jehē rō. Núu súcuan te ma cuajníñu ró núu jniñu cāhá-ni jeē ndácu ñayuu ñayíví. ²⁴Núu súcuan hermano, ná ñin ná ñin ró na quéndōo ró núu Yaā Dios ndese íyó ró ná ni cana ya rohó. ²⁵Te vijna te siquí ñayuu jeē íyó maá-ni, tú na jñuhun ní ndácu Jitoho yō nuū rí. Te na cáhan rí jeē jéni ni maá rí, chi ni cundáhu ni Jitoho yō ruhū, te ni sáha ya jeē cúu cahān ndaā rí. ²⁶Jéni ni rí jeē vāha-ni núu quendōo-ni tēe

ndese cáhiyo de, jeē siquí jeē íyó jñundóho tiempo yáha. ²⁷Núu íyó ñasihí ró, te ma ndusín ró jín ña. Te núu tu íyó ñasihí ró, te ma nducú ró ña. ²⁸Te núu quijnáhan ró, te nasūu cuéchi cúu. Te núu quijnáhan sūchi síhí, te suni nasūu cuéchi cúu. Te ñayuu quijnáhan, chi nihin i jñundóho ñayívi yáha, te cúní rí jeē ma nihin rō jñundóho.

²⁹Hermano jijnáhan ró, jñuhun jeē cahán rí yáha cúu jeē yachi-ni ndíhi tiempo jeē sáha yó jniñu ya. Núu súcuan te nde vijna te tēe íyó ñasihí, na cóndihví gā ni de siquí jniñu máá yá vésú siquí ña. ³⁰Te ñayuu jeē ni jíhi jnáhan vehe i, na sáha i nájnūhun jeē tu cúcuíhyá ni i. Te ñayuu cúsiñi ni, na sáha i nájnūhun jeē tu cúsiñi ni i. Te ñayuu jéen, na sáha i nájnūhun jeē nasūú ndajniñu i cúu. Ma cuáha i jñuhun jeē cási tācá un jéē ma cúu condihví ni i jniñu máá yá. ³¹Te ñayuu jeē ní cacondihví ni siquí ndajniñu ñayívi yáha, ma cujnéñu ga i jín. Chi je yajni naa tāca jéē íyó ñayívi yáha.

³²Cúní rí jeē ma nácani ndasí ni rō siquí tāca jéē íyó ini ñayíví. Chi tēe cúu soltero, ndíhví ni de jniñu máá Jítoho yō, ndese cusí ni Jitoho yō sáha de. ³³Te tēe íyó ñasihí chi ndíhví ni de jniñu íyó ñayíví, ndese cusí ni ñasihí de sáha de. ³⁴Te suni súcuan síñ síñ jéni ni ñahan íyó yí jín ñahan íyó máá. Chi ñahan íyó máá, ndíhví ni ña jniñu máá Jítoho yō, chi cúní ña jeē coo ndoo coo íi anuá ña jín yiquí cúñu ña cuajniñu ña nuū yā. Te ñahan íyó yí chi ndíhví ni ña jniñu íyó ñayíví, ndese cusí ni yí ña sáha ña.

³⁵Jeē váha máá ró jijnáhan ró cúu jeē ni cáhan rí súcuan. Chi nasūu

jeē nducú rí casi rī jeē quijnáhan ró, chi sa suhva cúni rī jeē caca yíñúhún ró te nune ró cuajníñu cutú ró núu maá Jítóho yō.

³⁶Te núu iin tēe íyó sēhe síhí de, te núu cuayíi i, te núu jéni ni de jeē vāha ga jeē quijnáhan i, núu súcuan te na sáha de jeē jéni ni de, te cuāha de jnūhun quijnáhan i, chi nasūu cuéchi cúu. ³⁷Te núu iin tēe ni cundaā ni de jeē cóndee sēhe síhí de súcuan-ni, jeē ma cuāha de i vēsú fuerza jícán ñayuu i, núu súcuan te cuu quendōo i nájñūhun cúni de, chi jeē vāha sáha de.

³⁸Núu súcuan te tēe jéhe jnūhun quijnáhan i, vāha sáha de. Te tēe tu jehe jnūhun, chi vāha ga sáha de.

³⁹Te ñahan ní quijnáhan, chi yíhi ña ndaha yíi ña níni jeē técu de. Te núu je ni jihí yíi ña, yūcuán na te je ni cuu libre ña jeē quijnáhan tucu ña jíin na-ni tēe cúu ni ña, te núu tēe cándíje nuū Jítóho yō cúu de. ⁴⁰Te jéni ni rī jeē ndetū gā coo ña te núu quendōo ña súcuan-ni. Te suni jéni ni rī jeē jíin Espiritu Yaā Dios cúu jeē cahán rī.

Siquí cūñu ni sócō nuū ídolo

8 Te vijna te na cáchi rī siquí cūñu ni sócō nuū ídolo. Ndaā chi tāca yó jéni ni yō jeē maá yó cúu jeē jiní ndese cúu. Te tāca jéē jiní yō ún, chi nducú sáha jeē cundúxí yó. Te sa suhva jeē cundáhú ni yō jnáhan yó, sáha un jéē íje i jíin jnūhun ya. ²Núu na-ni ñayuu jéni ni i jeē jiní vāha i, te tuú chi ná tu cuni cuiti i nájñūhun cánuú cuni i. ³Te sa suhva ñayuu jeē maní i jíin Yaā Dios, maá i cúu jeē jetáhú yá.

⁴Núu súcuan te na cástūhun rí siquí cūñu jeē ní casocō ñayuu nuū ídolo. Ndaā chi jíin yō jeē tāca ídolo ñayívi, tú ndaā cuiti. Te tú na inga yaā iyó, chi maá iin-ni Yaā Dios.

⁵Te ñayuu chi cájeni ni i jeē iyó tāca yāā ini andívi jíin ñáyívi, chi cácahān i jeē iyó ndije cuehē yaā i jíin jítóho i. ⁶Te nuū maá yó chi iin-ni Yaā iyó, jeē cúu Tátá yō Yaā Dios. Te maá yá ni sáha tāca jéē iyó, te cuenta maá yá cúu yó jíináhan yó. Te suni íyó iin-ni Jítóho yō Jesucristo, te nde nuū maá yá vēji tāca jéē iyó, te suni maá yá ni sáha yóhó.

⁷Te ñayuu cácaandíje, chi tú ndihi i jíin jnūhun yáha. Chi sava i ni cacāan i ni chiñúhún i ídolo nde ná tu candíje i. Te nde vijna núu cáyeji i cūñu ún te sáha i cuenta jeē ni sócō nuū ídolo cúu. Te siquí jeē ná tu íje i jíin jnūhun Yaā Dios, te jéni ni i jeē cujnéhén ánuá i sáha cūñu jeē ni sócō nuū ídolo ún. ⁸Te ndaā chi nasūu jéē yéji yō cúu jeē sáha jeē cuatáhú Yaā Dios yohó. Chi núu yéji yō, nasūu yúcuan sáha jeē quéndōo vāha ga yō nuū Yaā Dios. Te núu tu yéji yō, ni tu sáha jeē quéndōo ndáhú gá yō nuū yā.

⁹Te vēsú tú ni iin jési jeē ma cúu caji rō cūñu ún, te coto ró jnáhan ró jéē ná tu íje jíin jnūhun ya, te ma sáha ró jéē suni caji i jeē jéni ni i jeē cuéchi cúu. ¹⁰Vāha ga ma caji rō núu súcuan, chi sanaa te hermano rō jeē ná tu íje jíin jnūhun ya, coto de róhó jéē yéji rō ini vehe ídolo, chi jíin vāha ró jéē tú na vé sáha. Te súcuan te sáha ró jéē cájni ni de jeē suni caji maá de cūñu jeē ni sócō nuū ídolo, vēsú jéni ni de

jeē cuēchi cúu. ¹¹Te súcuan stívi ró anuá hermano rō jeē ná tu ije jíin jnúhun ya, vēsú jíiní vāha máá ró jeē tú na vé sáha jeē cáji rō. Te tú vāha sáha ró, chí suni jehē maá de ni jihī Cristo. ¹²Te núu súcuan stívi ró anuá hermano rō jeē ná tu ije jíin jnúhun ya, núu súcuan te siquī Cristo cúu jeē sáha ró cuēchi. ¹³Núu súcuan te núu cūñu un sáha jeē quívi hermano rī cuēchi, te ma cáji cuíti ga rī cūñu ún, návāha ma sáha ri jeē quívi de cuēchi.

**Siquī jeē iyó derecho
tēe cácuu apóstol**

9 Te máá rí chí jíca libre rī, te iyó derecho rī siquī jeē cúu ri apóstol, tēe ni tají yá scáca jnúhun ya. Chí ni jito ri nuū máá Jítoho yō Jesús, te máá ró jijnáhan ró cácuu jniñu jeē ni sáha ri jeē ni squívi ri rohó ndaha Jítoho yō. ²Te núu sava ga ñayuu tu jétáhú i jeē cúu ri apóstol, te nuū máá ró chí suu cúu ndije ri. Chí siquī jeē ní scandíje ri rohó jijnáhan ró, te jeē yúcuan cácuu ró prueba jeē steén jeē ndíso jniñu ri cúu ri apóstol nuū máá Jítoho yō.

³Te jnúhun yáha cáhán rī jehē máá rí nuū ñayuu cácahān siquī rī. ⁴Achí rí: Iyó derecho rī caji rī coho ri jeē cájēhe ñayuu núu cúní rī. ⁵Te suni iyó derecho rī núu jeē cuní rī condeca ri ñin hermana candíje cuu ñasihí rí, caca ña jíin rí, nájnūhun iyó ñasihí Pedro jíin táca gá apóstol jíin tēe cácuu ñani máá Jítoho yō.

⁶¿Chí cájeni ni rō jeē máá rúhú-ni jíin Bernabé tú na derecho rī jeē stóo ri jniñu cásáha ri jeē cótecu rī, návāha nune ga rī nacani ri jnúhun

vāha ya, chí naún? ⁷¿A iyó soldado jeē técu de xúhún vehe de? ¿A iyó tēe jeē jítu uva te tu yéji de ndehē ún? ¿A iyó tēe jeē ndíto lanchi te tu jíhi de leche tí? Tú cuíti. ¿Te á suni tu iyó derecho rī cotecu rī siquī jnúhun ya naún? ⁸Te ma cáni ni rō jeē táca jēe cahán rī yāhá, máni máá jēe cácahān ñayuu ñayívi cúu. Chí nde máá ley yā jeē ni jēhe ya nuū Moisés, cáhán súcuan. ⁹Chí cáhán nuū tútu ley yā: Ma chúhun ró ñunu yuhu stíquī, quíti jéxín trigo, achí. Te ndaā chí nasūu máni siquī stíquī cúu jeē ni cáhān yā súcuan. ¹⁰Chí suni siquī máá yó ní cahān yā. Chí ley un ní jēhe ya jeē vāha máá yó, chí steén jeē tēe jítu jíin tēe jéxín trigo cánuu jeē nihín de sava un quíví ndutútú. ¹¹Te suni súcuan ruhū jijnáhan ri jeē ní cataji ri jnúhun Espíritu ini anuá rō, ¿te á véyi cúu jíin ró núu nastútú rí jeē cótecu rī nuū rō? ¹²Te núu sava ga tēe cástéén nuū rō, iyó derecho de cacān de nuū rō, te nagā ni cuu ruhū jijnáhan ri jeē ma cóo derecho rī cacān rī.

Te tu ní cájicān rī derecho un, chí sa suhva ni jendeyí ni rī coto máá rí jeē cáji rī, návāha ma cási rī jeē cáca jnúhun vāha Cristo. ¹³Te cájini rō jeē sutū ni cajejniñu ini templo, ni cacotecu de siquī jeē ní casocō ñayuu ini templo. Chí sutū ni cajejniñu nuū altar nuū ní casocō i quíti, suni ni cayeji de sava quíti ún. ¹⁴Te suni súcuan ni ndacu máá Jítoho yō jniñu jeē tēe cánacani jnúhun jeē jnáma ya yohó, siquī jniñu un níhín de jeē cótecu de. ¹⁵Te ruhū tu ní jíicán cuíti rī derecho rī yāhá, te suni nasūu jēe

tée ri jnūhun yáha návāha cuāha ró núu ri jijnáhan ró. Chi jéni ni rī jeē vāha ga núu na cúu rī nasūu jéē quíhin ri jeē cuāha ró, chi casi jeē cúsi ni rī scāca ri jnūhun ya súcuan-ni.

¹⁶Te tú vāha núu sátéyí rí maá rí siquī jeē nácani ri jnūhun jeē jnáma ya yohó. Chi iin jeē ní tejniñu ya ruhū cúu, te cánuú squícu ri. Chi nacā ndahú cúu ri te núu tú nacani ri jnūhun ya. ¹⁷Te núu jeē cúu ni maá rí sáha ri nuú, yūcuán na te cuu cacān rī yāhu ri. Te tuú chi cánuú sáha ri, chi máá Yaā Dios ni tee ya jniñu siquī rī. ¹⁸Núu súcuan te yāhu ri cúu jeē cúsi ni rī jeē súcuan-ni nácani ri jnūhun jeē jnáma ya yohó, te tu jícán rī derecho rī jeē cotecu rī siquī jeē nácani ri jnūhun ya.

¹⁹Chi vēsú tú ni iin ñayuu ndácu jniñu nuū rī, te ni sáha ri maá rí mozo nuū tācá i jeē nácani ri jnūhun nuū i, návāha nihīn rī cuehē i candíje i Cristo. ²⁰Núu íne ri jíin jnáhan ri hebreo te sáha ri nájñūhun cásáha i, návāha cuu scándíje ri i. Chi násáha ri maá rí nájñūhun tēe cáyihī chiji ley Moisés, návāha cuu scándíje ri i jeē cáyihī i chiji ley un, vēsú tuá yíhi ri chiji ley un. ²¹Te suni násáha ri maá rí nájñūhun ñayuu tu cáyihī chiji ley Moisés, návāha cuu scándíje ri ñayuu ún. Te vēsú súcuan te yíhi ri chiji ley Yaā Dios, chi suu cúu ley Cristo jeē squícu ri. ²²Te núu íne ri jíin ñáyuu jeē ná tu ije jíin jnúhun ya, te sáha ri maá rí nájñūhun jeē ná tu ije ri jíin jnúhun ya, návāha cuu scándíje ga rī i. Núu súcuan te násáha ri maá rí núu ndese cándāa

tāca ñáyuu, návāha tācá-ni modo un te cuu scándíje ri sava i. ²³Tāca yáha sáha ri jeē siquī jnúhun jeē jnáma ya yohó, návāha suni nihīn rī tahū jeē ndíso jnūhun ya.

²⁴Je cájini rō jeē tēe cájину carrera, jendaá chi ndíhi de cájину, te iin-ni de cúndeyí nihīn premio. Te suni súcuan nducú ndéyí máá ró squícu ró, návāha nihīn rō premio nuū yā. ²⁵Te tāca tēe cúni cundeyí síquī iin deporte, chi cáscuáha de te cándito de máá de. Súcuan cásáha de návāha nihīn de iin premio jeē cúu corona ndaha yújnu jeē náā yachī. Te máá yó chi sa suhva cánducú ndéyí yó návāha nihīn yō iin premio jeē ma náā cuítī. ²⁶Te máá rí suni nducú ndéyí rí nájñūhun tēe cájину, te tu nducú ndéyí cāha rí. Te sáha ri nájñūhun tēe cácajnáhan juego jeē tu jéhe iyú de, chi queé jniñu sáha ri. ²⁷Chi sa suhva stóho ri yiquí cúñu rī, te stíhvī ni rī maá rí squícu ri. Chi vēsú ni stíhvī ni rī ínga ñayuu jeē nducú ndéyí i, te núu tu nducú ndéyí máá rí te snāā rī premio rī.

Siquī jeē ma chíñúhún i ídolo

10 Hermano jijnáhan ró, cúni rī jeē na jécūhun ni rō ndese ni cajica jíy yō jenahán. Chi ndíhi de ni cajica chiji vicō jeē ni stéén ichi nuū de, te ndíhi de ni cayāha mēhñú ndute Mar Rojo jeē ní cusíin, ni nune ichi. ²Súcuan cúu jeē ní canduu inuú ndíhi i jíin Moisés, chi ni candiquīn i de chiji vicō jíin méhñu mar. ³Te ndíhi i chi inuú-ni ni cayeji i alimento jeē ni jéhe máá Espíritu. ⁴Te suni ndíhi i ni cajihī ndute jeē ni jéhe Espíritu.

Chi ni cajihī i ndute jeē ní cane jicā cáva nuū ní cajica cuu i. Te Cristo cúu nájñuhun cava un jéē jéhe ya ndute cotecu yō níf cáni. ⁵Te vēsú súcuan te cuehē i ni cuniñhi ni i, te tu ní cúsiñi ni Yaā Dios jíin i, te jeē yúcuān ní cajihī i nuū ñuhun téhé.

⁶Te tāca jéē ní cuu ún, iin ejemplo cúu nuū yō, návāha ma ndíyo ni yō tāca jéē neé, nájñuhun ni candiyo ni ñayuu ún. ⁷Te ma chiñúhún ró ídolo, nájñuhun ni casáha sava i. Chi súcuan cáhán nuū tútu ii: Ni cacucōo ñayuu ún, ni cayeji i ni cajihī i vico ídolo, te ni ndocuññi i ni cajita jéhe i, áchí. ⁸Te ni ma cáca jnéni ró nájñuhun ni casáha sava i, te ni cajihī ocō unī mil i jeē iin quivī-ni. ⁹Te ni ma sáha ró jniñu jeē squití ni rō Jitoho yō, nájñuhun ni casáha sava i, te ni cajihī i jeē ní catuu coō i, ni sáha ya. ¹⁰Te ni ma cahán sōo ró siquī Yaā Dios, nájñuhun ni cacahān sōo sava i, te ni cajihī i jeē ní jehni ndajéhe yā i.

¹¹Te tāca jéē ní cuu ún, chi iin ejemplo cúu nuū yō. Te súcuan yósó núu tútu návāha na chúhun vāha ni maá yó. Chi cácuu yó ñayuu cátecu quivī cuándihī ñayiví. ¹²Núu súcuan te rōhó jéē cájeni ni rō jeē cáhiin nihin ró jéē ma sáha ró cuéchi, coto má quiví ró cuéchi. ¹³Chi máni íyó jéē nducú squiví rōhó cuéchi, te inuú-ni cándoho ró súcuan nde jíin táca gá ñayuu. Te cuu cucáhu ni rō Yaā Dios jeē ma cuáha ya jñuhun jeē vihyá gá coto ndee jexeén rōhó vēsú jeē cúu cundeyí ró jíin. Chi sa suhva núu vēji jeē nducú squiví rōhó cuéchi, te chindéé ñáhán yá rohó quenda ró te cundeyí ró siquī.

¹⁴Ñánī mánī, ma chiñúhún cuiti rō ídolo núu súcuan. ¹⁵Cáhán rī jíin ró jéē cúu ró ñayuu cájecūhun ni, te na sáha ró cuenta núu ndaā jñuhun cáhán rī. ¹⁶Maá copa ii jeē cájicān tahu yō jehē, suu cájihī cáhu yó jéē steén yō jeē inuú cúu ndihī yó, chi ni jeti niñi Cristo jeē siquí yō ná ni jihī yā jicā cruz. Te pan jeē sacuéchí yó cáyeji cáhu yó, stéén jeē inuú cúu ndihī yó siquī jeē ni jéhe Cristo yiqui cúñu yā ni jihī yā jehē yō. ¹⁷Te vēsú cuehē yō iyó, te iin-ni ñayuu cácuu yó, chi iin-ni pan un cáyeji cáhu yó siquī jeē cácanđije yó.

¹⁸Condēhe ró ndese casáha ñayuu Israel. Tāca tée jeē yéji quitī jeē ni sócō nuū yā, chi inuú-ni cúu ndihī de siquī jeē cáyeji de jeē ni sócō ún. ¹⁹Núu súcuan te cáhán rī jeē tu ndé jéjníñu ídolo, ni tu jéjníñu cūñu jeē ni sócō nuū ídolo, chi inuú cúu jíin táca gá cūñu. ²⁰Te suni cáhán rī jeē ñayuu tu cájini jñuhun Yaā Dios, núu cásocō i, te nuū tachī cásocō i, nasūu núu Yaā Dios. Te tu cúní rī jeē cuajniñu ró núu tachī. ²¹Ma cúu coho ró copa maá Jitoho yō te núu cájihī ró jéē ni sócō nuū tachī. Te ma cúu caji rō nuū mesa Jitoho yō te núu cáyeji rō jeē ni sócō nuū tachī. ²²Ma quiví nduu yō súcuan jíin táchī, návāha ma cucuññi Jitoho yō jíin yó. ¿Chí téyí gá maá yó vēsú maá yā jeē ma cúu stóho ya yohó, cájeni ni rō, chí naún?

Ndihī chi sáha yó jíin jñuhun cundáhú ni

²³Te ndaā cúu jeē cácahān jeē ndihī-ni jniñu íyó váha sáha yó núu ndese cúní yō. Te tuú chi nasúu ndihī sáha jeē quéndōo vāha ánuá

yō. Ndihi chi cuu sáha yó, te vēsú súcuan te nasūú ndihi sáha jeē ije jnáhan yó jíin jnúhun ya. ²⁴Chi cánuú sáha yó jéē váha jnáhan yó, nasūu máni máá jéē váha máá yó.

²⁵Cuu caji rō ndihi-ni cūñu cýyáhu nuū yáhu, te ma cájnūhun rō ni ma cáni ni rō núu jeē ni sócō nuū ídolo cúu. ²⁶Chi cuenta maá Jítóho yō cúu ñayīvi jíin ndivii jeē iyó ini, te cuu cuajníñu yó.

²⁷Te núu ñin tēe tu cándíje, cana de rōhó caji rō jíin de, te núu cácuni rō quihñ rō, núu súcuan te caji rō táca jéē cáni de nuū rō. Te ma cájnūhun rō ni ma cáni ni rō núu jeē ni sócō nuū ídolo cúu. ²⁸Te núu cachi ñin i nuū rō jeē cūñu ni sócō nuū ídolo cúu, yūcuán na te ma cáji rō, chi siquī jeē jéni ni i jeē cuēchi cúu, te tu cúní rō sáha rō jéē quívi i cuēchi. ²⁹Te súcuan cáhán rī siquī jeē inga i cájeni ni i jeē cuēchi cúu, te nasūu jéē súcuan cájeni ni maá rō.

Te sanaa te cahān ñin rō: ¿A tu íyó libre rī caji rī jeē cuní maá rī, vēsú cájeni ni inga i jeē cuēchi cúu? ³⁰¿Te núu nácuatáhú rī nuū Yaā Dios te yéji rī, te najehē cácahān i siquī rī jeē yéji rī? achi rō. ³¹Tuú chi ndihi jeē sáha rō, vēsú jeē caji rō chí jéē coho rō, chí na-ni jniñu sáha rō, ndihi na sáha yíñúhún rō jíin Yaā Dios, návāha cuni ñayuu jeē luu cújéñu ya. ³²Te ma sáha rō jniñu jeē squívi rō ñáyuu nuū cuéchi, cúu ñayuu hebreo, cúu ñayuu táca nación jeē tu jíin jnúhun ya, cúu ñayuu cácañíje Yaā Dios. ³³Te ruhū chí ndúcú rí jeē na cúsiñ ni táca ñáyuu jíin táca jniñu sáha rī. Tu ndúcú rí jeē váha máa-ni

rī, chí sa ndúcú rí sáha rī jeē váha cuehē ñayuu, návāha cácu i.

Siquī ndese cánuú sáha ñahan cándututú

11 Te na ndácu rō rúhū jijnáhan rō, nájnūhun ndácu máá rí Cristo. ²Váha cásáha rō, hermano, jeē niní cánucūhun ni rō ruhū, te cándihvī ni rō jíin táca jniñu jeē ni steén rī nuū rō. ³Te cúní rī jeē na jécūhun ni rō jeē Cristo cúnuú yá nuū táca tée. Te tēe cúnuú de nuū ñasihí de. Te Yaā Dios cúnuú yá nuū Cristo. ⁴Núu ñin tēe ñúhun de lélú te jícán tahú de chí nácani de jnúhun nuū ndututú ñáyuu cácañíje, núu súcuan te jéhe de jnúhun canu máá de. ⁵Te sa núu ñin ñahan tu ndési xiní ña te jícán tahú ña chí nácani ña jnúhun, núu súcuan te jéhe ña jnúhun canu máá ña, chí ñin-ni cúu un núu ní sáte xiní ña. ⁶Chi núu tú casi ña xiní ña, vāha ga na sáte ña ixi ña núu súcuan. Te núu cúcanu ña jeē sáte ña ixi ña chí jéē sáte liñ ña, te na cási ña núu súcuan. ⁷Te tēe chi ma cási de xiní de, chí máá de cúu muestra jeē steén ndese cúu Yaā Dios jeē cújéñu ya. Te ñahan chí steén ña jeē cújéñu tēe. ⁸Chi ná ni sáha ya tēe, te nasūu jíin yiquí ñahan ni sáha ya, chí sa suhva jíin yiquí tée ni sáha ya ñahan. ⁹Te ñahan chí ni cuvāha ña jeē siquí tée, nasūu tée jeē siquí ñahan. ¹⁰Te jeē yúcuan cánuú jéē cóndesi xiní ñahan, te suu steén jeē cújéñu tēe, chí suni cándehé ndajéhé yā ndese sáha ña. ¹¹Te vēsú súcuan te yóhó jéē cándíje yó, chí jíin yō jeē tu íyó tée núu jeē tu íyó ñahan, te tu íyó

ñahan núu jeē tu íyó té. ¹²Chi vēsú ni sáha ya ñahan jíin yiquí té, te vijna cácu tēe chíi ñahan, te máa Yaā Dios cúu jeē sáha tācá-ni.

¹³Na sáha máa ró cuenta ía íyó váha núu tu ndési xinī ñahan te jícan tahu ña nuū Yaā Dios? ¹⁴Chi sáha yó cuenta jeē ini ñayivi yáha, núu cáni ixi tēe te cúcanu de sáha. ¹⁵Te ñahan chi sa váha jíto ña te núu cáni ixi ña, chi suu ni jēhe ya jeē cóndesi xinī ña. ¹⁶Te núu ndé iin ñayuu cuní i cahān i siquī jnūhun yáha, te ruhū jíin táca grupo ñayuu cácanđije nuū Yaā Dios, tú na inga costumbre jejnūhún rí siquī jnūhun yáha.

Jeē castívi i siquī Cena Jitoho yō

¹⁷Te íyó inga jnūhun cánuú cahān rí jíin ró, chi tu cúu cahān rí jeē váha casáha ró. Chi nuū cándutútú ró te tu sáha jeē quéndōo váha ga rō, chi sa jeē castívi ró. ¹⁸Xihna jnūhun yáha cáhān rí, jeē nihín rí jnūhun jeē nuū cándutútú ró te cácusín ni rō. Te jéni ni rí jeē ndaā cúu. ¹⁹Chi níni coo sava ró jēe cusín ni, návāha natūu ndé-ni cúu jeē cácanđije váha mēñu ró. ²⁰Te jeē cácusín ró súcuan nuū cándutútú ró, te nasūu cena maá Jitoho yō cúu jeē cáyeji rō núu súcuan. ²¹Chi núu cáyeji rō, te tācá iin iin ró cúní caji xihna gā vēsú jnáhan ró. Te súcuan te sava ró tu cánihin, te cájii sōco, te sava ró cánajini jeē cájili cuehē. ²²¿A tu cánevāha ró vehe nuū cáji rō coho ró, chí naún? Chi jeē casáha ró súcuan cúu jeē tu íyó yíñúhún ró ini vehe nuū cándutútú ñayuu cácanđije Yaā Dios, chi casáha ró

jeē cácanu ñayuu jeē tú na vé névāha. ¿Ndese cahān rí jíin ró núu súcuan? ¿A cáhān rí jeē váha casáha ró? Tuú chi nasūu jēe váha cúu jeē casáha ró súcuan.

Siquī jeē ní jequin Jitoho yō Cena yā

(Mt. 26.26-29; Mr. 14.22-25; Lc. 22.14-20)

²³Chi jnūhun yáha jēe ní nastéen rí nuū rō, chi nuū maá Jitoho yō ni nihín rí: Jeē maá jecuāa jeē ní nastúu de Jitoho yō Jesús, te ni quihin ya pan. ²⁴Te ni nacuatáhú yá, te ni tahu cuéchí yá, te ni cahān yā jíin tēe cáscuáha jíin yá: Quihin te caji rō jijnáhan ró, chi yāha cúu yiquí cúnu rí jeē ni sócō rí jeē siquí rō. Te níni caji rō súcuan jeē cáñuhun ni rō ruhū jeē ni jíhi rí jehē rō. Achí yá. ²⁵Te suni súcuan ni quihin ya copa ná ni cuu ni cuxíni ya jíin de, te ni cahān yā: Jeē ñuhun copa yáha cúu niñi rí jeē sácútu contrato jeē jeē jnáma ri ñayuu. Te tāca jínu jeē cájili ró, te nucūhun ni rō ruhū. Achí yá. ²⁶Chi tāca jínu jeē cáyeji rō pan un te cájili ró copa un, súcuan cástéen rō jeē ni jíhi Jitoho yō jehē yō. Te súcuan na sáha ró ndé quivi ndíji ya.

Ndese caji yíñúhún i Cena yā

²⁷Te núu na-ni ñayuu caji i pan un chí coho i copa Jitoho yō ún, te núu tu sáha yíñúhún i nuū Yaā Dios, núu súcuan te sáha i cuēchi jeē tu íyó yíñúhún i siquí yiquí cúnu maá Jitoho yō jíin síquí niñi yā. ²⁸Núu súcuan te coto ndee rō maá ró núu íyó ndoo ánuá rō jeē tú cuēchi ró. Te sáa te cuu caji rō pan un te coho ró copa un. ²⁹Chi núu iin ñayuu tu

yéji tu jíhi yíñúhún i te tu núcūhun ni i jeē yiqui cúñu yā cúu, ñayuu ún chi nihin i castigo núu na cáji i coho i. ³⁰Jeē yúcuan cúu jeē iyó cuéhē ñayuu cácuñu jíin jéē ní cacuxíí, cáhiyo mēñu ró. Te sava i je ni cajihí. ³¹Te núu coto ndee yō maá yó nde ná tu caji yō, te Jitoho yō ma cuáha ya castigo yohó. ³²Te núu Jitoho yō jéhe ya castigo yohó, te súcuan stóho ya yohó návāha ma jnahnú ndetú yō jíin ñayuu ñayiví.

³³Ñānī mánī, núu súcuan te jeē cándutútú ró jeē cáji rō Cena yā, te condetu ró te caji inuú ró. ³⁴Te núu ñayuu jíí i sōco, te xihna gā na cáji i vehe i návāha ma stívi i nuú cándutútú ró. Te súcuan te ma cuáha ya castigo i. Te quiví jécondēhe rí rohó te cachi rí ndese coo sava ga jniñu.

Siquí tāca táhū jeē jéhe Espiritu

12 Hermano, cúní rī jeē na jécūhun ni rō siquí tāca táhū jeē jéhe Espiritu nuú yō, suu tāca modo jejniñu ñin ñin yó núu Yaā Dios.

²Te cájini rō jeē ná ni cuu ró ñayuu ná tu candíje, te ni cacondihvī ni rō ni cachíñúhún ró ídolo ñihín. ³Te vijna te na jécūhun ni rō jeē núu ndé ñayuu cahán ndevāha i siquí Jesús, te nasūu jíin poder Espiritu Yaā Dios cúu jeē cahán i súcuan. Te ni ñin i ma cúu cahán i jeē Jitoho i cúu Jesús, te núu tu ndéé poder Espiritu Santo ini i.

⁴Te sñin sñin tahū jéhe ya jeē cuajniñu ñin ñin yó núu yā, te ñin-ni máá Espiritu cúu jeē jéhe. ⁵Te sñin sñin jéjniñu yó, te nuú maá ñin-ni

Jitoho yō jejniñu yó. ⁶Te sñin sñin modo sáha yó jniñu ya, te ñin-ni Yaā Dios cúu jeē sáha jniñu un jíin yó. ⁷Te nuú ná ñin ná ñin yó ní jéhe Yaā Dios tahū jeē sáha Espiritu yā jíin yó, návāha na sáha yó jéē ije jnāhan yó jíin jnúhun ya. ⁸Chi sava yó ní canihin tahū jeē ndichí cáhán yō jnúhun ya, sáha máá Espiritu. Te sava ga yō ni canihin yō jeē cúu jécūhun vāha ni yō te castūhun yó, te suni máá Espiritu sáha. ⁹Te nuú sava ga yō ni jéhe ya tahū jeē cúu cándíje nihin yó jéē sáha ya jeē jicán yō, te sava ga yō cúu sáha yó jéē ndúvāha ñayuu cácuñu, te suni máá Espiritu sáha. ¹⁰Te sava ga yō cúu sáha jniñu jéñu jíin fuerza Yaā Dios. Te sava ga yō cúu nácani jnúhun ya. Te sava ga yō ni sáha ya jeē nácuni yō tāca jnúhun, núu vēji nuú Espiritu yā chí tuú. Te sava ga yō ni nihin tahū jeē cahán yō tíjni yuhu jeē tu jécūhun ni yō. Te sava ga yō cúu nacastūhun yó jnúhun ni cahán jnāhan yó jíin inga yuhu ún. ¹¹Te tāca táhū yáha, chi ñin-ni máá Espiritu sája, te sñin sñin jéhe ya nuú ñin ñin yó, ndese núnjahan ni maá yá.

Ndihí yó cúu nájñūhun ñin na yiqui cúñu

¹²Chi nájñūhun ñin yiqui cúñu iyó cuéhē parte, súcuan cúu yó jíin Cristo jeē cúu yó nájñūhun yiqui cúñu yā, chi ñin na cúu yó jíin yá. Te vēsú cuéhē parte cácuu yó te ñin-ni cúu yó, nájñūhun ñin yiqui cúñu jeē iyó cuéhē parte. ¹³Chi ñin na ni canduu yó jíin yá ni sáha ñin-ni máá Espiritu ná ni cajendute yó. Súcuan cúu vēsú cúu yó ñayuu

hebreo chí ñáyuu griego, vēsú mozo jeē ní jeen ñayuu chí tēe sájniñu cuenta maá. Te ndihi yó chi ñin-ni Espiritu ni canihin yō.

¹⁴Te ñin yiqui cúñu chi nasūú ñin-ni parte cúu, chí sa cuehē parte cúu. ¹⁵Te núu jehē cahān: Nasūu cuenta yiqui cúñu cúu ri, chí nasūú ndaha cúu ri, te tuú chi parte yiqui cúñu cúu nahín. ¹⁶Te núu sōho cahān: Nasūu cuenta yiqui cúñu cúu ri, chí nasūu tñūu cúu ri, te tuú chi parte yiqui cúñu cúu nahín. ¹⁷Núu nñí yiqui cúñu yō cúu tñūú, ¿te ndese cuni sōho yó núu súcuan? Te núu nñí yiqui cúñu yō cúu sōho, ¿te ndese cuaan yó xicō núu súcuan? ¹⁸Te Yaā Dios ni chujnáhan ya ñin ñin parte yiqui cúñu, nájñūhun cúní yā jeē coo. ¹⁹Chi núu ñin-ni parte cúu ndihi, te nasūú ñin nñí yiqui cúñu cúu núu súcuan. ²⁰Te tuú chi cuehē parte iyó, te ñin-ni yiqui cúñu cúu.

²¹Te ni ma cúu cahān tñūu jíin ndaha: Tu jíni ñúhún rí rohó. Te ni xiní ma cúu cahān jíin jéhē: Tu jíni ñúhún rí rohó. ²²Chi sa suhva tāca parte yiqui cúñu jeē jéni ni yō jeē núu ga fuerza, suu cúu jeē cánuú gá. ²³Te tāca parte yiqui cúñu jeē jéni ni yō jeē tu cáa vāha, suu cúu jeē yucún gá chúhun yó sahma. Te parte jeē tú-ni luu cáa, sa vāha ga jési yō. ²⁴Chi parte jeē lúu cáa, tu cánuú jéē condihyū. Chi súcuan ni chujnáhan Yaā Dios yiqui cúñu, jeē yucún gá ndíto yó jéē tu cáa luu. ²⁵Súcuan ni sáha ya návāha ma cusñin tāca parte yiqui cúñu, chí sa chindéé ñájñáhan vāha jíin jnáhan. ²⁶Te núu jétú ñin parte yiqui cúñu, te suni nñí cáhnu-ni jétú. Te núu

ñin parte ndíto yúcún yó, te suni ndihi-ni parte quéndōo vāha.

²⁷Te rōhó jíináhan ró chí nájñūhun yiqui cúñu Cristo cácuu ró, chí ñin na cúu yó jíin yá. Te ná ñin ná ñin ró cúu ñin ñin parte yā. ²⁸Núu súcuan te sñin sñin jniñu ni jēhe Yaā Dios nuū tāca ñáyuu cácanđje jeē cácuu i nájñūhun ñin ñin parte yā: Te suu ñin parte yā cúu tācá apóstol jeē ní jeni ya xihna gā jeē scáca de jñūhun ya. Yūcuán na te jeē uú, tēe cánacani jñūhun ya, te jeē uní, tēe cástéén. Yūcuán na te ñayuu casáha jniñu jéñnu jíin fuerza yā, jíin ñáyuu casáha jeē ndúvāha ñayuu cácuuhū, jíin ñáyuu cachíndéé ñájñáhan, jíin ñáyuu cándiso jniñu, jíin ñáyuu cácahān sñin sñin yuhu jeē tu cájecūhun ni. ²⁹¿A ndihi yó cácuu apóstol, chí naún? ¿A ndihi yó cánacani jñūhun? ¿A ndihi yó cástéén? ¿A ndihi yó cuu sáha jniñu jéñnu? ³⁰¿A ndihi yó cuu sáha jeē ndúvāha ñayuu cácuuhū? ¿A ndihi yó cuu cahān sñin sñin yuhu? ¿A ndihi yó cuu nacastūhún yuhu ún, chí naún? Tuú chí sñin sñin tahū ni canihin yō. ³¹Núu súcuan te na cóndihvī ni rō cacān rō jeē cuáha Yaā Dios tahū cánuú gá nuū rō. Te vijna te na stéén rī nuū rō ñin jeē vāha ga nuū tāca gá tahū ún, suu jñūhun cúndáhú ni jnáhan.

Jñūhun jeē cundáhú ni jnáhan

13 Vēsú núu cuu cahān yō tijní yuhu jeē cácahān ñayuu chí jéē cácahān ndajéhé Yaā Dios, te núu tu cúndáhú ni yō jnáhan yó, te jñūhun cahān yō un cúu nájñūhun ñin tambor jeē ndaxín cáján chí ñin

platlillo jeē ndaxín cáxín sánee sōho ñayuu. ²Te vēsú cuu nacani vāha yó jnúhun ya, te cuu jecūhun ni yō tāca jnúhun sāhi yá jíin tāca jnúhun ndíchí, te núu tu cúndáhú ni yō jnáhan yó, te tu ndé jéjníñu cuiti yō núu súcuan. Te vēsú cuu candíje téyí yó jeē nde cuu cahān yō jeē cújiyo yucu, te núu tu cúndáhú ni yō jnáhan yó, te tu ndé jéjníñu cuiti. ³Te vēsú na sája yó ndíhi jeē névāha yó cuu ñayuu ndahú, te vēsú núu cuāha yó jnúhun cahmu ñayuu yohó jéē siquí jnúhun ya, te núu tu cúndáhú ni yō jnáhan yó, te tu ndé jéjníñu cuiti.

⁴Ñayuu cundáhú ni chi íyó paciencia jíin jnáhan, te íyó mání ni, te tu cúcuésún ni. Te tu sándúxí, te tu sátéyí máá. ⁵Tu sájéē ni, tu ndúcú jéē cúu máá-ni, tu quítí ni, tu ñúhun ni jnúhun quítí ni. ⁶Tu cúsiñ ni jíto jniñu néé cásáha jnáhan, chi sa cúsiñ ni jíin jniñu vāha. ⁷Ñayuu cundáhú ni chi ndíhi jéhnde ni ndoho jehē jnáhan, te tu jécuiñi jeē candíje jnáhan, jíin jéē ñúhun ni jeē squícu jnáhan, jíin jéē jéndeýí ni jíin jnáhan.

⁸Jnúhun cúndáhú ni chi ma nāā cuiti. Te quiji quiví jeē tuá nacani i jnúhun, ni tuá cahān i tijní yuhu, ni tuá jíni ñúhún jnúhun ndíchí. ⁹Chi tu jíni vāha vāha yó vijna, te jnúhun cánacani yó suni jecu-ni cúu. ¹⁰Te núu na quíji quiví jeē cúni yō ndíhi, yūcuán na te tuá coo jeē jíni yó jecu-ni.

¹¹Ná ni cuu yó súchi lúlí te ni cahān yō, ni jeni ni yō, ni jecūhun ni yō nájnūhun sūchi lúlí. Te ná ni jehnu yó te ni stóo yó modo sūchi lúlí. ¹²Te suni súcuan, jecu-ni

jécūhun ni yō vijna, nájnūhun jeē jíto yó núu ñin espejo jeē tú ndijin vāha. Te cúcuéé gá te jecūhun cáji ni yō ndíhi. Te vijna chi jecu-ni jíni yō, te cúcuéé gá te cuni vāha yó ndese Yaā cúu ya, nájnūhun jíni vāha ya yohó ndese ñayuu cúu yó. ¹³Núu súcuan te íyó úní jnúhun jeē quéndōo cutú níí cáni: Jeē candíje nihin yó jéē squícu ya jeē ni jéjníñu ya, jeē cócuhun ni yō tāca jéē vāha coo, jíin jéē cundáhú ni yō jnáhan yó. Te jnúhun cúndáhú ni chi jéhnú ndasí gá cúu nuū tāca jéē yáha.

Siquí jeē cácahān i tijní yuhu

14 Na cóndihvī ni rō cundáhú ni rō jnáhan ró, te suni cóndihvī ni rō cacān rō tāca táhū jeē jéhe Espíritu. Te tahū jeē cánuú gá cúu jeē nácani ró jnúhun ya. ²Chi tēē névāha tahū jeē cahān de tijní yuhu jeē tu jécūhun ni de, chi máá-ni Yaā Dios jiní jeē cahān de, nasūu ñáyuu. Chi ni ñin i ma jécūhun ni jeē cahān de. Chi sáha Espíritu jeē cahān de tāca jnúhun yísāhí. ³Te sa suhva tēē nácani jnúhun ya, chi jíin ñáyuu cahān de návāha ije i jíin jnúhun ya, te stáhvī ni de i, te cáhán ndeyí ni de jíin i. ⁴Te tēē jeē cahān tijní yuhu, chi máá-ni de íje jíin jnúhun ya. Te tēē jeē nácani jnúhun ya, chi sa suhva sáha de jeē ñáyuu cácaandíje íje i jíin jnúhun ya.

⁵Nújnahan ni ri jeē ndíhi ró cuu cahān rō tijní yuhu jeē tu jécūhun ni rō, te jeē cánuú ndasí gá cúu jeē nácani ró jnúhun ya. Chi jéhnú ga jniñu sáha tēē nácani jnúhun ya vēsú tēē cáhán tijní yuhu. Chi núu

tú tēe castūhun jnúhun cáhán de, te ma cuajníñu jeē íje ñayuu cáchandíje.

⁶Jeē yúcuan hermano jijnáhan ró, núu na jée rī nuū rō, te núu cahān rī tijni yuhu jeē tu jécūhun ni rō, ¿te ndé cuajníñu ún? Te núu na cáhán rī ñin jeē ni stéén yā, chí ñin jeē cútūhva ró jnúhun ndaā, chí ñin jeē nácani ri jnúhun ya, chí ñin jeē steén rī nuū rō, yúcuan cúu jeē cuajníñu.

⁷Sáha yó cuenta jeē nájnūhun instrumento música, vēsú tu técu, te cuu cata, nájnūhun flauta jíin arpa. Te núu tu jíta sñin sñin nota, ¿te ndese cuni yō na yaa jíta? ⁸Te núu corneta tu jécú cájí, te ni ñin tēe ma sátūhva de quihñin de guerra. ⁹Te suni súcuan róhó jijnáhan ró, núu tu cáhán cají ró jnúhun jecūhun ni ñayuu, ¿te ndese cuni i na vé cahán rō? Chi jnúhun cáhán rō ndíso tachī cuahān jíin. ¹⁰Te ndaā chi íyó cuéhē yuhu ini ñayiví, te tācá yuhu chi íyó ñayuu jécūhun ni. ¹¹Te núu tu jécūhun ni yō yuhu cáhán ñin tēe, te cúu yó nájnūhun tēe ñuu jicá núu tēe cáhán, te suni nájnūhun tēe ñuu jicá cúu de nuū maá yó. ¹²Jeē yúcuan róhó jée cácani ndasí ró nihñin rō tahū jeē jéhe Espíritu, na cácan rō tahū jeē sáha jeē íje ñayuu cáchandíje jíin jnúhun ya.

¹³Núu súcuan te ñayuu jeē cahán inga yuhu jeē tu jécūhun ni i, na cácan tahú i jeē cuu nacastūhún i yuhu ún. ¹⁴Chi núu jicán tahú yō jíin inga yuhu, te maá ánuá-ni yó cúu jeē jicán tahú, te tu ndé jéjníñu nuū jeē níjnūni yō. ¹⁵¿Ndese sáha yó núu súcuan? Na cácan tahú yō jíin ánuá yō, te suni jíin jée níjnūni

yō. Na cáta yó yaa ñi jíin ánuá yō, te suni jíin jée níjnūni yō. ¹⁶Chi núu nácuatáhú ró máni jnúhun jeē ní quiji nuū ánuá rō te tu jécūhun ni rō, núu súcuan te tēe jíni sōho te tu jécūhun ni, ma cúu nacuatáhú de jíin ró. Chi tu jíni cuiti de na jnúhun cáhán rō. ¹⁷Ndaā chi vāha nácuatáhú maá ró, te inga de chí tú na vé nihñin de jeē íje de jíin jnúhun ya. ¹⁸Na cútahū rī nuū Yaā Dios jeē cahán gā rī jíin tijni yuhu vēsú maá ró jijnáhan ró. ¹⁹Te vēsú súcuan te núu íne ri nuū cáyūcu tútú ñayuu cáchandíje, te nújnahan gā ni rī cahān rī uhñin-ni jnúhun jeē jécūhun ni i te stéén nuū i, vēsú jeē cahán rī uxī mil jnúhun jíin inga yuhu jeē tu jíni cuiti i.

²⁰Hermano jijnáhan ró, ma cáni ni rō nájnūhun sūchi lúlí, chí sa suhva na íje ró jée jecūhun vāha ni rō. Te coo ró nájnūhun sūchi lúlí jée tu jíni i jniñu néé. ²¹Te yósó núu tútú ley yā jenahán: Jíin jnúhun cácahān tēe inga yuhu, jíin jnúhun cácahān tēe ñuu jicá, sáha ri jeē cúni sōho ñayuu yáha jnúhun ri. Te ni jíin súcuan ma sáha i cuenta jnúhun cahān rī, achí maá Jítóho yō. ²²Núu súcuan te tahū jeē cahán yō tijni yuhu, yúcuan cúu ñin jeē steén poder Yaā Dios nuū ñayuu tu cáchandíje, nasūu núu ñayuu cáchandíje. Te jeē nácani yó jnúhun ya, yúcuan cúu jeē steén nuū ñayuu cáchandíje, nasūu núu ñayuu tu cáchandíje. ²³Núu súcuan te núu ndíhi ró ñayuu cáchandíje cáhiyo tútú, te tāca ró cácahān sñin sñin yuhu, te quivícoo ñayuu tu jécūhun ni jíin ñayuu tu cándíje, ¿te á má cahán i jeē ní canduu loco rō? ²⁴Te

núu tāca ró cánacani jnūhun ya, te núu quīvi iin tēe tu cándíje chí iin tēe tu jécūhun ni, yūcuán na te nacuni de jeē tēe íyó cuéchi cúu de, te coto ndee de máá de jíin jnúhun cánacani ró. ²⁵Te nucūhun ni de tāca jéē ní jeni yuhu ni de jíin ánuá de. Yūcuán na te jecuiñī yití de te chiñúhún de Yaā Dios. Te cahān de jeē íne ndije Yaā Dios jíin ró jijnáhan ró.

**Siquī jeē yucún yíñúhún
na cóo nuū ndutútú yó**

²⁶Núu súcuan hermano jijnáhan ró: Nuū cándutútú ró te tāca ró coo iin yaa iī cata ró, chí iin jnūhun stéén rō, chí iin jnūhun jeē ni sáha Yaā Dios jeē jécūhun ni rō, chí inga yuhu jeē cahán rō, chí jéē nácástūhun ró jnūhun inga yuhu ún. Te ndíhi ún na sáha ró návāha ije ñayuu cácandíje jíin jnúhun ya. ²⁷Te núu cáhiyo tēe cahān inga yuhu, te na cáhán uū de chí únī-ni de, te ná iin ná iin de na cáhán. Te suni jíni ñúhún jéē nacastūhún iin tēe jnūhun ún. ²⁸Te núu tu íyó tēe jeē cúu nacastūhun jnúhun ún, te tēe cácahān inga yuhu, vāha ga ma cahán de nuū cándutútú ró, te na cáhán maá-ni de jíin Yaā Dios. ²⁹Te suni súcuan tēe cánacani jnūhun, na cáhán uū de chí únī de, te sava ga rō nacani ni rō núu íyó ndāá jeē cácahān tēe ún. ³⁰Te núu inga tēe néne ni nihīn de iin jnūhun jeē ni stéén yā nuū de, núu súcuan te tēe cáhán na jecuiñī jeē cahán de, návāha cahān inga tēe ún. ³¹Te súcuan te ná iin ná iin ró cuu nacani ró jnúhun jeē stéén yā nuū rō, návāha cutūhva ró te coo ndeyí

ni rō. ³²Te tēe cánacani jnūhun, jíni ñúhún cuatáhú de jeē nácani inga tēe jnūhun te jecuiñī jeē cahán maá de. ³³Chi Yaā Dios cuní yā jeē coo nayúú méhñu ró, násūu jéē sacā núu cuvaā rō.

Te nájñūhun casáha tāca grupo hermano cácandíje, ³⁴suní súcuan táca ñahan cándutútú jíin ñayuu cácandíje, na cóo nayúú ña. Chi tú vāha jeē cahán ña, chi sa cuatáhú ña nájñūhun cáhán tutu ley yā. ³⁵Te núu cuní ña cucáhnū ni ña iin jnūhun, te nde vehe na cájnūhún ña yī ña. Chi jnūhun canu cúu jeē cahán iin ñahan méhñu núu cándutútú ró.

³⁶Te na sáha ró cuenta jeē tu ní quénda jnūhun Yaā Dios nuū maá ró jijnáhan ró, te nasūu máá iin máá ró ní cánihīn jnūhun ya. ³⁷Núu iin tēe jéni ni de jeē tēe nácani jnūhun ya jíin tēe névāha Espiritu cúu de, núu súcuan te na cuájñúhún de jeē jniñu ní ndacu Jitoho yō cúu jeē tēe ri yāhá. ³⁸Te núu tu jétáhú de jnūhun yáha, suni ma cuatáhú yó de.

³⁹Núu súcuan, ñānī mánī jijnáhan ró, na cóndihvī ni rō nacani ró jnúhun ya, te ma cásī rō nuū tēe cácahān sīn sīn yuhu. ⁴⁰Te yúcún yíñúhún na sáha ró táca jniñu.

Jnūhun jeē ní natecu Cristo

15 Hermano jijnáhan ró, vijna te nucūhun ni rō jnūhun jnáma ya yohó jeē ní nacani ri nuū rō. Te jnūhun ún chi je ni cajetáhú ró, te suni cáhiin nihīn ró jíin. ²Te suni jíin jnúhun ún te ni jnama ya rohó, te núu cáhiin nihīn ró jíin jnúhun ni nacani ri nuū rō, te núu tu ní cácandíje cáha ró.

³Chi jñūhun cánuú gá jeē ni níhīn maá rí ni nastéén rī nuū rō: Jeē ni jíhī Cristo siquī cuēchi yó, nájnūhun je cáhán tutu iī nde jenahán. ⁴Te ni quindūji ya, te ni natecu yā nuū uní quivī, nájnūhun cáhán tutu iī. ⁵Te ni nane ya nuū Pedro. Te sáá te ni nane ya nuū ndihúxí gā apóstol. ⁶Te sáá te ni nane ya nuū vihyá gā uhūn ciento hermano jeē cáyūcu tūtú. Te sava i tēcu gā nde vijna, te sava i je ni jíhī. ⁷Te sáá te ni nane ya nuū Jacobo, yūcuán na te nuū ndihī ga apóstol.

⁸Te jeē sándihí na te ni nane ya nuū maá rí. Te nájnūhun iin jeē ní cacu yúte, súcuán cúu jeē iin sanaa-ni te ni nduu ri apóstol. ⁹Chi tēe núu ga nuū tāca gá apóstol cúu ri, te ni nasūu tēe vāha cúu ri jeē cónaní rí apóstol, chi ni jito xeēn rī ñayuu cácanđije nuū Yaā Dios. ¹⁰Te siquī jeē ni sáha Yaā Dios jeē váha ruhū, jeē yúcuán cúu ri apóstol vijna. Te jeē ni sáha ya jeē váha ruhū, chi tú cāha ní cúu, chi sa ni scáca ga rī jñūhun ya vēsú tāca gá tēe apóstol. Te nasūu máá rí ni sáha, chi Yaā Dios ni sáha ya jeē váha un jíín rí. ¹¹Núu súcuán te vēsú ruhū chí tāca gá tēe ún, súcuán cánacani ri jñūhun, te súcuán ni cacandíje rō.

Jñūhun jeē natecu ndīyi

¹²Te jeē cánacani ri jñūhun Cristo jeē ní natecu yā mēhñu ndīyi, ¿te naun cácahān sava rō jēe ma nátecu ndīyi? ¹³Chi núu jeē tú natecu ndīyi, te suni tu ní nátecu Cristo nuú. ¹⁴Te núu jeē tu ní nátecu Cristo, te cánacani cāha rí jñūhun ya nuú, te suni cácanđije cāha rō núú. ¹⁵Chi núu jeē súcuán cúu núú, te cácuu

ri tēe jeē tu cácahān ndaā jñūhun Yaā Dios, chi ni cacachi rī jeē ní nastécu Yaā Dios Cristo. Te núu jeē tú natecu ndije ndīyi, núu súcuán te tú ndaā jeē ní nastécu Yaā Dios Cristo. ¹⁶Chi núu tú natecu ndīyi, te ni Cristo suni tu ní nátecu yā nuú. ¹⁷Te núu tu ní nátecu Cristo, te cácanđije cāha rō te cándiso iī gā rō cuēchi rō núú. ¹⁸Te núu jeē súcuán cúu núú, te suni je ni cajnahñu ndetū ñayuu ni cacandíje Cristo. ¹⁹Chi núu tú natecu ndīyi, te núu máá iin-ni siquī vida yáha ñūhun ni yō jeē sáha Cristo jeē váha yóhó, núu súcuán te ndahú ndasí gá cácuu yó vēsú tāca gá ñayuu, chi cácanđije cāha yó nuú.

²⁰Te tuú chi íyó ndaā jeē ní natecu Cristo mēhñu ndīyi. Te máá yá cúu jeē xíhna gā ni natecu nuū tāca gá ndīyi jeē natecu. ²¹Chi siquī jeē ni stfvi iin-ni tēe Adán, te ni quejéé jíhí ñayuu. Te suni súcuán siquī jeē ni sáha iin-ni tēe Cristo, te natecu ñayuu. ²²Chi nájnūhun cájihī ndihī yó síquī jeē cácuu yó yúcuán Adán, suni súcuán natecu ndihī yó síquī jeē yfhi yó ndaha Cristo. ²³Te ná iin ná iin ndese ndíquín jñáhan máá: Xíhna gā Cristo ni natecu yā, te sáá te quivī ndíji ya te natecu tāca ñáyuu yfhi ndaha ya. ²⁴Yūcuán na te jīnu tiempo, te snāā yā poder tāca enemigo jeē cujéhnu jíín jēe ndácu jniñu jíín jēe iyó poder. Te ndihī jeē ndácu ya jniñu nuū, nacuāha ya nuū Tatá yā Yaā Dios. ²⁵Chi cánuú jēe ndacu Cristo jniñu nde quiji quivī jeē quénde Yaā Dios poder tāca jēe jíto uhū nuū Cristo, te stóho ya. ²⁶Te jeē sándihí na te

snáa yā cuehyi jéhni ñayuu. ²⁷Chi cáhán tutu ii jeē sáha Yaā Dios jeē cujéhnú Cristo siquī ndíhi, te cuatáhú núu yā. Te jeē cáhán jeē cujéhnú ya nuū ndíhi-ni, te jíní vāha yó jéē maá Yaā Dios ma quíhi ya ndaha Cristo, chi Yaā Dios cúu jeē ni chíhi tǎcá un ndaha Cristo.

²⁸Te ná ni quívi ndíhi ún ndaha Cristo, yūcuán na te suni máá Cristo jeē cúu ya Sēhe, quívi ya ndaha Tátá yā, Yaā jeē ní chihi tǎcá un ndaha ya. Te súcuan te máá Yaā Dios jnií ya ndíhi-ni.

²⁹Te íyó ñáyuu cájendute jehē ndíyi. Te núu tú natecu cuíti ndíyi, ¿te najehē cájendute i jehē ndíyi núu súcuan?

³⁰Te ruhū jijnáhan ri, ¿najehē cúu jeē ndiquivī cájendeyí ni rī jító ri jnūndóho cuu rī, te núu tú natecu ndíyi? ³¹Hermano, nájñūhun íyó ndáa jeē cúsií ni rī siquī jeē cácandíje ró Jítóho yō Jesucristo, suni súcuan íyó ndáa jeē ndiquivī nducú ñáyuu cahni ruhū siquī jñíñu ya. ³²Te jeē ní ndoho ri ni casáha tēe xeēn ñuu Efeso, jeē cácuu de nájñūhun quíti xéén, ¿te na vé nihín rī siquī un núu súcuan? Chi núu tú natecu ndíyi, te cuu cahán yō nájñūhun áchí iin jñūhun: Na cúsií ni yō caji yō coho yó, chi sanaa te sajñē te cuu yō, achi yō nuú.

³³Ma cuáha ró jnúhun stáhú ñáyuu rohó. Chi áchí iin jñūhun: Núu cájica ró jíní ñáyuu neé, te stívi i róhó jéē tuá caca ndaā rō.

³⁴Nachuhun ni rō jijnáhan ró, te sáha ró jniñu ndaā, te ma sáha ga rō cuēchi. Chi sava ró tu cájini cuíti rō ndese Yaā cúu Yaā Dios. Súcuan cáhán rī návāha na cúcanu rō.

Ndese natecu ndíyi

³⁵Te sanaa te cahán iin ró: ¿Ndese natecu ndíyi? ¿Ndese coo yiqui cúñu i? achi rō. ³⁶Tu jécūhun cuíti ni rō núu súcuan. Chi cúu nájñūhun jeē cátají ró táca tata chíji ñūhun návāha nane yucū i. ³⁷Te tata jeē quívi chíji ñūhun, núu trigo chí inga tata, chi nasūu yúcū cúu, chi máá núní-ni cúu. ³⁸Te cuéé gá te cane, chi Yaā Dios ni jēhe ya yucū tata ún, ndese ni nujnahan ni maá yá, te ná iin ná iin tata chi sín sín cáa yucū ni sáha ya. ³⁹Te suni súcuan tǎcá yiqui cúñu, chi tú inuú cándāa. Chi sín cáa ñayuu, te sín cáa quíti, te sín cáa saa, te sín cáa chācá. ⁴⁰Te suni súcuan cúu tǎca jéē iin andiví jíní táca jéē íyó ñáyiví. Te sín luu cáa jeē iin andiví, te sín luu cáa jeē íyó ñáyiví. ⁴¹Te sín ndíndēe níandii, te sín ndíndēe yóō, te sín ndíndēe táca quími. Te tǎcá iin iin quími chi suni sín sín ndíndēe. ⁴²Te suni súcuan coo jíní ndíyi jeē natecu. Ndíyi jeē chindūji yó chi téhyū, te jeē nastécu yā chi ma cúu gā. ⁴³Jeē chindūji yó chi ndáhú cáa, te jeē nastécu yā chi luu cujéhnú. Jeē chindūji yó chi tú na fuerza, te jeē nastécu yā chi coo fuerza. ⁴⁴Jeē chindūji yó chi iin yiqui cúñu cuenta ñayiví cúu, te jeē nastécu yā chi iin yiqui cúñu cuenta Espíritu yā cúu. Chi íyó yiqui cúñu cuenta ñayiví, te suni íyó yiqui cúñu cuenta Espíritu.

⁴⁵Chi súcuan yósó núu tútu ii: Adán, tēe xihna ñúhún, ni cuvāha de jíní vida cuenta ñayiví, áchí. Te Cristo cúu nájñūhun inga Adán uū, te máá yá cúu Espíritu jeē

jéhe vida. ⁴⁶Te nasūú yiqui cúñu cuenta Espíritu cúu jeē ní cuvāha xihna gā, chi sa suhva yiqui cúñu cuenta ñayīví, te sáá te nduu cuenta Espíritu. ⁴⁷Te cuenta ñayīví cúu tēe xihna ñúhún, chi ni cuvāha de jíin tícachā ñuhun. Te Adán uū jeē cúu máá Jítóho yō, chi nde andíví ní quiji ya. ⁴⁸Te ñayuu ñayīví yáha, chi cúu i jnáhan Adán jeē ní cuvāha jíin tícachā ñuhun. Te ñayuu jeē quívicoo andíví, chi ndúu i nájnūhun máá Yaā ní quiji nde andíví. ⁴⁹Chi jeē cáa yó nájnūhun tēe ni cuvāha jíin tícachā ñuhun, suni súcuan coo yó nájnūhun cáa máá Yaā ní quiji nde andíví.

⁵⁰Jnūhun yáha cástūhun rí nuū rō jijnáhan ró, hermano, jeē yiqui cúñu yō cuenta ñayīví yáha, ma cúu quīví ñuu nuū ndácu Yaā Dios jniñu. Chi jeē jihí cúu, te ma cúu quīví nuū cótecu níf cáni. ⁵¹Te cúní rī jeē na jécūhun ni rō jnūhun yáha jeē ní yisāhí: Nasūú ndíhi yó cuu, te ndíhi yó chi nasāma yiqui cúñu yō. ⁵²Chi quīví jeē cuécu sandíhí na trompeta, te ñin yachī-ni, nájnūhun ñin jeē nácuenī-ni yó, te nasama ya yohó. Chi cuecu trompeta un, te natecu tāca ndíyí jeē ma cúu gā i. Te tāca yó jeē cátecu yō quīví ún, chi nasama ya yiqui cúñu yō. ⁵³Chi jeē tehyú yāhá, cánuú nucūhun jeē ma téhyú gā. Te jeē jihí cánuú nucūhun jeē ma cúu cuítí gā. ⁵⁴Chi jeē jihí jeē tehyú, chi quiji quīví jeē nucūhun jeē ma cúu gā ma tehyú gā. Yūcuán na te cundaā jnūhun yósó núu tútu ii: Jíin poder yā ni snáa yā cuehyī jéhni ñayuu. ⁵⁵Cuehyī jéhni yóhó ¿ndese ga cuu sáha xeēn jíin yó? Chi natecu yō.

¿Te ndese ga cundeyí jíin yó? Chi snáa yā. Achí tutu. ⁵⁶Chi cuēchi cúu jeē sáha jeē cundeyí cuehyī jéhni ñayuu. Te ley yā jenahán sáha jeē náne cuēchi siquī yō. ⁵⁷Te na cútahū yō nuū Yaā Dios, chi jíin máá Jítóho yō Jesucristo sáha ya jeē cundeyí yó siquī cuēchi jíin siquī jnūhun cuu yō.

⁵⁸Jeē yúcuan, ñání mání, cuiñí ñihin ró te ma cáca yátá ró jijnáhan ró. Te níni na sájniñu vāha ró jíin jniñu máá Jítóho yō. Chi je cájini rō jeē tu cásájniñu cāha ró jíin máá Jítóho yō.

Siquī jeē cáquin i xūhún cuu tācá hermano

16 Te vijna te cahān rī siquī xūhun jēe cáquin rō cuu hermano cácandíje cándoho ndáhú. Suni na sáha máá ró jijnáhan ró nájnūhun ni ndacu ri nuū tāca grupo ñayuu cácandíje ichi Galacia. ²Tācá domingo te ná ñin ná ñin ró chuvāha sñin ró jecu xūhún, núu ndese ni nihín maá ró, návāha quivī jeē jinú rī nuū rō te je íyó túhva. ³Te jeē jeé rī, te cuāha ri carta nuū tāca tēe jeē nácāji ró, te tají rí de quingoo de nuū tācá hermano cáyucú Jerusalén, quisiáha de xūhun jēe ní casocō rō. ⁴Te núu íyó vāha jeē quihín rī, te suni quihín rī jíin de jijnáhan de.

Jeē cahán Pablo siquī jeē quícondēhe de ñayuu cácandíje

⁵Te jeē jeé rī nuū rō jijnáhan ró, te jini ñúhún jeē xihna gā jeē rī región Macedonia, yūcuán na te jeé rī ñuu rō Corinto. ⁶Te sanaa te quendōo ri jíin ró jijnáhan ró jecu

tiempo, chí sanaa te coyūcu yó níí tiempo mījin. Yūcuán na te cuu chindéé ñáhán ró ruhū, núu ndé chi quihín tucu ri. ⁷Chi tu cúní rī jeē rī nuū rō vijna te yāha yachī rī quihīn rī, chí ñūhun ni rī jeē quendōo ri jíin ró jecu tiempo, te núu cuāha Jítoho yō jnūhun. ⁸Te cone ri ñuu Efeso yāhá nde na yāha quivī Pentecostés. ⁹Chi coo cuehē ñayuu scandíje ri, te vāha quihīn jniñu Jítoho yō. Te suni íyó cuéhē ñayuu cácuu contra.

¹⁰Te núu na jée Timoteo, te sáha ró jée coo sīi ni de mēhñu ró, te ni iin ma cáni ni de siquī. Chi suni jniñu máá Jítoho yō sáha de, nájñūhun máá rí. ¹¹Núu súcuan te ni iin ró má sajee ni rō nuū de. Chi sa suhva chindéé ñájñáhan ró jíin de jeē na quihín gā de, te coo ndeyí coo sīi ni de, návāha ndiji de coto jnáhan ri jíin de. Chi ruhū jíin sava ga hermano cándetu ri de.

¹²Te hermano Apolos chi ni cahān ndahú rí jíin de jeē na jée de jíin sava ga hermano, condēhé de rōhó. Te ni jeni ni de jeē ma cúu jeē de vijna. Te núu na núne de te jeē de.

Saludo jeē sándīhí

¹³Ndito coo ni rō jijnáhan ró, te cuiñi nihin ro jíin jnúhun cácandíje ró. Te téyí na cóo ni rō, te na cóo fuerza ini rō. ¹⁴Te tāca jée casáha ró, na sáha ró jíin jnúhun cúndáhú ni jnáhan.

¹⁵Hermano, cájini rō jeē xíhna gā ñayuu vehe Estéfanas ni cacandíje ichi Acaya. Te ni cajēhe i máá i nuū jniñu jeē chindéé ñáhán i tācá hermano cácandíje. ¹⁶Te cúní rī jeē suni máá ró jijnáhan ró, cuatáhú váha ró ñáyuu casáha súcuan, jíin táca ñáyuu cachindéé ñájñáhan te casájniñu siquī jniñu ya. ¹⁷Cúsīi ni rī jeē ní quijicoo Estéfanas jíin Fortunato jíin Acaico, chí tēe yáha ni cajejniñu de nuū rī jehē rō jeē tu ní cáhīyo ró jíin rí. ¹⁸Chi ni ndundeyí ni rī, te suni súcuan máá ró jijnáhan ró, ni casáha de. Te cánuu cuajnúhún ró tāca tēe cándāa súcuan.

¹⁹Sándeýí ni rō jijnáhan ró, áchí táca grupo ñayuu cácandíje cáyūcu Asia. Aquila jíin Priscila jíin ñáyuu cácandíje jeē cándutútú vehe de, cácahān i jeē sándeýí ndasí ni rō jíin jnúhun máá Jítoho yō. ²⁰Te tācá hermano cácahān i jeē sándeýí ni rō. Te jeē cahán rō jíin táca jnáhan ró, te yíñúhún techūhu ró ndaha i.

²¹Ruhū Pablo, jíin ndaha máá rí tēe ri jnúhun yáha jeē na sándeýí ni rō jijnáhan ró.

²²Te núu ndé iin tu íyó mánī jíin Jítoho yō Jesucristo, te na jnáhnú ndetū i núu súcuan. Te na cáhán yō: Jítoho ná, cúní na jée yachī ndiji ní.

²³Te ñūhun ni rī jeē maá Jítoho yō Jesucristo na sáha ga yā jeē váha rōhó jijnáhan ró. ²⁴Te manī rī jíin ró jijnáhan ró jée cácandíje ró Cristo Jesús. Súcuan na cóo. Amén.

CARTA UU JEE NI TEE SAN PABLO APOSTOL NUU ÑAYUU ÑUU CORINTO

1 Máá rí cúu Pablo, apóstol Jesucristo, chi súcuan ni nujnahan ni Yaā Dios ni tají yá ruhū nacani ri jnūhun ya. Te ndindúú rí jiín hermano yō Timoteo cátee ri carta yáha cuájeē nuū rohó hermano ñuu Corinto jeē cácanđíje ró Yaā Dios, jiín nuū ndíhi róhó jéē cáyíhi ndaha Yaā Dios jeē cáyūcu níí cáhnu Acaya. ²Te cáñuhun ni ri jeē Tatá yō Yaā Dios jiín Jítóho yō Jesucristo na sáha ga yā jeē váha róhó te sáha ya jeē coo ndeyí coo síi ni rō.

Siquí jeē ní ndoho Pablo jnūndóho

³Na cáhán yō jeē yóhyo cújéhnu Yaā Dios, Yaā cúu Tátá maá Jítóho yō Jesucristo. Chi máá yá cúu Tátá yō jeē cundáhú ni yohó, te níni sáha ya jeē ndúsiī ni yō. ⁴Chi sáha ya jeē ndúsiī ni yō siquí táca jnúndóho ndóho yó, náváha suni cuu sáha máá yó jeē ndúsiī ni jnáhan yó jéē cándoho jnūndóho. Chi nájnūhun ni sáha ya jeē ndúsiī ni maá yó, suni súcuan sáha yó jéē ndúsiī ni i. ⁵Chi jeē ndóho yó cuehē jnūndóho nájnūhun ni ndoho Cristo, suni súcuan nihīn yō cuehē jnūhun ndusiī ni, sáha Cristo. ⁶Jeē

yúcuan núu cándoho ri jnūndóho te súcuan te cuu sáha ri jeē ndúsiī ni rō te quendōo vāha ga anuá rō. Te jeē sáha Yaā Dios jeē ndúsiī ni rī, suu sáha tucu jeē ndúsiī ni maá ró, te quéndōo vāha ga anuá rō. Te súcuan te nihīn rō fuerza jeē cuándeyí ni rō jiín táca jnúndóho nájnūhun cándoho ri. ⁷Te cáñuhun ndasí ni rī jeē cúu róhó, chi cájini ri jeē nájnūhun cándoho ró jnúndóho jiín rí, suni súcuan ndusiī ni rō jiín rí sáha máá Yaā Dios.

⁸Hermano, cácuni ri jeē na cúni rō jijnáhan ró ndese ni candoho ri ichi Asia. Chi yóhyo xeē jnūndóho ni cajito ri, nde je yajni tuá canda ri, te ni jeni ni rī jeē cuu rī nuú. ⁹Te siquí jeē ní cajehnde ni rī cuu rī, te yúcuan ní sáha jeē ní cajecūhun ni rī jeē ma tenuū rī maá rí chi tú jniñu ri, chi sa suhva Yaā Dios jeē nastécu ndíyi tenuū rī. ¹⁰Chi máá yá ni scácu ruhū jijnáhan ri nuū jnúndóho xeē jeē jé yajni cuu rī nuú, te suni súcuan scácu ya ruhū vijna. Te ñúhun ni rī jeē suni scácu tucu ya ruhū ichi núú gā. ¹¹Te suni na chíndéé ñáhán ró rúhū jijnáhan ri jeē cacān tahú rō jehē ri. Chi núu cuehē ñayuu cacān tahú jehē ri, te

sunì cuehē i cuu nacuatáhú jehē rì jeē nì sáha ya jeē váha ruhū.

**Jeē ní cucuéeé Pablo quihín
de ñuu Corinto**

¹²Iyó iin jeē sáha jeē cácusii nì rì: Chi vāha íyó nì anuá rì jeē váha ndoo te ndaā nì cajica rì nuū ñáyuu ñayiví, te víhyá gā nuū maá ró jijnáhan ró. Chi siquī jeē váha nì Yaā Dios, te nì chindéeé ñáhán yá ruhū, te nasūu síquī jéē ndichí máá rí cúu jeē ní cajica rì súcuan. ¹³Te jnūhun cátee rì nuū tāca carta rì, chi máni jeē cúu cahu ró te jecūhun nì rō cúu. Te ñūhun nì rì jeē jecūhun vāha ga nì rō, ¹⁴nájñūhun je cájecūhun nì rō jecu. Te súcuan te cuu cusii nì rō siquī rì quivī ndiji Jitoho yō Jesús, nájñūhun cácusii nì rì siquī maá ró.

¹⁵Te siquī jeē súcuan nì cucáhnu nì rì, te jeē yúcuan ní jeni nì rì jeē núu na quíhín rì Macedonia te jeē rì nuū maá ró xihna gā, návaha cusii nì rō jeē jécondēhe rí rohó úu jínu núú. ¹⁶Chi nì jeni nì rì jeē jécondēhe rí rohó, te yāha rì quihín rì Macedonia, te jeē nándicó rí Macedonia te ndiji tucu rì nuū rō. Yūcuán na te cuu chindéeé ñáhán ró ruhū jeē quihín rì ichi Judea nuú. ¹⁷Te jeē súcuan nì jeni nì rì, ¿te á tée tu nácani vāha nì cúu rì jeē tu ní jéé rì nuū rō, chí naún? ¿A cájeni nì rō jeē cúu rì nájñūhun ñayuu ñayivi jéé yachí cahán jeē cuu, yūcuán na te tuú, chí naún? ¹⁸Tuú chi máá Yaā Dios jíni yā jeē tu cáhán rì jíni ró jeē cuu, te yachí nácahān rì jeē ma cúu. ¹⁹Chi ruhū jíni Silvano jíni Timoteo nì canacani rì jñūhun Jesucristo Sēhe

Yaā Dios nuū rō jijnáhan ró. Te máá yá tu cáhán yā jeē cuu te nacahān tucu ya jeē ma cúu. Chi squícu ya jeē cahán yā. ²⁰Chi ndihi jeē nì jéjñūhun Yaā Dios, squícu máá Cristo. Te jeē yúcuan cácahān yō jeē yóhoyo luu cújéhnū Yaā Dios, te cácahān yō Amén, chi ndihi squícu Cristo Jesús. ²¹Te Yaā Dios cúu jeē sáha jeē ruhū jijnáhan rì jíni rōhó jijnáhan ró, cáhiin nihin yó jíni Cristo, te nì sándoo ya yohó jéé cuajníñu yó núu yā. ²²Te sunì nì jēhe ya Espíritu yā jeē cóndee ini anuá yō, te cúu ya nájñūhun iin sello jeē steén jeē cúu yó séhe Yaā Dios. Te sáha Espíritu jeē iyó ndáa nì yō jeē cuāha Yaā Dios tahū yō.

²³Te jeē ná tu jeē rì nuū rō ñuu Corinto, nájñūhun nì jeni nì rì, suu cúu siquī jeē tu ní cúní rì cuxeēn rì nuū rō jeē tu cásáha vāha ró. Te máá Yaā Dios cúu Yaā jíni jeē cahán ndaā rì. Te íyó váha jeē na cúu rì te núu tu cáhán ndaā rì. ²⁴Te nasūu jéé cácuni rì ndacu nihin rì jniñu nuū rō siquī jñūhun cácandíje ró yá, chi je cáhiin nihin ro jíni jñūhun ún. Chi sa suhva cácuni rì chindéeé ñáhán rí rohó jéé na cúsi gā nì rō.

2 Núu súcuan te nì jeni nì rì jeē ma jéé rì inga jínu nuū rō jíni jñūhun cuxeēn rì te cucuíhyá nì rō sáha rì. ²Chi núu cucuíhyá nì rō sáha rì, ¿te ndé ñáyuu sáha jeē cusii nì maá rí? Tuá na inga ñayuu, chi máni máá rōhó, te ndese cuu te núu nì sáha rì jeē cucuíhyá nì rō. ³Te jeē yúcuan cúu jeē ní tee rì carta un núu rō, návaha nacani nì rō siquī cuéchi ró sáha, te ma cucuíhyá nì rì sáha cuéchi ró quívī jeé rì nuū rō. Chi sa suhva sáha ró jéé cúsi nì rì.

Te jíní vāha ri jeē núu cusī ni rī, te suni ndīhi ró jijnáhan ró cusī ni rō. ⁴Te jeē ní tee ri carta un núū rō, te yōho ni nacani ni rī siquī rō, te ni jnahuhū ni rī, te nde ndahyú rī ni tee ri. Te tu ní tée ri jeē sáha ri jeē cucuíhyá ni rō, chi sa suhva návāha cuni rō ndese yōho manī rī jín ró.

**Jeē íne cáhnu ni Pablo nuū
tée ni sáha cuēchi**

⁵Te jeē ní cucuíhyá ni rī ni sáha tēe jeē ni sáha cuēchi ún, te nasūu máá-ni ri, chi suni nde máá ró jijnáhan ró ni sáha de jeē ní cacucuíhyá ni rō jecu. Te cáhán ri jeē jecu-ni, chi tu cúní rī cuxeēn ndasí rí. ⁶Te jín jéē ní cacuxeēn rō nuū de ná ni candutútú ró, te jín yúcuan-ni te ni cuu-ni. ⁷Te vijna chi jíní ñúhún jeē cóne cáhnu ni rō nuū de, te sáha ró jéē ndúsī ni de, chi sanaa te caa ga cucuíhyá ni de, te ma ndúsī gā ni de. ⁸Núu súcuan te cáhán ndahú rí jín ró jijnáhan ró jéē steén tucu ró jéē iyó mání rō jín de. ⁹Chi jeē siquī jniñu yáha cúu jeē ní tee ri carta un núū rō, návāha coto ndee rī rohó núu cuatáhú váha ró jniñu ndácu ri nuū rō. ¹⁰Núu súcuan te núu íne cáhnu ni rō nuū ñayuu, te suni súcuan ruhū. Chi jeē íne cáhnu ni rī nuū ñayuu núu ni sáha i cuēchi, te sáha ri súcuan siquī jeē manī rī jín ró jító jínúu Cristo. ¹¹Chi cánúu cone cáhnu ni yō, chi tu cúní yō jeē nihín Satanás cuēchi siquī yō, chi je jíní vāha yó ndese ndúcú un stáhú yóhó sáha yó cuéchi.

**Jeē tu ní íyo nayúu ni
Pablo ini ñuu Troas**

¹²Ná ni jehēn rī ñuu Troas jeē nácani ri jñuhun Jitoho yō Cristo,

te vāha ni sáha ya jeē ni íyo modo jeē nácani ri jñuhun ya. ¹³Te vésú súcuan te tu ní íyo nayúu ni anuá rī, chi tu ní níjnáhan ri jín hermano yō Tito. Yūcuán na te ni nacuatáhú rí nuū ñáyuu yūcuán, te cuananducú rí de ichi Macedonia.

**Jñuhun jeē cujéhnu
ndúu yó jín Cristo**

¹⁴Te na cútahū yō nuū Yaā Dios, chi níní ndéca vāha ya yohó cuángoo yó jín Cristo Jesús, te ndúu yó jín yá jeē cujéhnu ndasí yá snāā yā poder ndīhi enemigo yā. Te jéjníñu ya yohó jéē scuité núu yó jñuhun ya tēcá-ni lugar, nájñuhun jíté núu ñin xicō asīn. ¹⁵Te cúu yó nájñuhun ñin sūje jeē jeén asīn nuū Yaā Dios sáha Cristo. Te nájñuhun jeē jinú xicō un núu ñáyuu cācu ánuá jín núu ñáyuu jnahnū ndetū. ¹⁶Nuū ñáyuu jnahnū ndetū chi cúu yó nájñuhun ñin xicō jeē cúu i sáha, te nuū ñáyuu cācu ánuá chi cúu yó nájñuhun ñin xicō váha jeē cótecu i sáha. Te ni ñin yó ma cánda yó sáha yó jniñu yáha, te núu ma chindéé ñáhán yá yohó. ¹⁷Te ruhū jijnáhan ri, tu cásáha ri nájñuhun cásáha cuehē tēe jeē cánducú de nihín de xūhun síquī jñuhun Yaā Dios. Chi sa cánacani ndaā rī jñuhun ya, chi máá Yaā Dios ni tají rúhū, te máá yá jiní jeē cánacani ndaā rī siquī jeē cácdánje ri Cristo.

Jñuhun siquī contrato jeē

3 Te jeē cáchān rī súcuan, ¿te á cájeni ni rō jeē cánducú tucu ri cahān rī jeē váha ga tēe cácuu ri, chí naún? ¿Te chí jíní ñúhún jéē steén rī carta recomendación nuū

rō, chí jéē cacán rī cuāha ró núū rī jijnáhan ri, nájnūhun cásáha sava i?

²Tuú chi máá-ni ró cácuu nájnūhun iin carta recomendación rī. Te jeē nūhun ni rī jeē ní cacandíje vāha ró ni sáha ri, suu cúu nájnūhun jeē yosó jnūhun carta un ini anuá rī. Te ndíhi ñayuu chi nájnūhun cáhu i, cúu jeē jiní i ndese ni nasāma ró. ³Chi máá ró cácuu nájnūhun iin carta jeē ní tee Cristo te cáscaca ri. Te nasūu jíin tinta ni tee ya, chi sa suhva jíin Espíritu Yaā Dios, Yaā técu. Te nasūu núū tabla yuú nájnūhun ni tee ya ley yā, chi sa suhva nuū anuá ñayuu ni tee ya.

⁴Te cacāhān rī súcuan, chi cácucahnu ni rī Yaā Dios siquī jeē ni sáha Cristo. ⁵Te nasūu jéē cájeni ni rī jeē cúu canda máá rí sáha ri jniñu ún. Chi sa suhva máá Yaā Dios sáha jeē cuu squícu ri. ⁶Te máá yá ni sáha jeē cuu cuajniñu vāha ri siquī contrato jeé yá. Te contrato yáha tu cáhān jeē squícu yó ley jeē ní tee jíin letra, chi sa suhva jeē caca yó jíin vida jeé, suu jeē ni jéhe Espíritu yā. Chi contrato ley jeē yosó jíin letra, jnahnū ndetū ñayuu sáha. Te jeē sáha máá Espíritu cúu jeē cótecu yō níf cáni.

⁷Te ley jenahán jeē ni jéhe ya nuū Moisés, ni yosó letra nuū tabla yuú. Te yōhyo ni kujéhnu, te ni ndindēe ndasí ni sáha, te nde Moisés ndí nuū de ni sáha. Te tu ní cúu coto vāha ñayuu Israel nuū de ni sáha. Te vēsú súcuan te cuéé-ni cuéé-ni ni ndahvā jeē ndíndēe núū de. Te núu súcuan ni kujéhnu ndasí ley jeē sáha jeē cuu ñayuu te jnahnū ndetū i, ⁸te sa víhyá gā kujéhnu ndasí gá jnūhun cotecu yō jeē jéhe Espíritu

nuū yō. ⁹Chi núu yōhyo ni kujéhnu ley un jéē jnahnū ndetū ñayuu sáha, te sa víhyá gā kujéhnu jnūhun jeē ndáhva Yaā Dios cuēchi yó. ¹⁰Chi ley un jéē ní kujéhnu nde saá, tuá kujéhnu cuítí, siquī jeē kujéhnu ndasí gá jnūhun Espíritu jeē iyó vijna. ¹¹Te núu súcuan ni kujéhnu ley jeē ni íyo jecu-ni tiempo, te sa kujéhnu ndasí gá jnūhun jeē coo níf cáni.

¹²Te jeē súcuan cáñuhun ni rī, jeē yúcuan cáhiyo téyí ni rī nácani ri jnūhun yáha. ¹³Chi tu cásáha ri nájnūhun ni sáha Moisés jeē ní jesi de iin sahma nuū de, návāha tú coto ñayuu Israel ndese cuandahvā jeē ní ndindēe núū de. ¹⁴Te ñayuu ún tu ní cájecūhun ni i. Te nde vijna núu cácahu ñayuu Israel tutu contrato ley jenahán, suni tu cájecūhun ni i, chi nájnūhun jési sahma un núū jeē níjnūni i, te tu cújiyo cuítí. Chi nde jeē candíje i Cristo, yūcuán na te cujiyo. ¹⁵Te suni súcuan nde vijna núu cácahu i tutu ley Moisés, te nájnūhun jeē jési iin sahma nuū jeē níjnūni i. ¹⁶Te jeē násāma ini iin ñayuu quívi i nuū máá Jítoho yō Cristo, yūcuán na te cújiyo-ni jeē jési ún. ¹⁷Chi Jítoho yō cúu máá Espíritu. Te nuū íne Espíritu máá Jítoho yō, yūcuan cúu nuū iyó libre ñayuu jeē tuá yíhi i chíji ley jenahán. ¹⁸Te jeē yúcuan máá yó jijnáhan yó, tuá jési nuū jeē níjnūni yō. Chi cácuu yó nájnūhun espejo jeē jéhe nduva, cúu jeē cájica ndaā yō te suu stéén ndese yōhyo luu cújéhnu máá Jítoho yō. Te máá yó tāca quívi cuanasāma yó cuandu luu ga anuá yō nájnūhun cáa máá yá. Chi máá Jítoho yō jeē

cúu ya Espíritu, súcuan sáha ya jíin yó.

4 Núu súcuan te tu ndínuu ni rí cánacani ri jnūhun ya. Chi siquī jeē ní cundáhú ni yā ruhū jijnáhan ri te ni jēhe ya jniñu yáha nuū rī. ²Te tu cásáha ri jniñu néé jēē cúcanu yō sáha, ni tu cájica cuu ri jíin jnúhun ndíchí stáhú, ni tu cásama ri jnūhun Yaā Dios. Chi sa suhva cácahān rī mání jnūhun ndaā. Te súcuan te cuu cuni tāca ñáyuu ini anuá i jeē cácahān ndaā rī jíto jínúū Yaā Dios. ³Te núu íyó ñáyuu tu jécūhun ni jnūhun jnama ya yohó jēē cánacani ri, te súcuan cúu nuū mání máá ñáyuu jnahñu ndetū. ⁴Te jeē tu cácañdije i, te máá jéxeén jeē ndácu jniñu ini ñayīvi yáha, ní jesi nuū jeē níjnūní i, návāha ma ndíndēe jnúhun Cristo ini anuá i, te ma cúni i jeē yóhoyo luu cújéhnu Cristo, Yaā jeē ínuú cáa jíin Yaā Dios. ⁵Te jeē cánacani ri jnūhun, te nasūu jnúhun máá rí, chi sa suhva jnūhun Jitoho yō Jesucristo cánacani ri. Te máá rí chi cácuu ri mozo-ni nuū rō jijnáhan ró jēē siquī jeē maní rī jíin Jesús. ⁶Chi ná ni sáha Yaā Dios ñayīvi te ni cahān yā jeē na cúndijin nuū néē. Te suni súcuan ni sáha ya jeē ní cundijin nuū anuá yō jeē cájécūhun ni yō siquī Jesucristo, ndese ndíndēe núū yā, cúu jeē yóhoyo luu cújéhnu ya nájnūhun cúu Yaā Dios.

**Jeē cándiquīn yō jnūhun
cácañdije yó yá**

⁷Te tāca jnúhun yáha jeē yóhoyo luu cújéhnu, chi nájnūhun jeē ñúhun ini iin quīsi ñuhun. Chi cácuu yó nájnūhun quīsi ñuhun,

chi tú na fuerza yō. Te jeē yúcuan cájini vāha ri jeē máá Yaā Dios cúu jeē jēhe poder siquī jnúhun yáha jeē yóhoyo luu cújéhnu, te nasūu fuerza máá rí cúu. ⁸Te jeē yúcuan, vēsú tāca lado cájito ri jnūndóho, te tu sáha jeē ma ndúsiī gā ni rī. Te vēsú cácuu íhyá ni rī siquī jnūndóho, te cáñuhun ni rī jeē quee vāha jniñu ri. ⁹Te vēsú cájito xeēn ñayuu ruhū, te máá yá tu stóo ya ruhū jijnáhan ri. Te vēsú cánducú i snāa i ruhū jíin jniñu sáha ri, te ma cúu. ¹⁰Te ndé-ni cúu nuū cuángoo ri, te nájnūhun ni ndoho Jesús jeē ni jíhī yā, suni súcuan cándoho ri jeē jé yajni cuu rī, návāha suni cuu stéén rī fuerza Jesús jeē técu yā ini yiqui cúñu rī. ¹¹Chi jeē niní cátecu rī, te tāca quívi je yajni cahni ñayuu ruhū jeē siquī Jesús. Te súcuan te cájito ñayuu jeē técu Jesús ini yiqui cúñu rī jeē cúu. ¹²Núu súcuan te ruhū jijnáhan ri, níni cúu jeē jé yajni cuu rī siquī jnúhun ya, te yúcuan sáha jeē cotecu máá ró níi cáni jijnáhan ró. ¹³Te yósó núu tútu ii: Ni candije ri te jeē yúcuan ní cahān rī, achí. Te suni jeē cácañdije máá rí cúu jeē cánacani ri jnūhun ya. ¹⁴Chi cájini rī jeē máá Yaā jeē ní nastécu Jitoho yō Jesús, suni súcuan nastécu yā ruhū, te sáha ya jeē iin cáhnu ni cuiñi ndíhi yó núu yā. ¹⁵Chi tāca jnūndóho yáha cándoho ri návāha coo vāha ró jijnáhan ró. Te súcuan te cayā cuehē gā ñayuu jeē sáha ya jeē vāha i. Yūcuán na te suni yóhoyo cuehē i nacuatáhú i nuū Yaā Dios, te cujéhnu ga yā sáha.

¹⁶Jeē yúcuan cúu jeē tu ndínuu ni rī, te vēsú cuandíhi fuerza yiqui cúñu rī, te sa suhva cuanduu

fuerza gā anuá rī tāca quívī. ¹⁷Chi jnūndóho jeē ndóho yó ñayívi yáha, tú-ni xeēn cúu, te yachī yāha. Te sáha jeē nihín yō iin tahū jeē kujéhu yó ní cáni jeē cáa ndasí gá vēsú jnūndóho ún. ¹⁸Te tu táñúhún yó nuū tāca jnūndóho jíto yó núu vijna, chi sa suhva táñúhún yó nuū tāca jéē váha jeē tu jíto yó núu vijna. Chi tāca jéē jíto yó núu vijna, chi yachī ndíhi, te tāca jéē tu jíto yó núu, chi coo níí cáni.

5 Chi yiqui cúñu yō jeē ndeé yó ñáyívi yáha, cúu nájnūhun iin vehe jeē náā. Te cájini yō jeē núu na náā, te cuāha Yaā Dios iin yiqui cúñu jeé, te suu cúu nájnūhun iin vehe jeē coo níí cáni ichi ándiví. Te nasūú iin vehe jeē sáha ñayuu cúu, chi jeē sáha Yaā Dios cúu. ²Te níni jéē ndeé yó vehe yáha jeē cúu yiqui cúñu yō, te cájitū ni yō sáha, chi yōhyo cúní yō jeē núcūhun yó yiqui cúñu jeé yó nde andiví. ³Chi jeē núcūhun yó un, te ma cóo máá na anuá yō jeē náā yiqui cúñu yō yáha. ⁴Chi níni jéē iyó gá yō ini vehe yiqui cúñu yō yáha, te jítu ni yō te cúcuíhyá ni yō. Te nasūu jéē cuní yō jeē stóo yó yiqui cúñu yō te coo máá-ni ánuá yō. Chi sa suhva cúní yō núcūhun yó jéē jeé, návaha ndahvā yiqui cúñu yō jeē náā, te coo máá jéē cótecu níí cáni. ⁵Te Yaā Dios cúu jeē ni sáha ya jeē súcuan coo yó. Te ni jēhe ya Espíritu yā jeē cóndee ini anuá yō, te sáha Espíritu jeē iyó ndāā ni yō jeē cuáha Yaā Dios tahū yō.

⁶Núu súcuan te níni cúu jeē cáducáhu ni rī. Chi cájini rī jeē níni ndeé gá rī chíji yiqui cúñu yáha, te jíca cúu rī jíin núu ndeé

máá Jítoho yō. ⁷Chi vijna chi cáducáhu rī jeē iyó yá jíin rí, vēsú ná tu coto rī nuū yā. ⁸Te cáducáhu ni rī, chi sáha rī cuenta jeē váha ga núu na quénda rī chíji yiqui cúñu yáha te quihín rī condee rī jíin máá Jítoho yō. ⁹Jeē yúcuan cúu jeē cáducú ndeyí rí sáha rī jeē cusíi ni yā jíin rí, vēsú núu ndeé gá rī yiqui cúñu rī chí vēsú núu condee rī jíin yá. ¹⁰Chi cánuú jéē ndíhi yó cuiñi yuhu mesa Cristo jeē sándaā yā jniñu yó. Te ná iin ná iin yó níhín yō siquí ndese ni casáha yó, á jéē váha chí jéē neé, ná ni condee yō chíji yiqui cúñu yō.

**Siquí jeē ndívicoo yó núu
jnūhun maní Yaā Dios jíin yó**

¹¹Núu súcuan te cándiso iyo rī nuū maá Jítoho yō, te jeē yúcuan ndúcú ndeyí rí scandíje rī ñayuu. Te jíni Yaā Dios jeē cáhiyo ndaā rī, te ñúhun ni rī jeē suni súcuan cájini maá ró. ¹²Te nasūu jéē cáducú tucu rī cahān rī jeē váha ga tēe cácuu rī, chi sa suhva cástūhun rí jeē cuu cusíi ni rō jeē siquí rī jijnáhan rī. Te súcuan te cuu stío cuiñi rō nuū ñayuu jeē cuteyí i siquí ndese cáa ñayuu, te tu sáha i cuenta ndese cáa ini anuá ñayuu. ¹³Te va sanaa te cájeni ni rō jeē tēe loco cácuu rī jeē cácahān rī súcuan. Te siquí jeē cándíhvī ni rī jehē Yaā Dios cúu. Te tuú chí cáhiyo vāha xiní rī, te jeē yúcuan cájejníñu rī jeē quéndōo vāha ró. ¹⁴Chi siquí jeē ní cundáhu ni Cristo ruhū jijnáhan rī cúu jeē cánuú nacani rī jnūhun ya. Chi cájini vāha rī jeē ni jíhi mañúhún-ni ya jeē siquí ndíhi yó, te jeē yúcuan nájnūhun ni jíhi ndíhi yó jíin yá.

¹⁵Chi ni jihī yā jeē siquí ndihi yó návāha tāca yó jēē técu, ma cótecu ga yō jeē sáha yó jēē cuní maá yó, chi sa suhva jeē cuní maá yá jeē ni jihī yā te ni natecu yā jeē siquí yō.

¹⁶Jeē yúcuan tuá casáha ri cuenta ndese-ni cándāa ñayuu, nájñuhun casáha ñayuu ñayīví. Te vēsú súcuan ni casáha ri cuenta siquī Cristo nde saá, jeē iin tēe-ni cúu ya, te vijna chi cájini rī jeē cúu ya Sēhe Yaā Dios.

¹⁷Chi núu iin ñayuu yíhi i ndaha Cristo, te je ni ndujeé i. Te tāca modo neé ní nevāha i, je ni yāha cuahān, te vijna je ni ndujeé ndihi.

¹⁸Te Yaā Dios cúu jeē sáha ndihi jeē yáha, chi jíin Cristo ni sáha ya jeē ní ndīvícoo yó núu jnúhun manī yā jíin yó. Te ni tejníñu ya ruhū jeē cánacani ri jnúhun jeē ndīvícoo ñayuu nuū jnúhun manī yā jíin i.

¹⁹Chi jíin Cristo te ni sáha Yaā Dios jeē ñáyuu ñayīví ndīvícoo i nuū jnúhun manī yā jíin i. Te tu ndácunehen ya cuēchi ni casáha ñayuu. Te ni tejníñu ya ruhū jeē cánacani ri jnúhun yáha ndese ndīvícoo i nuū jnúhun manī yā jíin i.

²⁰Núu súcuan te cácuu ri tēe cájica jniñu maá Cristo. Te jeē cahán rī, te nájñuhun jeē maá Yaā Dios cahán ndahú yá jíin ró. Núu súcuan te cácahān ndahú rī jíin ró jeē cahán Cristo, jeē na ndīvícoo ró núu jnúhun manī Yaā Dios jíin ró.

²¹Te Cristo, vēsú tú ni iin cuēchi ya, te ni sáha Yaā Dios jeē ní nucondee cuēchi yó síquī yā. Te súcuan te yóhó jēē yíhi ndaha Cristo, ni nucondee síquī yō jeē iyó ndāa yō nájñuhun iyó ndāa Yaā Dios.

6 Núu súcuan te síquī jeē cácuu ri tēe casájniñu jíin yá, te

cácahān ndahú rī jíin ró jeē ma stóo uun ró jnúhun jeē ni sáha Yaā Dios jeē váha rōhó.

²Chi áchí yá nuū tútu ii:

Maá tiempo cuní maá rī te cuni sóho rī jnúhun cáhán ndahú ró jíin rī.

Te maá tiempo jnáma ri ñayuu, te jnama ri rohó.

Achí yá. Te vijna-ni cúu maá tiempo jeē cuní yā, chi vijna-ni cúu tiempo ni quiji Yaā jnáma yóhó.

³Te cánducú rī jeē ma sáha ri ni iin jniñu jeē casi jeē candíje ñayuu, návāha ma cahán i síquī jniñu ndíso ri.

⁴Chi sa suhva cánducú rī jeē ndihi jeē sáha ri, steén jeē cácuu ri tēe cájejniñu nuū Yaā Dios. Jeē yúcuan cájendeyí ni rī jíin jēē ndóho ri jnúndóho, jíin jēē cúmanī nuū rī, jíin jēē yíi sáha jíin rī.

⁵Chi ni iyó tājni jínu jeē ní cacani i ruhū, jeē ní cachune i ruhū vecāa, jeē ní candonda i síquī rī, jeē ní casájniñu nihin ri, jeē ní cajehni rī māhna maá rī, jeē ní cahīyo ndite ni rī.

⁶Te suni cánducú rī jeē cuajnúhún i ruhū síquī jeē ndoo cájica ri, te cájecūhun vāha ni rī jnúhun ndaā, te cáhīyo paciencia ni rī, te vāha ni rī, te ndéé Espiritu Santo ini rī, te cákundáhú ndije ni rī jnáhan ri.

⁷Te cánacani ndaā rī jnúhun, te poder Yaā Dios íne jíin rī. Te jíin jnúhun ndaā cándahva rī tācá jniñu neé, chi nájñuhun jeē cájejnáhan ri síquī. Chi nájñuhun jeē ndónda un síquī rī te ndónda ri síquī.

⁸Iyó jínu yíñúhún ñayuu jíin rī, te iyó jínu tuú. Iyó jínu jéjnúhún i ruhū, te iyó jínu cácahān i síquī rī. Iyó jínu cácahān i jeē tēe stáhú cácuu ri, te iyó jínu cácahān i jeē tēe

ndaā cácuu ri. ⁹Iyó jínu cásáha i nájñuhun jeē tu jíní i ruhū jijnáhan ri, te iyó jínu jeē jiní vāha i ruhū. Iyó jínu jeē cuní ñayuu cahni i ruhū, te cátecu nahín rí. Te vēsú cástóho i ruhū, te tu cájihí rí sáha. ¹⁰Te vēsú iyó jéē cácuuñhyá ni rí, te níní cácusihí ni rí. Te vēsú tēe ndáhú cácuu ri, te sácúcá rí cuehē ñayuu jín jnúhun ya. Te vēsú tú na vé cánevāha ri, te jín mǎá yá te ndíhi-ni cúu jeē cánevāha ri.

¹¹Hermano ñuu Corinto, súcuan cúu jeē cácahān cají rí jín ró jijnáhan ró, chí siquī jeē maní rí jín ró, jeē yúcuan cáhí ndíhi ri ndese cándoho ri. ¹²Mǎá rí jijnáhan ri cácahān cají rí siquī jeē maní ndasí rí jín ró, te mǎá ró jijnáhan ró sanaa te tu súcuan cúu. ¹³Nájñuhun cáhān tatá jín séhe, súcuan cáhān ndahú rí jín ró jeē nájñuhun iyó mǎní rí jín ró, súcuan na cóo maní tucu ró jín rí.

Siquī jeē cúu yó templo Yaā Dios

¹⁴Ma quívi nduu rō jín jniñu néé cásáha ñayuu tu cácañdije, chí ma cúu coo inuú ró jín i. ¿Chí ndese cuu quijnáhan jniñu cásáha ñayuu ndaā jín jniñu cásáha ñayuu tú ndaā? ¿Te ndese cuu coyūcú inuú ñáyuu cájica jín luz yā jín ñáyuu cájica nájñuhun nuū néé? ¹⁵¿Ndese cuu coo inuú ni Cristo jín Satanás? ¿Te ndese cuu cuiñi cáhnu ñayuu cácañdije jín ñáyuu tu cácañdije? ¹⁶¿Te ndese cuu quijnáhan templo Yaā Dios jín ídolo? Chí mǎá ró cácuu templo Yaā Dios, Yaā técu, chí ndéé yá ini anuá rō, nájñuhun ni cahān yā:

Condee rí ini i te caca cuu ri mēhñú i,

te cuu ri Yaā Dios máa i,
te cuu i ñayuu máa rí.

¹⁷Te jeē yúcuan ní cahān gā yā:
Ma quívi nduu rō jín jniñu néé cásáha i,
te cusíin ró jijnáhan ró, áhí Jítóho yō.

Te ma jnǎí ró tāca jéē tú ndaā.
Yūcuán na te naquihin ri rohó,

¹⁸te cuu ri Tatá rō jijnáhan ró,
te cuu ró séhe yíí rí jín séhe síhí rí,
áhí Jítóho yō, Yaā jnǎí ndíhi poder.

Achí tutu.

7 Nuu súcuan, ñání mǎní, cánevāha yó tāca jnúhun yáha jéē ni jéjñuhun ya. Jeē yúcuan na sándoo yó mǎá yó tāca jéē sajnéhén yiquí cúñu yō jín ánuá yō. Te na cónso iyo yó núu Yaā Dios, te coo ndoo coo ií yō nuū yā jín ndíhi jniñu cúní yā.

Jeē ní canacani ni ñayuu Corinto siquī cuéchi i

²Coo maní rō jín rí jijnáhan ró víi. Chí tu ní sáha ri falta nuū ní ñin ró, te tu ní stívi rí anuá ni ñin ró, te ni ñin ró tu ní stáhú rí. ³Te nasūu jéē nducú rí cahān rí nuū rō cúu jeē cahān rí súcuan, chí je ni cahān rí jeē yóhyo maní rí jín ró. Te níní ñuhun ni rí rohó, vēsú cuu yō chí cotecu yō. ⁴Te cúcáhnu ndasí ni rí rohó jijnáhan ró, te cúsií teyí ni rí jeē siquí rō. Te vēsú cájito rí tāca jnúndóho yáha, te iyó ndeyí ni rí te cúsií ndasí ni rí jeē siquí rō.

⁵Ná ni jengoo ri Macedonia te tu ní iyo nayúu ni anuá rí, chí sa suhva yíí ní iyo jnúndóho jín rí tāca lado. Chí ni iyo jeē ní castáhān

jnáhan jíin rí, te ni cayūhu rí sanaa te caca yátá ñáyuu cácanđije. ⁶Te Yaā Dios jeē sāha jeē ndúndeyí ni ñáyuu cácuuíhyá ni, ni sāha ya jeē ní candundeyí ni rī, chi ni quiiji Tito ni sāha ya. ⁷Te ni candusiī ni rī, nasūu máá ĩn-ni siquī jeē ní quiji de, chi suni jeē ní ndundeyí ni de ni casáha ró. Chi ni castūhún de jeē cáñuhun ni rō coto tucu ró rúhū, jíin jéē cácuuíhyá ni rō jeē siquī cuēchi ró, jíin jéē cánacani ni rō jehē rī. Te jeē yúcuan ní cusīī gā ni rī.

⁸Te carta jeē ní tají rí nuū rō, vēsú ni sāha jeē ní cacucuíhyá ni rō, te tuá nácani cuíhyá ni rī jeē ni sāha súcuan. Chi vēsú ni cucuíhyá ni rī saá, te vijna te tuá, chi jíin rī jeē jecu-ni quivī ni cacucuíhyá ni rō ni sāha. ⁹Te vijna te cúsiī ni rī, te nasūu síquī maá jéē ní cacucuíhyá ni rō. Chi cúsiī ni rī jeē ní jejnīñu jeē ní cacucuíhyá ni rō, chi ni sāha jeē ní canacani ni rō siquī cuēchi ró. Chi ni cacucuíhyá ni rō nájñuhun cúní maá Yaā Dios, te nasūu jéē ni sáhuhū rī rohó. ¹⁰Chi núu cúcuuíhyá ni yō nájñuhun cúní Yaā Dios, te suu sāha jeē nácani ni yō siquī cuēchi yó te jnama ya yohó, te ma cóo gā jeē nácani cuíhyá ni yō. Te jeē cácuuíhyá ni ñáyuu tu cácanđije, tu jéjnīñu jeē nácani ni i, chi sa jnahñu ndetū i. ¹¹Te ni cacucuíhyá ni rō nájñuhun cúní Yaā Dios, te vijna te cájito ró náa vāha ni jejnīñu. Chi ni canacani ndasí ni rō ni sāha, te ni canducú ró jeē quéndōo ndaā rō, te ni cacuxeēn rō nuū téē ni sāha cuēchi, te ni cayūhu ró jeē ní castíví ró núū yā. Yūcuán na te yōhyo ni cacuni

rō coto tucu ró núū rī, te yōhyo ni candihvī ni rō ni cacuxeēn rō nuū téē ni sāha cuēchi ún. Te súcuan ni castéēn rō jeē tú cuēchi ró, chi tu ní cájejnūhún ró cuēchi ni sāha téē ún. ¹²Te jeē ní tee ri carta un, nasūu máá-ni jeē cúxeēn rī nuū téē ni sāha cuēchi ún, ni nasūu máá-ni jeē cahán rī jehē téē ni ndoho ni sāha de. Chi sa suhva ni tee ri návāha nucūhun ni rō ndese yōhyo ni canacani ni rō jehē rī jító jíinúu Yaā Dios. ¹³Jeē yúcuan ní candusiī ni rī jeē siquī rō.

Te víhyá gā ni cacusiī ni rī jeē ní jini rī jeē cúsiī ni Tito, chi ni nduu nayúú ini de ni casáha ró. ¹⁴Chi je ni cahán rī jíin de jeē cúsiī ni rī jeē vāha ñáyuu cácuu ró, te vijna te tu ní quéndōo ri jñuhun canu jeē siquī rō. Chi nájñuhun ni cajini rō jeē iyó ndaā tāca jñuhun ni cacahán rī jíin ró, suni súcuan ni cundaā jñuhun ni cacahán rī jíin Tito jeē cúsiī ni rī siquī rō jeē vāha cácuícu ró. ¹⁵Te víhyá gā maní de jíin ró vijna jeē ñuhun ni de jeē vāha ni cajetáhú ró jeē cahán de, te ni cahīyo yíñuhún ró ni candiso iyó ró núū de. ¹⁶Núu súcuan te cúsiī ni rī siquī jeē cucáhnu ndasí ni rī rohó jíjnáhan ró.

Jeē na cúsiī ni i socō i cuehē

8 Hermano, vijna te suni cácuuni rī castūhun rí nuū rō jijnáhan ró ndese cuehē jeē vāha ni sāha Yaā Dios jíin ñáyuu cácanđije cáyūcú Macedonia. ²Chi vēsú yōhyo ni jito ndee jñundóho i, te suni yōhyo ni cacusiī ni i jíin jñuhun ya. Te vēsú ñáyuu ndahú ndasí cácuu i, te yōhyo vāha ni

cajequin i cuehē xūhun jēē cūu ñayuu ndahú cá candíje. ³Chi cūu ri testigo jeē ní cacusiī ni maá i ni cajēhe i ndésaa ni canda i, te nde vihyá gā ni cajēhe i. ⁴Chi ni cacahān ndahú ndasí i jíin rí jeē na cuáha ri jñūhun chindéé ñáhán i jíin yó cuāha i xūhún cuu hermano cándoho ndáhú. ⁵Te víhyá gā ni casáha i vēsú jeē ní cajeni ni rī, chi xīhna gā ni casocō i maá i nuū Jítóho yō, te sáa te ni cajēhe i maá i sáha i tāca jēē cá cuni rī, ndīhi ndese núnjahan ni Yaā Dios. ⁶Te jeē súcuan ni casáha ñayuu Macedonia, te ni castíhvī ni rī Tito jeē na jēē tucu de nuū maá ró, sáha de jeē jīnu jniñu jeē ni squéjéé de jíin ró jeē suni caquin rō cuehē xūhún cuu ñayuu ndahú. ⁷Chi maá ró yōhyo vāha casáha ró táca-ni, chi vāha cá candíje ró, vāha cá nacani ró jnúhun, vāha cá jecūhun ni rō, vāha cá ndīhvī ni rō, vāha manī rō jíin rí jijnáhan ri. Núu súcuan te suni cánuú sáha vāha ró jniñu yáha jēē cuáha ró jēē cūu ñayuu ndahú.

⁸Te nasūu jēē cuní rī ndacu ri jniñu nuū rō, chi sa cástūhun rí nuū rō ndese yōhyo cá cusiī ni sava ga ñayuu jéhe i xūhún, te súcuan te cuni rī jeē suni maá ró cá cundáhú ndije ni rō ñayuu ndahú. ⁹Chi je cájini rō ndese yōhyo vāha ni Jítóho yō Jesucristo jíin yó. Chi siquī jeē ní cundáhú ni yā rohó te ni nasáha ndáhú yá maá yá, vēsú cucá ndasí yá nde andiví núú. Te súcuan ni sáha ya jeē cá cucúca ró ndīhi jeē ndíso jñūhun ya, siquī jeē ní nasáha ndáhú yá maá yá.

¹⁰Te jeē váha maá ró cūu jeē na cáchi rī ndese jéni ni rī siquī

jniñu yáha. Vāha ni caquejéé ró nde jendujin, chi nasūu maá-ni jeē ní cajequin rō xūhún, chi suni yōhyo ni cacusiī ni rō sáha ró. ¹¹Núu súcuan te vijna te sínu ró. Te nájnūhun ni cacusiī ni rō ni caquejéé ró jíin, suni súcuan na cúsiī ni rō sínu ró, chi cuāha ró núu ndese cánevāha ró. ¹²Chi núu cúsiī ni yō cuāha yó, te jétáhú yá núu ndese névāha yó, chi tu jícan yā jeē cuāha yó jēē tu névāha yó.

¹³Te nasūu jēē cahán rī jeē cáhni ndahú ró maá ró jeē cáa ga nihīn i vēsú jeē ndóo nuū maá ró. ¹⁴Chi sa suhva jeē iin cūhva-ni conevāha ró jíin i. Chi cánevāha cuehē rō vijna, te cuu cuāha ró jēē cúmanī nuū i. Yūcuán na te núu ndé iin quivī conevāha i, te suni cuu cuāha i te núu ni cumani nuū rō. Te súcuan te iin cūhva-ni conevāha ró jíjnáhan ró, ¹⁵nájnūhun cáhán tutu iī siquī ñayuu jeē ní canastútú maná nde jenahán: Tēe jeē ní nastútú cuéhē, tu ní ndóo ga nuū de. Te tēe jeē ní nastútú jecu-ni, suni tu ní cúmani nuū de. Achí tutu.

Jñūhun Tito jíin úu gā jnáhan de

¹⁶Te na cútahū rī nuū Yaā Dios jeē ni sáha ya jeē ndīhvī ni Tito jehē rō nájnūhun cándīhvī ni maá rí. ¹⁷Chi ní jetáhú de jeē ní cacahān rī jíin de jeē jeé de nuū rō. Te siquī jeē ndīhvī ni de jehē rō, jeē yúcuán cuájeē de, chi súcuan cūu ni maá de.

¹⁸Te suni cátají rí iin hermano cuajeē jíin Tito nuū rō. Te táca grupo ñayuu cá candíje cá jecnúhún i tēe un jēē váha jéjníñu de siquī jnúhun jeē jnáma ya yohó. ¹⁹Te táca

grupo ñayuu cácanđíje suni ni catee i jniñu siquĩ de jeē cáca de jíin rí chindéé ñáhán de quindēca de xúhun jíin rí jeē ní cajēhe ñayuu. Te jniñu yáha cásáha ri návāha cahān ñayuu jeē yóhyo vāha Yaā cúu máá Jítóho yō, chi cuni i ndese yóhyo cácusĩ ni rō cásocō rō xúhún. ²⁰Te quingoo ndĩndúú rí návāha ni ĩn ñayuu ma tée i cuēchi siquĩ rĩ siquĩ xúhun cásocō ñayuu. ²¹Chi ndúcú rí jeē squĩcu ndaā rĩ tēcá jniñu, nasūu máá ĩn-ni nuū Yaā Dios, chi suni nuū ñáyuu.

²²Te suni cátají rí inga hermano yō cuajeē de jíin ndĩndúú tée yáha. Te tĩjni jíinu ni steén de jeē yóhyo cúsiĩ ni de ndĩhvĩ ni de tēcá jniñu. Te vijna chi ndĩhvĩ gā ni de jehē rō, chi cúcáhnū ndasĩ ni de jeē cásquĩcu rō. ²³Te núu cácajnūhún ñayuu siquĩ Tito, te achi rō jeē cúu de tēe chindéé ñáhán jéjníñu jíin rí nuū rō siquĩ jnúhun ya. Te uū gā hermano yō yáha, achi rō jeē cácuu de tēe jeē ní catejníñu ñayuu cácanđíje, te cáhĩyo yĩnúhún de nuū Cristo. ²⁴Núu súcuan te stéén rō nuū de jeē cáhĩyo manĩ ndije rō jíin de, návāha na cúni tēcá grupo ñayuu cácanđíje. Te súcuan cuni i jeē tu ní cácusĩ cāhá ni rĩ siquĩ rō.

Siquĩ jeē cájequin i xúhún cuu tēcá hermano

9 Te vijna te tuá jíni ñúhún tee rĩ nuū rō siquĩ xúhun jeē cájequin rō cuu tēcá hermano cándoho ndáhú. ²Chi je jíni rĩ jeē cánujnahān ni rō cuāha rō. Te jeē yúcuan máni cúsiĩ ni rĩ cahān rĩ jíin ñáyuu Macedonia jeē rohó ñáyuu Acaya, je ni casátúhva

ró xúhun ndé jendujin. Te jeē súcuan ni cacusiĩ ni maá rō, te jeē yúcuan cuehē ñayuu Macedonia ni cacondĩhvĩ ni i ni cajēhe máá i. ³Te tájí rí ndinúnĩ hermano yáha cuajeē maá de nuū rō xihna gā, návāha jeē jinú maá rí te ma quéndōo néé rí siquĩ jnúhun ni cahān rĩ jeē squĩcu vāha rō jíin jniñu ún. Chi coo túhva ndije rō jíin xúhun nájnūhun ni cahān rĩ jíin i. ⁴Chi sanaa te jecoo jecu tēe Macedonia jíin rí, te núu cuni de jeē tu cáhĩyo túhva rō, te coo jnúhun canu nuū rĩ, te suni nuū maá rō jijnáhan rō, chi ni cahān teyĩ rí jeē cáhĩyo túhva ndije rō. ⁵Jeē yúcuan ní jeni ni rĩ jeē cánuú cahān rĩ jíin tēcá hermano yáha jecoo de xihna gā, te sáá te jinū rĩ, návāha stĩhvĩ ni de róhó jēé yáchĩ na cóo túhva xúhun jēé ní cacahān rō jeē cuáha rō. Te súcuan te coo túhva siquĩ jeē vāha ni rō, te nasūu jēé safuerza rĩ rohó.

⁶Cocuhun ni rō jnúhun yáha, jeē núu jecu-ni cuāha rō te suni jecu-ni nanihĩn rō: Chi tēe jeē tihlí-ni táji, suni tĩhlĩ-ni nastútú. Te tēe jeē táji cuehē, suni cuehē nastútú. Achĩ tutu. ⁷Tēcá ĩn ĩn rō cuāha rō ndésaa ni tee ni rō. Ma cúxii ni rō cuāha rō, chi nasūu fuerza cúu. Chi Yaā Dios manĩ yā jíin ñáyuu jeē cúsiĩ ni cuāha. ⁸Te máá Yaā Dios cuu sáha ya jeē nducuehē ndinuū jeē vāha cuu rō jijnáhan rō, návāha níni conevāha rō ndĩhi tēcá jeē jíni ñúhún rō, te coo sobra gā jeē cuāha rō jēé cúu tēcá jniñu vāha. ⁹Chi súcuan cáhán tutu ĩi siquĩ tēcá ñáyuu jéhe:

Ni scáa i ni jēhe i nuū ñáyuu ndahú.

Te tācá jniñu váha sáha i, chi quendōo níí cáni.

Achí tutu. ¹⁰Te Yaā Dios jéhe ya tata nuū tēe táji, te nihin de staā jeē caji de. Te suni súcuan cuāha ya ndinuū jeē váha cuu ró, te sáha ya jeē cáyā te nducuehē jniñu váha cásáha ró. ¹¹Súcuan cucúcá ró jíin táca-ni, návāha cuu cuāha cuehē rō. Te xūhun jēe cuāha ró quíhīn nuū hermano cándoho ndáhú, suu sáha jeē nácuatáhú i nuū Yaā Dios. ¹²Chi xūhun jēe cuāha ró núu i, nasūu máá ĩn-ni jeē nihín i jeē cúmanī nuū i, chi suni sáha jeē nácuatáhú ndasí i nuū Yaā Dios. ¹³Te cahān i jeē yóhoyo vāha Yaā cúu Yaā Dios, chi xūhun jēe ní cajēhe ró stéén jeē váha cácañdije ró jnúhun Cristo. Te suni sáha jeē cahān i jeē yóhoyo cújéhnu Yaā Dios siquī jeē ní cajēhe cuehē rō nuū i jíin núu sava ga ñayuu. ¹⁴Te suni cacān tahú i jehē rō, chi coo manī ndasí i jíin ró siquī jeē yóhoyo vāha ni sáha Yaā Dios jíin ró. ¹⁵Te na cútahū yō nuū Yaā Dios, chi ni jēhe ya Sēhe ya nuū yō, jeē cúu ĩn tahū cáhnu ndasí jēe ma cánda cuiti yō castūhún ndihí yó.

Jeē ndíso jniñu Pablo cúu de apóstol

10 Te ruhū Pablo, cáhān ndahú rí jíin ró jijnáhan ró jíin modo maá Cristo jeē vitá ni yā te vāha ni yā. Ruhū, chi cácahān rō jeē iyó suchí ni rí núu ndéé rí jíin ró, te núu ndéé jíicá rí te tu yúhú cuiti rí cahān nihin rí jíin ró, cácahān rō. ²Núu súcuan te cáhān ndahú rí jíin ró jeē núu na jéé rí te ma cahān rō jnúhun jeē sáha jeē cuxeēn rí nuū rō. Chi sava ró cácahān jeē casáha ri jniñu

ya siquī jeē máni jeē na níhín rí siquī ún. Núu súcuan te íyó túhva rí cuxeēn rí nuū ñayuu cácahān súcuan. ³Chi vēsú cácuu rí ñayuu cáyūcú ini ñayiví, te tu cájejnáhan rí modo cájejnáhan ñayuu ñayiví. Chi nájnūhun jeē cájejnáhan rí siquī tācá jniñu neé. ⁴Chi nasūu ndajniñu ñayiví jéjníñu rí cájejnáhan rí, chi jíin poder Yaā Dios cájejnáhan rí snāā rí tāca fuerza jeē cúu contra siquī yā. ⁵Súcuan cásnāā rí tāca jnúhun ndúxí jíin jnúhun téyí jeē nducú casi jeē ma cúni ñayuu ndese Yaā cúu Yaā Dios. Te cájesi rí nuū ndihí jeē tú vāha jeē cájeni ni ñayuu, návāha cuandetū i nuū Cristo. ⁶Te jeē jínu cuandetū vāha máá ró, yūcuán na te coo túhva rí cuāha rí castigo nuū tāca gá ñayuu jeē tu cájendetū.

⁷Máá ró jijnáhan ró máni cájeni ni rō modo ñayuu tu cájecūhun ni. Núu na-ni tēe jéni ni de jeē Cristo ni tejníñu ya de, te na sáha de cuenta jeē suni súcuan ni tejníñu ya ruhū jijnáhan rí. ⁸Te núu ni cahān teyí rí jíin ró jeē ndíso jniñu rí, te tu cúcanu rí sáha. Chi máá Jítóho yō ni tejníñu ya ruhū jijnáhan rí, návāha sáha rí jeē ije ánuá rō jíin jnúhun ya, nasūu jéé snāā rí. ⁹Núu súcuan te tu cúní rí jeē cáni ni rō jeē nducú rí siúhú rí rohó jíin carta rí. ¹⁰Chi cácahān sava ró jéé tāca carta rí yóhoyo stíhví ni te nihin ndácu jniñu, te sa suhva núu ndéé rí jíin ró te tu cúndeyí ni rí ndacu nihin rí jniñu, te suni tu cúu cahān vāvihí rí, achí ró. ¹¹Te ñayuu cácahān súcuan na sáha i cuenta jeē nájnūhun nihin cáhān carta rí jeē ĩne jíicá rí, suni súcuan nihin

ndacu ri jniñu nuū rō jeē cóndee rī jíín ró.

¹²Te va ma chúndeyí cuítí ni nde ri jeē sajeñhu ri maá rí, nájñuhun cásáha sava tēe un jēē cájeñhún nde de máá de. Tāca tēe ún chi cācunéé de jeē cájeni ni de jeē cujēñhu ga de vēsú jnánhan de, te tu cásáha de cuenta ndese cúní Yaā Dios jeē caca de. ¹³Te ruhū jijnánhan ri, chi cutéyí nde ri maá cūhva-ni jniñu jeē ni jēhe Yaā Dios nuū rī, te ma yáha ga rī. Máá Yaā Dios ni tee cūhva yá ndésaa cúu jeē sáha ri, te máá yá ni jēhe jñuhun jeē ni jínū rī nuū rohó ñáyuu ñuu Corinto. ¹⁴Jeē yúcuan ná ni jinūcoo ri nuū rō jeē xíhna ñhún te nasūu jēē ni yáha ri nuū cūhva jniñu ní jēhe ya nuū rī. Chi xíhna gā maá rí ni jinūcoo nuū rō ni canacani ri jñuhun vāha Cristo. ¹⁵Te tu cācutéyí rí siquī jniñu ní casáha inga tēe, nájñuhun jeē jniñu máá rí cúu. Chi sa suhva cāñuhun ni rī jeē cuehē gā candíje ró, te súcuan te cuu sáha ri cuehē gā jniñu ya mēñhu ró, te níni máá cūhva jeē ni jēhe ya nuū rī. ¹⁶Yūcuán na te cācuni ri scuité núu ga rī jñuhun jnáma ya yohó núu tāca gā ñuu yúcu ndé yúcuan gá. Te súcuan te ma quívi nduu rī cutéyí rí nuū jeē jé ni canacani inga tēe jñuhun.

¹⁷Te núu ndé tēe cúní de cutéyí de, na cutéyí de siquī jeē sáha máá Jítóho yō, nasūu síquī jēē sáha máá de. ¹⁸Chi nasūu tēe jeē jeñhún máá cúu jeē quéndoo yíñhún, chi sa suhva tēe jeē jeñhún máá yá.

Jeē cahán Pablo siquī tēe canacani jñuhun stáhú

11 Cone cāhnu ni rō jijnánhan ró jeē cahán rī jecu jñuhun

modo nájñuhun cācahān ñayuu canéé. Núu súcuan te cāhnu coo ni rō víi. ²Chi cúcuñí rí jehē rō jijnánhan ró, nájñuhun cúcuñí Yaā Dios. Chi cācuu ró nájñuhun iin sūchi síhí íyó ndoo, te ni sáha ri jeē quijnánhan ró jíín Cristo, nájñuhun quíjnánhan iin sūchi síhí jíín máñhún-ni yíi i. ³Te yúhú rí sanaa te cuāha ro jñuhun stáhú tāca tēe un rōhó, te siáá rō jñuhun jeē chiñhún ndāā rō Cristo nde jíín ini jíín ánuá rō. Chi suni súcuan ni sáha Satanás jíín Eva, chi ni quívi ini iin coō, te ni stahú un ña jíín jñuhun ndíchí stáhú. ⁴Chi núu quíjicoo tēe nuū rō jeē tu cānacani ndāā de jñuhun Jesús nájñuhun ni canacani ri nuū rō, te va yōhyo vāha cājetáhú nde ró de. Te suni súcuan vāha cājetáhú nde ró núu inga espíritu jíín núu inga jñuhun jeē tu quíjnánhan jíín Espíritu jíín jñuhun jeē ní cacandíje ró jēē jnáma ya rohó. ⁵Te tāca tēe cācandíje ró un jēē cācahān jeē apóstol cujēñhu ga cācuu, tú cuítí jeē cujēñhu ga nde de nuū rī. ⁶Chi vēsú tu níhín vāha nde ri modo cahān rī, te jécūhun vāha ni rī. Chi jíín ndíhi jniñu ni casáha ri mēñhu ró ni castéén cají rí nuū rō jeē súcuan cúu.

⁷Tu ní jíicán rí xūhun núu rō siquī jeē ní nacani ri jñuhun jnáma ya yohó. Te súcuan ni cotecu ndahú rí návāha quendōo vāha ga maá ró jíín jñuhun ya. ¿Te va cuēchi ni sáha ri jeē ni sáha ri súcuan, chí naún? ⁸Chi sava ga grupo ñayuu cācandíje ni quihin ri xūhun jēē ní cajēhe i nuū rī, návāha súcuan-ni nacani ri jñuhun ya nuū rō jijnánhan

ró. ⁹Te ná ni condee rī jín ró te ni ndíhi xūhun rí, te tu ní jícán cuiti rī nuū ní ìn ró. Chi hermano jeē ní quijicoo ichi Macedonia ni cajēhe de nuū rī jeē cúmani. Te jeē súcuan tu ní stáhān rī rohó, te ni ma sáha cuiti rī. ¹⁰Te nájnūhun cúcáhnu vāha ni rī jeē jíní rī jnūhun ndaā Cristo, suni súcuan jíní rī jeē ma quíhin rī xūhún nuū ni ìn ñayuu ñí ndáñū Acaya, návāha ma cási i jeē cúsiñ ni rī jeē súcuan-ni nácani rī jnūhun ya. ¹¹¿Te á síquī jeē tú manī rī jín ró cúu jeē cahán rī súcuan, jéni ni rō, chí naún? Tuú chi máá Yaā Dios jiní yā jeē manī rī jín ró jijnáhan ró.

¹²Te sáha ri ná-ni sáha ri, chi ma quíhin rī xūhun ró, návāha casi rī nuū jeē casátéyí tēe un máá de jeē cácahān de jeē inuú casáha de jniñu ya jín rí. ¹³Te tēe ún chi nasūú apóstol ndaā cácuu de, chi máni máá jnúhun stáhú cácahān de, te casáha de máá de jeē cácuu de apóstol Cristo. ¹⁴Te tu náā ni yō jító yó jēe casáha de súcuan, chi je jíní yō jeē suni Satanás násama máá te stáhú jēe sáha máá nájnūhun ìn ndajéhé Yaā Dios jeē jica jín luz yā. ¹⁵Te jeē yúcuan suni tu náā ni yō jító yó jēe tēe cájejniñu nuū Satanás, casáha de máá de jeē tēe ndaā cácuu de. Te ìn quivī te nanihin de síquī jniñu neé casáha de.

Jnūndóho ni ndoho Pablo síquī jeē cúu de apóstol

¹⁶Enga jínu cáhán rī jín ró jeē ni ìn ró ma cáni ni rō jeē tēe cánéé cúu rí. Te núu súcuan cájeni ni rō, te va cuatáhú nde ró jēe cahán rī nájnūhun tēe cánéé, návāha suni

cúu cutéyí nde ri jecu nájnūhun casáha tēe ún. ¹⁷Jeē cahán rī vijna chi nasūu jēe ní ndacu máá Jítóho yō cúu, chi sa nájnūhun tēe cánéé cáhán rī jeē cutéyí nde ri. ¹⁸Chi cuehē de casátéyí de máá de modo jeē iyó ini ñayiví, te suni súcuan na sátéyí nde ri maá rí núu súcuan. ¹⁹Te va tēe cáhīyo cájí xíní cácuu nde ró, te jeē yúcuan cúu vāha ni nde ró cuatáhú ró ìn tēe cánéé núu súcuan. ²⁰Chi va vāha-ni cájendeyí ni rō nuū tēe un jēe casáfuerza de rōhó cuajniñu ró núu de, chí casáha de jeē ndundáhú ró, chí cáquende de ndajniñu ró, chí casájéhnu de máá de nuū rō, chí ndé cácatu de nuū rō. ²¹Te vēsú cúcanu nde ri cahán rī, te na cáhán rī jeē tu ní cúndeyí ni nde ri satéyí rí maá rí nájnūhun casáha tēe ún.

Te vijna te núu íyó sava tēe chúndeyí ni de sátéyí de máá de, te va suni chundeýí ni nde máá rí núu súcuan. Te va cáhán rī nájnūhun cáhán ìn tēe cánéé. ²²Núu cácutéyí de jeē tēe hebreo cácuu de, te suni súcuan ruhū. Núu tēe Israel cácuu de, te suni ruhū. Núu yucūn Abraham cácuu de, te suni ruhū. ²³Núu tēe cájejniñu nuū jnúhun Cristo cácuu de, te víhyá gā ruhū. Te va cáhán rī nájnūhun tēe cánéé jēe cutéyí rí súcuan. Chi ni caa ga ni sájniñu ri vēsú maá de jijnáhan de, te ni caa ga ni cacani i ruhū, te cuehē gā jínu ni ine ri vecāa, te suni cuehē gā jínu ni cacuni ñayuu cahni i ruhū. ²⁴Te jnáhan ri hebreo, uhūn jínu ni cacani xeēn de ruhū jín cuarta ñi, ìn cūhva jeē jé yajni cuu rī sáha. ²⁵Unī jínu ni cacani de ruhū jín yujnu xí, te ìn jínu

ni cajêhe de yuū xinī rī. Unī jīnu ni quēe barco jeē ní jica ri siquī jnūhun ya. Te ĩn jecuāā jīn ĩn ndiāca ni yosō candá rí nuū cunú ndute mar. ²⁶Cuehē jīnu ni ndoho ri ni jica ri ichi, te ni cācu ri nuū táca yúte, te ni cācu ri nuū táca ñācuīhná. Ni cācu ri nuū ñáyuu nación rī jīn núū ñáyuu ñuu jícá. Ni cācu ri cháha chúcuan ná ni iyo ri ñuu jīn rancho jīn mar. Ni cācu ri nuū táca jnáhan ri jeē tu íyó ndáā. ²⁷Ni sájniñu niñin ri te yí ní ndoho ri. Cuehē jīnu ni jehni rī maá rí máhná. Ni jī rī sōco, ni jichī rī ndute. Cuehē jīnu ni iyo ndite ni rī, ni cuijnu rī, ni cumanī sahma ri

²⁸Te siquī tāca jēē yáha chí íyó gá. Chi ndiquivī ndóho ri jeē nācani ndasí ni rī jehē tāca grupo ñayuu cácadíje. ²⁹Núu ĩn ñayuu tu fuerza ini i, te suni ndóho ri jehē i. Te núu ĩn ñayuu quívi i cuēchi sáha jnáhan i, te ndóho ri jnūhun cúcanu jīn jnūhun náxeēn ni.

³⁰Núu súcuan te núu cānuú cutéyí nde ri, te va cutéyí rí siquī tāca jēē steén jeē tú na fuerza ini rī. ³¹Te Yaā Dios, Yaā cúu Tátá maá Jítoho yō Jesucristo, jíní yā jeē cahán ndaā rī. Te ní cāni na cāhán ñayuu jeē vāha ndasí Yaā cúu ya. ³²Ná ni iyo rī ñuu Damasco, te gobernador jeē ndācu jniñu ndañúū jeē jní rey Aretas, ni jeni de soldado ni cacondito tāca yéhyí jeē ní condúū ndihyú ñuu ún, chí jni de ruhū quihīn rī vecāa ni cuni de núú. ³³Te ni quívi ri chíi ĩn jica, te ñayuu cácadíje ni cascúun i ruhū ventana ĩn vehe jeē néne jicā jeē ndihyú ñuu ún. Te súcuan ni cācu ri nuū téé ún.

Jeē ní jito ndijin Pablo
jeē ní stúu ya nuū de

12 Te tu níhín jniñu jeē cutéyí rí. Te vāha ga na cástūhun rí nuū rō siquī jeē ní jito ri jeē ni stúu maá Jítoho yō nuū rī te ni steén ndijin yā nuū rī. ²Jíní rī ĩn tēe cándíje Cristo, te je ni cuu uxí cuūn cuiyā jeē ní sáha ya jeē ní caa tēe un ní jehēn de nde andiví úní. Te tu jíní rī núu ni jehēn rī jīn yiqui cúñu rī, chí ní jehēn anuá-ni ri. Máá Yaā Dios cúu jeē jíní. ³Te jíní rī jeē ní ndonehen ya ruhū. Te á ní jehēn rī jīn yiqui cúñu rī, chí ní ndōo, tu jíní rī, chí máá-ni Yaā Dios cúu jeē jíní. ⁴Chi ni sáha ya jeē ní caa ri ni jehēn rī nde jardín andiví. Te yūcuan ní jini sōho ri tāca jnūhun sáhi ndasí jēē ma cúu castūhun yóhó ñáyuu. ⁵Te siquī jeē ni sáha ya súcuan jíní rí cúu jeē cutéyí rí, te ma cutéyí rí siquī ndese cúu máá rí. Chí cutéyí rí máni jeē tú na fuerza ini rī. ⁶Te núu cúní rī cutéyí rí siquī maá rí nuú, te nasūu jēē canéé rí núu sáha ri súcuan núu, chí ndaā cúu jeē iyó jeē cutéyí rí. Te ni ma sáha ri, chí tu cúní rī jeē cani ni ñayuu jeē cujéñu ga rī vēsú jeē ní jito i chí jēē ní jini i jnūhun ri.

⁷Te tu cúní yā jeē yáha ri cutéyí rí siquī jeē ni steén ndijin yā jniñu jéñu ndasí un núu rī, te jeé yūcuan ni quiji ĩn jnūndóho jeē ndiquín ruhū te stóho ruhū. Te ĩn jeē ni jéhe ya jnūhun ni tají Satanás cúu, ĩn jeē stóho ruhū, návāha ma yáha ri cutéyí rí. ⁸Te unī jīnu ni cahán ndahú rí jíní maá Jítoho yō jeē na téjiyo ya quihīn. ⁹Te ni cahán yā jíní rí: Tuú chí tu cúmani

jeē cundáhú ni rī rohó. Chi ñayuu jeē tú na fuerza ini, sáha ri jeē nducuehē gā fuerza maá rí ini i, ni achi yā. Núu súcuan te cúsiñi ni rī jeē tú na fuerza ini rī, chi súcuan te nducuehē gā fuerza Cristo ini rī. ¹⁰Jeē yúcuan cúu jeē cúsiñi ni rī jeē tú na fuerza rī, jíin jéē cácahān ndevāha ñayuu jíin rí, jíin jéē cúmanī nuū rī, jíin jéē cájito xeēn i ruhū, jíin jéē ndóho ri jñúndóho siquī Cristo. Chi jeē tú na fuerza maá rí, yúcuan sáha jeē nihín rī fuerza maá yá.

Jeē nácani ni Pablo siquī ñayuu cácañíje ñuu Corinto

¹¹Te va tēe cánéé cúu ri jeē ni satéyí nde ri maá rí. Te siquī jeē tu cácañíje ró rúhū, jeē yúcuan ní satéyí rí maá rí. Chi cánuú jéē máá ró cuajnúhún ró ruhū nuú. Chi vésú tú jniñu ri jeē maá rí, te va tu núu cuiti nde ri nuū tāca tēe un jéē cácahān rō jeē apóstol cujéhu cácuu de. ¹²Chi mēhñu ró ní sáha ri tācá jniñu jeē steén jeē cúu ndije ri apóstol. Chi jíin cuéhē paciencia ni sáha ri tācá jniñu jéhu jeē steén poder Yaā Dios, jíin táca jniñu jeē nahán ní canaa ni rō ni cajito ró. ¹³Te tu ní sáha ri jeē núu ga cácuu ró núu tāca gá grupo ñayuu cácañíje, chi máá ñin-ni jeē tu ní stáhān rī rohó jéē cuáha ro jéē jíni ñúhún rí. Cone cáhnu ni rō núu súcuan ni sáha nde ri falta nuū rō víi.

¹⁴Te vijna je íyó túhva ri jecondēhe rí rohó vuelta unī. Te suni tú na vé cacán rī nuū rō, chi nasúú ndajniñu ró cúu jeē cuní rī, chi sa suhva jeē quendōo vāha rō

jíin jnúhun ya. Chi nájñuhun sēhe ri cácuu ró, te sēhe chi tu cánuú caya i jeē cúu tátá i, chi sa tátá cánuú cuāha de jeē quendōo vāha sēhe de. ¹⁵Jeē yúcuan cúsiñi ni rī stíhi ri jeē névāha ri, te nde stíhi ri fuerza maá rí, návāha sáha ri jeē quendōo vāha ánuá rō jijnáhan ró. Te manī gā coo ri jíin ró, vésú sanaa te jecu-ni cáhiyo manī rō jíin rí.

¹⁶Te íyó jecu rō cácahān jeē vésú tú na vé ni jícán rī nuū rō, te tēe stáhú cúu ri, chi ni nducú rí modo ndichí nihín rī xūhun ró, cácahān rō. ¹⁷¿A táca tēe ní tají rí nuū rō, á ñin máá de ni stahú de rōhó jéē nihín de xūhun ró cuu máá rí, chí naún? Tú cuiti. ¹⁸Ni cahān ndahú rí jíin Tito jeē jécondēhé de rōhó, te ni tají rí ñin hermano ni jeē jíin de. ¿Te chí ní stahú Tito rohó ní quihin de xūhun núu rō jeē cuu máá de, chí naún? Tuú chi inuú-ni cásáha ndíndúú rí, te ñin-ni ánuá ndíndúú rí.

¹⁹¿Sanaa te cájeni ni rō jeē cahán rī jñuhun yáha návāha quendōo vāha ri jíin ró, chí naún? Nasúu súcuan cúu, chi Yaā Dios jiní yā jeē cahán rī maá-ni jñuhun jeē cuní Cristo. Te ndíhi jeē cahán rī chi nducú rí jeē ije ró jíin jnúhun ya, ñáni manī. ²⁰Chi yúhú rí jeē núu na jéé rī, te sanaa te cuní rī jeē tu cásáha ró jniñu nújnahan ni rī. Te máá ró jijnáhan ró, suni ma nújnahan ni rō ruhū. Chi sanaa te cátejñáhan ró, cácuésún ni rō, cáquitī ni rō, cásándúxí ró, cásájñuhún ró, cácahān rō siquī jñáhan ró, cácutéyí ró, cájica néé ró. ²¹Te yúhú rí jeē núu na jéé tucu ri te cuāha Yaā Dios jñuhun canu nuū

rī jeē súcuan casáha ró. Te sanaa te cucuíhyá ni rī núu íyó cuéhē rō jeē ní casáha cuēchi ichi yátá, te tu nácani ni rō stóo ró jniñu jnéhen jniñu jíca jnéni jíin jniñu néé ndasí ní casáha ró.

Saludo jíin jnúhun cástūhun

Pablo jeē sándihí

13 Yāha cúu vuelta unī jeē jécondēhe rí rohó. Te sándaā yō jniñu nájñuhun cáhán tutu: Jíin jnúhun jeē cahán uū chí únī testigo te cundaā tácá jniñu, áchí. ²Te vijna jeē íne jíca rí te cáhán tucu ri nájñuhun ni cahān rī ná ni ine ri jíin ró. Cáhán rī nuū ñáyuu ni casáha cuēchi un jíin núu ndihí ró, jeē núu na jéé tucu ri te ma cóo vītá ni rī jíin ró. ³Te yūcuán cuu prueba jeē cánducú ró, suu núu jendaá jeē cahán rī jíin fuerza Cristo. Chi Cristo tu cúmani fuerza yā jeē sándaā yā jíin ró, chi stéén yā poder yā mēhñu ró. ⁴Te vēsú tu ní stéén yā fuerza yā ná ni jihí yā jicā cruz, te vijna chí técu yā jíin poder Yaā Dios. Te nájñuhun ni ndoho máá yá, suni súcuan cándoho ri vijna jeē tu fuerza rī. Te vēsú súcuan te jíin poder Yaā Dios cátecu rī jíin yá jeē cuajññu ri nuū rō jeē síquí jnúhun ya.

⁵Coto ndee rō maá ró núu cáhiin nihin ró jíin jnúhun cáchandíje ró yá. Sáha vāha ro cuenta. ¿Te á tu cájini rō jeē ndeé Jesucristo ini anuá rō, te núu ndaā jeē ní cacandíje ndije ró? ⁶Te ñúhun ni rī

jeē suni cáducáhnú ni rō jeē maá rí cáchandíje ndije ri. ⁷Te cájicān tahú rī nuū Yaā Dios jeē ma sáha ró ni iin jniñu néé. Te vēsú núu cuajññuhún ró jeē váha ndácu ri jniñu nuū rō, chí vēsú núu ma cuajññuhún ró, te tú na vé sáha, chí máni jeē na sáha ró jniñu ndaā cúu jeē cánducú rí. ⁸Chi tu jési ri nuū jniñu ndaā, chí sa suhva scáca ri. ⁹Núu súcuan te cácusihí ni rī núu tú na fuerza maá rí, te núu íyó fuerza maá ró. Te níni cácan tahú rī jeē na íje ga ni rō jijnáhan ró jíin jnúhun ya. ¹⁰Te téé ri carta yáha nuū rō nde ná tu jeē rī, návāha núu na jéé rī te tuá jíni ñúhún cuxeēn rī nuū rō. Chi ni jēhe Jitoho yō jniñu ndíso ri yāha jéé sáha ri jeē íje ánuá rō jíin jnúhun ya, nasūu jéé snáá rī.

¹¹Je ni cahān yō núu súcuan hermano, te na cóo jeē váha jíin ró jijnáhan ró. Te na cóndihvī ni rō ije ró jíin jnúhun ya, te coo ndeyí ni rō. Te na cóo inuú ni rō te coyūcu máni rō jíin jnáhan ró. Te Yaā ndíso jnúhun ndeyí sñi ni jíin jnúhun cúndáhú ni, coo ya jíin ró jijnáhan ró. ¹²Te jeē cahán rō jíin táca jnáhan ró, te yíñúhún techūhu ró ndaha i. ¹³Sándeýí ni rō jijnáhan ró, áchí hermano cáchandíje jeē cáyūcu yáha.

¹⁴Te ñúhun ni rī jeē Jitoho yō Jesucristo na sáha ga yā jeē váha rōhó jijnáhan ró, te Yaā Dios cundáhú ni yā rohó, te Espíritu Santo condee cáhnú ya jíin ró. Súcuan na cóo. Amén.

CARTA JEE NI TEE SAN PABLO APOSTOL NUU ÑAYUU GALACIA

1 Máá rí cúu Pablo apóstol. Te nasūu ñáyuu ni jéni ruhū ni nasūu ñáyuu ni tájí ruhū jeē nácani ri jnūhun, chi sa suhva máá Jesucristo jíin Tátá yō Yaā Dios, Yaā ní nastécu Jesús mēhñu ndýi. ²Te ruhū jíin táca hermano cáyūcu jíin rí yāhá, cátee ri carta yáha cuájeē nuū rohó ñáyuu cácandíje níi región Galacia. ³Te cáñuhun ni rī jeē Tátá yō Yaā Dios jíin Jítóho yō Jesucristo, na sáha ga yā jeē váha rōhó, te sáha ya jeē coo ndeyí coo siī ni rō. ⁴Chi Jesús ni socō yā maá yá jeē ni jíihī yā jeē siquí cuéchi yó, návaha jnama ya yohó núu táca jéē neé íyó ñayīvi yáha, chi súcuan ni nujnahan ni maá Tátá yō Yaā Dios. ⁵Jeē yúcuan na cáhán yō jeē yóhyo luu cújéhnu ya níi cáni. Súcuan na cóo. Amén.

Siquí jeē tuá na inga jnūhun cācu ñayuu

⁶Te nánhán náā ni rī jíto ri jeē yóhyo yachī cánducú ró stóo ró Yaā Dios, Yaā ní cana rōhó jéē quívi ró ndaha ya siquí jeē cundáhú ni Cristo yohó. Chi ni candiquīn rō inga jnūhun jeē síin cáhán. ⁷Te tú cuítī na inga jnūhun jnama yóhó

íyó. Te cáhīyo jecu ñayuu castáhān i rōhó, te cácuni i nasama i jnūhun ndese jnáma Cristo yohó. ⁸Te núu ñin ñayuu nacani inga jnūhun nuū rō ndese jnáma ya rohó, te núu tu quíjnáhan jíin jnúhun ni canacani ri nuū rō xihna gā, na jnáhnú ndetū ñayuu ún. Te vēsú maá rí chí ñin ndajéhé jeē quíji nde andiví nacani inga jnūhun núu, na jnáhnú ndetū. ⁹Je ni cahán rī jíin ró, te suni súcuan cáhán tucu ri vijna: Na-ni tēe nacani inga jnūhun nuū rō, te núu tu quíjnáhan jíin jnúhun jeē ní cajetáhú ró, na jnáhnú ndetū tēe ún. ¹⁰Te jeē cahán rī súcuan, íá ndúcú rí jeē cuajnúhún ñáyuu ruhū, chí Yaā Dios? ¿Chí ndúcú rí jeē cúsiī ni ñayuu jíin rí, cájeni ni rō? Núu ndúcú gá rī jeē cúsiī ni ñayuu jíin rí, te nasūu mozo Cristo cúu ri núu súcuan.

Ndese ni jinū Pablo cúu de apóstol

¹¹Te cástūhun rí nuū rō, hermano jíjnáhan ró, jéē jnúhun jnáma ya yohó jéē nácani ri, nasūu jéē ní jeni ni maá rí jíin ñáyuu cúu. ¹²Chi nasūu ñáyuu ni stéén nuū rī, ni nasūu ñáyuu ní sáha jeē ní cutūhva ri, chi sa suhva máá Jesucristo ni steén nuū rī.

¹³Chi je ni cajini jñuhun ró ndese ni sáha ri nde saá, ná ni chiñúhún rí sahān jñahan ri ñayuu hebreo. Te cājini rō jeē yóhoyo ni jito xeēn rī ñayuu cácanđije nuū Yaā Dios, te ni condihvī ni rī snāā rī i nū. ¹⁴Te vāha ga ni cutūhva ri sahān ún vēsú cuehē gā tēe naciōn rī jeē ní cajehnu jíin rí, chi ni condihvī gā ni rī siquī tāca jēē ní cajequin jíi rī. ¹⁵Te vēsú súcuan te Yaā Dios je ni nacāji ya ruhū nde ná tu cacu ri, te ñin quivī te ni cusī ni yā ni cana ya ruhū jeē quívi ri ndaha ya, siquī jeē yóhoyo ni cundáhú ni yā ruhū. ¹⁶Te ni steén yā Sēhe ya nuū rī, návāha nacani ri jñuhun ndese jñama ya ñayuu tācā naciōn jeē tu jíin jñuhun ya. Yūcuán na te tu ní cājñuhun rí ni ñin ñayuu, ¹⁷ni tu ní jéhén rī ñuu Jerusalén nuū tēe cácuu apóstol xihna gā vēsú ruhū. Chi sa suhva ni jehēn-ni ri nde región Arabia, te saá te ni nuhūn tucu ri ñuu Damasco.

¹⁸Yūcuán na te nde ni yāha unī cuiyā, te ni jehēn rī Jerusalén. Te ni jíin jñahan ri jíin Pedro, te ni condee rī jíin de xahūn-ni quivī. ¹⁹Te tu ní jíto ri nuū tāca gā apóstol, chi máá ñin-ni nuū Jacobo ñani maá Jítóho yō. ²⁰Jñuhun yáha jēē tēe ri cuajeē nuū rō, chi jíin Yaā Dios jeē ndaā cúu.

²¹Yūcuán na te ni jehēn rī níi región Siria jíin Cilicia. ²²Te ñayuu cácanđije jeē yíhi ndaha Cristo, jeē cáyucú región Judea, ná tu coto cuiti i nuū rī saá. ²³Chi máni jñuhun-ni ni cajini i cácahān ñayuu: Tēe ni jito xeēn yohó ndé saá, vijna chi nácani de jñuhun cándije yó jēē ní nducú de snāā de nde saá, áchí i.

²⁴Te ni cacahān i jeē yóhoyo cújéhnu Yaā Dios jeē súcuan ni sáha ya jíin rí.

Jeē ní cajetáhú táca gā apóstol un Pablo

2 Yūcuán na te nde nuū uxí cuūn cuiyā, te ni jehēn tucu ri Jerusalén jíin Bernabé, te suni ni jeca ri Tito ni jehēn de jíin rí. ²Te ni jehēn rī chi máá Yaā Dios ni steén yā jeē jíin ñúhún quíhīn rī. Te ni candutútú sñin nene tēe cácujuhnu nuū ñayuu cácanđije ún. Te ni castūhun rí nuū de siquī jñuhun jñama ya yohó jēē nácani ri nuū ñayuu tācā naciōn tu jíin jñuhun ya. Te súcuan ni sáha ri návāha cuajñuhún de jniñu ri, te ma quéndōo cāhá jniñu sáha ri jíin jēē ni sáha ri. ³Te ni tu ní cásáha fuerza de Tito, tēe ni jica jíin rí, jeē cóndee jñunī circuncidar de, vēsú nasūu tēe hebreo cúu de. ⁴Te súcuan ni cundaā, vēsú ni quívicoo jecu tēe stáhú jēē sáha de jeē hermano cácuu de. Te tēe un ní quívicoo de návāha yuhu-ni coto de ndese ni ndulibre yō nuū ley circuncidar siquī jeē yíhi yó ndaha Cristo Jesús. Chi cácuni de jeē squícu tucu yó ley un, nduu tucu yó mozo nuū ley un. ⁵Te tu ní cájetáhú cuiti rī nuū tēe ún, chi cúní rī jeē quéndōo ñihin ró jíin jñahan ró jíin jñuhun jñama ya yohó.

⁶Te máá tēe cácujuhnu nuū ñayuu cácanđije ún, tuá na inga jniñu jēē ní cándacu de nuū rī. Te máá rí chi tu ní chíhi ri cuenta siquī jeē cácujuhnu de, chi suni Yaā Dios tu sáha ya cuenta, chi inuū-ni cúu ndivii tēe nuū yā. ⁷Chi sa suhva

ni cajini de jeē jnúhun jnáma ya yohó, ndíso jníñu ri nacani ri nuū ñáyuu tācá nación jeē tu cásáha circuncidar, nájñuhun nácani Pedro jñuhun un núu ñáyuu hebreo jeē casáha circuncidar. ⁸Chi Yaā Dios jeē ní tají Pedro jeē nácani de jñuhun nuū ñáyuu hebreo, suni máá yá ni tají rúhū jeē nácani ri jñuhun nuū ñáyuu tācá nación tu jíní jñuhun ya.

⁹Jeē yúcuan, Jacobo jíin Pedro jíin Juan, ni cajini de jeē Yaā Dios ni jēhe ya jniñu luu yáha nuū rī. Te tēe un cácahān ñayuu cácañdije jeē maá de cácajéhnu ga. Te ni cajniñi de ndaha ri jíin ndaha Bernabé, jeē ní castéén de jeē cáhiyo manī de jíin rí, jíin jéē ní cacundaā ni de jeē maá rí quingōo nacani jñuhun nuū ñáyuu tāca gá nación, te máá de jíjñáhan de nuū ñáyuu hebreo. ¹⁰Te máá ñin-ni jeē ní cajicān de cúu jeē cónahán rí chindéé ñáhán rí ñayuu cándoho ndáhú, te jniñu ún je ni condihvī ni rī ni sáha ri.

Jeē ni cáhān Pablo nuū Pedro

¹¹Te ná ni quiji Pedro ñuu Antioquía, te ni cahān cají rí nuū de, chi ni stívi de jniñu. ¹²Chi nde ná tu quecoo sava jnáhan de hebreo jeē ní tají Jacobo, te yéji de staā jíin ñáyuu jeē násúu hebreo cácuu. Yūcuán na te nuū ní quecoo tēe ún, te ni cusíin de jeē tuá yéji de jíin i, chi yúhú de jeē cúni tāca tēe un jéē tuá squícu de ley jnáhan de hebreo. Chi áchí ley jeē ma cúu cají de staā jíin ñáyuu jeē tu cásáha circuncidar. ¹³Te sava ga tēe hebreo jeē cácañdije, suni ni cacujiyo de nuū i, nájñuhun ni sáha Pedro, chi

cáyūhú de jeē cúni tēe ún. Te nde máá Bernabé ni cascáhán de ni cujiyo. ¹⁴Yūcuán na te ni jini ri jeē ní canayūhú de caji de staā jíin ñáyuu ún, cúu jeē tuá jíca de jíin modo jeē cahán jñuhun jnáma ya yohó. Te ni cahān rī nuū Pedro, jíto jíinúu tācá de: Róhó jéē cúu tēe nación yō hebreo, tuá squícu ró ley jnáhan yó hebreo, chi yéji rō jíin ñáyuu ún. ¿Te najehē safuerza rō i jeē squícu i ley jnáhan yo hebreo núu súcuan? ni achi rī.

Ñin-ni modo jnáma ya ñayuu hebreo jíin táca gá nación

¹⁵Te yohó chi cúu yó ñáyuu hebreo, te cácahān yō jeē násūu ñáyuu tāca gá nación casáha cuēchi cácuu yó. ¹⁶Te vēsú súcuan te jíin yō jeē ní ñin yó tu quéndōo ndaā yō nuū Yaā Dios jeē squícu yó jniñu ndácu ley Moisés jenahán, chi máá jéē candíje yó jeē Jesucristo ndahva yā cuēchi yó. Jeē yúcuan suni máá yó ni candíje yó Jesucristo, návaha ndahva yā cuēchi yó síquī jeē candíje yó, nasūu jíin jéē nducú yó squícu yó ley un. Chi áchí tutu iñ: Ní ñin ñayuu ma quéndōo ndaā i nuū Yaā Dios jíin jéē nducú i squícu i jniñu jeē ndácu ley, achi.

¹⁷Te máá yó ñayuu hebreo, núu cúni yō jeē ndahva Yaā Dios cuēchi yó síquī jeē ni jíhī Cristo jehē yō, suu cúu jeē jécūhun ni yō jeē suni ñayuu casáha cuēchi cúu yó, nájñuhun tāca gá ñayuu. Núu súcuan ¿te á cuēchi ni sáha yó jeē ni stóo yó ley jenahán ná ni candíje yó Cristo? Tú cuiñi jeē súcuan. ¹⁸Chi sa núu naquihin tucu yó ley jeē ni stóo yó un, te súcuan

tée yó cuéchi siquī maá yó. ¹⁹Chi ruhū, nájñuhun ni jihī rī ni sáha ley un, te jeē yúcuan má cúu ga ndacu jniñu nuū rī. Te súcuan te cuu cotecu rī jeē sáha ri jeē cuní Yaā Dios. ²⁰Chi nájñuhun je ni jihī rī jicā cruz jíin Cristo, te vijna chi tuá técu rī jeē maá rí, chi máá Cristo cúu jeē técu ini rī. Te jeē técu rī ini ñayīvi yáha vijna cúu jeē candíje ri jeē Sēhe Yaā Dios chindéé ñáhán yá ruhū. Chi ni cundáhú ni yā ruhū te ni socó yā maá yá jehē rī. ²¹Núu súcuan te tu cúní rī casi rī nuū jnúhun jeē ndáhva Yaā Dios cuéchi yó síquī jeē yóhyo vāha ni yā jíin yó. Chi núu jeē quéndōo ndaā yō nuū yā jeē nducú yó squícu yó ley jenahán, yūcuán na te tu ndé jéjñiñu jeē ni jíhī Cristo nuú.

Jnúhun ley jíin jnúhun cándíje

3 Róhó hermano ñuu Galacia, ¿naun tu cájecūhun ni rō? ¿Ndé tée ni saca núu xinī rō jeē tuá cájetáhú ró jnúhun ndaā? Chi ná ni canacani ri jnúhun ya nuū rō, te cájí ndasí ni cajecūhun ni rō jeē ni jíhī Jesucristo jicā cruz jehē rō. ²Ĥin-ni jnúhun yáha cájñuhun rí rohó: ¿Ndesé ni canihīn rō Espírítu Santo? ¿A jéé ní cacundeyí ró squícu ró jniñu ndácu ley Moisés? Tú cuiti, chi jeē ní cacandíje ró jnúhun jnáma ya rohó jéé ní cajini sōho ró. ³¿Ndesé cúu jeē tu cájecūhun cuiti ni rō? Chi xihna gā ni cacandíje ró jéé ni jíhī Cristo jeē jnama ya rohó, te ni canihīn rō Espírítu. Te vijna ¿á cájeni ni rō jeē stóo ró jnúhun ún te fuerza maá ró squícu ró ley un, te cācu ró naún? ⁴Núu súcuan te tu ndé ní jéjñiñu

cuiti jeē ní castóho ñayuu rohó síquī jnúhun jnáma Cristo rohó, chi vijna cánducú ró squéndōo ró jnúhun ún. Nacā jeē váha te núu jeē tu ní castóo ró, chi sa cácandíje ndije ró yá. ⁵¿Te na siquī cúu jeē jéhe Yaā Dios Espírítu yā nuū rō te sáha ya jniñu jéhnu mēhñu ró? Tu sáha ya siquī jeē cánducú ró squícu ró ley un, chi siquī jeē ní cacandíje ró jnúhun jnáma ya rohó jéé ní cajini sōho ró.

⁶Abraham ni candíje de jeē sáha Yaā Dios jeē ni jéjñuhun ya, te jeē yúcuan ní ndahva yā cuéchi de. ⁷Núu súcuan te na jécūhun ni rō jijnáhan ró jéé ñáyuu cácandíje jeē sáha Yaā Dios jehē i, ndívi i yucūn Abraham siquī jeē súcuan cácandíje i. ⁸Chi nde jenahán je cáhán tutu i i jeē ñáyuu tācá nacióon tu jíin jnúhun Yaā Dios, ndahva yā cuéchi i núu candíje i ún. Te nde ná tu cuu tāca jéé yáha te je ni jejnūhun ya jnúhun vāha yáha nuū Abraham: Jeē rohó cúu jeē quendōo ndetū ñayuu tācá nacióon. ⁹Núu súcuan te ñayuu cácandíje, quéndōo ndetū i jíin Abraham, tēe ni candíje jeē ni jéjñuhun ya.

¹⁰Te sa jnahñu ndetū ñayuu jeē cánducú i quendōo ndaā i jeē jíin ley Moisés. Chi súcuan yósó núu tútu ii: Jnahñu ndetū tāca ñáyuu jeē tu squícu ndíhi cuiti jnúhun yósó núu tútu ley, achí. ¹¹Núu súcuan te cájí cúu jeē ni ĩin ñayuu ma quéndōo ndaā i nuū Yaā Dios siquī jeē nducú i squícu i ley un. Chi cáhán tutu: Ñayuu jeē ní ndahva yā cuéchi i, técu i jeē candíje i jeē sáha ya jehē i, achí. ¹²Te ley Moisés tu cáhán jeē cótecu

yō ní cáni síquī jeē candíje yó, chi sa suhva cáhán: Núu ndé ñáyuu síquu jniñu yáha, te cotecu i sáha, áchí.

¹³Te Cristo ni jnama ya yohó núu jnūhun cáhán ley jeē jnahnú ndetū yō síquī cuéchi yó, chi máá yá ni ndoho síquī jnūhun jeē jnahnú ndetū yō. Chi yósó núu tutu ii: Tāca ñáyuu condita caa jicā yújnu, jnahnū ndetū i, áchí. ¹⁴Te Cristo Jesús ni jihī yā jicā yújnu cruz návāha quendōo ndetū ñáyuu tācá nación sáha ya. Chi jnūhun jeē ni jéjnūhun ya quendōo ndetū Abraham, jinū nuū i. Te súcuan te núu candíje yó jeē ni sáha Yaā Dios jehē yō, te nihīn yō Espírítu jeē ni jéjnūhun ya quiiji.

Siquī ley jíin síquī contrato jeē ni jéjnūhun ya

¹⁵Hermano, na cáhán rī iin jnūhun ndese cásáha ñáyuu ñayíwí: Núu iin tēe sáha de iin contrato chí iin acta, te núu je ni cucutú ni sáha de firmar, te ma cúu ga najnanū, ni ma cúu jecosō gā. ¹⁶Te suni súcuan ni sáha Yaā Dios iin contrato jeē ni jéjnūhun ya nuū Abraham jíin yúcūn de jeē quíji. Te tu cáhán tutu ii síquī cuehē yucūn de, chi sa cáhán síquī iin-ni yucūn de, te suu cúu Cristo. ¹⁷Núu súcuan te jnūhun jeē cahán rī yāha cúu jeē xihna gā ni sáha Yaā Dios iin contrato jíin Abraham, jeē quiiji Cristo jnama ya yohó, te ni sácútu yá. Yūcuán na te ni yāha cuūn ciento ocō uxí cuiyā, te sáá te ni jēhe ya ley nuū Moisés. Te ley un jéé ní quee cueé gá, ma cúu nacanū contrato un, ni ma cúu casí nuū jnūhun jeē ni jéjnūhun

ya jeē jnama ya yohó. ¹⁸Chi núu jeē jíin ley Moisés jnama Yaā Dios ñáyuu, yūcuán na te nasūu síquī contrato jeē ni jéjnūhun ya cúu. Chi sa suhva síquī máá jéé ni jéjnūhun Yaā Dios nuū Abraham cúu jeē ní jnama ya de.

¹⁹Núu súcuan ¿te ndese jéjníñu ley Moisés? Jéjníñu chi ni jēhe ya un cuéé gá návāha nastúu cuéchi i. Te ni ndacu jniñu máá-ni nde ná tu quiiji Cristo, Yaā cúu yucūn jeē ni jéjnūhun Yaā Dios jeē quíji. Te nde ná ni jēhe Yaā Dios ley un núu ñáyuu, te ni tají yá tācá ndajéhé yā ni cacastūhun núu Moisés, te Moisés ni nacachī nuū i. ²⁰Te sáin cúu jnūhun jeē ni jéjnūhun ya nuū Abraham jeē quíji Cristo, chi máñúhún-ni ya ni jéjnūhun, te tu ní jíni ñúhún ni iin jeē nacachī nuū Abraham.

Siquī ndese jéjníñu ley jenahán

²¹Núu súcuan ¿te á cúní cahán jeē ley jeē ni jēhe Yaā Dios nuū Moisés, téjiyo jeē ni jéjnūhun ya ún? Tú cuíti jeē súcuan. Chi núu jeē ni jēhe Yaā Dios iin ley jeē cótecu ñáyuu ní cáni sáha, yūcuán na te quendōo ndaā i nuū yā síquī jeē síquu i jniñu ndácu ley un núu. ²²Te tuú chi yósó núu tútu ii jeē ndíhi ñáyuu ñayíwí, nájnūhun yíndihyū i vecāa chí cáyíhi i chíji cuéchi. Te súcuan cúu návāha tācá i jeē candíje i jeē ní jíhī Jesucristo jehē i, nihīn i máá jéé ni jéjnūhun ya nuū i síquī jeē candíje i ún.

²³Chi nde ná tu quee jnūhun candíje yó Cristo, te nájnūhun ni yíndihyū yō ni sáha ley jenahán, návāha condetu yó quíwí quiiji

Cristo, Yaā candíje yó. ²⁴Núu súcuan te ley ni cuu ñin jeē ndíto yóhó nájñūhun ñin mozo ndíto sūchi lúlí, te ni jejniñū nde quiví ní quiji Cristo, návāha candíje yó jéē ni jíhi yā jehē yō, te ndahva Yaā Dios cuēchi yó. ²⁵Te vijna jeē ní quee Cristo, Yaā candíje yó, te tuá yíhi yó ndaha ley jeē cúu nájñūhun mozo ndíto yóhó.

²⁶Chi ndívii rō cácuu sēhe Yaā Dios siquī jeē ní cacandíje rō Cristo Jesús. ²⁷Chi tāca rō jeē ní jendute rō síquī jeē ni quívi rō ndaha Cristo, ni sáha ya jeē ní nduu rō nájñūhun cúu máá yá. ²⁸Te vijna chi tuá cúu rō ni ñayuu hebreo ni ñayuu griego, ni mozo jeē ní jeen ñayuu, ni ñayuu sájñiñū cuenta maá, ni tēe ni ñahan. Chi ñin na cúu rō núu yā jeē cáyihí rō ndaha Cristo Jesús. ²⁹Te núu cáyihí rō ndaha Cristo, núu súcuan te yucūn Abraham cácuu ndije rō, te nihīn rō maá táhū jeē ni jéjñūhun ya.

4 Jeē cahán rī jíin rō jíjnáhan rō cúu jeē yáha: ñin sūchi chíí táhū, vēsú maá i naquihin ndíhi jeē névāha tátá i, te núu lúlí i chi ñnuú cúu i jíin mozo. ²Chi yíhi i ndaha tāca jéē ndíto i jíin jéē ndíto ndajniñū i, nde quee quiví jeē ní jeni tátá i, te sáá te nihīn i. ³Te suni súcuan yóhó, chi nde ná tu jecūhun ni yō siquī Cristo te ni cuu yó nájñūhun sūchi lúlí, te ni yíhi yó chíji tācá costumbre jeē ní cajequin ñayuu ñayiví. ⁴Te nde ná ni quee quiví jeē ní jeni Yaā Dios, te ni tají yá Sēhe ya, ni cacu ya chíji ñin ñahan, te ni cacu ya yucūn ñayuu nación hebreo jeē cáyihí chíji ley Moisés. ⁵Súcuan ni cacu ya návāha

jnama ya yohó jéē tuá quihí yó chíji ley un, te návāha naquihin Yaā Dios yohó cuu yó sēhe ya.

⁶Te siquī jeē cácuu rō sēhe ya, te ni tají Yaā Dios Espíritu Sēhe ya ni quiví ini anuá rō, te sáha ya jeē cácahān jee rō: Tátá maá ná. ⁷Núu súcuan te tuá cácuu rō nájñūhun mozo, chi sēhe ya cácuu rō. Te jeē cácuu rō sēhe Yaā Dios, te suni nihīn rō maá táhū jeē ni jéjñūhun ya jeē jíin Cristo.

Jeē nacani ni Pablo siquī ñayuu cacandíje

⁸Chi nde saá, nde ná tu jecūhun ni rō ndese Yaā cúu Yaā Dios, te ni cacu rō mozo nuū tāca jéē násūu yāā ndaā cúu. ⁹Te vijna chi je cájini rō ndese Yaā cúu ya, te vāha ga na cáhān rī jeē maá yá je jíin yā rohó. Núu súcuan ðte najehē cácuni rō nandió cóo rō nduu tucu rō mozo nuū tācá costumbre ñayuu ñayiví jéē tu níhín jniñū cuití? ¹⁰Chi máni jeē cánēe ñi rō quiví jíin yóō jíin vico jíin cuíyā. ¹¹Te yúhú rí sanaa te tu ní jéjniñū cuití jeē ní nacani ri jñūhun nuū rō.

¹²Cáhān ndahú rí jíin rō hermano, jeē na cáni ni rō nájñūhun jéni ni maá rí jeē tuá siquī ri costumbre ñayuu hebreo. Chi ruhū ni nasáha ri maá rí nájñūhun máá rō jeē tu ní cáyihí rō núu ley costumbre ñayuu hebreo. Te tú na vé ni casáha rō jéē cucuíhyá ni rī nde saá. ¹³Chi cájini rō ndese ni cuu ná ni nacani núu rí jñūhun nuū rō ndese jnáma ya yohó. Chi siquī jeē cuhú rī te ni jecuiñī rī ñuu rō ni nacani ri jñūhun. ¹⁴Te vēsú jñūndóho ni cuu jeē ní cocuhū rī, te tu ní casájéē ni rō nuū rī, ni

tu ní cásquéhichī ni rō ruhū. Chi sa ni cajetáhú ró ruhū nájñuhun jeē cúu ri ñin ndajéhé Yaā Dios, chí nájñuhun jeē cúu ri maá Cristo Jesús. ¹⁵Núu súcuan ¿te najehē cúu jeē tuá cácusī ni rō jíin rí vijna? Chi náhán rí jeē vāha ni casáha ró jéē ní cajnahuhū ni rō núu jeē cúu te tava rō tinūu vāha maá ró, cuāha ró nduu tinūu rí nuú. ¹⁶Te vijna ¿á ní nduu ri enemigo rō siquī jeē cachí rí máni jñuhun ndaā nuū rō, chí naún?

¹⁷Te cáhiyo tēe jeē cándihvī ni siquī rō jijnáhan ró, te nasūu jéē quéndō vāha ánuá rō, chí sa jeē cácuni de nasásñin de róhó jíin rúhū, návāha condihvī ni rō jeē cúu maá de. ¹⁸Te íyó vāha jeē cándihvī ni de jehē rō, te núu jeē quéndō vāha ánuá rō cúu núu. Chi níni jíni ñúhún sáha de jeē vāha róhó, vēsú núu íne ri jíin ró chí núu tú ri íne. ¹⁹Séhē mánī jijnáhan ró, jeē siquī rohó cúu jeē inga jínu jnáhuhū ni rí, chí nájñuhun ñin ñahan scácu sēhe, súcuan ndóho ri jehē rō. Te suu cúu jeē jnáhuhū ni rí ndétu ri jeē na ndúndaā anuá rō ndacu ró Cristo. ²⁰Nacā jeē vāha núu jeē ndeé rí jíin ró vijna ñúhún, návāha cuu cahán maní rí jíin ró. Te tu cújñuní cuiti ni rí ndese ga cúu jeē cáni ni rí siquī rō.

Jñuhun yátá siquī Agar jíin Sara

²¹Róhó jíjñáhan ró jéē cácuni rō quíhi ró chíji ley Moisés, cachí nuū rí: ¿A tu ní cájini sōho ró ndese cáhán ley un? ²²Chi cáhán tutu ñi jeē Abraham ni iyo uū sēhe yíí de. Te ñin i cúu sēhe Agar, ñahan cúu mozo vehe de. Te inga i cúu sēhe

ñahan íyó libre, suu ñasihí de Sara jeē ní cuu ña ñahan numá. ²³Te sēhe ñahan cúu mozo, ni cacu i nájñuhun cácu tāca gá sūchi lúli. Te sēhe ñahan cúu libre, ni cacu i maá siquī jeē súcuan ni jejnūhun Yaā Dios. ²⁴Te yāha cúu ñin jñuhun yátá, chí ndindúú ñahan un cúu ña nájñuhun ndindúú contrato jeē ni sáha Yaā Dios jíin ñayuu. Máá ñahan nání Agar, cúu ña nájñuhun contrato ley jeē véji nde yucu Sinaí. Te ñayuu cáyihí chíji contrato ley, cácuu i mozo nuū ley un. ²⁵Chi Agar cúu nájñuhun ley jeē ni jéhe Yaā Dios xiní yucu Sinaí jeē ñin nde Arabia. Te cúu ña nájñuhun Jerusalén, ñuu ñayuu hebreo, jeē iyó vijna, chí tāca sēhe ñuu Jerusalén, cácuu i nájñuhun mozo nuū ley un. ²⁶Te Jerusalén jeē iyó andiví, chí sa suhva íyó libre nájñuhun Sara. Te yóhó ñayuu cácandíje, nájñuhun sēhe un cácuu yó, chí íyó libre yō nuū contrato ley. ²⁷Chi suhva yósó nuū tútu ñi:

Róhó jeē ní cuu ró ñahan numá jéē tú sēhe ró, na cúsi ni rō. Róhó jéē tu ní jéhnde chíji ró jéē scácu ró, na cána jee ró jéē cúsi ni rō.

Chi coo cuehē gā sēhe róhó jéē ní cuu ró ñahan numá vēsú ñahan jeē jé ni scácu sēhe.

Achí tutu.

²⁸Hermano, sēhe Yaā Dios cácuu yó, chí súcuan ni jejnūhun ya nuū yó, nájñuhun ni jejnūhun ya nuū Abraham jeē cacu sēhe de Isaac. ²⁹Te nde saá te inga sūchi ní cacu nájñuhun cácu tāca gá ñayuu, ni jito xeēn i Isaac, sūchi ní cacu ní sáha Espíritu. Te nájñuhun ni

īyo sáá, suni súcuan cájito xeēn ñayuu tāca séhe Yaā Dios nde vijna. ³⁰¿Te ndese cáhán tutu īi? Achí: Quenehen ró ñahan cúu mozo na quíhín ña jíin séhe ña. Chi séhe ñahan cúu mozo, ma nihín i tahū jíin séhe ñahan libre, achí yá jíin Abraham. ³¹Núu súcuan hermano, tu cúu yó nájñuhun séhe ñahan cúu mozo, chi nájñuhun séhe ñahan libre cúu yó.

**Na cuiñi nihin yó jíin jñuhun
jeē ni sáha libre yohó**

5 Te Cristo ni sáha libre yā yohó jeē tuá yíhi yó chíji ley Moisés. Núu súcuan te cuiñi nihin ró jíin jñuhun jeē ni sáha libre yā yohó, te ma ndáivicoo tucu ró cuu ró mozo nuū ley un.

²Sáha ró cuenta jijnáhan ró, chi ruhū Pablo cahán rī jíin ró jeē núu squícu ró ley circuncidar, yūcuán na te tu níhín jníñu cuiñi jeē ní candíje ró jéē ni jíhi Cristo jehē rō.

³Te inga jínu cáhán nihin rī jíin táca téē cánducú cuu circuncidar, jeē núu súcuan te suni cánuú jéē squícu de ndívii cuiñi gā jñuhun cáhán ley Moisés. ⁴Róhó jéē cánducú ró quendōo ndaā rō jeē squícu ró ley un, je ni casiáá rō Cristo núu súcuan. Je ni castóo ró jñuhun jeē ndahva yā cuēchi ró síquī jeē cundáhú ni Yaā Dios rohó. ⁵Te máá yó chí cájica yó jíin Espíritu, te cácandíje yó jéē ní ndahva yā cuēchi yó, te jeē yúcuan ñuhun ni yō jeē quendōo ndaā yō quivī cuiñi yó núu Yaā Dios. ⁶Chi yóhó jéē cáyíhi ndaha Cristo Jesús, vēsú núu jeē cúu yó circuncidar chí tu cúu yó, tú na vé níhín jníñu. Jeē

nihín jníñu cúu jeē candíje yó jeē sáha ya jehē yō. Te yúcuan sáha jeē cundáhú ni yō jnáhan yó.

⁷Vāha ni cacandíje ró núu. ¿Te ndé iin ni jesi jeē tuá cájetáhú ró jñuhun ndaā núu súcuan? ⁸Jñuhun jeē ní cascáhán de róhó, chí tú vēji nuū maá Yaā ní cana róhó ní quívicoo ró ndaha ya. ⁹Te ma náā ni rō jeē téē cástáhú róhó, jñuhun cástéén de cúu nájñuhun levadura, chí vēsú jecu-ni levadura, te ndāa ndíhi ñujen sáha. ¹⁰Te cúcáhnū ni rī jeē maá Jítoho yō sáha ya jeē ma cándíje ró jíjnáhan ró inga jñuhun jeē sīn cáhán. Te máá Yaā Dios cuāha ya castigo téē jeē sáca núu xinī rō, núu na-ni téē cúu de.

¹¹Te ruhū, hermano, núu jeē nácani ga rī jñuhun ley circuncidar nde vijna, te jnáhan rī ñayuu hebreo ma cóto xeēn i ruhū nuú. Chí ma quiñi ni i jeē nácani rī jñuhun jeē ni jíhi Cristo jicā cruz, núu jeē súni nácani rī jñuhun circuncidar nuú. ¹²Te tāca téē jeē sáca núu xinī rō síquī jñuhun ún, vāha ga na cáhnde gā de máá de núu súcuan.

¹³Chi máá ró jijnáhan ró hermano, ni cana ya rohó návāha coo libre rō nuū ley un. Te vēsú iyó libre rō, te ma cáni ni rō jeē cúu quívicoo ró táca cuēchi jeē cúu modo neé cúní maá ró, chí sa suhva na sáha ró máá ró mozo jeē chindéé ñáhán ró jnáhan ró síquī jeē cundáhú ni rō i. ¹⁴Chi je ni squícu ró ndíhi ley núu squícu ró iin-ni jñuhun ndácu jniñu yáha: Cundáhú ni rō jnáhan ró nájñuhun cundáhú ni rō maá ró, achí. ¹⁵Te núu máni jeē ndóna xeēn rō síquī jnáhan ró

jeē cuajnáhan ró, te coto ma snáā rō jniñu jeē ni sáha ya mēhñu rō jijnáhan ró.

**Modo cuní ñayuu tu cándíje
jín modo sáha Espíritu**

¹⁶Súcuan cáhán rī jín rō jijnáhan ró: Caca ró nájñuhun cuní maá Espíritu, te yūcuán na te ma sáha ga rō modo jeē cuní maá ró. ¹⁷Chi tāca jéē cuní maá yó, yūcuan jési nuū jeē cuní maá Espíritu. Te jeē cuní Espíritu, jési nuū modo neé jéē cuní maá yó. Te jeē ndíndúú yáha chí cajesi nuū jnáhan, te jeē yúcuán tu cúu sáha ró jniñu váha jeē cuní rō sáha ró. ¹⁸Te núu máá Espíritu steén nuū rō, núu súcuan te tuá cáyihí ró chíji ley jenahán.

¹⁹Te iyó ndijin tācá jniñu cásáha ñayuu cájica jín modo neé máá, te yáha cúu: Cásíquí ndéē jnáhan i, cásáha i jniñu jnéhén, cásáha neé ndasí i. ²⁰Cáchíñúhún i ídolo, cásáha tásí i, cájito uhū jnáhan i, cájeynáhan i, cácuquíñí ni i. Te yachí cáquití ni i, te cándíhvī ni i jeē cúu máá-ni i, te cátejnáhan i cásásíin i máá i. ²¹Te cácuquésún ni i, cájehni i ndīyí, cánajīni i, cásáha i vico neé, jín táca gá jeē súcuan. Te cáhán nihin rī jín rō, nájñuhun je ni cahān rī jín rō saá, jeē ñayuu casáha súcuan, ma nihín tahú i quīvicoo i ñuu nuū ndácu Yaā Dios jniñu.

²²Te ñayuu jeē nduú i jín Espíritu, tācá jniñu yáha sáha ya jín i: Jeē cundáhú ni jnáhan, jeē cúsiñi ni, jeē iyó ndeyí sīñi ni, jeē iyó paciencia, jeē maní ni, jeē váha ni, jeē squícu vāha, ²³jeē tu sáha jeē cujéhnū, jín jéē jési modo jeē cuní maá. Te tú

na ley cacān cuēchi siquī rō núu sáha ró táca jniñu yáha. ²⁴Te ñayuu cáyihí ndaha Cristo, nájñuhun je ni cajehni i modo neé máá i jicā cruz, nde jín táca jéē ndíyo neé ni i te cútíndí i. ²⁵Te jeē súcuan ni jēhe máá Espíritu iin vida jeē núu yō, te suni na cáca yó jín modo steén Espíritu.

²⁶Te ma sandúxí yó jéē squítí ni yō jnáhan yó, te ni ma cucuésún ni yō siquī jnáhan yó.

**Jñuhun jeē chindéé
ñáhán yó jnáhan yó**

6 Hermano, núu iin jnáhan ró ni sáha cuēchi, te rōhó jéē cájica jín Espíritu, na náchuhun ichí ró i. Te jín jñuhun vitá cahān rō jín i, te suni condito ró máá ró jeē ma cacán ini rō sáha ró táca cuēchi. ²Te chindéé ñáhán ró jnáhan ró núu na vé cúu jeē ndóho i, chí súcuan cúu jeē squícu ró ley Cristo.

³Chi núu iin ñayuu jéni ni i jeē ñayuu teyí cúu i, vēsú nasūu súcuan cúu, te stáhú i máá i núu súcuan. ⁴Te tācá iin iin ró na cóto ndee rō ndese cáa jniñu sáha ró. Te núu vāha sáha ró, yūcuán na te cuu cusíñi ni rō jín jéē sáha máá ró, te tu níni jéē scáni jnáhan ró máá ró jín jnáhan ró. ⁵Chi tācá iin iin yó cánuú squícu yó jín jniñu ní jéhe ya nuū maá yó.

⁶Te rōhó jéē cascuáha jñuhun vāha ya, na chindéé ñáhán ró tēe cástéén nuū rō jín táca jéē váha cánevāha ró.

⁷Ma stívi ró cani ni rō jeē cuu sáha ró cuēchi. Chi ma cúu sácatā rō nuū Yaā Dios cani ni rō jeē tu

sáha ya cuenta. Chi tāca núu ndese sáha ñayuu, suu yūcuán nanihīn i. ⁸Chi ñayuu jeē sáha i jeē cuní modo neé máá i, nihīn i jeē jnahnú ndetū i sáha modo jeē cuní maá i ún. Te ñayuu jeē sáha jeē cuní maá Espírítu, chi nihīn i jeē cótecu i níí cáni andiví sáha Espírítu. ⁹Te ma cuíta yó jeē sáha yó jniñu váha núu súcuan, chi jeē queé maá quívī te nanihīn yō, te núu ma cuíta yó. ¹⁰Núu súcuan te tāca jínu jeē cúu sáha yó, te na sáha vāha yó jíín táca ñáyuu, te hermano yō jeē cácandíje cúu jeē cánuú gá.

Saludo jíín jnúhun cástūhun

Pablo jeē sándihí

¹¹Condēhe ró jeē náhnu letra tée ri cuajeē nuū rō jijnáhan ró, chi ndaha máá rí tée ri yāhá. ¹²Te tēe jeē casáfuerza de róhó cuu ró circuncidar, cásáha de siquī jeē cácani de cuajnúhún ñáyuu de. Te cásáha de návāha ma cóto xeēn ñayuu de jeē cánacani de jnúhun jeē ni jíhī Cristo jehē yō. ¹³Te ni máá de jeē casáha de circuncidar, suni tu squícu vāha de ndihī ga ley jenahán. Te cácani de jeē cuu

ró circuncidar, návāha cuu sátéyí de máá de núu quihin ró jnúni circuncidar sáha de. ¹⁴Te ruhū tu cúní rī satéyí rí maá rí siquī ní ñin jeē yúcuan, chi máá ñin-ni siquī jeē ni jíhī Jitoho yō Jesucristo jicā cruz. Chi siquī yúcuan cúu nájnúhun ni jihī rī, chi ni siaá rī tāca jéé iyó ini ñayíví, te suni nájnúhun ñin ndíyí cúu ri nuū ñayíví. ¹⁵Chi núu yhī yó ndaha Cristo Jesus, te tu níhín jniñu núu cúu yó circuncidar chí tuú. Chi jeē níhín jniñu cúu jeē ní nasájeé yá anuá yō. ¹⁶Te ñúhun ni rī jeē tāca ró jeē jica ró jíín modo yáha, na sáha ga yā jeē coo ndeyí coo siī ni rō, te cundáhú ni yā rohó. Te suni ñúhun ni rī jeē súcuan sáha ya jíín táca gá i jeē cúu ndije i ñayuu cácandíje Yaā Dios.

¹⁷Te vijna jíín níí gá cuahān yō, cúní rī jeē ma stáhān gā ni ñin ñayuu ruhū. Chi yiquí cúñu rī ndíso seña jeē ni tújī rī ni ndoho ri jeē cúu ri mozo maá Jitoho yō Jesús.

¹⁸Hermano, ñúhun ni rī jeē na sáha ga Jitoho yō Jesucristo jeē váha róhó jijnáhan ró. Súcuan na cóo. Amén.

CARTA JEE NI TEE APOSTOL SAN PABLO NUU ÑAYUU ÑUU EFESO

1 Máá rí cúu Pablo, apóstol Jesucristo, chi súcuan ni nujnahan ni Yaā Dios ni tají yá ruhū. Te téé ri carta yáha cuájeē nuū rohó ñáyuu ñuu Efeso, jeē cácuu ró ñáyuu maá yá jeē cácandíje ró Cristo Jesús. ²Te ñúhun ni rí jeē Tatá yō Yaā Dios jíin Jítóho yō Jesucristo, na sáha ga yā jeē váha róhó, te sáha ya jeē coo ndeyí coo sīi ni rō.

Jeē sáha Cristo jeē quéndōo vāha ánuá yō

³Na cáhán yō jeē yóhoyo cújéhnū Yaā Dios, Yaā cúu Tatá Jítóho yō Jesucristo. Chi ni jēhe ya tāca jéē váha íyó andiví jéē quéndōo vāha ánuá yō, chi yíhi yó ndaha Cristo. ⁴Chi nde ná tu jecōo ñayiví te ni nacāji ya yohó jéē quíví yó ndaha Cristo, návāha coo ndoo ánuá yō te caca ndaā yō nuū yā. ⁵Je ni cundáhú ni yā yohó nde saá, te ni tana ya yohó jéē náquihin séhe ya yohó. Te jíin Jesucristo ni sáha ya súcuan, chi ni nujnahan ni yā sáha ya. ⁶Te jeē yúcuan níní na cáhán yō jeē yóhoyo cújéhnū ya, chi yóhoyo vāha ni sáha ya yohó jíin táca jéē váha ni yā, siquī jeē yíhi yó ndaha

Cristo, Sēhe ya jeē maní yā jíin. ⁷Te siquī jeē yóhoyo vāha ni yā jíin yó, te Sēhe ya un ní jnama ya yohó jéē ni jíhi yā jehē yō, te ni ine cáhnu ni yā nuū cuéchi yó. ⁸Te ni steén yā jeē cundáhú ndasí ni yā yohó, te ni sáha ya jeē jécūhun ni yō te cundíchí yó jíin jnúhun ya. ⁹Te ni sáha ya jeē cuni yō ñin jnúhun ya jeē ní yisāhí, jeē tu ní sáha ya jeē cuni ñayuu jenahán. Chi súcuan ni tee ni yā nde saá, te nujnahan ni yā sáha ya. ¹⁰Te yāha cúu jnúhun ún: Nde na quée tiempo te sáha ya jeē ndihí jeē yúcu andiví jíin jéē yúcu ñayiví, inuú-ni nduu, quíhi ndaha Cristo.

¹¹Te siquī jeē yíhi yó ndaha Cristo, te nihin yō tahū yō, chi je ni nacāji Yaā Dios yohó nde saá. Chi súcuan ni tee ni maá yá, chi sáha ya tācá-ni jeē jé ni cundaā ni yā jeē nujnahan ni yā sáha ya. ¹²Súcuan ni sáha ya návāha máá rí jeē xíhna gā ni cacandíje ri Cristo, caca ndaā rí te súcuan sájéhnū ri yā jeē yóhoyo luu cújéhnū ya. ¹³Te suni máá ró jijnáhan ró, ni cajini ró jnúhun ndaā jnúhun vāha jeē jnáma ya rohó, te ni cacandíje ró Cristo. Te ni canihin rō Espíritu Santo jeē ni jéjnūhun ya

jeē cuáha ya. Te ndéé Espíritu yā ún ini anuá yō, te cúu ya nájñuhun sello jeē steén jeē cúu yó séhe Yaā Dios. ¹⁴Te sáha ya jeē jiní ndije yó jéē cucuéé gá te cuáha Yaā Dios tahū yō, nde na sínu ya jniñu jeē jnáma ya ñayuu yā. Te quivī ún cahān yō jeē kujéhnun ya, chi yōhyo luu kujéhnun ya.

**Jeē jicán tahú Pablo jehē
ñayuu cácanđije**

¹⁵Te ruhū ni jini jñuhun ri ndese cácanđije ró jéē ni sáha Jitoho yō Jesús jehē rō, jíin ndese cácanđáhú ni rō ndíhi ñayuu cáyihí ndaha Yaā Dios. ¹⁶Te jeē yúcuan tu jécuiñī rī jeē nácuatáhú rī jehē rō, te jeē jicán tahú rī te tu náā ni rī cacān tahú rī jehē rō. ¹⁷Chi jicán tahú rī jeē na sáha Yaā Dios jeē jécūhun vāha ni rō te ndundíchí ró jíin jñuhun ya, te cuni gā rō ndese Yaā cúu ya. Chi máá yá cúu Yaā Dios Jitoho yō Jesucristo, te cúu ya Tatá yō jeē lúu ndasí kujéhnun. ¹⁸Te jicán tahú rī jeē na sándijin gā yā nuū jeē nájñunī rō, návāha jecūhun ni rō ndese cáa ndíhi jeē cáñuhun ni rō nihin rō siquī jeē ní cana ya rohó. Te jecūhun ni rō ndese cúcá cacuu ró jíin táca jñuhun jéhnun luu ndíso jñuhun ya jeē cúu ñayuu maá yá. ¹⁹Te jicán tahú rī jeē na jécūhun ni rō ndese yōhyo jéhnun poder yā jeē sájñiñu ya ini anuá yohó jéē cúu yó ñayuu cácanđije. Chi tu ndíhi cuiti poder yā. ²⁰Te suu poder un cúu jeē ni stéén yā ná ni sáha ya iin jniñu jéhnun ga jeē ní nastécu yā Cristo mēhñu ndíyi te ni scúcoo ya lado váha ya nde andiví. ²¹Te ni jeni ya Cristo siquī táca jéē kujéhnun, jíin

jéē ndíso jniñu, jíin jéē jnái poder, jíin jéē ndácu jniñu, jíin síquī táca jeē cácahān ñayuu jeē kujéhnun, cúu tiempo yáha, cúu tiempo quiji. ²²Te ni jēhe ya jeē kujéhnun Cristo siquī ndivii. Te ni sáha ya jeē cúnuú yá kujéhnun ya nuū ñayuu cácanđije. ²³Te ñayuu cácanđije un cácuu i nájñuhun yiqui cúñu ya, chi iin na cúu i jíin yá te ñuhun chitú yá ini anuá i, chi Yaā jeē ñuhun chitú níí cáhnu-ni cúu ya.

**Ni cācu yó síquī jeē ní
cundáhú ni yā yohó**

2 Te ni sáha ya jeē cotecu rō níí cáni jíin Cristo. Chi je ni cacuu ró nájñuhun ndíyi nuū yā, ni sáha cuēchi ró jíin jniñu néé ní casáha ró. ²Chi ni cajica ró jíin jniñu yúcuan nde saá, ná ni cacondiquin rō jniñu ñayuu ñayiví, ná ni cajetáhú ró nuū jexeén jeē ndácu jniñu nuū táca táchi xeén, te jíca nuū tachí. Te suu cúu jeē scánda ini ñayuu nihni ni nuū Yaā Dios. ³Te máá rí jijnáhan ri, suni súcuan ni cajica rí, chi ni casáha ri jniñu néé jéē cuní maá rí, jíin táca jéē jicán yiqui cúñu rī, jíin jéē cájeni néé ni rī nde saá. Jeē yúcuan suni ni cacuu rí ñayuu jeē nihin castigo xeén jeē cuáha ya nuú, chi inuú-ni ni casáha ri nájñuhun casáha máá i. ⁴Te Yaā Dios chi yōhyo cuehē ni cundáhú ni yā yohó, te vāha ndasí ni yā jíin yó. ⁵Te náa cúu yó nájñuhun ndíyi nuū yā ni sáha cuēchi yó, te ni nastécu yā yohó jéē cōtecu yō níí cáni jíin Cristo. Chi siquī jeē yōhyo vāha ni yā cúu jeē ní jnama ya yohó. ⁶Te ni nastécu yā yohó jéē cōtecu inuú

yó jíin Cristo Jesús, te scúcoo ya yohó jíin yá nde andiví. ⁷Súcuan ni sáha ya návaha ní gá tiempo jeē quíji, te stéén yā ndese yōhyo maní yā jíin yó, jíin ndese vāha ni yā jíin yó jeē siquí Cristo Jesús. ⁸Chi siquí jeē yōhyo maní yā jíin ró cúu jeē ní jnama ya rohó, chi ni cacandíje ró jéē sáha ya jehē rō. Te nasūu síquí jeē ní casáha máá ró cúu, chi tahū jeē ni jéhe ya nuū rō cúu. ⁹Chi tú na jniñu váha ní casáha yó jéē jnama ya yohó, te jeē yúcuan ni iin yó ma cúu sátéyí yó maá yó. ¹⁰Chi cúu yó iin jniñu luu jeē ní nasáha máá yá, chi ni nasáha ya yohó jéē cundúú yó jíin Cristo Jesús, návaha sáha yó táca jniñu váha jeē jé ni sátūhva Yaā Dios jeē sáha yó.

Jeē sáha Cristo jeē ndívi yó núu jnúhun maní Yaā Dios jíin yó

¹¹Núu súcuan te na núcūhun ni rō ndese ñayuu ni cacuu ró ndé saá. Chi tu ní cácuu ró ñáyuu hebreo, chi sa suhva ni cacuu ró ñáyuu tãcá nación jeē tu jíin jnúhun ya. Te ñayuu hebreo jeē casáha circuncidar yiquí cúñu, ni cacahān i jeē cácuu ró ñáyuu tu sáha circuncidar. ¹²Na núcūhun ni rō jeē ndé saá tu ní cáhīin ró jíin Cristo, te ni cacuu ró ñáyuu ñuu jicá núu nación Israel. Te tu ní cájini rō táca jnúhun contrato jeē ni jéjnūhun Yaā Dios. Te tu ní íne Yaā Dios jíin ró ñayívi yáha, te tú na vé jeē váha ní cáñuhun ni rō jeē cóo. ¹³Te vijna chi ni ndívicoo ró núu Yaā Dios jeē tu ní cájini rō jnúhun ya nde saá, chi ni quívicoo ró ndaha Cristo siquí jeē ni jíihí yā jehē rō. ¹⁴Chi Cristo cúu Yaā sáha jeē ndúmani jnáhan

yó. Chi ni sáha ya jeē ñáyuu hebreo jíin ñáyuu táca gá nación, ni nduu yó iin na nuū yā. Chi ni sáha ya jeē tuá jíto uhū jnáhan yó, te suu cúu nájnūhun jeē ní jenu ya iin jeē ndihyú sava mēhñu yó jeē sásñin yóhó. ¹⁵Chi ni socó yā maá yá ni jíihí yā, te súcuan ni ndahva yā ley jenahán jíin jnúhun ndácu jniñu jíin jéē tajnúni ndíso máá. Chi ley un ní sásñin ñayuu hebreo jíin táca nación jeē tu ní jíin i ley un. Te ni nasquíjnanhan ya ndíhi yó jéē ní nduu yó iin na nación jeé, yñhi yó ndaha ya. Te súcuan ni sáha ya jeē ní ndumaní jnáhan yó. ¹⁶Te jíin jéē ni jíihí yā jicá cruz, te ni snáā yā jnúhun cájito uhū jnáhan ñayuu hebreo jíin táca gá nación. Te ni sáha ya jeē ndívicoo yó núu jnúhun maní Yaā Dios jíin yó, te ni nduu yó iin na ñayuu maá yá.

¹⁷Chi ni quíji Cristo ni nacani ya jnúhun váha nuū táca ñáyuu jeē na ndívi i nuū jnúhun maní yā jíin i, cúu róhó ñáyuu tu ní cájini jnúhun ya, te suni ñayuu jnáhan ri hebreo jeē cájini jnúhun ya. ¹⁸Te vijna te siquí jeē ni jíihí Cristo, te ndíhi yó, cúu ñayuu hebreo chí ñáyuu táca gá nación, cuu quívicoo yó núu Tatá yō Yaā Dios, te iin-ni Espíritu yā sáha. ¹⁹Núu súcuan te tuá cúu ró nájnūhun ñayuu ñuu jicá ni ñayuu tatú, chi iin na ni nduu ró jíin ñáyuu ñuu maá yá. Te jnáhan ñayuu vehe Yaā Dios cácuu ró. ²⁰Te cácuu ró nájnūhun iin iin parte iin vehe cáhnu jeē cúvaha síquí cimientu, te cimientu un cúu jnúhun Cristo jeē ní canacani táca apóstol jíin téé ni canacani jnúhun ya jenahán. Te máá Jesucristo cúu

nájnūhun yuū cánuú gá jeē yítuu vehe. ²¹Te níí vehe cúvāha vāha siquī maá yá, cú súcún cuáhān, cúu ĩn templo ĩi jeē ndeé maá Jítóho yō. ²²Te suu cúu máá ró jijnáhan ró, chi ndúú ró jíin Cristo, te ĩnuú-ni sáma ya rohó jíin táca ñáyuu cá candíje, cácuu ró nájnūhun ĩn ĩn yuū templo. Te suu cúu jeē ndeé Espírítu Yaā Dios ĩn rō nájnūhun ĩn ĩn templo.

**Jeē ndíso jníñu Pablo nácani
de jnūhun nuū ñáyuu tu
jíní jnūhun Yaā Dios**

3 Te jeē yúcuan ruhū Pablo, jícán tahu rī nuū yā. Te ĩne ri vecāa siquī jeē ní nacani ri jnūhun Cristo Jesús nuū rohó ñáyuu táca nación jeē tu ní jíní jnūhun ya nuú. ²Te jíní rī jeē ní cajini ró jnūhun ndese yōhyo vāha ni sáha Yaā Dios jíin rí, chi ni jēhe ya jniñu nuū rī jeē nácani ri jnūhun vāha ya nuū rō. ³Te jnūhun ya jeē ní yisāhí, ni nastúu ya nuū rī, nájnūhun je ni tee ri jecu siquī un núu rō. ⁴Te núu na cáhu ró te cuu jecūhun ni rō jeē ní jini vāha ri jnūhun Cristo jeē ní yisāhí un. ⁵Te tu ní stéén yā jnūhun sāhí un núu ní ĩn ñáyuu táca cuíyā ní quiji ichi yátá. Te vijna cúu jeē steén ndijin yā jíin Espírítu yā nuū táca apóstol jeē ní jeni ndoo ya, jíin núu téé cánacani jnūhun ya. ⁶Te súcuan cáhán jnūhun ní yisāhí un: Ñáyuu táca gá nación, ĩn cáhnu-ni nihĩn i tahu i jíin ñáyuu hebreo, chi ni cacandíje i jnūhun jeē jnáma ya i. Te ĩnuú-ni ni nduu ndĩhi i, te ĩn cáhnu-ni quéndōo ndetū anuá i sáha Cristo, nájnūhun ni jejnūhun Yaā Dios. ⁷Te jeē siquí jnūhun yáha

cúu jeē ní jeni ya ruhū jeē nácani ri jnūhun nuū rō. Chi ni cutahū rī jniñu luu yáha jeē ni jēhe ya nuū rī. Te jíin poder yā ni sáha ya un jíin rí. ⁸Te ruhū chi cúu ri tēe núu ga nuū táca ñáyuu núu ga jeē yíhi ndaha ya. Te vésú súcuan te nuū maá rí ni jēhe ya jniñu luu yáha jeē nácani ri jnūhun vāha ya nuū ñáyuu táca nación jeē tu jíní, ndese yōhyo cúca yó ndĩhi jeē ndíso jnūhun Cristo, jeē ma cánda cuiti yō jecūhun ni yō. ⁹Chi ni jeni ya ruhū jeē steén cají rí jeē suni máá i jnama ya i. Te yúcuan cúu jnūhun Yaā Dios jeē ni yísāhi ndé jenahán ndasí, chi máá yá ni sáha ndĩhi-ni. ¹⁰Te súcuan ni sáha ya jíin ñáyuu, návāha vijna te táca jéé cácujeñhu jíin jéé ndíso jníñu nuū sucún, na cúni ndese ndíchí ndasí Yaā Dios. Chi ndíchí ndasí ni sáha ya jíin ñáyuu cá candíje. ¹¹Chi súcuan ni tee ni yā nde níí cáni, te ni sáha ya jeē Jítóho yō Cristo Jesús ni squícu ya ún. ¹²Te siquī jeē ni sáha Cristo, te vijna te jíin ndije yó jéé cúu quívi yó cáhán yō jíin Yaā Dios siquī jeē candíje yó Cristo. ¹³Núu súcuan te cáhán ndahú rí jíin ró jeē ma cucuíhyá ni rō siquī jnūndóho jeē ndóho ri jehē rō. Chi suu sáha jeē quéndōo ndetū anuá rō jijnáhan ró.

Cristo yōhyo cúndáhú ni yā yohó

¹⁴Te jeē yúcuan cúu jeē jécuiñĩ yití rí nuū maá Yaā cúu Tátá Jítóho yō Jesucristo. ¹⁵Te máá yá cúu Tátá nuū ndĩhi ñáyuu yā jeē yúcu andiví jíin ñáyiví. ¹⁶Te jícán tahu rī jeē jíin poder yā jeē cujeñhu ndasí yá, na sáha ya jeē íje vāha ni rō jíin jnūhun ya, te coo fuerza ĩn ĩn anuá

rō, sāha Espiritu yā. ¹⁷Te jícán rí jeē candíje nihin ró Cristo, návāha condee yā ini anuá rō, te jnií vāha ró jnúhun jeē cundáhú ni yā rohó, te cuiñi nihin ró jíin. ¹⁸Te súcuan te cuu jecūhun vāha ni rō jíin táca ñáyuu candíje, ndese cáa jnúhun cundáhú ni Cristo yohó. Chi yōhyo jíté, cáni, cúnú, súcún jnúhun ún, chi yōhyo cuehē sāha. ¹⁹Te jícán rí jeē na cúní vāha ró ndese cundáhú ni yā yohó, vēsú tu cúu cuiñi jecūhun ni yō ndihi ndihi. Te súcuan te cundúú ró jíin Yaā Dios jeē cunuú yá ini anuá rō.

²⁰Núu súcuan te na cáhán yō jeē yōhyo luu cújéhnú ya, chi máá yá cúu Yaā iyó poder jeē sāha ya jeē vāha ndasí gá vēsú ndihi jeē jicán yō chí jéé jéni ni yō. Te sāha ya un jíin poder yā jeē sájniñu ini anuá yō. ²¹Te na cáhán yō jeē yōhyo luu cújéhnú ya jeē siquí jeē ni sāha ya jehē ñayuu cácandíje jíin jéé siquí Cristo Jesús. Te súcuan na cóo nde ní cáni cuiñi tiempo jeē quíji. Amén.

**Inuú-ni cácuu ñayuu
cácandíje sāha Espiritu**

4 Te ruhū jeē íne ri vecāa siquí jnúhun maá Jítoho yō, cáhán ndahú rí jíin ró jeē na cáca ndaā rō nájñuhun cánuú caca ró jéé cácuu ró ñáyuu ni cana ya. ²Te níni na cóo suchí ni rō, te coo vitá ni rō. Te na cóo paciencia rō, te cuandeyí ni rō jíin jnáhan ró jéé cundáhú ni rō i. ³Te na cóndihvī ni rō coyūcu mání inuú ró, sāha máá Espiritu nuū véji jnúhun maní ni. ⁴Chi ñni-ni cácuu ñayuu maá yá, te iyó ñni-ni Espiritu, te inuú cáñuhun ni yō jeē

cóo jeē vāha siquí jeē ní cana ya yohó. ⁵Te iyó ñni-ni Jítoho yō, jíin ñni-ni jnúhun cándíje yó, jíin ñni-ni jnúhun jéndute yó. ⁶Te iyó ñni-ni Yaā Dios jeē cúu Tátá yō jijnáhan yó. Te máá yá cujéhnú siquí ndihi yó, te sájniñu ya jíin ndihi yó, te ndéé yá ini ndihi yó.

⁷Te táca ñni ñni yó ní cacutahū yō sñin sñin jniñu sāha yó, núu ndese ni tana Cristo cūhva tahū un núu yō.

⁸Jeē yúcuan cáhán tutu ii:

Ná ni ndaa ya cuanuhun yā andiví, te ni stutú yá cuehē jeē yándihyū, cuahān yā jíin. Te ni saja ya tahū nuū táca ñáyuu.

⁹Te jeē cahán tutu jeē ní ndaa ya, suni cúní cahān jeē xihna gā nde andiví ni cuun ya nde nuū cunú gá ñayiví yāha. ¹⁰Te Yaā ní cuun, suni máá yá cúu jeē ní ndaa nde nuū sucún gá andiví, návāha cuhun chitú yá ní cáhnu-ni. ¹¹Te ni tana ya sñin sñin jniñu sāha ñayuu. Chi ni jeni ya sava ñayuu cuu apóstol, te sava ga nacani jnúhun ya, te sava ga scándíje ñayuu jnúhun jeē jnáma ya i, te sava ga coo pastor condito ñayuu cácandíje, te sava ga steén.

¹²Súcuan ni jeni ya ñayuu maá yá jeē cuajniñu i nuū yā, návāha cuehnu ga ñayuu Cristo jíin jnúhun ya. ¹³Te súcuan coo nde nduu ñni-ni ndihi yó jíin jnúhun cándíje yó, te cuni vāha yó ndese Yaā cúu Sēhe Yaā Dios. Te súcuan ije vāha yó ndé na cúchitú yó jíin ndihi jnúhun jeē núhun chitú ini Cristo. ¹⁴Te súcuan te ma cóo ga yō nájñuhun sūchi lúlí jéé yachí jéni yāha jéni yūcuán ni i, ni ma quívi nduu yō cháha chúcuu jíin sñin sñin jnúhun

jeé cástéén tēe stáhú jéē yóhoyo ndito de squívi de yóhó nuū jnúhun stáhú. ¹⁵Chi sa suhva na cóndiquīn yō jnúhun ndaā jíin jnúhun cúndáhú ni. Te súcuan cuehnu yó jíin táca jniñu cúní Cristo, Yaā cujéhnu nuū ñáyuu cácuu nájñuhun yiqui cúñu yā, chi iin na cúu i jíin yá. ¹⁶Te sáha ya jeē nduu inuú ni tācá i jeē cáhije i cuahān i, chi cácuu i nájñuhun iin na yiqui cúñu jíin yá. Te jéjñiñu vāha tācá iin iin i ndese ni nihīn jniñu i, návāha scuéhnu jnáhan te ije jíjnáhan jíin jnúhun cúndáhú ni.

Jeē ndújeé yó sáha Cristo

¹⁷Núu súcuan te yāha cúu jnúhun cáhán rī jíin ró, te jeē achí Jítoho yō cúu jeē cahán nihin ri jíin ró: jeē ma cáca ga rō nájñuhun cájica sava ga ñayuu jeē tu jíin i ndese Yaā cúu Yaā Dios, chi cájica i jíin jnúhun jeē jéni sáa-ni máa i. ¹⁸Te íyó nee nuū jeē níjñunī i, te tu névāha i Espíritu jeē véji nuū Yaā Dios, chi tu jíin i jnúhun ya, siquī jeē níhni ni i. ¹⁹Te tuá cúcanu i, chi ni quívicoo i jíin jniñu néé ndasí, te ndíhví ni i sáha i tācá jniñu jnéhén. ²⁰Te róhó jíjnáhan ró, nasūu súcuan ní cáscuáha ró jnúhun Cristo, ²¹te núu ndaā jeē ní cajini ró jnúhun ya jíin jéē ní cacutühva ró jíin jnúhun ndaā Jesús. ²²Núu súcuan te na stóo ró táca jniñu ní casáha ró ichi yátá, ná ni casáha ró modo cuní maá ró jeē ní cujnéhén ánuá rō ni sáha jniñu néé stáhú jéē ní ndiyo ni rō. ²³Te na ndújeé ánuá rō jíin jéē níjñunī rō. ²⁴Te na cuáha ró jnúhun ndujeé ró, chi nasáha Yaā Dios rohó nájñuhun cúní maá yá jeē cáca ndaā rō jíin jniñu váha jniñu ndoo.

²⁵Núu súcuan te ma cahán gā rō jnúhun stáhú, te na cáhán ndaā rō jíin táca jnáhan ró, chi iin-ni cácuu ndíhi yó.

²⁶Núu véji iin jeē squítí ni rohó, te ma quití neé ni rō. Te ma quití ni rō nde quēe niāndii. ²⁷Ma cuáha ró jnúhun jeē sáha jexeén jeē quívi ró cuéchi.

²⁸Ñayuu ní sacuíhná, ma sacuíhná gá i, chi sa suhva na sájñiñu i, te na cócuu i jíin jniñu váha, návāha nihīn i jeē cuáha i nuū ñáyuu cúmanī nuū.

²⁹Ni iin jnúhun néé ma cahán rō, chi sa suhva na cáhán rō jnúhun vāha jeē scuéhnu jnáhan jíin jnúhun ya, te sáha jeē quéndoo vāha ñayuu jíin sōho. ³⁰Ma sáha ró cuéchi návāha ma cucuíhyá ni Espíritu Santo Yaā Dios. Chi Espíritu yā cúu nájñuhun sello jeē steén jeē cúu yó séhe Yaā Dios, nde quíji quívi jínu jniñu jeē jnáma ya rohó.

³¹Te na siáá rō táca jnúhun cútucu ni, jíin jnúhun xeēn ni, jíin jnúhun quítí ni, jíin jnúhun cáhán ndevāha, jíin táca jnúhun néé.

³²Chi sa suhva na cóo vāha ni rō jíin jnáhan ró, te cundáhú ni rō i. Na cóne cáhnu ni rō nuū jnáhan ró, nájñuhun ni ine cáhnu ni Yaā Dios nuū rō siquī Cristo.

Ndese cánuú caca ndaā séhe Yaā Dios

5 Núu súcuan te na ndácu ró Yaā Dios, chi cácuu ró séhe ya jeē maní yā jíin. ²Te níin cundáhú ni rō jnáhan ró, nájñuhun ni cundáhú ni Cristo yohó, te ni socō yā maá yá jehē yō, ni cuu ya

nájnūhun iin londe jeē jeén asīn nuū Yaā Dios jeē ni sócō yā maá yá.

³Te vijna jeē cácuu ró séhe Yaā Dios, te ni ma sáha ró ni ma ndájnūhun ró síquī jnūhun jíca jnéni, ni tācá jniñu jnéhén, ni jnūhun ndíyo ni ndajniñu. ⁴Te ni ma cahán rō tāca jnūhun sáha jeē cúcanu jnáhan, ni jnūhun cánée íi, ni jnūhun jeē tu ndé jéjñiñu cuiṭi. Chi tācá un tu níhín jniñu. Chi sa suhva na nácuatáhú ró nuū Yaā Dios. ⁵Chi je cájini rō jeē ní iin ñayuu cájica jnéni, ni jeē sáha jniñu jnéhén, ni jeē ndíyo ni tācá ndajniñu, ma nihín tahú i quívi i ndaha Cristo jíin Yaā Dios jeē ndacu ya jniñu nuū i. Chi tāca jéē ndíyo ni i cúu nájnūhun ídolo i jeē cáchiñúhún i. ⁶Te coto ró jéē ma stahú ni iin i róhó jíin táca jnūhun cáhán saá ni i, chi síquī tāca jnūhun néé yáha cúu jeē quíji castigo xeēn Yaā Dios nuū tāca ñayuu niñni ni. ⁷Ma quívi nduu rō jíin i núu súcuan.

⁸Chi tāca quívi saá ni coyūcu ró nájnūhun nuū néē, te vijna chi cáyūcu ró jíin luz maá Jítoho yō, cúu jeē cájecūhun ni rō síquī yā. Te na cáca ró nájnūhun cájica ñayuu jeē steén luz yā ini anuá i. ⁹Chi jniñu sáha luz yā jíin yó cúu tācá jniñu maní ni, jniñu ndaā, jíin jniñu váha. ¹⁰Scuáha ró sáha ró táca jniñu jeē újnahan ni maá Jítoho yō. ¹¹Te ma quívi nduu rō jíin táca jeē tu níhín jniñu jeē casáha ñayuu cáyūcu nájnūhun nuū néē. Chi sa suhva steén rō nuū i jeē tú váha casáha i. ¹²Chi cúcanu yō cahán yō síquī jniñu casáha yuhu maá i. ¹³Te luz yā sáha jeē nátuu tācá jniñu néé casáha i. Te núu cuatáhú i luz yā

te caca i jíin luz ún. ¹⁴Jeē yúcuan cáhán tutu:

Róhó jeē cúhuun ni, jeē nájnūhun quíxi, natahū ni, te quenda ró méhñu ñayuu jeē cácuu nájnūhun ndíyi.

Te Cristo steén yā luz yā ini anuá rō.

Achí tutu.

¹⁵Núu súcuan te coto váha ró ndese caca yúcun ró. Te ma cáca ró nájnūhun cájica ñayuu canée, chi caca ró nájnūhun cájica tēe ndíchí. ¹⁶Ma snáa rō tiempo, chi condíhvī ni rō jíin jniñu ya, chi íyó cuéhē cuēchi quívi yáha. ¹⁷Núu súcuan te ma cóo néé xíni rō, chi sa suhva na jécūhun váha ni rō na jniñu nújnahan ni maá Jítoho yō. ¹⁸Te ma nájini ró, chi tīvi ró sáha. Chi sa suhva na ndúcú ró jeē cúnuu Espiritu Santo ini anuá rō. ¹⁹Te cahán rō jíin jnáhan ró jíin salmo jíin himno, yaa íi jeē cahán jnūhun ya. Te ini anuá rō cahán rō jíin yá jíin táca yaa, chi yūcuan cúu jeē jíta ánuá rō nuū yā chíñúhún ró yā. ²⁰Te níni nacuatáhú ró síquī tācá-ni nuū Tatá yō Yaā Dios te ndacunehen ró síhvī maá Jítoho yō Jesucristo.

Ndese squícu váha ñayuu cácandíje nuū jnáhan i

²¹Te cuatáhú ró nuū jnáhan ró síquī jeē cáhíyo yíñúhún ró nuū Cristo.

²²Róhó ñahan cácuu ñasihí, cuatáhú ró nuū yíi ró, nájnūhun jétáhú ró nuū Jítoho yō. ²³Chi yíi cújéhnu nuū ñasihí, nájnūhun cújéhnu Cristo nuū yohó ñayuu cácandíje, jeē cácuu yó nájnūhun

yiqui cúñu yā, chi iin na cúu yó jíin yá. Te máá yá jnáma ya yohó. ²⁴Chi nájnūhun ñayuu cácanđije cájetáhu i nuū Cristo, suni súcuan ñasihí cuatáhu ña ndihi jeē cahán yii ña.

²⁵Te róhó tée cácuu yii, cundáhu ni rō ñasihí ró, nájnūhun ni cundáhu ni Cristo yohó ñayuu cácanđije, te ni socō yā maá yá jehe yō. ²⁶Súcuan ni sáha ya jeē cóo ndoo coo ii yō nuū yā, te ni nacate ya anuá yō jíin jnūhun ya jíin jēē ní jendute yó. ²⁷Te yóhó ñayuu cácanđije chi cuiñi yó núu yā, te luu cujéhu yó. Te ma cóndee cuēchi ánuá yō, ni jeē tú luu, ni iin jeē súcuan, chi sa suhva coo ndoo coo ii yō nuū yā, te tú na vé cumani gā. ²⁸Te nájnūhun Cristo ni cundáhu ni yā ñayuu cácanđije, suni súcuan cánuú jēē cundáhu ni yii ñasihí de, nájnūhun cundáhu ni de máá de. Chi tēe cundáhu ni de ñasihí de, máá de cundáhu ni de. ²⁹Chi ni iin tēe tu jíto uhū de máá de, chi sa suhva yéji de te ndíto yúcún de máá de. Te suni súcuan sáha Cristo jíin yóhó ñayuu cácanđije nuū yā. ³⁰Chi cácuu yó nájnūhun yiqui cúñu yā, te iin iin yó cácuu nájnūhun iin iin parte yiqui cúñu yā. ³¹Te suu cúu nájnūhun tēe jeē stóo de tátá de náná de, te quijnáhan de jíin ñasihí de, te iin na cúu ndíndúú de. ³²Yōhyo jéhu jnūhun sāhi yáha, te cáhán ri jeē ñayuu cácanđije suni súcuan quijnáhan i jíin Cristo. ³³Te suni súcuan ná iin ná iin rō cundáhu ni rō ñasihí ró, nájnūhun cundáhu ni rō maá ró. Te ñasihí na cúu yíñúhún ña jíin yii ña.

6 Te róhó séhe jíjnáhan ró, cuandije ró núu tatá rō nuū naná rō, chi yūcuan cúu jeē váha sáha ró jēē candije ró Jítoho yō. ²Chi yáha cúu iin jnáhan jeē uxí jnūhun ndácu jniñu jeē ni jéhe ya, te xihna gā jnūhun yáha ndíso tahū: Coo yíñúhún ró nuū tatá rō nuū naná rō, ³návāha quendōo ndetú rō, te náhán cotecu rō ini ñayívi yáha. Achí.

⁴Te róhó tátá jíjnáhan ró, ma squití ni rō séhe ró, chi sa suhva scuéhu ró i jíin jnūhun cuandije i, te stéén rō nuū i jeē candije i máá Jítoho yō.

⁵Te róhó mozo jíjnáhan ró, cuandije ró núu patrón rō ñayívi yáha, te coo yíñúhún ró te conso iyo ró núu de. Te na sájniñu ndaā sájniñu ndije ró, cani ni rō jeē nuū Cristo cájejniñu ró. ⁶Ma sájniñu ndúxí ró jeē maá jēē coto de te cuajnúhún de róhó. Chi sa suhva sáha ró cuenta jeē mozo Cristo cácuu ró. Te sáha ró jēē nújnahan ni Yaā Dios nde jíin ini jíin ánuá rō. ⁷Te na cúsi ni rō sájniñu ró, te na cáni ni rō jeē nuū maá Jítoho yō cájejniñu ró, nasūu núu ñayuu. ⁸Chi je cájini rō jeē jniñu váha sáha iin iin ró, te nihin rō yáhu jniñu yúcuan núu maá Jítoho yō, vēsú cúu ró mozo chí tēe sájniñu máá.

⁹Te róhó patrón jíjnáhan ró, suni súcuan sáha ró jíin mozo rō, te ma cahán xeēn rō jíin i. Chi na cócuhun ni rō jeē suni máá ró jíin máá i yíhi ró ndaha Jítoho yō, Yaā ndeé andiví. Te tu sáha ya cuenta ndese cúu iin iin ñayuu, chi inuú sáha ya jíin i.

**Na cúcutú yó jíin táca
fuerza Yaā Dios**

¹⁰Te íyó inga jnūhun, hermano jijnáhan ró. Nducú ró jeē na cóo fuerza ini rō jíin fuerza maá Jítóho yō jeē nduú yá jíin ró, chí íyó téyí poder yā. ¹¹Na cúcutú ró jíin táca fuerza Yaā Dios, návāha cuu cuiñi nihin ró jēē ma stahú jexeén rōhó. ¹²Chi nájnūhun jeē cájejnáhan yó jíin táca jēē neé. Te nasūu ñayuu cúu jeē cájejnáhan yó jíin, chí sa suhva jíin táca táchī cájica nuū sucún. Te yūcuan cúu jeē cácujeñnu, jíin jēē cándiso jniñu, jíin jēē cándacu jniñu nuū ñayuu ñayivi yáha jeē nájnūhun cájica i nuū neé. ¹³Núu súcuan te na cúcutú ró jíin ndihi fuerza Yaā Dios, návāha cuu cuiñi nihin ró quívī jító ndee jexeén rohó. Te súcuan coo tūhva ró jíin táca ndihi jeē cuiñi nihin ró jíin. ¹⁴Núu súcuan te cuiñi nihin ró jíin jnúhun ndaā jeē cúu nájnūhun jeē yíhi nihin sanchíi chíji ró. Te sácutú ró maá ró jíin jnúhun caca ndaā rō, te suu cúu nájnūhun jeē cúcutú soldado jíin sahma cáa jeē ndihyú de. ¹⁵Te níni cotūhva ró nacani ró jnúhun ndeyí jnúhun siñi jeē véji nuū Yaā Dios. Te suu cúu nájnūhun jeē chíhi soldado ndijēn jehē de. ¹⁶Te jeē cánuú gá cúu jeē candíje ró jeē iyó yá jíin ró. Te yūcuan cúu nájnūhun jeē tūhva ró máá ró yatā ñin escudo. Chí jíin jnúhun cándíje ró un te cuu ndahva rō ndihi jeē tají máá jéxeén, jeē cúu nájnūhun nduva jeē cayú yáñuhūn punta. ¹⁷Te cuiñi ró jíin jnúhun ni jnama

ya rohó, jeē cúu nájnūhun ñin lélú cáa. Te cuajniñu ró jnúhun jeē yosó núu tútu Yaā Dios jeē ni jéhe Espiritu Santo nuū rō. Chí yūcuan cúu nájnūhun jéjniñu soldado espada de. ¹⁸Te níni cácan tahú rō nuū Yaā Dios siquī ndihi-ni, te cahān ndahú ró jíin yá jíin fuerza Espiritu. Núu súcuan te ndito na cóo ni rō, te ma jécuiñi rō jeē cacán tahú rō jehē táca ñayuu maá yá. ¹⁹Te suni cahān rō jehē rī, návāha nihin rī jnúhun cahān rī, te coo téyí ni rī nacani cáji rí jnúhun jeē jnama ya yohó, suu jnúhun jeē ní yisāhí un. ²⁰Chi ni tají yá ruhū jeē jica ri nácani ri jnúhun ya ún, te jeē siquí un cúu jeē íne ri vecāa. Te na cácan tahú rō jeē coo téyí ni rī cahān rī jnúhun ya, nájnūhun cánuú cahān rī.

Saludo jeē sándihí

²¹Tíquico cúu ñin hermano jeē maní yō jíin, te cúu de tēe squícu vāha chindéé ñájnáhan jíin rí nuū jniñu máá Jítóho yō. Te máá de castūhún ndihi ndese cuahān jniñu ri te ndese íyó rí. ²²Jeē yūcuan ní tají rí de cuajeē de nuū rō, návāha cachi de ndese cáhiyo ri, te coo ndeyí ni rō jijnáhan ró sáha de. ²³Te ñúhun ni rī jeē Tatá yō Yaā Dios jíin Jítóho yō Jesucristo, na sáha ya jeē coo ndeyí coo siñi ni táca rōhó jēē cácuu hermano, te coo maní gā rō jíin yá, te candíje vāha ró. ²⁴Te ñúhun ni rī jeē na sáha ga yā jeē váha rōhó jijnáhan ró jēē maní ndije ró jíin Jítóho yō Jesucristo. Súcuan na cóo. Amén.

CARTA JEE NI TEE APOSTOL SAN PABLO NUU ÑAYUU ÑUU FILIPOS

1 Máá rí cúu Pablo jíin Timoteo, mozo Jesucristo. Te cátee ri carta yáha cuájeē nuū tāca róhó hermano cáyucú ñuu Filipos, jeē cácuu ró ñáyuu maá yá jeē cáyihí ró ndaha Cristo Jesús. Te suni cátee ri nuū tée cándiso jníñu cándito róhó, jíin núu tēe cájejníñu mēññu ró. ²Te cáñuhun ni rí jeē Tatá yō Yaā Dios jíin Jítóho yō Jesucristo, na sáha ga yā jeē váha róhó, te sáha ya jeē coo ndeyí coo siñ ni rō.

Jeē jicán tahu Pablo jehē ñáyuu cácadíje

³Tāca jínu jeē núcūhun ni rí rohó jíjnáhan ró, te nácuatáhú rí nuū Yaā Dios. ⁴Te náa jicán tahu rí, te níni cúsiñ ni rí jicán tahu rí jehē rō. ⁵Chi ni chindéé ñájnáhan ró jíin rí jeē scáca yó jnúhun váha ya, nde quiví ní cacandíje ró te nde vijna. ⁶Te jíni ndije ri jeē maá Yaā ní squéjéé jniñu váha jíin ró, cocu ya jíin ndé quiví ndíji Jesucristo, te sínu ndihí ya. ⁷Te iyó váha jeē súcuan jéni ni rí siquī tāca róhó, chi yōhyo maní rí jíin ró, te inuú-ni ni sáha ya jeē váha yóhó. Te súcuan cúu vēsú íne ri vecāa chí vēsú cuiñi ri nuū tāca tēe cújéhnu, cahān rí jehē jnúhun

jeē jnáma ya yohó jéē jnúhun ndaā cúu. ⁸Chi Yaā Dios jíin yā ndese yōhyo maní rí jíin ró jíjnáhan ró, nájnūhun yōhyo maní Jesucristo jíin yó. ⁹Te jicán tahu rí jeē na cáca ga jeē cundáhú ni rō jnáhan ró, jíin jéē na jécūhun ga ni rō te cundíchí ró jíin tāca jnúhun ya. ¹⁰Te súcuan te cuu nacáji ró tāca jéē váha condiquín rō, te caca ndaā rō, te ma cóo ni ñin cuéchi siquī rō quiví ndíji Cristo. ¹¹Te súcuan te cayā cuehē jniñu váha jeē sáha Jesucristo jíin ró. Te sáha jeē coo yíñúhún ñáyuu jíin Yaā Dios te cahān i jeē yōhyo luu cújéhnu ya.

Jnúhun jeē técu nduú yó jíin Cristo

¹²Hermano, cúni rí jeē na cúcáhnu ni rō jíjnáhan ró ndese ni sáha jnúndóho ni ndoho ri. Chi ni sáha jeē ni jítē núu ga jnúhun jeē jnáma ya yohó. ¹³Chi tācá soldado cáyucú ini palacio, jíin tāca gá ñáyuu, cájini i jeē íne ri vecāa jeē siquī Cristo. ¹⁴Te siquī jeē íne ri vecāa, jeē yúcuan cúu jeē vihyá gā nihín ndeyí ni cuehē tācá hermano cácadíje nuū Jítóho yō. Te cáhiyo téyí gá ni de nácani de jnúhun ya, te tu ndé ndínuu ni de.

¹⁵Te ndaā chi sava tēe cānacani de jnūhun Cristo siquī jeē cuesún ni de jíin jēe nduxí de. Te sava ga de chi sa suhva cānacani de jnūhun ya siquī jeē váha ni de. ¹⁶Sava de cānacani jnūhun Cristo siquī jeē nducú de jeē váha máá-ni de, te tú ndije de, chi cācuni de jeē nihīn gā rī jnūndóho jeē íne ri vecāa. ¹⁷Te sava ga de chi cānacani de jnūhun siquī jeē cundáhú ni de ruhū, chi cājini de jeē íne ri vecāa siquī jeē cahán rī jehē jnūhun jeē jnáma ya yohó. ¹⁸Tú na vé sáha núu súcuan, chi tēcá-ni modo cascuíté núu de jnūhun Cristo, vēsú núu ndije de chí tuú. Te yāha cúu jeē cúsiī ni rī sáha.

Te suni cusīī gā ni rī, ¹⁹chi jíiní rī jeē táca jēe yáha sáha jeē váha ga coo jíin rí, chi cājicān tahū rō jehē rī, te Espírītu Jesucristo chíndéé ñáhán yá ruhū. ²⁰Chi ñūhun ni rī te cúu ndasí ni rī jeē ma sáha ri ni ñin jeē sáha jeē cucanu ri nuū yā. Chi sa suhva coo téyí ni rī cahān rī jnūhun ya, návāha ndujéhnū ga Cristo sáha máá rí vijna, nájñūhun je ni sáha ri ní véji ri, te vēsú na cótecu rī chí vēsú na cúu rī. ²¹Chi jeē técu rī cúu jeē nduú rí jíin Cristo, te jeē cúu rī cúu jeē vihyá gā váha coo jíin rí. ²²Te núu cotecu gā rī, te cuu scáca ga rī jniñū máá Jítoho yō. Núu súcuan te tu cúcáhnu ni rī ndé ñin cúu jeē váha ga, núu jeē cótecu rī chí jēe cúu rī. ²³Chi mēhñū ndindúú jnūhun yáha íne nihin ri. Chi ñin cúu jeē cuní rī quihīn rī condee rī jíin Cristo, chi yūcuan cúu jeē vihyá gā váha coo jíin rí. ²⁴Te suni cánúú gá jeē cótecu gā rī jeē siquí rohó jíinánhan rō. ²⁵Núu súcuan te íyó ndáa ni rī

jeē quéndōo ri condee gā rī jíin rō, návāha stéén gā rī nuū rō ndese caca váha ga rō jíin yá, te cusīī gā ni rō jíin jnūhun cācandíje rō. ²⁶Núu súcuan te condee tucu ri jíin rō, te cusīī teyí ni rō jeē siquí ruhū, sáha máá Cristo Jesús.

²⁷Te máá ñin-ni jeē condíhvī ni rō caca ndaā rō, nájñūhun cánúú caca rō síquī jeē cācandíje rō jnūhun Cristo. Yūcuán na te vēsú na jíin rī coto jnáhan yó, chí condee jíca rí, te nihīn rī jnūhun ro jēe cáhiin nihin rō jíin jnūhun ya, te cáhiyo ñnuú ni rō, te ñnuú-ni cānducú ndéyí rō siquí jnūhun jeē cācandíje yó jēe jnáma ya yohó. ²⁸Te ma yūhú cuítī rō sáha jeē cājito uhū rohó. Chi jeē jíto uhū i rōhó, yūcuan stéén jeē jnahnú ndetū i, te suni stéén jeē cācu ánuá maá rō jíinánhan rō sáha Yāa Dios. ²⁹Chi ni jēhe Cristo uū jeē váha nuū rō: nasūu máá ñin-ni jeē candíje rō yá, chi suni jeē na ndóho rō jēe siquí yā. ³⁰Chi máá rí jíin rōhó jíinánhan rō, nájñūhun jeē cājejnánhan yó jíin táca jēe neé. Chi ni cajito rō jēe súcuan ni sáha máá rí, te cānihīn rō jnūhun jeē sáha ga rī nde vijna.

Jeē ni sáha suchí yá maá yá te ni ndujéhnū ya

2 Núu súcuan te sáha Cristo jeē cáhiyo ndeyí ni rō, jíin jēe cúsiī ni rō siquí jeē váha ni yā jíin rō. Te ndéé Espírītu yā jíin rō, te maní rō jíin jnáhan rō, te cājito ndáhú rō i. ²Núu súcuan te na cócu ga rō jíin táca jnūhun yáha, návāha cusīī teyí ni rī. Te ñnuú-ni na cóo ni rō, te coyūcu mání rō, te ñnuú na cóo ánuá rō, te ñnuú caní ni rō. ³Te

ni iin jniñu ma sáha ró jéē nducú ró jeē váha máá-ni ró, ni jeē satéyí ró maá ró. Chi sa suhva sáha suchí ró maá ró, te sáha ró cuenta jeē váha ga jnáhan ró vēsú maá ró. ⁴Te ma cóndihvī ni rō maá-ni jniñu jeē quéndōo vāha máá-ni ró, chi suni na cóndihvī ni rō jniñu jeē quéndōo vāha jnáhan ró.

⁵Te na cáni ni rō jijnáhan ró nájnūhun ni jeni ni Cristo Jesús. ⁶Chi máá yá kujéhnū inuú yá jíin Yaā Dios, te vēsú súcuan te tu ní jéni ni yā jeē kujéhnū inuú yá jíin Yaā Dios. ⁷Chi ni siaá yā jeē kujéhnū ya, te ni nduu ya nájnūhun índāa mozo, te ni cacu ya ni nduu ya tēe. ⁸Te ná ni nduu inuú yá jíin tēe, te ni sáha suchí yá maá yá. Te ni jendije ya nde jíin jnúhun jeē cúū yā, te nde jíin jnúhun canu jeē cúū yā jicā cruz. ⁹Jeē yúcuan ní sáha Yaā Dios jeē yóhoyo ni ndujéhnū luu ya, te síhvī yá kujéhnū ndasí gá nuū tāca gá síhvī. ¹⁰Te tāca jéē cáhiin andiví jíin ñáyivī jíin chíji ñáyiví, núu na cúni i síhvī Jesús te jecuiñī yití i. ¹¹Te cahān ndaā ndivii i jeē Jesucristo cúu máá Jítóho. Te súcuan stéén i jeē yóhoyo cújéhnū máá Tátá yā Yaā Dios.

**Ñayuu cávandije cúu i
nájñūhun quīmi jeē ndíndēē**

¹²Núu súcuan hermano jijnáhan ró, nájnūhun níni ní cajendije ró jnúhun ni cahān rī ná ni condee rī jíin ró, suni súcuan víhyá gā cuandije ró vijna jeē ndeé jícá rí jíin ró. Te condihvī ni rō jeē caca ndaā rō jíin jnúhun ní jnama ya rohó, te caca yíñúhún ró conso iyo ró núū yā. ¹³Chi Yaā Dios jícū ya jíin ró

jeē cúu ni rō sáha ró jniñu váha, te chíndēē ñáhán yá rohó jéē squícu ró jniñu núnahan ni yā.

¹⁴Ndihī jeē sáha ró, ma cahān sōo ró, ni ma tejnáhan ró, ¹⁵návāha cuu ró séhe Yaā Dios jeē tú na cuēchi coo siquī rō te coo ndaā rō. Te caca ndoo ró méhñu ñáyuu níhni ni jeē casáha néé. Chi méhñu ñáyuu un stéén rō jniñu váha ró, te súcuan cácuu ró nájnūhun quīmi jeē ndíndēē núū néé ñáyiví. ¹⁶Te stéén rō jnúhun ya nuū i jeē cótecu i níí cáni sáha. Te súcuan te cusíi teyí ni rī quivī ndíji Cristo, chi cuni rī jeē tu ní jícā cāhá rí, ni tu ní sájñiñu cāhá rí. ¹⁷Te vēsú na cúū rī jeē socō rī maá rí nuū yā jeē siquí rohó, te yúcuan cúu jeē nducú rí scandíje ga rī rohó, návāha socō rō maá ró sáha ró jniñu váha jeē cávandije ró yá. Jeē yúcuan cúsiī ni rī, te cúni rī jeē suni cusíi ni rō jíin rí jijnáhan ró. ¹⁸Núu súcuan te na cúsiī ni maá ró jíin rí, te inuú na cúsiī ni yō jijnáhan yó.

Jnúhun Timoteo jíin Epafrdito

¹⁹Te ñúhun ni rī jeē cuáha máá Jítóho yō Jesús jnúhun jeē tají yáchi rī Timoteo jeē de nuū rō, návāha ndusiī ni rī núu na níhín rī jnúhun ndese cáhiyo ró. ²⁰Chi tuá na inga tēe íyó yáha jéē inuú jéni ni jíin rí, nájnūhun máá de jeē ndihví ndije ni de jehē rō. ²¹Chi tāca de cánducú de jeē cúu máá de, te nasūu jéē cuní Cristo Jesús. ²²Te je cájini rō jeē tēe vāha cúu Timoteo. Chi nájnūhun sēhe jíin tátá, súcuan ni jejníñu de jeē nácani de jnúhun vāha ya jíin rí. ²³Núu súcuan te ñúhun ni rī tají rí de jeē de nuū rō,

te núu je ni cucáhnū ni rī ndese coo jíin rí. ²⁴Te jéni ndije ni rī jeē cuāha Jítoho yō jnūhun jeē suni máá rí jinū yachī rī nuū rō jijnáhan ró.

²⁵Te suni jéni ni rī jeē cánuú tají rí hermano yō Epafrodito jeē de, chi tēe sájniñu jíin rí siquī jnūhun ya cúu de te chindéé ñájnáhan de jíin rí. Chi máá ró ni catajī ró de jeē cuajniñu de nuū rī tāca jēē cúmanī nuū rí. ²⁶Chi yōhyo cúu ni de ndacoto tucu de nuū rō jijnáhan ró. Te ni cucuíhyá ndasí ni de, chi ni canihīn rō jnūhun jeē ní cocuhū de. ²⁷Chi jendaá ni cocuhū de, te je yajni cuu de núú. Te Yaā Dios ni cundáhú ni yā de, te nasūu máñúhún-ni de, chi suni ruhū, návāha tú caa ga cucuíhyá ni rī jehē de núú. ²⁸Jeē yúcuan cúu jeē ndihví gā ni rī tají rí de nuū rō, návāha ndusiī ni rō jeē ndácoto tucu ró núú de. Te suni ruhū ma cucuíhyá ndasí gá ni rí. ²⁹Núu súcuan te na cúsiī ni rō jeē nájinū de nuū rō, chi cúu de hermano yō jeē candíje de maá Jítoho yō. Te coo yíñúhún ró jíin tāca tēe índāa nájñūhun cáa de. ³⁰Chi jeē siquí jniñu Cristo cúu jeē jé yajni cuu de núú. Chi ni chundeyí ni de jeē cúu de siquí jeē chindéé ñáhán de ruhū jíin jniñu jeē tu ní íyo modo sáha máá ró jijnáhan ró.

Jnūhun jeē cáca ndaā vāha yó

3 Te vijna, hermano jijnáhan ró, na cúsiī ni rō jíin máá Jítoho yō. Ruhū chi tu jnániní ni rī jeē tēe tucu ri jnūhun yáha núu rō, chi cuajniñu jeē quéndōo vāha ga rō. ²Condito ró máá ró nuū tēe casáha jniñu néé, jeē cándāa ná cándāa ina.

Chi cánducú de stújí de róhó jēē casáha de circuncidar, te tu casáha de jniñu ndaā. ³Te máá yó cácuu ñayuu ni cuu circuncidar ndije, chi cáchiñúhún yó nuū Yaā Dios nde jíin ini jíin ánuá yō, te cácusī ni yō jeē yihí yó ndaha Cristo Jesús, te tu tēnuū yō jeē quéndōo ndaā yō jíin jniñu jeē sáha máá-ni yó. ⁴Núu jeē súcuan cúu te ruhū chi suni cuu tenuū ri jniñu jeē sáha máá-ni ri nuū. Chi núu ndé tēe jéni ni de jeē cuu tenuū de máá de, te ruhū chi víhyá gā cuu tenuū rí maá rí. ⁵Chi ni casáha circuncidar ruhū nuū uná quivī ná ni cacu ri. Te yucūn Israel cúu ri, te suni jnáhan yucūn Benjamín, te iin hebreo sēhe hebreo cúu ri. Te suni ni cuu ri tēe grupo fariseo jeē ni squícu ri tāca ley jnáhan ñuu rí hebreo. ⁶Te ni jito xeēn rí ñayuu cácañíje, chi yōhyo ni condihví ni rī jeē ma sáma i modo ley jenahán. Te ni iin tu ní cúu cahán jeē tu squícu ri ley un, chi ni squícu vāha ri. ⁷Te tāca jēē ní tenuū rí ún, chi sáha ri cuenta jeē tu ndé níhín jniñu cuiti, chi vijna te ni candíje ri Cristo. ⁸Te suni chíhi ri cuenta jeē vāha ga na náa ndihí jeē ní tenuū rí ún, chi vāha ndasí gá cúu jeē ni quívī ri ndaha máá Jítoho rí Cristo Jesús. Te jeē siquí maá yá te ni siaá rí ndihí ún, te sáha ri cuenta jeē nájñūhun yācá-ni cúu. Chi ni quívī ri ndaha Cristo, ⁹te ndúú yá jíin rí. Te tuá nducú rí quéndōo ndaā rí jeē jíin ley un, chi sa suhva Yaā Dios ni ndahva yā cuēchi ri jeē ní candíje ri Cristo. Chi súcuan squéndōo ndaā yā ñayuu cácañíje. ¹⁰Te vijna te cúni rí jecūhun vāha ni ri ndese

Yaā cúu ya. Te cúní rí jeē poder jeē ní natecu yā cone jíin rí. Te cúní rí ndoho rí jíin yá, te nde jinū rí ndoho rí nájnūhun ni ndoho máá yá jeē ni jíhi yā. ¹¹Chi yōhyo ñūhun ni rí natecu rí nájnūhun ni natecu yā.

**Jeē nducú ndéyí Pablo
sínu de carrera de**

¹²Te ná tu nihīn rí ndīhi jeē ni cáhān rí ún, ni ná tu ije rí jíin. Te nducú ndéyí rí siquī ún, chi ñūhun ni rí jeē nihīn rí tācá un, chi jeē yúcuan cúu jeē ni nihīn Cristo Jesús ruhū xīhna gā. ¹³Hermano jijnáhan ró, tu sáha rí cuenta jeē jé ni nihīn rí ndīhi ún. Te íyó ñin jeē sáha rí, cúu jeē squéndō rí tāca jéé ní cuu ichi yátá, te nducú ndéyí rí nihīn rí tāca jéé iyó ichi núú. ¹⁴Chi cúu un nájnūhun jeē jínu rí ñin carrera cuahān rí nde jinū rí andíví, te nihīn rí premio jeē cuáha Yaā Dios. Chi ni cana ya yohó jéé quihín yō nuū yā andíví siquī jeē yíhi yó ndaha Cristo Jesús.

¹⁵Te tāca yó jeē jé ni ije vāha yó jíin jnūhun cándíje yó, súcuan na cáni ni yō. Te núu ndé ñin ró sīin jéni ni rō, te Yaā Dios suni stéén yā nuū rō jeē násūu súcuan cúu. ¹⁶Te jíni ñūhún cani ni yō te caca yó modo jeē quijnáhan jíin jéé jé ni nihīn yō.

¹⁷Hermano, na ndácu ró rúhū jijnáhan ró. Te condēhe vāha ró ndese cájica ñayuu ndaā, chi cájica i nájnūhun ni castéén rí nuū rō.

¹⁸Te je ni cuu tijni jínu ni cahān rí jíin ró, te nde ndahyú rí cahān tucu rí vijna, jeē iyó cuéhē ñayuu cájica i ñin modo jeē steén jeē jíto uhū i jnūhun jeē ni jíhi Cristo jicā

cruz. ¹⁹Te ñin quiví te jnahnū ndetū ñayuu ún. Chi máni jeē cáji vāha i cúu jeē cáchiñúhún i. Te sátéyí i máá i jíin jniñu néé jeē jéhe jnūhun canu. Te máni máá jéé iyó ini ñayívi cúu jeē ndíhví ni i. ²⁰Te máá yó chi ñayuu coyūcú andíví cúu yó, te cándetu yó jéé nde yūcuán ndiji Jitoho yō Jesucristo, Yaā jnáma yóhó. ²¹Te máá yá nasama ya yiqui cúñu ndahú yó, návāha nduu yó nájnūhun cáa máá yá jeē lúu cújéhnu ya. Te súcuan sáha ya jíin poder yā jeē cújéhnu ya siquī ndīhi-ni.

Níní na cúsiñ ni yō jíin Jítoho yō

4 Núu súcuan hermano jijnáhan ró, cuiñi nihīn ró jíin jnūhun máá Jítoho yō. Chi yōhyo maní rí jíin ró, te cúní rí jeē coto jnáhan yó, te cúsiñ ni rí jíin ró, te nájnūhun premio rí cácuu ró.

²Te cáhān ndahú rí jíin róhó Evodia jíin Síntique jeē ñnuú na cóo ni rō, chi cácuu ró hermana jeē cácandíje ró máá Jítoho yō. ³Te suni cáhān ndahú rí jíin róhó, téé jeé ní chindéé ñájnáhan vāha jíin rí, jeé na chindéé ñáhān ró hermana un, chi ni casájniñu nihīn ña jíin rí siquī jnūhun jeé jnáma ya yohó. Te suni súcuan ni sáha Clemente jíin sava ga ñayuu ni sájniñu jíin rí. Te ni jecosō síhví i nuū libro jeé yosó síhví ñayuu cotecu ní cáni.

⁴Te níní na cúsiñ ni rō jijnáhan ró jíin máá Jítoho yō. Te ñnga jínu cáhān rí jeé na cúsiñ ni rō. ⁵Sáha vāha ró jíin táca ñayuu, návāha cuni i jeé súcuan vāha ni rō. Chi máá Jítoho yō, yajni-ni cúu ya jíin ró.

⁶Ma nácani ndasí ni rō siquī ni iin. Chi sa cahān rō jíin Yaā Dios siquī tāca jéē nácani ni rō. Chi cacān tahú rō, te cahān ndahú rō, te suni nacuatáhú rō nuū yā. ⁷Yūcuán na te sāha Yaā Dios jeē cóo ndeyí coo siī ndasí ni rō, te súcuan coo jíin rō nde cūhva jeē ma jécūhun ni rō ndese cúu jeē sāha ya ún. Te condito vāha ya anuá rō jíin jéē níjnūnī rō, coo cuehē jnūhun ndeyí jnūhun siī ni jíin rō, siquī jeē yíhi rō ndaha Cristo Jesús.

Jeē na cáni ni yō siquī tāca jéē váha

⁸Te iin na jnūhun íyó, hermano jijnáhan rō. Na cáni ni rō siquī tāca jéē iyó ndāā, jíin jéē sāha yíñúhún, jíin tāca jniñu sāha vāha, jíin jniñu íyó ndoo, jíin tāca jéē iyó mánī ni, jíin jéē lúu sāha. Te mánī na núcūhun ni rō tāca jéē váha jeē sāha jeē nacuatáhú rō nuū yā.

⁹Tāca jéē ni stéén rī nuū rō, jeē ní cacutūhva rō núu rī, jíin jéē ní cajini rō ní cahān rī, jíin jéē ní cajito rō ni sāha ri, tāca yúcuan suni na sāha máá rō. Yūcuán na te máá Yaā jeē jéhe jnūhun ndeyí siī ni, coo ya jíin rō.

Jeē ní casocō ñayuu Filipos nuū Pablo

¹⁰Te yōhyo cúsiī ni rī sāha máá Jítóho yō, chi vijna te ni canucūhun tucu ni rō jeē chindéé ñáhán rō rúhū. Te nasūu jéē ní naa ni rō sāha rō súcuan, chi siquī jeē tu ní íyo modo. ¹¹Te nasūu jéē cahán rī siquī jeē ndóho ndáhú rí, chi je ni cutūhva ri cusīī ni rī jíin jéē névāha rī. ¹²Jínī rī cotecu ndahú rí, te jínī rī cotecu cucá rí. Chi ni cāan

ri jíin táca-ni, núu jeē ndutú chíji ri chí jéē ndóho ri sōco, núu jeē cónevāha cuehē rī chí jéē cúmani nuū rī. ¹³Ndihī-ni cúu sāha ri, chi máá Cristo jéhe ya fuerza ini rī. ¹⁴Te vēsú súcuan te vāha ni casáha rō jéē ní chindéé ñáhán rō ruhū jíin jnūndóho jeē ndóho ri.

¹⁵Te rōhó ñáyuu ñuu Filipos, je cájini rō ndese ni cuu. Chi nde quivī ní quejéé rí nácani ri jnūhun jeē jnáma ya yohó, ná ni quenda ri Macedonia vēji ri, te ni casocō rō xūhun núu rī siquī jeē ní canihīn rō jnūhun ya ni nacani ri. Te ni iin grupo ñayuu cácanđje tu ní sāha súcuan, chi máá-ni rōhó jijnáhan rō. ¹⁶Te ná íne ri ñuu Tesalónica, te ni catají rō jecu jeē jínī ñúhún rí, ni jinū iin uū jínu. ¹⁷Te nasūu jéē nducú rí jeē cuáha rō núu rī, chi sa nducú rí jeē na cáyá gā jniñu vāha rō, návāha cayā tahū rō nuū Yaā Dios. ¹⁸Chi je ni nihīn rī ndihī jeē jínī ñúhún rí, te ndóo ga. Te íyó cuehē nuū rī, chi ni nihīn rī jeē ní catají rō vēji jíin Epafrodito. Te jeē ní catají rō cúu nájñūhun iin ofrenda jeē asín jeén, ni casocō rō nuū Yaā Dios, te cúsiī ni yā jíin. ¹⁹Te Yaā Dios chi cuāha ya nuū rō tāca jéē cúmani nuū rō, chi cucá ndasí yá jíin tāca jéē váha jeē lúu íyó núu Cristo Jesús. ²⁰Te na cáhán yō jeē yóhyo luu cújéhnu Tátá yō Yaā Dios ní cáni. Amén.

Saludo jeē sándīhí

²¹Cachi rō nuū tāca ñáyuu máá yá jeē sándeýí ni i, áchí rí, chi cácanđje i Jesucristo. Te hermano yō cáyūcu jíin rí yáha, cácahān de jeē sándeýí ni rō jijnáhan rō. ²²Te tāca ñáyuu máá yá jeē

cáhiyo yáha, suni cácahān i jeē sándeýí
ni rō. Te ñayuu cáyūcú vehe rey cújéhnū
ñuu Roma yáha, máá i cácahān gā
súcuan.

²³Te ñúhun ni rī jeē maá Jítóho
yō Jesucristo, na sáha ga yā jeē
váha róhó jíjñáhan ró. Súcuan na
cáo. Amén.

CARTA JEE NI TEE APOSTOL SAN PABLO NUU ÑAYUU ÑUU COLOSAS

1 Máá rí cúu Pablo, apóstol Jesucristo, chi súcuan ni nujnahan ni Yaā Dios ni tají yá ruhū. Te jíin hermano yō Timoteo ²cátee ri carta yáha cuájeē nuū rohó ñáyuu ñuu Colosas, jeē cácuu ró ñáyuu maá yá jeē cácandíje vāha nuū Cristo. Te cáñuhun ni rī jeē Tatá yō Yaā Dios na sáha ga yā jeē vāha rōhó, te sáha ya jeē coo ndeyí coo siī ni rō.

Jeē jicán tahú Pablo jehē ñáyuu cácandíje

³Te jeē cájicān tahú rī nuū Yaā Dios, Yaā cúu Tatá maá Jítóho yō Jesucristo, te níni cánacuatáhú rí nuū yā jeē siquí rohó jíjnáhan ró. ⁴Chi ni cajini jnūhun ri ndese vāha cácandíje ró Cristo Jesús, jíin ndese cácanadáhu ni rō táca ñáyuu maá yá. ⁵Chi cáñuhun ni rō nihin rō jeē ñúhun vāha nde andiví cuu ró. Chi ná ni cajini ró jnúhun ndaā jeē jnáma ya rohó, te ni caquejéé ró ñúhun ni rō. ⁶Te jnūhun un jéé ní canacani nuū rō, chi ndúcuehē cuahān te níhín jníñu ní cáhnu ñayíví. Te suni súcuan ni sáha jíin rōhó jíjnáhan ró ndé quiví ní cajini ró te ni cajecūhun ni rō jeē ndaā

cúu jeē yóhyo vāha ni Yaā Dios jíin ró. ⁷Te jnūhun un cúu jeē ni stéén Epafras nuū rō, tēe sájniñu jíin rí jeē maní rī jíin. Chi cúu de tēe jéjníñu squícu vāha nuū Cristo jeē ndíto de rōhó. ⁸Te máá de ni castūhun núu rī siquí rohó, ndese cácanadáhu ni rō jnáhan ró sáha máá yá.

⁹Jeē yúcuan suni tu cájecuñī rī jeē cájicān tahú rī jehē rō, nde quiví ni níhín rī jnūhun ún te nde vijna. Te cájicān rī nuū yā jeē na jécūhun vāha ni rō te coo ndíchí ró jíin jnúhun ya, sáha máá Espíritu, návāha cuni rō ndihi ndese nújnahan ni maá yá. ¹⁰Te cájicān rī jeē caca ndaā rō nájnūhun cánuú caca ró jéé cácuu ró ñáyuu maá Jítóho yō. Te súcuan te sáha ró ndihi jeē nújnahan ni yā, te nihin jníñu ró jíin táca jniñu vāha, te jecūhun ga ni rō ndese Yaā cúu Yaā Dios. ¹¹Te cájicān rī jeē cuáha ya fuerza ini rō, nájnūhun íyó fuerza maá yá jeē cujéhnu luu ya. Te súcuan te cuu cuandeyí ni rō jíin táca-ni jnúndóho, te cusí teyí ni rō. ¹²Te cuu nacuatáhú ró nuū Tatá yō, chi máá yá ni chihi fuerza yohó jéé iin cáhnu-ni jíin táca ñáyuu maá yá

nihin yō tahū yō. Chi cájica yó jíin luz yā jeē yíhi yó ndaha ya. ¹³Chi ni jnama ya yohó jéē ni yíhi yó ndaha máá jéē jní poder nuū néē, te ni squívi ya yohó ndaha Séhe ya jeē maní yā jíin, ndácu ya jniñu nuū yō. ¹⁴Chi Séhe ya un ní jnama ya yohó jéē ni jíhi yā jehē yō, te ni ine cáhnu ni yā nuū cuēchi yó.

Jeē ni sáha Cristo jeē ní ndívi yó núu jnúhun maní Yaā Dios jíin yó

¹⁵Yaā Dios jeē tu cúu coto yó, ni sáha ya jeē ní quiji Séhe ya, te súcuan ni jito yó máá yá. Te Séhe ya ún, je íyó yá nde ná tu jecōo tāca jéē iyó. ¹⁶Chi jíin Séhe ya ni sáha Yaā Dios ndíhi jeē ni jécōo, ndíhi jeē iyó andívi jíin jéē iyó ñayívi, jeē jíní yō nuū jíin jéē tu jíní yō nuū. Te suni ni sáha ya tācá ndajéhé jeē cándacu jniñu, jíin jéē cándiso jniñu, jíin jéē cácujuhnu, jíin jéē cájnií poder. Jíin Cristo ni sáha Yaā Dios jeē ni jécōo ndíhi, te jeē cúu Cristo cúu. ¹⁷Te je íyó Cristo nde ná tu coo ndíhi jeē iyó. Te ndaha máá yá yíhi vāha ndíhi-ni. ¹⁸Te máá yá cújéhnun nuū ñayuu cávandíje, nájñuhun cújéhnun xiní nuū yiqui cúñu, chi nájñuhun yiqui cúñu yā cácuu i, cúu jeē ñin na cúu i jíin yá. Te máá yá sáha jeē cotecu i ní cáni, te xihna gā maá yá ni natecu mēñu ndívi, návāha cujéhnun ya nuū tācá-ni. ¹⁹Chi ni cusíi ni Yaā Dios jeē ndíhi ndese cúu máá yá, suni súcuan cúu Cristo. ²⁰Te siquí jeē ni jíhi Cristo, te ni cusíi ni Yaā Dios sáha ya jeē ndívicoo tācá-ni nuū jnúhun maní yā jíin, tāca jéē yúcu ñayívi jíin jéē yúcu andívi. Chi jíin jéē ni jíhi Cristo jicā cruz,

te ni sáha Yaā Dios jeē ndívicoo tācá-ni nuū jnúhun maní yā jíin.

²¹Te máá ró jijnáhan ró, chi sñin siquí ni cahíin ró ndé saá, te ni cajito uhū rō yā ini anuá rō, chi máni jniñu néé ní casáha ró. Te vijna chi je ni sáha Yaā Dios jeē ní ndívicoo ró núu jnúhun maní yā jíin ró. ²²Súcuan ni sáha ya siquí jeē ni sócō Cristo maá yá ni jíhi yā, návāha coo ndoo coo ñi rō cuiñi ró núu yā, te ma cóo jnéhén ró, te tú na cuēchi coo siquí rō. ²³Te súcuan sáha ya núu cuiñi nihin ró jéē candíje vāha ró, te núu quendōo nihin ró jíin jnúhun vāha jeē cáñuhun ni rō jeē jnáma ya rohó, te ma siaá cuiti rō. Chi jñuhun un ní cajini ró, te ni jite núu ní cáhnu ñayívi. Te ruhū Pablo suni jéjníñu ri jeē nácani ri jñuhun ún.

Jeē jejniñu Pablo siquí ñayuu cávandíje

²⁴Te vijna te cúsiñi ni rí jeē ndóho ri jehē rō jijnáhan ró. Chi jíin yiqui cúñu ri ndóho ri jeē cúmani gā ndoho ri jíin Cristo jehē ñayuu cávandíje, suu ñayuu cúu nájñuhun yiqui cúñu yā. ²⁵Te cúu ri tēe jéjníñu siquí ñayuu cávandíje, chi súcuan ni tejníñu Yaā Dios ruhū, návāha nacani ndíhi ri jñuhun ya nuū rō te quendōo vāha ró. ²⁶Te nácani ri jñuhun ya jeē ní yisáhi, jeē tu ní cájni ñayuu nde jenahan ndasí te nde ní cáni vēji. Te vijna te je ni steén cají yá jñuhun un núu ñayuu maá yá. ²⁷Chi ni cusíi ni yā jeē steén yā nuū i ndese cúcúca ndasí i jíin ndíhi jeē ndíso jñuhun sáhi yáha jéē lúu cújéhnun, te cuitē núu quihín nuū tācá nación jeē tu

jíní. Te jnūhun sāhi yáha cúu jeē ndeé Cristo ini anuá rō, ndúú yá jín rō, te jeē yúcuan cáñuhun ni rō táca jéé lúu jéhu jeē coo.

²⁸Te jnūhun Cristo un cúu jeē cánacani ri, te cástíhví ni rī táca ñáyuu, te cástéén rī jnūhun ya návaha jecūhun vāha ni i. Te súcuan te ije vāha ni ndívii i jeē yíhi i ndaha Cristo Jesús. ²⁹Te siquī yúcuan cúu jeē sájniñu ri, chi ndíhví ni rī nácani ri jnūhun jíin táca fuerza Cristo jeē chindéé ñájnáhan ya jíin rí.

2 Chi cúní rī jeē na jécūhun ni rō ndese yōhyo ndúcú ndéyí rí jehē rō, jíin jéhē ñayuu ñuu Laodicea, jíin ndé táca ñáyuu jeē tu ní cájini cuiti nuū rī. ²Chi cúní rī jeē coo ndeyí ni anuá i, te inuú-ni coyūcu mání i, te jecūhun ndíhi ni i ndese yōhyo cúcá i jíin jnúhun jeē candíje nihin i. Chi cuni i ndese Yaā cúu Cristo, chi máá yá cúu jnūhun Yaā Dios jeē ni yísāhí un. ³Te ini Cristo yísāhí táca jnúhun jeē cucúcá rō jíin, suu jnūhun ndíchí jíin jnúhun jécūhun ni. ⁴Te jnūhun yáha cáhán rī jíin rō jijnáhan rō, návaha ma stahú ni ñin i rōhó jíin táca jnúhun stáhú jéé lúu cáhán. ⁵Chi vēsú ndeé jícá rí jíin rō, te ñúhun ni rī rohó, te cúsiñ ni rī jeē jíní rī ndese cájica ndaā rō te cácandíje nihin rō Cristo.

⁶Núu súcuan te nájñuhun ni cajetáhú rō jeē Jítoho rō cúu Jesucristo, suni súcuan na cáca ndaā rō jíin yá. ⁷Te na jnái vāha jnūhun ya ini rō, te na íje vāha rō jíin jnúhun cácandíje rō yá, nájñuhun je ni cajini rō. Te níní nacuatáhú rō nuū Yaā Dios.

Jeē ndújeé yó sáha Cristo

⁸Coto má cuāha rō jnúhun jeē stahú ni ñin ñayuu rohó jíin jnúhun ndíchí jéé tu jéjníñu, jíin jnúhun ndúxí stáhú. Chi tu cácandíje i jnūhun Cristo, chi sa cácandíje i táca jéé tajnúní ñayuu, modo jeē castéén ini ñayívi yáha.

⁹Chi ndíhi ndese cúu máá Yaā Dios, suni súcuan cúu Cristo. ¹⁰Te ndíhi ndese cúu Cristo, suni súcuan cúu rō jijnáhan rō, chi cáyíhi rō ndaha ya. Te máá yá cújéhu nuū táca jéé cujéhu jíin jéé ndíso jníñu andíví. ¹¹Te siquī jeē cáyíhi rō ndaha ya, suu cúu jeē nájñuhun ni cuu rō circuncidar. Te jeē súcuan ni sáha ya circuncidar rohó, chi nasūú ñin jnuni jeē yíhi yiqui cúñu rō cúu, chi sa suhva jeē ní sándoo ya táca cuéchi ni casáha rō jíin modo neé máá rō. Chi súcuan cúu jeē sáha Cristo circuncidar rohó. ¹²Te jeē ní cajendute rō cúu nájñuhun jeē ní quindūji rō jíin Cristo, te suni nájñuhun jeē ní natecu rō jíin yá. Chi ni cacandíje rō jéé jíin poder Yaā Dios ni nastécu yā Cristo mēhñu ndíyi. ¹³Chi ni cacuu rō nájñuhun ndíyi nuū yā siquī cuéchi rō, chi ná tu sáha ya circuncidar anuá rō nde saá. Te vijna te ni sáha Yaā Dios jeē cotecu rō ní cáni jíin Cristo, chi ni ine cáhnu ni yā nuū táca cuéchi rō. ¹⁴Te nájñuhun jeē iyó ñin acta jeē jicán cuéchi siquí yō jeē ni stívi yó ley yā. Te ni ndahva yā acta un, chi ni chunaa Cristo cuéchi yó jéé ni jíhi yā jicā cruz. ¹⁵Chi ná ni jihí yā jicā cruz, te ni quende yā ndíhi poder táca jéneé jéé cácujeñu jíin jéé cájniñi poder.

Te ni quende yā jeē tuá cujéhnu, chi ni sáha ya jeē cuángoo nuū quíndihyū, te súcuan ni steén yā poder yā.

**Na ndúcú yó jeē quéndōo
vāha yó ndé andíví**

¹⁶Núu súcuan te ma cuatáhú ró núu cácahān ñayuu cuēchi siquī rō, siquī ñin jeē yéji rō chí síquī ñin jeē jíhi ró, chí jéē tu nées ñi rō quivī víco jíin quívī núcōsō yoō jíin quívī ndétātú. ¹⁷Chi tāca ley siquī un ní jejnīñu máá ndé ná tu quiji Cristo. Te vijna te ni quiji ya te tuá jíni nūhún tāca ún. ¹⁸Ma cuáha ro jnúhun jeē cásí ni ñin ñayuu jeē nihín rō tahū rō. Chi cáchiñúhún i tācá ndajéhé yā, te cácahān i jeē súcuan cásáha suchí i máá i. Te cácahān i jeē cájini ndije i jeē iyó ndáā jnúhun cánacani i, te tuú. Te súcuan cásáha téyí sáá-ni i máá i, chí cájeni néé ni i. ¹⁹Te tu cáhiin i jíin Cristo, Yaā cujéhnu nuū ñayuu cácuu nájñuhun yiqui cúñu yā chí ñin na cúu i jíin yá. Chi máá yá scuéhnu ya i jíin jnúhun ya, te nduu ñnuú ni tācá i jeē cáhije i cuahān i, nájñuhun ni jeni ni Yaā Dios.

²⁰Núu súcuan te nájñuhun jeē je ni cajihí rō jíin Cristo, cúu jeē ní casiáá rō tāca jéē tajnúní jeē castéén ini ñayíví. Núu súcuan éte naun cásáha ga rō nájñuhun cásáha ñayuu ñayívi jéē jéndije ró tāca jéē tajnúní? ²¹Chi cácahān i: Ma quehé ró ma caji rō jeē yáha chí jéē yúcuan, ni ma jní ró, áchí i. ²²Te máni jeē tajnúní ñayuu jíin costumbre máá i cúu te tu níhín jniñu jeē quéndōo ndaā ñayuu. ²³Te ndaā chí cájeni ni i jeē jnúhun

ndíchí cúu ún, chí sáha jíin i jeē chiñúhún níhin i, jíin jéē sáha suchí i máá i, jíin jéē stóho i yiqui cúñu i. Te tu níhín jniñu cuiti jeē casi tācá jniñu néé jéē cuní i sáha i.

3 Núu súcuan te nájñuhun ni natecu Cristo, suni súcuan ni canatecu rō jeē ní cuu ró nájñuhun ndíyí ni sáha cuēchi ró. Te na cóndihvī ni rō siquī tāca jéē iyó andíví núu ndeé Cristo lado váha Yaā Dios nuū cujéhnu ya. ²Te na cáni ni rō siquī tāca jéē iyó andíví, nasūu síquī jeē iyó ini ñayíví. ³Chi nájñuhun je ni cajihí rō jíin Cristo, te vijna chí nájñuhun cátecu rō jíin yá andíví, chí cáyihí ró ini ndaha Yaā Dios. ⁴Te quivī ndiji Cristo, Yaā sáha jeē cótecu yō níí cáni, yūcuán na te suni quendacoo ndijin maá ró jíin yá, te cujéhnu luu ró jíin yá.

**Ñayuu jíca jíin modo cuní
maá, jíin ñayuu ní ndujeé**

⁵Núu súcuan te casi rō tāca modo cuní maá ró jeē cáhiyo ró ini ñayívi yáha. Chi ma cáca jnéni ró, ma sáha ró jniñu jnéhén, ma ndíyo ni rō sáha ró tāca jniñu néé, ma cutóó ró, ma ndíyo ni rō ndajniñu. Chi tācá ndajniñu jeē ndíyo ni yō cúu nájñuhun ídolo yō jeē chiñúhún yó. ⁶Chi siquī tācá jniñu yáha cúu jeē cuāha Yaā Dios castigo xeēn nuū ñayuu nihni ni nuū yā. ⁷Te suni jíin jniñu yáha ní cajica ró ndé saá, ná ni casáha ró súcuan. ⁸Te vijna te na stóo ró tāca jéē yáha: jeē quití ni, jeē xeēn ni, jeē sáha jniñu néé, jeē cahán ndevāha nuū jnáhan, jíin jéē cahán tāca jnúhun tú váha. ⁹Ma stahú ró jnáhan ró, chí yúcuan cúu modo

maá ró jeē ní cajica ró jíin ndé saá, te je ni castóo ró. ¹⁰Te ni canduu ró ñayuu jeé, cuandacu ró máá Yaā ni sáha róhó, te cuajecūhun vāha ni rō ndese Yaā cúu ya. ¹¹Te ñayuu ní ndujeé tuá cúu i ñayuu griego, ni ñayuu hebreo, ni ñayuu ni sáha circuncidar, ni ñayuu tu ní sáha circuncidar, ni ñayuu ñuu jicá, ni ñayuu yucú jeē ní indāa néé, ni mozo jeē ní jeen ñayuu, ni ñayuu sájniñu cuenta maá, chi inuú cúu ndíhi i nuū yā. Chi Cristo cúu Jítoho ndíhi i, te ndéé yá ini anuá ndíhi i, ndúú yá jíin i.

¹²Chi ni nacāji Yaā Dios rohó jíjnáhan ró jeē cúu ró ñayuu maá yá jeē maní yā jíin. Núu súcuan te níni cundáhú ni rō jnáhan ró, te coo vāha ni rō jíin jnáhan ró. Te coo suchí ni rō, te coo vitá ni rō, te coo paciencia ni rō. ¹³Cuandeyí ni rō jíin jnáhan ró, te cone cáhnu ni rō nuū i te núu na vé ni sáha i nuū rō. Chi nájnūhun ni ine cáhnu ni Cristo nuū rō, suni súcuan sáha máá ró.

¹⁴Te jeē cánuú gá cúu jeē cundáhú ndasí ni rō jnáhan ró. Chi yūcuan sáha jeē ndúu inuú ni rō te íje vāha ni rō jíin jniñu vāha. ¹⁵Te jñūhun coyūcu mánī na cúnuú ini anuá rō sáha Yaā Dios. Chi ni cana ya rohó jéē nduu ró ñin na ñayuu jéē cóyūcu mánī rō. Te níni na nácuatáhú ró nuū yā.

¹⁶Te scuáha vāha ró jñūhun Cristo návaha cunuú jñūhun ún ini anuá rō. Te stéén rō nuū jnáhan ró, te stíhví ni rō i jíin táca jñūhun ndíchí yá. Te jíin salmo jíin himno, yaa ii jeē cahán jñūhun ya, na cáta luu ró jéē nácuatáhú ró ini anuá rō nuū Yaā Dios. ¹⁷Te tēcá jniñu sáha ró,

núu jeē cahán rō chí jéē sáha ró cúu, ndíhi na sáha ró jéē ndujéhnū síhví máá Jítoho yō Jesús, te nacuatáhú ró núu Tatá yō Yaā Dios sáha ya.

Ndese cánuú squícu ñayuu cáccandíje nuū jnáhan i

¹⁸Róhó ñahan cácuu ñasíhí, cuatáhú ró nuū yíi ró, chi súcuan cánuú sáha ró síquī jeē candíje ró Jítoho yō. ¹⁹Te róhó tée cácuu yíi, cundáhú ni rō ñasíhí ró, te ma cútucu ni rō jíin ña. ²⁰Róhó séhe jíjnáhan ró, tēcá-ni jniñu cuandije ró núu tatá rō nuū naná rō, chi súcuan cúsiī ni maá Jítoho yō. ²¹Te róhó tátá jíjnáhan ró, ma squítí ni rō séhe ró, návaha ma cucuíhyá ni i. ²²Róhó mozo jíjnáhan ró, tēcá-ni jniñu cuandije ró núu patrón rō ñayívi yáha. Ma sájniñu ndúxí ró jeē maá jéē coto de te cuajnúhún de róhó. Chi na sájniñu ndaā sájniñu ndije ró, te conso íyo ró núu Yaā Dios. ²³Te tēcá jniñu sáha ró, na cúsiī ni rō sáha ró, te na cáni ni rō jeē nuū Jítoho yō cájejniñu ró, nasūu núu ñayuu. ²⁴Chi je cájini rō jeē maá Jítoho yō cuáha ya cuehē tahū cuu ró níí cáni. Chi nuū maá Cristo cájejniñu ró, chi máá yá cúu Jítoho rō. ²⁵Te ñayuu casáha jniñu néé, chi sa suhva ndutahū i síquī jeē ni sáha i. Chi tu sáha Yaā Dios cuenta ndese cúu ñin ñin ñayuu, chi inuú sáha ya jíin i.

4 Róhó patrón jíjnáhan ró, vāha ndaā na sáha ró jíin mozo rō. Te na núcūhun ni rō jeē suni íyó Jítoho maá ró, Yaā ndeé andíví.

²Te ndívii rō ma jécuiñī rō jeē jicán tahú rō, chi coo ndito ni

rō jíin, te nacuatáhú ró núu Yaā Dios. ³Te suni cacān tahú rō jehē rī jijnáhan ri, jeē na sáha Yaā Dios jeē cóo ga modo nacani ri jnūhun, návāha cuu cahān rī jnūhun Cristo jeē ní yisāhí, jeē tu ní cājini ñayuu jenahán. Te siquī jnūhun un cúu jeē íne ri vecāa. ⁴Te cacān tahú rō jeē cuu cahān cají rí ndese cánuú cahān rī.

⁵Sáha yúcun váha ró jíin ñáyuu tu cávandíje. Ma cúhuun ni rō siquī i, chi condíhvī ni rō scandíje ró i. ⁶Te máni cahān vāha ró jíin ñáyuu, te cahān rō jnūhun cuajníñu jeē quéndōo vāha i sáha. Te cani ni rō ndese vāha nastíó cuñí rō jnūhun nuū ñin ñin i.

Saludo jeē sándīhí

⁷Tíquico cúu ñin hermano jeē maní yō jíin, te tēe squícu vāha chándéé ñájnáhan jíin rí cúu de, te jéjníñu de jíin rí nuū maá Jítoho yō. Te máá de castūhún ndíhi nuū rō ndese cuahān jniñu ri. ⁸Jeē yúcuan ní tají rí de cuajeē de nuū rō jijnáhan ró, návāha cuni rō ndese cáhiyo ri jíin jniñu, te coo ndeyí ni rō sáha de. ⁹Te suni cuajeē Onésimo jíin de, tēe cúu jnáhan máá ró jijnáhan ró. Te cúu de hermano jeē squícu vāha jeē maní yō jíin. Te ndíndúú de castūhun núu rō ndese cuahān tācá jniñu ichi cháha.

¹⁰Sándeyí ni rō jijnáhan ró, áchí Aristarco, tēe íne jíin rí vecāa. Te suni súcuan cáhán Marcos, ñani primo Bernabé. Te je ni ndacu ri jniñu nuū rō siquī Marcos, te núu

ni jecondéhé de rōhó te sáha vāha ró jíin de. ¹¹Te suni súcuan cáhán Jesús, tēe jeē suni nání Justo, jeē sándeyí ni rō. Te máá-ni de cácuu tēe hebreo cávandíje jeē chindéé ñáhán cánacani jnūhun jíin rí siquī ndese ndácu Yaā Dios jniñu. Te yōhyo ndeyí íyó ni rī casáha de. ¹²Sándeyí ni rō jijnáhan ró, áchí Epafras, tēe cúu jnáhan máá ró, te mozo Cristo cúu de. Te níni jíicán tahú ndasí de jehē rō, jeē na cuñí nihin ró, te íje vāha ni rō jeē squícu vāha ró ndíhi jniñu cúní Yaā Dios. ¹³Chi cáhán ndaā rī jeē yōhyo ndíhvī ni de jehē rō jijnáhan ró, jíin jéhē ñáyuu ñuu Laodicea jíin Hierápolis. ¹⁴Lucas, tēe cúu médico jeē maní yō jíin, suni cáhán de jeē sándeyí ni rō, te suni súcuan cáhán Demas.

¹⁵Cachi rō nuū tācá hermano ñuu Laodicea jeē sándeyí ni i, áchí rí. Te suni súcuan cahān rō jíin Ninfas, jíin táca ñáyuu cávandíje cándutútú vehe ña. ¹⁶Te ná ni jinu ni cacahu ró carta yáha, te suni tají ró na cáhu ñayuu cávandíje ñuu Laodicea. Te suni cahu máá ró carta jeē cuahán nuū ñáyuu Laodicea te ndiji nuū rō. ¹⁷Te cachi rō nuū Arquipo jeē na ndúcú ndeyí de squícu de jniñu ní tee Jítoho yō siquī de, áchí rí.

¹⁸Ruhū Pablo, yāhá-ni cúu jeē tēe ri jíin ndaha máá rí, jeē sándeyí ni rō. Te nucūhun ni rō ruhū jeē íne ri vecāa. Te ñūhun ni rī jeē na sáha ga Yaā Dios jeē vāha rōhó jijnáhan ró. Súcuan na cóo. Amén.

CARTA HN JEE NI TEE APOSTOL SAN PABLO NUU ÑAYUU ÑUU TESALONICA

1 Máá rí cúu Pablo jíin Silvano jíin Timoteo, te cátee ri carta yáha cuájeē nuū rohó ñáyuu cácandíje ñuu Tesalónica, jeē cáyihí ró ndaha Tátá yō Yaā Dios jíin Jítóho yō Jesucristo. Te cáñuhun ni rī jeē Tátá yō Yaā Dios jíin Jítóho yō Jesucristo, na sáha ga yā jeē váha rōhó, te sáha ya jeē coo ndeyí coo siī ni rō jíjnáhan ró.

Ñayuu Tesalónica cúu i iin ejemplo vāha

²Níní cánacuatáhú rí nuū Yaā Dios jeē siquí rohó jíjnáhan ró, te tu náā ni rī cacān tahú rī jehē rō jeē cájicān tahú rī. ³Te níní ndácunehen ri rohó núū Tátá yō Yaā Dios, jeē váha cásáha ró táca jniñu chi cácandíje ró, jíin jéē váha cájejniñu ró núū yā chi manī rō jíin yá, jíin jéē cájendeyí ni rō chi cáñuhun ni rō jeē coo jeē váha sáha Jítóho yō Jesucristo. ⁴Chi manī Yaā Dios jíin ró jíjnáhan ró hermano, te cájini rī jeē ní nacāji ya rohó. ⁵Chi ná ni canacani ri jñuhun nuū rō jeē jnáma ya rohó, te nasūu jéē ni cáhān rī súcuan-ni, chi ni nacani ri jíin poder Espíritu Santo, te ni cacacáhnu vāha ni rī jeē jñuhun

ndaā cúu. Te cájini rō ndese ni casáha vāha ri ná ni coyūcu rí jíin ró, chi ni nducú rí jeē quéndō vāha ró.

⁶Te rōhó jíjnáhan ró chi ni candacu ró rúhū, te suni ni candacu ró máá Jítóho yō. Chi ni cajetáhú ró jñuhun ya, te ni cacusiī ni rō ni sáha Espíritu Santo, vēsú ni cajito ró cuehē jñūdóho siquí ún. ⁷Te súcuan cácuu ró iin ejemplo nuū ndihi ñayuu cácandíje jeē cáyúcú región Macedonia jíin Acaya jíñā. ⁸Chi jeē siquí rohó jíjnáhan ró cúu jeē ní jite núu jñuhun Jítóho yō, te nasūu máni Macedonia jíin Acaya, chi suni ní cáhnu-ni ni jite núu jñuhun ndese cácandíje ró Yaā Dios. Te jeē yúcuan tuá jíni ññhún jeē nácani máá rí jñuhun nuū i. ⁹Chi sa máá i cánacani ndese ni cajetáhú váha ró rúhū ná ni jecoo ri nuū rō, jíin ndese ni castóo ro ídolo te ni quivicoo ró ndaha Yaā Dios, Yaā ndaā Yaā técu, jeē cuajniñu ró núu yā. ¹⁰Te cánacani i jeē cándetu ró jéē ichi ándiví ndiji Sēhe ya Jesús jeē ní nastécu yā. Te máá Jesús jnama ya yohó núu castigo xeēn jeē quíji.

**Jniñu jeē ni sáha Pablo
ñuu Tesalónica**

2 Chi cájini rō hermano, jeē tu ní jécoo cāhá-ni ri nuū rō. ²Te cájini rō jeē ní castóho i ruhū te ni cacahān ndevāha i nuū rī ini ñuu Filipos. Te vēsū sūcuan te máá Yaā Dios ni chindéé ñáhán yá ruhū, ni sáha ya jeē ni íyo ndeyí ni rī, te ni jécoo ri ñuu rō ni canacani ri jñūhun jeē jnáma ya rohó. Sūcuan ni casáha ri vēsū xeēn ni íyo jñūndóho. ³Te jñūhun ni canacani ri, nasūu jñūhun ni caství ri cúu, ni nasūu jéē nihín rī siquī rō, ni nasūu jéē ní castáhú rí rohó. ⁴Chi máá Yaā Dios ni jito ndee yā ruhū, te ni tejníñu ya ruhū jeē nácani ri jñūhun jeē jnáma ya rohó. Te jeē yúcuán cúu jeē cácahān rī. Te tu cácahān rī jñūhun jeē nújnahān ni ñayuu, chi sa jeē nújnahān ni Yaā Dios, chi máá yá jíto ndee anuá rī. ⁵Te cájini rō jeē tu ní cānducú rí cuajnúhún rí rohó ñin modo stahú, ni tu ní cácahān rī jeē cúsiñi ni rī jíin ró návāha nihín rī xūhun ró. Te jíni Yaā Dios jeē sūcuan cúu. ⁶Te ni tu ní cānducú rí jeē cuajnúhún ró ruhū, ni jeē cuajnúhún inga ñayuu ruhū, vēsū sūcuan cánuú coo núu, chi apóstol Cristo cácuu ri. ⁷Chi sa suhva vīta ní cacahān rī jíin ró, nájñūhun sáha ñahan ndéca yiquín jéē yucún ndíto ña sēhe ña. ⁸Te siquī jeē cákundáhú ndasí ni rī rohó, jeē yúcuán ní cacondihvī ni rī nacani ri jñūhun vāha Yaā Dios nuū rō. Te nasūu máá yúcuán-ni, chi suni nde vida rī cuāha ri jeē siquí rō nuú, chi yōhyo manī rī jíin ró. ⁹Te cánahan ró hermano, jeē tú ni ñin ró ní

stáhān rī jeē cacān rī nuū rō ná ni canacani ri jñūhun vāha Yaā Dios nuū rō. Chi ni canducú ndeyí rí ni casájniñu ndasí rí siquī jeē cótecu rī. Te nduú ñuú ni casájniñu rī.

¹⁰Máá ró cájini rō, te suni Yaā Dios jíni yā ndese ndaā ndoo ni cajica ri nuū rohó ñayuu cácañdije. Te ni ñin tu cúu cahān cuēchi siquī rī. ¹¹Te suni cájini rō ndese ni castíhvī ni rī ná ñin ná ñin ró, te ni cacahān rī jñūhun ndeyí ni jíin ró, nájñūhun sáha ñin tátá jíin sēhe de. ¹²Te ni cacahān ñihin ri jíin ró jeē na cáca ndaā rō nuū Yaā Dios nájñūhun cánuú caca ró. Chi ni cana ya rohó jéē quíngoo ró núu ndácu ya jniñu, nuū luu cujéñu ró jíin yá.

¹³Te jeē yúcuán níni nácuatáhú rí nuū Yaā Dios, chi ni cajetáhú ró jñūhun ya jeē ní canacani ri. Chi ni cajini rō jeē násūu jñūhun ñin tēe cúu, chi jñūhun Yaā Dios cúu. Te máá jéndaá jeē jñūhun un sájniñu ini anuá rohó ñayuu cácañdije nde ndacu ró yá. ¹⁴Hermano, ñayuu ñuu rō ni cajito xeēn i róho, te sūcuan ni candoho ró nájñūhun ni candoho ñayuu cácañdije cáyucú región Judea jeē cáyihī ndaha Yaā Dios jíin Cristo Jesús. Chi nájñūhun ni candoho i ni sáha jñahan i ñayuu hebreo, suni sūcuan ni candoho ró. ¹⁵Chi suu ñayuu hebreo ni cajehni de máá Jítoho yō Jesús, nájñūhun ni cajehni de tāca tēe ñuu de jeē ní canacani jñūhun ya nde jenahán. Te suni nde ruhū jijnáhan ri ni cascúnu de. Te casáha de jniñu jeē tu nújnahān ni Yaā Dios, te cúu de contra siquī tāca ñayuu. ¹⁶Chi jésicoo de jeē ma nácani ri jñūhun

nuū ñáyuu tǎcá nación jeē tu jíni, návaha tú cǎcu i. Te súcuan sáha de jeē nducuehē gǎ cuēchi siquī de. Te vijna te yachi quiji quivī jeē cuáha Yaā Dios castigo xeēn nuū de.

**Jeē cuní Pablo quicōndēhé
tucu de ñayuu Tesalónica**

¹⁷Hermano, ni cacujio ri ñin núnúu-ni nuū rō jijnáhan ró. Te vésú tu cájito jnáhan yó, te níni cáñuhun ni rī rohó. Te yōhyo ni cacuu ni rī ndacoto ri nuū rō jijnáhan ró. ¹⁸Te jeē yúcuan ní cajeni ni rī jecoo ri nuū rō nuú. Te ruhū Pablo, tǎjni jínu ni nducú rí modo jeē rī, te Satanás ni jesi ichi ri jijnáhan ri. ¹⁹Chi tuá na inga cáñuhun ni rī, te tuá na inga cácusī ni rī, chi suu máá ró jijnáhan ró. Te jeē siquī maá ró cúu jeē nihín rī premio rī te cusī teyí ni rī cuiñi yó núu maá Jítóho yō Jesucristo quivī ndíji ya. ²⁰Suu jeē siquī rohó cúu jeē cácusī teyí ni rī.

3 Te jeē yúcuan tuá ni cǎcanda ri condetu ri nde nihín rī jnūhun ndese cáhiyo ró. Te ni casándaā rī jeē quéndōo máá-ni rī ñuu Atenas. ²Te ni catajǎ rí hermano yō Timoteo, tēe jéjníñu jíni rí nuū Yaā Dios siquī jnúhun jeē jnáma Cristo yohó. Te ni jecondēhé de rōhó návaha sáha de jeē cuiñi nihín ró te coo ndeyí ni rō jíni jnúhun cǎcandíje ró. ³Te ni jeē de návaha ma náyūhú ni ñin ró síquī táca jnúndóho jeē sáha ñayuu. Chi je cájini rō jeē súcuan cǎnuú ndoho yó. ⁴Chi nde ná ni coyūcu rí jíni ró, te ni cacastūhun rí nuū rō jeē nihín nahín yó jnúndóho. Te je cájini rō jeē súcuan ni cuu, nájnūhun ni

cacahān rī. ⁵Te jeē yúcuan, náa tuá ni cǎnda ri condetu ri jeē nihín rī jnūhun ndese cáhiyo ró, te ni tajǎ rí de ni jeē de, návaha cuni rī núu cǎcandíje nahín ró. Chi ni jeni ni rī á sanaa te jexeén jeē jíto ndee yohó ní cundeyí jíni ró, te naa cǎhá-ni jniñu jeē ní casáha ri jíni ró.

⁶Te vijna chi je ni ndee Timoteo nuū rī jijnáhan ri jeē ni jéē de ñuu rō Tesalónica. Te ni nacani de jeē cǎcandíje vāha ró, te cǎcundáhú ni rō jnáhan ró. Te ni cachi de jeē cáñuhun ni rō ruhū, chi cáhiyo manī rō jíni rí. Te cǎcuni rō ndacoto ró núu rī, nájnūhun cǎcuni rī ndacoto ri nuū rō. ⁷Te jeē yúcuan ní candusiñi ni rī siquī jeē cǎcandíje vāha ró, hermano, vésú xeēn iyó jnúndóho siquī rī. ⁸Te vijna je ni cananihín ni rī, chi cáhiñi nihín ró jíni máá Jítóho yō. ⁹Núu súcuan te tu jínu cuiti nacuatáhú rí nuū Yaā Dios jeē siquī rohó jijnáhan ró. Chi jíto ya jeē cácusī ndasí ni rī jeē súcuan cáhiyo ró. ¹⁰Te nduu ñuu cájicān tahú ndasí rí jeē ndacoto tucu ri nuū rō, te stéén gǎ rī na-ni jnūhun cúmani jecūhun ni rō siquī jnúhun cǎcandíje yó.

¹¹Te cǎcuni rī jeē maá Tátá yō Yaā Dios jíni Jítóho yō Jesucristo, na núne ya ichi jeē cuu jecoo tucu ri nuū rō. ¹²Te na sáha máá Jítóho yō jeē cuehē ndasí gǎ cundáhú ni rō jnáhan ró jíni táca gǎ ñayuu, nájnūhun cǎcundáhú ni rī rohó jíni rí. ¹³Te na sáha ya jeē íje ánuá rō jeē cuiñi nihín ró, návaha coo ndoo ró jéē ma cóo cuēchi ró núu maá Tátá yō Yaā Dios, quivī ndíji Jítóho yō Jesucristo jíni táca ñayuu yíhi ndaha ya.

**Siquī jeē caca ndaā yō
modo jeē cúsī ni yā**

4 Te vijna hermano, íyó inga jñūhun jeē cácahān ndahú rí jíin ró te cáhān nihin ri jíin ró, chi súcuan cúní maá Jítóho yō Jesús. Je ni castéén rī nuū rō ndese cánuú caca ndaā rō návāha cusī ni Yāā Dios. Te cácahān ndahú rí jíin ró jeē sa víhyá gā na cáca ró súcuan.

²Chi je cájini rō na jniñu ni candacu ri nuū rō jeē ní ndacu máá Jítóho yō Jesús. ³Te cúní Yāā Dios jeē na cóo ndoo coo iī rō nuū yā, te ma cáca jnéni ró. ⁴Te ná iin ná iin ró na cóndeca yíñúhún ró ñasihí máá ró, te súcuan caca ndoo ró. ⁵Te ma sáha ró jniñu néé jéé ndíyo ni rō jesihí, nájnūhun cásáha ñayuu tācá nación jeē tu cájini i jñūhun Yāā Dios. ⁶Ni iin ró ma sáha ró cuéchi jeē quénde rō ñasihí jñáhan ró. Chi máá Jítóho yō cuāha ya castigo xeēn nuū ñayuu casáha tācá jniñu súcuan, nájnūhun je ni cacahān nihin ri ni castūhun rí nuū rō. ⁷Chi tu ní cána Yāā Dios yohó jéé sáha yó jniñu jnéhén, chi sa jeē caca ndoo yó. ⁸Núu súcuan te ñayuu jeē squéhichī jñūhun yáha, nasūu jñūhun iin tēe squéhichī i, chi sa jñūhun Yāā Dios, Yāā ni jéhe Espíritu Santo nuū yō.

⁹Te tu jíni ñúhún jéé téé ri nuū carta yáha jéé coo manī rō jíin táca hermano, chi je ni steén Yāā Dios nuū rō jeē coo manī rō jíin jñáhan ró. ¹⁰Te je cáhiyo manī rō súcuan jíin táca hermano cáyūcu ní cáhnu Macedonia jiñā. Te cáhān ndahú rí jíin ró hermano, jeē sa víhyá gā na cóo manī rō jíin i. ¹¹Te na

cóndihvī ni rō coyūcú nayúú ró, te ma cóndihvī ni rō siquī ndese cásáha jñáhan ró, chi condihvī ni rō sáha ró jniñu máá ró, nájnūhun ni candacu ri nuū rō. ¹²Súcuan na sáha ró návāha ñayuu tu cándíje, cuatáhú i róhó, te suni ma cúmani jeē cotecu rō.

Siquī jeē ndíji Jítóho yō

¹³Suni cécuni rī, hermano, jeē na jécūhun ni rō jijñáhan ró siquī ñayuu cájihī, návāha ma cucuíhyá ni rō nájnūhun sava ga ñayuu jeē tu cáñuhun ni i jeē nátecu ndíyī. ¹⁴Chi nájnūhun cácañíje yó jéé ni jíhī Jesús te ni natecu yā, suni súcuan cácañíje yó jéé nastécu Yāā Dios tāca ñayuu ni cacandíje nuū Jesús te ni cajihī.

¹⁵Jeē yúcuan cácastūhun rí iin jñūhun jeē ní castūhun máá Jítóho yō nuū ri: Jeē yóhó jéé cátecu gā quivī ndíji máá Jítóho yō, nasūu máá yó cosnūu jéé ndaa yó quíhīn yō. Chi xihna gā ñayuu je ni cajihī ndaa i quíhīn i. ¹⁶Chi máá Jítóho yō nuu ya quiji ya ichi ándiví, te cana jee ya jeē maá yá ndácu jniñu, te cana jee ndajéhe cujéhnu ga, te cuecu trompeta Yāā Dios. Te xihna gā natecu tāca ndíyī jeē ní cacandíje Cristo. ¹⁷Yūcuán na te yóhó jeē cátecu gā yō quivī ndíji ya, suni ndonehen ya yohó jíin i, quíhīn yō mēhñu vícō. Te naquijñáhan yó jíin máá Jítóho yó sava andiví. Te súcuan condee yó ní cáni jíin máá Jítóho yō. ¹⁸Núu súcuan te jíin jñūhun yáha cahān ndeyí ni rō jíin táca jñáhan ró.

5 Te tu jíni ñúhún jéé téé ri nuū carta yáha siquī cuiyā

chí quíivī jeē coo tācá un, hermano. ²Chi je cájini vāha ró jēē iin sanaa ni yō te quee quíivī ndíji máá Jítóho yō, nájñuhun iin sanaa ni yō te quíji ñacuihná jecuáá. ³Chi ná-ni cácahān ñayuu jeē nayúú-ni íin te tú na jñúndóho coo, te ná-ni cácahān i súcuan te iin sanaa ni i te quíji jñúndóho siquī i jeē náā i, te ma cácu cuiti i. Chi quíji quíivī un nájñuhun iin sanaa-ni te quejéé jéhdē chíji iin ñahan scácu sēhe. ⁴Te rōhó hermano, tu cácuu ró ñáyuu cájica nájñuhun nuū néē jeē iin sanaa-ni te quíji quíivī un siquī ró nájñuhun quíji ñacuihná. ⁵Chi ndíhi ró cácuu ñayuu jeē nájñuhun cájica ró nduú, chí stéén luz yā ini anuá ró. Chi tu cácuu yó nájñuhun ñayuu jeē tu jécūhun ni siquī Yaā Dios, jeē nájñuhun cájica i nuū néē. ⁶Núu súcuan te ma cúhuun ni yō nájñuhun ñayuu cáquixī, chí sa ndito na cóo ni yō te coo cájí xínī yō. ⁷Chi jecuáá cúu jeē cáquixī ñayuu, te suni jecuáá cúu jeē nájini i. ⁸Te máá yó chí nájñuhun jeē cájica yó nduú, te na cóo cájí xínī yō. Te na cúcutú yó jíin jñuhun cándíje níhin yó jíin jñuhun cúndáhú ni yō jnáhan yó, nájñuhun cúcutú soldado jíin sahma cáa. Te na cúcutú yó jíin jñuhun jeē cáñuhun ni yō jeē cācu yó, nájñuhun cúcutú soldado jeē ñúhun lélú cāa xínī de. ⁹Chi Yaā Dios tu ní jéni ya yohó jéē cuáha ya castigo yohó, chí sa suhva jeē jnama ya yohó sáha máá Jítóho yō Jesucristo. ¹⁰Te máá yá ni jihī yā jehē yō, návāha cotecu ínuú yó jíin yá, vēsú núu cotecu gā yō ñayīvī yáha chí cúu yō. ¹¹Núu súcuan te

cahān ró jñuhun ndeyí ni jíin táca jnáhan ró, te scuéhnu jnáhan ró jíin jñuhun ya, nájñuhun je cásáha ró.

Jeē jéni ichí Pablo tācá hermano

¹²Te cácahān ndahú rí jíin ró hermano, jeē cuatáhú ró tēe cájejníñu cándito rōhó, jeē cácujeñnu de nuū ró jíin jniñu máá Jítóho yō, te cájeni ichí de rōhó.

¹³Te coo yíñuhún ndasí ró nuū de, te coo manī ró jíin de siquī jniñu ya jeē casáha de. Te na cóyūcu manī ró jíin táca jnáhan ró.

¹⁴Te suni cácahān ndahú rí jíin ró hermano, jeē na stíhvī ni ró ñayuu cájica cúxí. Te cahān ró jñuhun ndeyí ni jíin ñáyuu jeē yachī ndínuu ni i. Te chindéé ñáhán ró ñayuu jeē tu fuerza ini. Te cuandeyí ni ró jíin ndíhi ñayuu.

¹⁵Te coto má nasáha ndevāha ro jíin ni iin ñayuu te núu sáha ndevāha i jíin ró. Chi máni jeē váha nducú ró sáha ró jíin táca jnáhan ró jíin ndíhi-ni ñayuu.

¹⁶Níní na cóo siñ ni ró jijnáhan ró. ¹⁷Te níní na cácan tahú ró. ¹⁸Te nacuatáhú ró jeē siquí tācá-ni. Chi súcuan cúní Yaā Dios jeē sáha ró jéē cácañdije ró Cristo Jesús.

¹⁹Te ma cásí ró nuū jniñu jeē sáha Espíritu Santo jíin ró. ²⁰Te ni ma cujéē ni ró nuū jñuhun cácahān tēe cáncani jñuhun Yaā Dios. ²¹Chi coto ndee ró tāca jñuhun, te núu jeē váha cúu, te cuatáhú ró. ²²Te ma quíivī nduu ró jíin ni iin jniñu néé.

²³Te máá Yaā Dios jeē jéhe jñuhun ndeyí sñī ni, ñúhun ni rí jeē sáha ndíhi ya jeē cóo ndoo coo ii ró nuū yā. Te ñúhun ni rí jeē cóndito váha ya anuá ró jíin

jéē níjnūnī rō, jíín yíqui cúñu rō, návāha tú na cuēchi coo siquī rō quivī ndíji máá Jítóho yō Jesucristo. ²⁴Chi Yaā jeē ní cana róhó, sáha ya ndihi un jíín ró, chi squícu ya jeē ni jéjnūhun ya.

Saludo jíín bendición jeē sándihí

²⁵Hermano jijnáhan ró, cacān tahú rō jehē rī jijnáhan rī.

²⁶Te núu na cáhán rō jíín táca hermano, te techūhu yáñúhún ró ndaha i.

²⁷Te cáhán níhin rī jíín ró, chi súcuan cúní maá Jítóho yō, jeē na cáhu ró carta yáha núū tācá hermano.

²⁸Te ñúhun ni rī jeē maá Jítóho yō Jesucristo na sáha ga yā jeē váha róhó. Súcuan na cóo. Amén.

CARTA UU JEE NI TEE APOSTOL SAN PABLO NUU ÑAYUU ÑUU TESALONICA

1 Máá rí cúu Pablo jíin Silvano jíin Timoteo, te cátee ri carta yáha cuájeē nuū rohó ñáyuu cácaandíje ñuu Tesalónica, jeē cáyihí ró ndaha Tátá yō Yaā Dios jíin Jítóho yō Jesucristo. ²Te cánuhun ni rī jeē Tátá yō Yaā Dios jíin Jítóho yō Jesucristo, na sáha ga yā jeē váha ródó, te sáha ya jeē coo ndeyí coo siī ni rō jijnáhan ró.

**Jeē sándaā yā cuēchi
quívī ndíji Cristo**

³Cánuú jéē niní nacuatáhú rí nuū Yaā Dios jeē siquí rohó jijnáhan ró hermano. Chi súcuan íyó váha, chi yōhyo váha cuahije ró jíin jnúhun jeē cácaandíje ró yá, te yōhyo cuanducuehē jeē cácaandíje ni rō táca jnáhan ró. ⁴Te jeē yúcuan cúu jeē cácusí teyí ni rī cácanani ri jnúhun ró núu táca grupo ñayuu cácaandíje nuū Yaā Dios. Chi váha cácaandíje ró, te váha cájendeyí ni rō jeē cájito xeē ñayuu rohó jíin jéē cándoho ró táca gá jnúndóho. ⁵Te jíin táca jéē yáha chíhi ya cuenta jeē cácuu ró ñáyuu váha jeē quívicoo ró ñuu nuū ndácu ya jniñu. Chi siquí ñuu un cúu jeē cándoho ró. Te jeē súcuan chíhi ya cuenta

siquí rō, yáha stéén nuū yō jeē váha Yaā cúu ya.

⁶Te suni íyó váha jeē nastóho ya ñayuu castóho ródó. ⁷Te quívī ndíji Jítóho yō Jesús, quívī un sáha Yaā Dios jeē ndétātu ródó jéē cándoho, te suni ruhū jijnáhan ri. Chi jíin yáñuhūn quíji Jesús ichi ándiví jíin táca ndajéhé yā jeē ndíso poder.

⁸Te cuáha ya castigo nuū ñáyuu jeē tu ní cájēhe i jnúhun cuni i ndese Yaā cúu Yaā Dios, te tu ní cájetáhú i jnúhun máá Jítóho yō Jesucristo jeē jnáma ya i. ⁹Te ñayuu ún chi ndoho i níf cáni, chi cujiyo i nuū maá Jítóho yō, te ma cúu quívicoo i nuū lúu ndasí cújéhnú ya jíin poder yā. ¹⁰Súcuan sáha ya quívī ndíji ya jeē lúu cújéhnú ya sáha ñayuu cácaandíje jeē yíhi ndaha ya. Te nahán naa ni i coto i nuū yā. Te suni súcuan ródó jijnáhan ró, chi ni cacandíje ró jnúhun jeē ní canacani ri nuū rō.

¹¹Te jeē yúcuan cúu jeē niní cájicān tahú rī jehē rō, jeē na cúu ró ñáyuu váha jeē ní cana ya rohó. Te jíin fuerza yā na sáha ya jíin ró jeē squícu ró táca jniñu váha jeē ní catee ni rō sáha ró síquí jeē cácaandíje ró. ¹²Te súcuan te

cujéhnu máá Jítóho yō Jesucristo sáha ró, te suni kujéhnu máá ró jijnáhan ró sáha ya. Chi Yaā Dios yō jíin Jítóho yō Jesucristo, súcuan cúu jeē sáha ya jeē váha yóhó.

**Jnūhun siquī maá téé
sáha xeēn cuēchi**

2 Vijna te cahān rī siquī jeē ndíji máá Jítóho yō Jesucristo jíin jéē ndutútú yó núū yā. Cácahān ndahú rí jíin ró jijnáhan ró hermano, ²jeē ma cuáha ró jnūhun sacā nuu caní ni rō, ni ma cunéé ni rō núu cácahān ñayuu jeē jé ni quee quivī ndíji máá Jítóho yō. Ma candíje cuítī rō vēsú núu cahān i jeē ni níhīn i ñin jnūhun siquī un núū Espíritu, chí ñin jnūhun jeē ni cáhān ñnga, chí núu cachi i jeē ruhú jijnáhan ri ni tají ñin carta jeē cahán súcuan. ³Ma cuáha cuítī rō jnūhun jeē stahú ni ñin i róhó. Chi nde ná tu quiji quivī ún te xihna gā ndunihni ni cuehē ñayuu nuū yā, te quenda ndíjin máá téé sáha xeēn cuēchi, te tēe jnāhnū ndetū cúu máá téé ún. ⁴Chi tēe jíto uhū Yaā Dios cúu de, te ndonda de contra siquī táca jéē casnání i yaā i jíin táca jeē cáchiñúhún i. Te xeēn gā sáha de, chi nde cucōo de ini templo Yaā Dios jeē iyó Jerusalén, te cahān de jeē maá de cúu Yaā Dios.

⁵¿A cánahán ró jnūhun yáha? Chi súcuan ni cahān rī jíin ró ná ni iyo ri jíin ró. ⁶Te je cájini rō ndé vé cúu jeē jési jeē ná tu quenda ndíjin tēe ún, chi nde na quee quivī maá de. ⁷Chi je jícu sāhi táca cuēchi xeēn ini ñayiví, te vijna chí iyó jéē jési nuū, návāha ma

cáa ndasí gá cuēchi, chi nde na cújiyo máá jéē jési nuū. ⁸Te sáa te quenda ndíjin maá téé xeēn ún. Te máá Jítóho yō Jesús cahni ya tēe un jíin táchi yuhu-ni ya, te jíin jéē ndíndēe yá ndíji ya te snáhnú ndetū yā de. ⁹Te jeē quíji tēe xeēn ún chí máá Satanás sáha. Te quiji de jíin cuéhē poder, te sáha de táca jniñu jéhu jeē stahú de, jeē nahán naa ni ñayuu coto i. ¹⁰Te jíin táca jniñu néé te stáhú ndasí de ñayuu jeē jnahnú ndetū, chí tu ní cúní i cuatáhú i jnūhun ndaā jeē cácu i núú. ¹¹Te jeē yúcuan cuāha Yaā Dios jnūhun jeē cuatáhú i jnūhun jeē tú ndaā cuítī, te candíje i jnūhun stáhú un. ¹²Te súcuan te jecondee cuēchi siquī ndíhi i jeē tu ní cácañdíje i jnūhun ndaā, chí sa jniñu néé ni cacusiñ ni i jíin.

Ñayuu jeē ní nacāji ya jeē cācu i

¹³Te cánuú jéē niní nacuatáhú rí jijnáhan ri nuū Yaā Dios jeē siquí rohó jéē cácuu ró hermano jeē maní Jítóho yō jíin. Chi nde ná ni jecōo ñayiví, te je ni nacāji Yaā Dios rohó jéē jnáma ya rohó. Chi sáha Espíritu yā jeē cáhiyo ndoo cáhiyo ñi rō nuū yā te cácañdíje ró jnūhun ndaā. ¹⁴Chi jeē yúcuan ní cana ya rohó jíin jnūhun jeē jnáma ya yohó jeē ní canacani ri, návāha quivicoo ró núu kujéhnu luu ró jíin máá Jítóho yō Jesucristo.

¹⁵Núu súcuan te cuiñi ñihin ró hermano, te conahán váha ró jnūhun jeē ní cacutūhva ró núu rī, núu jeē ní cacahān rī chí jéē ní tee ri nuū carta. ¹⁶Máá Jítóho yō Jesucristo jíin Tátá yō Yaā Dios ni cundáhú ni yā yohó, te ní sáha ya jeē coo siñ ni yō níí cáni,

jíin jéē nūhun ni yō tāca jéē váha jeē coo siquī jeē váha ni yā jíin yó. ¹⁷Te na sáha ga yā jeē cóo ndeyí ni anuá rō jijnáhan rō, te na sáha ya jeē íje rō cáhān rō tāca jnūhun váha ya, te sáha rō táca jniñu váha.

Jeē na cacán tahu i jehē de

3 Te íyó inga jnūhun cánuú, hermano. Na cacán tahu rō jehē rī jijnáhan ri, návāha yachī cuitē núu jnūhun máá Jítóho yō, te cuatáhú váha ñayuu, nájñūhun ni cajetáhú máá rō. ²Te suni cacān tahu rō jeē na cácu ri nuū tāca tée casáha nées jéē cátejñáhan jíin rí. Chi tú ndíhi tēe cácandíje jnūhun ya. ³Te máá Jítóho yō chi váha squícu ya jeē ní jéjnūhun ya, te sáha ya jeē íje ni tāca rō jíin jnūhun ya, te coto ya rohó núu jeneé. ⁴Te cácu cáhnu ni rī sáha máá Jítóho yō, jeē cócuu rō jíin jniñu jeē ní candacu ri nuū rō, te suni cocuu ga rō jíin. ⁵Te ñúhun ni rī jeē máá Jítóho yō steén gā yā ndese coo maní gā rō jíin Yaā Dios nde jíin ini jíin ánuá rō, jíin jéē cuándeyí ni rō nájñūhun ni sáha Cristo.

Jeē cánuú sájniñu yó

⁶Te cándacu ri jniñu nuū rō hermano, chi súcuan ni ndacu máá Jítóho yō Jesucristo, jeē na cújiyo rō núu táca hermano cájica cúxí te tu cájica váha de nájñūhun ni castéén rī nuū rō. ⁷Chi je cájini rō ndese cánuú ndacu rō rúhū jijnáhan ri, chi tu ní cájica cúxí rí ná ni cahíyo ri jíin rō. ⁸Ni tu ní cáyeji rī staā ni ñin rō súcuan-ni, chi ni cachunaa rī. Chi sa ni canducú ndeyí rí ni casájniñu téyí rí nduú ñuú, návāha ma stáhān ri ni ñin rō. ⁹Te vēsú íyó

derecho rī jeē cacán rī nuū rō nuú, te tu ní cájicān rī, chi súcuan ni casáha ri návāha cuu ri ñin ejemplo nuū rō ndese sáha rō jijnáhan rō. ¹⁰Chi ná ni coyūcu rí jíin rō, te ni candacu ri jniñu yáha nuū rō: Núu ndé ñin ñayuu tu cúní i sájniñu i, te suni ma cáji i núu súcuan. ¹¹Chi ni canihīn rī jnūhun jeē cájica cúxí sava rō, te tu casájniñu rō, chi yāha yúcuan-ni sáha rō. ¹²Te cándacu ri jniñu nuū rohó jéē casáha súcuan, te cástíhví ni rī rohó jeē na cóo nayúu rō te sájniñu rō, návāha nihīn rō jeē cáji rō siquī jniñu sáha máá rō. Chi súcuan ndacu máá Jítóho yō Jesucristo jniñu.

¹³Hermano, ma ndínuu ni rō jijnáhan rō sáha rō táca jniñu váha. ¹⁴Te núu ndé ñin i tu jétáhú i jnūhun jeē cahán rī nuū carta yáha, te condēhe váha ro ndé-ni i cúu, te ma quiñáhan ga rō jíin i, návāha na cúcanu i te nacani ni i. ¹⁵Te nasūu jéē cóto uhū rō i, chi sa cahān rō jíin i nájñūhun jíin ñani rō jeē na sájniñu váha i.

Bendición jeē sándihí

¹⁶Te ñúhun ni rī jeē máá Jítóho yō, Yaā jeē jéhe jnūhun ndeyí sñ ni, níni na sáha ya jeē coo ndeyí coo sñ ni rō siquī táca-ni, te coo ya jíin rō jijnáhan rō.

¹⁷Ruhū Pablo, yāhá-ni cúu jeē tée ri jíin ndaha máá rí jeē cahán rī jeē sándeyí ni rō jijnáhan rō. Te súcuan jéhe ri firma nuū tāca carta rī, návāha cuni rō jeē carta máá rí cúu. Súcuan cáa letra rī. ¹⁸Te ñúhun ni rī jeē máá Jítóho yō Jesucristo, na sáha ga yā jeē váha rō jijnáhan rō. Súcuan na cóo. Amén.

CARTA HN JEE NI TEE SAN PABLO

APOSTOL NUU TIMOTEO

1 Máá rí cúu Pablo, apóstol Jesucristo, chi Yaā Dios jeē jnáma yóhó, jíin Jítóho yō Jesucristo jeē ñúhun ni yō coto yó, ni catají yá ruhū jeē nácani ri jnúhun ya. ²Te téé ri carta yáha cuájeē nuū rō Timoteo, chi cúu ndije ró nájnúhun sēhe ri siquī jeē ni scándíje ri rohó. Te ñúhun ni rí jeē Tatá yō Yaā Dios jíin Jítóho yō Jesucristo, na sáha ga yā jeē váha róhó, te cundáhú ni yā rohó, te sáha ya jeē coo ndeyí coo siī ni rō.

Jeē ma candíje i tāca jnúhun stáhú

³Ná ni quihin ri ichi jeē quihín ri Macedonia, te ni cahān ndahú rí jíin ró jeē quéndōo ró ñuu Efeso. Te suni súcuan cáhán rí jíin ró vjna, návāha cahān nihin ró jíin sava ñayuu yúcuan jeē ma stéén i inga jnúhun jeē tú ndaā. ⁴Te ma cuatáhú i tāca jnúhun jeē cúu máá cuento-ni, jíin jnúhun jeē cahán siquī ndese vēji yucūn tāca jíi yō. Chi tāca jēé yúcuan sáha jeē nahán cándajnúhún i siquī, te tu ndé jéjníñu, te tu sáha jeē íje i squícu i nuū Yaā Dios siquī jnúhun cáncandíje yó.

⁵Te ndácu ri jniñu yáha chi cúní ri jeē na cundáhú ni i jnáhan i siquī

jeē iyó ndoo íyó ndáā anuá i, te cáncandíje ndije i ya. ⁶Te sava ñayuu chi ni cajica yátá i, te ni cascuíta i jnúhun ya, ni quívicoo i nuū tāca jnúhun jeē tu ndé jéjníñu. ⁷Chi cáncuni i cuu i maestro ley yā, te ni tu cájecūhun ni i na jnúhun cúu jeē cácahān i, jíin na vé cúu jeē castéén nihin i.

⁸Te jíiní yō jeē iyó váha ley un, te núu jecūhun ni yō ndese jéjníñu. ⁹Chi cánuú sáha yó cuenta jeē tu ní jécōo ni ñin ley jeē siquī ñayuu ndaā, chi sa suhva siquī ñayuu jeē tu cájetáhú, jeē níhni ni, jeē casáha jniñu néé, jeē casáha cuēchi, jeē tu cáchiñúhún Yaā Dios ni tu cáncandíje ley yā, jeē cájehni tatá jíin náná, jíin jéé cájehni ndīyi. ¹⁰Te suni ni jecōo siquī ñayuu cájica jnéni, jíin téé casáha ndiyí jíin jnáhan yí, jíin ñayuu casácuíhná inga ñayuu, jíin ñayuu castáhú, jíin ñayuu cácahān nihin jnúhun yáá. Te ni jecōo siquī tāca gá ñayuu jeē casáha jniñu tu quíjnhán jíin jnúhun ya jeē stéén ndaā váha. ¹¹Te jnúhun ya un cúu jnúhun yōhyo jéhnu jeē jnáma Yaā Dios yohó. Te yōhyo ndetū Yaā cúu ya. Te ni tejníñu ya ruhū nácani ri jnúhun ya.

**Jeē nácuatáhú Pablo siquī jeē
ní cundáhú ni yā de**

¹²Te nácuatáhú rí nuū Jítóho yō Jesucristo, Yaā ni jēhe fuerza ini rī, chi ni quihin ya ruhū ni sāha ya jeē cuu squícu ri, te ni tejníñu ya ruhū nácani ri jñūhun ya. ¹³Te súcuan ni sāha ya jíin rí vēsú ni cahān ndevāha ri siquī yā nde saá, te ni sāha ndevāha ri jíin ñáyuu cácanđije, te xeēn ni sāha ri. Te vēsú súcuan te ni cundáhú ni yā ruhū, chi ná tu candíje ri yā nde saá, te tu ní jécūhun ni rī na vé cúu jeē sāha ri. ¹⁴Súcuan ni sāha Jítóho yō jeē váha ndasí jíin rí. Te ni sāha ya jeē candíje ri jíin jēē cúndáhú ni rī jnáhan ri siquī jeē ni quívi ri ndaha Cristo Jesús.

¹⁵Te ndaā ndije cúu jñūhun yáha, te jeē cánuú candíje ndihī ñáyuu cúu: jeē ní quiji Cristo Jesús ini ñayīvi návāha jnama ya ñáyuu iyó cuēchi. Te ruhū cúu tēe jeē vihyá gā ni sāha cuēchi. ¹⁶Te ni cundáhú ni Yaā Dios ruhū, návāha jíin rúhū jeē vihyá gā ni sāha cuēchi te stéen Jesucristo ndese yōhyo íne cáhnu ni yā. Te súcuan ni sāha ya jeē cúu ri ñin ejemplo nuū tāca ñáyuu candíje níí cuāhān yō, návāha nihīn tahú i cotecu i níí cáni. ¹⁷Núu súcuan te níí cáni na cáhān yīñúhún yó jeē yóhyo luu cújéhnu máá Yaā jeē cúu Rey siquī ndihī, jeē técu níí cáni, jeē tu náā cuítī. Te tu cúu coto yó núu yā vijna, te máá ñin-ni ya iyó, te ndíchí yá. Amén.

¹⁸Nájñūhun sēhe ri cúu ró Timoteo, te jniñu yáha téjñiñu ri rohó, jēē na ndúcu ndéyí ró siquī jniñu váha. Te na cándíje vāha ró,

te na cóo ndaā anuá rō. Chi nde saá je ni cacahān tācá hermano jíin jñūhun Yaā Dios jeē súcuan condiso jniñu ró. ¹⁹Chi sava ñáyuu tuá iyó ndaā anuá i nuū yā, te ni casnāā i jñūhun cácanđije i. ²⁰Himeneo jíin Alejandro cúu uū tēe ni casáha súcuan. Te je ni siaá rī de nuū Satanás, jeē stóho ún de, návāha jíin jñúndóho ún te cutūhva de jeē ma cáhān ndevāha ga de siquī Yaā Dios.

Siquī ndese cacān tahú yō

2 Núu súcuan te xihna gā ndácu ri jeē cacān tahú rō jehē tāca ñáyuu. Te cahān ndahú ró jehē i, te cacān rō na-ni na vé jíni ñúhún i, te nacuatáhú ró nuū yā jeē siquī i. ²Te cacān tahú rō jehē tāca tēe cácu jéhnu jíin jēē ndácu jniñu, návāha sāha de jeē cuu coyūcu váha yó te tú na jñúndóho coo siquī yō, te cuu chíñúhún váha yó Yaā Dios te sāha yíñúhún yó jíin táca-ni. ³Chi yāha cúu jeē váha jeē nújnahan ni Yaā Dios, Yaā jnáma yóhó. ⁴Chi máá yá cuní yā jnama ya tāca ñáyuu te cuni i ndese íyó jñūhun ndaā yā. ⁵Chi íyó ñin-ni Yaā Dios, te suni íyó ñin-ni Yaā jeē cahān jíin Yaā Dios jehē ñáyuu. Te Yaā un cúu máá Jesucristo jeē ní nduu tēe. ⁶Te ni socō yā maá yá ni jihī yā jeē ní chunaa yā cuēchi ndihī yó. Te ná ni quiji máá quívi ún, te ni quejéé ní canacani jñūhun ún. ⁷Te jeē siquí yúcuán ní jeni ya ruhū cúu ri apóstol jeē nácani ri jñūhun ya, návāha stéen rī nuū ñáyuu tācá nación jeē tu jíni jñūhun ya, jeē na cándíje i jñūhun ún te sāha i jniñu ndaā. Te siquī jeē

candíje ri Cristo te ndaā cúu jeē cahán rī.

⁸Núu súcuan te cúní rī jeē ndihī-ni lugar na cacán tahu táca tée. Te na cóo ndoo ánuá de jeē ma quití ni de ni ma tejnáhan de. ⁹Te suni súcuan táca ñahan, na cási vāha ña máá ña nájñuhun cánuú, návāha ma cóo jñuhun canu. Te ma cóndihvī ni ña jeē sáha luu ndasí ña xiní ña, chí jéē cuhun ña siquī oro chí perla chí sahma váha ga. ¹⁰Chi sa suhva na quéndōo luu ánuá ña jíin jniñu váha sáha ña, nájñuhun cánuú sáha ñahan ndoo ánuá jeē cájejniñu nuū Yaā Dios. ¹¹Te núu cáhiin ña jíin ñáyuu cascuáha jñuhun ya, te na cúní nahín ña te cuatáhú ña. ¹²Chi tu jéhe ri jñuhun jeē steén ñahan nuū ñáyuu ndutútú, ni jeē ndácu ña jniñu nuū tē. Chi sa suhva na cúní nahín ña. ¹³Chi xihna gā Adán ni sáha ya, te sáá te ni sáha ya Eva. ¹⁴Te tu ní stáhú jexeén Adán, chi sa suhva ni stahú un ñasihí de, te ni sáha ña cuēchi. ¹⁵Te jeē scácu táca ña sēhe te coo vāha ña, te núu na quéndōo ña jíin jñuhun cándíje ña ya, jíin jéē cundáhú ni ña jnáhan ña, jíin jéē cóo ndoo ánuá ña, jíin jéē sáha yíñuhún ña.

Ndese cánuú coo tēe cándiso jniñu nuū ñáyuu cácañdíje

3 Ndaā cúu jñuhun yáha: Núu iin tēe cúní de condiso jniñu de condito de ñáyuu cácañdíje, te vāha jniñu ndúcú de sáha de. ²Núu súcuan te tēe ndíso jniñu nuū ñáyuu cácañdíje, cánuú jeē ma cóo ni iin jeē nihín ñáyuu cuēchi siquī de. Te na cóo iin-ni ñasihí de,

te cájí coo ni de, te ndito coo xiní de, te sáha yíñuhún de. Te cánuú jeē niní cuanúu de vehe nuū ñáyuu cájica, te níní stéén vāha de jñuhun ya. ³Te ma cúu de tēe nájini, te ma tejnáhan de, te ma ndíyo ni de xūhún. Chi sa suhva coo vāha ni de, te coo vitá ni de, te ma cutóo ni de siquī xūhún. ⁴Te cánuú jéē na ndácu vāha de jniñu ini vehe de, te sáha de jeē squícu vāha sēhe de te coo yíñuhún i nuū de. ⁵Chi núu iin tēe tu jíin de ndacu vāha de jniñu ini vehe de, ¿te ndese cuu condiso jniñu de nuū ñáyuu cácañdíje nuū Yaā Dios? ⁶Núu súcuan te tēe ndíso jniñu nuū ñáyuu cácañdíje, ma cúu de tēe jeē saá ní candíje, chi núu súcuan te sanaa te sándúxi de máá de, te inuú-ni cuēchi jecondee siquī de jíin jéxeén. ⁷Te cánuú cuu de tēe jeē suni nde ñáyuu tu cácañdíje, cuajnúhún i de, návāha ma nihín i cuēchi siquī de, te ma cúndeyí jexeén jíin de.

Ndese cánuú coo tēe cájejniñu mēhñu ñáyuu cácañdíje

⁸Te suni súcuan tēe cájejniñu mēhñu ñáyuu cácañdíje, cánuú jéē na cóo yíñuhún de, te na squícu de jíin jñuhun cáhán de. Te ma cúu de tēe nájini, te ni ma ndíyo ni de xūhún. ⁹Te na cuñi nihin de jíin jñuhun cándíje yó jéē ní yisāhi ndé jenahán, te na cóo ndoo anuá de. ¹⁰Te cánuú jéē xihna gā coto ndee rō de, te núu ni jini rō jeē tú na cuēchi de, yūcuán na te cuu cuajniñu de mēhñu ñáyuu cácañdíje. ¹¹Te suni súcuan ñasihí de jíin náhan ña, cánuú coo yíñuhún ña, te ma sajnúhún ña, te cájí coo ni

ña, te squícu vāha ña tǎcá-ni jniñu. ¹²Te tēe cájejniñu mēhñu ñáyuu cácandíje, na cóo ñin-ni ñasihí de, te na ndácu vāha de jniñu nuū séhe de jíin núu ñáyuu vehe de. ¹³Chi tǎca tēe cájejniñu vāha mēhñu ñáyuu cácandíje, chi vāha quéndōo yíñhún de, te níhín de modo jeē cají gá nácani de jñuhun Cristo Jesús jeē cácandíje yó.

Jñuhun sāhi yá jeē cácandíje yó

¹⁴Te vēsú ñuhun ni rī cuajeē yachī rī coto jñahan yó, te tēe ri jñuhun yáha cuájeē nuū rō, ¹⁵návāha núu cucuée rí, te je jíin rō ndese cánuú sáha vāha ñáyuu cácuu séhe Yaā Dios. Chi máá i cácuu ñáyuu cácandíje nuū Yaā Dios, Yaā técu. Te máá i cásáha jeē iyó cutú jñuhun ndaā, chi cáhiin ñihin i jíin. ¹⁶Te jendaá ndije chi jéhnun ndasí cúu jñuhun yáha jeē cácandíje yó, jeē ní yisāhi ndé jenahán:

Yaā Dios ni steén yā maá yá, chi ni nduu ya tēe,
te Espiritu ni steén jeē iyó ndáā jniñu ni sáha ya,
te tǎcá ndajéhé andiví ní cajito jniñu ní sáha ya.
Te ni jitē núu jñuhun ya nuū ñáyuu tǎcá nación,
te ni cacandíje ñáyuu ñí ñáyiví núu yā,
te ni ndaa ya cuanhun yā andiví.

Siquí ñáyuu cájica yátá nuū jñuhun cácandíje yó

4 Te cají stéén Espiritu Yaā Dios jeē quiví cuándihí te coo sava ñáyuu caca yátá i nuū jñuhun cácandíje yó. Te cuatáhú i tǎca jéé

cácahān jñuhun stáhú jíin jñuhun ní castéén tachī. ²Chi cuni nahín i jñuhun cástéén tēe cástáhú-ni, jeē tu cácahān ndaā de. Chi tēe un ní cahije ndasí ni de jíin jñuhun stáhú, te tuá sáha jíin ánuá de jeē nácani ni de. ³Te cahān de jeē cuēchi cúu jeē coo ñasihí tēe, te suni súcuan núu caji ñáyuu sava ndeyu. Te ndeyu ún chi ni sáha Yaā Dios jeē cúu ñáyuu cácandíje jeē jiní jñuhun ndaā, návāha caji i te nacuatáhú i nuū yā. ⁴Chi ndihí jeē ni sáha Yaā Dios, íyó vāha, te ma squexícó yó ni ñin, chi sa nacuatáhú yó te caji yó. ⁵Chi jíin jéé cáhu yó jñuhun Yaā Dios jíin jéé nácuatáhú yó nuū yā, te íyó ndoo ndihí-ni.

Tēe jéjniñu vāha nuū Jesucristo

⁶Te núu stéén rō jñuhun yáha núu tǎcá hermano, núu súcuan te cuu ró tēe jéjniñu vāha nuū Jesucristo, te ije ró jíin jñuhun vāha ya jeē candíje ró, chi ni cutúhva ró te ndíquín rō. ⁷Te ma quívi nduu rō jíin tǎca jñuhun jeē cúu cuento-ni jeē cájeni cāhá ni ñáyuu. Chi níin na scuáha ró ndese chiñúhún vāha ró Yaā Dios. ⁸Chi jeē scuáha yó ejercicio jeē cóo ndacuí yiquí cúñu yō, jecu-ni níhín jniñu. Te jeē scuáha yó chiñúhún vāha yó yá, suu yūcuan cúu jeē vāha níhín jniñu siquí tǎcá-ni, jeē cúu vida yáha jíin vida quiji. ⁹Te ndaā ndije cúu jñuhun yáha, te jeē cánuú candíje ndihí ñáyuu cúu. ¹⁰Te jeē siquí yáha cúu jeē sájniñu ñihin yó siquí jñuhun ya te ndóho yó jéé cácahān ndevāha i nuū yō. Chi ñúhún ni yō jeē coto yó núu maá Yaā Dios, Yaā técu. Te máá yá cúu

Yaā jnáma tāca ñáyuu, te ñayuu cácadíje jnúhun cúndáhú ni yā i, máá i cúu jeē jnáma ya.

¹¹Tāca jnúhun yáha cánuú jéē ndacu ró núu i te stéén rō. ¹²Ma cuáha ro jnúhun jeē kujéē ni ni ñin i nuū rō siquī jeē suchí ró. Chi sa coo ró ñin ejemplo nuū ñáyuu cácadíje, jeē cúni i ndese vāha cáhán rō, ndese vāha sáha ró, ndese cúndáhú ni rō jnáhan ró, ndese cándíje ró, ndese íyó ndoo ánuá rō.

¹³Te níni ndé ná tu jinū rī nuū rō, te condíhvī ni rō jeē cáhu ró tutu ñi nuū hermano cándutútú, jíin jéē stíhvī ni rō i, jíin jéē steén rō nuū i. ¹⁴Ma cúhuun ni rō jíin táhū jeē ni jéhe Yaā Dios nuū rō jeē nácani ró jnúhun ya. Chi tāca tée jéhu cándiso jniñu nuū ñáyuu cácadíje, ni casóo de ndaha de xinī rō, te ni sáha Yaā Dios jeē ní cacahān de jeē súcuan condiso jniñu ró.

¹⁵Núu súcuan te cocuu ró jíin táca jniñu yáha, te condíhvī ni rō jíin, návāha cuni tāca ñáyuu jeē váha íje ró cuáhān rō jíin. ¹⁶Coo cuidado rō jeē caca ndaā rō jíin jéē steén vāha ró jnúhun ya, te cuiñi nihin ró jíin ndíhi. Chi núu súcuan sáha ró te quendōo vāha ánuá maá ró jíin ñáyuu chuhun ni jnúhun cáhán rō.

Ndese sáha vāha yó jíin ñáyuu cácadíje

5 Ma cúxeēn rō nuū tāca tée jéhu, chi sa cahān vāha ró jíin de jeē ma stívi de, nájnūhun cáhán rō jíin tátá rō. Te tāca tée suchí, suni cahān vāha ró jíin de nájnūhun jíin ñani rō. ²Te suni súcuan cahān rō jíin táca ñahan jéhu, nájnūhun jíin náná rō. Te

suni súcuan jíin táca ñahan súchí, nájnūhun jíin cuáha ró, te yíñúhún ndajnūhun ró jíin ña.

³Te ñayuu cácadíje na cuáha i jeē jíni ñúhún ñahan ni caquendōo ndáhú, te núu ni quendōo ndáhú ndije ña jeē tú na ñayuu condito ña.

⁴Chi ñin ñahan ní quendōo ndáhú, núu íyó séhe ña chí séhe chání ña jeē jévāha, te na cóto máá i ña. Chi cánuú cutúhva i jeē xíhna gā nuū ñáyuu vehe i squícu i coto i. Te na nácoto i náná i tátá i siquī jeē ní cacondito ña i. Chi yāha cúu jniñu váha jeē nújnahan ni Yaā Dios.

⁵Te ñin ñahan ní quendōo ndáhú ndije jeē máá ñin na ña, ñúhun ni ña jeē maá Yaā Dios condito ya ña, te tu jécuiñī ña jeē jicán tahu ña nduú ñuú. ⁶Te sa suhva núu máni ndíhvī ni ña siquī tāca jéē cúsiñi ni maá-ni ña, yūcuán na te vésú técu ña, te nájnūhun je ni jihī ña.

⁷Jniñu yáha ndacu ró núu ñáyuu, návāha ma cóo cuēchi siquī i. ⁸Te núu ñin ñayuu tu ndíto i jnáhan vehe i, te víhyá gā ñayuu ini vehe i, núu súcuan te sáha i jniñu jeē tu quíjnahan jíin jnúhun cándíje yó, te cúu i ñin jeē neé gá vésú ñáyuu tu cácadíje.

⁹Te ñahan viuda cuu quívi síhvī ña nuū lista ñayuu jeē cáchindéé ñahán ró jíin xúhun, te núu je ni jinū ña unī xico cuiyā, te núu ni íyo ñin-ni yī ña. ¹⁰Te suni cánuú jéē cuajnúhún ñáyuu ña jeē váha jniñu ni sáha ña, núu jeē ni scuéhu vāha ña séhe ña, jíin jéē ní jéhe núu ña vehe nuū ñáyuu cájica, jíin jéē ní jejniñu ña nuū hermano cácadíje, jíin jéē ní chindéé ñahán ña ñayuu cándoho jnúndóho, jíin jéē ni sáha ña tāca gā jniñu váha.

¹¹Te tãcã ñahan viuda jeë iyó suchí gá, chi ma soó ró síhví ña nuū lista. Chi sanaa te nducú ña jeë cúsiñ ni maá-ni ña, te ma cóndihvī ni ña siquī Cristo, chi cuu ni ña condeca tucu ña tēe. ¹²Te súcuan jecondee cuēchi siquī ña, chi tu ní squícu ña jeë ni jéjnūhun ña ná ni jecosō síhví ña nuū lista. ¹³Te suni caca cuu ña tãcã-ni vehe te quee cúxí ña. Te nasūu máni jeë cáca cúxí ña, chi suni siquī jeë sajnūhún ña, te quīvi nduu ña cahān ña jnūhun jeë tu íyó váha jeë cahán ña. ¹⁴Jeë yúcuan cúni rī jeë tãcã ñahan viuda jeë iyó suchí, na nándāha ña, te scuéhnu ña sēhe, te coto váha ña vehe ña, návāha ñayuu cácuu contra ma cúu cahān i siquī ña. ¹⁵Chi sava ñahan viuda je ni cajica yátã ña te sáha ña jniñu jeë cuní Satanás.

¹⁶Te núu ñin tēe chí ñin ñahan cándíje, núu íyó ñahan viuda vehe i, te na cóto máá i ña. Te ma cóndee gasto ña siquī grupo ñayuu cácañíje, návāha cuu cuāha váha i nuū ñahan viuda jeë tu ndé ñin coto ña.

¹⁷Te tãca tēe jéhnū cándito ñayuu cácañíje, na jécunaā doble yāhu de, te núu cándihvī ni de cástéen de cánacani váha de jnūhun ya. ¹⁸Chi cúu nájnūhun cáhán tutu ii: Ma cánda stiquī caxīn tī trigo, núu ma cuāha ró jéē cáji tī. Te suni cáhán: Tēe jeë sajniñu tátú, jīni ñūhún quiyāhu de, áchi.

¹⁹Ma cuajnúhún ró te núu jéquin ñayuu cuēchi siquī ñin tēe jéhnū cándito ñayuu cácañíje te núu tu íyó úu chí úní testigo. ²⁰Te núu cásáha ñayuu cuēchi, te cánúu cuxeēn rō nuū i, jito jínúu ndihi

ñayuu, návāha na cónso iyo sava ga i. ²¹Te cáhán ñihin ri jíin ró, jito máá Yaā Dios jíin Jítóho yō Jesucristo jíin táca ndajéhé yā jeë ní nacāji ya: Squícu váha ró jniñu yáha, te ma sáha ró cuenta ndese cúu ñin ñin i, chi ñnuú-ni sándaā rō siquī ndihī-ni i. ²²Ma cáni yachī rō ñin tēe jeë condiso jniñu de nuū ñayuu cácañíje, chi xihna gā coto ndee rō de. Chi sanaa te stívi de, te cuēchi de suni condee siquī rō jíin de. Te coto ró máá ró jeë ma quívi ró jíin jniñu néé.

²³Te siquī jeë núu-ni núu-ni cúhú chíji ró, te ma cóho ga rō máni ndute, chi suni coho ró jecu vino.

²⁴Cuēchi sava ñayuu chi je íyó ndijin nde ná tu quívi i nuū cúndaā cuēchi i. Te cuēchi sava ga i chi cúcuéé te natūu nahín. ²⁵Te suni súcuan tãcã jniñu váha, chi íyó ndijin. Te vésú ná tu natūu jniñu váha ún, te ma cúu quisāhi níí cáni, chi natūu nahín.

6 Tãca ñayuu cácuu mozo, na cóo yíñūhún váha i nuū patrón i, návāha ma cahán neé ñayuu siquī Yaā Dios jíin síquī jnūhun ya jeë castéén yō. ²Te mozo jeë yíhi nuū patrón cácañíje, ma cáni ni i jeë cūhva-ni sáha yíñūhún i nuū de siquī jeë hermano cácañíje cácuu de. Chi sa cuajniñu váha ga i nuū de, chí tēe cándíje tēe manī i jíin cúu tãca tēe un jéē sajniñu i nuū. Jnūhun yáha stéén rō te stíhví ni rō i.

**Siquī jeë chíñūhún váha
yó yá te cusīñ ni yō jíin
cūhva jeë névāha-ni yó**

³Te núu ndé tēe stéén de jnūhun tú ndaā jeë tu quíjnáhan jíin

jnúhun vāha ndaā maá Jítóho yō
 Jesucristo, jíin jnúhun ni steén
 Yaā Dios jeē cá candíje yó, ⁴núu
 súcuan te máni tēe ndúxí tēe tu
 jécúhun cuítí ni cúu de. Chi cánéé
 xíní de, chi máni cúní de tejnáhan
 de siquī tāca jnúhun stéén de.
 Te tācá un sáha jeē cá cucuésún
 ni, jíin jéé cátejnáhan, jíin jéé
 cácahān ndevāha, jíin jéé cájeni
 néé ni siquī jnáhan, ⁵jíin jéé máni
 cástáhān jnáhan. Súcuan cása
 hā tēe jeē ní ndunéé xíní, jeē tu cájini
 jnúhun ndaā. Te cájeni ni de jeē
 nihín de cuehē xúhun siquī jnúhun
 cá candíje de stéén de. Na cújiyo
 ró núu ñayuu cándāa súcuan. ⁶Te
 jendaá jeē yóhyo vāha quéndōo yó
 te núu chíñúhún váha yó yá, te núu
 cúsiñ ni yō jíin cúhva jeē névāha-ni
 yó. ⁷Chi tú na vé ni cácu yó jíin
 ñayívi yáha, ni tú na vé condiso
 yó quíhín yō jíin núu na cúu yō.
⁸Te núu íyó jéé cáji yō jeē cusúcún
 yó, te na cúsiñ ni yō jíin yúcuan-ni.
⁹Chi ñayuu jeē cuní cucúcá, chi
 yachí quívi i cuēchi jeē jíto ndee
 jexeén i. Te quívi i jíin cuéhē jniñu
 cánéé jniñu stívi jéé ndíyo ni i.
 Te tācá un sáha jeē tíví ñayuu te
 jnahnū ndetū i. ¹⁰Chi jeē ndíyo ni
 yō xúhún, yúcuan sáha jeē quejéé
 tāca jniñu néé. Te sava ñayuu jeē
 ndíyo ni xúhún, ni castóo i jnúhun
 cá candíje i, te ni canihín i cuehē
 ndasí jnúndóho.

**Jeē na ndúcú ndéyí yó
 siquī jnúhun cándíje yó**

¹¹Te róhó chi tēe jéjníñu nuū Yaā
 Dios cúu ró, te cunu ró coto ró tāca
 cuēchi yáha. Te condiquín rō jniñu
 ndaā, te chíñúhún váha ró Yaā Dios,

te candíje vāha ró, te cundáhú ni
 rō jnáhan ró, te cuandeyí ni rō, te
 coo vítá ni rō. ¹²Te nducú ndéyí ró
 siquī jnúhun cándíje yó yá. Te cuiñí
 nihin ró jíin jnúhun jeē ni níhín
 tahu yō cotecu yō níí cáni. Chi jeē
 yúcuan cúu jeē ní cana ya rohó, te
 cájí ní cahān rō jeē vāha cándíje
 ró yá, jíto jínúu cuehē ñayuu. ¹³Te
 cáhān nihin ri jíin ró, jíto máá
 Yaā Dios, Yaā jeē sáha jeē técu
 tācá-ni, jíin Jesucristo, Yaā jeē cáj
 ní cahān yā ni nacani ya jnúhun
 vāha nuū Poncio Pilato. ¹⁴Squícu
 vāha ró jniñu ndácu ya nuū rō, te
 ma stívi ró sáha ró, návāha ma
 cahān ñayuu cuēchi siquī rō. Te
 súcuan sáha ró níí ndé quiví ndíji
 Jítóho yō Jesucristo. ¹⁵Chi quiji
 ndíjin yā maá quíví jeē ní jeni Yaā
 Dios. Te Yaā Dios chi máá ñin-ni
 ya cúu Yaā yóhyo ndetū, te jnái ya
 ndíhi poder. Te cúu ya Rey nuū
 tāca rey, jíin Jítóho nuū tāca jítoho.
¹⁶Te máñúhún-ni ya cúu jeē íyó níí
 cáni. Te ndéé yá ñin lugar nuū ndíi
 ndaxín, nuū ma cúu quívi yó. Te
 ni ñin ñayuu ñayívi yáha tu ní jíto
 cuítí i nuū yā, te ni ma cúu coto i
 nuū yā. Te níí cáni na cóo yíñúhún
 yó nuū yā, chi jnái máá yá poder níí
 cáni. Amén.

¹⁷Te cahān rō jíin ñayuu cucá
 ndajniñu ñayívi yáha, jéé ma
 cúndúxí i. Te ma tēnuū i xúhún i,
 chi yachí naa ún. Chi sa suhva na
 tēnuū i jeē coo vāha i sáha Yaā Dios,
 Yaā técu, chi máá yá jéhe cuehē
 yā tācá-ni jeē cúsiñ ni yō jíin. ¹⁸Te
 ndacu ró jniñu nuū i jeē na sáha
 vāha i, chi jeē sacúcá ndíje i máá i
 cúu jeē sáha i tācá jniñu váha. Te
 na cúu i ñayuu vāha ni jeē cuáha i

jeē cúu jnáhan i. ¹⁹Te súcuan caya i cuehē jniñu váha jeē coo cúcá i nuū yā ní tiempo jeē quíji. Te nihīn tahu i cotecu i ní cání.

Jniñu sándīhi ndácu

Pablo nuū Timoteo

²⁰Te róhó Timoteo, condito ró táca jniñu ní chihi ya ndaha ró. Te ma quívi nduu rō jíin táca

jnúhun cāhá-ni, cuenta ñayīvi yáha, jíin táca jnúhun stáhú jéē cácahān i jeē jnúhun ndíchí ndāā cúu. ²¹Chi sava ñayuu cándiquīn tāca jnúhun yáha, ni cajica yátá i ni castóo i jnūhun cácaandíje i ya.

Te ñúhun ni rī jeē Yaā Dios na sáha ga yā jeē váha róhó. Súcuan na cóo. Amén.

CARTA UU JEE NI TEE SAN PABLO APOSTOL NUU TIMOTEO

1 Máá rí cúu Pablo, apóstol Jesucristo, chi súcuan ni nujnahan ni Yaā Dios ni tají yá ruhū jeē nácani ri jnūhun jeē ni jéjnūhun ya jeē cótecu yō ní cání siquī jeē yíhi yó ndaha Cristo Jesús. ²Te téé ri carta yáha cuájeē nuū rō Timoteo, chi cúu ro nájñūhun sēhe ri jeē maní rí jíin. Te ñūhun ni rí jeē Tatá yō Yaā Dios jíin Jítóho yō Jesucristo, na sáha ga yā jeē váha róhó, te cundáhú ni yā rohó, te sáha ya jeē coo ndeyí coo sií ni rō.

Jeē nácani de jnūhun Cristo

³Níni tu náā ni rí cacān tahú rí jehē rō nuū Yaā Dios nduú ñuú, te nácuatáhú rí nuū yā jeē siquí rō. Chi nuū maá yá jejníñu ri, nájñūhun ni casáha tāca jíi rí, te íyó ndoo ánuá rí nuū yā. ⁴Te núcūhun ni rí jeē ni ndáhyū rō ná ni quenda ri cuahān rí. Te cúu ni rí ndacoto jnāhan yó, návāha cusíi ndasí ni rí. ⁵Te núcūhun ni rí jeē váha ndije cándíje rō Cristo, nájñūhun ni cándíje náná jéhnū rō Loida, jíin náná rō Eunice xihna gā. Te cúcāhnu ni rí jeē suni súcuan cándíje máá rō vijna.

⁶Te jeē yúcuan nástíhví ni rí rohó jéé na cóndíhví gā ni rō jíin táhū jeē

ni jéhe Yaā Dios nuū rō jeē nácani rō jnūhun ya. Te tahū un ní nihīn rō ná ni tee ri ndaha ri xinī rō. ⁷Chi Espíritu jeē ni jéhe Yaā Dios nuū yō, tu sáha jeē yūhu yó nacani yó jnūhun, chi sa sáha jeē iyó fuerza ini yō, jíin jéé cundáhú ni yō jnāhan yó, jíin jéé ndíto íyó xinī yō. ⁸Núu súcuan te ma cúcanu rō nacani ndaā rō jnūhun máá Jítóho yō. Te suni ma cúcanu rō jeē siquí maá rí jeē íne ri vecāa siquí jnūhun ya. Chi sa cuāha rō jnūhun ndoho rō jíin rí siquí jeē cánacani yó jnūhun jnáma ya yohó, núu ndese ni jéhe Yaā Dios fuerza ini yō. ⁹Chi ni jnama ya yohó, te ni cana ya yohó jéé coo ndoo ánuá yō cuajníñu yó núu yā. Te tu ní cána ya yohó síquī jeē váha ni sáha yó, chi siquí jeē ní tee ni maá yá jeē cundáhú ni yā yohó jéé yíhi yó ndaha Cristo Jesús. Chi nde ná tu jecōo ñayíví, te je cúndáhú ni yā yohó. ¹⁰Te vijna jeē ní quenda ndijin Jesucristo, Yaā jnáma yóhó, te ni steén cají Yaā Dios jeē cundáhú ni yā yohó. Chi máá Cristo ni snāa yā poder cuehyí jéhni yóhó, chi jíin jnūhun jnáma ya yohó ni steén cají yá nuū yō jeē cótecu yō ní cání chi ma jnahnú ndetū yō.

¹¹Te ni jeni Yaā Dios ruhū jeē nácani ri jnūhun ún, te ni tají yá ruhū cúu ri apóstol jeē steén rī nuū ñayuu tācá nación jeē tu jíni jnūhun ya. ¹²Te siquī un cúu jeē ndóho ri tāca jnúndóho yáha íne ri vecāa. Te tu cúcanu rī, chi jíni rī ndese Yaā cúu Yaā candíje ri, te cúcáhnu ni rī jeē cúu coto ya jniñu jeē ní chihi ya ndaha ri nde vijna te nde quivī ndíji ya.

¹³Te cuiñi nihin ró jíni tāca jnúhun ya jeē steén ndaā, suu jnūhun jeē ni steén rī nuū rō. Te caca ró jíni jnúhun cándíje yó, te cundáhú ni rō jnáhan ró siquī jeē yíhi ró ndaha Cristo Jesús. ¹⁴Te condito ró tāca jniñu váha jeē ní chihi ya ndaha ró, sáha poder maá Espíritu Santo jeē ndeé ini yō.

¹⁵Je jíni rō jeē tāca ñayuu cáyūcu Asia ni castóo i ruhū. Te uū i cúu Figelo jíni Hermógenes. ¹⁶Te jícán tahu rī jeē cundáhú ni Jítoho yō ñayuu vehe Onesíforo, chi cuehē jíni ni nanihin ni rī ni sáha de, te tu ní cúcanu de siquī rī jeē ní ine ri vecāa. ¹⁷Chi sa suhva ná ni quiji de ñuu Roma, te ni nanducú yúcún de ruhū nde ni nanihin de ruhū. ¹⁸Te jícán tahu rī jeē maá Jítoho yō cundáhú ni yā de quivī ndíji ya. Te je jíni váha maá ró ndese yōhyo ni chindéé ñáhán de ruhū ná ni cahíyo ri ñuu Efeso.

**Jeē cúu yó nájñuhun soldado
váha nuū Jesucristo**

2 Núu súcuan te róhó, séhé mání, na cóo fuerza ni rō siquī jeē yíhi ró ndaha Cristo Jesús te sáha ya jeē váha róhó. ²Te tāca jnúhun jeē ní jini ró ní cahān ri, jító

jínúū ñayuu cuehē, jnūhun ún na nástéén rō nuū tēe cásquícu váha, návāha suni cuu stéén tucu máá de nuū sáva ga i.

³Te róhó na cuándeyí ni rō coto ró jnúndóho, chi cúu ró nájñuhun iin soldado váha nuū Jesucristo. ⁴Ni iin soldado jeē íin nuū guerra, tu sájneñu de máá de jíni jniñu máá de, chi cánúu jeē sáha de mání máá jéé ndácu tēe ní tejniñu de. ⁵Te suni súcuan tēe cásquí deporte, ma nihín de premio te núu tú condihvī ni de cosíquí váha de máá modo chíjniñu. ⁶Te tēe sájniñu nihin ñuhun, máá de cúu jeē nihín xihna gā jeē cuáha itu. ⁷Nacani ni rō siquī jeē cahán rī, te máá Jítoho yō sáha ya jeē jécūhun ni rō siquī ndíhi.

⁸Te cocuhun ndasí ni rō Jesucristo, Yaā ní quiji yucūn rey David, te ni natecu yā mēhñu ndíyi, nájñuhun cáhán jnūhun jnáma ya yohó jéé nácani ri. ⁹Te jeē siquī jnūhun un ndóho ri jnúndóho, te nde ni cajihni i ruhū íne ri vecāa nájñuhun iin tēe ni sáha cuēchi xeēn. Te jnūhun Yaā Dios chi ma cúu cuhni i jeē ma cuité núu. ¹⁰Núu súcuan te jéndeyí ni rī jító ri tāca jnúndóho yáha síquī jeē cundáhú ni rī ñayuu jeē ní nacāji ya, návāha suni cācu máá i jeē quivī i ndaha Cristo Jesús, te quihin i nuū cujéhnu i ní cáni. ¹¹Chi ndaā cahán jnūhun yáha:

Núu vésú na cúu yō jeē siquí yā,
te suni cotecu yō jíni yá,

¹²te núu cuandeyí ni yō ndoho yó,
te suni ndacu yó jniñu jíni yá.

Te núu ma cuajnúhún yó yā, te
suni ma cuajnúhún yá yohó.

¹³Te vésú tu squícu váha yó, te
máá yá chi mání squícu ya,

chi tu cúu sáfalta yā, chi squícu ya jeē ni cáhān yā.

**Tēe sájniñu squícu vāha
jíin jnúhun ya**

¹⁴Jnúhun yáha na nástíhvī ni rō ñayuu, te cahān nīhin ro jíin i, jíto máá Jítoho yō, jeē ma téjñáhan i siquī tāca jnúhun sáá-ni. Chi tu ndé jéjñiñu cuiti, chi sa stívi ñáyuu jíni sōho. ¹⁵Te nducú ndéyí ró jeē cuajnúhún Yaā Dios rohó, jéē cúu ró tēe sájniñu squícu vāha jíin jnúhun ya, návāha ma cúcanu rō nuū yā siquī ní ĩn, chi vāha nacani ró jnúhun ndaā yā. ¹⁶Te ma quívi nduu rō jíin táca jnúhun sáá-ni ñayīvi yáha, chi suu sáha jeē ndúcuehē gā jniñu néé quívicoo ñayuu cácahān. ¹⁷Te tāca jnúhun cástéén i chi cúu nájñuhun ĩn ndīhyi xeēn jeē sacáhú gá cuahān. Te Himeneo jíin Fileto cúu uū tēe jeē casáha súcuan. ¹⁸Chi tēe un ní cajica yátá de nuū jnúhun ndaā, te cácahān de jeē jé ni cuu ni canatecu ndīyí. Te súcuan cásaca nuu de xinī sava ñayuu cácaandíje. ¹⁹Te Yaā Dios ni jeni ya ñayuu maá yá, te íyó cutú ndaā i jeē ma cáca yátá i, nájñuhun yósó núu tútu ii: Je jíni Jítoho yō Yaā Dios tāca ñáyuu jeē yíhi ndaha máá yá. Te suni cáhān: Tāca ñáyuu jeē ndácunehen síhvī Cristo, na cújiyo i nuū jniñu néé, áchí.

²⁰Te ini ĩn vehe cáhnu íyó cuéhē cohō, nasūu máni cohō oro cohō plata, chi suni cohō yujnu cohō ñuhun. Te íyó jéē fino te íyó jéē corriente. ²¹Te núu ĩn ñayuu sándoo i máá i jeē quénda i nuū tācá jniñu néé, te cuu i nájñuhun ĩn cohō fino. Te coo ndoo coo ii

i nuū Jítoho yō, te nīhin jniñu i ndese cúní maá yá. Te coo tūhva i jeē sáha i tācá jniñu vāha.

²²Núu súcuan te cunu ró coto ró táca jéē tú vāha jeē cándiyo ni tēe suchí. Te condiquīn rō jniñu ndaā, jíin jnúhun cándíje ró yá, jíin jnúhun cúndáhú ni, jíin jnúhun coyūcu máni jíin jnáhan. Te súcuan sáha ró ndé jíin táca ñáyuu ndoo ánuá jeē ndácunehen síhvī máá Jítoho yō. ²³Te ma quívi nduu rō jíin táca jnúhun cánéé ĩi jeē tu íyó cájí, chi je jíni rō jeē sáha jeē tejnáhan ñayuu. ²⁴Te mozo maá Jítoho yō, tú vāha jeē tejnáhan de, chi sa suhva cánuú jéē coo vāha ni de jíin táca ñáyuu. Te coo vāha ni de stéén de, te cuandeyí ni de jíin i. ²⁵Te jíin jéē víta ni de te cani ichi de ñayuu nīhni ni. Chi sanaa te nacani ni i sáha Yaā Dios, te jecūhun ni i ndese íyó jnúhun ndaā. ²⁶Te nducájí ni i te cācu i nuū jexeén jeē ní jniñi ún i, chi ni cundeyí jíin i jeē sáha i jeē cuní maá.

**Siquī ndese coo ñayuu sáha
néé quívī cuándihi**

3 Te suni na jécūhun ni rō jeē quívī cuándihi te quee quívī coo jnúndóho. ²Chi coo ñayuu jeē chiñúhún máá, te ndiyo ni i xūhún, te sátéyí i máá i, te sándúxí i máá i. Te cahān neé i siquī Yaā Dios, te cunīhni ni i nuū tatá i nuū naná i, te ma nácuatáhú i, te ma chiñúhún i Yaā Dios. ³Te ma cóo manī i jíin jnáhan i ni ma cundáhú ni i. Te sájñuhún i, te ma cúu casi i tāca jéē ndíyo néé ni i, te yōhyo xeēn coo i, te quiti ni i coto i tācá jniñu vāha. ⁴Te suni nastúu i jnáhan i,

te ma yūhú i sáha i cuēchi, te coo ndúxí ndasí i, te nducú i jeē cúsiñ ni maá-ni i, te ma nducú i quīvi i nuū Yaā Dios. ⁵Te sáha-ni i jeē chiñúhún i ya, te casi i nuū poder yā jeē ma sáma modo i.

Ma quīvi nduu rō jíin ñayuu casáha súcuan. ⁶Chi sava tēe ún quīvi de vehe te stáhú de tācá ñahan cánée jēe iyó ndasí cuēchi. Te yachī quīvicoo ña jíin táca jnúhun tú ndaā jeē cúsiñ ni ña jíin. ⁷Te vēsú niní scuáha ña na-ni jnúhun, te tu cúu cuiñi jecúhun ni ña jnúhun ndaā yā. ⁸Te nájñuhun ni casáha tēe tásí Janes jíin Jambres jenahán, jeē ní canducú de casi de nuū Moisés, suni súcuan sáha tēe ún, chi nducú de casi de nuū jnúhun ndaā. Chi coo nee jeē níjnūnī de, chi ma candíje ndije de jnúhun cándíje yó. ⁹Te ma queé jniñu sáha de, chi cuni tāca ñayuu jeē tēe cánée xínī cácuu de, nájñuhun ni cajini ñayuu jeē ni íyo néé xínī ndíndúú tēe jeē ní nducú casi nuū Moisés.

**Jniñu sándiñi ndácu
Pablo nuū Timoteo**

¹⁰Te róhó chi je ni cutúhva vāha rō ndese steén rī, ndese jíca ndaā rī, ndese tēe ni rī sáha rī, ndese cándíje ri yā, ndese née ri paciencia, ndese cúndáhú ni rī jñahan ri, jíin ndese jéndeyí ni rī. ¹¹Chi ni cajito xeēn ñayuu ruhū, te ni ndoho ri jnúndóho. Te jíin rō tāca jēe ní ndoho ri ñuu Antioquía, ñuu Iconio, jíin ñuu Listra. Te jíin rō ndese ni cajito xeēn i ruhū. Te máá Jítoho yō ni jnama ya ruhū nuū ndiñi ún. ¹²Chi ndaā cúu jeē tāca ñayuu jeē

ndihví ni cuajniñu vāha nuū Cristo Jesús, ndoho i jeē coto xeēn ñayuu i. ¹³Te ñayuu casáha jniñu néé jíin ñayuu castáhú, chi sa víhyá gā cocuu i jíin jniñu néé, chi stáhú i ñayuu, te suni candíje máá i jnúhun stáhú.

¹⁴Te róhó chi sa cuiñi nihin rō jíin jēe ní cutúhva rō jíin jēe ní cucáhnu vāha ni rō. Chi jíin rō ndese ñayuu cúu jeē ní castéén nuū rō. ¹⁵Chi nde ná lulí rō, te je jíin rō ndese cáhán tutu i jeē steén nuū rō ndese candíje rō jeē ni jíin Cristo Jesús jehē rō návāha cācu rō. ¹⁶Te ní tutu i cúu jnúhun jeē ni cáhān Yaā Dios, te vāha níhín jniñu jeē steén nuū yō, jeē cahán nuū yō, jeē náchuhun ichí yóhó, jíin jēe scuéhnu yóhó jíin jniñu ndaā, ¹⁷návāha tēe cájejniñu nuū Yaā Dios, ije ni de te coo túhva vāha de sáha de tācá jniñu vāha.

4 Te cáhán rī jíin rō, jíto Yaā Dios jíin Jítoho yō Jesucristo, Yaā quiñi ndacu jniñu, te sándaā yā jniñu ñayuu cátecu jíin ñayuu ní cajihí. ²Cáhán nihin ri jeē na nácani rō jnúhun ya, te stíhvī ni rō i candíje i. Te níni sáha rō súcuan núu núne i chí vēsú tu núne i. Te sáha rō jēe na jécúhun ni i, te cahān rō nuū i, te caní ichí vāha rō i, te jíin cuéhē paciencia steén rō nuū i. ³Chi quee tiempo jeē ma cuájñuhún cuiñi ñayuu jnúhun ya jeē steén ndaā vāha, chi sa cuájñuhún i jnúhun cúsiñ ni maá i, te nducú i cuehē maestro jeē steén nuū i máni jnúhun jeē nújnahan ni i cuni nahín i. ⁴Te cujiyo i nuū jnúhun ndaā, te condíhvī ni i tāca jnúhun jeē máá cuento-ni cúu. ⁵Te

róhó chi níní coo ndito ni rō, te cuandeyí ni rō jíin jnúndóho, te condihvī ni rō nacani ró jnúhun jnáma ya yohó, te squícu vāha ró jíin jniñu ya jeē sāha ró.

⁶Te ruhū chi je ni socō rī maá rí jeē cúu rī, te je cuacuyajni quivī cuu rī. ⁷Te je ni cundeyí rí jeē ní nducú ndéyí rí siquī jniñu vāha, te je ni jinu ni jica ri ñayīvi yáha, te tu ní siáa rī jnúhun cándíje ri yā. ⁸Te vijna je íyó túhva premio jeē nihín rí siquī jeē ní jica ndaā rī. Chi Jitoho yō cuāha ya un núu rī maá quivī sándaā yā jniñu, chi maá yá cúu juez ndaā. Te nasūu núu maá ñin ruhū cuāha ya, chi suni cuāha ya nuū tāca ñayuu jeē cúu ni i jeē ndíji ya chi manī i jíin yá.

Jeē cána Pablo quiji Timoteo nuū de

⁹Nducú ndéyí ró quiji yachī rō nuū rī. ¹⁰Chi Demas ni stóo de ruhū, chi ndíyo ni de ndajniñu ñayīvi yáha, te cuahān de ñuu Tesalónica. Te Crescente chi cuahān de Galacia, te Tito cuahān de Dalmacia. ¹¹Te maá ñin na Lucas íne jíin rí. Te jeē quíji ró, te condeca ró Marcos quiji ró jíin de, chi vāha cuajniñu de jeē chindéé ñáhán de ruhū jíin jniñu ya. ¹²Tíquico ni tají rí de cuahān de ñuu Efeso. ¹³Te jeē quíji ró, te condaha ró cotón jeē ni stóo ri vehe Carpo ñuu Troas. Te suni condaha ró tāca libro, te jeē cánuú gá cúu tācá tutu ní tee maá rí.

¹⁴Alejandro, tēe cúu herrero, yōhyo xeēn ni sāha de jíin rí. Te

maá Jitoho yō cuāha ya yāhu de jeē súcuan ní sāha de. ¹⁵Te condito ró maá ró nuū de, chi yōhyo ni cuu de contra siquī jnúhun cástéén yó.

¹⁶Te ná ni ine ri jeē xíhna ñúhún núu tāca tóhō, te tú ni ñin tēe ní índichi jíin rí, chi ndíhi de ni castóo de ruhū. Te ñúhun ni rí jeē Yaā Dios cone cáhnu ni yā nuū de. ¹⁷Te vēsú súcuan te maá Jitoho yō ni chindéé ñáhán yá ruhū, te ni jēhe ya fuerza ini rí, te súcuan ni sínu ri ni nacani ndíhi ri jnúhun jnáma ya yohó, ni cajini nahín ñayuu tācá nación tu jíin jnúhun ya. Súcuan ni jnama Jitoho yō ruhū nuū tāca tēe xeēn. ¹⁸Te jnama ga yā ruhū nuū tācá jniñu néé, te condito ya ruhū nde quivī ri andiví núu ndácu ya jniñu. Te na cáhán yō jeē yōhyo luu cújéhnu ya níí cáni. Amén.

Saludo jíin bendición jeē sándihí

¹⁹Te cahān rō jeē sándeýí ni Prisca jíin Aquila, jíin ñayuu vehe Onesiforo, achí rí. ²⁰Erasto ni quendōo de ñuu Corinto. Te ni quendōo Trófimo ñuu Mileto, te cúhú de. ²¹Te condihvī ni rō quiji ró nde ná tu quejéé vico mójin. Sándeýí ni rō, achí Eubulo jíin Pudente jíin Lino jíin Claudia jíin tāca gá hermano.

²²Te ñúhun ni rí jeē maá Jitoho yō Jesucristo na cóo ya jíin ró, te Yaā Dios sāha ga yā jeē vāha róhó jíináhán ró. Súcuan na cóo. Amén.

CARTA JEE NI TEE SAN PABLO

APOSTOL NUU TITO

1 Máá rí cúu Pablo, mozo Yaā Dios jíin apóstol Jesucristo, chi ni tají Yaā Dios ruhū jeē scándíje ri ñayuu ní nacāji ya, návāha jecūhun ni i jnūhun ndaā yā jeē candíje yó, ²te cocuhun ni i jeē cótecu i níí cáni. Chi nde ná tu jecōo ñayíví te ni jejnūhun Yaā Dios jeē cótecu yō, te íyó ndāā jnūhun ni cahān yā. ³Te vijna jeē ní quee tiempo ni jeni ya, te stéén cají yá jnūhun ya nuū yō. Te ni tejníñu ya ruhū ni ndacu ya jniñu jeē nácani ri jnūhun ya ún. Chi Yaā jnáma yóhó cúu ya. ⁴Te tée ri carta yáha cuájee nuū rō Tito, chi nájñuhun sēhe ri cúu ndije ró síquī jeē ínuú-ni cándíje yó yá. Te ñúhun ni ri jeē Tatá yō Yaā Dios jíin Jítóho yō Jesucristo, Yaā jnáma yóhó, na sáha ga yā jeē váha róhó, te cundáhú ni yā rohó, te sáha ya jeē coo ndeyí coo síi ni rō.

Jniñu ya jeē ni sáha Tito nde isla Creta

⁵Te ni stóo ri rohó ndé isla Creta, návāha sándaā rō síquī jniñu jeē cúmani gā cundaā, te cani ró táca tée jéñu condito ñayuu cáncandíje tãcá ñuu, nájñuhun ni ndacu ri jniñu nuū rō. ⁶Te tēe jéñu un

cánuú jeē ma cóo ni iin jeē nihín ñayuu cuēchi síquī de. Te cánuú coo iin-ni ñasihí de. Te sēhe de cánuú cuu i sūchi cáncandíje jeē ma nihín ñayuu cuēchi síquī i jeē tu sáha vāha i chí jéē níhni ni i nuū de. ⁷Chi tēe cácujeñhu cáncandíje jniñu nuū ñáyuu cáncandíje, cánuú caca ndaā de chi cáncandíje jniñu de síquī jniñu Yaā Dios. Te ma satéyí de máá de, ma quití yachí ni de, ma cúu de tēe nájini, ma cuajnáhan de, te ma ndíyo ni de xūhún. ⁸Chi sa cánuú jéē niní cuāha núu de vehe nuū ñáyuu cájica, te níni sáha de jniñu váha, te ndito coo xini de, te coo de tēe ndaā, te coo ndoo ánuá de, te casi de modo jeē cuní maá de. ⁹Te cánuú cuiñi nihin de jíin jnūhun ndaā jeē ni scuáha de, návāha cuu stíhví ni de ñayuu jíin táca jnūhun ndaā vāha, te suni cuu sáha de jeē jécūhun ni ñayuu cácuu contra, te casi i yuhu i.

¹⁰Chi íyó cuéhé ñayuu nihni ni, te cástéén i inga modo jéni ni maá i jeē súcuan cácu ñayuu, te stáhú i ñayuu. Te jnáhan yó hebreo cúu jeē vihyá gā casáha súcuan. ¹¹Te cánuú jéē casi rō yuhu táca tée ún, chi cástéén de jnūhun jeē tu íyó

váha stéén de, chi cúní de nihin de xūhun síquī ún. Te súcuan sáca nuu de xiní ndíhi ñayuu tǎcá vehe.

¹²Te iin tēe isla Creta jeē nácani jnūhun, ni cahān de síquī jnāhan ñuu de: Jnāhan yó ñayuu Creta, chi máni ñayuu stahú cácuu i, te nájñūhun quití xéén casáha i, te máni ndíhví ni i caji cuehē i, te cúxí i, áchí de. ¹³Te ndaā cúu jnūhun ni cahān tēe ún. Jeē yúcuan na cúxeēn rō nuū i, návāha ndaā vāha na cándíje i. ¹⁴Te ma sáha i cuenta tǎca jnúhun ni catava jnāhan yó hebreo, jeē maá cuento-ni cúu, ni ma squícu i jniñu cándacu tēe ni quendacoo nuū jnúhun ndaā.

¹⁵Te ñayuu jeē ní ndundoo jeē níjnūní, máni modo iyó ndoo íyó váha jéni ni i jíto i tǎcá-ni. Te ñayuu tu cándíje jeē tu ní ndúndoo jeē níjnūní, máni jéni ni i iin modo tú ndoo tú vāha síquī tǎca jéé jíto i. Chi nde jeē níjnūní i jíin ánuá i íyó jnéhén. ¹⁶Te vésú cácahān i jeē jíní i Yaā Dios, te jíin jniñu casáha i te jíní yō jeē tú ndije i. Chi ñayuu ndevāha ñayuu nihni ni cácuu i, te tu cúu sáha i ni iin jniñu váha.

Jnūhun ya jeē steén ndaā vāha

2 Te máá ró chi níní na cáhán rō tǎca jnúhun jeē quijnāhan jíin jnúhun ya jeē steén ndaā vāha. ²Te cahān rō jíin tǎca tēe jéhnu jeē na cóo cájí ni de, te sáha yíñúhún de, te ndito coo xiní de, te candíje nihin de jnūhun cúndáhú ni yā de, te cundáhú ni de jnāhan de, te cuandeyí ni de. ³Te suni súcuan tǎcá ñahan jéhnu, na sáha yíñúhún ña, te ma sajnúhún ña, te ma nájini ña. Te na stéén ña tǎca jeē váha.

⁴Te na stéén ña nuū tǎcá ñahan súchí jéé coo maní ña jíin yíi ña jíin séhe ña. ⁵Te ndito coo xiní ña, te coo ndoo ánuá ña, te coto vāha ña jniñu vehe ña, te coo vāha ni ña, te cuatáhú ña nuū yíi ña, návāha ma cahán neé ñayuu síquī jnúhun Yaā Dios.

⁶Te suni súcuan stíhví ni rō tǎca tēe suchí jeē ndito na cóo xiní de. ⁷Te róhó, cuu ró iin ejemplo nuū de jeē sáha ró tǎca jniñu váha. Te jeē steén rō nuū de te ndaā steén rō te coo ndije ni rō. ⁸Te ndaā vāha stéén rō, návāha ma cúu cahān ñayuu síquī. Te súcuan te cucanu ñayuu cácuu contra, chi ma cúu cahān i ni iin cuēchi síquī rō.

⁹Te cahān rō jíin ñayuu cácuu mozo jeē na cuatáhú i nuū patrón i, te na sáha i tǎcá jniñu jeē újnahan ni de, te ma cahán maá i núu ndácu de jniñu nuū i. ¹⁰Te ma sacuíhná i ndajniñu de, chi na cúu i ñayuu ndaā ndije, návāha jíin tǎca jniñu jeē sáha i, te cuni tǎca ñayuu jeē yóhoyo luu cúu jnūhun jeē steén síquī Yaā Dios, Yaā jnáma yóhó.

¹¹Chi vijna je ni steén Yaā Dios ndese sáha ya jeē váha ñayuu, chi cúní yā jnama ya ndíhi ñayuu ñayíví. ¹²Te jnūhun jeē váha ni yā jíin yó, suu stéén nuū yō jeē na síáá yō jniñu neé jíin tǎca jéé ndíyo neé ni yō. Te ndito na cóo xiní yō ini ñayívi yáha, te caca ndaā yō, te chiñúhún váha yó Yaā Dios. ¹³Te suni stéén nuū yō jeē cocuhun ni yō jeē quéndōo ndetū yō jeē quíji máá quíví jéhnu jeē quénda ndijin Yaā Dios, Yaā kujéhnu ndasí, suu Jesucristo, Yaā jnáma yóhó. ¹⁴Chi ni socó yā maá yá jehē yō, návāha jnama ya yohó núu

táca jniñu néé, te sándoo ndihi ya anuá yō jeē cuu yó ñáyuu maá yá, te condihvī ni yō sáha yó jniñu váha.

¹⁵Táca jnúhun yáha cánuú steén rō, te stíhvī ni rō i, te cahān rō nuū i, chi súcuan ndíso jniñu ró. Te ma cuáha ro jnúhun jeē sajéé ni ni ñin i nuū rō.

Ndese cánuú sáha ñayuu cácañdije

3 Te na nástíhvī ni rō i jeē cuatáhu váha i nuū tēe cácañéhu jíin tēe cándiso jniñu ñuu. Te na squícu i jniñu cándacu de, te coo ñamā ni i sáha i táca jniñu váha. ²Te ma cahán neé i siquī ni ñin ñayuu, te coyūcu máni i jíin ñayuu, te coo vāha ni i, te coo vitá ni i jíin ndihi ñayuu.

³Chi máá yó suni ni cuu yó ñáyuu canéé jeē tu jécūhun ni nde saá, te ni cacunihni ni yō nuū Yaā Dios. Te ni cacandije yó táca jnúhun tú ndaā, te ni cajejniñu sáa-ni yó núū táca jéé ní ndiyo néé ni yō jíin na-ni jniñu ni cusñi ni yō. Te ni cajica yó jíin jniñu néé jíin jnúhun cuésún ni. Chi ni cajito uhū ñayuu yohó, te ni cajito uhū yō i. ⁴Yūcuán na te Yaā Dios, Yaā jnáma yohó, ní steén yā jeē váha ni yā te cúndáhu ni yā ndihi ñayuu ñayiví. ⁵Te ni jnama ya yohó, te tú na jniñu váha ní cásáha yó jéé jnáma ya yohó, chi sa siquī jeē ní cundáhu ni yā yohó. Chi ni nacate ya anuá yō, te súcuan ni nacacu jeé yó, te ni ndujeé yó ni sáha ya jíin máá Espíritu Santo. ⁶Te yōhyo ni cunuú Espíritu Santo ini anuá yō, jeē ni sáha Yaā Dios jeē jíin Jesucristo, Yaā jnáma yohó. ⁷Te súcuan te ni ndahva yā cuēchi yó síquī jeē váha ni yā, te nihin tahú yō cotecu yō níí cáni, nájnūhun ñúhun ni yō.

⁸Ndaá cúu jnúhun yáha, te cúni rī jeē niní cáhān nihin ro táca jnúhun

yáha, návāha ñayuu cácañdije Yaā Dios, na cóndihvī ni i cocuu i jíin jniñu váha. Chi íyó váha táca jéé yáha, te níhín jniñu jeē quéndōo vāha ánuá ndihi ñayuu. ⁹Te ma quívi nduu rō jíin táca jnúhun cánéé íi, jíin jnúhun siquī ndese vēji táca jíi yō, jíin táca jnúhun sáha jeē cátejñáhan i cácahān i jeē cánuú squícu yó ley Moisés. Chi máni jnúhun cáhā-ni jeē tu níhín jniñu cúu.

¹⁰Te núu íyó ñáyuu jeē sáha jeē ndusñin ini ñayuu cácañdije, te cahān rō nuū i ñin uū jínu, te núu ma chúhun ni i, te quenehen ró i. ¹¹Chi jíni rō jeē ñin ñayuu sáha súcuan, stívī ndasí i chi jíni i jeē tú vāha sáha i, te jeē yúcuán jécondeé cuēchi siquī i.

Jeē cána Pablo quiji Tito nuū de

¹²Te jeē tají rí Artemas chí Tíquico cuajeé de, yūcuán na te nducú ndéyí ró quiji ró núu rī ñuu Nicópolis, chi je ni cundaā ni rī jeē yúcuán condee rī tiempo mǐjin. ¹³Te condihvī ni rō chindéé ñáhán ró Zenas, tēe cúu abogado, te suni súcuan Apolos. Chi cuáha ró jéé jíni ñúhún de jeē quíngoo ga de ichi nuū quihín de. Te coto ró jéé ma cúmani ni ñin nuū de. ¹⁴Te ñayuu cáhiin jíin yó, cánuú cutúhva i sáha i táca jniñu váha, te chindéé ñáhán i ñayuu cúmani nuū, návāha ma cótecu saá-ni i.

Saludo jíin bendición jeē sándihí

¹⁵Táca ñáyuu cáyūcu jíin rí yáha, cácahān i jeē sándeyí ni rō. Te cahān rō jeē achí rí jeē sándeyí ni ñayuu jíñā jeē maní yō jíin síquī jeē cácañdije yó. Te núhun ni rī jeē na sáha ga Yaā Dios jeē váha róhó jíñáhan ró. Súcuan na cóo. Amén.

CARTA JEE NI TEE SAN PABLO

APOSTOL NUU FILEMON

¹Máá rí cúu Pablo, te íne ri vecāa jeē siquí jnúhun Cristo Jesús. Te jíín hermano yō Timoteo cátee ri carta yáha cuájeē nuū rō Filemón. Chi cúu ró tée jeē cáhīyo manī rī jíín, chi chéndéé ñájnáhan ró jíín rí siquí jníñu Yaā Dios. ²Te suni cátee ri carta yáha nuū ñáyuu cávandíje cándutútú ini vehe ró, te suni nuū hermana yō Apia, jíín núu Arquipo, tēe chéndéé ñájnáhan jíín yó siquí jníñu cánducú ndeyí yó jíín. ³Te cáñuhun ni rī jeē Tatá yō Yaā Dios jíín Jítóho yō Jesucristo, na sáha ga yā jeē váha róhó jíjnáhan ró, te sáha ya jeē coo ndeyí coo siñ ni rō.

Tēe cúndáhú ni te cándíje váha cúu Filemón

⁴Te jeē jicán tahu rī nuū Yaā Dios te tu náā ni rī cacān tahu rī jehē rō, te níni nácuatáhú rí nuū yā jeē siquí rō. ⁵Chi níhín rī jnúhun jeē váha cándíje ró jnúhun cúndáhú ni Jítóho yō Jesús rohó, te cúndáhú ni rō táca ñáyuu yíhí ndaha Yaā Dios. ⁶Te jicán tahu rī jeē ñáyuu ni cacandíje siquí jeē candíje máá ró, na jécúhun váha ga ni i siquí táca jéé váha jeē sáha ya yohó jeē jíín Cristo Jesús. ⁷Chi cúsiñ ndasí ni rī

te íyó ndeyí ni rī, hermano, siquí jeē cundáhú ni rō ñáyuu cávandíje. Chi máá ró ni sáha jeē ní ndusiñ ni i.

Jeē jicán Pablo iin favor jehē Onésimo

⁸Núu súcuan te cáhán ndahú rí jíín ró, vésú cuu ndacu ri nuū rō ndese cánuú sáha ró, chi cúu ri apóstol Cristo. ⁹Te tuú chi sa cáhán ndahú rí jíín ró siquí jeē cáhīyo manī yō. Te cundáhú ni rō ruhū sáha ró jéé cuní ruhū Pablo, chi je jéhnú ri, te íne ri vecāa jeē siquí jnúhun Cristo Jesús. ¹⁰Te cáhán ndahú rí jíín ró jehē mozo rō Onésimo jeē ní jeen ró te ni jinu. Te vijna te cúu i nájnūhun sēhe ri, chi ni scándíje ri i ini vecāa yāhá.

¹¹Te nde saá chi tu ní cúu i mozo squícu nuū rō, chi ni jinu i. Te nde vijna chi váha cuajníñu i nuū rō jíín núu rī. ¹²Te nátají rí i najeē i nuū rō. Núu súcuan te cahán váha ró jíín i, te sáha ró cuenta jeē nájnūhun máá rí ni najinū, chi yōhyo manī rī jíín i. ¹³Te cusíñ ni rī núu jeē na cúu quendōo i jíín rí yāhá, návaha cuajníñu i nuū rī lugar maá ró níni jéé íne ri vecāa jeē siquí jnúhun váha ya. ¹⁴Te tu ní cúní rí sáha

ri súcuan, chi nde cuāha máá ró jnūhun. Chi nasūu jéē safuerza rī rohó, chi jeē váha ni rō te sáha ró favor jíin rí, nájnūhun cúsiī ni maá ró. ¹⁵Chi sanaa te jeē siquī yáha cúu jeē ní jinu i ni cujiyo i nuū rō jecu-ni tiempo, suu návāha ví quendōo i jíin ró sáha Yaā Dios. ¹⁶Te vijna tuá cúu i ñin mozo jeē ní jeen ró, chi ni nduu i ñin jeē váha ga, suu ñin hermano jeē maní rō jíin. Te ruhū chi yōhyo maní rī jíin i, te nagā ni cuu máá ró jeē ma cóo maní rō jíin i. Te nasūu jéē maní rō jíin ñin tēe súcuan-ni, chi siquī jeē cúu i ñin hermano jeē candíje nuū Jítóho yō.

¹⁷Te núu sáha ró cuenta jeē ruhū cúu jnāhan ró cándíje, núu súcuan te cahān vāha ró jíin i jeē jinú i nuū rō, nájnūhun jeē ruhū cahān rō jíin. ¹⁸Núu na-ni falta ni sáha i nuū rō, chí núu táu i nuū rō, te cacān rō chunaa maá rí. ¹⁹Ruhū Pablo, jíin ndaha máá rí tēe ri yāha jéē maá rí nachunaa. Súcuan cáhán rī vēsú cuu cahān rī jeē sa máá ró taú nuū

rī sáha ró jéē cúsiī ni rī siquī jeē ni scándíje ri rohó te ni cācu ánuá rō. ²⁰Núu súcuan, hermano, sáha ró favor yáha jíin rí siquī jeē candíje ró Jítóho yō. Sáha ró jéē ndúsiī ni rī, siquī jeē cúu ró hermano candíje Cristo.

²¹Te tēe ri yáha núu rō, chi cúcáhnū vāha ni rī jeē cuatáhú ró, te nde vihyá gā sáha ró vēsú jeē ni jíicān rī. ²²Te suni jíicān rī jeē sátūhva ró núu cóndee rī, chi ñūhun ni rī jeē quéndā ri yāhá te jeē rī nuū rō sáha Yaā Dios siquī jeē cájicān tahū rō jehē rī.

Saludo jíin bendición jeē sándihí

²³Epafras, tēe íne jíin rí vecāa jeē siquī jnūhun Cristo Jesús, cáhán de jeē sándeyí ni rō. ²⁴Te suni súcuan cácahān Marcos, jíin Aristarco, jíin Demas, jíin Lucas, tēe cáchindéé ñájnáhan jíin rí siquī jníñu ya.

²⁵Te ñūhun ni rī jeē Jítóho yō Jesucristo na sáha ga yā jeē váha rohó jíjnéhan ró. Súcuan na cóo. Amén.

CARTA JEE CUAHAN NUU ÑAYUU HEBREO

Jeē ní tají Yaā Dios Sēhe ya
ni nacani ya jnūhun

1 Tijni jínu te tijni modo ni
cahān Yaā Dios jíin táca jíi
yō nde jenahán, chi ni tají yá tēe
ni canacani jnūhun ya. ²Te vijna
te tiempo cuándihí yāha ní tají yá
maá Sēhe ya ni nacani ya jnūhun
nuū yō. Te jíin Sēhe ya ni sáha ya
ñayīvi jíin táca gá, te ndivii jeē iyó
ní chihi ya ndaha Sēhe ya. ³Te Sēhe
ya yōhyo luu cújéhnū ya, nájñūhun
luu cújéhnū maá yá. Te ndihí ndese
cúu maá yá, suni súcuan cúu Sēhe
ya. Te jíin poder jnūhun ni cahān
Sēhe ya te iyó cutú ndihí-ni. Te ni
sándoo ya yohó táca cuéchi yó, te
sáa te ni cucōo ya lado váha mesa
maá Yaā cújéhnū nde andiví.

Jeē cújéhnū ga Sēhe Yaā Dios
vēsú tǎcá ndajéhé yā

⁴Te ni ndujéhnū ndasí gá Sēhe
ya vēsú tǎcá ndajéhé andiví, chi
ni nihīn yā tahū jeē ndíso ya jniñū
jéhnū ndasí gá vēsú jniñū cándiso
ndajéhé. ⁵Chi súcuan ni cahān
Yaā Dios jíin Sēhe ya, te nasūu jíin
ndajéhé yā:

Máá ró cúu Sēhe ri,

te vijna te ni sajhénu ri rohó jéē
cúu ri Tatá rō.

Te suni ni cahān yā jnūhun Sēhe ya,
te nasūu jnūhun ndajéhé yā:

Máá rí cúu Tátá nuū Sēhe ri,
te máá i cúu Sēhe nuū rī.

⁶Te suni ná ni tají yá Sēhe ya cújéhnū,
ni quiji ini ñayīvi yáha, te ni cahān yā:

Ndihí ndajéhé rī na chíñúhún i
Sēhe ri.

⁷Te ni cahān tucu ya jnūhun ndajéhé yā:

Nájñūhun quée tachī, súcuan
cájica ndajéhé rī sáha ri,
te tǎcá un jéē cájejníñū nuū rī,
nájñūhun yáñuhūn cácuu.

⁸Te jnūhun Sēhe ya chi sa suhva
cáhán yā:

Máá ró cúu Yaā Dios, te ndacu
ró jniñū níí cáni,
te jniñū ndácu ró, máni jniñū
ndaā cúu.

⁹Cúsī ni rō jíin jniñū váha, te
jíto uhū rō jniñū néé.

Jeē yúcuan ruhū, Yaā Dios maá
ró, ni sáha ri
jeē yóhyo ga cúsī ni rō vēsú
tǎca gá jeē iyó andiví.

¹⁰Te suni cáhán yā:

Máá ró cúu Jitoho, te nde xihna
ñúhún ni sáha ró jéē ni jécōo
ñayīví.

Te andiví chi suni jeē ni sáha ró cúu.

¹¹ Te tācá un chi naa, te máá ró chi ní cáni iyó ró.

Te tācá un chi cutúhú nájñuhun cutúhú ñin sahma,

¹² te nacaquin jnahnū rō te nasama ró jíjnáhan.

Te máá ró chi ma sáma cuiti rō, te quiví cótecu rō ma ndíhi cuiti.

¹³ Te súcuan ni cahān tucu yā jíin Séhe ya, te nasūu jíin ndajéhé yā:

Cucōo ró lado váha ri nuū kujéhnū ró,

te na sáha ri jeē quende rō

poder tāca jéē cájito uhū rohó.

Achí yá. ¹⁴ Te tācá ndajéhé yā chi mozo-ni cácuu, te tájí yá cuangoo jeē chindéé ñáhán ñáyuu jeē nihín tahū jeē jnama ya.

Jeē ma cúhuun ni yō jíin jnúhun jnáma ya yohó

2 Núu súcuan te cánuú jéē váha ga chuhun ni yō tāca jnúhun ya jeē ní cajini yó, chi núu tuú te sanaa te scuíta yó. ² Chi nde jenahán ní jejníñu ya ndajéhé yā ni cacastúhun jnúhun ya, te ni cajini ñayuu jeē iyó ndáá. Te ñayuu nihni ni jíin ñáyuu tu ní cájendetū jnúhun ún, vetū-ni ni canihín i castigo. ³ Te núu súcuan ni cuu, te yóhó, ¿ndese cācu yó núu ma chúhun ni yō jnúhun cánuú gá jeē jnáma ya yohó? Chi xihna gā maá Jítoho yō ni nacani ya jnúhun yáha, te sáá te tēe jeē ní cajini nahín ni canacani ndaā tucu máá de nuū yō. ⁴ Te Yaā Dios suni ni chindéé ñáhán yá de jeē ní canacani de jnúhun ya. Chi ni sáha ya jíin de jeē ní casáha de sñin sñin jñiñu jéhnū jeē nahán

náā ni yō jíto yó poder yā. Te suni ni jēhe ya Espíritu Santo yā nuū ñin ñin yó, ndese ni nujnahan ni maá yá sáha yó.

Jeē ní nduu Jesús jnáhan ñayuu

⁵ Te Yaā Dios nasūu núu ndajéhé yā ni jēhe ya jnúhun jeē condiso jníñu siquī ñayiví jéē quíji, chi sa suhva nuū Séhe ya Cristo ni jēhe ya. Te siquī ñayiví un cúu jeē cahán rí yāhá. ⁶ Chi suhva yósó núu tútu jeē ni cahán David jíin yá:

¿Na vé cúu ñayuu jeē ñúhun ni ní i?

Te ndíhví ni ni síquī i, te máá ñáyuu cúu i.

⁷ Chi jecu-ni tiempo ni sáha ní jeē núu i nuū tācá ndajéhé ni.

Yūcuán na te sajéhnū ní i te squéndōo yíñúhún ní i, te cani ní i jeē ndacu i jniñu nuū tāca jéē ni sáha ní.

⁸ Te ndíhi jeē iyó chi sáha ní jéē kujéhnū i siquī.

Achí tutu. Te jeē ni sáha Yaā Dios jeē kujéhnū i siquī ndíhi, núu súcuan te ma quéndōo ni ñin jeē ma cújéhnū i siquī. Te vēsú súcuan te vijna te ná tu coto yó jéē kujéhnū i siquī ndíhi jeē iyó. ⁹ Te jeē jiní yō vijna cúu Jesús, Yaā jeē ní nduu núu jecu-ni tiempo nuū tācá ndajéhé yā. Chi ni ndoho ya jeē ni jíhi yā jehē yō, te jeē yúcuan ní ndujéhnū luu tucu ya, te ndíhi cáhiyo yíñúhún núu yā. Chi jeē váha ni Yaā Dios jíin yó, jeē yúcuan ní jihí Jesús jehē yō.

¹⁰ Te ndíhi jeē iyó chi cuenta Yaā Dios cúu, chi máá yá ni sáha. Te suni ndéca ya cuehē ndasí séhe ya jeē quihín i andiví núu luu kujéhnū

i jíin yá. Te vāha níhín jníñu jeē ni jéhe ya jnündóho nuū Jesús, chi jeē ní ndoho ya súcuan te cuu condeca vāha ya ñayuu ní jnama ya. ¹¹Chi Jesús jeē ni sándoo ya i te máá i jeē ní candundoo i, chi iin-ni Tátá i jíin yá. Te jeē yúcuan tu cúcanu Jesús jeē cahán yā hermano yā jíin i, vēsú ndasí núu i. ¹²Chi yósó núu tútu jeē ni cáhān yā jíin Tátá yā:

Cachi na jnúhun ní núu tǎcá hermano na,
te mēhñu núu cándutútú i cata ná ndese cújéhnú ní.

¹³Te suni cáhān yā nájñuhun cácahān hermano yā:

Ruhū chi cándíje ri yā.

Te cáhān tucu yā:

Yāha íne ri jíin táca gá sēhe Yaā Dios jeē ni jéhe ya nuū rí.

Achí Jesús.

¹⁴Te nájñuhun cácacu ñayuu jeē cúu i yíqui cúñu, suni súcuan ni cacu Jesús, návāha cuu yā jehē yō. Te súcuan ni snāā yā poder jexeén jeē squívi ñayuu nuū cuéchi te jíhí i. ¹⁵Te ni cacu ya súcuan návāha cuu quenehen ya táca ñáyuu chíji jnúhun jeē yuhú i cuu i. Chi níí vida i ndóho i sáha ún. ¹⁶Te jendaá tu ní quíji ya jeē chindéé ñáhán yá tǎcá ndajéhé yā, chi sa suhva jeē chindéé ñáhán yá ñayuu cácaandíje jeē ní nduu yucūn Abraham. ¹⁷Jeē yúcuan ní jini ñúhún nduu ínuú yá jíin táca hermano yā, návāha cuu ya sutú cújéhnú jeē squícu vāha ya tǎcá jniñu jehē i nuū Yaā Dios. Chi ni cundáhú ni yā i, te ni ndahva yā cuéchi i jeē ni sócō yā maá yá jehē i. ¹⁸Chi suni máá yá ni ndoho ya jeē ní jito ndee jnündóho ya, te

jeē yúcuan cuu chindéé ñáhán yá ñayuu jeē jito ndee jnündóho i.

Cújéhnú ga Jesús vēsú Moisés

3 Hermano, ni cana Yaā Dios rohó, te cácuu ró ñáyuu ndoo máá yá. Núu súcuan te na nácani vāha ni rō siquí Cristo Jesús, Yaā cúu apóstol jeē ní tejniñu Yaā Dios, te suni cúu ya sutú cújéhnú siquí jnúhun cácaandíje yó. ²Chi ní squícu vāha ya nuū Yaā Dios, Yaā ní tee jniñu un siquí yā, nájñuhun ní squícu vāha Moisés nuū ñáyuu jeē ni cáhān Yaā Dios jeē cácuu i ñayuu vehe ya. ³Chi cújéhnú ndasí gá Jesús vēsú Moisés, nájñuhun cújéhnú ndasí gá tēe sáha vehe nasūu máá vehe. ⁴Chi tǎcá vehe íyó tée ni sáha. Te máá Yaā Dios cúu jeē ni sáha táca jéé iyó. ⁵Te Moisés ní squícu vāha de jíin jniñu jeē ní cuu de mozo ni condito de ñayuu vehe Yaā Dios. Te ni castúhún de siquí táca jnúhun jeē steén yā tiempo quíji. ⁶Te Cristo chi sa cúu ya maá Séhe jeē ndácu jniñu nuū ñáyuu vehe Tátá yā, te vāha squícu ya jeē ní jéjñuhun ya nuū i. Te suni máá yó cácuu ñayuu vehe ya, te núu na cuñi níhin yó jíin jnúhun cándíje yó ndé quívi sándíhí, te núu cúsiñi ni yō jeē ñúhún ni yō táca jéé vāha jeē coo.

Jnúhun jeē ndetātu ñáyuu Yaā Dios

⁷Núu súcuan te na chúhun ni yō jeē cahán Espíritu Santo nuū tútu ii:

Vijna te núu cuni sōho ró jéé cahán Yaā Dios,

⁸te ma cúniñni ni rō nájñuhun ní cacuniñni ni ñayuu jenahán.

Chi tu ní cájendetū i nuū yā ná
ni cajica i nuū ñúhun téhé.

⁹ Chi yúcuán ní casáha jíí rō
jniñu jeē ni quitī ni rī, achí yá,
vēsú ni cajito i tācá jniñu ni
sáha ri uū xico cuiyā.

¹⁰ Jeē yúcuán ní quitī ni rī jíín
ñáyuu tiempo un.

Te ni cahān rī jeē máni jeē
castóo i ichi ndaā,
chi tu cáculi i condiquin i
jnūhun ri.

¹¹ Te jeē yúcuán ní quitī ni rī, te ni
cahān teyí rí
jeē ma quívicoo cuiti i nuū
ndetātú i sáha ri.

Achí yá.

¹² Núu súcuán hermano, coto má
conéé ánuá ni ñn ró jéē cáca yátá
ró jeē tuá candíje ró Yaā Dios, Yaā
técu. ¹³ Chi sa suhva tāca quívī na
stíhvī jnáhan ni rō, níni gá iyó
tiempo, návāha ma cúnihni ni ni
ñn ró te stáhú rōhó sáha ró cuéchi.
¹⁴ Te núu na cuñi nihin yó ndé quivī
sándihī jíín jnúhun jeē ní quejéé
yó jíín, yúcuán na te cuu yó jnáhan
Cristo.

¹⁵ Chi cáhán tutu:

Vijna te núu cuni sōhó ró jéē
cahán Yaā Dios,

te ma cúnihni ni rō nájnūhun ni
cunihni ni ñayuu jenahán.

Achí. ¹⁶ ¿Te ndé-ni cúu ñayuu jeē ní
jini jnúhun ya te ni cunihni ni? Suu
ndihī ñayuu jeē ni scácu Moisés jeē
ní quendacoo Egipto. ¹⁷ ¿Te ndé-ni
cúu ñayuu jeē ní quitī ni yā nuū
uū xico cuiyā? Suu ñayuu jeē ní
casáha cuéchi, te ni cajihī i nuū
ñúhun téhé. ¹⁸ ¿Te ndé-ni i cúu jeē
ni cahān teyí yá jeē ma quívicoo
cuiti i nuū ndetātú i sáha ya? Suu

máa ñáyuu jeē tu ní cájendetū nuū
yā. ¹⁹ Núu súcuán te jíni yō jeē tu ní
cúu quívicoo i nuū ndetātú i, siquī
jeē tu ní cáculi i ya.

4 Te níni iyó gá jnúhun jeē
ni jéjnūhun ya jeē quívicoo
ñayuu nuū ndetātú i sáha ya, te na
cónso iyó yó jéē ma stívi yó, návāha
tú coo jíín sava ró jéē ma nihín rō
quívī ró. ² Chi suni máa yó ni cajini
sōho yó jnúhun jeē jnáma ya yohó,
nájnūhun ñayuu jenahán un. Te
nuū maá i tu ní jéjníñu jnúhun ni
cajini i ún, siquī jeē tu ní cáculi
i. ³ Te yóhó jéē cáculi, máa yó
cúu jeē quívicoo yó núu ndetātu
yó. Te siquī ñáyuu tu cáculi ni
cahān yā suhva:

Jeē yúcuán ní quitī ni rī, te ni
cahān teyí rí

jeē ma quívicoo cuiti i nuū
ndetātú i sáha ri.

Te súcuán ni cahān yā vēsú je iyó
túhva nuū ndetātú i nde ná ni jecōo
ñayivī. ⁴ Chi súcuán yósó jnúhun
nuū tútu i siquī quivī uxá:

Ni sínu Yaā Dios tāca jéē ni sáha
ya, te ni ndetātu yá quivī uxá.

⁵ Te suni nuū tútu un yósó tucu:

Ma quívicoo cuiti i nuū ndetātú
i sáha ri.

Achí yá. ⁶ Núu súcuán te sava
ñayuu chi quívicoo nahín i nuū
ndetātú i. Te ñayuu jenahán jéē ní
cajini jnúhun jeē jnáma ya i, tu ní
quívicoo i siquī jeē tu ní cájendetū
i nuū yā. ⁷ Jeē yúcuán ní jeni tucu
ya inga quivī jeē quívicoo ñayuu, te
quivī un cúu vijna. Chi ná ni yāha
cuehē tiempo jeē ni cahān yā jíín
ñáyuu jenahán, te yósó núu tútu jeē
ni sáha ya jeē suni ni cahān David
suhva:

Vijna te núu cuni sōho ró jéē cahán yā,
 te ma cúnihni ni rō núu súcuan.
 Achí tutu. ⁸Te nde jenahán ní squívi Josué ñayuu Israel un ñuu nuū ndetátú i. Te tu ní cúu squívi de i nuū ndetātu ánuá i sáha ya. Chi núu súcuan te ma cahán gā Yaā Dios jíin táca ñayuu jeē vijna cúu quívi jeē quívicoo i nuū ndetátú i. ⁹Núu súcuan te íyó túhva nahín iin nuū ndetātu ñayuu Yaā Dios, nájñuhun ni ndetātu máá yá. ¹⁰Chi ñayuu jeē quívicoo nuū ndetátú i jíin yá, chi ndetátú i jeē ní casájniñu i, nájñuhun ni ndetátú Yaā Dios nuū jñíñu ni sáha máá yá. ¹¹Núu súcuan te na ndúcú ndéyí yó quívi yó núu ndetātu yó un, te ma sáha ni iin yó cuéchi jeē ma cándíje yó, nájñuhun ni casáha i nde saá. ¹²Chi jñuhun Yaā Dios ndító técu te íyó poder. Chi cúu nájñuhun iin espada jeē xeén ndíndúú lado, chi nástúu cájí ndese íyó jéē níjñuní yó jíin ánuá yō, nájñuhun sáha espada jeē jéhnde te nástúu nuū ñujnáhan yiquí jíin meque. Te jñuhun ya nástúu ndíhi ndese jéni ni yō jíin ndese cúní yō sáha yó. ¹³Te tu íyó ni iin jeē yísahí jeē tu jíni máá Yaā jeē náquihin cuenta, chi ndíhi-ni jíni vāha ya, te ndíhi-ni túu ndijin nuū yā.

Jesús cúu sutū cujéhnu ga

¹⁴Te cánevāha yó iin sutū cujéhnu ga, te je ni ndaa ya ni ndívi ya nuū iyó Yaā Dios. Te Jesús Sēhe Yaā Dios cúu ya. Jeē yúcuan na cuñi ñihin yó jíin jñuhun jeē ní candíje yó. ¹⁵Chi névāha yó iin sutū cujéhnu jeē jíto ndáhú yóhó

jeē tu fuerza yō squícu vāha yó. Chi nájñuhun ndóho yó jéē jíto ndee jexeén yohó, suni súcuan ni ndoho ya jeē ní jito ndee un yá, vésú tú cuíti cuéchi ya. ¹⁶Núu súcuan te ma yūhu yó, chi na quívi yó yuhu mesa yā, cúu jeē cacān tahú yō. Chi maní yā jíin yó, te cúndáhú ni yā yohó, te siquí jeē vāha ni yā te chíndéé ñáhán yá yohó táca jínu jeē jíni ñhún yó.

5 Chi táca sūtū jeē ní cujéhnu jenahán, ni nacāji Yaā Dios de mēhñu ñayuu, te ni jeni ya de jeē cuñi de nuū yā jehē ñayuu, te socō de ndajñíñu jíin quití nuū yā jeē siquí cuéchi i. ²Te cuu cahán vitá de jíin ñayuu tu jécūhun ni jíin ñayuu castívi, chi máá de suni tú na fuerza ini de squícu vāha de. ³Jeē yúcuan cúu jeē suni cánuú sócō de quití nuū yā jeē siquí cuéchi máá de, nasūu máá-ni jeē siquí cuéchi ñayuu.

⁴Te ni iin tēe tu cúu sájéhnu de máá de jeē cuu de sutū cujéhnu, chi sa máá Yaā Dios cúu jeē nacāji ya de, nájñuhun ni nacāji ya Aarón nde jenahán. ⁵Te suni súcuan Cristo, tu ní sájéhnu ya maá yá jeē cuu ya sutū cujéhnu, chi sa Yaā Dios ni sáha, chi ni cahán yā jñuhun yáha:
 Máá ró cúu Sēhe ri,
 te vijna te ni sajeéhnu ri rohó jéē cúu ri Tatá ró.

⁶Te suni cáhán tucu ya nuū tútu ii:
 Níí cáni cúu ró sūtū,
 nájñuhun sutū Melquisedec jenahán.

⁷Te Cristo, ná ni condee ya ñayívi, te ni jicān tahú yā, te nde ni ndahyū yā te ni ndahyū cohó yá. Te ni cahán ndahú yá jíin Yaā

Dios, Yaā jeē cúu jnama ya jeē ma cúu yā nuú. Te siquī jeē yíñúhún ní chiñúhún yá Yaā Dios, te ni chindéé ñájnáhan Yaā Dios jíin yá nuú jñúndóho ún. ⁸Chi vésú Sēhe Yaā Dios cúu ya, te ni jendetū yā ni ndoho ya ini ñayīví, te súcuan ni jini yā ndese cúu jñuhun jéndetū. ⁹Te ná ni cuu ni squícu ndíhi ya jeē ní jendetū yā, te ni cucutú jñuhun jeē jnáma ya tāca ñayuu jéndetū nuú yā, te cotecu i ní cání. ¹⁰Chi ni jeni Yaā Dios yā jeē cúu ya sutū cujéhnu nájnūhun sutū Melquisedec.

Siquī jeē ma cáca yátá i

¹¹Te íyó cuéhē jñuhun jeē castūhun rí siquī tāca jéē yáha. Te yíí cúu jeē jécūhun ni rō sáha ri, siquī jeē tu cáconi rō chuhun ni rō. ¹²Te je ni cunahán cácañdeje ró, te jíni ñúhún jéē cúu ró tée stéén nuú. Te tuú chi sa cájini ñúhún tucu máá ró tée stéén nuú rō tāca jñuhun Yaā Dios jeē tú yíí cuítí. Chi sa ni canduu ró nájnūhun sūchi yíquín jéē jíni ñúhún caxin i, chi ná tu ije i caji i jeē ndáva. Súcuan cácuu ró chi ná tu ije ró jíin jñuhun yíí gá. ¹³Chi núu máni máá nájnūhun sūchi yíquín jéxin cácuu ró, núu súcuan te tu cúu jecūhun vāha ni rō jñuhun ndaā. ¹⁴Te ñayuu jeē jé ni ije, chi cáyeji i jeē ndáva, cúu jeē ní cutūhva vāha i te je cúu nácāji i jeē vāha jíin jéē neé.

6 Núu súcuan te na yáha yó núu tāca jñuhun Cristo jeē tú-ni yíí, te na quíhín yō nuú jñuhun yíí gá, návāha na íje vāha ni yō jíin jñuhun ya. Te ma ndejéé tucu yó jíin jñuhun jeē ni scuáha yó xíhna gā, suu jñuhun jeē nácani ni yō stóo

yo cuéchi yó jéē cúu yō sáha, jíin jéē candíje yó Yaā Dios, ²jíin siquī jeē jéndute, jíin siquī jeē soó ndaha xiní ñayuu, jíin siquī jeē nátecu ndíyi, jíin siquī jeē jnahnú ndetū ñayuu níí cání. ³Núu súcuan te na yáha yó núu tāca jéē yáha te quívi yó núu jñuhun yíí gá, te núu cuāha Yaā Dios jñuhun.

⁴Chi íyó ñayuu jeē jé ni jecūhun ni i, te je ni jini i tāca jéē jéhe Yaā Dios, te je ni quívi i nuú jñuhun stéén Espíritu Santo, ⁵te suni je ni jini i jñuhun vāha Yaā Dios jíin ndese coo poder yā tiempo quií. ⁶Te ñayuu un núu caca yátá i, te ma cúu ga ndejéé jeé i jeē nácani ni i. Chi jeē cáca yátá i cúu nájnūhun jeē nácagni tucu i Sēhe Yaā Dios jicā cruz, te cájéhe i jñuhun canu yā cájito ñayuu. ⁷Te ñayuu chi cácuu i nájnūhun ñuhun jeē cúun vāha saū nuú te ndóyo vāha. Te núu cánecoo jeē vāha caji tée cásájniñu, yūcuán na te cúsiñi ni Yaā Dios jíin. ⁸Te núu máni iñu yóquin jíin yucū sajnéñu cánecoo nuú, núu súcuan te tu jéjñíñu cuítí, te squéndōo ií yā, te iñ quiví te cayū. Súcuan jnahnū ndetū ñayuu cájica yátá.

Jeē ñúhun ni yō tāca jéē vāha jeē coo

⁹Te máá ró jijnáhan ró hermano, vésú cácahān rī súcuan jíin ró, te cácuacāhnu ni rī jeē cácuu ró ñayuu cuiñí ñihin, chi ñayuu ni jnama ya cácuu ró. ¹⁰Te Yaā ndaā cúu Yaā Dios, te tu náā ni yā jñíñu cásáha ró. Chi siquī jeē cáhiyo maní rō jíin yá te ni cacundáhú ni rō hermano rō cácañdeje, te ni cachindéé ñáhán ró i, te súcuan cásáha ró ndé vijn. ¹¹Te cáconi rí jeē niní súcuan sáha

ga ná ñin ná ñin ró ndé quiví sándihí, chi jeē sāha ró súcuan te nihin rō ndihí jeē cáñuhun ni rō. ¹²Te cácuni rī jeē ma cúhuun ni rō, chi sa ndacu ró ñáyuu cácandíje jeē jíin paciencia cándetu i, te jeē yúcuan nihin tahú i táca jéē ni jéjnūhun ya.

¹³Chi quiví jeē ni jéjnūhun Yaā Dios nuū Abraham, te ni ndacunehen ya maá yá jeē ni jéjnūhun téyí yá, chi tuá na inga ndacunehen ya jeē kujéhu ga vēsú maá yá jeē cuu testigo yā. ¹⁴Te ni cahān yā: Jendaá ndije jeē vāha ndasí sāha ri jíin ró, te sāha ri jeē nducuehē ndasí yúcūn rō, achí yá jíin Abraham. ¹⁵Te jíin paciencia ni condetu de, te súcuan te ni nihin de jeē ní jejnūhun ya. ¹⁶Te núu cáhān teyí ñáyuu, te ndácunehen i síhví ñin jeē kujéhu ga vēsú maá i. Te núu íyó ñin jnūhun jeē tu cácandíje jnāhan, te núu ñin tēe cáhān teyí de jíin síhví Yaā Dios, yūcuán na te jécuiñī jeē cátejnhān. ¹⁷Te suni súcuan Yaā Dios, chi ni jejnūhun téyí yá nuū ñáyuu jeē cuāha ya tahū i. Chi ni cuni yā jeē cucāhnu vāha ni i jeē ma nácani yátá ni yā siquī jeē ni jéjnūhun ya nuū i. ¹⁸Chi ma nácani yátá cuítī ni yā siquī jnūhun jeē ni cáhān yā uū jínu, ñin jeē ni jéjnūhun ya, te inga jeē ni cáhān teyí tucu ya siquī suni jnūhun ún. Chi tu stáhú cuítī yā. Te jeē yúcuan máá yó jeē ní tūhva yó yá, chi yōhyo íyó ndeyí ni yō, te cáñuhun teyí ni yō jeē squícu ya jeē ni cáhān yā. ¹⁹Te siquī jeē súcuan ñúhun ni yō, te suu sāha jeē quéndōo nihin ánuá yō jíin jnūhun ya, te quéndōo ndaā ni yō, nájnūhun quéndōo nihin

barco jeē jnī gancho yuū. Te sāha jeē cúu quiví yó andiví núu íf gā, nájnūhun cuarto íf gā jeē ni íyo ichi yátá sahna ni ndita caa ini vehe íf jenahán. ²⁰Te ini yūcuán chi xihna gā Jesús ni quiví, návāha nune ya ichi quívicoo yó. Te jeē yúcuan níf cáni cúu ya sutū kujéhu nájnūhun sutū Melquisedec.

Jeē cúu Jesús sutū nájnūhun Melquisedec

7 Te máá Melquisedec ni cuu de rey ñuu Salem, te ni cuu de sutū nuū Yaā Dios, Yaā kujéhu téyí. Te ni jejnahan de Abraham ná ni nandicó Abraham jeē ní cundeyí de ni cajejnahan de jíin táca rey. Te ni jicān tahú de jehē Abraham. ²Te táca úxi ndajñīnu jeē ní quende Abraham nuū táca rey un, ni jēhe de ñin ñin siquī un núu Melquisedec. Te síhví Melquisedec cuní cahān: rey jeē sāha jniñu ndaā. Te suni nání de rey Salem, te jnūhun Salem cuní cahān: jeē iyó ndeyí síf ni. Te jeē yúcuan suni nání de: rey jeē sāha jeē iyó ndeyí síf ni ñáyuu. ³Te tu cáhān tutu jnūhun tátá de ni náná de ni táca jíf de. Ni tu cáhān núu ni cacu de, ni núu ni jihí de. Chi cúu de nájnūhun Jesús, Sēhe Yaā Dios, chi níf cáni cúu de sutū.

⁴Te condēhe jíjnāhan ró náa jéhu ni cuu Melquisedec, chi jíf jéhu yó Abraham ni jēhe de ñin ñin siquī táca jéē uxí nuū de siquī táca jéē ní quende de nuū rey un. ⁵Te jíin yō jeē táca úxi ndajñīnu ni canihin ñáyuu, ni cajēhe i ñin ñin siquī un ní caquihin tēe cácuu sutū yucūn Leví, nájnūhun cáhān ley Moisés. Te ni caquihin de nuū

ñáyuu cácuu jnáhan de, chi iin-ni yucūn Abraham cácuu de jíin i. ⁶Te Melquisedec nasūu yúcūn Leví cúu de, te vēsú súcuan te ni quihin de iin iin siquī tāca jēē uxí nuū Abraham. Te suni ni jicān tahú de jehē Abraham, vēsú cúu Abraham tēe jeē ni jéjnūhun ya nuū. ⁷Te jíin vāha yó jēē tēe cújéhnu ga cúu jeē jicān tahú jehē tēe núu ga. ⁸Te ñayīvi yáha chi tāca sūtū cáquihin de iin iin siquī tāca jēē uxí nuū ñáyuu, vēsú cácuu te tēe cájihī. Te Melquisedec suni ni quihin de, te máá de chi cáhán tutu ii jeē técu de. ⁹Te suni cuu cahān yō jeē Leví, tēe jeē ní quihin iin iin siquī tāca jēē uxí nuū ñáyuu, suni nájnūhun nuū maá de ni quihin Melquisedec iin iin siquī tāca jēē uxí. Chi jeē ni jéhe Abraham nuū Melquisedec, suu cúu nájnūhun jeē suni ni jéhe de jeē siquí Leví jíin ndīhi ga yucūn de jeē quíji. ¹⁰Chi yucūn Abraham cúu Leví, te vēsú ná tu cacu de quivī jeē ni jéjnahan Melquisedec Abraham, te nájnūhun jeē ni jéhe máá de cúu jeē ni jéhe Abraham.

¹¹Te yucūn Leví ni cane sūtū Aarón jíin tāca gá sūtū ní quijicoo. Te ni castéén de ley yā nuū ñáyuu Israel jenahán. Te núu ní cúu sáha de jeē quendōo ndaā ñayuu jíin ley un núu, te tuá cánúu jeē núcuinī inga clase sūtū lugar Aarón jíin yúcūn de. Te inga clase sūtū cúu Cristo jeē cúu ya nájnūhun sūtū Melquisedec. ¹²Te núu nucuinī inga clase sūtū, te suni cánúu sáma ley siquī yucūn de. ¹³Núu súcuan te ni sáma ley un, chi cáhán tutu ii jeē Jítóho yō Jesús cúu inga clase sūtū ún, te ni cacu ya chíji inga yucūn.

Te yucūn ní quiji ya ún, tú ni iin ní cúu sūtū. ¹⁴Chi jíin vāha yó jēē chíji yucūn Judá ni cacu Jítóho yō. Te yucūn ún chi tu ní cáhán cuiti Moisés jeē cánecoo sūtū.

¹⁵Te cáji cúu jeē ní nucuinī Cristo jeē cúu ya inga clase sūtū nájnūhun sūtū Melquisedec. ¹⁶Te tu cúu ya sūtū jeē ní cacu chíji yucūn Leví nájnūhun cáhán ley jenahán. Chi cúu ya sūtū siquī jeē ndíso ya poder cotecu yā ní cáni te ma cúu cuiti yā. ¹⁷Chi súcuan ni cahān Yaā Dios jnūhun ya:

Ní cáni cúu ró sūtū,
nájnūhun sūtū Melquisedec.

¹⁸Núu súcuan te jniñu jeē ní ndacu ley jenahán siquī sūtū, chi ni naa vijna, chi tu ní níhín jniñu quendōo ní cáni. ¹⁹Chi ley Moisés tu ní sáha jeē quéndōo ndaā ñayuu. Te ni nihīn yō iin jnūhun vāha ga jeē ñūhun ni yō jeē ndáhva Cristo cuēchi yó, te súcuan ni cuyajni yó núu Yaā Dios.

²⁰Te jíin jēē ni cáhán teyí Yaā Dios te cúu Jesús sūtū. ²¹Chi tāca gá tēe ún, nasūu jíin jnūhun jeē ni cáhán teyí yá ní cúu de sūtū. Te Jesús chi ni cahān teyí Yaā Dios jeē cuu ya sūtū, chi súcuan cáhán tutu:

Ni cahān teyí máá Jítóho yō Yaā
Dios, te ma nácani yátá ni yā:
Ní cáni cúu ró sūtū,
nájnūhun sūtū Melquisedec.

Achí yá. ²²Núu súcuan te jíin Jesús ni cucutú iin contrato vāha ga vēsú ley jenahán. ²³Te tāca gá sūtū ún, chi ni iyo cuehē de, chi siquī jeē cájihī de te tu ní cúu cuiñi de ní cáni. ²⁴Te Jesús chi cúu ya sūtū jeē cuiñi ní cáni, chi técu yā ní cáni. ²⁵Jeē yúcuan ndíso jniñu ya jnama

ya ñayuu quíjicoo nuū Yaā Dios, cotecu i níí cáni. Chi níí cáni técu yā te cáhán yā jehē i jíin Yaā Dios.

²⁶Núu súcuan te vāha ndasí sutū cujéhnū cúu Jesús, jeē nájñūhun jíini ñúhún yó. Chi sutū ií cúu ya, te tú na cuēchi ya, te íyó ndoo ya, te tu cúu ya jnánhan ñayuu casáha cuēchi, te cújéhnū téyí yá nde nuū sucún gá andiví. ²⁷Te máá yá tu jíini ñúhún sáha ya nájñūhun ni casáha sutū cácujehnū jenahán, jeē ndiquiví ni casocō de quití siquī cuēchi máá de xihna gā, te sáá te siquī cuēchi ñayuu. Chi iin jíinu-ni ni socō yā maá yá jehē yō, te ni cuu-ni. ²⁸Chi ni jeni ley Moisés tāca sūtū cujéhnū jeē tú na fuerza squícu vāha. Yūcuán na te cuéé gá te ni cahán teyí Yaā Dios. Te jíin jéē ni cáhán teyí yá, te ni jeni ya Sēhe ya jeē cúu ya sutū cujéhnū, te sutū ndaā sutū vāha cúu ya níí cáni.

**Jeē ndíso jníñu Cristo
siquī iin contrato jeé**

8 Núu súcuan te jñūhun cánuú gá jeē jé ni cahán rī cúu yāhā: Névāha yó iin sutū cujéhnū nájñūhun ni cahán rī, te ndéé yá lado vāha mesa nuū ndácu jniñū máá Yaā cujéhnū nde andiví. ²Te vijna te cúu ya sutū nde andiví, jeē cúu ndije lugar ií jeē ni sáha máá Jítóho yō Yaā Dios, nasū ñáyuu. Chi tu cáa nájñūhun vehe ií jenahán jeē ní casáha ñayuu. ³Te tāca sūtū cujéhnū ni jeconaā de jeē socó de ndajníñu jíin quití nuū Yaā Dios. Núu súcuan te Jesucristo suni ni jini ñúhún jeē socó yā jeē cúu ya sutū. ⁴Te núu ní íyo ga yā ini ñayiví, te ni ma quijnáhan jeē cúu ya sutū

jíin táca gá sutū, chi níni cásocō gā de quití nájñūhun cáhán ley Moisés. ⁵Te jniñu casáha de, tu quijnáhan jíin jéē iyó andiví. Chi cúu iin muestra-ni jeē steén siquī andiví. Te cúu nájñūhun jeē ni cáhán Yaā Dios jíin Moisés quiví ní quejéé de sáha de vehe ií jenahán: Coto vāha ró jéé sáha ró táca ndajníñu nájñūhun jito jeē ni stéén rī nuū rō nde xiní yúcu, áhí Yaā Dios jíin de. ⁶Te vijna te sáha Cristo jniñu jéhnū ndasí gá vésú jeē casáha tāca sūtū ún, chi ndíso jniñu ya siquī contrato jeé jéé yóhyo vāha ga, chi ndíso jñūhun jéhnū ga jeē ni jéjñūhun Yaā Dios.

⁷Chi contrato ley xihna ñúhún, núu jeē ni sáha jeē queé vāha jniñu núu, te tuá cánuú jéé cóo contrato uū. ⁸Chi ñayuu jenahán un jéé tu ní cáquendōo ndaā, suhva ni cahán Yaā Dios jíin i, áhí tutu:

Quiji quiví jeē nasáha ri iin contrato jeé

jíin ñáyuu Israel jíin ñáyuu Judá, áhí Jítóho yō Yaā Dios.

⁹Te ma cóo nájñūhun contrato jeē ni sáha ri jíin jíi i jenahán, quiví jeē ní jniñi ri ndaha de jíjñáhan de, te ni quenehen ri de ini nación Egipto.

Chi tu ní cásquícu vāha de jíin contrato ley rī.

Jeē yúcuán tuá ni táñúhún rí de, áhí Yaā Dios.

¹⁰Núu súcuan te suhva coo contrato jeē nasáha ri jíin ñáyuu Israel, nde na quíji quiví yúcuán, áhí Jítóho yō Yaā Dios: Sáha ri jeē jécūhun ley rī nuū jeē níjnúní i,

te suni ini anuá i tee ri jnūhun
ley rī.

Te cuu ri Yaā Dios maá i,
te máá i cuu ñayuu maá rí.

¹¹ Te tuá jíni ñúhún stéén i nuū
jnáhan i nuū ñáni i,
návāha cuni i ndese Yaā cúu
Jitoho i.

Chi ndíhi i cuni ndese Yaā cúu
ri,
nde ñayuu núu ga jíin ndé
ñayuu cujéhu ga.

¹² Chi cone cáhnu ni rī nuū i jeē ní
casáha i jniñu néé,
te ni ma núcūhun ga ni rī
cuéchi ni casáha i.

Achí Yaā Dios. ¹³Te jeē ni cáhān yā
jeē cuáha ya ñin contrato jeé cúu
jeē ní cachi yā jeē tuá cuajníñu
contrato xihna ñúhún. Te ñin jeē ní
cutúhú jéé tuá jejníñu, chi jíni yō
jeē je yajni naa.

**Vehe iñ ñayívi yáha ní
steén ndese cáa andívi**

9 Te ndaā chi contrato xihna
ñúhún ní ndacu jniñu ndese
chiñúhún i ya, jíin ndese coo ñin
vehe iñ ini ñayívi yáha. ²Te ni
cuvāha vehe iñ ún, te ni iyo uū
cuarto. Te cuarto xihna ñúhún jéé
naní cuarto iñ, ni iñ candelero oro
jíin mesa oro jíin pan iñ. ³Te ni iyo
sahma jeē ndíta caa jeē ndihyú inga
cuarto jeē naní cuarto iñ ndasí gá.
⁴Te ini un ní iyo ñin altar oro nuū
cayú sūje cútú, jíin yéjnu jeē ñúhun
contrato ley, te máni oro cúu níí
síquī yejnu. Te ini yejnu un íne ñin
tijehēn oro jeē ñúhun maná jeē ní
cuun andívi. Te suni íne vara Aarón
jeē ní nane numa, jíin tabla yuū jeē
yosó jnúhun contrato ley. ⁵Te síquī

yejnu un ní cahiin ndindúú figura
ndajéhé querubín jeē steén jeē íne
Yaā Dios. Te ni sáha cuandahū síquī
tapa yejnu nuū ni cóso yuyú níñi
jeē ndáhva cuéchi. Te tu núne yó
cáhān gā yō síquī tāca yúcuan vijna.

⁶Te ná ni jínu tācá un, te núu-ni
núu-ni quívicoo sutū ini cuarto
xihna ñúhún jéé casáha de jniñu
jeē cúu de sutū. ⁷Te ini cuarto uū,
chi tu cúu quívicoo na-ni sutū jíin
inga ñayuu, chi máñúhún-ni sutū
cujéhu ga cúu jeē quívi, te suni
ñin-ni vuelta jeē cuiyá. Te suni
ma cúu quívi de núu tú níñi quiti
jeē socó de nuū Yaā Dios jeē síquī
cuéchi máá de jíin síquī cuéchi
ñayuu. ⁸Te jíin yúcuan stéén
Espíritu Santo nuū yō jeē ná ni iyo
ga cuarto iñ xihna ñúhún ini ñayívi,
te tu ní núne ichi jeē quívi ñayuu
ini lugar iñ ndasí jeē cúu andívi.

⁹Chi tāca yúcuan cúu jeē ni stéén
ndese cúu tiempo vijna. Chi jeē
ní casocō i ndajniñu jíin quiti nuū
Yaā Dios, chi tu ní cúu cuiti sáha
jeē quéndōo ndoo ánuá ñayuu ní
casocō ún. ¹⁰Chi tācá un ní steén
máni síquī yiqui cúñu yō, ndese caji
yō, ndese coho yó, ndese ndundoo
yó. Te ni jejniñu máá-ni nde ni quiji
Cristo jíin ñin modo vāha ga.

¹¹Chi vijna je ni quiji Cristo, te
cúu ya sutū cujéhu ga jeē ndíso
jniñu ya síquī tāca jéé vāha jeē ní
quiji vijna. Te cúu ya sutū ini lugar
iñ nde andívi jéé cujéhu ga te vāha
ga vésú cuarto iñ jenahán. Te nasūu
jéé ní casáha ñayuu cúu, chi nasūu
cuenta ñayívi yáha cúu. ¹²Te jeē ni
quívi ya ini lugar iñ ndasí gá nde
andívi, te nasūu jíin níñi ndixúhú
ni níñi becerro, chi jíin níñi máá

yá ni quívi ya, ni socō yā ñin jínu-ni jeē níf cáni. Te súcuan ni jnama ya yohó jeē cótecu yō níf cáni. ¹³Chi nde jenahán te niñi stíquī jíin níñi ndixúhú jíin yāa becerro jeē ni cáyū nuū altar, ni cacosō yuyú de siquī ñáyuu jeē tu íyó ndoo ánuá i, te súcuan ni ndundoo i nuū yā. ¹⁴Te núu ni nihín jníñu niñi tǎcá quití ún, te nagā ni cuu niñi maá Cristo. Chi Yaā ndoo cúu ya, te ni socō yā maá yá nuū Yaā Dios, ni sáha Espírítu jeē iyó níf cáni. Te niñi yā nácate ánuá yō nuū jníñu néé jeē cúu yō sáha. Te súcuan te cuu cuajníñu yó núu Yaā Dios, Yaā técu. ¹⁵Jeē yúcuan cúu jeē ndíso jníñu ya siquī ñin contrato jeé. Chi ní jihí yā, te súcuan ni quende yā cuēchi ni casáha ñayuu ná ni iyó i chíji contrato xíhna ñúhún. Te ñayuu jeē cána Yaā Dios i quívicoo i ndaha ya, nihín i tahú i jeē cóo níf cáni, nájñuhun ni jejnúhun ya. ¹⁶Chi cúu nájñuhun núu sáha ñin tēe acta jeē cahán siquī tahú, te nde na cúu de te níhín jníñu. ¹⁷Chi núu técu gā tēe ni sáha, te tu níhín jníñu. Te nde núu ni jihí de, te sáa te jéjníñu. ¹⁸Te suni súcuan contrato xíhna ñúhún, suni ni jini ñúhún cucutú jíin níñi quití níf jíhí. Te contrato jeé chi ni cucutú jíin níñi Cristo jeē ni jíhí yā. ¹⁹Chi ná ni cuu ni cachi Moisés tǎcá jniñu ndácu contrato ley un núu ndívii ñayuu, te ni quihin de niñi becerro jíin níñi ndixúhú jíin ndute, te jíin íxi cácuéhé jíin yúcū hisopo ni cosō yuyú de siquī libro ley jíin síquī ndívii ñayuu. ²⁰Te ni cahán de: Yáha cúu niñi jeē cúcutú contrato ley jeē níf sáha Yaā Dios

jíin yó, achí de. ²¹Te suni niñi un ní cosō yuyú de nde maá vehe ñi jíin táca ndajníñu ni cajejníñu de jeē cáchiñúhún de ya. ²²Te je yajni ndíhi ndajníñu, chí cahán ley un jeē jíini ñúhún ndundoo jíin níñi. Te núu ma cáti niñi te ma cóne cáhnu ni yā nuū cuéchi núu.

**Jeē ni sócō Cristo maá yá
jeē quénde yā cuēchi**

²³Núu súcuan te tǎcá ndajníñu un jéé cácuu muestra tǎca jéé iyó andíví, ni jini ñúhún ndundoo jíin níñi quití. Te tǎca máa jéé iyó andíví, chí ni jini ñúhún ndundoo jíin níñi Cristo jeē yóhoyo vāha ga. ²⁴Te Cristo chí tu ní quívi ya ini lugar ñi jeē ní casáha ñayuu, chí ñin muestra-ni ni cuu un jéé steén ndese íyó lugar ñi ndije nde andíví. Chí máa andíví ní quívi ya, te vijna íne ya nuū Yaā Dios jeē cahán yā jehé yō. ²⁵Te máa sūtū cujéhnu ga quívi de tǎca cuíyā ini cuarto ñi gā jeē socó de niñi quití. Te Cristo tu ní sócō yā maá yá cuehé jíinu, chí ñin jínu-ni. ²⁶Chi núu jeē súcuan te cánuú jéé cuehé jíinu ndoho ya nde ná ni jecōo ñayíví te nde vijna núu. Te tuú chí sa tiempo cuándíhi yáhá ni quenda ndíjin yā ñin jínu-ni jeē níf cáni, ni socō yā maá yá jeē ní quende yā cuēchi. ²⁷Te nájñuhun ni cundaá jeé cúu tǎca ñáyuu ñin jínu-ni, yūcuán na te sándaá Yaā Dios jniñu i, ²⁸suni súcuan Cristo ni jihí yā ñin jínu-ni jeē ni sócō yā maá yá jeē ní quende yā cuēchi cuehé ñayuu. Yūcuán na te ndíji ya ñinga jíinu, te nasūu jéé socó tucu ya maá yá jeē quénde yā cuēchi, chí sa suhva jeē jnáma ya ñayuu jeé cándetu i jeé ndíji ya.

10 Chi ley Moisés ni cuu iin muestra-ni tāca jéē váha jeē ní quiji jíin Cristo, iin jeē steén-ni ndese coo máá jéē váha. Jeē yúcuán tu cúu cuíti sáha ley un jéé quéndōo ndaā ñayuu jeē quíjicoo i nuū Yaā Dios jeē cásocō i quíti nuū cuiyá nuū cuiyá. ²Chi núu ní cúu sáha ley un jéé quéndōo ndaā i, te jecuiñī jeē cásocō i quíti núú. Chi núu ní cúu, te iin jínu-ni te je ni quendōo ndoo ánuá ñayuu cásocō ún, te ma yūhu gá anuá i jeē ni sáha i cuēchi núú. ³Te tuú chi jeē cásocō i quíti ún táca cuiyá, sa sáha jeē núcūhun ni i cuēchi i. ⁴Chi niñī stíquī jíin níñī ndixúhú, ma cúu cuíti quende cuēchi.

⁵Jeē yúcuán ná ni quiji Cristo ini ñayíví, te ni cahān yā jíin Yaā Dios: Jeē jéhu i quíti jíin jéé jéhe i ofrenda nuū ní, chi tu ní núnjahan ni ní.

Te ni sātūhva ní yiqui cúñu maá ná jeē socó na.

⁶Te tu ní cúsiñi ni ni jéé jéhu i quíti te sócō i ti jeē ndúndoo cuēchi i núú.

⁷Yūcuán na te ni cahān ná: Yáha véji ná jéé squícu ná jniñu jeē núnjahan ni ní, Tátā Yaā Dios. Chi súcuán je yósó jnúhun na núu tútu.

Achí Jesús. ⁸Xihna gā ni cahān yā jeē tu ní núnjahan ni Yaā Dios te tu ní cúsiñi ni yā jeē jéhu i quíti te jéhe i ofrenda, jíin jéé jéhu i ti te sócō i ti jeē ndúndoo cuēchi i núú, nájñūhun ndácu ley jenahán jniñu.

⁹Te ni cahān gā yā: Yáha véji ná jéé squícu ná jniñu jeē núnjahan ni ní, Tátā Yaā Dios. Te jeē ni cahān yā súcuán, te ni sáha ya jeē jecuiñī jeē

cásocō i quíti, chi ni socō yā maá yá. ¹⁰Te ni sáha Yaā Dios jeē iyó ndoo íyó íi yō nuū yā siquī jeē ni sáha Jesucristo jeē núnjahan ni Yaā Dios, suu jeē ni sócō yā yiqui cúñu yā iin jínu-ni jeē níí cáni.

¹¹Te tāca sūtū ún ndíquívī ni cahiin de ni cajejníñu de nuū yā, te cuehē jínu cájehni de suu quíti jeē socó socó de. Te tācá un chi ma cúu cuíti quende cuēchi. ¹²Te Cristo chi iin jínu-ni jeē níí cáni ni socō yā maá yá jeē siquī cuēchi yó. Te sáa te ni cucōo ya lado váha Yaā Dios nuū cujéhu ya. ¹³Te yūcuán ndétu ya vijna nde quiji quívī jeē quénde yā poder tāca jéé jíto uhū nuū yā. ¹⁴Chi jeē ni sócō yā maá yá iin jínu-ni, te ni sáha ya jeē níí cáni quendōo ndaā ñayuu ni sándoo ya.

¹⁵Te máá Espiritu Santo suni cáji cáhán yā siquī jnúhun yáha, chi xihna gā cahán yā:

¹⁶Suhva coo contrato jeē nasáha ri jíin i, nde na quíji quívī yúcuán, áchí Jítóho yō Yaā Dios: Sáha ri jeē jécūhun ley rī ini anuá i, te suni nuū jeē níjnūní i tee ri jnúhun ley rī.

¹⁷Yūcuán na te cáhán gā yā: Ma núcūhun cuíti gā ni rī tāca cuēchi jíin jniñu néé ní casáha i. Achí yá. ¹⁸Núu súcuán te núu je ni ine cáhnu ni yā nuū cuēchi yó, te tuá cánuú jéé socó gā yō jeē siquī cuēchi yó.

**Jeē ní nune ichi quívi
yó núu Yaā Dios**

¹⁹Jeē yúcuán hermano, ma iin jeē cáni ni yō, chi cuu quívi yó lugar

ii ndasí ndé nuū iyó Yaā Dios, siquī jeē ní jeti niñī Jesucristo. ²⁰Chi ni nune ya ñin ichi jée jée cótecu yō níf cáni sáha ya. Chi ná ni jihī yā te ni tahndē sahma ndíta caa jeē ndihyú lugar ii ndasí gá ini vehe ii. Te súcuan ni steén Yaā Dios jeē núne quívi yó lugar ii ndasí gá nuū iyó yá. ²¹Te Jesús cúu sutū cujéhnu ndasí jeē ndíto yóhó ñayuu cácuu sēhe Yaā Dios. ²²Núu súcuan te na quívicoo yó núū Yaā Dios, te na cóo ndije ndaā anuá yō, te na cándíje nihin yó jée iyó ndáā ndihī jnūhun ya. Chi jíin niñī Cristo ni ndundoo ánuá yō nuū tāca cuéchi ni casáha yó, nájnūhun ni ndundoo yó núū yā jeē ní jendute yó jíin ndute. ²³Te na cuñī nihin yó jíin jnūhun jeē cácahān yō jeē ñūhun ni yō jeē sáha ya jeē váha jíin yó. Te ma cáca yátá yó, chi vāha squícu máá Yaā Dios jeē ní jéjnūhun ya nuū yō. ²⁴Te na nácani ni yō ndese stíhvī jnáhan ni yō jeē cundáhú gá ni yō jnáhan yó, jíin jée sáha yó jniñu váha. ²⁵Te níni na ndútútú yó chiñúhún yó yā, te ma cúhuun ni yō nájnūhun casáha sava i, chi sa víhyá gā na stíhvī jnáhan ni yō, chi je cájini yō jeē cuácuyajni quívī ndíji ya.

²⁶Te núu je ni jecūhun ni yō te ni jetáhú yó jnūhun ndaā, te núu máni sáha sáha-ni yó cuéchi, núu súcuan te tuá na inga iyó jée cúu siquī cuéchi yó. ²⁷Chi sa quéndōo máni ga jnūhun xeēn siquī yō jeē quiji quívī juicio te quiji yáñuhūn xeēn jeē cayū ñayuu jeē cájito uhū i ya. ²⁸Ñayuu squéhichī ley Moisés, te núu uū chí únī ñayuu cahán cuéchi siquī i, te cuu nahín i, te tuá na jnūhun cúndáhú ni iyó. ²⁹Te

nagā ni cuu jeē ma ndóho xeēn gā ñayuu jeē squéhichī i máá Séhe Yaā Dios, chi nájnūhun jeē jeñú níhnu i siquī yā. Te sáha i jeē tu ndé jéjnūñu niñī yā jeē ní jeti siquī contrato jeē ndúndoo i nuū yā nuú. Te súcuan sáha ndevāha i nuū máá Espíritu Yaā Dios jeē sáha jeē váha yóhó. ³⁰Chi je jíin yō jeē ni cáhān máá yá: Máá rí sáha jeē ndutahū i siquī cuéchi i, máá rí cuāha castigo i, áchí Jítoho yō. Te suni cáhān: Máá Jítoho yō sándaā yā siquī cuéchi ñayuu yā. ³¹Núu súcuan te xeēn ndasí cúu jeē quívi ñayuu ini ndaha Yaā Dios, Yaā técu, jeē ndútahū i siquī cuéchi i.

³²Te na núcūhun ni rō ndese ni cuu ichi yátá, nde náa sá ní quejée ró caca ró jíin luz yā, te ni cajendeyí ni rō ni candoho ró tñjñi jnūndóho xeēn. ³³Chi sava ró ní cacahān neé i nuū rō te ni castóho i róhó ní cajito ñayuu. Te sava ga rō ni cajēhe ró jnūhun cuiñī ró jíin ñáyuu ni candoho súcuan. ³⁴Chi ni cacundáhú ni rō ñayuu ní cahiin vecāa jeē siquī yā, te ni cacusiñi ni rō vēsú ni caquende ñayuu ndajniñu ró. Chi ni casáha ró cuenta jeē ndé andíví cánevāha ró ñin tahū jeē váha ndasí gá jeē coo níf cáni. ³⁵Núu súcuan te ma siaā rō jnūhun jeē ní candíje ndije ró jée váha ni yā, chi cuehē ndasí táhū nihin rō siquī ún. ³⁶Chi cánuú jée cuándeyí ni rō návāha sáha ró jée nújñahan ni Yaā Dios, te nihin rō jeē ni jéjnūhun ya. ³⁷Chi cáhān tutu ii:

ñin núnúu-ni te ndee Yaā ndiji,
te ma cucuéé yá.

³⁸Te ñayuu jeē ní ndahva rí
cuéchi i, cotecu i jeē candíje i
jeē sáha ri jehē i.

Te núu na cáca yátá i, te ma cúsiñ ni rī jíin i.

Achí Yaā Dios. ³⁹Te yóhó tu cácuu yó jnáhan ñayuu cájica yátá jeē jnahnú ndetū i. Chi sa cácandíje yó jée nihín tahū yō cotecu anuá yō.

Siquī jñūhun cándíje

11 Te jeē candíje yó, suu cúu jeē cúndaā ndije ni yō jeē nihín yō tāca jée ñūhun ni yō, jíin jée jíiní vāha yó jée iyó ndije tāca jée tu cájito yó núu vijna. ²Te ñayuu jenahán chi ni jejnúhún yá i siquī jeē súcuu ni cacandíje nihin i.

³Siquī jeē candíje yó cúu jeē jécūhun ni yō jeē ni sáha Yaā Dios ñayīvi jíin jnúhun ni cahān-ni ya. Te jíin poder Yaā Dios jeē tu jíto yó núu, ni jecōo tāca jée jíto yó núu.

⁴Ni candíje Abel jeē sáha ya jehē de, te jeē yúcuu ní socō de jeē vāha ga nuū Yaā Dios vēsú Caín. Te jeē yúcuu ní jejnúhún yá jeē iyó ndáā de, chi ni jetáhú yá jeē ni sócō de quití nuū yā. Te vēsú ni jihī de, te cáhán gā ejemplo de jíin yó nde vijna, chi ni candíje ndaā de.

⁵Ni candíje Enoc jeē sáha ya jehē de, te jeē yúcuu ní naquihin ya de cuahān de andiví, te tu ní jíhí de. Te tu ní cánanihín ñayuu de, chi ni ndoñúhún-ni de ni sáha ya. Te áchí tutu jeē nde ná tu naquihin ya de te ni cusíi ni yā jíin táca jée ni sáha de.

⁶Te núu tu cándíje yó jée sáha ya jehē yō, te tú na modo cusíi ni Yaā Dios jíin yó. Chi ñayuu jeē cuní quívicoo ndaha ya, cánuu jée candíje ndaā i jeē iyó yá jíin jée cuáha ya tahū nuū ñayuu jeē nducú i candíje i ya.

⁷Te Noé ni candíje de jeē sáha Yaā Dios jehē de, ná ni castūhun yá nuū

de jeē coo jñúndóho jeē ná tu coto de jeē coo. Te jeē yúcuu ní jendetū de ni sáha de barco cáhnu jeē naní arca, návāha cácu de jíin ní vehe de. Te jeē súcuu ni candíje de, te ni cane cuēchi siquī ñayuu jeē tu ní cándíje i ya. Te ni ndahva yā cuēchi de siquī jeē ní candíje de jeē sáha ya jehē de.

⁸Te Abraham ni candíje de jeē sáha ya jehē de, te jeē yúcuu ní jetáhú de ná ni cahān yā jíin de jeē quihín de iin lugar nuū cuáha ya cuu tahū de. Te ni quenda de cuahān de, vēsú tu jíiní de ndé nuū quihín de. ⁹Ni candíje de jeē sáha ya jehē de, te jeē yúcuu ní condee tatú de nuū ñūhun jeē ni jéjñūhun ya jeē cuáha ya nuū de. Te ni condee de vehe ñi, te suni súcuu Isaac jíin Jacob, chi sēhe de ún suni inuú níhín tahū i jíin de jeē ni jéjñūhun ya. ¹⁰Chi ni ñūhun ni de condee de máá ñuu andiví jée iyó cutú cimientu, te máá Yaā Dios ni jequin yā ni sama ya ñuu ún.

¹¹Te suni ni candíje máá Sara jeē sáha ya jehē ña, te jeē yúcuu ní nihín ña fuerza jeē ní jecūhun sēhe ña. Chi nde ná ni yāha ndasí cuíyā ña, te ni cacu iin sēhe yí ña, chi ni candíje ña jeē squícu Yaā Dios jeē ni jéjñūhun ya. ¹²Te súcuu ni cuu jeē ní táhū cuehē ñayuu ni sáha iin-ni Abraham, vēsú je jéhnu ndasí de. Te yucūn de ni nducuehē ndasí, nájnūhun quími andiví, jíin ñíti yumar, jeē ma cúu cuití cahu yó.

¹³Te tāca tée cándíje un, ní cajihí de. Te vēsú tu ní cájito de jeē ni jéjñūhun ya, te ni cajini vāha de jeē cóo, te ni cacusíi ni de jeē cóto de inga tiempo. Te súcuu ni cacahān

de jeē ñáyuu ñuu jicá ñáyuu tatú cácuu de ini ñayĩvi yáha. ¹⁴Te tāca tēe jeē cahán súcuan, chi stéén cají de jeē nducú de ñin ñuu jeē cúu andiví núu cúu ñuu maá de. ¹⁵Chi núu jeē cánacani ni de siquĩ ñũũ nuũ ní quendacoo de, te íyó modo jeē nándicó cóo de te núu jeē cáculi de núu. ¹⁶Te tuú chi ni cacuu ndasí ni de coyūcú de inga ñuu váha ga jeē cúu ñuu andiví. Jeē yúcuan tu cúcanu Yaā Dios jeē naní yá Yaā Dios de jíjnáhan de, chi je ni sātúhva ya ñin ñuu nuũ cóyūcú de.

¹⁷Ni candíje Abraham jeē sáha ya jehē de, te jeē yúcuan ní jehēn de jíin Isaac jeē socó de i, ná ni jito ndee ya de. Te ni íyo tūhva de jeē socó de sēhe de un jéē mañúhún ni i nuũ de, vēsú ni nihin de jnūhun jeē ni jéjnūhun ya suhva siquĩ i: ¹⁸Isaac cúu tēe jeē squejéé rí yucūn rō quihin, achí jnūhun ni jejnūhun ya. ¹⁹Te ni sáha de cuenta jeē cúu nastécu Yaā Dios i. Te nájnūhun súcuan ni cuu, chi cuu cahān yō jeē nájnūhun ni jihí i te ni natecu i nuũ de, chi ni jesi-ni ya jeē ma cáhni de i.

²⁰Ni candíje Isaac jeē sáha ya jehē de, te jeē yúcuan ní cahān de jeē vāha tahū nihin sēhe de Jacob jíin Esaú tiempo quiji. ²¹Te suni súcuan ni candíje Jacob, te jeē yúcuan, náa je yajni cuu de te ni cahān de jeē vāha tahū nihin ndindúú sēhe yíí José. Te yítuu de vara de, ni chiñúhún de Yaā Dios. ²²Te suni súcuan ni candíje José, te jeē yúcuan, náa cuacuyajni cuu de, te ni cahān de jeē tāca yúcūn Israel, ñin quivĩ quendacoo i nación Egipto. Te ni ndacu de jniñu jeē chíndúji i yiquí de ñuu nuũ quívicoo i.

²³Te ná ni cacu Moisés, te tátá i náná i ni cacandíje de jeē sáha ya jehē de, te jeē yúcuan ní cacondito sáhi de i uní yoō. Chi ni cajito de jeē lúu cáa i, te tu ní cáyūhú de siquĩ acta jeē ni sáha rey jeē na cúu tāca súchi yíí. ²⁴Te suni súcuan ni candíje Moisés, te jeē yúcuan ná ni jehnu de te tuá ni jéhe de jnūhun cuu de sēhe ñahan cúu sēhe síhí rey Egipto. ²⁵Chi sa ni cuu ni de ndoho de jíin táca jnáhan de ñayuu Yaā Dios, nasūu jéē cusíi ni de jecu-ni tiempo jíin cuéchi. ²⁶Chi ni sáha de cuenta jeē núu cahān neé ñayuu siquĩ de jeē siquí Cristo, te yúcuan sáha jeē cucá ndasí gá de ndíhi jeē ndíso jnūhun Yaā Dios, vēsú jeē nihin de ndíhi ndajniñu cúca íyó nación Egipto. Chi ni ñuhun ni de jeē cuáha ya tahū de. ²⁷Te jeē súcuan ni candíje de, jeē yúcuan ní quenda de nación Egipto cuahān de. Te tu ní yúhú de jeē quití ni rey nuũ de. Chi ni ñin nihin de siquĩ jniñu sáha de, chi ni sáha de cuenta jeē je jito de nuũ Yaā jeē tu cúu coto yó núu vijna.

²⁸Te jeē súcuan ni candíje de, te jeē yúcuan ní cahān de jeē na cáhni ñayuu londe pascua. Te ni ndacu de jniñu jeē na cóso yuyú i niñĩ tĩ yehyí i, návāha núu na quíji ndajéhé jeē cáhni yā tāca sēhe nuú ñáyuu Egipto, te ma cáhni yā sēhe nuú ñáyuu Israel. ²⁹Te siquĩ jeē ní cacandíje ñayuu Israel jeē sáha ya jehē i, te ni cayāha-ni i mēhñu Mar Rojo, chi ni nune ya te ni natūu-ni ñuhun íchi. Te suni súcuan ni cacuni tēe Egipto yāha de núu, te ni nandihyū-ni ndute siquĩ de ni cajihí de.

³⁰Ni cacandíje soldado jeē sáha ya jehē de, te jeē yúcuan ní cotúú jeē ní condúú ndihyú ñuu Jericó, ná ni cajicó ndúú de uxā quivī.

³¹Te Rahab, vēsú ñahan tíjni ni ni cuu ña, te ni candíje ña jeē sáha ya jehē ña. Te ni chindéé ñáhán ña tēe Israel jeē ní quijicoo ni condéhé yuhu ndese íyó ñuu ña. Te jeē yúcuan tu ní jíhí ña jíin ñáyuu nihni ni ñuu ña ún.

³²¿Te ndé jnúhun ga cahān rī núu súcuan? Chi tuá na tiempo jeē nácani ga rī jnúhun Gedeón jíin Barac jíin Sansón jíin Jefté jíin David jíin Samuel jíin táca tēe ni canacani jnúhun ya nde jenahán.

³³Ni cacandíje de jeē sáha ya jehē de jíjnáhan de, te jeē yúcuan ní cacundeyí de ni canajni de táca ñuu náhnu, te vāha ni candacu de jniñu nuū, te ni chindéé ñáhán yá de nájnūhun ni jejnūhun ya. Te nuū sava de ni jesi Yaā Dios yuhu ndícaha jeē tu ní cáyeji tī de. ³⁴Te sava de tu ní cáyú de sáha ñuhūn jeē cayú xeēn. Te sava de ni cācu de jeē tu ní jíhí de jíin espada. Te sava de ni nanihīn ni de náa tuá fuerza de núú, te ndacuī teyí ní íyo de nuū guerra, te ni cacundeyí de siquī soldado táca ñuu jicá jéē jito uhū ún de. ³⁵Te sava ñahan ni natecu sēhe ña jeē ni jíhí i.

Te sava ga ñayuu chi sa suhva ni candoho xeēn i nde ni cajihī i. Te tu ní cájēhe i jnúhun jeē siaá i jnúhun ya te cācu i, chi ni catee ni i jeē natecu i coyūcu vāha ga i andiví.

³⁶Te sava ga i ni casácata ñayuu nuū i, te ni cacani ñayuu i, te nde ni caconuhnī cadena i ni cahiin i vecāa. ³⁷Te ni cajēhe yuū xinī i, te

ni cajehnde i jíin sierra, te ni cajito ndee i jíin jnúndóho, te ni cajehni i jíin espada. Ni cajica cuu i cháha chúcuan, te máá ñii lánchi máá ñii ndíxuhú ní cañuhun i. Ni candoho ndáhú i, ni cajito i jnúndóho, ni castóho ñayuu i. ³⁸Vāha ndasí ñáyuu ni cacuu i jeē tú cuiṭi ñayuu ñayivī súcuan, te vēsú súcuan te ni casáha ñayuu jeē ní cajica cuu i nuū ñúhun téhé jíin chíji yucu, ni cahiin i yaū cava jíin yáú ñuhun. ³⁹Te táca ñáyuu yáha, vēsú ni jejnūhún yá i jeē ní cacandíje nihni i jeē sáha ya jehē i, te tu ní cájito i nuū jeē ni jéjnūhun ya. ⁴⁰Chi ni sātūhva Yaā Dios iin jniñu vāha ga, te suu cúu jeē sáha Cristo jíin yó, návāha iin cáhnu-ni nihin yō tahū yō jíin i, te jeē yúcuan cúu jeē ná tu nihin i ndihī tahū i.

Jeē na cócunuū yō nuū maá iin-ni Jesús

12 Te íyó cuéhē ndasí ñáyuu un jéē ní cacandíje nihni i jeē sáha ya jehē i, te nájnūhun ni jicó ndúú i yóhó, cástéén gā i nuū yō nde vijna jeē suni súcuan na candíje yó. Núu súcuan te suni máá yó, na téjiyo yó táca jéē sajnéñu jíin cuéchi jeē ni cáan yó jíin. Te na cuándeyí ni yō cunu yó jíin carrera jeē ni jéhe ya jeē cunu yó. ²Te na cócunuū vāha yó Jesús, Yaā jeē ni scándíje yóhó te sáha ya jeē íje vāha yó jíin jnúhun ya nde jínu ije yó. Chi máá yá ni jendeyí ni yā ni ndoho ya jicā cruz. Te vēsú jnúhun canu cúu jeē súcuan cuu yā, te tu ní sáha ya cuenta. Chi ni ñuhun ni yā jeē sa cusii ndasí ni yā ná ni cuu ni ndoho ya. Yūcuán na te ni cucōo ya

lado váha mesa nuū ndácu Yaā Dios jniñu.

³Te na nácani ni rō ndese ni jendeyí ni yā ni ndoho ya jeē ni sáha ndevāha ñayuu iyó cuéchi jíin yá. Te súcuan te ma cuíta ró ni ma ndínuu ni rō jíin jnúndóho. ⁴Chi ni ná tu ndoho ró jéē ndé cuu rō jeē cánducú ndéyí ró snāā rō cuéchi.

⁵Te sanaa te je ni canaa ni rō jñuhun cáhán tutu iī, jeē stihví ni Yaā Dios rohó jéē cácuu ró séhe ya:

Séhē, ma quití ni rō jeē snahnú

Jitoho yō rohó,

te ni ma ndínuu ni rō núu cáhán yā nuū rō.

⁶Chi Jitoho yō snahnú yā ñayuu jeē maní yā jíin,

te jéhe ya castigo tāca jéē

náquihín ya cuu sēhe ya.

Achí tutu. ⁷Núu súcuan te na cuándeyí ni rō jeē snahnú Yaā Dios rohó, chí sáha ya jíin ró nájñuhun sáha tátá jíin séhe. Chí tú na sēhe íyó jéē tu snahnú tatá i. ⁸Te núu ma snahnú yā rohó, nájñuhun ndóho tāca séhe, núu súcuan te nájñuhun sēhe ndáhú cácuu ró, nasūu séhe ndije ya. ⁹Te tátá yō ñayívi yáha, suni ni snahnú de yóhó, te ni iyo yíñúhún yó jíin de. Te nagā ni cuu jeē ma cuándetū yō nuū maá Tátá yō andiví jeē snahnú yā yohó, te cotecu yō níí cáni. ¹⁰Te ndaā chí máá de ni casnáhnú de yóhó jecu-ni quiví, ndese ni cuu ni maá de. Te máá yá chí snahnú yā yohó iin modo jeē quéndōo vāha ga yō, návāha coo ndoo yó nájñuhun íyó ndoo máá yá. ¹¹Te ndaā chí tu cácusíi ni yō maá hora jeē ndóho yó castigo, chí sa cúcuíhyá ni yō. Te cúcuéé gá te cuni yō jeē ní quéndōo

ndaā yō te coo ndeyí síi ni yō jeē ni snahnú yā yohó.

Siquí ñayuu jeē casquéhichi i jñuhun cáhán Yaā Dios

¹²Núu súcuan te ma cóo ró nájñuhun tēe ni cuíta íi ndaha te quísi i xiní yití, chí sa ndacuí na sáha ró máá ró nuū jnúndóho. ¹³Te sáha ró ichi ndóo caca ndaā rō, návāha nduvāha róhó jéē tu fuerza ini, jeē cácuu ró nájñuhun tēe chácua jeē tu cúu caca vāha.

¹⁴Te na cóndihví ni rō jeē condee maní rō jíin táca ñayuu, jíin jéē cóo ndoo coo iī rō nuū yā. Chí ma cúu coto ni iin ñayuu nuū maá Jitoho yō te núu tu íyó ndoo i. ¹⁵Te coto má cáca yátá ni iin ró te scuíta ró jñuhun jeē sáha Yaā Dios jeē váha róhó, návāha tú cuu ró nájñuhun iin yucú uvuá jeē stívi te sáha daño jíin cuéhē ñayuu. ¹⁶Te ni iin ró ma cáca jnéni. Te ni ma cóo jéē ni rō nuū Yaā Dios, nájñuhun ni iyo Esaú. Chí máá iin cohō ndeyu ni jicān de nuū ñāni de, ni sama de jíin derecho de jeē cúu de sūchi núu, te súcuan ni xicó de derecho de. ¹⁷Te cájini rō jeē cucuéé gá te ni cuni de jeē na cáhán tátá de jeē váha tahū nihín de, te tu ní cúu, chí tuá ni tánúhún Yaā Dios de. Chí tu ní níhín jniñu jeē ní nacani ni de, vēsú ni nducú ndéyí de te nde ndahyú de.

¹⁸Te róhó jíjnáhan ró tu ní quíjicoo ró núu íyo cúu, nájñuhun iyo ni cuu máá yucu nuū ni jéhe ya ley yā nuū ñayuu Israel. Chí ni cane yáñuhún yucu Sinaí, te nee lúchi jnúú jito, te quée tachí xeén. ¹⁹Te ni jecu trompeta, te ni cahán Yaā Dios. Te ñayuu jeē ní cajini sōho jeē

cahán yā, ni cacahān ndahú i jeē ma cahán gā yā jíin i. ²⁰Chi tu ní cúndeyí i jíin jnúhun jeē ní ndacu ya jniñu nuū i, chi ni cahān yā: Vēsú iin quiti-ni núu quívi ti yucu yáha, jíni nñuhún cuu tī jíin yúu chí jíin lanza, achí yá. ²¹Te síquī jeē íyo ndasí cúu jeē cájito i ún, te ni cahān Moisés: Quísi i ruhū jeē yuhú rí, achí de.

²²Te vijna róhó jéē cácadíje, tu ní quíjicoo ró núu yúcu yúcuan. Chi sa suhva nuū maá yucu Sion jíin núu maá ñuu Yaā Dios, Yaā técu, ni quívicoo ró. Te ñuu un cúu Jerusalén jeē íyo andíví, nuū cáhíyo tútú cuéhē ndasí mil ndajéhé cáchiñuhún Yaā Dios. ²³Te ni quívicoo ró núu cáyūcu tútú ñayuu cácadíje jeē cácuu sēhe Yaā Dios, jeē íyo lista i andíví. Te ni quívicoo ró núu Yaā Dios, Yaā sándaā jniñu ndíhi ñayuu, jíin núu cáhíyo ánuá ñayuu vāha jeē jé ni squéndōo ndaā yā i. ²⁴Te suni nuū maá Jesús, Yaā ndíso jniñu síquī contrato jeē ní quívicoo ró. Te yahu ndasí gá jniñu sáha niñí yā jeē ni jéti jeē ndáhva cuēchi yó, nasūu níñí Abel jeē ni jíicān cuēchi.

²⁵Núu súcuan te coto má squéhichí rō jnúhun jeē cahán yā jíin ró jíinánhan ró. Chi ñayuu jeē tu ní cájetáhú ná ni cahān yā jíin i ñayívi yáha, tu ní cáccācu i. Te xeēn gā ndoho yóhó te núu ma cuatáhú yó nuū yā jeē cahán yā nde ichi ándíví núu súcuan. ²⁶Te nde saá ní quísi i ñayívi jéē ni cáhān yā. Te vijna chi cáhān yā: ĩn na jínu quísi rí ñayíví, te nasūu máá-ni ñayíví, chi suni tāca jéē ĩn andíví, achí yá. ²⁷Te jnúhun yáha jéē cahán, iin

na jínu, chi cúní cahān jeē téjiyo ya tāca jéē tu íyó cutú, suu jeē ní cuvāha, návāha na quéndōo jeē cóo cutú níí cáni. ²⁸Núu súcuan te cuāha Yaā Dios iin ñuu nuū yō jeē cóo cutú níí cáni. Te jeē yúcuan, na nácuatáhú yó nuū yā, te na chíñuhún yó yā, te na cóo yíñuhún yó, návāha cusíi ni yā jíin yó. ²⁹Chi Yaā Dios maá yó cúu nájnūhun iin ñuhūn jeē snāā ndíhi jeē neé.

Ndese sáha yó te cusíi ni Yaā Dios

13 Ma jécuiñí rō jíinánhan ró jéē cundáhú ni rō hermano rō cácadíje. ²Conahán ró jeē cánuú cuáha núu ró vehe nuū ñayuu cájica. Chi íyó jínu jeē súcuan ni cajēhe núu ñayuu vehe, te tu ní cájini i jeē nuū maá ndajéhé andíví ní cajēhe núu i vehe.

³Te conahán ró chindéé ñáhán ró ñayuu cáhiin vecāa, chi sáha ró cuenta jeē nájnūhun cáhiin cáhnu ró jíin i vecāa. Te suni nacani ni rō jehē jnánhan ró jéē cándoho i sáha ñayuu, chi núu súcuan coo jíin máá ró te suni ndoho ró.

⁴Coo yíñuhún ró síquī jnúhun quíjínhan ñayuu, te ma cosíquí ndéé jnánhan ró. Chi máá Yaā Dios sándaā yā cuēchi ñayuu tíjni ni jíin ñayuu casíquí ndéé jnánhan.

⁵Te ma ndíyo ni rō xūhún, chi na cóo síi ni rō jíin jéē cánevāha ró. Chi máá yá ni cahān: Ma siaá cuíti rí rohó, ni ma stóo cuíti rí rohó, achí yá. ⁶Núu súcuan te ma ĩn jeē cáni ni yō, chi cuu cahān yō:

Máá Jítóho rí chindéé ñáhán yá ruhū,
te ma yūhu rí núu na vé cúní ñayuu sáha i jíin rí.

Achi yō.

⁷Te na núcūhun ni rō tācá pastor rō, jeē ní castéén de jnūhun Yaā Dios nuū rō. Te sāha vāha ro cuenta ndese ni nihīn jníñu jeē ní casáha de, te na ndácu ró de jeē ní cacandíje de jeē sāha ya jehē de.

⁸Te Jesucristo chi iin-ni cáa ya ichi yátá jíin vijna jíin níí cáni.

⁹Núu súcuan te ma cuāha ró jnūhun candíje ró táca jnūhun jeē síin cáhán jeē tu quíjnáhan jíin jnūhun máá yá. Chi íyó váha jeē na íje ánuá yō sāha jnūhun jeē váha ni yā jíin yó. Te tu jíni nūhún yó jnūhun jeē tajnúni síquī jeē yéji yō, chi tu níhín jníñu cuítí jíin ñáyuu cáhiin jíin.

¹⁰Te máá yó chi cánevāha yó iin jeē ni sócō maá jéhē yō, cúu Cristo. Te tāca sūtū jeē cásocō gā de modo jeē cahán ley jenahán, tú na vé nihín de nuū yā jeē ni sócō yā maá yá. ¹¹Te sutū cujéhnu ga, ná ni socō de niñī tācá quití ini cuarto íi gā jeē síquī cuéchi, te yiqui cúñu tí ni cajehmu de ichi yátá ñuu. ¹²Te suni súcuan ni ndoho máá Jesús ichi yátá ñuu, návāha jíin níñī maá yá te sándoo ya ñayuu. ¹³Núu súcuan te ma cóo inuú gá ni yō jíin ñáyuu tu cacandíje, chi nájnūhun quihīn yō jíin yá ichi yátá ñuu, te na ndóho yó jíin yá jeē sácatá i. ¹⁴Chi ñayivī yáha tu íyó ñuu nuū coo yó níí cáni, chi sa cánducú yó máá ñuu nuū cóyūcu yó quivī quíji. ¹⁵Núu súcuan te jeē jíin Jesucristo te níni na cáhán yō jeē yóhoyo cújéhnu Yaā Dios, chi suu cúu nájnūhun iin jeē socō yō nuū yā, suu jeē nácuatáhú yó nuū yā. ¹⁶Te ma náá ni rō sāha vāha ró núu jnáhan ró, te cuāha ró

jeē cúmanī nuū i. Chi nájnūhun iin jeē cásocō rō nuū Yaā Dios cúu tāca jeē yáha, te cúsiī ni yā jíin.

¹⁷Te cuandije ró núu tēe cácuu pastor rō, te cuandetū rō nuū de. Chi cándito de róhó jeē quéndōo vāha ánuá rō, chi cájini de jeē cánuú nacuāha de cuenta nuū yā. Te condihvī ni rō sāha vāha ró, návāha cusī ni de síquī rō te ma cucuíhyá ni de síquī rō. Chi núu tu súcuan te ma cóo jeē váha jíin ró.

¹⁸Te cacán tahu rō jehē rī jijnáhan ri. Chi vāha íyó ni anuá rī jeē tú na cuēchi ri. Chi cáconi rī caca yíñhún rí jíin táca jniñu. ¹⁹Te suni cáhán ndahú rí jíin ró jeē cacán tahu ndasí ró jehē maá rí, návāha cuāha ya jnūhun jeē yachī gā cuajeē tucu ri nuū rō.

Bendición jíin saludo jeē sándihí

²⁰Te máá Yaā jeē jéhe jnūhun ndeyí sí ni nuū yō, ni nastécu yā Jitoho yō Jesucristo mēhñu ndíyī. Te Jesús cúu pastor cujéhnu jeē ndíto ñayuu cácuu nájnūhun lanchi ya. Chi jíin níñī yā ni sácutú yá contrato jeé yá jeē coo níí cáni. ²¹Te ñūhun ni rī jeē Yaā Dios na sāha ya jeē íje ni rō jijnáhan ró, návāha cuu sāha ró táca jniñu vāha ndese núnahan ni yā. Te ñūhun ni rī jeē jíin fuerza Jesucristo jeē ndeé yá ini yō, na sāha Yaā Dios jeē cuu yó ñáyuu cúsiī ni yā jíin. Te na cáhán yō jeē yóhoyo luu cújéhnu ya níí cáni. Amén.

²²Hermano jijnáhan ró, cáhán ndahú rí jíin ró jeē cone cáhnu ni rō jeē stihvī ni rī rohó jíin jecu-ni jnūhun ni tee rī nuū carta yáha.

²³Te cástūhun rí jeē hermano yō

Timoteo, je ni quenda de vecāa. Te nūu yachī quiji de yāhá, te cuajecoo ndindúú rí nuū rō coto jnāhan yó.

²⁴Te cahān rō jín táca tée cácuu pastor rō jín táca hermano cácaandíje jeē sándeýí ni de, áchí

rí. Te ñayuu Italia suni cácahān i jeē sándeýí ni rō.

²⁵Te ñúhun ni rī jeē na sáha ga Yaā Dios jeē váha róhó jínáhan ró. Súcuan na cóo. Amén.

CARTA JEE NI TEE SANTIAGO NUU ÑAYUU CACANDIJE

1 Máá rí cúu Santiago, mozo Yaā Dios jíin Jítóho yō Jesucristo. Te téé ri carta yáha cuájeē nuū rohó ñáyuu cacandíje jeē cácuu ró ndihúxí uū yucūn Israel, te ni cajitē núu ró níí ñáyíví. Sándeyí ni rō jijnáhan ró.

Yaā Dios sáha jeē jécūhun ni yō

2Ñání mání, na cúsiī ndasí ni rō jijnáhan ró núu quiji tijní tāca jnúndóho siquí rō. **3**Chi cájini rō jeē núu jító ndee jnúndóho róhó núu cacandíje vāha ró, te yūcuan sáha jeē cútūhva ró cuándeyí ni rō. **4**Te na cuándeyí ni rō nde ije vāha ró jíin, návāha cuu sáha ró ndíhi jniñu vāha, te ma cúmaní jeē squícu vāha ró núu yā.

5Te núu ndé iin ró cúmaní jecūhun ni rō caca ndíchí ró jíin jnúhun Yaā Dios, na cácan rō nuū yā, te sáha ya jeē jécūhun ni rō. Chi sáha ya ndíhi jeē cájicān ñayuu, te tu cúxeēn yā nuū i jeē jicán i. **6**Te jeē jicán rō, te cánuú candíje ró jéé sáha ya jeē jicán rō, te ma cáni siquí ni rō. Chi ñayuu jéni siquí ni, cúu i nájñuhun ndute mar jeē ndóna jísó cóyo cuahān cháha chúcuan sáha tachí. **7**Ñayuu ún ma cáni ni i

jeē sáha Jítóho yō jeē jicán i. **8**Chi ñayuu jeē jéni iin jéni uū ni, chi mání násāma ni i jíin táca jniñu cásáha i.

9Tācá hermano ndahú, na cúsiī ni de jeē sáha Yaā Dios jeē cujéhnu de. **10**Te hermano cucá, na cúsiī ni de núu ni ndundáhú de. Chi tāca téé cucá, yachí naa jeē cucá de, nájñuhun náa ita yucū. **11**Chi núu ni cane niāndii te cújihní, te íchí-ni yucū, te cóyo-ni ita, te náā-ni jeē lúu cáa. Te suni súcuan ndoho tāca téé cucá níni sá jícu de jíin jniñu de.

Siquí jeē jító ndee jnúndóho yóhó

12Yōhyo ndetū tēe jeē jéndeýí ni de núu jító ndee jnúndóho de. Chi núu je ni cundeyí de jíin, te nihin de premio jeē cujéhnu de cotecu de níí cáni. Chi súcuan ni jeññuhun Yaā Dios jeē cuáha ya nuū ñáyuu jeē maní jíin yá. **13**Núu iin ñayuu jicán ini i jeē sáha i cuēchi, te ma cáni ni i jeē nuū Yaā Dios vēji jeē jicán sáha i cuēchi. Chi ni iin ma cúu cuiti sáha jeē quívi Yaā Dios cuēchi, te ni máá yá tu squívi ya ni iin ñayuu nuū cuēchi. **14**Chi sa suhva jeē ndíyo néé ni maá i, suu sáha jeē jicán ini i sáha i cuēchi,

te scánda ini i chi stáhú un i. ¹⁵Te jeē ndíyo néé ni i, yūcuan quéjéé cuéchi. Te cuēchi ún, núu je ni cunihin, te sáha jeē jnahnú ndetū ñayuu. ¹⁶Núu súcuan te ma stívi ró cani ni rō jijnáhan ró, ñánī mánī.

¹⁷Tāca jéé cútahū yō jeē váha jeē lúu íyó, chi vēji nde andiví núu maá Yaā Dios, Yaā ni sáha tāca jéē ndíndēe iin andiví. Te máá yá tu násama cuítī ini yā nájñuhun násama nduva jíin cuándahū. ¹⁸Te ni sáha ya jeē cótecu yō níí cáni, chi ni candíje yó jnúhun ndaā yā. Te ni nduu yó nájñuhun sēhe nuú yá nuū tāca gá sēhe ya jeē quíji, chi súcuan ni nujnahán ni yā sáha ya.

Siquí ndese chiñúhún ndaā yō yā

¹⁹Núu súcuan te tāca róhó ñánī mánī, ñama na chúsóhó ró jñuhun ya, te sa suhva ma cahán yachī rō, ni ma quití yachī ni rō. ²⁰Chi ñayuu cáquitī ni, tu sáha i jniñu ndaā jeē cuní Yaā Dios. ²¹Núu súcuan te na siáá rō tācá jniñu jnéhén jíin jniñu néé jéē ni cáyā jíin ró. Te na cóo vitá ni rō te cuatáhú ró jñuhun ya jeē ni quívi ini anuá rō. Chi jñuhun un ndíso poder jeē cācu ánuá rō.

²²Te na squícu ró jéē steén jñuhun ún, te nasūu máá jéē cúni sōho ró súcuan-ni, chi núu súcuan te cástáhú ró maá ró, chi tu níhín jniñu núu tu squícu ró. ²³Chi tēe jeē jíni sōho de jñuhun ya súcuan-ni, te tu squícu de, cúu de nájñuhun iin tēe jeē jíto de nuū espejo ndese cáa nuū de. ²⁴Te jíto vāha de nuū de, te cuahān-ni de, te nāá ni de ndese cáa nuū de. ²⁵Te núu iin tēe tu nāá ni de jñuhun jíni sōho de, chi sa suhva chúhun vāha ni de jeē cahán

maá ley ndaā Jesús jeē ni sáha libre yohó, te núu cuiñi nihin de jíin, te squícu de jeē ndácu, yūcuán na te quéndōo ndetū de jíin jniñu váha jeē sáha de.

²⁶Te núu ndé iin ró jéni ni rō jeē chiñúhún váha ró Yaā Dios, te núu tu ndíto ró yáá ró, núu súcuan te stáhú ró maá ró, te tu ndé jéjñiñu jeē chiñúhún ró yā. ²⁷Ñayuu jeē chiñúhún ndoo chíñúhún ndáa i máá Tátá yō Yaā Dios, chi jniñu yáha sáha i: Chíndéé ñáhán i sūchi ní caquendōo ndáhú jíin ñahan ní caquendōo ndáhú, núu na-ni jñundóho íyó. Te tu sájnéhén i ánuá i jíin jniñu néé íyó ñáyiví.

Ma cúhichī ni yō coto yó ñayuu ndahú

2 Ñánī mánī, cácadíje ró Jítoho yō Jesucristo jeē cujéhnu luu ya. Núu súcuan te ma sáha ró cuenta ndese cúu iin iin ñayuu, chi inuú sáha ró jíin ndíhi i. ²Chi íyó jínu quívi iin tēe ini vehe nuū cándutútú ró, te yíhi xehyu oro ndaha de, te ñúhun de sahma váha. Te suni íyó jínu quívi iin tēe ndáhú, te ñúhun de sahma tahndé. ³Te tú vāha núu sáha yáñúhún ró jíin tēe ñúhun sahma váha, te cahán rō jíin de: Cucōo ní lugar váha yāhá. Te cahán rō jíin tēe ndáhú: Yūcuán cuiñi ní, chí yáha cucōo ní nuū ñúhun, achi rō. ⁴Chi núu cásáha ró súcuan, te tu jéni vāha ni rō siquí jnáhan ró, chi síin sáha ró jíin tēe cúcá jíin tēe ndáhú.

⁵Ñánī mánī, chusóhó ró jñuhun cáhán rī: Yaā Dios ni nacáji ya ñayuu ndahú ini ñáyiví yáha jéé cóo cúcá i jíin jnúhun cácadíje i

ya, te nihīn i tahū i űnuu nuū ndácu ya jniñu. Chi ni jejnūhun ya cuāha ya un núu ñáyuu jeē maní jíin yá. ⁶Te máá ró chi sa suhva cájēhe ró jnúhun canu ñayuu ndahú. ¿Te á násūu tēe cúcá cúu jeē castáhú róhó síquī jeē nihín de xūhun ró, te yachi jéquin de cuēchi síquī rō nuū tohó? ⁷Te suni cácahān neé de síquī Cristo, te suu síhví máá yá cúu jeē cánamí ró cristiano.

⁸Vāha cásáha ró te núu cásquīcu ndije ró máá jnúhun jéhnú ga jeē cahán ley, nájñūhun yósó núu tútu ii: Cundáhú ni rō jnáhan ró nájñūhun cundáhú ni rō maá ró, achí. ⁹Te núu síin sáha ró jíin ñáyuu cucá jíin ñáyuu ndahú, núu súcuan te cuēchi cásáha ró, te jécondee cuēchi síquī rō jeē stívi ró ley Yaā Dios. ¹⁰Chi núu iin ñayuu stívi i iin-ni jniñu ndácu ley, te vēsú na squīcu i ndihī ga, te nájñūhun ni stívi i ndihī ley, te ndihī un jécondee cuēchi síquī i. ¹¹Chi Yaā jeē ni cáhān jeē ma cósíquí ndēē jnáhan ró, suni ni cahān yā jeē ma cáhni rō ndīyī. Te vēsú tu ní cásíquí ndēē jnáhan ró, te núu ni jehni rō ndīyī, núu súcuan te je ni stívi ndihī ró ley. ¹²Te tāca jēē cahán rō jíin jēē sáha ró, chi sáha ró cuenta jeē sándaā yā ndihī un jíin máá ley Jesús jeē ni sáha libre rohó. ¹³Chi quívī sándaā yā jniñu, te ñayuu jeē tu ní cundáhú ni jnáhan, suni ma nihín i jñūhun cundáhú ni. Te ñayuu ni cundáhú ni jnáhan, cusīi ni i jeē ní ndahva yā cuēchi i máá quívī sándaā yā jniñu.

**Tu jéjníñu jeē candíje yó
núu tu squīcu yó**

¹⁴Ñānī mánī, núu cáhān iin tēe jeē candíje de jeē sáha ya jehē de,

te núu tu sáha de jniñu váha, ¿te ndé jéjníñu jeē candíje de ún? ¿A cuu cācu ánuá de jíin jēē cahán-ni de jeē candíje de, te núu tu sáha de jniñu váha? ¹⁵Te núu iin hermano yō chí hermana yō, cúmanī sahma i jíin jēē cáji i tāca quívī, ¹⁶te núu iin ró cáhān jíin i: Cuandeyí ni rō, te cusúcún váha ró te caji vāha rō, achi rō jíin i, te núu tu ní jēhe ro jēē jíni ñūhún i cotecu i, ¿te ndé jéjníñu jeē cahán rō súcuan? ¹⁷Te suni súcuan cúu jeē núu áchí ró jeē candíje ró jeē sáha ya jehē rō, te núu tu sáha ró jniñu váha, núu súcuan te tu ndé jéjníñu cuiti jeē cahán-ni ró jēē candíje rō.

¹⁸Te sanaa te cahān iin ñayuu: Róhó chi cándíje ró jēē sáha ya jehē rō, te ruhū chi sáha ri jniñu váha. ¿Na jíin stéén rō jeē candíje ró jeē sáha ya jehē rō, te núu tú na jniñu váha sáha ró? Te ruhū chi sáha ri jniñu váha te súcuan stéén rī jeē candíje ri jeē sáha ya jehē rī. ¹⁹Ndaā chi cándíje ró jeē iyó iin-ni Yaā Dios. Te va íyó váha núu súcuan. Te tachī chi suni súcuan cácandíje, te cáquisi i jeē cáyūhú, chi tu cásáha jniñu váha. ²⁰¿Te naun tu jécūhun ni rō? ¿A tu jíin rō jeē núu tu sáha ró jniñu váha, te tu ndé jéjníñu cuiti jeē cahán rō jeē candíje ró? ²¹Te jíi yō Abraham, ni ndahva yā cuēchi de síquī jeē ni sáha de jniñu váha. Chi ni jetáhú de jeē ni cáhān yā jeē cahni de sēhe de Isaac socō de i nuū altar. ²²Te jécūhun ni rō jeē síquī jeē ní candíje de jeē sáha ya jeē ni jéjñūhun ya nuū de, jeē yúcuan ní jetáhú de jeē ni cáhān yā jeē socó de sēhe de. Te jeē ní jetáhú de, suu

ni steén jeē candíje ndije de jeē sáha ya jeē ni jéjnūhun ya nuū de. ²³Te súcuan ni cundaā jnūhun cáhán tutu ii: Abraham ni candíje de jeē ni jéjnūhun ya nuū de, te jeē yúcuan ní ndahva yā cuēchi de, áchí tutu. Te ni conaní de amigo Yaā Dios.

²⁴Núu súcuan te je ni cajini rō jeē ndáhva Yaā Dios cuēchi ñayuu jeē casáha i jniñu váha siquī jeē cácandíje i jeē sáha ya jehē i, te nasūu máá jéē cahán-ni i jeē candíje i. ²⁵Te suni súcuan Rahab, vēsú ñahan tǎjni ni ni cuu ña xihna gā, te ni ndahva yā cuēchi ña siquī jeē ni sáha ña jniñu váha. Chi ni jēhe núu ña vehe nuū tāca mozo ni tají Josué, te ni chuhichí ña de inga ichi, návāha cācu de nuū tēe cánducú cahni de. Te jeē yúcuan ní ndahva Yaā Dios cuēchi ña.

²⁶Te iin ñayuu núu tuá anuá i nuū yiqui cúnu i, te ndíyi cúu i. Te suni súcuan núu cándíje yó jeē sáha ya jehē yō, te núu tu sáha yó jniñu váha, te nájnūhun ndíyi cúu yó.

Jnūhun siquī yaá yó

3 Ñání mání, ma cáni ni cuehē rō cuu ró maestro steén jnūhun ya. Chi cajini rō jeē yóhó jéē steén jnūhun, cuehē gā cuēchi ndenehen ya siquī yō. ²Chi ndíhi yó stívi cuehē jniñu. Te núu iin tēe cuu condito de yáá de jeē ma stívi de jíin ni iin jeē cahán de, núu súcuan te yōhyo váha tēe cúu de, te suni cuu condito de níí gá de jeē ma stívi de. ³Chi cúu nájnūhun jeē chíhi yó freno yuhu caballo, te súcuan snáhnú yō níí tí jeē quihín tǎ jíin yó ndé nuū cuní yō. ⁴Te suni

súcuan tāca barco, vēsú náhnu ndasí, te vēsú nihin chúndahá táchī, te jíin iin timón lulí-ni te cuu scuícō tēe scáca, te quihín de jíin ndé nuū cuní de. ⁵Te suni súcuan cúu yáá yó, chi vēsú lulí-ni, te cuehē teyí sáha yó jíin. Te suni jíiní yō jeē iin ñuhūn lulí cuu jniñi jeē cayú iin yucu cáhnu ndasí. ⁶Te suni súcuan yáá yó, chi sáha nájnūhun iin ñuhūn, chi scuíquín cuehē teyí jniñu néé. Te yáá yó cúu iin parte lulí yiqui cúnu yō, te sáha jeē quívi níí yó cuēchi. Te infierno cúu jeē scuíquín jnūhun néé jíin yáá yó, te yáá yó scuíquín cuehē jniñu néé níí tiempo jeē iyó yó ini ñayívi. ⁷Te ñayuu chi cuu snáhnú i tācá quití jíin saa jíin cóō jíin quití ñúhun nuū mar, te je ni snáhnú i cuehē tǎ. ⁸Te ni iin ñayuu ma cúu condito i yáá i. Chi iin jeē neé jéē ma cúu condito i cúu. Te nájnūhun yuhu cóó jeē ñúhun chítú veneno jeē jéhni, súcuan cúu yáá yó. ⁹Jíin yáá yó chiñúhún yó Tatá yō Yaā Dios, te suni jíin yáá yó cahán ndevāha yo síquī ñayuu jeē ni sáha ya ánuá i nájnūhun íyó máá yá. ¹⁰Iin-ni yuhu cáne jnūhun chíñúhún yó yá jíin jnūhun cáhán ndevāha yó. Ñání mání, tu íyó váha cuítí jeē súcuan. ¹¹¿A iin-ni tesōcō cáne ndute váha jíin ndute úvuá, chí naún? ¹²Ñání mání, ¿á cuu cuun ndehē oliva xiní yújnu higo, te á cuu cuun ndehē higo xiní yoyúcú uva, chí naún? Te suni súcuan iin tesōcō ma cúu cane ndute úhvuá jíin ndute váha.

Jnūhun ndíchí jéē véji nuū Yaā Dios

¹³Te núu ndé iin ró ndíchí te jécūhun váha ni, núu súcuan te

jíin jéé jíca ndaā rō steén rō jeē súcuan cúu ró. Te na cóo suchí ni rō modo jeē jéhe jnūhun ndíchí yá. ¹⁴Te núu cácuésún teyí ni rō te ndúcú ró jéé cujéhnu máá ró, núu súcuan te ma cutéyí ró cani ni rō jeē ndíchí ró. Chi suu cúu jeē stahú ró, te cúu ró contra siquī jnūhun ndaā. ¹⁵Chi ñayuu cándāa súcuan, nasūu núu Yaā Dios vēji jeē ndíchí i. Chi cuenta ñayīví, jíin cuenta anuá neé ñayuu, jíin cuenta maá jéxeén cúu. ¹⁶Chi nuū iyó ñayuu cucuésún ni jíin ñayuu nducú jéé cujéhnu máá, suni yūcuan íyó jnūhun sáca núu jíin táca jniñu neé. ¹⁷Te jnūhun ndíchí jeē vēji nuū Yaā Dios, núu ni sáha jeē ní ndundíchí ñayuu, yūcuán na te íyó ndoo ánuá i. Te suni yúcu manī i jíin jnáhan i, te vítá ni i, te tú niñni ni i. Te cúndáhú ni i jnáhan i, te sáha i jniñu váha. Te suni íyó ndáā i, te tu stáhú i. ¹⁸Te ñayuu cáyūcu manī jíin jnáhan, jíin jnūhun manī casáha i tācá jniñu ndaā, te nanihīn i jeē quéndōo ndaā i.

Jeē ma cutóo ni yō jeē iyó ini ñayīví

4 ¿Te ndese quéjéé jéé cájejnáhan ró jíin jéé cátejnáhan ró? Quéjéé síquī jeē cándiyo neé ni rō, te yōhyo scánda ini anuá rō. ²Chi cándiyo ni rō, te tu cáneváha ró, te suu sáha jeē cájehni rō ndīyí. Cándiyo ni rō jeē névāha jnáhan ró, te tu níhín rō, te suu sáha jeē cátejnáhan ró te cájejnáhan ró. Te tu cánihīn rō jeē cuní rō, chi tu cájicān rō nuū Yaā Dios. ³Te núu cájicān rō, te tu cánihīn rō, chi tu cájicān váha ró, chi manī jeē cusīi ni máá ró cúu jeē

cájicān rō nuū yā. ⁴Ñayuu castóo Yaā Dios cácuu ró. ¿A tu cájini rō jeē núu cutóo ni rō jeē iyó ini ñayīví, yūcuan cúu jeē cájito uhū rō Yaā Dios? Chi ñayuu jeē cutóo ni jeē iyó ñayīví, ndúu i ñayuu jíto uhū nuū Yaā Dios. ⁵Te tu cáhán saá-ni jnūhun yáha jéé yosó núu tútu ii: Máá Espíritu jeē ni jéhe Yaā Dios jeē ndeé ini yō, cúcuñí ni yā jeē súcuan casáha yó, chi manī yā jíin yó, achí. ⁶Te jeē váha ni Yaā Dios, te jéhe ya fuerza ini yō jeē ma sáha yó súcuan. Chi cáhán tutu ii: Yaā Dios jési yā nuū ñayuu casáha téyí máá, te váha ni yā chindéé ñáhán yá ñayuu casáha suchí máá, achí. ⁷Núu súcuan te cuandetū rō nuū Yaā Dios. Te cuiñi níhin ró jéé ma cuátáhú ró jéxeén, te cunu coto róhó jíjnáhan ró. ⁸Manī gā coo ró jíin Yaā Dios, te víhyá gā steén yā jeē manī yā jíin ró. Róhó jéé casáha cuēchi, na sándoo ró máá ró, stóo ró cuēchi. Te róhó jéé cácuuni rō coo manī rō jíin Yaā Dios níni jéé cácuuni rō cutóo ni rō jeē iyó ini ñayīví, na sándoo ró ánuá rō jeē tuá coo ró súcuan. ⁹Na jnáhuhū ni rō, te cucuíhyá ni rō, te na ndáhyú rō siquī jeē iyó cuēchi ró. Te vēsú ni cajecū rō, te vijna na ndáhyú cohó ró. Te vēsú ni cacusiī ni rō, te vijna na ndúcuihyá ni rō. ¹⁰Na sásuchí ró máá ró nuū Yaā Dios, te sájéhnu ya rohó.

**Ma cóndihvī ni yō siquī
cuēchi jnáhan yó**

¹¹Hermano jijnáhan ró, ma cahán neé ró siquī jnáhan ró. Chi tēe jeē cahán neé siquī jnáhan, chí jéé ndihví ni siquī cuēchi jnáhan,

nájnūhun jeē siquí ley yā cahán neé de, chi tu squícu de ley jeē cundáhú ni yō jnáhan yó, te nájnūhun cáhán de jeē tu íyó ndáa ley yā. Te núu cáhán rō jeē tu íyó ndáa ley yā, núu súcuan te nasūu jée squícu rō, chi sa jeē cahán rō siquí. ¹²Iyó ñin-ni Yaā jeē ni jéhe ley, te máá-ni ya cúu jeē sándaā siquí cuéchi. Te jnama ya ñayuu cácanđije te snáhnū ndetū yā ñayuu tu cácanđije. Núu súcuan źte na jniñu ndiso rō jée sándaā rō siquí jnáhan rō?

Tú vāha jeē satéyí yó maá yó

¹³Vijna te cáhán rī jíin róhó jée cácahān: Vijna chí sājnē te quihīn yō ñuu yúcuan, te coyūcu yó ñin cuiyā, te cuaan yó xíco yó, te nihīn yō siquí, achí rō. ¹⁴Te tu jíiní cuítī rō ndese coo sajnē. ¿Chi na vé va víhí cúu vida rō? Cúu nájnūhun ñin vicō nūhún jée ñin núnúu-ni núcūhun, te yūcuán na te ndéchi-ni cuahān. ¹⁵Chi sa vāha ga na cáhán rō: Núu cúní maá Jítoho yō te cotecu yō te sáha yó jée yáha chí jée yúcuan, achi rō. ¹⁶Te sa suhva máni cácutéyí ni rō cácahān rō. Te tú vāha jeē súcuan cácutéyí ni rō. ¹⁷Te núu ñin ñayuu jíiní i sáha i jniñu vāha, te núu tu sáha i, te cuéchi cúu núu súcuan.

Jnūhun cáhán nuū tēe cúcá

5 Te cáhán rī jíin táca róhó tēe cúcá, jée na ndáhyú rō te ndahyū cohó rō siquí jnūndóho jeē quíji nuū rō. ²Chi ndajníñu cúcá cánevāha rō, je téhyú. Te sahma vāha rō, je tēe tiquíxin. ³Te oro jíin plata cánevāha rō, chi je cáne xehyu. Te xehyu un stéén jeē ní

casáha rō jniñu stáhú jíin xúhun rō. Te yūcuan cúu jeē ndúnihin cuéchi siquí rō, nájnūhun ñin ñuhūn jeē snáa yiquí cúñu rō. Chi ni cacaya cuehē rō ndajníñu vāha quiví cuándihí yáha. ⁴Te táca tēe ni cajehnde trigo rō, tu ní cáchunaa vāha rō yáhu de. Te vijna cácana jee de nuū Yaā Dios, Yaā cúu Jítoho nuū táca ndajéhé andiví, jeē súcuan ni casáha rō. Te jíiní sōho ya jeē cácana jee tēe ni cajehnde ún. ⁵Cátecu vāha ndasí rō ini ñayiví yáha, te casáha rō táca jée cácusí ni maá rō. Te cájito yúcún rō maá rō, te cúu rō nájnūhun quítī neñu jeē ndétu quiví cúu. ⁶Te ni catee rō cuéchi siquí ñáyuu ndaā, te nde ni cajehni rō i. Te tu ní cúu casi i jeē casáha rō.

Jeē na cóo paciencia ni yō te cacān tahú yō

⁷Hermano, núu súcuan te coo paciencia ni rō condetu rō ndé quiví ndíji máá Jítoho yō. Tēe sājniñu ñuhun, cánuu coo paciencia ni de condetu de nde quiji saū néhen jíin saū neñu isa, te sáa te nihīn de nuni vāha jeē jéhe itu. ⁸Te suni súcuan coo paciencia ni rō, te ndeyí coo ni rō condetu rō, chi cuacuyajni ndee maá Jítoho yō. ⁹Te ma cahán sōo rō siquí jeē sáha jnáhan rō, hermano, návāha ma jécondee cuéchi siquí rō. Chi máá Yaā jeē sándaā cuéchi, je yajni ndiji ya. ¹⁰Ñáni máni, conahan rō jijnáhan rō ndese ni casáha tēe ni canacani jnūhun máá Jítoho yō nde jenahán, chi ni cacuu de ñin ejemplo nuū yō. Chi vésú ni candoho de, te ni iyo paciencia ni de. ¹¹Te cáhán yō jeē

ñayuu cájendeyí ni jíin jnúndóho, ndetū cúu i sáha Yaā Dios. Chi ni cajini ró jnúhun ndese ni jendeyí ni Job jíin jnúndóho, te suni cájini rō jeē yóhyo vāha ga ni quendōo de ni sáha máá Jítóho yō ná ni yāha jnúndóho. Chi yóhyo cúndáhú ni yā yohó, te vāha ndasí ni yā jíin yó.

¹²Ñánī mánī, jeē cánuú gá cúu jeē ma cahán cāha ró síhví Yaā Dios jíin jnúhun cácahān teyí ró. Ma cahán rō verdad de Dios, Yaā ndeé andiví, ni ma cahán rō verdad de Dios, Yaā chíí ñayiví, te ni ìin ga jnúhun súcuan ma cahán teyí ró. Chi núu cahān rō jeē cuu, te súcuan-ni cahān rō. Te núu cahān rō jeē tuú, te súcuan-ni cahān rō, ma scāa gā rō cahān rō, návāha ma ndénehen Yaā Dios cuēchi siquī rō.

¹³Te núu íyó ìin ró jéē ndóho jnúndóho, te na cácan tahú rō. Te núu íyó ìin ró jéē cúsi ni, te na cáta ró yaa jeē chiñúhún ró yá. ¹⁴Te núu íyó ìin ró jéē cuhú, te na cána ró téé jéhnú cándito ñayuu cácandíje. Te na cácan tahú de jehē ñayuu cuhú. Te jíin síhví máá Jítóho yō na

chíhi de aceite i. ¹⁵Te núu cácandíje de jeē sáha Jítóho yō jeē cájicān tahú de, yūcuán na te jnama ya ñayuu cuhú. Chi nasávāha ya i, te núu ni sáha i cuēchi, te cone cáhnu ni yā nuū i. ¹⁶Núu súcuan te nacani ndaā rō cuēchi ró núu jnáhan ró, te cacān tahú rō jehē jnáhan ró návāha nduvāha ró jíjnáhan ró. Chi núu ìin tēe ndaā ndíhví ni de jícan tahú de, te yóhyo vāha níhín jnínu, chi sáha ya jeē jícan de. ¹⁷Chi Elías, tēe ni nacani jnúhun Yaā Dios jenahán, suni ìin tēe jeē nájnūhun íyó máá yó ni cuu de. Te ni jícan tahú ndasí de jeē ma cúun saū, te tu ní cúun saū unī cuiyā ìñū yoō. ¹⁸Yūcuán na te ni jícan tahú tucu de, te ni cuun saū, te ni canecoo tucu tāca jéē jéhe ñuhun.

¹⁹Ñánī mánī, núu ìin ró ni stóo ichi ndaā, te núu ìnga rō nachuhichí ró jnáhan ró, ²⁰núu súcuan te cuni rō jeē núu ni nachuhichí ró tēe ni quiví cuēchi, te je ni jnama ró de jeē jnahnú ndetū de núu, te súcuan íyó jnúhun cáhnu ni nuū cuehē cuēchi de.

CARTA HN JEE NI TEE SAN PEDRO APOSTOL NUU ÑAYUU CACANDIJE

1 Máá rí cúu Pedro, apóstol jeē ní tají Jesucristo, te tée ri carta yáha cuájeē nuū rohó ñáyuu ní cajitē núu, te cáyūcu jíca ró nń Ponto, Galacia, Capadocia, Asia, jíin Bitinia. ²Te máá Tátá yō Yaā Dios ni nacāji ya rohó, chi súcuan ni tee ni yā nde ná tu jecōo ñayíví. Te jíin Espíritu Santo ni sáha ya jeē iyó ndoo íyó íi rō cájetáhú ró núū yā, te ni nacate ya anuá rō jíin nńñ Jesucristo. Te ñúhun ni rī jeē na cáyá gā tāca jéē váha jeē sáha ya rohó, jíin jéē coo ndeyí coo síi ni rō jíinánhan ró.

**Jeē ñúhun ni yō tāca jéē
váha jeē cóo andíví**

³Na cáhan yō jeē yóhyo cújéhu Yaā Dios, Yaā cúu Tátá maá Jítho yō Jesucristo. Chi ni cundáhú ndasí ni yā yohó, te ni sáha ya jeē ní nacacu jeé yó, siquī jeē ní natecu Jesucristo mēhñu ndíyi. Te jeē yúcuan níní cáñuhun ni yō tāca jéē váha jeē coo. ⁴Chi nihin rō tahu jeē ñúhun váha ini andíví jeē cúu ró jíinánhan ró. Te tahu un má nāa cuítí, ni ma tívi cuítí, ni ma ndíhi cuítí. ⁵Chi cávandíje ró jéē sáha Yaā Dios jehē rō, te jeē yúcuan ndíto ya

rohó jíin poder yā, návāha jnama ya rohó quíví sándihí, chi ni sándaā yā jeē súcuan coo.

⁶Jeē yúcuan cácusíi ndasí ni rō, vésú cájito ró cuéhē ndinuū jnūndóho jecu-ni quíví. ⁷Chi nájnūhun jeē stuhvá ñayuu oro jíin ñúhūn, jíto ndee i núu jeē váha cúu, suni súcuan cánuú coto ndee jnūndóho róhó núu cávandíje nihin ró chí tuú. Chi jeē cávandíje nihin ró, chi yahu ndasí gá cúu vésú oro, ndajníñu jeē nāā. Te yúcuan cúu jeē cuajnúhún yá rohó, te sájéhu ya rohó, te squéndōo yíñúhún yá rohó quíví quenda ndijin Jesucristo.

⁸Te vésú tu ní cájito ró núū yā, te cáhiyo maní ndasí ró jíin yá. Te cávandíje nihin ró yá vésú tu cájito ró núū yā vijna. Te yóhyo luu cácusíi ndasí ni rō, chi nde tuá níhín cuítí yō jnūhun castūhun yó ndese cúsií ni yō. ⁹Te nihin tahu rō jeē cācu ánuá rō, chi jeē yúcuan cúu jeē cávandíje ró.

¹⁰Te tée ni canacani jnūhun Yaā Dios nde jenahán, ni cananducú yúcún de ni cacajnúhun váha de siquī jnūhun ndese jnama ya yohó. Te ni cacachi de ndese sáha Yaā Dios jeē váha róhó jíinánhan

ró. ¹¹Chi nde ná tu coo, te ni steén Espíritu Cristo nuū de jíjnáhan de ndese quiji jnūndóho síquī Cristo jíin ndese luu ndujéhu tucu ya jeē yáha jnūndóho ún. Te ni cananducú yúcun de jeē na jécūhun ni de ndé quívī quiji Cristo te ndese coo tāca jēē ni cáhān maá Espíritu jeē ndeé ini de. ¹²Te ni steén Yaā Dios nuū de jeē násūu máá de coto jniñu jeē ní canacani de ún, chi sa máá yó cúu jeē cóto. Te vijna je ni cajini sōho máá ró jnūhun ún, chi tāca tēē nácani jnūhun jnáma ya yohó, ni canacani de nuū rō, ni sáha poder Espíritu Santo jeē ní quiji ichi andiví. Te jnūhun ún chi nde maá ndajéhé Yaā Dios cánanducú návāha na jécūhun ni.

Cúní yā jeē coo ndoo ánuá yō

¹³Jeē yúcuan ndito na cóo xini rō jíjnáhan ró, te cájī coo ni rō. Te cocuhun ndasí ni rō jeē nihín rō tāca jēē váha jeē sáha Yaā Dios rohó quívī quenda ndijin Jesucristo. ¹⁴Te na cúu ró séhe jeē cájetáhú váha. Te ma sáha ga rō tācá jniñu jeē ní cacusiñi ni rō sáha ró nde ná tu jecūhun ni rō jnūhun Yaā Dios. ¹⁵Chi sa suhva na cóo ndoo ánuá rō jíin tāca jniñu cásáha ró, chi Yaā ní cana róhó, Yaā iyó ndoo cúu ya. ¹⁶Chi súcuan cáhán tutu ii: Na cóo ndoo ró jíjnáhan ró, chi ruhū iyó ndoo ri, achí yá.

¹⁷Te núu cácahān rō Tatá rō jíin Yaā Dios, núu súcuan te na cáca yíñuhún ró nuū yā tāca quívī jēē cájica ró ñayīvi yáha. Chi máá yá sándaa síquī ndese ni casáha iin iin yó, te tu sáha ya cuenta ndese cúu iin iin yó, chi inuú sáha ya jíin

ndihi yó. ¹⁸Chi ni jnama ya rohó núu tācá costumbre jeē ní cajequin jíi rō, jeē ní cajejnñu cáha ró núu. Te cájini vāha ró jēē yahu cúu jeē ní jnama ya rohó. Chi tu ní chúnaa yā jíin ndajniñu jeē náā, nájñuhun oro jíin plata, ¹⁹chi sa suhva jíin níñī Cristo jeē yáhu ndasí gá cúu. Chi ni socō yā maá yá nájñuhun iin londe, quitī íyó váha íyó ndoo. ²⁰Chi jeē yúcuan ní jeni Yaā Dios maá Cristo nde ná tu jecōo ñayīví, te ni cane ndijin Cristo maá tiempo cuándihi yáha, návāha quendōo váha ánuá rō jíjnáhan ró. ²¹Te jeē jíin Cristo te cácandíje ró Yaā Dios. Chi ni sáha Yaā Dios jeē ní natecu yā mēññu ndíyi jíin jēē ní ndujéhu ya. Te jeē yúcuan cácandíje ró Yaā Dios, te cáñuhun ni rō coto ró yá.

²²Te vijna chi je ni candundoo ánuá rō, chi ni cajetáhú ró jnūhun ndaa ni sáha Espíritu jíin ró, návāha cundáhú ndije ni rō hermano cácandíje. Núu súcuan te na cundáhú ndasí ni rō jnáhan ró nde jíin ini jíin ánuá rō. ²³Chi je ni canacacu jeé ró, te nasūu chíji yucūn ñayuu jeē cúu. Chi sa jnūhun Yaā Dios jeē ndito técu ní cání ni sáha jeē ní nacacu ró. ²⁴Chi súcuan cáhán tutu ii:

Nájñuhun yucū cúu ndihi tāca ñayuu, chi jecu-ni quívī técu i. Te nájñuhun ita yucū cúu jeē cujéhu i. Chi íchí-ni yucū, te ndáhvá-ni ita.

²⁵Te jnūhun Jitoho yō Yaā Dios, sa quéndōo ní cání. Achí tutu. Te jnūhun un cúu máá jnúhun jnáma ya yohó jēē ní canacani ri nuū rō.

2 Núu súcuan te na siáá rō tācá jniñu néé, tāca jéé stahú, jéé tú ndije, jeē cucuésún ni, jíin jéé sajnúhún siquī jnáhan. ²Te nájnūhun sūchi yíquín sá ní cacu jeē jéxin te jéhnú, súcuan na cóndihvī ni rō scuáha ró jnúhun ndaā yā, návāha cuehnu ró jíin te cācu ánuá rō. ³Chi je cājini rō jeē yóhoyo váha ni maá Jítóho yō.

Cristo cúu nájnūhun yuū yítuu vehe

⁴Núu súcuan te manī gā coo ró jíjnáhan ró jíin Jítóho yō Cristo. Chi cácuu ró nájnūhun templo nuū ndeé Yaā Dios, chi ndeé yá ini anuá rō. Te Cristo cúu nájnūhun iin yuū cánuú gá jeē yítuu yiquī templo, te sáha ya jeē cótecu rō ní cání. Te ñayuu vēsú ni casquéhichī i ya, te Yaā Dios chi je ni nacāji ya Cristo chi cánuú ndasí yá, nájnūhun nacāji yó iin yuū váha jeē quítuu yiquī vehe. ⁵Te maá ró chi cácuu ró nájnūhun iin iin yuū jeē cúvāha templo Yaā Dios, te cotecu rō ní cání. Te na cuáha ró jnúhun jeē sama ya rohó jíjnáhan ró jéé cúvāha templo yā, cúu jeē ndeé Espíritu yā ini anuá rō nájnūhun ini iin templo. Te suni cúní Yaā Dios jeē cuu ró sūtū cáhiyo ndoo cájejniñu nuū yā. Chi siquī jeē ní sáha Jesucristo jehē rō, te na sócō rō maá ró jeē cuajniñu ró núu yā sáha ró táca jniñu váha jeē núnjahan ni Yaā Dios. ⁶Chi súcuan cáhán tutu i:

Vijna te nde ñuu ri Sion jéquin ri iin yuū jeē cánuú gá jeē quítuu yiquī vehe, chi ni nacāji ri yā nájnūhun iin yuū váha jeē cánuú téyí.

Te ñayuu jeē candíje i ya, jnama nahín yá i.

Achí Yaā Dios, áchí tutu. ⁷Te maá ró jeē cáncandíje ró, chi yuū váha jeē cánuú téyí cúu ya nuū rō. Te nuū ñayuu tu cáncandíje chi tuú, chi sa cúndaā jeē cahán tutu i:

Maá yúu jeē ní casquéhichī tēe cásama vehe, suu cúu yuū cánuú gá yítuu yiquī vehe.

⁸Te suni cúndaā jnúhun jeē cahán tutu siquī ñayuu tu cáncandíje:

Cúu ya nájnūhun iin yuū jeē cácachihī i jehē i, nájnūhun toto jeē cotúú i sáha.

Achí. Chi jeē cácachihī i jehē i cúu jeē casániñni ni i nuū jnúhun ya. Te je ni cúndaā jeē jnahnú ndetū i siquī jeē cáacunihni ni i.

Jnúhun ñayuu maá Yaā Dios

⁹Te maá ró cácuu ñayuu jeē ní nacāji Yaā Dios. Te suni cácuu ró sūtū cájejniñu nuū maá Yaā cúu Rey, te ñayuu cáhiyo ndoo, jíin ñayuu maá yá cácuu ró. Súcuan ni sáha Yaā Dios rohó návāha nacani ró jnúhun ndese yóhoyo jéhnú jniñu sáha ya, chi maá yá ni cana róhó ná ni coyūcu ró nájnūhun nuū néé. Te ni squívicoo ya rohó núu luz yā jeē yóhoyo váha stéén yā ini anuá rō.

¹⁰Chi nde saá te nasūu ñayuu Yaā Dios cácuu ró, te vijna je ni nduu ró ñayuu maá yá. Te nde saá chi ná tu cundáhú ni yā rohó, te vijna je cundáhú ni yā rohó jíjnáhan ró.

Jeē cuajniñu váha yó núu Yaā Dios

¹¹Ñáni manī, ini ñayivī yáha cácuu ró nájnūhun ñayuu ñuu jicá jeē cájica cuu tátú. Núu súcuan

te cáhán ndahú rí jíin ró jéē ma sáha ró táca jniñu jeē ndíyo néé ni rō jíin modo maá ró. Chi táca un cájejnáhan jíin ró, ndúcú jéē jnahnū ndetū anuá rō. ¹²Te ndaā na cáca ró méhñu ñáyuu tu jíin jñūhun Yaā Dios. Chi vēsú cácahān i siquī rō, nájñūhun cácahān i siquī ñáyuu casáha jniñu néé, te núu na cóto i jniñu váha casáha ró, te quivī sándaā Yaā Dios jniñu te cahān i jeē yóhoyo cújéhnu ya.

¹³Jeē siquí maá Jítóho yō te cuatáhú ró nuū tāca tóhō cándiso jniñu nuū ñáyuu. Cuatáhú ró nuū maá rey, chi tēe cújéhnu ga cúu de. ¹⁴Te cuatáhú ró nuū tāca gobernador jeē ní jeni rey návāha stóho de ñayuu casáha jniñu néé te cuajnúhún de ñayuu casáha jniñu váha. ¹⁵Chi cúní Yaā Dios jeē sáha ró jniñu váha, te jeē súcuan sáha ró te tāca ñáyuu canéé jéē tu cájecūhun ni, casi i yuhu i.

¹⁶Te na cáca ndaā rō jeē cácuu ró ñáyuu ni nduu libre anuá, te nasūu jéē ní nduu libre rō jeē sáha ró jniñu néé. Chi sa cácuu ró mozo Yaā Dios, te cuajníñu vāha ró núu yā. ¹⁷Coo respeto rō nuū tāca ñáyuu. Cundáhú ni rō hermano cácañdije. Conso iyo ró núu Yaā Dios. Coo yíñúhún ró nuū maá rey.

Jeē na ndóho yó jéhē jnáhan yó nájñūhun ni ndoho Cristo

¹⁸Róhó jéē cácuu mozo, cuatáhú ró nuū patrón rō, te coo respeto rō nuū de. Te nasūu máa-ni nuū tēe vāha ni jíin tēe vitá ni, chi suni nuū tēe xeēn ni. ¹⁹Chi iin jeē váha cúu núu jéndeyí ni iin tēe jeē stóho cáha ñáyuu de siquī jeē squícu de

nuū Yaā Dios. ²⁰Chi núu cástóho i róhó jéē casáha ró cuēchi, te ni iin ma cuajnúhún róhó núu jéndeyí ni rō jíin jeē ndóho ró. Te núu cástóho i róhó jéē casáha ró jniñu váha, te núu jéndeyí ni rō jíin, yāha cúu jeē váha jeē núnahan ni Yaā Dios.

²¹Chi jeē yúcuan cúu jeē ní cana ya rohó jíjnáhan ró. Chi suni máá Cristo ni ndoho ya jeē siquí rō, te súcuan ni cuu ya iin ejemplo nuū rō jeē na ndóho ró jéhē jnáhan ró, te súcuan condiquin rō ichi ya. ²²Te máá yá tú cuiti na cuēchi ní sáha ya, ni tú cuiti na jñūhun stáhú ní cáhán yā. ²³Ná ni cacahān neé i nuū yā, te tu ní nácahān neé yá. Te ná ni castóho i ya, te tu ní téjñáhan ya jíin i, chi sa ni chihi ya maá yá ndaha Yaā Dios, Yaā sándaā vāha siquī ndíhi ún. ²⁴Te ni condiso máá Cristo cuēchi yó jíin yiqui cúñu yā ná ni jihī yā jicā cruz, návāha quenda yó chíji cuēchi te caca ndaā yō. Chi ni tujī yā, te jeē yúcuan ní canduvāha ánuá rō. ²⁵Chi ni casana ró nájñūhun lanchi, te vijna je ni candicó ró ni ndívicoo ró núu Cristo, Yaā cúu pastor rō te ndíto vāha ya anuá rō.

Ndese cánuú coyūcu váha yii jíin ñasihí

3 Suni súcuan róhó ñasihí jíjnáhan ró, cuatáhú ró nuū yii ró, návāha núu cúu de tēe tu cándije jñūhun ya, te cuu scándije ró de, jeē tuá niní jíin jéē cahán rō, chi máá jíin jéē casáha vāha ró. ²Chi cuni de jeē cájica ndaā rō te cáhiyo respeto rō. ³Te jeē casáha luu ró máá ró, chi nasūu máni máá ichi siquí rō sáha ró, jeē sáha luu

ndasí ró xinī rō, chí jéē cúhun ró síquī oro chí sahma váha ga. ⁴Chi sa nducú ró jeē quéndōo luu ánuá rō, te coo luu ró ìin modo jeē ma nāā cuiti, suu jeē cóo vitá ni rō te coo nahín ni rō. Chi yāha cúu jeē yahu ndasí gá nuū Yaā Dios. ⁵Chi ñahan ní cahīyo ndoo ánuá nde jenhán, suni súcuan ni casáha luu ña ánuá ña. Chi ni cañuhun ni ña Yaā Dios, te ni cajetáhú ña nuū yīi ña. ⁶Te súcuan ni sáha Sara, chí ni jetáhú ña nuū yīi ña Abraham, te ni cahān yīñúhún ña jíin de. Te rōhó jíjnáhan ró, núu sáha vāha ró te núu ma yūhu ró ni ìin, yūcuán na te coo ró nájñuhun ni iyo Sara.

⁷Te suni súcuan rōhó yīi, na cóo vitá ni rō jíin ñasihí ró. Te yīñúhún coo ró jíin ña, síquī jeē núu ga fuerza ña vēsú rohó, te suni síquī jeē inuú ní canihīn tahú rō cotecu rō ní cáni síquī jeē váha ni Yaā Dios. Te súcuan sáha ró návāha tú casi nuū jñuhun jícan tahú rō.

**Jñuhun ñayuu cándoho
síquī jeē cájica ndaā**

⁸Núu súcuan te inuú na cáni ni rō jíjnáhan ró, te cucuíhyá ni rō jeē ndóho jnáhan ró, te cundáhú ni rō i nájñuhun ñani rō. Te na cóo mani rō te cani suchí ni rō. ⁹Núu casáha neé ñayuu jíin ró, te ma nasáha neé ró jíin i. Te núu cácahān neé i nuū rō, te ma nácahān neé ró núu i. Chi sa suhva cacān tahú rō jeē na quéndōo vāha i. Chi Yaā Dios ni cana ya rohó jéē suni súcuan quendōo vāha ró. ¹⁰Chi súcuan cáhán tutu i:

Ñayuu cácuni cotecu vāha te cusī ni tāca quívī,

na cóto i yuhu i jeē ma cáhán neé i,
te na cóto i jeē ma cáhán i
jnūhun stáhú.

¹¹Na cújiyo i nuū jniñu neé, te na sáha i jniñu váha.
Na ndúcú i coyūcu mánī i, te na cóndihvī ni i jíin.

¹²Chi máá Jítóho yō ndíto ya ñayuu ndaā,
te jíni nahín yá jeē cájicān tahú i.
Te ñayuu casáha jniñu neé, chí tu jétáhú yá i.

Achí tutu.

¹³Te ni ìin ma sáha neé jíin ró te núu mánī jniñu váha cándihvī ni rō sáha ró. ¹⁴Te vēsú núu ndóho ró síquī jeē cájica ndaā rō, te yōhyo ndetū cácuu ró. Núu súcuan te ma yūhu ró coto ró i, ni ma cunéé ni rō. ¹⁵Chi sa jíin ini jíin ánuá rō chíñúhún ró maá Jítóho yō Cristo. Te níni coo tūhva ró nastió cuñí vīta ró te cahān yīñúhún ró jíin ñayuu jeē castíchí rohó síquī tāca jéē cáñuhun ni rō. ¹⁶Te caca ndaā rō jeē tú na cuēchi condee anuá rō, návāha ñayuu cácahān neé síquī rō, cucanu i jeē ni stáú yáhu i rōhó jéē cájica ndaā rō chí cácañíje ró Cristo. ¹⁷Chi núu cúnī Yaā Dios te vāha ga jeē ndóho ró síquī jeē casáha ró jniñu váha vēsú síquī núu sáha ró jniñu neé.

¹⁸Chi máá Cristo suni ni ndoho ya, te ìin jínu-ni ni jihī yā jeē síquī cuéchi ndīhi yó. Yaā vāha cúu ya, te ni ndoho ya jehē yohó ñayuu ní casáha jniñu neé, návāha quívicoo yó núu Yaā Dios sáha ya. Chi ni jihī yiquí cúñu yā, te ánuá yā chí técu-ni ní cáni. ¹⁹Te ná ni jihī yā

te ni jehēn anuá yā ni nacani ya jñūhun nuū anuá ñayuu cáyindihyū.

²⁰Chi nde jenahán tu ní cájetáhú i, ná ni iyo paciencia ni Yaā Dios te ni condetu ya níní sáha Noé barco jeē naní arca. Te jíin arca un ní cācu jecu-ni ñayuu, chi unā-ni i ni cācu nuū ndúte. ²¹Te nájñūhun ni cacācu i nuū ndúte, súcuan cúu jeē jéndute yó vijna te cācu ánuá yō. Te jeē jéndute yó, nasūu jéē ndúndoo yiqui cúñu yō, chi sa jeē jicán yō nuū Yaā Dios jeē ndúndoo ánuá yō. Te súcuan te cācu yó, chi ni cundúu yó jíin Jesucristo nuū jñūhun ni natecu yā. ²²Te ni ndaa ya cuanuhun yā andiví, te ndéé yá ichi ndáváha Yaā Dios nuū kujéhnu ya. Te tēcá ndajéhé andiví, jíin jéē cándacu jniñu, jíin jéē cájnií poder, cájendetū nuū yā.

**Jeē na cuájniñu yó jíin táhū
jeē ni jéhe ya nuū yō**

4 Núu súcuan te nájñūhun ni ndoho Cristo jehē yō jíin yiqui cúñu yā, suni súcuan na táva ni maá ró ndoho ró. Chi ñayuu jeē ní ndoho jíin yiqui cúñu, tuá sáha i cuēchi. ²Núu súcuan te níí tiempo jeē cuahán gā rō, na sáha ró jniñu jeē cuní Yaā Dios, te ma sáha ga rō jniñu jeē ndíyo néé ni rō jíin modo maá ró. ³Chi nde níí vėjí ró, te ni casáha ró cuéhē cuēchi jeē cánujnahán ni rō siquī jeē tu ní cájini rō jñūhun Yaā Dios. Te tiempo un mání maá jéē neé ni casáha ró, te ni candiyo ni rō tēcá jéē neé, ni canajini ró, ni casáha ró vico néé, ni cajihí ndasí ró nuū víco ró, te ni cachíñuhún ró ídolo jeē ni cáhān Yaā Dios jeē ma

chíñuhún yó. ⁴Te cáacunéé ni i jeē tuá cájica ró jíin i jeē sáha ró táca cuēchi xeēn jíin i. Te jeē yúcuan cúu jeē cácahān neé i siquī rō. ⁵Te máá i chi iin quiví te nacuāha i cuenta nuū maá Yaā jeē iyó túhva ya sándaā yā jniñu ñayuu técu jíin ñáyuu ní cajihí. ⁶Chi jeē yúcuan suni ni quiji jñūhun vāha ya nuū tēcá ndíyi ná ni cotecu i. Te ni cundaā siquī cuēchi ni casáha i ñayiví yáha, nájñūhun cúndaā siquī ndihí ñayuu, návāha nacani ni i te cotecu anuá i níí cáni nájñūhun técu Yaā Dios.

⁷Te je cuacuyajni quiví jeē náā tēcá jéé iyó. Núu súcuan te ndito na cóo xiní rō jíináhán ró, te condihví ni rō cacān tahú rō. ⁸Te jeē cánuú gá cúu jeē cundáhú ndasí ni rō jñáhan ró. Chi núu cundáhú ni yō jñáhan yó, te íyo jñūhun cáhnu ni nuū cuéhē cuēchi. ⁹Sáha vāha ró jíin ñáyuu jeē jinú i vehe ró, te ma cúxii ni rō. ¹⁰Tēcá ró cuajniñu ró núu jñáhan ró, núu ndese íyo máá táhū rō jeē ni jéhe Yaā Dios jeē cuajniñu ró núu yā. Te squícu vāha ró jíin táhū jeē síin síin ni jéhe ya nuū iin iin ró. ¹¹Núu tahū jeē nácani ró jñūhun cúu, te na cáhán rō nájñūhun jeē maá Yaā Dios cahán. Te núu tahū jeē chindéé ñáhán ró jñáhan ró cúu, te na sáha ró jíin fuerza jeē ni jéhe ya nuū rō, návāha jíin ndihí jeē casáha ró te cahān ñayuu jeē yóhoyo cújéhnu Yaā Dios siquī jeē ni sáha ya jíin Jesucristo. Te na cáhán yō jeē luu cújéhnu Cristo te jñí ya yó poder níí cáni. Amén.

**Jeē ndóho yó siquī jeē
candíje yó Cristo**

¹²Ñáni mání, núu vėjí jñūndóho xeēn jeē coto ndee rohó, te ma

cunéé ni rō cani ni rō jeē maá ró ni nihīn jnūndóho xeēn gā. ¹³Chi sa cusīī ni rō jeē cándoho ró jecu jnūndóho jeē ní ndoho Cristo, návāha suni cusīī ndasí ni rō quivī quénda ndijin yā jeē kujéhu luu ya. ¹⁴Te yōhyo ndetū rō te núu cácahān neé i nuū rō siquī jeē cácaandíje ró Cristo. Chi máá Espírītu Yaā Dios jeē kujéhu ndasí, ndéé yá ini rō. Máá i chi cácahān neé i siquī yā, te máá ró chi cáchiñúhún ró yā. ¹⁵Te núu ndoho ró, te na ndóho ró siquī jeē cácaandíje ró Cristo. Te ma ndóho ró siquī tāca cuéchi nájñūhun cándoho ñayuu jéhu ndīyī, ñayuu sacuíhná, ñayuu sáha jniñu néé, jíin ñáyuu quívi nduu nuū jniñu jnáhan jeē tu cánuú quívi nduu. ¹⁶Te sa núu iin ró ndóho siquī jeē candíje ró Cristo, te ma cúcanu rō, chi sa nacuatáhu ró nuū Yaā Dios siquī jeē cúu ró cristiano.

¹⁷Chi je ni jinū quivī jeē quejéé sándaā Yaā Dios cuēchi, te xihna gā ñayuu cácuu sēhe ya sándaā yā cuēchi. Te núu xihna gā cuēchi máá yó quejéé yá sándaā yā, núu súcuan te xeēn gā coo jeē ndénehen ya cuēchi siquī ñáyuu jeē tu ní jétáhu jnúhun vāha ya. ¹⁸Te núu yōhyo yíí cácu ñayuu vāha, núu súcuan ¿te ndese cácu ñayuu casáha jniñu néé jíin táca cuéchi? ¹⁹Núu súcuan te róhó jéé cándoho siquī jeē súcuan cúni Yaā Dios, ma jécuiñī rō sáha ró jniñu vāha, te na chíhi ró máá ró ndaha máá Yaā jeē ni sáha róhó, chi squícu ya jeē ni jéñūhun ya.

Jeē jéhe de consejo ñayuu cácaandíje

5 Vijn te na cáhan rī jíin táca róhó téé jéhu cándito ñayuu

cácaandíje, chi suni téé jéhu ndíto ñayuu cácaandíje cúu máá rí. Te cúu ri testigo jeē ní jito ri ndese ni ndoho Cristo. Te suni ndujéhu ri jíin ró sáha Cristo quivī quénda ndijin yā. ²Na cóto yúcún ró ñayuu jeē ndeé jniñu ró condito ró, jeé cácuu i nájñūhun lanchi Yaā Dios. Te na cúsiī ni rō condito ró i, chi súcuan cúni Yaā Dios. Te nasūu síquī jeē sáfuerza yā rohó, ni nasūu síquī jeē nihín rō xūhún, chi sa siquī jeé cuní rō cuajniñu ró. ³Te nasūu jéé ndacu nihin ró jniñu nuū ñáyuu cándito ró, chi sa nducú ró cuu ró iin ejemplo nuū i jeé cácuu i lanchi ya. ⁴Yūcuán na te quivī quénda ndijin maá Yaā cúu Pastor kujéhu nuū rohó téé cácuu pastor lanchi ya, te cuāha ya premio nuū rō jijnáhan ró jéé yóhyo luu te ma náā cuítī.

⁵Te suni róhó táca téé suchí, na cuándetū rō nuū táca téé jéhu jíñā. Te ndíhi róhó ñáyuu cácaandíje, cuándetū rō nuū jnáhan ró, te cani suchí ni rō. Chi suhva cáhan tutu:
Yaā Dios jési yā nuū ñáyuu
casáha téyí máá,
te vāha ni yā chíndéé ñáhan yá
ñayuu casáha suchí máá.

Achí. ⁶Núu súcuan te na cáni suchí ni rō, chi cáyihí ró ndaha Yaā Dios jeé jniñu poder. Te sájéhu ya rohó, na jíinú maá quívi. ⁷Tāca jéé cácanani ndasí ni rō siquī, chíhi ró ndaha máá yá te máá yá coto, chi ndíto ya rohó.

⁸Te cájí na cóo xinī rō te ndito coo ni rō. Chi jexeén jeé jíto uhū rohó, jíca cuu ndúcú squívi róhó jíijnáhan ró núu cuéchi. Te xeēn gā sáha vésú ndicaha jeé iyo ndáhyú. ⁹Te cuiñi nihin ró jéé ma cúndeyí

jexeén jíin ró, te nihin candíje ró jnúhun cúndáhú ni yā rohó. Chi cájini ró jeē suni súcuan cándoho hermano ró jeē cáyūcu níí cáhnu ñayiví. ¹⁰Te núu ni jíinu jeē ndoho ró jecu-ni tiempo, te Yaā Dios chi sáha ya jeē ije vāha ni ró jíin jnúhun ya, jíin jéē cuíñi nihin ró, te cuāha ya fuerza ini ró, te quendōo cutú ró níí cáni. Chi máá yá cúu jeē sáha tāca jéē váha yóhó, te ni cana ya yohó jéē kujéhnu luu yó jíin yá níí cáni, siquī jeē nduú yó jíin Jesucristo. ¹¹Te na cáhán yō jeē yóhoyo luu cújéhnu ya te jnái ya poder níí cáni. Amén.

Saludo jeē sándihí

¹²Jíní rī jeē Silvano cúu ññ hermano jeē squícu vāha. Te máá

de cuajeē nuū ró jíin carta yáha jéē ní tee ri jecu jnúhun. Te jíin yáha stíhví ni rī rohó, te cáhán rī jíin ró jeē ndaá cúu jeē tāca jéē váha ni sáha Yaā Dios rohó, suu stéén nuū ró jeē cundáhú ndije ni yā rohó. Te na cuíñi nihin ró jíin jnúhun yáha.

¹³Ñayuu cácandíje jeē cáyūcú ñnu Babilonia, jeē ní nacāji ya i nájñuhun ni nacāji ya rohó, cácahān i jeē sándeyí ni ró. Te Marcos, tēe cúu nájñuhun sēhe ri, suni súcuan cáhán de. ¹⁴Te núu na cáhán ró jíin jnáhan ró, te techūhu mánī ró ndaha i.

Te na cóo ndeyí coo siñ ni ndíhi ró jéē cáyihí ró ndaha Jesucristo. Súcuan na cóo. Amén.

CARTA UU JEE NI TEE SAN PEDRO APOSTOL NUU ÑAYUU CACANDIJE

1 Máá rí cúu Simón Pedro, te cúu ri mozo Jesucristo, te cúu ri apóstol jeē ní tají yá. Te téé ri carta yáha cuájeē nuū rō jijnáhan rō, jeē ni sáha Yaā Dios jeē inuú-ni jíin rí jijnáhan ri ni canihīn rō jnūhun luu váha jeē cácanđije yó yá. Chi Yaā ndaā cúu Yaā Dios, suu máá Jesucristo jeē jnáma yóhó. ²Te ñūhun ni rí jeē na sáha ga yā jeē váha ndasí rōhó jíin jéé yóhyo coo ndeyí coo siī ni rō siquī jeē cájecūhun vāha ni rō ndese Yaā cúu Yaā Dios jíin Jítóho yō Jesús.

Siquī ndese cánuú coo ñayuu cácanđije

³Te Yaā Dios, jíin poder yā ni jēhe ya nuū yō tāca jéé sáha jeē cúu caca ndaā yō nuū yā jíin jéé chiñúhún váha yó yá. Chi ni steén yā maá yá nuū yō, chi cúu ya Yaā jeē ní cana yóhó, siquī jeē yóhyo cújéhnu ya jíin táca jniñu jéhnu sáha ya. ⁴Jeē yúcuán ní jejnūhun ya tāca jéé yóhyo jéhnu yōhyo vāha sáha ya yohó, návāha jíin táca ún te nduu rō nájñūhun íyó máá yá, te cācu rō núu jniñu jeē cándiyo néé ni ñayuu casáha i ini ñayívi yáha. ⁵Núu súcuán te na ndúcú ndeyí rō

jíin jnūhun yáha. Te jeē cácanđije rō, te siquī ún na chísóó rō jeē caca ndaā rō. Te jeē cájica ndaā rō, te siquī ún chísóó rō jeē cóndihvī ni rō jecūhun vāha ni rō. ⁶Te siquī ún chísóó rō jeē casi rō modo jeē cuní maá rō. Te siquī ún chísóó rō jnūhun cuandeyí ni rō, te siquī ún chísóó rō jeē chiñúhún váha rō Yaā Dios. ⁷Te siquī ún chísóó rō jeē cóo manī rō jíin jnáhan rō, te siquī ún chísóó rō jeē cundáhú ni rō jnáhan rō.

⁸Chi núu cayā tācá jniñu yáha jíin rō, te suu sáha jeē ma cótecu saá-ni rō, chi sa quee vāha jniñu sáha rō, síquī jeē cájecūhun ni rō ndese Yaā cúu Jítóho yō Jesucristo. ⁹Te ñayuu jeē tu casáha jniñu yáha, nájñūhun jeē cáhīyo cuáá i, chi tu jécūhun ni i jnūhun ya, te je ni naa ni i jeē ni sándoo ya i tāca cuéchi ni casáha i ichi yátá. ¹⁰Jeē yúcuán na ndúcú ndeyí rō hermano, návāha coo seguro jeē ní cana ya rohó jíin jéé ní nacáji ya rohó. Chi núu sáha rō táca jniñu yáha, te ma cáca yátá cuítí rō. ¹¹Yúcuán na te nune vāha ichi quívi rō ini ñuu maá Jítóho yō Jesucristo, Yaā jnáma yóhó, nuū ndácu ya jniñu níí cáni.

¹²Jeē yúcuan ma jécuiñī rī sáha ri jeē núcūhun ni rō tāca jnúhun yáha, vēsú je cájini rō te cáhiin nihin ró jíin jnúhun ndaā jeē cácanđije ró.

¹³Chi jéni ni rī jeē iyó váha stíhví ni rī rohó vijna tēcu gā rī, návāha nucūhun ni rō. ¹⁴Chi máá Jítóho yō Jesucristo ni castūhun yá nuū rī jeē tuá cotecu nahán rī ñayīvi yáha.

¹⁵Jeē yúcuan na ndúcú ndéyí gá rī stíhví ni rī rohó, návāha núu je ni jīhī rī, te níní nucūhun ni rō tāca jnúhun yáha.

Jeē ní cajito de jeē kujénu Cristo

¹⁶Ná ni castéén rī jnúhun máá Jítóho yō Jesucristo nuū rō, ndese ndiji ya jíin poder yā, te tu ní cácahān rī iin cuento-ni jeē ní catava ndichí ñáyuu. Chi ná ni cahīyo ri jíin yá xinī yúcu, te ni cajito jíin núu rī jeē tucu ni nduu ya jeē ní nduluu jénu ya. ¹⁷Chi ni cajini rī jeē Tatá yō Yaā Dios ni cahān yiñúhún yá jíin Jesús, te ni sajeénu ya Jesús. Chi ichi ándiví ní quiji jnúhun luu, ni cahān Yaā Dios: Yāha cúu Sēhe ri jeē maní ndasí rī jíin, te cúsiī ni rī jíin, áchí yá. ¹⁸Te ni cajini sōho ri jnúhun un jéē ni cáhān ichi ándiví, chi ni cahīin ri jíin máá Jítóho yō xinī yúcu iī ún.

¹⁹Te súcuan cájini yō jeē iyó ndáā ndije tāca jnúhun ni catee tēe ni canacani jnúhun ya nde jenahán. Te vāha jeē na chúhun ni rō jnúhun un jíjnāhan ró, chi suu cúu nájnūhun iin luz jeē cayú nuū néē, nde na cúndijin quivī ndíji ya, te stéén yā ini anuá rō nájnūhun jeē ndíndéé lucero. ²⁰Te xihna gā na jécūhun ni rō jeē ni iin jnúhun cáhān tutu iī, nasūu jéē súcuan-ni ni caji ni

tēe cúu. ²¹Chi tāca tēe ndoo jeē ní canacani jnúhun ya nde jenahán, tu ní cácahān cuíti de jnúhun jeē cúu ni maá de. Chi sa suhva ni canacani de jnúhun Yaā Dios jeē ni stéén Espíritu Santo nuū de.

Siquī tēe cástéén jnúhun stáhú

(Judas 4-13)

2 Te mēhñu ñáyuu Israel ún suni ni cahīyo tēe ni canacani jnúhun stáhú. Te suni súcuan coo tēe stéén jnúhun stáhú méhñu ró. Te squívi de jnúhun stáhú jéē tívi ñáyuu sáha. Te ni ma cuajnúhún de Jítóho yō jeē jnáma ya de, te súcuan sáha de jeē jnahnú ndetū yachī de. ²Te cuehē ñáyuu condiquin i modo neé jéē castéén de. Te sáha de jeē cahán neé ñáyuu siquī jnúhun vāha ya jeē cúu ichi ndaā. ³Te siquī jeē cándiyo ni de xūhún, te quende de xūhun ró siquī jnúhun stáhú stéén de nuū rō. Te tu quíxín jnúndóho jnahnū ndetū de, chi nde jenahán je ndétu jnúhun ndonda ya siquī cuéchi de.

⁴Chi tu ní íne cáhnu ni Yaā Dios nuū tǎcá ndajéhé yā jeē ní casáha cuéchi, chi sa ni jnaa yā infierno cáyindihiyū nuū néē, cánuhni jíin cadena. Te ni chindihiyū yā nde quivī sándaā yā siquī. ⁵Te suni tu ní íne cáhnu ni yā nuū ñáyuu jenahán, chi sa ni scúun ya saū xeén siquī ñáyuu ni casáha néé un. Te máá-ni Noé, tēe ni nacani jnúhun ndaā, ni scácu ya de jíin úxā gā ñáyuu. ⁶Te suni ni ndonda ya siquī cuéchi ñáyuu ñuu Sodoma jíin ñuu Gomorra, te ni cayū ñuu i ni nduu máá yáa na. Te súcuan cúu i iin ejemplo nuū tāca gá ñáyuu

sáha néé jéé quíji ga. ⁷Te ni scácu ya Lot, chi tēe ndaā ni cuu de, te ni cucuíhyá ndasí ni de ni jito de jniñu néé ní casáha ñayuu neé un. ⁸Chi tēe váha un ní condee de mēhñu ñáyuu ún, te ndíquívī ni nacani cuíhyá ni de jeē ní jini sōho de ni jito de tācá jniñu néé ní casáha i. ⁹Núu súcuan te máá Jítóho yō chi jnáma ya ñayuu cáchiñúhún núu yā, te núu vēji jnūndóho siquī i. Te chíndihyū yā ñayuu casáha néé, návāha ndoho i castigo quívī sándaā yā cuēchi i.

¹⁰Te víhyá gā stóho ya tēe casáha jniñu jnéhén jéé ndíyo néé ni de, te cácuu jéé ni de siquī jniñu ndácu máá Jítóho yō. Nihni ndasí ni de, te cáchundeyí ni de sáha de jeē cácuu maá de, te tu cáyūhú de cahān ndevāha de siquī tāca jéé cácujuhnu nuū sucún. ¹¹Te ni máá ndajéhé jeē cáhiin nuū Jítóho yō, vēsú cácujuhnu ga yā jíin fuerza jíin jniñu ndíso ya, te tu cácahān ndevāha ya siquī tāca jéé cácujuhnu ún.

¹²Te tēe ún chi cácuu de nájñuhun quítī yúcu jéé ni jéconaa tī jíin modo sáha tī, te cátahū tī návāha nihīn ñayuu tī cahni i tī. Chi cácahān neé de siquī tāca jéé tu cájecūhun ni de. Te cuu de nájñuhun jíhí tācá quítī ún. ¹³Te jeē ní castóho de ñayuu, suni súcuan nanihīn de ndoho de. Te cácusī ni de jíin tāca jéé cácajni ni de, te casáha de tācá jniñu jeē cándiyo néé ni de. Te cácuu de tēe quini jeē casáha jniñu cúcanu ñayuu. Te jeē cándutútú de jíin ró vico ró, te níni cácusī ni de jíin jniñu néé jniñu stáhú.

¹⁴Te cándiyo ni de cájito de ñahan, te tu cájecuñī de sáha de cuēchi. Te cástáhú de ñayuu tahya ni. Chi ni cacāan de jíin jnúhun ndíyo ni de tācá ndajñū. Te tēe jnahnū ndetū cácuu de. ¹⁵Te ni casana de, chi ni castóo de jnúhun jeē cúu ichi ndaā. Te ni candiquīn de modo Balaam, tēe ni nacani jnúhun nde jenahán, séhe Beor. Chi tēe un ní cusī ni de nihīn de xūhun síquī jnúhun néé jéé cahán de. ¹⁶Te iin burro ni cahān tī nájñuhun iin ñayuu, vēsú quítī ñihīn cúu tī. Te ni cahān tī nuū tēe ún, te súcuan ni jesi tī jeē ma quihín de cahān de tāca jnúhun néé stívi.

¹⁷Te tāca tēe súcuan chi cácuu de nájñuhun tesoco íchi, nájñuhun vicō jeē stechí táchi. Te jnahnū ndetū de quívicoo de nuū néé nuū lúchi jnúu coyūcú de níí cáni. ¹⁸Chi yōhyo cáсандúxí de máá de jíin jnúhun cácahān saá-ni de. Te cánducú de squívī tucu de sava ñayuu nuū jniñu néé jniñu ndíyo ni. Te súcuan cástáhú de ñayuu jeē sa ní quenda i ni cācu i nuū ñáyuu casáha jniñu néé. ¹⁹Te cácahān de jeē cáhiyo libre i sáha i ndese-ni cúní maá i, te ni máá de tu cáhiyo libre de, chi cácuu de mozo nuū cuēchi, chi máni jniñu jnéhén casáha de. Chi tācá jniñu jeē cúndeyí jíin iin tēe jeē sáha de, suu yūcuan ndúu de mozo nuū. ²⁰Chi núu je ni cajini de ndese Yaā cúu máá Jítóho yō Jesucristo, Yaā jnáma yóhó, te núu súcuan ní quenda de ni cācu de nuū jniñu jnéhén íyó ini ñayívī, te yūcuán na te núu ndívicoo tucu de nuū jniñu un jéé cúndeyí tucu jíin de, núu súcuan te néé gá quendō

de jeē sándihí vēsú jeē xíhna nūhún.

²¹Chi vāha ga núu jeē tu ní cájini de jnūhun ichi ndaā nuú, vēsú jeē ní cajini de, te stóo tucu de jniñu ndoo jeē ní ndacu ya nuū de. ²²Chi cúndaā jíin de nájñūhun cáhán iin jnūhun jenahán: Ina ni nacaji tī jeē ní ndujen tī. Te quivī ní ndundo, ni nacuchi tucu tī ndehyū, achí.

Siquī jeē ndíji Jítoho yō

3 Nánī mánī, yāha cúu carta uū jeē tée ri nuū rō. Te jíin ndindúú carta yāha cúní rī jeē nacani ni rō siquī ndíhi jeē vāha ndaā jeē jéni ichí rí rohó. ²Te na núcūhun ni rō tāca jnúhun jeē ní canacani tēe ndoo Yaā Dios nde jenahán, jíin jniñu ní ndacu máá Jítoho yō, Yaā jnáma yóhó. Te suu cúu jeē ní castéén tēe cácuu apóstol nuū rō.

³Te xíhna gā jnūhun yāha na jécūhun ni rō: Jeē nuū cuándihī quivī te quijicoo tēe sácatā siquī jnúhun ndaā yā, chi sáha de tācá jniñu néé jéé ndíyo ni maá de. ⁴Te cahān de jíjnáhan de: ¿Najehē cúu jeē tu ndíji Cristo nájñūhun ni jejnūhun ya? Chi nde quivī ní cajihī jíi yō te nde vijna, tu ndé sáma cuitī ndíhi jeē iyó ndé ná ni jecōo ñayīví, achi de. ⁵Chi tu cácuu de jecūhun ni de jeē ndé jenahán ní cuvāha andíví jíin jnúhun ni cahān Yaā Dios. Te ni ndacu ya jniñu jeē na cuvāha ñayīvi jíin ndute, te mēhñú ndute ni nane ñuhun íchi. ⁶Te suni jíin ndute ni naa ñayīví jenahán, chi ni ndaa ndute jeē ní cuun saū xeén. ⁷Te suni súcuan jíin jnúhun ni cahān Yaā Dios ni sátūhva ya jeē cayú andíví jíin ñayīvi iyó vijna.

Chi máá quivī juicio te cayū ndíhi, te jnahnū ndetū ñayuu ni casáha néé.

⁸Te suni ma náā ni rō jnūhun yāha, ñánī mánī: Jeē nuū maá Jítoho yō chi iin quivī cúu nájñūhun mil cuiyā, te mil cuiyā cúu nájñūhun iin quivī-ni. ⁹Chi nasūu jéé cucuéeé máá Jítoho yō siquī jnúhun ni jejnūhun ya, nájñūhun cájeni ni sava ñayuu. Chi sa suhva iyó paciencia ni yā nuū yō, chi tu cúní yā jeē jnahnú ndetū ni iin yó, chi sa cúní yā jeē ndíhi yó nacani ni yō stóo yó cuéchi yó.

¹⁰Te quivī ndíji máá Jítoho yō, iin sanaa-ni te quee, nájñūhun iin sanaa-ni te quee ñacuīhná jecuáá. Te quivī ún chi ñihin ndasí andíví, te naa-ni. Te ndíhi jeē iyó andíví chi naa sáha ñuhūn. Te ñayīvi jíin táca jéé iyó ini, ndíhi cayū.

¹¹Te núu súcuan naa tācá un, te cánuú ndasí jéé coo ndoo ánuá rō te chiñúhún vāha ro yá jíjnáhan rō. ¹²Te condetu rō te condíhvī ni rō jeē na quee yachī quivī ndíji Yaā Dios. Te quivī ún cayū andíví te naa-ni, te tāca jéé iyó chi ndute sáha yáñuhūn. ¹³Te máá yó chi cándetu yó andíví jéé jíin ñayīvi jéé, chi súcuan ni jejnūhun Yaā Dios. Te yūcuán chi mánī jniñu ndaā jíin jniñu vāha coo.

¹⁴Núu súcuan, ñánī mánī, níní jéé cándetu rō jéé squícu tācá jniñu yāha, te na ndúcú ndéyí rō návāha quivī ndíji ya te nihin yā rohó jéé cáyūcu mánī rō, te coo ndoo rō jéé tú na cuéchi rō. ¹⁵Te na jécūhun ni rō jeē siquī jeē iyó paciencia ni maá Jítoho yō, jeē yúcuan cácu yó. Chi hermano yō

Pablo jeē maní yō jíin, suni súcuan ni tee de nuū rō, chi súcuan ni steén Yaā Dios jnūhun ndíchí yá nuū de. ¹⁶Te cáhán de siquī jnúhun yáha núū tāca carta jeē ní tee de. Te nuū carta de un íyó jecu jnūhun jeē yí jécūhun ni yō. Te ñayuu tu jécūhun ni jíin ñáyuu tu íje jíin jnúhun cándíje, cánasama i modo steén jnūhun yí un, nájñūhun násama i jeē cahán sava ga tutu ií. Te súcuan sáha i jeē jnahnú ndetū maá i.

¹⁷Te róhó ñání maní, vijna te je ni cajini rō ndese coo tācá jniñu yáha. Núu súcuan te coto má condiquin rō jnūhun stáhú cástéén ñayuu casáha néé. Chi núu tuú te snáa rō jnūhun cáhiin nihin ró jíin. ¹⁸Chi sa na cóndihvī gā ni rō cuni rō ndese Yaā cúu máá Jítoho yō Jesucristo, Yaā jnáma yóhó. Te na íje ga ni rō jíin jnúhun cúndáhú ni yā rohó. Te na cáhán yō jeē yóhyo luu cújéhnu ya nde vijna jíin ní cání. Súcuan na cóo. Amén.

CARTA HN JEE NI TEE SAN JUAN APOSTOL NUU ÑAYUU CACANDIJE

Jnūhun cotecu yō nií cáni

1 Jnūhun cátee ri cuajeē nuū rō jijnáhan ró cúu jnūhun máá Yaā jeē je íyó ndé ná tu jecōo tāca jéē íyó. Te ni cajini sōho ri jeē ni cáhān yā, te ni cajito jínúū rī yā, chi ni cajito vāha ri nuū yā, te ni cajniī ri yā. Te máá yá cúu Jnūhun cotecu yō nií cáni. ²Chi Yaā yáha jéē sáha ya jeē cótecu yō, ni quenda ndijin yā. Te cácahān rī jnūhun ya, chi ni cajito ri yā. Te cácastūhun rí nuū rō jijnáhan ró síquī Yaā cúu Jnūhun cotecu yō nií cáni, Yaā ni condee jíin Tátá yō Yaā Dios, te ni quenda ndijin yā nuū rī jijnáhan ri. ³Jeē ní cajito ri jíin jéē ní cajini sōho ri, yūcuan cúu jeē cácastūhun rí nuū rō, návāha coo inuú ni rō jíin yó jijnáhan yó. Te jendaá chi cáhiyo inuú ni yō jíin máá Tátá yō Yaā Dios jíin Séhe ya Jesucristo. ⁴Te jnūhun yáha cátee ri cuajeē nuū rō, návāha cusiī teyí ni rō jijnáhan ró.

Yaā Dios cúu luz

⁵Te yāha cúu jnūhun ni steén Jesucristo nuū rī, te vijna cácastūhun rí nuū rō: Yaā Dios cúu luz, chi yōhyo ndaā yā, te tú

cuíti na jniñu néé íyó jíin yá. ⁶Núu cácahān yō jeē cáhiyo inuú ni yō jíin yá, te núu cájica yó nájñūhun nuū néé jeē sáha yó jniñu néé, núu súcuan te cástáhú yó, te nasūú jniñu ndaā casáha yó. ⁷Te núu cájica yó jíin luz yā jeē casáha yó jniñu ndaā, nájñūhun íyó máá yá jíin luz yā jeē sáha ya jniñu ndaā, yūcuán na te cáhiyo inuú ni yō jíin táca jnáhan yó. Te niñī maá Séhe ya Jesucristo sándoo yóhó núu ndiī cuēchi yó.

⁸Núu cácahān yō jeē tú na cuēchi yó, te cástáhú yó maá yó jeē jéni ni yō súcuan, te tu ñūhun jnūhun ndaā ini yō. ⁹Te núu nacani ndaā yō cuēchi yó núu yā, te cone cáhnu ni yā nuū cuēchi yó, te sándoo ya yohó ndiī jeē neé casáha yó. Chi jíin yō jeē Yaā vāha Yaā ndaā cúu ya. ¹⁰Te núu cácahān yō jeē tú na cuēchi yó, te nájñūhun sáha yó jéē Yaā stahú cúu ya, te tu cándíje ndije yó jnúhun ya.

Cristo cúu Yaā cahán jehē yō

2 Tāca jnúhun yáha téé ri cuajeē nuū rohó jéē cácuu ró nájñūhun sēhe ri, návāha ma sáha ró cuēchi jíijnáhan ró. Te núu ndé

iin ró ní sáha cuēchi, te íyó máá Yaā cahán jehē yō nuū maá Tátá yō Yaā Dios. Jesucristo Yaā ndaā cúu ya. ²Te ni socō yā maá yá jeē ndahva yā cuēchi yó, te nasūu cuéchi máá-ni yó, chi suni cuēchi ñayuu ní ñáyiví.

³Núu squícu yó jniñu ndácu Yaā Dios nuū yō, jíin yúcuan cúcáhnú ni yō jeē jíin ndije yó ndese Yaā cúu ya. ⁴Te núu cáhán iin ñayuu: Ruhū chi jíin rī ndese Yaā cúu ya, te núu tu squícu i jniñu ndácu ya, núu súcuan te stáhú i, te tu cáhán i jnūhun ndaā. ⁵Te sa ñayuu squícu jnūhun ya, je ni ije vāha ni i jeē maní i jíin yá. Súcuan te cuni yō núu ndúu yó jíin yá chí tuú. ⁶Núu cáhán iin ñayuu jeē nduú i jíin yá, cánuú jéē caca ndaā i nájñūhun ni jica Jesucristo.

Jniñu jéé ndácu ya nuū yō

⁷Hermano, nasūú iin jniñu jéé ndácu ri nuū rō jeē cahán rī jeē na cundáhú ni rō jnáhan ró. Chi jniñu jeē je cájini rō nde ná ni quejéé ró candíje ró cúu. Te jniñu yáha jeē ndácu ya, vēji nde jenahán, te suu cúu jnūhun ni cajini sōho ró ndé quiví ní quejéé ró candíje ró. ⁸Te vēsú súcuan, te níni jniñu jéé cúu, te jniñu ndaā cúu nuū Cristo jíin núu maá ró jijnáhan ró. Chi je cuayāha jniñu néé jéé iyó núu nēé, te je stéén maá luz ndaā ini anuá yō vijna.

⁹Núu iin ñayuu cahán i jeē jíca i jíin luz yā, te núu jíto uhū i jnáhan í, ñayuu ún chi jíca ga i nájñūhun nuū nēé jíin cuéchi. ¹⁰Te ñayuu jeē cundáhú ni jnáhan, chi jíca i jíin luz yā, cúu jeē sáha i jniñu vāha.

Te ni iin ma cúu sáha jeē quíví i cuéchi. ¹¹Te ñayuu jíto uhū jnáhan, chi íyó i nuū nēé, te jíca i nuū nēé. Te tu jíin i ndé chi quíhín i, chi nuū nēé un ní jesi jeē tu jécūhun ni i.

¹²Róhó jéé cácuu sēhe, téé ri jnūhun yáha cuájeē nuū rō, chi jeē siquí Jesucristo te ni ine cáhnú ni Yaā Dios nuū cuéchi ró. ¹³Róhó tátá jijnáhan ró, suni téé ri nuū rō, chi cájini rō ndese Yaā cúu Yaā iyó ndé xihna ñúhún. Róhó téé suchí jijnáhan ró, suni téé ri nuū rō, chi ni cacundeyí ró jeē tu ní cúu squívi jexeén rohó cuéchi.

Róhó jéé cácuu sēhe, téé ri jnūhun yáha cuájeē nuū rō, chi cájini rō ndese Yaā cúu máá Tátá yō Yaā Dios. ¹⁴Róhó tátá jijnáhan ró, suni téé ri nuū rō, chi cájini rō Yaā iyó ndé xihna ñúhún. Róhó téé suchí jijnáhan ró, suni téé ri nuū rō, chi cáhīin nihin ró, te cácandíje ró jnūhun Yaā Dios, te ni cacundeyí ró síquī jexeén.

¹⁵Ma cutóo ni rō síquī ñayiví, ni tāca jéé iyó ini ñayiví. Chi núu ndé ñayuu cutóo ni i síquī ñayiví, ñayuu ún tu íyó maní i jíin Tátá yō Yaā Dios.

¹⁶Chi tāca jéé cúu cuenta ñayiví, nasūu ndé nuū Tatá yō Yaā Dios vēji, chi cuenta ñayiví cúu. Te yúcuan cúu tāca jéé cájini ni yō jeē cuní modo neé máá yó, jíin jéé ndíyo ni yō jeē jíto yó núu, jíin jéé sandúxí yó maá yó síquī ndajniñu névaha yó. ¹⁷Te cuandíhi ñayiví jíin táca jéé ndíyo néé ni yō. Te ñayuu casáha jeē cuní maá Yaā Dios, chi cotecu i ní cáni.

Jnūhun ndaā jíin jnūhun stáhú

¹⁸Róhó jéé cácuu nájñūhun sēhe ri, cáhán rī jíin ró jeē cuandíhi

quivī. Te je ni cajini jñuhun ró jéē quíji máá téē cuu contra siquī Cristo. Te nde vijna je ni canecoo cuehē tēē jeē cácuu contra siquī Cristo. Te jeē yúcuu jíni yō jeē cuándihi quivī. ¹⁹Mēhñu máá yó ni quendacoo de, te nasūu jnáhan yó cácañdije cácuu de. Chi núu jeē jnáhan yó cácuu de, te quendōo de jíin yó nuú. Te ni quenda de cuangoo de, návāha cuni cají yó jéē násūu jnáhan yó cácuu ndihi de.

²⁰Te máá ró jijnáhan ró, chi Cristo ni jēhe ya Espíritu Santo, ndeé yá ini anuá rō, te jeē yúcuu cájini rō jñuhun ndaā. ²¹Núu súcuu te téē ri yāha cuájēē nuū rō, siquī jeē cájini rō jñuhun ndaā, nasūu síquī jeē tu cájini rō. Te cájini rō jeē tú na jñuhun stáhú íyó nuū jñuhun ndaā.

²²¿Ndeé ñin cúu jeē cahán máni jñuhun stáhú? Suu tēē jeē cahán jeē Jesús, tu cúu ndije ya Cristo, Yaā ní tají Yaā Dios. Yúcuu cúu tēē jeē cúu contra siquī Cristo, chi tu jéjñuhún de máá Tátá yō Yaā Dios jíin Séhe ya. ²³Tāca ñayuu jeē tu jéjñuhún i Sēhe ya, suni tu íyó máá Tátá jíin i. Te ñayuu jeē jejñuhún i Sēhe ya, suni íyó máá Tátá jíin i.

²⁴Núu súcuu te chuhun vāha ni rō maá jñuhun ni cajini sōho ró ndé jeē xíhna ñuhún. Te núu ñuhun vāha ni rō jñuhun ní cajini sōho ró ndé jeē xíhna ñuhún, yúcuán na te suni ndúu ró jíin máá Tátá yō jíin Séhe ya. ²⁵Te yāha cúu jñuhun jeē ni jéjñuhun Jesucristo nuū yō: jeē cótecu yō níí cáni sáha ya.

²⁶Jñuhun yáha ní tee ri nuū rō jeē cástuhun rí siquī ñayuu cánducú stáhú rōhó. ²⁷Te máá ró jijnáhan ró,

chi ni jēhe Jesucristo Espíritu Santo, ndeé yá ini anuá rō. Te jeē yúcuu tu jíni ñuhún jéē steén ni ñin ñayuu nuū rō ndé vé cúu jendaá, chi máá Espíritu cúu jeē steén ndihi nuū rō, te steén yā jñuhun ndaā, chi tu stáhú cuíti yā. Núu súcuu te caca ndúu ró jíin Cristo, nájñuhun steén Espíritu nuū rō.

²⁸Séhē jijnáhan ró, vijna te na cáca ndúu ró jíin Cristo, návāha núu na quenda ndijin yā, te ma yūhu yó, ni ma cúcanu yō nuū yā quivī ndíji ya. ²⁹Chi je cájini rō jeē Yaā ndaā cúu Jesucristo, te suni na jécuhun ni rō jeē tāca ñayuu casáha jniñu ndaā, sēhe Yaā Dios cácuu i.

Jñuhun ñayuu cácuu sēhe Yaā Dios

3 Nacā jeē yóhoyo ni cundáhú ni Tatá yō Yaā Dios yohó, chi ni nihin yō jñuhun cuu yó séhe ya, te suu cúu ndije yó. Jeē yúcuu, ñayuu ñayiví tu cájini i jeē cúu yó séhe ya, chi tu jíin i ndese Yaā cúu máá yá. ²Ñáni mání, vijna te cúu yó séhe Yaā Dios, te ná tu cuni yō ndese coo yó níí cáni. Te je jíin yō jeē quivī quenda ndijin Jesucristo, te nduu yó nájñuhun íyó máá yá, chi coto yó núu yā ndese íyó yá. ³Te tāca ñayuu jeē súcuu ñuhun ni i, chi sándoo i ánuá i, nájñuhun íyó ndoo Jesucristo.

⁴Te ñayuu casáha cuēchi, chi stívi i ley Yaā Dios. Chi núu sáha yó cuēchi, te stívi yó ley yā. ⁵Te je cájini rō jeē ní quiji Jesucristo ini ñayiví návāha quende yā cuēchi yó. Te máá yá tú na cuēchi ya. ⁶Te tāca ñayuu jeē ndúu i jíin yá, tu cájica i jíin cuēchi. Te tāca ñayuu cájica jíin cuēchi, tu jíin i ya, ni

tu jécūhun ni i ndese Yaā cúu ya. ⁷Séhē jijnáhan ró, coto ró jéē ma stáhú ni ìn i róhó. Chi na jécūhun ni rō jeē ñáyuu casáha jniñu ndaā, máá i cácuu ñayuu ndaā, nájñūhun íyó ndáá maá yá. ⁸Te ñayuu casáha cuēchi, máá i cácuu sēhe jexeén. Chi jexeén cúu jeē sáha cuēchi vēji nde jeē xíhna ñúhún. Jeē yúcuan ní quiji Sēhe Yaā Dios, jeē snáa yā tācá jniñu néé sáha jexeén.

⁹Ni ìn ñayuu jeē cúu sēhe Yaā Dios, tu jíca i jíin cuēchi, chi ni sáha Yaā Dios jeē ní nduu i nájñūhun íyó máá yá. Te ma cúu ga caca i jíin cuēchi, chi sēhe Yaā Dios cácuu i. ¹⁰Súcuan cuni yō ndé ìn cúu sēhe Yaā Dios jíin sēhe jexeén: Tāca ñáyuu jeē tu sáha jniñu ndaā, jíin jéē tu cúndáhú ni jnáhan, nasūu sēhe Yaā Dios cúu i.

Jeē na cúndáhú ni yō jnáhan yó

¹¹Yāha cúu jñūhun jeē ní cajini sōho ró ndé jeē xíhna ñúhún: jeē na cúndáhú ni yō jnáhan yó. ¹²Te ma sáha yó nájñūhun ni sáha Caín, jeē ní cuu de sēhe jexeén, te ni jehni de ñani de. ¿Te najehē ni jehni de ñani de? Siquī jeē ñani de ni sáha jniñu ndaā te máni jniñu néé ní sáha máá de.

¹³Hermano jijnáhan ró, ma cunéé ni rō te núu ñayuu ñayīvi cáquitī ni i nuū rō. ¹⁴Te máá yó chi siquī jeē cundáhú ni yō jnáhan yó, súcuan jíin yō jeē jé ní cācu yó jéē cótecu yō níí cáni. Te ñayuu jeē tu cúndáhú ni jnáhan, íyó i jíin jñūhun jnahñu ndetū i. ¹⁵Chi tāca ñáyuu quitī ni nuū jnáhan, nájñūhun ñayuu jéñni ndīyi cúu i. Te cájini rō jeē ñayuu jéñni ndīyi,

ma nihín tahú i cotecu i níí cáni.

¹⁶Jeē ni jíhī Cristo jehē yō, yúcuan cúu jeē steén cají ndese cúu jñūhun cúndáhú ni. Te máá yó, chi suni súcuan jíin ñúhún cundáhú ni yō jnáhan yó vēsú na cúu yō jehē i. ¹⁷Te núu névāha yó jéē cótecu yō ñayīví, te núu jíin yō jeē cúmanī nuū jnáhan yó, te núu tú cundáhú ni yō i cuāha yó jéē jíin ñúhún i, núu súcuan ¿te á íyó máni yō jíin Yaā Dios, chi naún? ¹⁸Séhē jijnáhan ró, ma cundáhú ni yō jíin máá jñūhun cáhán-ni yó, chi sa suhva na cúndáhú ndije ni yō nde jíin jniñu sáha yó.

Ndese cucáhnu ni yō jeē váha sáha yó núu Yaā Dios

¹⁹Te súcuan cundaā ni yō jeē squícu yó jñūhun ndaā, te cucáhnu ni yō jeē váha sáha yó núu yā. ²⁰Chi núu ánuá yō tú vāha sáha siquī jeē íyó cuēchi yó, te Yaā Dios chi cújéñnu ga yā vēsú anuá yō, te jíin ndihī ya tācá un. ²¹Núu súcuan ñáni máni, núu vāha sáha ánuá yō siquī jeē tú na cuēchi yó, yúcuan na te cucáhnu ni yō jeē váha sáha yó núu Yaā Dios. ²²Te tāca jéē cacán yō nuū yā, te sáha ya jeē cahán yō, chi squícu yó jniñu ndácu ya te sáha yó jniñu jeē cúsi ni yā. ²³Te yāha cúu jniñu ndácu ya: jeē na cándije yó jéē ni sáha Sēhe ya Jesucristo jehē yō, jíin jéē na cúndáhú ni yō jnáhan yó, nájñūhun ni ndacu ya jniñu nuū yō. ²⁴Te tāca ñáyuu squícu jniñu ndácu Yaā Dios, ndúu i jíin yá, te ndéé yá ini anuá i. Te jíin máá Espíritu jeē ni jéhe ya jeē ndeé ini anuá yō, jíin yúcuan te jíin yō jeē ndeé Yaā Dios ini yō.

**Jnūhun jeē vēji nuū Espíritu jíin
jnūhun cáhán contra Cristo**

4 Nánī mánī, ma candíje ró táca tée jéē cácahān de jeē jíin Espíritu Yaā Dios cácanani de jnūhun. Chi sa suhva coto ndee rō de, núu nde nuū Yaā Dios vēji jnūhun cácahān de, chí tuú. Chi ini ñayīví je ni canecoo cuehē tēe cácanani jnūhun stáhú, te cácahān de jeē ndé nuū Yaā Dios vēji. ²Te súcuan nacuni rō ndé-ni i cúu jeē jíin Espíritu Yaā Dios cahán: táca ñáyuu jeē cácahān ndaā jeē ní quiiji Jesucristo, ni nduu ya tēe, máá i cúu jeē jíin Espíritu Yaā Dios cácahān. ³Te táca ñáyuu jeē tu cájejnūhún jeē súcuan ni nduu ya tēe, máá i chi nasūu jíin Espíritu Yaā Dios cácahān i. Chi sa suhva cácuu i contra siquī Cristo. Te je ni cajini jnūhun ró jéē quíjicoo ñayuu súcuan, te vijna je cáhiyo i ini ñayīví.

⁴Séhē jijnáhan ró, máá ró cácuu sēhe Yaā Dios, te je ni cacundeyí ró siquī tée cástáhú un. Chi jéhnu ga cúu poder maá Yaā jeē ndeé ini rō, vēsú poder maá jéē ndeé jíin ñáyuu ñayīví jéē castáhú. ⁵Máá i cácuu cuenta ñayīví, te jeē yúcuan cácahān i jnūhun cuenta ñayīví. Te ñayuu cácuu cuenta ñayīví, cajini nahín i jnūhun ún. ⁶Te máá yó chi sēhe Yaā Dios cácuu yó. Te ñayuu jeē cajini i ndese Yaā cúu Yaā Dios, máá i cajini nahín i jnūhun cácahān yō. Te ñayuu jeē násūu sēhe Yaā Dios cácuu, máá i tu cajini nahín i jnūhun cácahān yō. Te súcuan nacuni yō ndé-ni cúu jeē cahán jnūhun ndaā jíin ndé-ni cúu jeē cahán jnūhun stáhú.

**Máni jnūhun cúndáhú
ni iyó jíin Yaā Dios**

⁷Nánī mánī, na cúndáhú ni yō jnáhan yó, chi jnūhun cúndáhú ni, nde nuū Yaā Dios vēji. Te táca ñáyuu cundáhú ni jnáhan, chi sēhe Yaā Dios cúu i, te jíní i ndese Yaā cúu Yaā Dios. ⁸Te ñayuu jeē tu cúndáhú ni jnáhan, tu jíní i ndese Yaā cúu Yaā Dios, chi mání jnūhun cúndáhú ni iyó jíin Yaā Dios. ⁹Súcuan ni steén Yaā Dios ndese cúndáhú ni yā yohó, chi ni tají yá Sēhe ya ni quiiji ini ñayīví yáha, vēsú mañūhún-ni ya iyó, návāha cotecu yō ní cáni sáha ya. ¹⁰Te yáha cúu jnūhun cúndáhú ni: nasūu jéē xíhna maá yó ni iyo maní yō jíin Yaā Dios, chi sa suhva máá yá cúu jeē ní cundáhú ni yā yohó. Te ni tají yá Sēhe ya ni quiiji, návāha socō yā maá yá jeē quende yā cuēchi yó.

¹¹Nánī mánī, núu súcuan ni cundáhú ni Yaā Dios yohó, te suni súcuan cánuu jeē cundáhú ni yō jnáhan yó. ¹²Ni iin ñayuu tu ní jító cuiti nuū Yaā Dios. Te núu cúndáhú ni yō jnáhan yó, te ndeé Yaā Dios ini anuá yō, te je ni ije vāha ni yō jíin jnūhun cúndáhú ni. ¹³Te máá Espíritu Santo jeē ni jéhe ya jeē ndeé ini yō, máá yá steén jeē nduú yó jíin Yaā Dios, te ndeé Yaā Dios ini yō. ¹⁴Te ni cajito ri te cácastūhun rí jeē maá Tátá yō ni tají yá Sēhe ya ni quiiji návāha jnama ya ñayuu ñayīví. ¹⁵Te núu ndé ñáyuu jejnūhún i jeē Séhe Yaā Dios cúu Jesús, te ndúu i jíin Yaā Dios, te Yaā Dios ndeé yá ini i.

¹⁶Te máá yó, je ni jini yō te ni candíje yó jéē cundáhú ni Yaā Dios

yohó. Chi máni jnūhun cundáhú ni iyó jíin Yaā Dios. Te ñayuu cundáhú ni jnáhan, ndúú i jíin Yaā Dios, te ndéé yá ini anuá i. ¹⁷Te súcuan cúu jeē íje vāha ni yō jíin jnūhun cundáhú ni, návāha ma yūhu yó quivī sándaā yā jniñu yó. Chi nájñūhun cundáhú ni Cristo, suni súcuan cándaā máá yó ini ñayīvi yáha. ¹⁸Te núu manī yō jíin yá, te tu yúhú yó nuū yā. Chi núu ni íje yó jíin jnūhun manī yō jíin yá, te tú na siquī yuhú yó nuū yā. Chi jnūhun yúhú un cúu jeē yuhú yó ndoho yó castigo. Jeē yúcuan ñayuu cáyūhú chi ná tu íje vāha i jíin jnūhun manī i jíin yá.

¹⁹Te yóhó chi manī ndasí yó jíin Yaā Dios, chi xihna gā maá yá ni cundáhú ni yā yohó. ²⁰Te núu ñin ñayuu cahán i jeē manī i jíin Yaā Dios, te núu quítí ni i nuū jnáhan i, núu súcuan te ñayuu stahú-ni cúu i. Chi núu ñin ñayuu tu íyó mání i jíin jnáhan i jeē jíto i nuū, te ni ma cúu coo manī i jíin Yaā Dios jeē tu jíto i nuū yā. ²¹Chi je ni ndacu ya jniñu yáha nuū yō: Ñayuu jeē manī i jíin Yaā Dios, suni na cóo manī i jíin jnáhan i.

**Jeē cundeyí yó siquī jeneé
íyó ini ñayīvi**

5 Tāca ñayuu jeē cácandíje i jeē Jesús cúu Cristo, Yaā ní tají Yaā Dios, máá i cácuu sēhe Yaā Dios. Te ñayuu manī jíin Yaā cúu Tátá, suni cácundáhú ni i ñayuu cácuu sēhe ya. ²Súcuan jíin yō jeē cundáhú ni yō ñayuu cácuu sēhe ya, núu manī yō jíin yá te squícu yó jniñu ndácu ya. ³Chi jeē squícu yó jniñu ndácu Yaā Dios cúu jeē

maní yō jíin yá. Te jniñu ndácu ya chi tú vēyi. ⁴Chi tāca ñayuu cúu sēhe Yaā Dios, cundeyí i siquī jeneé íyó ini ñayīvi. Te jeē candíje yó jéē cundáhú ni yā yohó, yúcuan cúu fuerza jeē sáha jeē cundeyí yó. ⁵Máá-ni ñayuu jeē candíje jeē Jesús cúu Sēhe Yaā Dios, máá i cúu jeē cundeyí siquī jeneé íyó ini ñayīvi.

**Jnūhun cahán ndaā
siquī Sēhe Yaā Dios**

⁶Te jeē ní quiji Jesucristo ini ñayīvi, chi ni jendute ya jíin ndute, te ni jeti niñī yā jeē ni jíhī yā jehē yō. Te nasūu máá ñin-ni jeē ní jendute ya jíin ndute, chi suni ni jeti niñī yā. Te máá Espíritu Yaā Dios cahán ndaā siquī yā, chi nuū maá Espíritu vēji jnūhun ndaā. ⁷Chi ini andiví íyó únī jeē cácahān ndaā siquī jnūhun yáha: máá Yaā cúu Tátá, jíin Yaā cúu Jnūhun, jíin Espíritu Santo. Te ndinúni yá, chi ñin-ni cúu ya. ⁸Te ini ñayīvi suni íyó únī jeē steén ndaā: máá Espíritu, jíin jéē ní jendute Jesús, jíin jéē ní jeti niñī yā. Te ndinúni yáha, chi ñnuú-ni stéén siquī yā. ⁹Te cájetáhú yó jnūhun cácahān ndaā tēe, te jéhnu ga cúu jnūhun cahán maá Yaā Dios. Te jnūhun ni cahán yā cúu jnūhun siquī Sēhe ya. ¹⁰Ñayuu cácandíje jeē Sēhe Yaā Dios cúu Jesús, je ní cacundaā ni i jnūhun yáha jeē ni cáhān Yaā Dios. Te ñayuu jeē tu cácandíje jeē ni cáhān Yaā Dios, nájñūhun cásáha i jeē Yaā stahú cúu ya, chi tu cácandíje i jnūhun ni cahán ndaā yā siquī Sēhe ya. ¹¹Te jnūhun ndaā un cúu jeē ni sáha ya jeē cótecu yō níí cáni, te Sēhe ya ndíso jnūhun cotecu yō.

¹²Ñayuu jeē iyó Séhe ya jíin i, je ni nihín tahú i cotecu i. Te ñayuu jeē tu iyó Séhe ya jíin i, ma nihín tahú i cotecu i.

Jnūhun consejo jeē sándīhí

¹³Jnūhun yáha tée ri nuū rohó ñáyuu cácandíje Séhe Yaā Dios, návāha cucáhnū ni rō jeē ni níhín tahú rō cotecu rō níí cáni.

¹⁴Te cúcáhnū ni yō Yaā Dios, chi jíiní yō jeē núu na vé jicán yō nuū yā jeē suni cúní maá yá, te jíiní nahín yá jeē jicán yō. ¹⁵Te núu jíiní yō jeē jíiní nahín yá jeē jicán yō, núu súcuan te suni jíiní yō jeē sáha ya jeē jicán yō.

¹⁶Núu ññ ñayuu jíiní i jeē sáha jnáhan i cuēchi jeē násūu cuēchi jeē jnahnú ndetū i cúu, te na cácan tahú i nuū Yaā Dios, te cuāha ya jnūhun cotecu jnáhan i, te núu nasūu cuēchi jeē sáha jeē jnahnú ndetū i cúu. Iyó cuēchi jeē

jnahnú ndetū i sáha, te tu cáhán rī jeē cacán tahú rō jehē ñayuu sáha cuēchi súcuan. ¹⁷Tācá jniñu néé cúu cuēchi, te iyó cuēchi jeē násūu jéē jnahnú ndetū i cúu.

¹⁸Te jíiní yō jeē tāca ñáyuu cácuu séhe Yaā Dios, tu jíca i jíin cuēchi. Chi Yaā cúu Séhe Yaā Dios, ndíto vāha ya i. Te tú na vé cúu sáha jexeén jíin i.

¹⁹Te jíiní yō jeē séhe Yaā Dios cácuu yó. Te ñayuu níí ñáyīvi yíhi i ndaha jexeén.

²⁰Te suni jíiní yō jeē ní quiji Séhe Yaā Dios, te ni sáha ya jeē jécūhun ni yō, návāha cuni yō ndese Yaā cúu máá Yaā ndaā. Te ndúú yó jíin Yaā ndaā, suu jíin máá Séhe ya Jesucristo. Máá yá cúu ndije Yaā ndaā, te máá yá sáha jeē cótecu yō níí cáni. ²¹Séhē jijnáhan ró, na cújiyo ró núu tāca jéē násūu Yaā ndaā cúu. Súcuan na cóo. Amén.

CARTA UU JEE NI TEE SAN JUAN APOSTOL

Jnūhun ndaā jín jnúhun cúndáhú ni

¹Máá ná cúu tēe jéhnú ndíso jniñu, te tēe ná carta yáha cuájeē nuū ni jēē cúu ní hermana ni nacāji Yaā Dios, jín núu séhe ní jínáhan i. Te maní na jín ní jijnáhan ní sáha jnūhun ndaā yā, te nasūu máá-ni ná, chi suni tāca ñáyuu jiní jnūhun ndaā. ²Te maní na jín ní jijnáhan ní síquī jeē cácanđije yó jnúhun ndaā yā jeē iyó ini anuá yō, te coo jín yó ní cáni. ³Te ñúhun ni na jēē Tatá yō Yaā Dios jín Séhe ya Jitoho yō Jesucristo, na sáha ga yā jeē váha níhín, te cundáhú ni yā nihín, te sáha ya jeē coo ndeyí coo síi ni ní, jín jnúhun ndaā jín jnúhun cúndáhú ni.

⁴Yōhyo ni cusíi ni ná, chi ni jini na jēē sava séhe ní cájica i jín jnúhun ndaā, nájñūhun ni ndacu máá Tatá yō Yaā Dios jniñu nuū yō. ⁵Hermana, cáhán ndahú ná jín ní jeē na cúndáhú ni yō jnáhan yó. Te jnūhun tēe ná yáha cuájeē nuū ní, nasūú ñiñ jniñu jéé sá ndacu ya cúu, chi jniñu ní ndacu ya nuū yō nde ná ni quejéé yó candíje yó cúu. ⁶Te jeē cundáhú ni yō jnáhan yó cúu jeē caca yó nájñūhun ni ndacu ya jniñu

nuū yō. Te jniñu ní ndacu ya cúu jeē caca ní jín jnúhun cúndáhú ni, nájñūhun ni cajini sōho ní ndé ná ni quejéé ní candíje ní.

Siquī tēe cástáhú

⁷Chi cuehē tēe cástáhú ni canecoo de ní ñáyiví, te tu cájejnúhún de jeē ní quiji Jesucristo ni nduu ya tēe. Te tēe tu cájejnúhún súcuan, cácuu de tēe stáhú, te cácuu de contra síquī Cristo. ⁸Coto ní jēē ma snáa ni táhū síquī jniñu váha ni casáha ní, chi sa suhva jeē na níhín ni ndihí tahū ní.

⁹Núu ndé ñáyuu jní inga jnūhun, te tu quéndōo i jín jnúhun ni steén Cristo, núu súcuan te tu iyó Yaā Dios jín i. Te ñayuu quéndōo jín jnúhun ni steén Cristo, chi iyó Tatá yō jín i, te suni iyó Séhe ya jín i. ¹⁰Te núu jinū ñiñ ñayuu vehe ní, te núu tu quíjnáhan jnūhun stéén i jín jnúhun yáha, te ma cuáha ní jnúhun condee i vehe ní, ni ma cahán ni jnúhun ndeyí ni jín i. ¹¹Chi ñayuu cahán jnūhun ndeyí ni jín i, chíndéé ñájñáhan jín i síquī jniñu néé casáha i.

Jnūhun sandíhí

¹²Iyó cuehē gā jnūhun cahán na jín ní jijnáhan ní, te tu cúní na tee

ná núū tútu jíín tinta. Chi ñúhun
ni na cuájeē ná coto jnáhan yó, te
ndajñúhun yó, návāha cusīī ndasí
ni yō.

¹³Tāca séhe cuhū ní, ñahan
jeē suni ni nacāji ya, cácahān i
jeē sándeýí ni ní. Súcuan na cóo.
Amén.

CARTA UNI JEE NI TEE SAN JUAN APOSTOL

Jeē jejnúhún de tēe nání Gayo

¹Máá rí cúu tēe jéhnú ndíso jníñu, te tēe ri carta yáha cuájeē nuū rō, amigo Gayo, chi manī rī jíin rō sáha jnūhun ndaā.

²Ñánī mánī, jícan tahú rī jeē vāha na quíhín tēcá jniñu sáha rō, jíin jēe na cóo vāha rō, nájñuhun íyó vāha ánuá rō jíin jnúhun ya.

³Yōhyo ni cusīi ni rī ná ni quecoo sava hermano te ni cacastūhún de nuū rī ndese vāha squícu rō táca jniñu ndaā, chi jíca ndaā rō. ⁴Tuá na inga sáha jeē cusīi gā ni rī, chi mánī jeē nihín rī jnūhun jeē cájica ndaā ñayuu cácuu nájñuhun sēhe ri siquī jeē ni scándíje ri i.

⁵Ñánī mánī, yōhyo vāha sáha rō jēe chindéé ñáhán rō tēcá hermano, te víhyá gā núu tēe ñuu jíca cácuu de. ⁶Chi tēe un ní canacani de jnūhun nuū ñayuu cácandíje yāhá, ndese cúndáhú ni rō de. Te jícan rī jeē chindéé ñáhán gá rō de, núu na vé jíni ñúhún de jeē caca ga de ichi nuū quíhín de, nájñuhun nújnahan ní Yaā Dios. ⁷Chi tēe un ní quendacoo de cájica de siquī jniñu Jesucristo. Te tú na vé cáquihín de nuū ñayuu jeē tu jíni jnūhun Yaā

Dios. ⁸Jeē yúcuau canúu coto yó de, chindéé ñáhán yó de jeē canacani de jnūhun ndaā.

Siquī jeē tú vāha sáha Diótrefes

⁹Je ni tee ri iin carta nuū ñáyuu cácandíje jíñā. Te Diótrefes, tu jétáhú de jnūhun cáhán rī, siquī jeē cuní de cujéhnú máá de nuū i. ¹⁰Jeē yúcuau, núu na jéé rī te cahán rī nuū de siquī jniñu sáha de, chi yōhyo sájñuhún de te cáhán de jnūhun stáhú síquī rī jíjnáhan ri. Te nasūu máá yúcuau-ni sáha de, chi suni tu jétáhú de tēcá hermano jéngoo nuū de, te jési de jeē ma cuátáhú ñáyuu nuū tēcá hermano un. Te ñayuu cájetáhú nuū hermano un, quénehen de i nuū cándutútú ñayuu cácandíje.

¹¹Ñánī mánī, ma ndácu rō ñáyuu casáha jniñu néé, chi sa suhva ñayuu casáha jniñu vāha. Chi sēhe Yaā Dios cácuu ñayuu casáha jniñu vāha. Te ñayuu casáha jniñu néé, tu cájini i ndese Yaā cúu Yaā Dios.

**Jeē cácahán i jeē vāha
sáha Demetrio**

¹²Tāca ñáyuu chi cácahán i jeē vāha sáha Demetrio. Te jniñu ndaā

jeē sāha de, stéén jeē téé ndaā cúu de. Te suni súcuan cácahān maá rí, te cájini rō jeē iyó ndáā jnūhun cáhān rī.

Jnūhun sandīhí

¹³Iyó cuéhē gā jnūhun cahān rī jín rō, te tu cúní rī tee ri jín

tinta jín pluma. ¹⁴Chi nūhun ni rī cuajeē yachī rī coto jnáhan yó, te ndajnūhun yó.

¹⁵Te nūhun ni rī jeē na cóo ndeyí coo sī ni rō. Tācá amigo yō yāha cácahān i jeē sándeýí ni rō. Te suni cahān rō jín ĩn ĩn amigo jīnā jeē sándeýí ni i, áchí rí, te cocahān yō.

CARTA JEE NI TEE SAN JUDAS

APOSTOL NUU ÑAYUU CACANDIJE

¹Máá rí cúu Judas ñani Jacobo, te mozo Jesucristo cúu ri. Te tée ri carta yáha cuájeē nuū roho ñáyuu jeē ní cana máá Tátá yō Yaā Dios, te ni sáha ya jeē iyó ndoo íyó lí rō nuū yā jeē cácuu ró ñáyuu manī yā jíín. Te Jesucristo ndíto vāha ya roho jéē cáyihī ró ndaha ya. ²Te ñúhun ni rī jeē na cúndáhú gá ni yā roho, te sáha ya jeē coo ndeyí coo sīh ni rō, te coo manī ndasí yá jíín ró, te na ndúcuehē gā tāca jéē yáha núu rō.

Siquī tēe cástéén jnūhun stáhú

(2 Pedro 2.1-17)

³Ñánī mánī, yōhyo ní cuu ni rī tee ri nuū rō siquī jnúhun ni jnama ya roho jíín rúhū jijnáhan yó. Te ni jini rī jeē cánuú gá tee ri carta jeē stihví ni rī roho návaha nducú ndéyí ró jeē ma cási ñáyuu nuū jnúhun cácandije yó. Te jnūhun ún chi je ni jēhe ya iin jíinu-ni nuū tāca ñáyuu maá yá. ⁴Chi sava tēe ni castáhú de róho ní quívicoo de mēhñu ró. Te tēe ún chi nde jenahán je cáhán tutu iī jeē jnahnú ndetū de siquī jniñu cásaaha de. Cácuu de tēe ndevāha, chi cácahān de jeē vāha ni Yaā Dios, te jeē yúcuan vetū-ni sáha de jniñu néé, cácahān

de. Te tu cájejnúhún ndije de Jitoho yō Jesucristo jíín Yaā Dios, jeē mañúhún-ni ya cujéhnú nuū yō.

⁵Te vijna chi vēsú je cájini vāha ró, te cúní rī jeē na núcúhun ni rō ndese ni sáha máá Jitoho yō. Chi ni jnama ya ñáyuu Israel jenahán, ni chindéé ñájnáhan ya i jeē ní jinu i ini ñuu tatú Egipto cuahān i. Te vēsú súcuan te cuéé gá te ni snáa yā sava i jeē tu ní cácandije i. ⁶Te suni nucúhun ni rō siquī ndajéhé yā jeē ní castóo jniñu ndíso, te ni castóo nuū ní ndeē andiví. Te Yaā Dios ni chindihiyū yā jijnáhan, te cándetu nde quiiji quiví cáhnu jeē sándaā yā jniñu. Te cánuhni jíín cadena, cáyūcu ní cáni nuū cunú núu néé. ⁷Te suni ni stóho ya ñáyuu ñuu Sodoma jíín ñuu Gomorra jíín sava ga ñuu jeē ní iyo yajni, chi suni ni casáha néé i nájnūhun ni casáha tāca ndajéhé un ndé jenahán gá. Te máá i ni cajica jnéni i te ni casáha i tāca cuéchi néé ndasí. Te ni canihīn i castigo ñuhūn jeē cayú ní cáni, te súcuan cúu i iin ejemplo nuū ndihī ñáyuu.

⁸Te tēe cástáhú jeē ní quívicoo mēhñu ró, vēsú cájini de jeē súcuan ni sáha ya, te cájeni cáhá ni de, te

cásáha jnéhén de yiqui cúñu de, te cásquéhichī ni de tēe cándacu jniñu Jitoho yō, te cácahān ndevāha de siquī tāca jéé cácujuhēnu nuū sucún. ⁹Te nasūu súcuan ní sáha ndajéhé Miguel, vēsū ndajéhé cujuhēnu ga cúu ya. Chi tu ní cáhán ndevāha ya ni tu ní ndácunehen ya cuēchi siquī jexeén ná ni casásáhán jnáhan ya jíin jéxeén un jeē siquī yiqui cúñu Moisés ná ni jihī de. Chi suhva-ni ni cahān yā: Máá Yaā Dios, Yaā cúu Jitoho, cuxeēn yā nuū rō, ni achi Miguel. ¹⁰Te tēe cástáhú yáha chi cácahān neé de siquī tāca jéé tu cájécūhun ni de. Te tāca modo cánevāha de siquī jeē sá cáa de, nájnūhun quitī yúcú jéé sá cáa tí, suu yūcuan sáha jeē jnahnú ndetū de.

¹¹Nacā xeēn ndoho de núu súcuan, chi tu cájetáhú de Yaā Dios, nájnūhun jeē tu ní jétáhú Caín. Te siquī jeē cácuñi de nihīn de xūhún te cástéén de jnūhun stáhú, nájnūhun ni sáha Balaam. Te jnahnū ndetū de nájnūhun Coré, tēe ni jihī siquī jeē ní cunihni ni de. ¹²Tēe yáha núu cándutútú de jíin ró jeē cáyeji manī rō, te cásáha de jniñu cúcanu rō. Chi cáyeji cájihī sīi ni de, te tu cásáha de cuenta ndese caji inga ñayuu, chi máni máá de ndíhvī ni de caji vāha de. Te cácuu de nájnūhun vicō ichi jéé stechí táchi. Te suni cácuu de nájnūhun yujnu jeē tu jéhe ndehē maá tiempo. Te cácuu de nájnūhun yujnu jeē ní quenda nde jíin yoho, te tú cuiti gā na modo nane numa. ¹³Te nájnūhun jeē jisó cóyo ndute mar te cáne tiñū, súcuan jícu de jíin jniñu neé jéé cúu jnūhun canu. Te cácuu de

nájñūhun quīmī jeē ní sana ichi. Te je íyó túhva nuū neé nuū lúchi jnúú coyúcú de ní cáni.

¹⁴Te jeē ní yáha iñū yucūn Adán, te ni cacu Enoc, te ni nacani de jnūhun jeē ni stéén Yaā Dios nuū de siquī tāca tēe yáha, áchí de: Máá Jitoho yō ni steén yā nuū rī jeē iin quivī te quiji ya jíin cuéhē mil ñayuu maá yá. ¹⁵Te sándaā yā jniñu tāca ñayuu, te snáhnú ndetū yā tāca ñayuu casáha neé. Chi máni jniñu neé cásáha i siquī jeē canéé máá i, te cácahān i cuehē jnūhun ndevāha siquī yā. Ni achi Enoc. ¹⁶Tāca tēe yáha máni cácahān sōó de, te cácahān de siquī ñayuu. Te máni jeē cúsiī ni maá de cánducú de. Te cácahān de jeē tēe téyí cácuu de, te cácahān yīñūhún de jíin ñayuu návāha nihīn de jecu nuū i.

Jeē stíhvī ni Judas ñayuu cácañdije

¹⁷Te máá ró jijnáhan ró ñánī manī, na núcūhun ni rō jnūhun jeē jé ni canacani tēe cácuu apóstol maá Jitoho yō Jesucristo. ¹⁸Chi ni cacahān de: Nde nuū cuándihī quivī te quijicoo tēe sácatā siquī jnúhun ndaā yā, te sáha de tācá jniñu neé jéé ndíyo ni maá de. Súcuan ni cacastūhún apóstol. ¹⁹Tēe un cúu jeē casásīn ñayuu. Te máni cándihvī ni de tāca jéé cutíndí ni maá de, chi tu ndéé Espíritu yā jíin de.

²⁰Te máá ró ñánī manī, na íje vāha ni rō jíin jnúhun ndoo ndasí jéé cácañdije ró. Te cacān tahú rō jíin fuerza Espíritu Santo. ²¹Te quendōo nihin ró jíin jnúhun jeē cundáhú ni Yaā Dios rohó. Te condetu ró quivī jeē cótecu rō ní cáni sáha máá Jitoho yō Jesucristo siquī jeē cundáhú ni yā rohó.

²²Te sava ñayuu jeē cájeni siquí ni, nducú ró modo scandíje ró i. ²³Te sava ga i chi nducú ndéyí ró jeē cácu i nuū cuéchi i, jeē nájnūhun stáa ró i nuū ñuhún. Te cundáhú ni rō i jnama ró i, te coto ró máá ró, te cuquini ni rō coto ró nde sahma i jeē ní cujnehén jíin jniñu néé cásáha i.

Jnūhun cújéhnū Yaā Dios ñí cáni

²⁴Te Yaā Dios chi máñuhún-ni máá yá cúu Yaā ndichí, Yaā jnáma

yóhó. Te íyó poder yā jeē coto ya rohó jéē ma quívi ró cuéchi, jíin jéē sáha ya jeē cuíñi ró núū ndíndēe yá, te quiví ún coo ndoo ró núū yā, te cusíi ndasí ni rō sáha ya. ²⁵Te na cáhán yō jeē yóhoyo luu cújéhnū ya siquí jeē ni sáha ya jíin Jítóho yō Jesucristo. Te na cáhán yō jeē cujéhnū téyí yá, te ndácu ya jniñu jíin poder jeē ndíso ya nde jenahán ndasí jíin ndé vijna jíin ndé ñí cáni. Súcuan na cóo. Amén.

JNIÑU QUIJI JEE NI JITO NDIJIN SAN JUAN

Jeē ni stéén Jesucristo
tácá jniñu quiji

1 Jnūhun yáha cúu jeē ní cachi Yaā Dios nuū Jesucristo ndese coo tǎcá jniñu quiji, návāha nacastūhun yá nuū ñáyuu cácanđíje jeē cácuu i mozo yā. Te stéén yā nuū i tǎcá jniñu jeē yachī coo. Te ni tají yá ndajéhé yā ni quiji ya ni steén ndijin yā jniñu un núū ruhū Juan jeē cúu ri mozo yā. ²Te máá rí cástūhun ndāā rī siquī tǎca jēē ní jito ri ún, te nácani ndāā rī jnūhun Yaā Dios jíin jnúhun jeē ní cahān ndāā Jesucristo.

³Yōhyo ndetū ñayuu cahu tutu yáha, te suni yōhyo ndetū ñayuu cuni nahín jeē cáhu ñayuu tǎca jnúhun yáha jeē ní cachi Yaā Dios, te chuhun ni i. Chi je cuacuyajni quivī coo tǎcá jniñu yósó núū tútu yáha.

Jeē tée Juan carta nuū ndihúxá
grupo ñayuu cácanđíje

⁴Máá rí cúu Juan, te tée ri jnūhun yáha cuájeē nuū rohó, ndihúxá grupo ñayuu cácanđíje jeē cáyūcu Asia. Te ñúhun ni rī jeē máá Yaā Dios na sáha ga yā jeē váha róhó

jíjnáhan ró, te sáha ya jeē coo ndeyí coo siī ni rō. Chi máá yá cúu Yaā iyó vijna, te ni iyo ya níí cáni, te coo ya níí cáni. Te ñúhun ni rī jeē suni súcuan sáha ndihúxá Espíritu jeē cáhiin ya yuhu mesa nuū ndácu Yaā Dios jniñu. ⁵Te ñúhun ni rī jeē suni súcuan sáha Jesucristo, Yaā cahán ndāā tǎca jnúhun. Te xīhna gā maá yá ni natecu mēññu ndíyí. Te cújéhnū ya nuū tǎca rey jeē iyó ñayiví. Te máá yá cúndáhú ni yā yohó, te ni nacate ya yohó núū cuéchi yó jíin níñī yā. ⁶Te ni sáha ya jeē ní nduu yó rey jíin sútū cájejníñu nuū Tatá yā Yaā Dios. Te na cáhán yō jeē yóhyo luu cújéhnū ya te jníí ya poder níí cáni. Amén.

⁷Cuni sōho jíjnáhan ró, chi ndijí Cristo jíin vícō. Te ndíiví ñayuu coto i nuū yā, te nde jíin ñáyuu jeē ní castújí i ya. Te tǎca raza ñayuu níí cáhnū ñayiví ndahyū i jeē tu ní cácanđíje i ya. Súcuan nahín coo.

⁸Suhva cáhán maá Jítoho yō, Yaā jníí ndíhi poder: Máá rí cúu nájñūhun letra A xīhna ñúhún jíin letra Z jeē sándíhí na, chi máá rí níí squejéé ndíhi te máá rí sínu, áchí máá Yaā iyó vijna, te ni iyo ya níí cáni, te coo ya níí cáni.

**Jeē ní jito Juan jeē
cujéhnū luu Cristo**

⁹Máá rí cúu hermano rō Juan jijnáhan ró. Te inuú-ni ndóho ri jnūndóho jíin ró siquī jeē cácanđije yó Jesucristo, te inuú-ni ndácu Yaā Dios jniñu nuū yō, te inuú-ni jéndeŷí ni yō sáha Jesucristo. Te siquī jeē ní nacani ri jnūhun Yaā Dios jíin jéē ní cachi ndaā ri jnūhun Jesucristo, jeē yúcuan ní cajñi i ruhū cuenta preso, te ni cachune i ruhū isla jeē naní Patmos. ¹⁰Te ñin domingo ni jito ndijin rī jeē ni stéén maá Espíritu Santo nuū rī. Te ni jini sōho ri ñin jeē cána jee niñin ichi yátá rī nájnūhun jeē tívi trompeta. ¹¹Te ni cahān jíin rí:

Máá rí cúu nájnūhun letra A xihna ñúhún jíin letra Z jeē sándñí na, chi máá rí cúu Yaā iyó ndé xihna ñúhún te coo ri ñí cáni. Te na tée ró núú ñin tutu tāca jéē cóto ró, te tají ró quihñ nuū ndihúxá grupo ñayuu cácanđije jeē cáyūcú i ñí cáhnu Asia, suu ini ñuu Efeso, jíin ñuu Esmirna, Pérgamo, Tiatira, Sardis, Filadelfia, jíin Laodicea. Achí.

¹²Yūcuán na te ni ndicó cóto ri jeē cóto ri ndé ñin cúu jeē cahān jíin rí. Te ná ni ndicó cóto ri te ni jito ri uxā candelero oro. ¹³Te mēhñú ndihúxá candelero un índichi maá Yaā ní nduu tēe. Te ñúhun ya ñin sahna cáni jeē jinú nde nuū jehé yā. Te núhñi ñin cinturón oro jicá yā. ¹⁴Te ixi xíní yā chi yaa nájnūhun ixi lánchi, nájnūhun yuhvā volcán. Te tinūu ya ndíndēe nájnūhun yáñuhñ. ¹⁵Te jehé yā xínú jito nájnūhun cāa cuaán jéē ni ndúhvā

nuū horno. Te níhñin ndasí cáhān yā, nájnūhun níhñin cuehē yūte náhnu. ¹⁶Te ndaváha ya jñí ya uxā quími. Te yuhu ya quénda jeē cáa nájnūhun espada jeē xeén ndíndúú lado, te suu cúu jnūhun ya jeē niní sándaā yā siquī cuéchi. Te nuū yā cáa nájnūhun niándii jeē nándii ndaxín.

¹⁷Te ná ni jito ri yā te ni cotúú rí nuū jéhé yā nájnūhun jeē ni jíhñ rī. Te ni soó yā ndaváha ya siquī rī, te ni cahān yā:

Ma yūhu ró. Máá rí cúu Yaā iyó ndé xihna ñúhún te coo ri ñí cáni. ¹⁸Te Yaā técu cúu ri. Chi ni jíhñ rī te ni natecu rī, te vijna chi técu rī ñí cáni. Te máá rí jñí poder siquī cuéhyī jéhñi ñayuu jíin síquī lugar nuū cáyūcu ánuá ndíyí. ¹⁹Núu súcuan te tee ró núú tútu tāca jéē ní jito ró, jeē cúu vijna jíin jéē cóo ichi núú. ²⁰Te yāha cúu jnūhun sáhi síquī ndihúxá quími ni jito ró jñí ndaváha ri, jíin síquī ndihúxá candelero oro. Ndhúxá quími ún cúu nájnūhun ndihúxá jeē cácujeñnu nuū ndihúxá grupo ñayuu cácanđije. Te ndihúxá candelero cúu nájnūhun ndihúxá grupo ñayuu cácanđije.

**Jnūhun cuahān nuū ndihúxá
grupo ñayuu cacandije:**

Jnūhun cuahān ñuu Efeso

2 Tee ró jnūhun yáha na quíhñ nuū jeē cujeñnu nuū ñayuu cácanđije ñuu Efeso: Súcuan cáhān ruhū, Yaā jeē jñí ndihúxá quími jíin ndaváha ri, te jíca cuu ri mēhñú ndihúxá candelero oro. ²Je jíin rī táca jniñu váha cásáha ró, jeē

cándihvī ni rō siquī jnúhun ri, jíin jéē cajendeyí ni rō. Te jíin rī jeē tu cájēhe ró jnúhun quivicoo ñayuu casáha néé méhñu ró. Te jíin rī jeē ní cajito ndee rō tēe cástáhú jeē cácahān de jeē cúu de apóstol, te ni cajini rō jeē tēe stáhú cácuu de. ³Te ni cajendeyí ni rō ni candoho ró jnúndóho, te tu ní ndínuu ni rō jeē cácuu ndasí ró jíin jniñu ri. ⁴Te vēsú súcuan te íyó jecu jeē cahán ri nuū rō, chi tuá cáhiyo manī vāha ró jíin rī nájnūhun ni íyo manī rō jíin rī quivī jehé. ⁵Núu súcuan te nucūhun ni rō ndese ni castóo ró jnúhun jeē ni íyo manī rō jíin rī, te nacani ni rō, te na sáha ró nájnūhun ni casáha ró ndé quivī ún. Te núu ma nácani ni rō, te yachī jeē rī te stáa ri candelero rō nuū ín, cúu jeē ma cuññi ga rō jíin ñáyuu cácañdije. ⁶Te vēsú súcuan te íyó ñin jeē váha casáha ró, chi tu cánujnahān cuiti ni rō cájito ró jniñu néé casáha ñayuu cándiquin jnúhun jeē steén Nicolás. Te suni máá rī tu nújnahān cuiti ni rī jito ri. ⁷Ñayuu iyó sóho na chúsóhó i jeē cahán maá Espíritu Santo jíin táca grupo ñayuu cácañdije. Táca ñáyuu jeē cúndeyí síquī jeneé, cuāha ri jnúhun caji i ndehē jeē cúun xini yújnu jeē sáha jeē cótecu i ní cání. Te yujnu un ín nuū jardín Yaā Dios nde andiví, áchí yá.

Jnúhun cuahān ñuu Esmirna

⁸Te tee ró jnúhun yáha na quíhín nuū jeē cujéhnu nuū ñáyuu cácañdije ñuu Esmirna: Súcuan cáhān ruhū, Yaā jeē iyó ndé xihna ñúhún te coo ri ní cání, te ni jihí rī te ni natecu ri. ⁹Je jíin rī táca

jniñu váha casáha ró, jíin jnúndóho cándoho ró, jíin jéē cándoho ndáhú ró. Te vēsú súcuan te cúca ró ndihí jeē ndíso jnúhun ri. Te jíin rī jeē cácahān neé ñayuu siquī rō jijnáhan ró. Ñayuu un cácahān i jeē ñáyuu hebreo, ñayuu maá Yaā Dios cácuu i, te tuú chi cástáhú-ni i, chi sa ñayuu yíhi ndaha Satanás cácuu i. ¹⁰Te ma yúhú cuiti rō táca jéē ndoho ró. Chi jexeén je yajni sáha jeē quivicoo sava ró vecāa jeē cóto ndee rohó jijnáhan ró, te ndoho ró jnúndóho uxí quiví. Te na cuññi nihin ró ndé cuu rō, te cuāha ri premio jeē cótecu rō ní cání. ¹¹Ñayuu iyó sóho na chúsóhó i jeē cahán maá Espíritu Santo jíin táca grupo ñayuu cácañdije. Táca ñáyuu jeē cúndeyí síquī jeneé, ma nihín i jnúndóho jeē jnahnú ndetū i cuu i vuelta uū, achí yá.

Jnúhun cuahān ñuu Pérgamo

¹²Te tee ró jnúhun yáha na quíhín nuū jeē cujéhnu nuū ñáyuu cácañdije ñuu Pérgamo: Súcuan cáhān ruhū, Yaā jeē névāha espada jeē xeén ndíndúú lado, te suu cúu jnúhun ri jeē sándaā rī siquī cuéchi. ¹³Je jíin rī táca jniñu váha casáha ró, te jíin rī jeē cáyūcu ró méhñu ñáyuu jeē ndácu Satanás jniñu nuū. Te vēsú súcuan te cáhiin nihin ró jíin jnúhun ri, te tu ní cányūhu ró jeē cácañdije ró rúhū, ni quiví ni jihí Antipas, tēe ni squícu vāha ni nacani ndaā jnúhun ri. Chi ñuu rō cáyūcu ñáyuu cácejniñu nuū Satanás, te ni cajehni i Antipas. ¹⁴Te vēsú súcuan te íyó jecu jeē cahán rī nuū rō jijnáhan ró. Chi méhñu róhó ñáyuu ñuu Pérgamo

iyó sava ñayuu cándiquin jnūhun ni steén Balaam. Chi tēe un ní steén de nuū Balac ndese squívi de ñayuu Israel cuēchi jeē cáji i jeē ni sócō nuū ídolo jíin jēē cosíquí ndēē jnáhan i. ¹⁵Te suni íyó sava ñayuu mēhñu ró jeē cáchandíje ga i jnūhun ni steén Nicolás, te jnūhun ún chi tu núnahan cuiṭi ni rī. ¹⁶Núu súcuan te nacani ni rō siquī cuéchi ró. Chi núu tuú te yachī jeē rī jíin espada jeē quénda yuhu rī, te suu cúu jnūhun rī jeē sándaā rī siquī cuéchi. Te jíin yúcuan te stóho rī ñayuu jeē candíje ga jnūhun néé un. ¹⁷Ñayuu iyó sóho na chúsóhó i jnūhun jeē cahán maá Espíritu Santo jíin táca grupo ñayuu cáchandíje. Táca ñayuu jeē cúndeyí síquī jeneé, scáji rī i maná jeē yísahí ichi ándiví. Te suni cuāha rī ñin yuū cuijín núu i, te nuū ún condee ñin síhvi jéé, te ni ñin ñayuu ma cúní síhvi un, chi máá-ni i jeē nihín. Achí yá.

Jnūhun cuahān ñuu Tiatira

¹⁸Te tee ró jnúhun yáha na quíhín nuū jeē cujéhnu nuū ñayuu cáchandíje ñuu Tiatira: Súcuan cáhán ruhū, maá Séhe Yaā Dios jeē ndíndēe tñūu rí nájnūhun yáñuhūn. Te jehē rī xínú jíto nájnūhun cāa cuaán jēé ni ndúhvā. ¹⁹Je jíin rī táca jniñu váha cásáha ró, chi cákundáhú ni rō jnáhan ró, te cáchandíje ñihin ró rúhū, te cájejniñu ró núu rī, te cájendeyí ni rō. Te jíin rī jeē vihyá gā cásáha ró vijna vēsú nde quivī jehé. ²⁰Te vēsú súcuan te íyó jecu jeē cahán rī nuū rō. Chi íyó ñin ñahan mēhñu ró jēé naní Jezabel, te cájēhe ró

jnūhun stéén ña nuū rō. Te áchí ña jeē nácani ña jnūhun Yaā Dios. Te tuú chi jíin jnúhun stéén ña te stáhú ña ñayuu cáchandíje jeē cácuu i mozo rī. Te sáha ña jeē casíquí ndēē jnáhan i, jíin jēé cáyeji i jeē ni sócō nuū ídolo. ²¹Te ni jēhe ri tiempo jeē na nácani ni ña, te tu cúní ña nacani ni ña stóo ña jeē casíquí ndēē ña. ²²Núu súcuan te na sáha ri jeē jécava ña jíin cuéhyī. Te táca ñayuu casíquí ndēé jíin ña, suni cuāha ri jnūndóho xeēn nuū i, te núu ma nácani ni i stóo i jniñu néé nájnūhun sáha ña. ²³Te sáha ri jeē cúu ñayuu jeē ni scándíje ña. Te súcuan cuni táca grupo ñayuu cáchandíje jeē maá rí cúu Yaā jiní ndihí ndese cāa jeē níjnūnín jíin ánuá ñayuu. Te cuāha ri yāhu ñin ñin ró núu ndese ni casáha ró. ²⁴Te sava ga rō jeē cáyucú ñuu Tiatira, jeē tu ní cájetáhú jnūhun stéén ñahan ún, ni tu ní cájniñi ró jnúhun jeē cácahān i jeē jnūhun sāhi gá Satanás cúu, jíin máá ró cahán rī jeē ma tēe ga rī inga jniñu siquī rō. ²⁵Chi máá-ni jeē na quéndōo nihin ró jíin jnúhun ndaā cáchandíje ró, te quendōo nihin ró jíin ndé quivī ndíji rī. ²⁶Tāca ñayuu jeē cúndeyí síquī jeneé, jíin jēé squícu vāha jniñu cúní rī nde vijna te nde quivī sándihí, sáha ri jeē cujéhnu i ndacu i jniñu nuū táca nación, ²⁷nájnūhun ni sáha Tátá rī jeē cujéhnu rī ndacu rī jniñu. Te ndacu nihin i jniñu nuū táca nación. Te nájnūhun cúun yúú i quísi tahu, súcuan squéhichi i ñayuu tu cájendetū nuū rī. ²⁸Te sáha ri jeē coto i ruhū jeē luu cujéhnu rī quenda ndijin rī, nájnūhun jíto i lucero jeē cáne cúndijin. ²⁹Ñayuu

iyó sóho na chúsóhó i jnūhun jeē cahán maá Espíritu Santo jíin táca grupo ñayuu cácanđije. Achí yá.

Jnūhun cuahān ñuu Sardis

3 Te tee ró jnūhun yáha na quíhín nuū jeē cujéhnu nuū ñayuu cácanđije ñuu Sardis: Súcuan cáhán ruhū, maá Yaā jeē névāha ndihúxá Espíritu Yaā Dios jíin ndihúxá quīmi. Je jíin rī tācá jniñu cásáha ró, te cácahān ñayuu jeē cátecu rō, te nuū rī chi nájñūhun ndīyī cácuu ró. ²Na nátaḥū ni rō, te ndejéé níhin ró jíin jniñu jeē jecu na iyó te ndúcú naa. Chi je jíin rī jeē tu squícu vāha vāha ró núu Yaā Dios. ³Te na núcūhun ni rō tāca jnūhun jeē ní castéén nuū rō. Te cuatáhú ró jnūhun ún te nacani ni rō siquī cuéchi ró. Chi núu tú natahū ni rō, te cuajeē rī nuū rō ñin sanaa-ni nájñūhun jeē ñin sanaa-ni te quíji ñacuīhná, te ma cúni rō na hora jinū rī nuū rō. ⁴Te vēsú súcuan te íyó nahín jecu rō ñuu Sardis jeē tu ní cásáha ró cuéchi, jeē cúu nájñūhun jeē tu ní sájnehén ró sahma ró. Jeē yúcuan cuíjín yaa coo sahma ró caca ró jíin rí, chi ñayuu vāha cácuu ró. ⁵Chi tāca ñayuu jeē cúndeyí síquī jeneé, cuāha ri sahma cuijín yaa cuhun i. Te ma ndáhva rī síhví i nuū libro jeē yosó síhví ñayuu cotecu ní cání. Te cuajnúhún rí i nuū Tatá rí jíin núu tācá ndajéhé yā. ⁶Ñayuu iyó sóho na chúsóhó i jnūhun jeē cahán maá Espíritu Santo jíin táca grupo ñayuu cácanđije. Achí yá.

Jnūhun cuahān ñuu Filadelfia

⁷Te tee ró jnūhun yáha na quíhín nuū jeē cujéhnu nuū ñayuu

cácanđije ñuu Filadelfia: Súcuan cáhán ruhū, Yaā ndoo Yaā ndaā, te névāha ri ndacáa rey David. Te máá rí núne jeē quívi ñayuu nuū ndácu ri jniñu, te ni ñin ma cúu casi, te máá rí jési, te ni ñin ma cúu nune. ⁸Je jíin rī tācá jniñu vāha cásáha ró. Te ni nune ri nájñūhun ñin yéhyí quívicoo ró, te ni ñin ma cúu casi. Chi vēsú jecu-ni fuerza rō iyó, te ni cacandíje ró jnūhun ri, te tu cájesi rō yuhu ró jéē cácanđije ró rúhū. ⁹Te íyó sava ñayuu yíhi ndaha Satanás, te cácahān i jeē ñayuu hebreo, jíin ñayuu maá Yaā Dios cácuu i, te tuú chi cástáhú-ni i. Núu súcuan te sáha ri jeē jécoco i nuū rō te jecuññí yití i nuū rō, te cuni i jeē maní rí jíin ró. ¹⁰Te vāha ni casquícu ró jnūhun ní cahān rī jeē cuándeyí ni rō. Te jeē yúcuan jnama ri rohó quíví jeē quíji ñin jnūndóho xeēn siquī ñayuu níí cáhnu ñayívi, jéé cóto ndee ún i jíjnāhan i. ¹¹Te yachí ndiji ri. Núu súcuan te quendōo níhin ró jíin jnūhun cácanđije ró, návāha ni ñin ma quénde premio rō. ¹²Tāca ñayuu jeē cúndeyí síquī jeneé, sáha ri jeē cuu i nájñūhun síhín yuū luu ini templo Yaā Dios maá rí. Te ma cújiyo i nuū ndeé yá un. Te tee ri síhví Yaā Dios maá rí jneé i, jíin síhví jéé máá rí, jíin síhví ñuu Yaā Dios maá rí. Te ñuu un cúu Jerusalén jeé, te cuun quiji ichi ándiví ndé nuū Yaā Dios maá rí. ¹³Ñayuu iyó sóho na chúsóhó i jnūhun jeē cahán maá Espíritu Santo jíin táca grupo ñayuu cácanđije. Achí yá.

Jnūhun cuahān ñuu Laodicea

¹⁴Te tee ró jnūhun yáha na quíhín nuū jeē cujéhnu nuū ñayuu

cácandíje ñuu Laodicea: Súcuan cáhán ruhū, maá Yaā cúu jñūhun ndaā, Yaā cúu testigo vāha jeē cahán ndaā. Te máá rí ni sáha ndíhi jeē ni cáhān Yaā Dios jeē na jécōo. ¹⁵Je jíni rí tǎcá jniñu cásáha ró. Te cácuu ró nájñūhun jeē tú mǐjin ni tú jihní, cúu jeē jecu-ni cácanđíje ró jñūhun ri, te ni tu cájito uhū rō ni tu cándihvī ni rō siquī. Te nacā jeē váha núu jeē mǐjin ró chí jéj jihní ró nuú. ¹⁶Te tuú chi máá yǐvixī-ni ró, chí ni tu cájito uhū rō ni tu cándihvī ni rō siquī. Te jeē yúcuu squéhichī rī rohó nájñūhun ñin jeē tésīhi rí jeē séyūhu rí jeē tu núnjahan ni rī. ¹⁷Te cácahān rō jeē cucá ró, te quéndōo vāha ró, te tu cúmanī ni ñin nuū rō. Te tu cásáha ró cuenta jeē cuécá íi cándoho ró, te ndáhú ndasí ró, te cácuáá ró, te máá ñií líi rō. Te tǎca jéé yáha cúní cahān jeē tu cácanđíje vāha ró. ¹⁸Núu súcuan te cáhān rī jíin ró jeē nuū rī cuaan ró oro jeē ni ndúhvā nuū ñuhún te ni nduu máá nene, te suu cúu jeē sáha ri jeē coo cúcá ndíje ró ndíhi jeē ndíso jñūhun ri. Te nuū rī cuaan ró sahma cuijín cuhun ró, návāha tú cucanu rō jeē maá ñií líi rō, cúu jeē quéndōo ndaā rō sáha rí. Te cuaan ró tájnā nuū rī, quǐvī tinūu ró, návāha ndundijín tinūu ró, cúu jeē jecūhun ni rō jñūhun ri. ¹⁹Tǎca ñáyuu jeē cundáhú ni rī, chí cáhān rī nuū i te stóho ri i, návāha na chúhun ni i. Núu súcuan te na cóndihvī ni rō jijnáhan ró, te nacani ni rō jeē stóo ró cuéchi ró. ²⁰Cuni sōho, chí íin ri yehyí ánuá rō te cáhān rī. Te núu ndé-ni rōhó cuni sōho te nune ró yehyí ánuá rō, te quǐvī ri caji ri

staā jíin ró, te suni caji maá ró jíin rí. Te suu cúu jeē cóndee rī anuá rō. ²¹Tǎca ñáyuu jeē cúndeyí síquī jeneé, cuāha ri jñūhun conene i jíin rí nuū mesa nuū ndácu ri jniñu. Chi máá rí suni ni snāā rī poder jeneé, te ni cucōo ri jíin Tátá rī nuū mesa nuū ndácu ya jniñu. ²²Ñayuu iyó sóho na chúsóhó i jñūhun jeē cahán maá Espiritu Santo jíin tǎca grupo ñayuu cácanđíje. Achí yá.

Tǎca jéé cáyucú andiví cáchiñuhún nuū yā

4 Yūcuán na te ni ndacoto ri, te ni jito ri jeē núne ñin yehyí andiví, te máá Yaā jeē ni cáhān jíin rí jeē xíhna ñuhún, ni cahān tucu jíin rí nájñūhun jeē tǎvī trompeta. Te ni cahān:

Caa quiji ró yáha, te na stéén rī nuū rō tǎcá jniñu jeē cóo ichi núu gā, achí yá.

²Te máá Espiritu Santo ni scóto-ni ya ruhū. Te ni jito ri jeē andiví íin ñin mesa nuū ndácu jniñu, te néne máá yá nuū mesa un. ³Te máá yá jeē néne yūcuu cáa ya nájñūhun ndíndéé ñin yuū quǐyí ndíi chí ñin yuū cuehé ndíi. Te ñin ticō vēhnde ní jicó ndúū yuhu mesa yā, te ndíndéé nájñūhun ñin yuū cuíi ndíi. ⁴Te xiin mesa yā ni jito ri jeē ní jicó ndúū ocō cuñ gā mesa nuū ndácu jniñu. Te nuū mesa un néne ocō cuñ tēe jéhnu cándiso jniñu. Te cáñuhun de sahma cuijín yaa, te xinī de cáñuhun corona oro. ⁵Te nde nuū mesa nuū ndácu ya jniñu ndíndéé taja te ñhñin te cáhān taja. Te ichi núu mesa yā íin ndíhuxá Espiritu Yaā Dios, jeē cáa nájñūhun uxā yiti náhnu jeē cayú ñuhūn.

⁶Te ichi núu mesa yā ún suni íyó nájñūhun iin mar jeē jíto quiyi nájñūhun vidrio.

Te xiin mesa yā un ní jicó ndúū cuūn jeē técu. Te íyó cuéhē tinūu níí cáhnu ichi núu jíín ichi yátá un.

⁷Te iin jeē técu un cáa nájñūhun ndicaha. Te inga cáa nájñūhun stiquī. Te jeē uní chi nées nuū tée. Te jeē cuún chi cáa nájñūhun yaha chócó jéē jicó núu tachí. ⁸Te ndicúún jeē técu un íyó íñū ndijēn jeē iin iin. Te máni máá tñūu cúu níí cáhnu nde jíín níí chíji ndijēn. Te nduú ñuú tu jécuiñī cuíti jeē cahán:

Yaā ii Yaā ndoo ndasí
cúu máá Jítoho yō Yaā Dios, Yaā
jníí ndihí poder,
Yaā iyó vijna, te ni íyo yá níí
cáni, te coo ya níí cáni.

Achí.

⁹Chi máni jeē cácahān ndicúún un jéē cujéhnu ndasí máá Yaā jeē néne nuū mesa, Yaā jeē técu níí cáni cuíti. Te yíñūhún cácahān un jíín yá, te nácuatáhu núu yā. ¹⁰Te tāca jínu jeē casáha súcuan, te ndihócó cuūn tēe jéhnu cándiso jníñu, cájecuiñī yití de nuū Yaā jeē técu níí cáni cuíti, cáchiñūhún de ya. Te cástáa de corona de, cájequin de ichi núu jehé mesa yā. Te cácahān de:

¹¹Jítoho ná te Yaā Dios na cúu ní.
Te vāha ndasí Yaā cúu ní jéē
cácahān i jeē luu cújéhnu ní,
te cáhiyo yíñūhún i nuū ní, te
jníí ní ndihí poder.
Chí máá ní ni sáha ndihí jeē iyó,
te siquī jeē súcuan ni cuu ni
máá ní te ni jecōo ndihí.

Achí de jíñāhan de.

Jeē ní nune Londe Yaā Dios tutu

5 Yūcuán na te ni jito ri jeē Yaā néne mesa jeē ndácu jníñu, ndaváha ya jníí ya iin tutu cáni jeē ní tuu. Te yósó jnúhun ndíndúú lado tutu ún, te ndíhyú jíín úxā sello. ²Te ni jito ri iin ndajéhé yā jeē ndíso poder, te ni cahān jee:

¿Ndé iin cúu tēe vāha ndasí jeē cóndiso jníñu cahnde sello te nune tutu yáha? áchí ndajéhé yā.

³Te ni andíví ni ñayíví ni jeē iyó chíji ñayíví, tu ní íyo ni iin jeē cóndiso jníñu nune tutu ún, ni jeē cóto nuū. ⁴Te ni ndahyū ndasí rí, chí tu ní íyo ni iin jeē cóndiso jníñu nune te cahu tutu ún, ni jeē cóto nuū. ⁵Yūcuán na te ni cahān iin tēe jéhnu un jíín rí:

Ma ndahyú rō, chí íyó iin Yaā ndíso jníñu jeē cahnde yā ndihúxá sello ndihyú tutu, te nune ya. Te máá yá chí íyó cuéhē poder yā, nájñūhun jeē iyó cuéhē fuerza iin ndicaha. Te ni cacu ya chíji yucūn Judá, jeē cúu yucūn rey David. Te ni snāa yā poder tāca jéneé.

⁶Yūcuán na te ni jito ri Yaā jeē cúu Londe Yaā Dios jeē ní cajehni i te ni natecu. Te Londe un íin ya nuū íin mesa Yaā Dios, mēhñū ndicúún jeē técu, jíín tēe jéhnu cándiso jníñu. Te íyó úxā ndiqui jíín úxā tinūú Londe ún. Te tinūú un cúu ndihúxá Espiritu Yaā Dios jeē ní tají yá ni jengoo níí cáhnu ñayíví. ⁷Te Londe un ní jequihin ya tutu jeē jníí ndaváha Yaā jeē néne nuū mesa. ⁸Te ná ni quihin ya tutu ún, te ndicúún jeē técu jíín ndihócó cuūn tēe jéhnu cándiso jníñu, ni cajecuiñī yití núu yā. Te ná iin ná iin tēe

jéhnun un cándaha yaa jeē naní arpa, jíin cóhō cūu oro jeē nūhun chitú súje cutú. Te sūje cutú un cūu máá táca jnúhun jeē cájicān tahuñayuu yíhi ndaha Yaā Dios. ⁹Te ni cajita de iin yaa jeé, te suhva cáhán:

Vāha ndasí Yaā cūu ní jéē
quihin ní tutu te cahnde ni
selo jeē ndihyú.

Chi ni cajehni i níhín, te jíin níñi
ni ní nacuaan níñayuu
mēhñu táca raza, táca yuhu,
tácá ñuu, táca nación, návāha
cūu i ñayuu Yaā Dios.

¹⁰Te ni sáha ní jéē cuu i rey jíin
sútū nuū Yaā Dios,
te ndacu i jniñu ini ñayiví.

Achí de cájita de.

¹¹Te ni jito ga rī, te ni jini sōho ri
jeē cácahān cuehē ndajéhé yā jeē ní
cajicó ndúu xiin mesa yā, jíin xiin
ndicúun jeē técu, jíin xiin tēe jéhnun
cándiso jniñu. Te iyó cuehē ndasí
millón ndajéhé un. ¹²Te suhva ni
cacahān jee ya:

Vāha ndasí Yaā cūu Londe jeē ní
cajehni i.

Te jeē yúcuan jnái ya poder, te
yōhyo cúca yá,
te yōhyo ndíchí yá, te ndíso ya
cuehē fuerza,
te cáhiyo yíñuhún ndihi nuū yā,
te luu cújéhnun ya,
te cácahān i jeē váha ndasí Yaā
cūu ya.

Achí.

¹³Te suni ni jini sōho ri jeē cácahān
ndihi jeē ni sáha Yaā Dios jeē iyó ini
andiví jíin ini ñayivi jíin chíji ñayivi
jíin ini mar. Te ndivii un ní cacahān:

Cúsii ni yō cahán yō jeē yóhyo
vāha Yaā cūu máá Yaā néne
mesa nuū ndácu ya jniñu,

jíin Yaā cūu Londe Yaā Dios.
Te na cóo yíñuhún yó nuū yā,
chi cújéhnun luu ya,
te jnái ya poder níí cáni cuiti.

Achí.

¹⁴Te ni cacahān ndicúun jeē técu:
Súcuan na cóo, áchí.

Te ndihócó cuñ tēe jéhnun
cándiso jniñu ni cajecuiñi yití de, te
ni cachiñuhún de nuū Yaā jeē técu
níí cáni cuiti.

Siquí ndihúxá selo

6 Yūcuán na te ni jito ri jeē
Yaā cūu Londe Yaā Dios, ni
jehnde yā iin jeē uxá selo un. Te
ni jini sōho ri jeē cahán iin jnáhan
ndicúun jeē técu ún, nájñuhun
cahán taja:

Nehen te cuni rō.

²Te ni ndacoto ri, te ni jito ri iin
caballo cuijín. Te jeē yosó síquī tī
un ndáhá iin arco jeē stáva nduva.
Te ni jecūhun iin corona xinī. Te ni
quenda ni jejnáhan, te ni cundeyí
síquī ndihi.

³Yūcuán na te Londe un ní jehnde
yā selo uū. Te ni jini sōho ri jeē
cahán inga jnáhan ndicúun jeē
técu:

Nehen te cuni rō.

⁴Te ni quenda iin caballo cuehé,
te jeē yosó síquī tī ndíso jniñu jeē
snáa jñuhun cáyūcu máni ñayuu
ñayiví, te quejéé i cahni jnáhan i.
Te ni nihín ún iin espada cáhnu.

⁵Yūcuán na te Londe un ní jehnde
yā selo unī. Te ni jini sōho ri jeē
cahán inga jnáhan ndicúun jeē
técu:

Nehen te cuni rō.

Te ni ndacoto ri, te ni jito ri iin
caballo jnuú. Te jeē yosó síquī tī

ndáhá iin balanza jeē chícuāha, chi coo jnamā xeēn. ⁶Te mēhñú ndicúun jeē técu un ní jini sōho ri iin jeē cahán:

Máá iin kilo-ni trigo nihin i jíin yáhu i jeē sájniñu i iin quivī. Te núu cebada, te unī-ni kilo nihin i jíin yáhu i jeē sájniñu i iin quivī. Te aceite jíin vino chi ma sáha ró jéé cúmanī. Achí.

⁷Yūcuán na te Londe un ní jehnde yā sello cuūn. Te ni jini sōho ri jeē cahán tucu inga jnáhan ndicúun jeē técu:

Nehen te cuni rō.

⁸Te ni ndacoto ri, te ni jito ri iin caballo cuaán yaa, te jeē yosó síquī tī cúu máá cuéhyī jéhni ñayuu. Te ichi yátá un ndíquín máá jnúhun jeē quívī ñayuu lugar nuū cáyūcu ánuá ndīyī. Te ndíndúú un cándiso jniñu jeē ndóna síquī iin jeē ndicúun parte ñayīví, te cuu sáha jeē cúu ñayuu jíin guerra, jíin jnamā, jíin cuéhyī xeēn, jíin táca quítī xeēn jeē iyó ñayīví.

⁹Yūcuán na te Londe un ní jehnde yā sello uhūn. Te chíji altar cáhnu ni jito ri anuá ñayuu jeē ní cacandíje jnúhun Yaā Dios te ni canacani ndaā i jnúhun ya, te síquī yūcuan ní cajehni ñayuu i. ¹⁰Te ni cacana jee ánuá un:

Jitoho ná Yaā Dios, maá ní cúu Yaā ndoo te vāha squícu ní jéé ni jéjnūhun ní. ¿Te nasaa ga tiempo coo te sándaā ni jéhé ná, te nacuāha ní jéé ndútahū ñayuu ñayīví jéé ní cajehni sáná? achí.

¹¹Yūcuán na te ni jēhe ya sahma cuijín cuhun i jíjnáhan i, te ni cahán yā jíin i jeē na ndétátú i jecu gā tiempo. Chi iyó gá hermano i

jeē cájejniñu nuū yā, jeē suni jíni ñúhún cuu i návāha jinu número i, achí yá.

¹²Yūcuán na te Londe un ní jehnde yā sello iñū. Te ni jito ri jeē ni jnáa ndasí. Te ni cujnúú níandii nájnūhun iin sahma jnúú. Te ní yóo ni nduu nájnūhun niñī. ¹³Te quīmi andiví ní ñingoyo nuū ñúhun nájnūhun ñingoyo ndehē yīhí yujnu higo sáha tachī níhin. ¹⁴Te andiví ní cujiyo cuahán nájnūhun jeē nátuu iin tutu cáhnu. Te tācá yucu jíin táca isla ni cujiyo cuangoo inga lado. ¹⁵Te tāca rey ñayīví, jíin jéé cácujuhnu, jíin jéé cucá, jíin táca capitán, jíin jéé cándiso poder, jíin mozo jeē ní cajeen ñayuu, jíin téé casájniñu cuenta maá, ní cachisāhi máá ini yaū cava jíin méhñu cava chíji yucu. ¹⁶Te ni cacahán i jíin yucu jíin cava:

Ndicó cáva síquī rī, na quísāhi rí návāha tú coto máá Yaā néne mesa ndácu jniñu, jíin Yaā cúu Londe jeē cuáha ya castigo xeēn ruhū. ¹⁷Chi ni quee maá quívī cáhnu jeē cuáha ya castigo, ¿te ndé iin canda condichi nuū yā? achí i jíjnáhan i.

Ñayuu táca yúcūn Israel jeē ni jécondee sello jneē

7 Te ná ni cuu jniñu yáha, te ni jito ri cuūn ndajéhé yā jeē cáhiin ndicúun lado ñayīví. Te cájesi yā nuū ndicúun tachī, návāha ma queé nuū ñúhun ni nuū mar ni nuū ní iin yujnu. ²Te suni ni jito ri inga ndajéhé yā, vēji ichi núu cáne niandii. Te ndáhá yá sello Yaā Dios, Yaā técu. Te ni cahán jee ya jíin ndicúun ndajéhé un jéé ndíso jniñu jeē sáha daño nuū ñúhun íchi jíin núu mar:

³Ma sáha ró daño nuū ñúhun ni nuū tǎcá yujnu ni nuū mar, chi nde na tée yó sello jneē tǎca ñáyuu cájejniñu nuū Yaā Dios yō.

⁴Te ni jini sōho ri jeē achí jée iyó ciento uū xico cuūn mil ñáyuu jeē ni jécondee sello jneē. Te ñáyuu un cácuu tǎca yúcūn ñáyuu Israel. ⁵Te iyó úxí uū mil ñáyuu cácuu yucūn Judá jeē ni jécondee sello, jíin úxí uū mil yucūn Rubén, jíin úxí uū mil yucūn Gad, ⁶jíin úxí uū mil yucūn Aser, jíin úxí uū mil yucūn Neftalí, jíin úxí uū mil yucūn Manasés, ⁷jíin úxí uū mil yucūn Simeón, jíin úxí uū mil yucūn Leví, jíin úxí uū mil yucūn Isacar, ⁸jíin úxí uū mil yucūn Zabulón, jíin úxí uū mil yucūn José, jíin úxí uū mil yucūn Benjamín. Ndihi yucūn yáha cúu jeē ni jécondee sello.

Ñáyuu cuehē jeē cáñuhun sahma cuijín

⁹Te ná ni cuu jniñu yáha te ni ndacoto ri, te ni jito ri cuehē ndasí ñáyuu. Te cúu i ñáyuu tǎcá nación jíin tǎca raza jíin tǎca yuhu jíin tǎca ñuu. Te cáhiin i nuū mesa nuū ndácu Yaā Dios jniñu jíin núu maá Yaā cúu Londe. Te siquí jeē cuehé ndasí i, te ni iin ma cúu cahu nasaa i cúu. Te cáñuhun i sahma cuijín, te cándahá i ñuū. ¹⁰Te ni cacana jee i:

Yaā Dios maá yó cúu jeē ní
jnama yóhó,

Yaā jeē néne nuū mesa jeē
ndácu jniñu,

jíin Yaā cúu Londe Yaā Dios.

Achí i jíináhan i. ¹¹Te ndihi ndajéhé ni cajicó ndúu yā cáhiin ya xiin mesa Yaā Dios, jíin xiin tēe jéhnu cándiso jniñu, jíin xiin ndicúún

jeē técu. Te ni cajecuiñí yití yá ni cachiñúhún yá Yaā Dios ichi núu mesa yā. ¹²Te ni cacahān yā:

Amén. Cúsiñi ni yō cahán yō jeē
yóhoyo vāha Yaā cúu Yaā Dios
maá yó.

Te luu cújéhnú ya te ndíchí yá.
Te na nácuatáhú yó nuū yā, te
na cóo yíñúhún yó núu yā.

Chi jniñi ya poder, te ndíso ya
cuehē fuerza jeē níí cáni cuiti.
Amén.

Achí tǎca ndajéhé yā.

¹³Yūcuán na te ni cahān iin tēe
jéhnú un jíin rí:

¿Ndé ñáyuu cúu yāha jée cáñuhun
sahma cuijín, te ndé chi véjicoo i?

¹⁴Te ni cahān ri jíin de:

Máa ní cúu jeē jiní, Tátā.

Te ni cahān de jíin rí:

Yāha cácuu ñáyuu jeē ní cayāha
i jeē ní cajito i jnūndóho xeēn. Te
ni canacate i sahma i jíin níñi maá
Londe, te ni nduyaa vāha, cúu jeē
ní ndundoo ánuá i ni sáha ya. ¹⁵Jeē
yúcuan cúu jeē cáhiin i nuū mesa nuū
ndácu Yaā Dios jniñu, te cájejniñu i
ini templo yā nduú ñuú. Te Yaā jeē
néne nuū mesa, coto ya i jeē quéndōo
vāha i nuū yā. ¹⁶Te ma cúu gā i sōco,
te ma jichí gā i ndute. Te ma cayú gā
i nuū niāndii, ni ma ndóho ga i jeē
jihní. ¹⁷Chi máa Yaā cúu Londe jeē
néne nuū mesa jeē ndácu jniñu, coto
ya i nájnūhun jeē cúu i lanchi ya. Te
condeca ya i quihñi yā jíin i nuū cáne
ndute jeē cótecu i sáha. Te Yaā Dios
nacuaa yā ndute núu i jíináhan i, te
ma ndahyú gā i. Achí tēe jéhnú ún.

Siquí sello uxā jíin cóhō cūu oro

8 Te Londe un ní jehnde yā
sello uxā jeē ndihyú tutu

ún, te nayúú-ni ni iyo ini andiví nájñuhun sava hora. ²Te ni jito ri ndihúxá ndajéhé jeē cáhiin nuū Yaā Dios. Te ni cajêhe uxā trompeta nuū ndajéhé un. ³Yūcuán na te ni quee inga ndajéhé, ndáhá yá iin cohō cūu oro, te ni jecuiñī yā nuū altar. Te ni jêhe cuehē sūje cutú núu yā, návāha socō yā jíin jñuhun cájicān tahú ndihi ñayuu cácanđije Yaā Dios. Te ni socō yā nuū altar oro jeē índichi ichi núu mesa nuū ndácu Yaā Dios jniñu. ⁴Te nuū cohō cūu jñī ndajéhé un ní cane ñuhmā sūje cutú, ni caa nuū Yaā Dios nde jíin jñuhun cájicān tahú ñayuu cácanđije Yaā Dios. ⁵Yūcuán na te ni quihin ndajéhé un cohō cūu un. Te ni scutú yá t̄cua ñuhūn jeē cayú nuū altar. Te ni jete yā nde ini ñayiví. Te ni sáha jeē ni cáhān taja, te ni ñihin, te ni ndindéé taja, te ni jñāa.

Jñuhun siquī trompeta

⁶Yūcuán na te ndihúxá ndajéhé jeē cándāhá ndihúxá trompeta, ni casátuhva ya jeē tiví yā.

⁷Te ndajéhé iin ni tiví yā trompeta. Te ni cuun ññīf ini ñayiví jíin ñuhūn jeē ni sácā núu jíin ññī. Te ni cayú iin jeē uní parte ñayiví, jíin iin jeē uní parte yujnu, jíin iin jeē uní parte ite cuí.

⁸Te ndajéhé uū ni tiví yā trompeta. Te iin nájñuhun iin yucu cáhnu jeē cayú ñuhūn ni ñingava cuahān nuū mar. Te iin jeē uní parte mar ni nduu ññī. ⁹Te ni jihí iin jeē uní parte quití ñuhūn nuū mar. Te ni naa cuehē barco, chi iin iin jeē t̄aca únī ni naa.

¹⁰Te ndajéhé uní ni tiví yā trompeta. Te ni ñingava iin quími

cáhnu ichi ándiví, te cáyú nájñuhun cáyú iin yití cáhnu. Te ni ñingava siquī iin iin jeē t̄aca únī yūte jíin núu cáne ndute. ¹¹Te quími un nání quími uvuā. Te iin jeē uní parte ndute ni cuu uvuā. Te ni cajihí cuehē ñayuu ni sáha jeē ní cuu uvuā ndute ún.

¹²Te ndajéhé cuūn ni tiví yā trompeta. Te iin jeē uní parte niāndii jíin yóō jíin quími ni tiví. Te ni ndunee iin jeē uní parte i, te tuá ni cúndijin iin jeē uní parte nduu jíin ñuu.

¹³Te ni ndacoto ri, te ni jini sōho ri jeē cána jee iin ndajéhé yā jeē ndáva cuahān sava andiví:

Nacā xeēn gā ndoho ñayuu cáyucú ini ñayiví, chi je yajni cuecu uní gā trompeta jeē tiví uní gā ndajéhé, achí yá.

9 Te ndajéhé uhūn ni tiví yā trompeta. Te ni jito ri jeē ichi ándiví ní ñingava iin quími nde ini ñayiví. Te nuū quími un ní jêhe ndacáa jeē núne tūhnchi cúnú ndasí. ²Yūcuán na te ni nune un tūhnchi, te ni cane ñuhmā ni caa nájñuhun ñuhmā iin ijnū cáhnu. Te ñuhmā un ní sáha jeē ní cunee niāndii jíin ññí núu tachí. ³Te nuū ñuhmā un ní canecoo t̄ica ndicuehyí, ni jitē núu t̄i ní cáhnu ñayiví. Te ni jêhe ya jñuhun jeē sáha t̄i nájñuhun cásáha tisuhma xeēn jeē iyó ini ñayiví. ⁴Te ni ndacu ya jniñu nuū t̄i jeē ma sáha t̄i daño ite jíin yúcū cuí jíin yujnu, chi máni ñayuu jeē tu ndéé sello Yaā Dios jneē i cúu jeē tuu t̄i. ⁵Te tu ní jêhe ya jñuhun jeē cáhni t̄i ñayuu, chi máni jeē stóho t̄i i uhūn yoō. Te sáha t̄i jeē jetú i nájñuhun jeē jetú

ñayuu jeē túu tisuhma i. ⁶Te quivī ún nducú ndasí ñayuu modo cuu i, te ma nihín i modo. Te vesú cuní i cuu i, te tú na modo cuu i.

⁷Te tíca ndicuéhyí un cáa ti nájnūhun caballo jeē cáhiyo tūhva quingoo nuū cuájnaħan. Te xinī tī ñūhun nájnūhun corona oro. Te nées ti nuū tée. ⁸Te íyó ixi ti jeē cáa nájnūhun ixi xíní ñahan. Te jnūhun ti cáa nájnūhun jnūhun ndícaħa.

⁹Te ní tī ndihyú nájnūhun sahma cáa. Te níħin ndijēn tī nájnūhun níħin jeē cuángoo cuehē caballo nuū guerra cáñuhun ti carreta.

¹⁰Te suhmā tī ndíso iñu nájnūhun tisuhma. Te jíin súhmā tī cuu stóho ti ñayuu uhūn yoō. ¹¹Te íyó iin jeē cujéħnu nuū tī, te suu cúu ndajéħe jexeén jeē ndító tūħnchi cúnú ndasí un. Te ndajéħe un yuhu hebreo naní Abadón, te yuhu griego naní Apolión, jeē cuní cahān maá jéē snāā.

¹²Je ni yāħa iin jnūndóho, te íyó úu gā jnūndóho jeē qujji.

¹³Te ndajéħe iñū ni tiví yā trompeta. Te ni jini sōho ri iin jnūhun jeē ni cáħan nde mēħnú ndicúun yiquí altar oro jeē iin nuū Yaā Dios. ¹⁴Te ni cahān un jíin ndajéħe iñū jeē ndahá trompeta:

Nandají ró ndicúun ndajéħe jeē nuhní yuhu yúte cáħnu jeē naní Eufrates, achí.

¹⁵Te ni nandají ndicúun ndajéħe un, návāħa cahni iin jeē uní parte ñayuu ñayiví. Chi je cáhiyo tūhva ndajéħe un jeē siquí maá hora jíin quívī jíin yoō jíin cuiyā jeē cóo súcuan. ¹⁶Te ni jini sōho ri jeē achí jéē iyó úu ciento millón soldado jeē cáyoso caballo.

¹⁷Te ni steén gā yā nuū rī, te ni jito ndijin rī tēcá caballo. Te tēe cáyoso siquí tī cáñuhun de camisa cáa jeē cuehé, jeē ndeé, jíin jéē cuaán. Te xinī caballo un cándāa nájnūhun xinī ndícaħa. Te yuhu ti quénda ñuhūn jíin ñúhmā jíin azufre. ¹⁸Te jíin únī jeē quénda yuhu caballo un, te ni jihī iin jeē uní parte ñayuu, suu jíin ñuhūn jíin ñúhmā jíin azufre. ¹⁹Chi yuhu ti jíin súhmā tī iyó fuerza jeē cáħni tī ñayuu. Chi suhmā tī cándāa nájnūhun coō, te íyó xíní, te jíin yúcuan stóho ti ñayuu.

²⁰Te sava ga ñayuu jeē tu ní jíhí jíin táca jnūndóho yāħa, tu ní nácani ni i stóo i ídolo jeē ní casáħa i. Te tu ní stóo i jeē cáchiñúhún i táca táchī jíin ídolo jeē ní cuvāħa jíin oro jíin plata jíin cáa cuaán jíin yúu jíin yujnu. Te tēcá un chi tu cúu coto, ni tu cúu cuni sōho, ni tu cúu caca. ²¹Te ni tu ní cánacani ni i stóo i jeē jéħni i ndīyi, jíin jéē satásí i, jíin jéē jíca jnéni i, jíin jéē sacuíħná i.

Ndajéħe jeē ndahá libro lulí

10 Te ni jito ri inga ndajéħe yā jeē ndíso poder, ni cuun ya ichi ándiví. Te ñúsúcun yá vicō, te xinī yā ñūhun ticō vēħndé. Te nuū yā ndíndēe nájnūhun niándii, te síħin ya cáa nájnūhun uū síħin jeē cáa ná cáa ñuhūn. ²Te ndáhá yá iin libro lulí jéē núne. Te ni jeni ya jehé váħa ya nuū mar, te jehé jecó yá nuū ñūhun íchi. ³Te ni cana jee téyí yá, nájnūhun jeē ndahyú ndícaħa. Te ná ni cana jee ya, te ni cacahān uxā taja. ⁴Te ná ni cacahān uxā taja, te je íyó tūhva ri jeē tée ri jnūhun

un núú. Te ni jini sōho ri iin jnūhun ichi ándiví jeē ni cáhān jíin rí:

Chuvāha ró táca jnūhun jeē ní cacahān uxā taja ún, te ma steén rō, ni ma téé ró, áchí.

⁵Yūcuán na te ndajéhé jeē ní jito ri jeē iin nuū mar jíin núú ñūhun, ni ndonehen ya ndaha váha ya ichi ándiví. ⁶Te ni ndacunehen ya síhví máá Yaā jeē técu ní cáni, Yaā ni sáha andiví jíin ñáyivi jíin mar jíin táca ndíhi jeē iyó ini. Te jíin síhví yá un ní cahān teyí ndajéhé:

Ma cucuéeé gá jeē jínu ñayívi. ⁷Chi núu na quéeé ndajéhé uxā tiví yā trompeta, yūcuán na te squícu-ni Yaā Dios jnūhun sáhi yá, nájnūhun ni castūhun yá nuū tāca mozo yā, téé ni canacani jnūhun ya nde jenahán, áchí ndajéhé.

⁸Yūcuán na te máá jée ní jini sōho ri jeē ni cáhān ichi ándiví, ni cahān tucu jíin rí:

Cuáhán te quihin ró libro lulí jée núne jeē ndahá ndajéhé jeē iin nuū mar jíin núú ñūhun, áchí.

⁹Te ni jehēn rī nuū ndajéhé un, te ni jicān rī jeē na cuáha ya libro lulí un núú rī. Te ni cahān yā:

Quihin te caji rō. Chi vixí sáha ini yuhu ró nájnūhun ndūxi, te chíji ró chi cuhiyá sáha, áchí yá.

¹⁰Yūcuán na te ni quihin ri libro lulí jeē ndahá ndajéhé yā, te ni yeji rī. Te vixí ni sáha ini yuhu ri nájnūhun ndūxi. Te ná ni cuu ni yeji rī, te ni jitē iyá ni rī. ¹¹Te ni cacahān jíin rí:

Cánuú jée nacani tucu ró jnūhun Yaā Dios, ndese coo siquī ñayuu cuehē ñuu jíin cuéhē nación jeē síin síin yuhu, jíin síquī cuehē rey cándacu jniñu, áchí jíin rí.

Siquī uū testigo yā

11 Yūcuán na te ni cajēhe iin yujnu nuū rī, jeē cúu iin cūhva jeē chícuāha. Te ni cacahān jíin rí:

Ndocuññi te chicuāha ró templo cáhnu Yaā Dios jíin altar, te cahu ró nasaa ñayuu cúu jeē cáchiñúhún núú yā yūcuán. ²Te ma chícuāha ró patio yatā templo. Chi je ni jēhe ya nuū ñayuu tācá ñuu jicá. Te coyúcú i ini ñuu ií yāhá, te uū xico uū yoō cueññi i siquī ñuu. ³Te tají rí uū testigo rī jeē nácani jnūhun ri mil uū ciento uní xico quiví. Te cuhun de sahma ndáyí jée cácuquíhyá ni de siquī cuéchi ñayuu, áchí yá.

⁴Te ndíndúú testigo un cúu nájnūhun ndíndúú yujnu olivo jíin ndíndúú candelero jeē iin nuū Yaā Dios, Yaā chíi ñayívi. ⁵Te na-ni ñayuu núu nducú sáha ndevāha jíin ndíndúú testigo un, te quenda ñuhūn yuhu ndíndúú de, te cayū ndíhi ñayuu cájito uhū i de. Te súcuan cuu tāca ñayuu jeē nducú sáha ndevāha jíin de. ⁶Te iyó poder ndíndúú testigo un jée cási de jeē ma cúun saū ní tiempo jeē nácani de jnūhun ya. Te suni íyó poder de sáha de jeē nduu niññi tācá ndute. Te cuu stíví de ñayívi jíin ndínuū jnūndóho, núu nasaa jínu cácuni de. ⁷Te ná ni jínu ni canacani de jnūhun ya, yūcuán na te quenda quiti xéen jeē néne tūhñchi ún. Te cuajnáhan jíin ndíndúú de, te cundeyí jíin de, te cahni de. ⁸Te ndíyí ún cava nuū yáhu ñuu cáhnu nuū ní cajehni i máá Jítoho yō jicā cruz. Te ñuu un cácahān yatá i jeē ñuu Sodoma jíin Egipto cúu, siquī jeē xeēn cuéchi

íyó ñuu ún. ⁹Te ñayuu tācá ñuu, tāca yúcūn, tācá yuhu, tācá nación, chi coto i jeē cáva ndíndúú ndíyí un úní quiví yosáva, te ma cuáha i jñūhun jeē quíndūji. ¹⁰Te ñayuu níí cáhnu ñayíví cusí ndasí ni i jeē ní cajihí de, te sáha i vico, te cuáha i regalo nuū jnáhan i. Chi ndíndúú tée ni canacani jñūhun ya ún, ní casáha de jeē ní candoho ndasí ñáyuu ñayíví. ¹¹Te jeē yáha uní quiví yosáva ún, te Yaā Dios sáha ya jeē nastáa tachí de, te ndonda-ni de. Te yūhú ndasí ñáyuu coto i jeē ní canatecu de. ¹²Yūcuán na te cuni sōho de jeē cána jee ichi ándiví:

Caa ró quijicoo ró ndé yāhá, áchí.

Te ndaa de mēhñu vícō quingoo de andiví, cuni ñayuu cájito uhí i de. ¹³Te máá hora un jnáa ndasí, te ndicó cáva naa ñin jeē uxí parte ñuu ún. Te jíin ñujnáa ún cuu uxā mil ñayuu. Te tāca gá ñayuu jeē ndóo, yūhú ndasí i, te cahān i jeē cujéhnu Yaā Dios jeē ndeé andiví.

¹⁴Súcuan yāha jñūdóho uū, te yachí coo jñūdóho uní.

Siquí trompeta uxā

¹⁵Te ndajéhé uxā ni tiví yā trompeta. Te ni jini sōho ri ni cacahān jee ichi ándiví. Te súcuan ni cacahān:

Tācá nación ñayíví je ni nuquihí ndaha máá Jítoho yō Yaā Dios jíin Cristo jeē ní tají yá.

Te ndacu ya jniñu níí cáni cuiti. Achí.

¹⁶Yūcuán na te ndihócó cuñ tēe jéhnu cándiso jñíñu jeē cánene de mesa de ichi núú Yaā Dios, ni cajecuññí yití de, ni cachiñúhún de ya. ¹⁷Te ni cacahān de:

Na cútahū na núú ní, Tátā Yaā Dios, chi máá ní jñí ndihí poder, te cúu ní Yaā iyó vijna, te ni iyo ní níí cáni, te coo ní níí cáni. Te ni najniñi ní ndívii jeē iyó, te jíin poder ni ní quejéé ní ndácu ní jniñu nuū.

¹⁸Ñayuu tācá nación ni caquití ni i siquí ní.

Te vijna chi ni quee quiví jeē cuáha ní castigo i, jíin jéé sándaā ní jniñu tāca ndíyí.

Te cuáha ni táhū nuū tāca mozo ni jéé ní canacani jñūhun ní, jíin núú tāca ñáyuu cájejniñu nuū ní, jíin ñáyuu cáchiñúhún núú ní, cúu ñayuu cácujeñu jíin jéé tuú.

Te vijna te snáhnú ndetū ni ñáyuu castívi ñayíví.

Achí de jíjnáhan de.

¹⁹Yūcuán na te ni nune templo Yaā Dios jeē iyó andiví. Te ni cajito ñayuu jeē yúcuan íne yejñu jeē ñūhun contrato yā. Te ni ndíndē taja, te níñin, te cáhán taja, te ni jnáa, te ni cuun xeñ níñí.

Jñūhun ñahan jíin cóo cáhnu

12 Yūcuán na te ini andiví ní cane ñin jeē nahán náa ni yō jíto yó: ñin ñahan jeē ñūhun ña niāndii nájnūhun sahna, te íin jehé ña siquí yoó, te ñūhun ñin corona xiní ña jeē ndeé uxí uū quími. ²Te ñūhun sēhe ña. Te ni ndahyū cohó ña jeē ndóho ña jéhnde chiji ña jeē scácu ña i. ³Yūcuán na te ini andiví ní cane tucu inga jeē náa ni yō jíto yó: ñin cóo cuehé cáhnu ndasí. Te

íyó úxā xinī tī jíin úxī ndiqui tí. Te ndihúxá xinī tī ñúhun corona. ⁴Te jíin súhmā tī ni stáa tí ñin jeē uní parte quími jeē iyó andiví, te ni síngoo tí ini ñayiví. Te ni ine tí nuū ñáhan jeē scácu sēhe ún, ndétu tí cocó tí sēhe ña jeē jé yajni cacu i.

⁵Te ni scácu ña ñin sēhe yíí, te sūchi un ní jeconaā jeē ndácu ñihin i jniñu nuū ndívii nación. Yūcuán na te ni ndoñúhún sēhe yíí ña ún, ni ndaa i cuahān i nde nuū ñin mesa Yaā Dios nuū ndácu ya jniñu. ⁶Te ñahan un ní jinu ña cuahān ña nde nuū ñúhun téhé nuū iyó ñin lugar jeē ni sátúhva Yaā Dios. Te yūcuán condee ña ñihin ña jeē cáji ña mil uū ciento uní xico quiví.

⁷Yūcuán na te ni cajejnáhan ini andiví. Chi ndajéhé jéhnú ga jeē naní Miguel jíin táca ndajéhé jeē cácuu mozo nuū yā, ni cajejnáhan jíin cóo cáhnu. Te coō un jíin táca ndajéhé maá, ni cajejnáhan jíin yá.

⁸Te tu ní cácuñdeyí tí, te tuá ní cúu coyūcu tí andiví. ⁹Súcuán ni cuu jeē ní quenehen ya coō cáhnu un jeē iyó ndé jenahán ndasí. Te naní tí jexeén jíin Satanás, te maá tí cúu jeē stahú ndihí ñayuu ñayiví. Te ni scáne ya tī nde ini ñayiví jíin táca ndajéhé tī.

¹⁰Yūcuán na te ni jini sōho ri ñin jñuhun jeē cahán jee ichi ándiví:

Je ni quee quiví jeē jínu jnama ya yohó, jíin jéē steén ndijin yā jeē jnái ya poder, jíin jéē ndácu ya jniñu, jíin jéē ndíso jniñu maá Cristo jeē ní tají yá. Chi je ni quenehen ya maá jéē cahán cuēchi siquí táca hermano yō. Chi nduú ñuú ni cahán cuēchi siquí i nuū Yaā Dios maá yó.

¹¹Te ni cacundeyí i siquí Satanás

un, ní sáha jñuhun jeē ni jíhi Yaā cúu Londe, jíin jéē ní cacahān ndaā i jñuhun Yaā Dios, jíin jéē tu ní cundáhú ni i máá i, chi ni jēhe i jñuhun candíje i vēsú núu cuu i jeē siquí yā. ¹²Núu súcuán te na cúsiñ ndasí ni táca róhó jéē cáyūcú andiví. Te nacā xeēn ndoho táca róhó jéē cáyūcú ini ñayiví jíin núu mar. Chi ni cuun jexeén ni jinū nuū rō jijnáhan ró. Te quítí xeēn ni, chi jíiní jeē tuá coo cuehē gā tiempo jeē stahú ñayuu. Achí.

¹³Te ni jini coō cáhnu ún jéē ni scáne ya maá cuahān ini ñayiví, te ni jinu tí jíin ñahan ní scácu sēhe yíí, jeē xeēn sáha tí jíin ña núu.

¹⁴Te ni cajēhe uū ndijēn yaha chócó cáhnu nuū ñahan ún, návāha ndava ña quihín ña lugar ña nuū ñúhun téhé, te cācu ña nuū coō ún. Te yūcuán condee ña uní cuiyā yosáva, te ñihin ña jeē cáji ña. ¹⁵Te yuhu cóo un ní cane ndute nájñuhun ñin yūte cáhnu, cuahān yatā ña návāha jneni ña. ¹⁶Te maá ñuhun chi ni chindéé ñáhán ñahan ún, chi ni nune-ni, te ni nungoo yūte jeē ní cane yuhu cóo ún. ¹⁷Yūcuán na te xeēn ni quítí ni coō cáhnu ni jito tí ña. Te cuahān tī cuajnáhan tí jíin táca gá sēhe ña, suu ñayuu casquícu jniñu ndácu Yaā Dios te cácuñdeyí vāha i jñuhun Jesucristo.

Jñuhun siquí uū quítí xéén

13 Te ni indichi rí yumár. Te ni jito ri jeē ní cane ñin quítí xéén ini mar. Te íyó úxā xinī tī jíin úxī ndiqui tí. Te ndihúxá ndiqui tí ñúhun corona. Te ndihúxá xinī tī ndeé ñin síhví néé jéē quítí ni Yaā Dios sáha. ²Te quítí xéén jeē

ní jito ri ún, cáa tì nájñūhun cuiñī, te ndaha tì cáa nájñūhun ndaha oso, te yuhu tì cáa nájñūhun yuhu ndícaha. Te nuū quitì un ní jēhe coō cáhnu poder maá jíin mesa nuū ndácu maá jniñu. Te ni sáha jeē cujéhnu ndasí quitì ún. ³Te ni jito ri jeē ni tújī ñin xinī tī, jeē jé yajni cuu tī nuū. Te ni nduvāha tì jeē ni tújī tī. Te nahán ní naa ni ñayuu ní cáhnu ñayīvi ní jito i, te ni cajetáhú i nuū tī. ⁴Te ni cachiñúhún i coō cáhnu siquī jeē ni sáha tì jeē cujéhnu ndasí quitì xéén un, te suni ni cachiñúhún i quitì xéén un. Te ni cacahān i:

Tú ni ñin jeē cujéhnu nájñūhun quitì yáha, te tú ni ñin cundeyí cuajnáhan jíin tī, áchí i jíinájhan i.

⁵Te tu ní jési ya jeē cahān tī jeē quitì téyí cúu tì, jíin jéé cahán ndevāha tì siquī yā. Te ni nihīn jñiñu tì jeē ndácu tì jniñu uū xico uū yoō. ⁶Te ni quejéé tī ni cahān ndevāha tì siquī Yaā Dios, jíin síquī síhví yá, jíin síquī nuū ndeé yá, jíin síquī tāca jéé iyó andiví. ⁷Te tu ní jési ya jeē cuajnáhan tì jíin ñayuu maá Yaā Dios, te cundeyí tī jíin i. Te suni ni nihīn jñiñu tì jeē ndácu tì jniñu nuū ñayuu tāca yúcūn, tācá ñuu, tācá yuhu, tācá nación. ⁸Te ñayuu ní cáhnu ñayīvi jéé tu yósó síhví i nuū tútu, ni cachiñúhún i quitì xéén un. Te Yaā cúu Londe jeē ní cajehni i, máá yá névāha tutu un jéé yósó síhví ñayuu cotecu ní cáni, te je yósó síhví i nde quiví ni jécō ñayīvi.

⁹Ñayuu iyó sóho na chúsóhó váha i jñūhun cahān rī yāhá. ¹⁰Tāca ñayuu jeē sáha jeē quíví jnáhan vecāa, suni vecāa cone máá i. Te

tāca ñayuu jeē jéhni jnáhan jíin espada, suni jíin espada cuu maá i. Núu súcuan te ñayuu maá Yaā Dios chí jíni ñúhún cuandeyí ni i jíin jñúndóho te ma jécuiñī i candíje i jñūhun cúndáhú ni yā i.

¹¹Yūcuán na te ni jito ri ñga quitì xéén jeē ní cane chíjī ñuhun. Te íyó úu ndiquí tì jeē cáa nájñūhun ndiquí lánchí. Te nájñūhun tachí coō cáhnu, súcuan tachí cahán tī.

¹²Te nájñūhun ndácu quitì xéén xihna ñúhún jniñu, suni súcuan ndácu quitì uū ún jniñu, ñin tì nuū quitì xihna ñúhún. Te quitì uū sáha tì jeē chiñúhún tāca ñayuu ní cáhnu ñayīvi nuū quitì xihna ñúhún, quitì ní tújī jeē jé yajni cuu tī te ni nduvāha tī. ¹³Te quitì uū suni sáha tācá jniñu jéhnu jeē nahán nāa ni yō jíto yó. Chí ni scúun tì ñuhún ichi ándiví ní quiji ñin ñayīvi, ní cajito ñayuu. ¹⁴Te ni stahú tī ñayuu ñayīvi jíin tāca jniñu jéhnu jeē ni níhín tī poder jeē sáha tì, jíto jíinúu quitì xihna ñúhún. Te ni ndacu tì jniñu jeē na sáha ñayuu imagen quitì xihna ñúhún, quitì ní tújī jíin espada, jeē jé yajni cuu tī te ni nduvāha tī. ¹⁵Te quitì uū ni nihīn tī poder jeē chutáchí tī xijní imagen quitì xihna ñúhún, návāha cuu cahān, te cahni tāca ñayuu jeē tu cájetáhú i chíñúhún i máá.

¹⁶Te tāca ñayuu cujéhnu jíin ñayuu tu cujéhnu, tāca ñayuu cucá jíin ñayuu ndahú, tāca ñayuu sájniñu cuenta maá jíin mozo jeē ní cajeen ñayuu, ni sáha tì jeē ni jécondeé ñin jñuní ndaváha i chí jnéé i. ¹⁷Te ni ñin ñayuu ma cúu cuaan i xícó i te núu tu ndíso i jñuní jeē cúu síhví tì chí jñuní número jeē cúu síhví tī.

¹⁸Jnūhun ndíhí cúu jeē cahán rī yāhá: Tāca ñáyuu jécūhun vāha ni cuu tava i cuenta número quitī xéén un, chí número un cúu síhví iin tēe. Te número un cúu iñū ciento unī xico iñū.

Yaa jeē cájita 144,000 ñayuu

14 Yūcuán na te ni ndacoto ri, te ni jito ri jeē iin máá Yaa cúu Londe xinī yucu Sión. Te cáhiin ciento uū xico cuūn mil ñayuu jíin yá. Te jneē i ndéé síhví máá yá jíin síhví Tátá yā Yaa Dios. ²Te ni jini sōho ri jeē nāhin ndasí ichi ándiví, nájñūhun jeē jica cuehē yūte chí jēē cahán nihin taja. Te jeē nāhin un sáha nájñūhun jeē cátee cuehē ñayuu yaa jeē naní arpa. ³Te cáhiin i ichi núu mesa nuū ndácu Yaa Dios jniñū, jíin núu ndicúún jeē técu, jíin núu ndihócó cuūn tēe jéhnū cándiso jniñū. Te ni cajita i iin yaa jeé. Te ni iin ñayuu tu cúu cutūhva i yaa ún, chí máni máá ciento uū xico cuūn mil ñayuu jeē ní jnama ya i ini ñayiví. ⁴Te tāca tēe yāha cácuu jeē tu ní cásáha cuēchi jíin ñahan cásáha néé, chí tēe ndoo ánuá cácuu de. Te cándiquin de Londe ndé-ni cúu-ni nuū cuahán yā. Chí ni jnama ya de ini ñayiví, te máá de cácuu tēe jeē xíhna gā ni cacandíje nuū Yaa Dios jíin núu Yaa cúu Londe. ⁵Te tú cuiti na jnūhun stáhu cácahān de, chí tēe ndoo ánuá cácuu de, cáhiin de nuū mesa Yaa Dios.

Jnūhun jeē ní cacahān
ndinúní ndajéhé yā

⁶Yūcuán na te ni jito ri inga ndajéhé yā jeē ndáva cuahān sava

andiví. Te ndíso ya jnūhun jeē jnáma Yaa Dios ñayuu cotecu i níí cáni. Te ni nacani ya jnūhun un núu tāca ñáyuu níí cáhnu ñayiví, nuū ñáyuu tācá nación, tāca yúcūn, tācá yuhu, tācá ñuu. ⁷Te ni cahān jee ya:

Conso iyo ró núu Yaa Dios, te na cáhān rō jeē yóhoyo cújéhnū ya, chí je ni quee quiví jeē sándaā yā siquī rō ndese ni casáha ró. Te na chíñūhún ró yā, chí máá yá ni sáha andiví jíin ñayiví jíin mar jíin táca núu cáne ndute, áchí ndajéhé yā.

⁸Yūcuán na te ndíquin inga ndajéhé yā vēji, te ni cahān yā:

Je ni naa iñū teyí Babilonia. Chí ni sáha jeē ñáyuu tācá nación casíquí ndéē i Yaa Dios jeē ní castóo i ya te cándiquin i ídolo jíin táca jniñū néé, áchí ndajéhé uū.

⁹Yūcuán na te ndíquin inga ndajéhé unī vēji, te ni cahān jee ya:

Xeēn coo siquī ñayuu cáchiñūhún quitī xéén jíin imagen tī, te jéhe i jnūhun condee jnunī tī jneē i chí ndaha i. ¹⁰Chí nihin i castigo xeēn siquī cuéchi ni casáha i, chí quitī ni Yaa Dios nuū i, te tuá cone cáhnu ni yā. Te ndoho i nuū cayú ñuhūn jíin azufre, coto tācá ndajéhé Yaa Dios jíin Yaa cúu Londe. ¹¹Te ñuhmā nuū cándoho i cánda níí cáni cuiti. Te nduú ñuú tu ndétātū ñayuu cándoho ún jeē ní cachíñūhún quitī xéén jíin imagen tī, jíin jéē ni jécondee jnunī síhví tī. ¹²Jeē yúcuan ñáyuu maá Yaa Dios jeē casquícu i jniñū ndácu ya te cácaandíje vāha i Jesús, cánuú jéē cuándeyí ni i. Achí ndajéhé unī.

¹³Yūcuán na te ni jini sōho ri iin jnūhun ichi ándiví jéē ni cáhān jíin rí:

Tee ró jnúhun jeē cahán rī jín ró yáhá: Nacā jeē ndetū tāca ñayuu cáccandíje Jitoho yō jeē cájihī vijna jín ndé ní cuáhān yō. Jendaá chi ndetātú i jeē ní casáha i jniñu váha, te jniñu i un má nāā chi sáha jeē quendōo vāha i ní cáni, áchí Espíritu.

Jeē ní nastútú yá ñayuu ñayiví

¹⁴Yūcuán na te ni ndacoto ri, te ni jito ri iin vicō cuijín. Te nuū vicō un néne Yaā ní nduu tēe. Te xini yā ñúhun corona oro, te ndáhá yá iin hoz xeēn. ¹⁵Te ni quenda inga ndajéhé yā ini templo, te ni cana jee, te cáhán jín Yaā néne nuū vicō un:

Cahnde ni jín hoz ní, te nastútú ní ñayuu ñayiví. Chi je ni quee quiví jeē nastútú ní i nájnūhun táhndé trigo jeē jé ni cuaan, áchí.

¹⁶Yūcuán na te Yaā néne nuū vicō ni nastútú yá ñayuu váha ini ñayiví, nájnūhun táhndé trigo jín hoz.

¹⁷Yūcuán na te ni quenda inga ndajéhé yā ini templo jeē iyó andiví, te suni ndáhá yá iin hoz xeēn. ¹⁸Te nde nuū altar ni quenda tucu inga ndajéhé, te ndíso jniñu ya siquī ñuhūn altar. Te ni cana jee ya, te cáhán yā jín ndajéhé jeē ndahá hoz xeēn:

Cahnde rō jín hoz xeēn rō, te nastútú ró ñayuu casáha néé ini ñayiví, nájnūhun jeē cájehnde i chutū ndehē uva jeē jé ni jichi, áchí.

¹⁹Te ndajéhé un ní jehnde yā jín hoz yā, te ni nastútú yá ñayuu casáha néé ini ñayiví, nájnūhun ndútútú ndéhē uva. Te ni jnaa ya i nuū nihín i castigo xeēn Yaā Dios, nájnūhun jnaa i ndehē uva

nuū taxín. ²⁰Te ni jēhe ya castigo i yatā ñúū, te ni jica niñí i nájnūhun ndūxi uva. Te ni ndaa ni jinū cūhva jeē sucún yuhu caballo, te ni jica cuahān nde unī ciento kilómetro.

Ndihúxá ndajéhé jín ndihúxá jnūndóho jeē sándihí

15 Te ni jito ri inga jniñu jéhnu ichi ándiví jéē nāā ni yō jito yó. Chi cáhiin uxā ndajéhé yā jeē cuáha ndihúxá jnūndóho sandihí na. Te jeē jínu ndihúxá jnūndóho yáha, te jinu jeē cuáha Yaā Dios castigo xeēn siquī cuéchi.

²Te suni ni jito ri iin jeē cáa nájnūhun mar, te cáa nájnūhun vidrio jeē ndíndēe nájnūhun ñuhūn. Te yumar un cáhiin ñayuu ni cacundeyí siquī quiti xéén jín imagen tí, jín jéē tu ní cáquihin i jnuni número jeē cúu síhvi tí. Te cándāhá i yaa jeē naní arpa jeē ni jéhe Yaā Dios nuū i. ³Te cájita i yaa jeē ní tava Moisés, tēe cúu mozo Yaā Dios, jín yaa maá Yaā cúu Londe. Te súcuan cáhán yaa ún:

Yōhyo nāā ni na cájito ná ndihi jniñu jéhnu teyí jéē sáha ní, Tátā Yaā Dios, chi jniñí ní ndihi poder.

Te máni jniñu ndaā jniñu váha sáha ní, jeē cúu ní Rey nuū tācá nación.

⁴Tú ni iin i iyó jéē ma cónso iyo i nuū ní, Tátā Yaā Dios.

Te ndihi i cahān nahín i jeē yóhyo cújéhnu ní.

Chi máñuhún ni máá ní cúu Yaā ndoo Yaā ii.

Te quijicoo ñayuu tācá nación, chiñuhún i níhín, chi je ni cajini i jeē ndaā váha sáha ní táca jniñu.

Achí i cájita i.

⁵Yūcuán na te ni ndacoto ri, te ni jito ri jeē ini andiví núne cuarto iini templo nuū íne tabla yuū jeē yosó ley yā. ⁶Te ini templo un ní quendacoo ndihúxá ndajéhé jeē cándiso jniñu siquī ndihúxá jnūndóho. Te cáñuhun ya sahma fino iyó ndoo te xíñú. Te núhni cinturón oro jicā yā. ⁷Te iin jnāhan ndicúun jeē técu ni jēhe iin iin cohō oro nuū ndihúxá ndajéhé un. Te ini cohō un ñuhun chitú castigo xeēn jeē ni jēhe Yaā Dios, Yaā técu ní cáni. ⁸Te ni chitú ndí ñuhmā ini templo, te suu ni steén jeē yóhyo cújéhnu Yaā Dios jíin poder jnāi ya. Te ni iin tu ní cúu quívi ini templo, chi nde na ndíhi ndihúxá jnūndóho jeē cuáha ndihúxá ndajéhé yā.

**Siquī ndihúxá cohō jeē
ñuhun castigo**

16 Yūcuán na te ini templo ni jini sōho ri iin jnūhun cáhán jee jíin ndihúxá ndajéhé yā:

Cuangoo te cati ró siquī ñayiví ndihúxá cohō jeē ñuhun castigo xeēn jeē ni jēhe Yaā Dios, achí.

²Te cuahān ndajéhé iin, te ni jeti ya cohō yā siquī ñayiví. Te tāca ñayuu jeē ndeē jnunī quití xéén un jíin jéé cáchiñuhún imagen tī, ni canecoo ndíhyi xeēn jeē jetú ndasí.

³Te ndajéhé uū ni jeti ya cohō yā nuū mar, te ndute mar ni nduu nájnūhun niñi ndíyí. Te ni cajihí táca quití jeē ñuhun ini mar.

⁴Te ndajéhé unī ni jeti ya cohō yā ini tāca yúte jíin táca núu cáne ndute, te ni nduu niñi. ⁵Te ni jini ri jeē cahán ndajéhé jeē ndíso jniñu siquī ndúte:

Tátā Yaā Dios, maá ní cúu Yaā ndoo Yaā iī, Yaā iyó vijna, te ni iyó ní níí cáni. Te ndaā sáha ní jeē súcuan ni ndonda ní síquī cuéchi i. ⁶Chi ni casáha i jeē ní jeti niñi ñayuu ndoo ní jíin ñayuu ní canacani jnūhun ní. Te vijna chi ni sáha ní jéé cájihí i niñi, chi ñayuu casáha jniñu néé cácuu i, jeē cánuú ndoho i súcuan.

⁷Te ni jini sōho ri jeē cahán inga nde nuū altar:

Tátā Yaā Dios, maá ní cúu jeē jnāi ndíhi poder. Te jniñu váha jniñu ndaā ni sáha ní jéé ní ndonda ní síquī cuéchi i. Achí.

⁸Te ndajéhé cuūn ni jeti ya cohō yā siquī níandii, te ni jēhe Yaā Dios jnūhun jeē ndujíhni ndasí níandii návāha cayū ñayuu. ⁹Te xeēn ndasí ní cayū tāca ñayuu. Te vēsú súcuan te tu ní cánacani ni i stóo i cuéchi i, ni tu ní cácahān i jeē cújéhnu Yaā Dios. Chi sa suhva ni cacahān ndevāha i siquī yā jeē ni jēhe ya tāca castigo yāha nuū i.

¹⁰Te ndajéhé uhūn ni jeti ya cohō yā nuū mesa nuū ndácu quití xéén jniñu. Te ni cunee níí cáhnu nuū ndácu tí jniñu. Te cánacayihí ñayuu yuhu i jeē cájetū ndasí i. ¹¹Te vēsú súcuan te tu ní cánacani ni i stóo i jniñu néé casáha i. Chi sa ni cacahān ndevāha i siquī Yaā Dios andiví síquī jeē cájetū ndasí i jíin ndíhyi xeēn cándoho i.

¹²Te ndajéhé iñu ni jeti ya cohō yā siquī yúte cáhnu jeē naní Eufates. Te ni ichi ndíhi ndute yúte ún, návāha nune iin ichi jeē quíjicoo tāca rey ichi núu cáne niandii.

¹³Te ni jito ri jeē ini yuhu cohō cáhnu jíin ini yuhu quití xéén jíin

ini yuhu máá téé nácani jnūhun stáhú ní canecoo unī tachī jeē cáa nájñūhun sáhvá. ¹⁴Te tachī ún chi ndajéhé jexeén cácuu, te cásáha jniñu jéhu jeē náa ni ñayuu cájito i. Te ni quendacoo tachī un jéé nastútú táca rey ní cáhnu ñayīvi, jéé cuajnáhan de siquī Yaā Dios quivī jeē ndíji ya. Te máá yá cúu jeē jñí ndíhi poder. ¹⁵Cuni sōho jíjnáhan ró, chi sanaa ni rō te ndiji ri, nájñūhun jeē iin sanaa-ni te quíji ñacuíhná. Te nacā jeē ndetū ñayuu jeē ndito ni i, te ndito yúcún i sahma i, návāha ma cáca vichí líi i, cúu jeē tú na cuēchi coo siquī i jeē cucanu i nuū tāca ñayuu, achí yá. ¹⁶Te ni canastútú táchī un táca rey, ni candutútú iin lugar jeē yuhu hebreo naní Armagedón.

¹⁷Te ndajéhé uxā ni jeti ya cohō yā nuū tachí. Te ini templo andiví jíjn núu mesa nuū ndácu ya jniñu, ni cane iin jnūhun jeē ni cáhān jee:

Je ni jīnu, áchí.

¹⁸Yūcuán na te ni ndindéé taja, te níhin, te cáhān taja, te ni jñāa ndasí. Chi nde ní cáni jeē iyó ñayuu ñayīvi, tu ní jñāa nihin ndasí nájñūhun jeē ni jñāa ni jito ri. ¹⁹Te máá ñuu cujéhu Jerusalén, ni cusín ni nduu unī parte, te ní cáhnu ñayīvi ni naa tāca ñuu. Te ñuu teyí Babilonia, chi ni sáha nahín yá jeē ní ndutahū i castigo xeēn, chi ni quitī ndasí ni yā siquī cuéchi i. ²⁰Te ni naa tāca isla, te suni yucu tuá gā. ²¹Te ichi ándiví ní cuun ñíñí náhnu siquī ñayuu, jeé véyi nde uū xico kilo. Te ni cacahān ndevāha ñayuu siquī Yaā Dios jeé ní cuun ndasí ñíñí, chi iin jñūndóho xeēn ni cuu.

Jeē ndonda ya siquī ñuu
neé Babilonia

17 Yūcuán na te ni quiji iin jnāhan ndihúxá ndajéhé jeē ní candāhá ndihúxá cohō ún, te ni cahān yā jíjn rí:

Nehen, te na stéén rī nuū rō ndese coo castigo siquī máá ñahan jnéni jeé cúu ñuu cujéhu íne nuū iyó cuéhé ndute. ²Chi tāca rey ñayīvi nájñūhun ni casiquí ndéé de jíjn ñahan ún, cúu jeē ní castóo de Yaā Dios te cándiquín de jnūhun néé ní steén ña. Te ni sáha ña jeē ñayuu ní cáhnu ñayīvi, nájñūhun nájini i te casiquí ndéé i Yaā Dios cúu jeē ní castóo i ya te cásáha ndasí i cuéchi. Achí ndajéhé yā.

³Te ni sáha ga Espíritu Santo jeē ní jito ndijin rí, te ndajéhé yā un cuáhān yā jíjn rí nde nuū ñūhun téhé. Te ni jito ri iin ñahan, yósó ña iin quití xeén cacuéhé. Te ní cáhnu tí ndeé jnūhun néé jéé quití ni Yaā Dios sáha. Te íyó úxā xinī tī jíjn úxí ndiquí tí. ⁴Te ñahan un ñūhun ña sahma ndihí jíjn sahma cuehé, te suni ñūhun ña siquī oro jíjn yúu luu jíjn perla jeé ndeé yahu. Te ndáhá ña iin cohō oro jeé ñūhun chitú jíjn jniñu néé ndasí jíjn jniñu jnehén jéé jíca jnéni ña. ⁵Te jneé ña ndéé iin síhvi jéé cúu iin jnūhun sáhi, te suhva cáhān: Yāha cúu ñuu teyí Babilonia, jeé cúu nájñūhun náná tāca jéé cájica jnéni jíjn jéé casáha néé ndasí ini ñayīvi, áchí. ⁶Yūcuán na te ni jini rí jeé ñahan un nájini ña jeé nájñūhun ni jihi ña níñi ñayuu máá Yaā Dios jíjn níñi ñayuu ni cajihí siquī jeé ní canacani ndaā i jnūhun Jesús. Te nahán ní naa

ni rī ni jito rī ña. ⁷Yūcuán na te ni cahān ndajéhé un jíin rí:

¿Naun naá ni rō jíto ró? Na cástūhun rí nuū rō ndese cúní cahān jñūhun sāhi síquī ñahan un jíin quití xéén yosó ña, jeē iyó úxā xinī tī jíin úxī ndiquí tī. ⁸Quití xéén jeē ní jito ró, chi ni cotecu tī, te vijna chi tuá tī. Te ndenda tucu tī ini tūhnchi cúnú, te yūcuán na te quihīn tī nuū jnahnú ndetū tī. Te ñayuu cáyūcu hí cáhnu ñayíví, naa ni i coto i nuū quítí un jéé ní cotecu tī te ni jihī tī, te natecu tucu tī. Te cácuu i ñayuu jeē tu yósó síhví i nuū tútu jeē yosó síhví ñayuu cotecu ní cáni jeē ni jécósó síhví i nde quiví ni jécōo ñayíví.

⁹Tāca ñayuu jécūhun vāha ni, cuu tava i cuenta ndese cúu: Ndihúxá xinī tī cácuu nájnūhun uxā yucu nuū néne ñahan ún. ¹⁰Te ndihúxá xinī tī suni cácuu nájnūhun uxā rey. Te uhūn rey un je ni naa jeē ndácu de jniñu, te ñin de ndácu jniñu vijna, te ñnga de chi ná tu quiji de. Te núu na quíji de te jecu-ni tiempo coo de. ¹¹Te quití xéén jeē ní cotecu te tuá iyó tī vijna, máá tī cuu rey unā. Te ñin jnáhan ndihúxá rey un cúu tī. Te suni quihīn tī nuū jnahnú ndetū tī.

¹²Te ndihúxí ndiquí jeē ní jito ró cúu nájnūhun uxí rey, te ná tu ndacu de jniñu jíjnáhan de. Te máá de jíin quití xéén un, chi nihīn jniñu de cuu de rey jecu-ni tiempo. ¹³Te ndihúxí rey un chi squíjnáhan de jñūhun, te nacūaha de poder de jíin jniñu ndíso de nuū quití xéén un návāha ndacu tī jniñu. ¹⁴Te cuajnáhan de jíin Yaā cúu Londe. Te Yaā cúu Londe quende yā poder de

jíjnáhan de. Chi máá yá cúu Jitoho nuū tāca jítoho, te máá yá cúu Rey nuū tāca rey. Te ñayuu cáhiin jíin yá, chi ni nacāji Yaā Dios i te ni cana ya i, te cásquícu vāha i. Achí ndajéhé un.

¹⁵Te ni cahān gā yā:

Cuehē ndute jeē ní jito ró núu néne ñahan jíca jnéni, suu cúu ñayuu cuehē tācá ñuu, tācá yuhu, tācá nación. ¹⁶Te ndihúxí ndiquí jeē ní jito ró jéé névāha quití xéén un, suu cácuu rey jeē coto uhū de ñahan jíca jnéni un. Te sāha de jeē quendōo ndáhú ña te quendōo vichí líí ña. Te caji de cūñu ña te cahmu de ña nuū ñuhún. ¹⁷Chi Yaā Dios scánda ya ini de jeē na sāha de jniñu cúní yā. Te squíjnáhan de jñūhun jeē nacūaha de jniñu ndíso de nuū quítí xéén un, ndacu tī jniñu nde na squícu tāca jnúhun ni cahān Yaā Dios. ¹⁸Te ñahan jeē ní jito ró cúu máá ñuu teyí jéé cujéhnu nuū tāca rey ñayíví. Achí ndajéhé un.

Siquí jeē naa ñuu Babilonia

18 Yūcuán na te ni jito rí jeē ní cuun ñnga ndajéhé yā ni quiji ichi ándiví. Te cújéhnu ndasí yá. Te jeē ndíndēe yá te ni ndíndēe núu ñayíví. ²Te ni cana jee ya:

Je ni naa ii ñuu teyí Babilonia. Te ni nduu vehe tāca táchi, nuū ñūhun ndínuu tachí neé, jíin tāca téji, quití quíni jeē tu újnáhan ni yō. ³Chi ñuu un cúu nájnūhun ñin ñahan ndevāha, te ni sāha ña jeē ñayuu tācá nación, nájnūhun nájini i te cásiquí ndēe i Yaā Dios, cúu jeē ní castóo i ya te casáha ndasí i cuéchi. Te tāca rey ñayíví, nájnūhun ni casíquí ndēe de jíin ñahan ún jeē

ní cajetáhú de jnūhun néé ní steén ña. Te ñayuu ní ñáyivi jéé cájeen cáxicó, ní cacucúca i jíin cuéhē jeneé jeē ní nevāha ña.

⁴Yūcuán na te ni jini sōho ri inga jnūhun jeē ni cáhān ichi ándiví:

Máá ró jeē cácuu ró ñáyuu maá rí, quendacoo ró ini ñuu jíñā, návāha ma quívi nduu rō jíin táca cuéchi jeē sáha ña, te návāha ma ndóho ró jnūndóho xeēn jeē ndoho ña.

⁵Chi ni cayā cuehē ndasí cuéchi ña, nájnūhun iin montón cáhnu ndasí jéé ní cusúcún ndé ándiví. Te vijna te nduxeēn Yaā Dios siquī cuéchi ña. ⁶Stóho ró ña nájnūhun ni sáha ña jeē ní ndoho sava ga ñayuu. Te nachunaa rō nuū ña doble jnūndóho jeē ni jéhe ña nuū inga ñayuu. Te sáha ró jeē nandicó cóo doble siquī ña vēsú jeē ni sáha ña siquī inga ñayuu. ⁷Te yōhoyo ni satéyí ña máá ña, te cúca ndasí ní cotecu ña. Te suni jíin cúhva yúcuan nacuāha ró jéé ndóho xeēn ndasí ña. Chi jéni ni ña: Yāha néne ri ndácu ri jniñu, te tu cúu ri ñahan viuda, te ma quíji cuíti jnūndóho ndoho ri, achí ña.

⁸Jeē yúcuan cúu jeē iin quiví-ni te quíji cuehē jnūndóho siquī ña. Chi cuu ndīyí, te cucuíhyá ndasí ni ña, te coo jnamā, te cayú ña nuū ñuhún. Chi yōhoyo íyó poder maá Jítoho yō Yaā Dios, Yaā ní ndonda siquī cuéchi ña, áchí.

⁹Te tāca rey ñayivi jéé ní casíquí ndéé de jíin ña te ni cotecu cucá ndasí de jíin ña, ndahyū de te ndahyū cohó de coto de jeē cánda ñuhmā cayú ña. ¹⁰Te cuiñi jíca de chi yūhú de coto de jeē súcuan ndoho ña castigo. Te cahān de jíjnāhan de:

Nacā jeē xeēn ndóho ró, ñuu cujéhnu Babilonia, chi yá-ni ñuu teyí ní cuu ró núú. Te vijna chi iin núnúu-ni te ni quee castigo jeē náā rō, achi de jíjnāhan de.

¹¹Te tāca téé ñayivi jéé cájeen cáxicó ñuu ún, ndahyū de te ndahyū cohó de jehē. Chi tuá ndé iin cuaan ndajniñu cáxicó de. ¹²Te ndajniñu cáxicó de un cúu oro, plata, yuū luu jíin perla jeē ndeé yahu, jíin sahma fino jíin sahma seda jeē ndihí jíin jéé cuehé. Te suni táca yujnu jeē asīn jéen xicó, jíin táca ndajniñu luu jeē ni sáha jíin marfil jíin yujnu lúu jeē ndeé yahu jíin cáca cuaán jíin cáca hierro jíin yúu cuijín luu. ¹³Te suni cáxicó de canela jíin táca jíhyo asīn jíin súje cutú jíin súje uvuā jíin táca perfume jíin vino jíin aceite jíin harina fina jíin trigo. Te suni cáxicó de quití ndíso jíin lanchi jíin caballo jíin carreta, te nde ñayuu cáxicó de jeē sájniñu sáá-ni i. ¹⁴Te cahān de jíin ñuu ún:

Ni cujiyo ndíhi ndajniñu cúca jeē ní nujnahan ndasí ni rō. Te tāca jéé lúu jeē váha jeē ní cotecu cucá ró, chi ni naa ndíhi, te ma nánihin cuíti gā rō, achi de jíjnāhan de.

¹⁵Te tāca téé ni cajeen ni caxico ní cacucúca jéé siquí ndajniñu ñuu ún, chi cuiñi jíca de jeē yūhú de coto de castigo coo ñuu ún. Te ndahyū de te ndahyū cohó de. ¹⁶Te cahān de jíjnāhan de:

Nacā jeē xeēn ndóho ñuu teyí yáha. Chi ni cuu nájnūhun iin ñahan jeē ni ñūhun sahma fino, sahma ndihí jíin jéé cuehé. Te ni ñūhun ña siquī oro jíin yúu luu jíin perla jeē ndeé yahu. ¹⁷Te vijna te

iin núnúu-ni te ni naa ndihi tācá ndajniñu váha ún, achi de jíjnáhan de.

Te cuiñi jícá táca tée cáscáca barco, jíin ñayuu cuángoo nuū barco, jíin tée cásájniñu ini barco, jíin táca gá tée cásájniñu nuū mar. ¹⁸Chi coto de ñuhmā jeē cayú ñuu ún, te cana jee de jíjnáhan de:

¿Ndé íne ga ñuu teyí jéē cujéhnu nájnūhun ni íyo ñuu yáha? achi de.

¹⁹Te cosō de ticachā ñuhun xinī de jeē cácuuíhyá ni de. Te ndahyū de te ndahyū cohó de. Te cana jee de jíjnáhan de:

Nacā jeē xeēn ndóho ñuu teyí yáha. Chi jíin ndajniñu cúcá jeē ni íyo ñuu un ní cacucúca táca ñayuu cánevāha barco cájica nuū mar. Te vijna te iin núnúu-ni te ni naa ndihi-ni, achi de.

²⁰Te na cúsiñi ni tāca róhó jéē cáyucú andiví, siquī jeē ní naa ñuu ún. Te na cúsiñi ni rohó, táca tée apóstol, jíin tée canacani jnūhun Yaā Dios, jíin ñayuu maá Yaā Dios. Chi ni sáha neé ñuu un síquī rō jíjnáhan ró, te jeē yúcuan ní ndonda Yaā Dios siquī, achi de.

²¹Yūcuán na te iin ndajéhé ndíso poder, ni quihin ya iin yuū cáhnu nájnūhun iin yōso cáhnu, te ni scāne ya ini mar. Te ni cahān yā:

Nájnūhun ni naa yōso yáha, suni súcuan naa Babilonia, ñuu cujéhnu téyí. Te ma núcoo cuiti gā jeē cóto yó núu. ²²Te ni cahān yā jíin ñuu ún: Ini calle rō ma cúni sōho cuiti gā ñayuu jeē scáta i yaa arpa jíin flauta jíin trompeta. Te suni ma cóo cuiti gā ñayuu casáha tācá ndajniñu. Te suni ma cúni sōho ga i jeē nñhin tācá molino rō. ²³Te ni

iin lámpara ma sáha ga jeē cúndijin nuū rō. Te ni ma cúni sōho ga i vico jeē cácusīñi ni ñahan tēe nándāha mēhñu rō. Te ñayuu ní cajeen ni caxicó nuū rō, ni cacujéhnu ndasí i ini ñayiví. Te ni stahú rō ñayuu tācá nación jíin jniñu tasí jíin jniñu mágica. Achí ndajéhé un.

²⁴Te ñuu un ní nihin castigo xeēn, chi siquī ñuu un ndéé cuēchi jeē ní jeti niññi tāca tée ní canacani jnūhun Yaā Dios, jíin táca ñayuu maá yá, jíin táca gá ñayuu ní cajehni i nñí cáhnu ñayiví.

19 Te ná ni cuu tāca jéē yáha, te ni jini sōho ri jeē cahān jee cuehē ndasí ñayuu ini andiví:

Yōhyo cújéhnu Yaā Dios. Chi Yaā Dios maá yó cúu jeē ní jnama yóhó.

Te máa yá cujéhnu ndasí, te máa yá jnñi ndihi poder.

²Te ndaā te váha sándaā yā tācá jniñu,

chi ni ndonda ya siquī cuēchi ñuu neé cújéhnu ún.

Chi ni stívi un ñayuu niñí cáhnu ñayiví jíin jnūhun cásiquí ndéé Yaā Dios.

Te ni sáha ya jeē ní ndutahū ñuu un síquī jeē ní jehni tāca mozo yā.

Achí i jíjnáhan i.

³Te ní cacahān tucu i:

Yōhyo cújéhnu ya. Chi nñí cáni canda ñuhmā ñuu un jéē cayú, achí.

⁴Te ndihóco cuñi tēe jéhnu cándiso jniñu, jíin ndicúun jeē tēcu, ni cajecuiñi yití de, te ni cachiñúhún de Yaā Dios, Yaā néne nuū mesa ndácu jniñu. Te ni cacahān:

Amén. Súcuan na cóo. Yōhyo cújéhnu ya.

⁵Te nde nuū mesa nuū ndácu ya jniñu ni cahān iin jnūhun:

Róhó jéé cájejniñu nuū Yaā Dios, jíin róhó jéé cándiso iyo nuū yā, jeé cácujeñhu jíin jéé tu cácujeñhu, na cáhān rō jeé yóhyo vāha Yaā cúu ya.

Achí.

Vico jeé nándāha Yaā cúu Londe

⁶Te ni jini sōho ri jeé cácahān ñayuu cuehē ndasí, te ñhīn nájñūhun ñhīn cuehē yūte, te nájñūhun jeé cahān ñhīn taja. Te ni cacahān:

Yóhyo cújeñhu ya. Chi Jitoho yō Yaā Dios, Yaā jñí ndīhi poder, vijna te ndácu ñhīn ya jniñu.

⁷Te na cúsiñ ni yō, te siñ ndasí na cóo ni yō, te na cáhān yō jeé yóhyo cújeñhu ya.

Chi ni quee quivī jeé nándāha máá Yaā cúu Londe.

Te je íyó túhva ñahan nandāha jíin yá, te suu cúu ñayuu maá Yaā Dios.

⁸Te ni nihīn ña jñūhun cuhun ña sahma fino jeé ndóo ndasí te xíñú.

Achí i jíjnāhan i. Te sahma fino un cúu tācá jniñu ndaā jeé casáha ñayuu maá Yaā Dios.

⁹Te ni cahān ndajéhé yā jíin rí: Tee ró jnúhun yáha: Nacā jeé ndetū tāca ñayuu jeé ní cana ya quingoo vico nándāha Yaā cúu Londe.

Te ni cahān gā ndajéhé un jíin rí: Tāca jnúhun yáha cúu jñūhun ndaā ni cahān Yaā Dios, achí yá.

¹⁰Te ni jecuiñī yití rí nuū jehé ndajéhé un jéé chiñūhún rí yā nuú. Te ni cahān yā jíin rí:

Ma sáha ró súcuan. Chi ruhū suni mozo Yaā Dios cúu ri, nájñūhun máá ró jíin tāca hermano rō jeé cácañdije vāha jñūhun Jesús. Sa suhva nuū maá Yaā Dios chiñūhún ró. Achí yá.

Chi jñūhun siquī Jesús cúu jeé cácahān ndaā ñayuu cánacani jñūhun Yaā Dios.

Yaā yosó síquī caballo cuijín

¹¹Yūcuán na te ni jito ri jeé núne andiví. Te ni cane iin caballo cuijín, te Yaā yosó síquī tī naní yá Yaā ndaā, Yaā squícu, chi squícu ya jeé ni jéjñūhun ya. Te ndaā sándaā yā jniñu te ndaā ndóna ya siquī tāca jéneé. ¹²Te tinūu yá ndíndēe nájñūhun yáñuhūn. Te xinī yā ñūhun cuehē corona. Te yósó iin síhvi yá jeé maá-ni ya cúu jeé jiní.

¹³Te ñūhun ya iin sahma jeé ni ñúndaji nuū niñí, te naní yá Jñūhun Yaā Dios. ¹⁴Te tācá ndajéhé yā jeé iyó andiví, cáyosō caballo cuijín, cándiquīn yatā yā. Te cáñuhun sahma fino cuijín íyó ndoo. ¹⁵Te ini yuhu máá Yaā jeé yosó síquī caballo, quénda jeé cáca nájñūhun iin espada xeēn. Te espada un cúu jñūhun ya jeé stóho ya ñayuu tācá nación. Te ñhīn ndacu ya jniñu nuū i. Te sándaā yā siquī cuéchi i nájñūhun jeé jeñú siquī ndehē uva cájexīn. Te cuāha ya castigo xeēn ndoho i jeé quití ni yā siquī cuéchi i. Chi máá yá jñí ndīhi poder. ¹⁶Te sahma ya jíin síhīn ya yosó jnúhun yáha: Rey nuū tāca rey jíin Jítoho nuū tāca jítoho, achí.

¹⁷Yūcuán na te ni jito ri iin ndajéhé yā jeé iin nuū níandii. Te ni cana jee ya xinī tācá quití ndáva nuū tachí:

Ndutútú ró quijicoo ró cuxíni ró ñin vico cáhnu sáha Yaā Dios. ¹⁸Te caji rō cūñu tāca rey jíin capitán jíin tée téyí, jíin cūñu tāca caballo jíin tée ni cayosō siquī tī. Te suni caji rō cūñu tāca gá ñayuu, cúu ñayuu casájniñu cuenta maá jíin mozo jeē ní cajeen ñayuu, cúu ñayuu cácujeñhu jíin ñayuu tu cácujeñhu. Achí ndajéhé yā.

¹⁹Yūcuán na te ni jito ri maá quiti xéen jíin táca rey ñayiví jíin cuéhē soldado de. Te ni candutútú de jeē cuajnáhan de jíin máa Yaā yosó caballo jíin táca ndajéhé yā. ²⁰Te ni jniñi ya quiti xéen cuahān tī preso jíin tée ni nacani jñūhun stáhú jeē ni sáha tāca jniñu jéñhu jeē ní jito jínūu quiti xéen. Chi jíin jniñu jéñhu un cúu jeē ni stáhú de tāca ñayuu jeē ní cajéhe jñūhun condiso jñunī quiti xéen, jíin jéē ní cachiñúhún imagen tī. Te quiti xéen un jíin tée ni nacani jñūhun stáhú un, cátecu ndindúú te ni scáne ya nuū laguna ñuhūn jeē cayú jíin azufre. ²¹Te jíin espada jeē cáne yuhu Yaā yosó caballo ni cajihí tāca soldado quiti xéen un. Te tāca quiti ndáva nuū tachí ni candutú chíji tī ni cayeji tī cūñu de jíjnáhan de.

Siquī mil cuiyā

20 Te ni jito ri jeē ní cuun ñin ndajéhé yā ichi ándiví. Te ndáhá yá ndacáa jeē núne tūhnchi cúnú ndasí. Te suni ndáhá yá ñin cadena cáhnu. ²Te ni jniñi ya maá cóo cáhnu jeē iyó ndé jenahán ndasí, te nání tī jexeén jíin Satanás. Te ni jihni yā jeē conuhni mil cuiyā. ³Te ni scáne ya ini tūhnchi cúnú ndasí. Te ni jesi vāha ya, te ni

sácutú yá yuyáú, návāha ma stahú gá un ñayuu tāca nación, chi nde na jínu mil cuiyā. Te jeē yáha mil cuiyā ún, yūcuán na te cánuú jéē ndají caca cuu jecu na tiempo.

⁴Te ni jito ri tāca mesa nuū ndácu jniñu, te yūcuan cáyūcu táca ñayuu jeē ní canihin jniñu i sándaā i jniñu. Te suni ni jito ri anuá tāca ñayuu jeē ní cajehnde xinī i siquī jeē ní canacani i jñūhun Jesús jíin jñūhun Yaā Dios. Te tu ní cáchiñúhún i quiti xéen jíin imagen tī, ni tu ní cájéhe i jñūhun jeē cóndee jñunī tī jneē i chí ndaha i. Te ni jito ri jeē ní natecu i te ni candacu i jniñu jíin Cristo mil cuiyā. ⁵Yāha cúu ndīyí jeē nátecu xīhna gā. Te tāca gá ndīyí, tu ní cánatecu i, chi nde jeē jínu mil cuiyā. ⁶Te nacā jeē ndetū tāca ñayuu ndoo ánuá jeē nátecu xīhna gā. Chi ma cúu cuiti i vuelta uū. Te cuu i sutū nuū Yaā Dios jíin núu Cristo, te ndacu i jniñu jíin yá mil cuiyā.

⁷Te jeē jínu mil cuiyā ún, te ndají Satanás te quenda nuū yíndihyū.

⁸Te stáhú tucu ñayuu tāca nación ní cáhnu ñayiví. Te stáhú ñayuu ñuu Gog jíin Magog. Te sáha jeē ndutútú táca soldado ñuu un jéē cuajnáhan de. Te coo cuéhē ndasí de nájñūhun ñití yumar. ⁹Te cuité núu de quingoo de níí cáhnu ñayiví. Te cuicó ndúu de ñuu nuū cáyūcu ñayuu maá Yaā Dios, ñuu jeē maní yā jíin. Te Yaā Dios chi scúun ya ñuhūn ichi ándiví, te cayū ndihí de. ¹⁰Te jexeén jeē ni stáhú táca ñayuu ún, chi scáne ya quihin nuū laguna ñuhūn jeē cayú jíin azufre. Te yūcuán chi xīhna gā ni scáne ya quiti xéen jíin tée ni nacani jñūhun

stáhú. Te yūcuán ndoho nduú ñuú ní cáni cuiti.

Jeē sándaā yā jniñu nuū mesa cuijín

¹¹Yūcuán na te ni jito ri iin mesa cuijín cáhnu, te néne máá Yaā ndácu jniñu. Te ñayivi jíin andiví ni ndoñuhún cuáhān jeē ní jito ya nuū, chi tuá ni cúu quendōo nuū yā. ¹²Te ni jito ri tāca ndíyí, jeē ní cujéhnú jíin jéé tu ní cujéhnú, cáhiin nuū Yaā Dios. Te ni sáha ya jeē núne tāca libro, te suni ni nune inga libro jeē yosó síhvi ñáyuu cotecu ní cáni. Te ni sándaā yā siquī tāca ndíyí ún, núu ndese jniñu ni casáha i jíin ndese yósó núu tāca libro un. ¹³Te tāca ndíyí jeē ní cajihī nuū mar, ni nanecoo. Te suni ni nanecoo tāca ndíyí jeē ní cajihī i, jeē íne i máá lugar nuū cáyūcu ánuá ndíyí. Te ni sándaā yā siquī, núu ndese ni casáha iin iin i. ¹⁴Yūcuán na te cuehyī jéhní ñáyuu jíin lugar nuū cáyūcu ánuá ndíyí, ni snáā yā ni scáne ya cuango nuū laguna ñuhūn. Te jeē ndóho ñáyuu nuū laguna ñuhūn, yūcuán cúu jeē cúu i vuelta uū. ¹⁵Te yūcuán ní scáne ya tāca ñáyuu ni casáha jniñu néé jéé tu yósó síhvi i nuū libro jeē yosó síhvi ñáyuu cotecu ní cáni.

Andiví jéé jíin ñáyivi jéé

21 Yūcuán na te ni jito ri andiví jéé jíin ñáyivi jéé. Chi andiví jíin ñáyivi xihna ñuhún ni naa. Te suni tuá mar. ²Te ruhū Juan, ni jito ri ñuu ii jeē cúu Jerusalén jeé. Te ñuu un ní cuun vēji ichi ándiví núu néne Yaā Dios. Te ñuu ún luu cáa nájñuhun iin ñahan jeē ni sātūhva ña ni cucutú

ña jeē nándāha ña jíin yii ña. ³Te ni jini sōho ri iin jñuhun jeē ni cáhān jee ichi ándiví:

Condēhé, chi vijna te ndéé Yaā Dios mēhñu ñáyuu. Te condee yā jíin i jíjnāhan i, te cuu i ñáyuu máá yá. Te máá yá condee yā jíin i jeē cúu ya Yaā Dios i. ⁴Te nacuaa yā ndute tñnúú i jíjnāhan i. Te ma cúu gā ñáyuu, ni ma ndahyú gā i, ni ma cucuíhyá gā ni i, ni ma jetú gā i. Chi je ni yāha tāca jnúndóho jeē ni íyo, áchí.

⁵Yūcuán na te ni cahān maá Yaā néne nuū mesa:

Condēhé, chi nasáha jeé rí tāca jéé iyó, áchí yá.

Te suni ni cahān yā:

Tee ró jnúhun yáha. Chi tāca jnúhun yáha cúu jñuhun jeē jiní ndije ró jéé ndaā cúu.

⁶Te ni cahān gā yā:

Je ni jinu. Máá rí cúu nájñuhun letra A xihna ñuhún jíin letra Z jeé sándihí na, chi máá rí ni squejéé ndihí te máá rí sínu. Te tāca ñáyuu cájichí, súcuán-ni cuāha ri coho i ndute cáne jeē cótecu i ní cáni.

⁷Tāca ñáyuu jeē cúndeyí síquī jéneé, nihin i ndihí jeē yáha cuu tahū i. Te cuu ri Yaā Dios i, te cuu i sēhe ri. ⁸Te tāca ñáyuu jeē cáyūhú ndoho siquī jnúhun ri, jíin ñáyuu tu cácandíje, jíin ñáyuu casáha jniñu néé, jíin ñáyuu cájehni ndíyí, jíin ñáyuu cájica jnéni, jíin ñáyuu casáha tásí, jíin ñáyuu cáchiñuhún ídolo, jíin tāca ñáyuu castáhú, ñáyuu ún chi quívicoo i laguna ñuhūn jeē cayú jíin azufre. Te yūcuán cúu jeē cúu i vuelta uū.

Jerusalén jeé

⁹Yūcuán na te ni quiji iin jnáhan ndihúxá ndajéhé jeé ní candāhá

ndihúxá cohō jeē ni ñúhun chitú ndihúxá jnūndóho sandihí. Te ni cahān yā jíin rí:

Nehen, te na stéén rī nuū rō ñahan jeē nándāha ña cuu ña ñasihí Yaā cúu Londe, áchí yá.

¹⁰Te ni sáha ga Espíritu Santo jeē ní jito ndijin rī, te ndajéhé un ní jeca ya ruhū cuahān yā jíin rí xinī ñin yucu cáhnu súcún. Te ni steén yā nuū rī maá ñuu ñi cujéhnu jeē cúu Jerusalén, te ni cuun vēji nde andiví núu néne Yaā Dios. ¹¹Te ndíndéé ndasí ñuu un nájnūhun ndíndéé Yaā Dios. Te xíñú nájnūhun xíñú ñin yuū luu jeē ndeé yahu ndasí, nájnūhun yuū cuijín jeē quiyi nájnūhun vidrio. ¹²Te yuhu ñúu un ní jicó ndúu ñin jeē cáhnu súcún ndíhyú ñuu ún. Te íyó úxi uū yehyí. Te tāca yéhyí un ñin ñin ndajéhé yā. Te tāca yéhyí un yósó síhví ndihúxí uū yucūn Israel. ¹³Te lado nuū cáne niāndii iyó únī yehyí. Te lado norte suni íyó únī yehyí. Te lado sur suni íyó únī yehyí. Te lado nuū queé niāndii suni íyó únī yehyí. ¹⁴Te íyó úxi uū yuū náhnu jeē cúu cimientu maá jéē ndihyú ñuu ún. Te tāca yúu un yósó síhví ndihúxí uū apóstol maá Yaā cúu Londe.

¹⁵Te ndajéhé jeē ni cáhān jíin rí, ndáhá yá ñin yujnu oro jeē chícuaaha yá ñuu un jíin tāca yéhyí jíin maá jéē ndihyú ñuu ún. ¹⁶Te ñuu ún chi ñin cūhva-ni cúu ndicúún lado. Chi jeē cáni jíin jéē jité, ñnuú-ni cúu. Te ndajéhé un ní chicuāha yá ñuu un jíin yujnu ún. Te née uū mil uū ciento kilómetro jeē ñin ñin lado. Te ñnuú-ni cūhva jeē cáni, jeē súcún, jíin jéē jité. ¹⁷Te suni ni chicuāha yá maá jéē ndihyú ñuu ún, te née

unī xico cuūn metro jeē súcún. Te yūcuan cúu cūhva jejníñu ñayuu, jeē suni jéjníñu ndajéhé un.

¹⁸Te maá jéē ndihyú ñuu un ní cuvāha jíin yúu cuijín quiyi. Te ñuu ún chi maá nene oro cúu, te cáa nájnūhun vidrio quiyi. ¹⁹Te tāca yúu jeē cúu cimientu maá jéē ndihyú ñuu ún, ní cucutú jíin ndínuu yuū luu jeē ndeé yahu. Yuū ñin cúu yuū cuijín quiyi. Te jeē uú cúu yuū ndeé ndí. Te jeē uní cúu yuū pinto. Te jeē cuún cúu yuū cuí ndí. ²⁰Te jeē uhún cúu yuū pinto jeē ñúhun raya. Te jeē ñúu cúu yuū cuehé pinto. Te jeē uxá cúu yuū cuaán quiyi. Te jeē uná cúu yuū cuí ndeé. Te jeē ñin cúu yuū cuaán ndí. Te jeē uxí cúu yuū cuí cuijín. Te jeē uxí ñin cúu yuū cuehé cuaán. Te jeē uxí uū cúu yuū ndihí ndí. ²¹Te ndihúxí uū yehyí un cácuu uxí uū perla jeē ndeé yahu. Te ñin ñin yéhyí cúu ñin ñin perla. Te maá nene oro cúu calle cáhnu ñuu ún, te quiyi nájnūhun vidrio.

²²Te tú na templo ni jito ri ini ñuu ún, chi ní cáhnu ñuu un ndeé maá Jítoho yō, Yaā jñí ndihí poder, jíin Yaā cúu Londe. ²³Te ñuu ún tu jíin ñúhún cundijin jíin luz niāndii jíin yōō. Chi jeē ndíndéé maá Yaā Dios cúu jeē cundijin ñuu ún. Te luz ñuu un cúu maá Yaā cúu Londe. ²⁴Te ñayuu tāca nación ñayiví jéē ní jnama ya, caca i jeē cundijin luz ñuu un núu i. Te tāca rey ñayiví quijicoo de ñuu ún, quindecas de tāca ndajñíñu jeē ndeé yahu jíin jéē cujéhnu de sáha. ²⁵Te tāca yéhyí ñuu ún ma cóndihyú cuítí nduú, chi tú na jecuāa coo. ²⁶Te ini ñuu ún quijicoo ñayuu tāca nación,

quindeca i tǎcǎ ndajníñu jeē ndeé yahu jíín jéé cujéhnú i sáha. ²⁷Te ma quívicoo cuiti ni ñin jeē jnehén. Ni ma quívicoo ñayuu casáha jniñu néé jíín jéé castáhú. Chi quívicoo máni máá ñayuu jeē yosó síhví i nuū libro jeē yosó síhví ñayuu cotecu níí cáni, jeē névāha Yaā cúu Londe.

22 Yūcuán na te ndajéhé yā ni steén yā nuū rí ñin yūte íyó ndoo. Te ndute un sáha jeē cótecu yō níí cáni. Te xíñú nájñuhun vidrio, te cáne nuū mesa nuū ndácu Yaā Dios jniñu jíín Yaā cúu Londe. ²Te jíca yūte ún sava mēññu calle cáhnu ñuu ún. Te ndíndúú lado yuyūte un yíhi yujnu jeē cótecu yō níí cáni sáha. Te yujnu un jéhe ndehē uxí uū jínu jeē ñin cuiyā, chi tǎca yóō cúun ndehē. Te ndaha yúcu i cúu tajná jeē ndúvāha ñayuu tǎcǎ nación. ³Te tǎcǎ-ni jeē ni cahān yā jeē násūu jéé váha cúu, ma cóo ini ñuu ún. Te ini ñuu ún cuiñi máá mesa nuū ndácu Yaā Dios jniñu jíín Yaā cúu Londe. Te ñayuu cáncandije jeē cácuu i mozo yā, chiñúhún i ya. ⁴Te coto i nuū yā, te condee síhví yá jneē i. ⁵Te ma cóo ga jecuáá ñuu ún. Te ñayuu cáyūcu yúcuu tuá jíni ñúhún i jeē cúndijin lámpara nuū i, ni jeē cúndijin niāndii. Chi jeē ndíndēe máá Jítoho yō Yaā Dios cúu jeē cúndijin nuū i. Te ndacu i jniñu níí cáni cuiti.

Jeē cuácuyajni ndiji Cristo

⁶Yūcuán na te ni cahān ndajéhé un jíín rí:

Tǎca jnúhun yáha cúu jnúhun jeē jini ndije ró jéé ndaā cúu. Te Jítoho yō Yaā Dios, máá yá sáha jíín tée

cánacani jnúhun ya jeē jíín Espíritu yā cánacani de. Te suu máá yá ni tají yá ndajéhé yā návāha steén nuū ñayuu cácuu mozo yā tǎcǎ jniñu jeē yachí coo.

⁷Ndiji yachí rí, achí yá.

Te nacā jeē ndetū ñayuu chusóhó jnúhun Yaā Dios jeē yosó núu tútu yáha.

⁸Te ruhū Juan, ni jini sōho ri tǎca jnúhun yáha, te ni jito ri tǎcǎ jniñu yáha. Te ná ni jini sōho ri ni jito ri, yūcuán na te ni jecuiñi yítí rí nuū jehé maá ndajéhé jeē ni steén tǎcǎ jniñu yáha núu rí, jeē chiñúhún rí yā nuú. ⁹Te ni cahān ndajéhé un jíín rí:

Ma sáha ró súcuu. Chi ruhū suni mozo Yaā Dios cúu ri, nájñuhun máá ró jíín tǎca hermano rō jeē cánacani jnúhun ya, jíín ndíhi ñayuu cájetáhú jnúhun yósó nuū tútu yáha. Sa suhva nuū maá Yaā Dios chiñúhún ró. Achí yá.

¹⁰Te ni cahān gā ndajéhé un jíín rí:

Ma chísaahi ró tǎca jnúhun Yaā Dios jeē yosó núu tútu yáha, chi je cuacuyajni tiempo jeē cúndaā ndíhi. ¹¹Te ñayuu casáha jniñu néé, na sáha ga máá i jniñu néé. Te ñayuu jnehén ánuá, na quéndōo máá i súcuu. Te sa ñayuu casáha jniñu ndaā, na sáha ga i jniñu ndaā. Te ñayuu cáhiyo ndoo ánuá, na cáca ndoo ga i súcuu. Achí ndajéhé un.

¹²Jendaá jeē ndiji yachí rí, achí Jesús. Te quiji ri jíín tǎhū cuāha ri nuū ñin ñin ñayuu, núu ndese jniñu ni casáha i. ¹³Máá rí cúu nájñuhun letra A xihna ñúhún jíín letra Z jeē sándíhí na, chi íyó rí nde xihna ñúhún te coo ri níí cáni.

¹⁴Nacā jeē ndetū ñayuu jeē jéhe i jnūhun ndundoo ánuá i nájñūhun ndúndoo sahma. Chi cuu caji i ndehē yujnu jeē sáha jeē cótecu i níí cáni, te cuu quívicoo i yéhyí ñuu ií ún. ¹⁵Te ichi fuera ñuu ún cuiñi ñayuu tu cácanđíje, jíin ñayuu casáha tásí, jíin ñayuu cájica jnéni, jíin ñayuu cájehni ndīyi, jíin ñayuu cáchiñúhún ídolo, jíin ñayuu cácusíi ni stahú jnáhan.

¹⁶Máá rúhū Jesús, ni tají rí ndajéhe rí návāha castūhun yá tāca jnúhun yáha nuū tāca grupo ñayuu cácanđíje. Te máá rí ni sáha jeē ni íyo rey David, te ni quiji ri nuū yucún David. Te cúu ri nájñūhun lucero ndíndēe cáne cúndijin. Achí yá.

¹⁷Te máá Espíritu Santo jíin máá ñahan jeē nándāha jíin Yaā cúu Londe, cácahān:

Nehen, quívicoo ró ndaha ya, achí.

Te tāca ñayuu jeē jíini sōho, suni na cáhān i:

Nehen, quívicoo ró ndaha ya.

Te tāca ñayuu cájichí jeē cácuni i coho i, na quívicoo i ndaha ya, te súcuan-ni na cóho i ndute jeē cótecu i níí cáni sáha.

¹⁸Te tāca ñayuu jíini sōho jnūhun Yaā Dios jeē yosó núu tútu yáha, cáhān níhin ri jíin i: Núu ndé ñayuu chisóo i nuū jnúhun cáhān tutu yáha, te Yaā Dios chisóo yá jnūndóho cáhān tutu yáha, ndoho i. ¹⁹Te núu ndé ñayuu quende i jecu jnūhun cáhān tutu yáha, te Yaā Dios quende yā tahū i jeē yosó núu libro jeē yosó síhví ñayuu cotecu níí cáni, te ma nihín i tahū i ini ñuu ií ún. Te tutu yáha cúu jeē cahán síquī tācá un.

²⁰Te Yaā jeē ni cáhān tāca jnúhun yáha, suhva cáhān yā:

Jendaá jeē ndíji yachí rí, achí yá.

Amén. Súcuan na cóo. Jítoho ná Jesús, jícán tahū na jéē ndíji yachí ní.

²¹Te ñúhun ni rí jeē Jítoho yō Jesucristo na sáha ga yā jeē váha róhó jíjñahan ró. Amén.